


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'
New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

Salmos	1
San Mateo	124
San Marcos	182
San Lucas	218
San Juan	278
Hechos	322
Romanos	376
1 Corintios	399
2 Corintios	421
Gálatas	435
Efesios	443
Filipenses	451
Colosenses	456
1 Tesalonicenses	462
2 Tesalonicenses	467
1 Timoteo	470
2 Timoteo	477
Tito	482
Filemón	485
Hebreos	487
Santiago	504
1 Pedro	510
2 Pedro	516
1 Juan	520
2 Juan	525
3 Juan	526
Judas	527
Apocalipsis	529

YUGU' SALMO

1

- ¹ Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxön nupa tun dul-la', en biti' runë' tsözxön le tun nupa ta'zí' quidza' Dios.
- ² Le raza ládxë'ë nácagaca xibá naguixjë' Xanru', en ca nácagaca xibá na' rëla, en te dza rulaba ládxë'ë.
- ³ Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en biti' ca' rizóa gubá'ayisö. Yúgu'të le runë' ta'rúaj dxi'a.
- ⁴ Biti' raca caní quégaca nupa tuá' dö'. Nácagaca ca bëbu zxe café ruá' le bö'.
- ⁵ Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.
- ⁶ Rapa chi'ë Xanru' Dios nōza ga ta'dë' bönni' tsahui' na', però uniti tsaz nu ridá gapa ta'dá nupa tuá' dö'.

2

- ¹ ¿Bizx que tu'tsatsa bönachi yugu' yödzö en tu'pá'a nítisö le ilúngaca?
- ² Bönni' ta'nná bë'ë luyú ta'dá'baguë'ë Dios. Tun tuz xtídza'gaca nupa dë lu ná'agaca para ila'dá'baga' Xanru', en Nu na' nabö cazë' para inná bë'ë,
- ³ ta'nná: "Uzxuzxaj uquínnajru' le ta'nná bé'enë' rë'u, en chú'unaru' yugu' le tu'zenë' bach rë'u."
- ⁴ Dios na' zoë' yehua' yubá uzxídxisë'. Xanru' Dios utitaj cazë' léguequi.
- ⁵ Ní'irö lu yöl-la' rilé queë' güi'ilenë' léguequi didza', en lu yöl-la' ridzá'a queë' uzenë' bach léguequi.
- ⁶ Innë': "Nuzóa caza' bönni' nabö caza' xilatjë' ga inná bë'ë. Inná bë'ë lu Guí'a Sión, le naca guí'a lá'ayi quia'."
- ⁷ Quíxjöi'ida' libí'ili' didza' nuzóë' tsaz Dios. Xanru' Dios gudxi cazë' neda': "Li' nacu' Zxí'ina'. Na'a dza nuzóa caza' Li'.
- ⁸ Gunábini neda', ate' guna' ga ilequi quiu' yugu' yödzö. Guequi ca' quiu' idútë yödzölió.
- ⁹ Quitsju' léguequi len tu xiyaga guíë. Uzxuzxju' léguequi ca run nu rilá'a tu zxiga' yö'öna."
- ¹⁰ Que lë ni na', libí'ili' na' rinná bë'ëli', guli'tséajni'i. Guli'sedi cuinli', núlöli' ruchi'a rusöröli' le raca luyú.
- ¹¹ Lu yöl-la' ba'a ladxi' queëli' guli'gún xichinë' Xanru'. Lu yöl-la' rixizi queëli' buli'sí' xibë'.
- ¹² Guli'gún bal Zxí'inë' Dios para cabí ilétenë', en para cabí udxí queëli' la' nōza. La' ilentë yöl-la' rilé queë'.
¡Bica' ba yúgu'të nupa tu'zxöni ladxi' Lë'!

3

1 Xan, chinayángacada' nupa ta'lé neda'.

Zián nupa ta'dá'baga' neda'.

2 Zián nupa ta'nné quia', ta'nná:

“Biti' usölé' Dios lè'.”

3 Pero Li', Xan, run chí'ítica'su' neda'.

Nacu' yöl-la' ba quia', en Nu rutipa neda'.

4 Bè'a zidzaj didza', bulidza'-nè' Xanru',
ate' Lè' biyönnè' chí'a ga na' zoè' lataj lá'ayi queë'.

5 Neda' rata', en rasia',

ate' rubana', tu' nazöntica'së' Xanru' Dios neda'.

6 Biti' gádxida' gayuá' gayuá' bönachi,

nupa na' nagú'ugaca neda' lè'ajlö.

7 ¡Guyasa, Xan! ¡Busölä neda', Dios quia'!

Budxía huè' xága'gaca nupa tu'dí'i neda',

en buquínnajda' nupa nácagaca xihui'.

8 Xan, rusölá cazu' bönachi quiu'.

Ben ga gaca dxi'a quégaca bönachi quiu'.

¡Ca' gaca!

4

1 Bubí'i didza' cate' rulidza' Li', Dios.

Nacu' Nu ruchi'a rusörö le raca quia'.

Cate' gurö'a böniga, bida cazu' Li' ga zoa', en gúcalenu' neda'.

Ruhéchi' ladxi' neda', en ruzé nagu' le rinábida' Li'.

2 Rnnè' Dios: “Libí'ili', bönachi, ¿gáca'xte ulidza dí'tajli' neda'?

¿Gáca'xte caz idxi'ili' le cabí nazaca', en güi'i ládxi'li' le cabí naca?”

3 Guli'tsöjné nabö cazë' Xanru' nu radxi Lè',

ate' riyönnè' neda' cate' rulidza'-nè'.

4 Guli'gadxi Lè', en bíti'rö gunli' dul-la'.

Guli'sá' ladxi' ca naca lè ni cate' dèli' ga ráta'li', en guli'sóa dxisö.

5 Guli'cú'u lahuè' Xanru' le naca dxi'a,

en buli'zxöni ladxi' Lè'.

6 Zián nupa ta'nná: “¿Nuzxi caz gun ga gaca dxi'a queëru'?”

Lu yöl-la' dxi'i ladxi' quiu' buyú netu', Xan.

7 Runu' ga rudzéjade'eröda'

ca tu'dzeja nupa tu'zí' xibé xzoa' za guizxi yu, en xisi lubá uva.

8 Cate' rata', la' rásitia' lu yöl-la' riböza dxi ladxi' quia',

tu' run cazu' Li', Xan, ga riböza' dxi'a tsáhui'do'.

5

1 Ruzé nagu' didza' ruá'a, Xan.

Buyú ca rinnèda' ládxa'a lu yöl-la' ruhui'ini quia'.

2 Dios quia', Nu rinná be'e neda', ruzé nagu' cate' rinábida' Li'

gácalenu' neda', na' güi'ilena' Li' didza'.

3 Yugu' zila yönnu' chí'a.

Zílado' idxina' lo', en cöza' didza' ubi'u.

4 Nacu' Li' Dios biti' raza ládxi'u le cabí naca,

en biti' ru'u lataj ibiga' ga zu' nu ruá' dö'.

- 5 Biti' ru'u lataj nupa tun ba rahui ila'dxín lo',
en biti' rilé'enu' dxi'a nupa nácagaca xihui'.
- 6 Rusunítii' dërö nupa ta'zì' ye'e luzě'eguequi,
en biti' rilé'enu' dxi'a nupa tuti bönachi, en ta'zì' yě'.
- 7 Gaca tsu'a neda' lu yu'u lidxu', tu' nadxí'ide'enu' neda'.
Lu yöl-la' ba'a ladxi' quia' tsu'a ga naca yudo' lá'ayi quiu', en tseaj ládxa'a Li'.
- 8 Tu' nacuá' zían nupa ta'lé neda', buluí'i neda' le naca dxi'a rě'ënu' guna', Xan.
Busëdi neda' para gaca guna' ca rě'ënu' Li'.
- 9 Biti' gaca nu tseajlé' didza' tuí'i nupa na' ta'lé neda'.
Nácagaca xihui' icja ládxi'do'guequi.
Naca ruá'agaca ca tu yeru ba nayalaj,
en lu yöl-la' rizi' yě' quéguequi tuí'i yulaj didza'.
- 10 Ben léguequi xigua', Dios.
Ben ga biti' udxín xtídza'guequi.
Gurú'una léguequi tu' túntica'sö dul-la',
en tu' ta'dá'baga' xtídz'u.
- 11 Ulu'dzeja nupa tu'zxöni ladxi' Li'.
Lu yöl-la' rudzeja quéguequi gúl-lagaca quiu' tu' rácalenu' léguequi.
Tu'zì' xibó' nupa nadxí'igaca Li'.
- 12 Run cazu' Li' ga raca dxi'a quégaca nupa tun ca rnna xtídz'u, Xan.
Lu yöl-la' dxi'i ladxi' quiu' run chí'u léguequi.

6

- 1 Biti' uzenu' bach neda' lu yöl-la' rilé quiu', Xan.
Biti' gunu' neda' xigua' lu yöl-la' ridzá'a quiu'.
- 2 Buéchi' ladxi' neda', Xan, tu' rudú ládxa'a.
Bun neda', Xan, tu' riguí'i rizáca'a.
- 3 Rö'ö böniga idútë le naca'.
¿Gáca'xte caz gaca caní, Xan?
- 4 Gudá dusöló' neda', Xan.
Tu' nadxí'inu' neda', busölá neda' lu yöl-la' guti.
- 5 Lu lataj chul-la cuntu nu tsöjné Li'.
Cuntu nu zoa ni' nu gaca cu'u Li' yöl-la' ba.
- 6 Rudú ládxa'a tu' rinnética'sö ládxa'a.
Yugu' dzö' ribisa le ráti'da' len nisa ribödxì quia'.
Rusubisa' xcúgua' len nisa ribödxì quia'.
- 7 Rö'ö gui guió'j lahua' tu' ribödxítica'sa'.
Biti' gaca ilé'eda' tu' nözigaca nupa tu'dí'i neda'.
- 8 Guli'cuíta ga zoa', libí'ili', ruá'ali' dö',
tu' riyönnë' Xanru' ribödxì neda'.
- 9 Ruzě' nague' le rulidza', ráta'yua' lahuë',
en rubi'ë didza' cate' bi rinábida' Lë'.
- 10 Ulu'tuí'i nupa tu'dí'i neda', en ila'bö' böniga.
Lu yöl-la' rutuí'i quéguequi ulu'biga' ga zoa'.

7

- 1 Ruzxöni ládxa'a Li', gácalenu' neda', Xana' Dios.
Busölá neda' lu ná'agaca nupa ta'bía no neda', en gúcalen neda'
- 2 para cabí soa nu cuéaj neda' ca runba' bédxi guixi',
en para cabí usuniti neda' ga cuntu nu zoa gácalen neda'.
- 3 Xana' Dios, channö caní nuna':

Channö nabága'a xiguia',

⁴ o channö bubí'a dö' que nu gúcalen neda',

o channö bí'a dö' que nu bití' bi ben quia' lu bití' rilé'e neda' dxi'a,

⁵ bë' lataj soa regu' neda' nu na' bití' rilé'e neda' dxi'a, en ucul-la neda'.

Bë' lataj nu na' quin neda' lu yu,

en ucá'ana neda' cá'asö.

⁶ Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusörö le raca quia'.

⁷ Ben ga ulu'dubi quiu' yúgu'të bönachi,

en gunná be'e léguequi ga ni' zu' xitsá'tërö.

⁸ Ruchi'a rusöröu' quéguequi yúgu'të bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

⁹ Ben ga udxí que le xihuí' tun nupa tuá' dö',

pero buzóa tsutsu nupa tun le naca dxi'a,

tu' nacu' Li' idú tsahui', Dios, en ruchi'a rusöröu'

le ta'zá' ládxi'gaca bönachi, en le ta'guínnaj ícjaguequi.

¹⁰ Naca cazë' Dios Nu run chí'i neda'.

Rusölë' nupa nácgaca idú ladxi'.

¹¹ Dios ruchi'a rusöröë' queëru' ca naca le naca tsahui',

en richúgutica'së' quégaca nupa tuá' dö'.

¹² Channö cabí ulu'bí'i ladxi' bönachi, utuchë' guíë tuchi' queë'.

Chinucözë' uxiti' yaga queë'.

¹³ Chinupë'ë yugu' le rudí'inë' lu gudil-la,

en nudxië' lu du uxiti' yugu' yaga túchi'do' zoa guí' láhuiguequi.

¹⁴ Buyútsöca', riguínnaj ícjë' bönni' ru'ë dö' le xihuí' gunë'.

Ruí'i ládxi'ë le naca dö', en rizí' yë'ë.

¹⁵ Nachö'önë' ga rë' tu yeru zxön ga nu ibixi,

pero lë cazë' yöjbixë' lu yeru na' guchö'önë'.

¹⁶ Budxín la' queëzë' dö' na' bi'ë,

en dxíë' huë' ca naca xiguia' nabáguë'ë.

¹⁷ Guía'-në' Xanru': "Xclenu" tu' náquië' tsahui',

en gul-la' yöl-la' ba que Lë' Xanru', Nu nayëpisëtërö.

8

¹ ¡Xana' Dios,

bica' ba Lo' idútë yödzölió!

¡Xitsá'tërö ca lúzxiba nayëpisu' Li'!

² Túl-labi' bí'ido', enca' bí'i huë'ënido' yöl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' bití' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzxiba quiu', le nunu' len xibön na'zu',

enca' beu', en yugu' bölj bení' nuzú' xilátjaguequi,

⁴ ní'irö rnniá': ¿Bizxi caz bönni', tu' röjné cazu' lë'?

¿Bizxi caz nu naca bönáchisö, tu' ruí'i ládxi'u Li' nu na'?

⁵ Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca

tu le néquini oro dxía ícjë'.

⁶ Nunu' ga rinná bé'enë' yugu' le nun cazu' Li'.

Yúgu'të nuzú' xini'ë lë'.

⁷ Nuzú' xini'ë yúgu'tëba' bö'cu' zxila', en yúgu'tëba' bëdxi,

⁸ en lës caní nunu' ca' quégacaba' biguínido',

en quégacaba' böla dzö'öba' nísado',

enca' quégacaba' yúgu'tëba' böa' ta'dödiba' lu nísado'.

⁹ ¡Xana' Dios,

bica' ba lo' idútë yödzölió!

9

¹ ¡Idú ládxa'a rigu'a Li' yöl-la' ba, Xan!

¡Usiyönda' bönachi ca naca yúgu'të yöl-la' huáca nunu'!

² ¡Udzéjada', en uzi'a xibó'!

¡Gul-la' yöl-la' ba que Lo', tu' nayëpisëtëru'!

³ ¡Ta'zxunnaj nupa ta'dá'baga' neda'!

¡Ta'dzö'ö, en tu'niti lo' Li',

⁴ tu' nubéaju' tsahui' le naca dxi'a runa'!

¡Rö'u ga rinná bë'u, en ruchi'a rusöröu' queétu' ca naca le naca tsahui'!

⁵ Bulidza zi'u yugu' yödzö, en busunítu' nupa tuá' dö'.

Tsaz busulu' lu guichi quiu' gapa gula'zúaj láguequi.

⁶ Chigula'niti nupa gula'dá'baga' Li'.

Tsaz naguínajgaca gapa gula'cuá'.

Busunítu' yugu' yödzö gapa na' gula'cuá',

ate' cuntu nu zoa röjné yugu' yödzö na'.

⁷ Zóatica'së' Xanru' Dios.

Naguixjë' tsaz lataj ga rö'ë rinná bë'ë en ruchi'a rusöröë' quégaca bönachi.

⁸ Uchi'a usöröë' quégaca bönachi yödzölió lu le naca tsahui'.

Uchi'a usöröë' quégaca yugu' yödzö lu le nácatë.

⁹ Gun chi'ë Xanru' Dios nupa nácgaca yechi'.

Gácalenë' léguequi cate' nu gun léguequi zi'.

¹⁰ Ulu'zxöni ladxi' Li' nupa núnbë'gaca Lo'.

Caní gaca, Xan, tu' cabí nusán ládxa'u nupa tu'guilaj Li'.

¹¹ Guli'gul-la yöl-la' ba queë' Xanru', zoë' ga na' nazí'i le Sión.

Buli'siyón bönachi yugu' yödzö ca naca yugu' le nunë'.

¹² Biti' ral-la ládxe'ë nupa ta'guí'i ta'zaca' cate' tu'lidza Lë',

tu' röjné léguequi Nu na' ruzí' lëbi nu ruti bönachi.

¹³ Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

¹⁴ para gaca usiyönda' bönachi yöl-la' ba quiu' Li'.

Ga naca ga nu tsaza yödzö quiu' nazí'i le Sión,

udzéjada' tu' nusóló' neda'.

¹⁵ Yöjbíxigaca bönachi yugu' yödzö lu yeru gula'chö'öna ga tsöjbíxigaca
luzé'eguequi.

Bila'röli ni'aguequi lu yöxaj bulu'cachi' para ila'zön léguequi.

¹⁶ Chinunë' Xanru' Dios ga núnbë'gaca bönachi Lë' tu' buchi'a busöröë'
quéguequi.

Lu lë na' nun nu ruá' dö' zön la' cuinsi.

¹⁷ Ila'yaza lataj chul-la nupa tuá' dö',

yúgu'të nupa na' nal-la ládxi'gaca Dios.

¹⁸ Calëga tsaz ulu'gá'ana cá'asö nupa ta'yadzaj ta'yudxi, en bití'initi tsaz yöl-la' run löza quégaca nupa nácgaca yechi'.

¹⁹ Guyasa, Xan.

Bití' gu'u lataj tsépisë nu naca bönáchisö.

Buchi'a busörö quégaca bönachi yugu' yödzö.

²⁰ Buxös léguequi, Xan.

Ben ga ulu'únbë' le nácgaca, tu' nácgacasö bönachi.

10

¹ ¿Bizx que zu' zi'tu', Xan?

¿Bizx que rucachi' lo' cate' bi raca quia'?

² Lu yöl-la' run ba rahui quégaca nupa tuá' dö' ta'bía no nupa nácgaca yechi'.

Ben ga ila'zön du yalaj na' nucachi'gaca la' léguequisö.

³ Run ba zxön cuinë' bönni' ru'ë dö' ca naca le xihui' rizë ládxi'ë. Bönni' ruhuídi'në' rulidza ditjë' luzë'ë, en ruzóë' Dios tsölá'alö.

⁴ Lu yöl-la' run ba zxön cuinë' bönni' huía' dö' bití' ru'í ládxi'ë Dios.

Rizá'asö ládxi'ë, rnnë': Bití' ca' zoa Dios.

⁵ Ruzi'ë xibé yúgu'të le runë'.

Bití' ca' réquibe'enë' zoë' Dios Nu ruchí'a rusörö quégaca bönachi.

Ruzóë' tsölá'alö nupa bití' ta'lé'e lë' dxi'a.

⁶ Rë' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácgaca le rudxía dö', enca' le rizi' yë', en le rudidza' yudxi yugu' luzë'ë.

Ru'ítica'sé' didza' le cabí nácatë, en le naca xihui'.

⁸ Rucachi' cuinë' yugu' lu yödzö.

Bagáchi'sö rútië' nupa bití' bi nabága'gaca.

Ruyúlanë' nu bi gaca gun que.

⁹ Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazönë'.

Zián nupa rucul-lë' len në'ë nal-la.

¹¹ Rë' la' cuinsë': "Nal-la ládxi'ë Dios.

Nucachi' lahuë', en bití' ca' rilé'enë' le runa'."

¹² ¡Guyasa, Xan!

¡Gulís no'o, Dios!

¡Bití' gal-la ládxi'u nupa ta'guí'i ta'zaca'!

¹³ ¿Bizx que bönni' na' ru'ë dö' nuzóë' Dios tsölá'alö?

Gudxë' la' cuinsë': Bití' uzí' lë' Dios neda'.

¹⁴ Li' bilé'e quézinu' lë' ni, Xan.

Ru'í ládxi'u nu riguí'i rizáca', en nu risëbi ladxí',

en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

¹⁵ Bugúa yöl-la' unná bë' quégaca nupa tuá' dö', en nácgaca xihui'.

Bubí'i quéguequi ca naca xiguia' nabága'gaca.

16 Inná bë'tica'së' Xanru' Dios.
Nupa tu'béaj ícjaguequi Xanru' ulu'niti tsaz lu xiyú cazë'.

17 Ruzë nagu', Xan, le ta'nábini Li' nupa nácagaca do' ladxi'.
Rutipu' ládxi'guequi, en ruzë nagu' chí'iguequi.

18 Ruchi'a rusöröu' quégaca nupa nácagaca uzëbi,
en nupa zoa nu ribía no léguequi,
para cabirö ulu'xösa bönachi yödzölió ni luzë'eguequi.

11

1 Ruzxöni ládxa'a Xanru' gácalenë' neda'.

¿Naru' guiëtso' neda':

“Buzxúnnaj lu guí'a ca runba' biguínido”?

2 Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,
para ilútië' bagáchi'sö nupa nácagaca dxi'a.

3 Channö ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

4 ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiöj lahuë' para uyúë' le tun bönachi.

5 Rizí' bë'ë Xanru' nu naca tsahui'.

Biti' rilé'enë' dxi'a nu ruá' dö', en nu raza ladxi' ta'dá'baga' yúlahui'.

6 Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

7 Caní gunë' Xanru' tu' náquië' tsahui', en nadxí'inë' le naca tsahui'.

Nupa tun le nácatë ila'lé'e lahuë'.

12

1 Busölá neda', Xan, tu' cabirö zoa nitú nu naca dxi'a,
en biti' gaca nu idzöli nitú nu run ca rnna xtídza'a.

2 Ta'zí' ye'e yúgu'të bönachi luzë'eguequi.

Lu yöl-la' rizi' yë' quéguequi tuí'ilen luzë'eguequi didza' yúlajdo'.

3 Xan, buzóa dxisö nupa na' tuí'i didza' yúlajdo',
en buzaga' ruí'igaca nupa tun ba zxön cuínguequi.

4 Ta'nná: “Güí'iru' didza' ca rizësö ládxi'ru',
ate' cuntu nu tá'baga' rë'u.

¿Nuzxi caz inná be'e rë'u ca naca didza' ruí'iru'?”

5 Rnnë' Xanru': “Na'a guída' tu' nacuá' nupa tun zi' nupa ta'yadzaj ta'yudxi,
ate' rinnë ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi.”

6 Huáca uzxöni ládxi'ru' didza' ru'ë Xanru'.

Nácagaca ca guíë plata ba nequi,
le nudxi'a gadxi luzuí tu lu guí lálë'e.

7 Li' caz, Xan, gun chi'u léguequi,
en usöló' léguequi lu ná'agaca nupa tuá' dö' na'a dza.

8 Gáti'tës nacuá' nupa tuá' dö',
cate' tun zxön bönachi le ruá' dö'.

13

¹ ¿Gáca'xte caz gal-la ládxa'u neda', Xan?

¿Naru' tsaz gal-la ládxa'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lë'."

Bití' gaca ulu'dzeja tu' nótjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',

tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí ril'é'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyüë' luyú ni ga nacuá' bönachi

para ilé'enë' channö zoa nu réajni'i, nu na' riguila' Dios.

³ Yúgu'të' nadödigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Bití' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' bönachi tsahui'.

⁶ Tu'titaj xtídza'gaca nupa nácgaca yechi',

pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,

ulu'dzeja xzí'ini xi'sóë' Jacob, bönachi Israel, en ulu'zí' xibë' Dios.

15

¹ ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

² Nu na' naca idú ladxi', en run le naca tsahui',

en lu icja ládxi'da'ahui ruí'i didza' le nácatë.

³ Nu na' bití' rizí' quidza' bönachi,

en bití' ruá' dö' que luzë'e,

en bití' ruzé naga nu rizí' quidza' luzë'e.

⁴ Nu na' bití' run bal nu ruá' dö',

pero run bal nupa tun zxön Dios,

en sal-la' bi uniti cate' chinún xtídza', bití' ca' rutsá' didza' na'.

⁵ Nu na' bití' rizí' icja dumí cate' runödzej dumí que tu chí'ido'sö,

en bití' rizí' dumí para si' yë' ca naca le nun nu bití' nabaga' xiguaia'.

Nu na' run yúgu'të' le caní bití' ca' idzá' xilataj.

16

¹ Ben chi'i neda', Dios, tu' ruzxöni ládxa'a Li'.

² Lu icja ládxi'da'ahua' gudxa'-në' Xanru':

“Li' nacu' Xana'.

Biti'rö bi zoa quia' le naca dxi'a, pero tuzu' Li'.”

³ Riyaza ládxi'lana' nupa nácgaca queë' Dios luyú ni,
en nupa nácgaca idú ládxi'.

⁴ Ila'yán le ila'guí'i ila'zaca' nupa ta'yéaj ládxi' yugu' dios izá'a.

Biti' ca' cu'a láhuiguequi rön ca tun bönachi na',

en biti' ulidza' lágaca dios na'.

⁵ Náquië' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé,

en lachi naca lataj na' nequi quia'.

⁷ Gul-la' yöl-la' ba queë' Xanru', Nu rigú'u yöl-la' neda' le naca tsahui',
ga ridxintë ruzéajni'inë' neda' cate' ni' rasia'.

⁸ Chinuna' ga zóatica'së' Xanru' lahua'.

Tu' zoë' cuita' biti' bi utsá' neda'.

⁹ Que lë ni na' budzeja ládxa'a, en buzí' xibé ládxi'da'ahua',

ate' gun löza le naca' cate' igácha'a yeru ba,

¹⁰ tu' cabí ucá'anú' neda' lataj chul-la,

en biti' gu'u lataj uniti nu nequi quez quiu'.

¹¹ Nunú' ga núnbë'a nöza ichë' neda' ga soa' ibana'.

Ga zu' Li' gata' quia' yöl-la' rudzeja idú,

ate' cuitu' Li' uzí'tica'sa' xibó'.

17

¹ Ruzé nagu' neda', Xan.

Lu le naca tsahui' quia' rulidza' Li'.

Bë' ládxi' le rinábida' Li' tu' cabí ca' rizí' yë'a.

² Buchi'a busörö quia'

tu' runu' Li' le naca tsahui'.

³ Núnbë'u Li' le yu'u ládxi'da'ahua'.

Ruyú' neda' chi'i dzö'ölö.

Guzxí' bë'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

⁴ Runa' ca rinná bë' xibá quiu',

en biti' ca' ruá'a dö' ca tun bal-la bönachi.

⁵ Ridática'sa' la' nöza tsahui' quiu',

en biti' ca' ridöda' tsölá'alö.

⁶ Rulidza' Li', Dios, tu' rubi'u didza'.

Ruzé nagu' yugu' didza' ruá'a.

⁷ Bulu'i lahui yöl-la' dxi'i ládxi' quiu'.

Rusölácazu' nupa tu'zxöni ládxi' Li'

lu ná'agaca nupa ta'dá'baga' léguequi.

⁸ Ben chi'i neda' ca run chi'u la' guiöj locazu'.

Bucachi' neda' cuitu' Li' ca runba' böra, rucáchi'gacaba' börado' zcan xílaba',

⁹ para cabí bi ilún quia' nupa tuá' dö',

nupa na' ta'lé neda', en nagú'ugaca neda' lë'ajlö.

¹⁰ Biti' ca' zóalen léguequi yöl-la' ruhuéchi' ládxi',

ate' tu'i didza' lu yöl-la' run ba zxön cuínguequi.

¹¹ Gátí'tës ga ridöda' ta'gú'u neda' lë'ajlö,
en tē'ëni ila'guín neda' luyú.

¹² Nácagaquië' ca yugu' bédxi guíxi'do'.

Tē'ënë' ulu'sunítië' neda'.

Nácagaquië' ca yugu' bédxi guixi'.

Nucachi' cuíngaquië' para ila'zönë' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guíë tuchi' quiu'.

¹⁴ Lu yöl-la' huáca zxön quiu' busölá neda', Xan,

lu ná'agaca nupa tu'zí' xibé na'a dza,

nupa na' nuhuölaj nudzë'egaca yöl-la' tsahui' quiu'.

Nayángacabi' zxi'inigaquië',

ate' tu'cá'anë' lu ná'agacabi' le dë sizxöni quégaquië'.

¹⁵ pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

18

¹ ¡Nadxí'ide'eda' Li', Xan!

¡Li' rutipa cazu' ládxa'a!

² Ruzóë' Xanru' neda' tsutsu, en rapa chi'ë neda', en rusölë' neda'.

Náquië' Dios quia', en Nu rutipa ládxa'a,

ate' ruzxöni ládxa'a Lë'.

Rácalenë' neda' lu gudil-la: Rusölë' neda', en rizönë' neda'.

³ Rulidza'-në' Xanru' Nu ral-la' cú'uru' yöl-la' ba,

ate' usölë' neda' lu ná'agaca nupa tu'dí'i neda'.

⁴ Ia'láti'sö la' gútia',

ate' yöjbaga' neda' le usuniti neda', le ben ga gúdxida'.

⁵ Ia'láti'sö la' yöjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-në' Xanru'.

Bulidza'-në' Dios quia' para gácalenë' neda'.

Ga na' zoë' lataj lá'ayi queë' biyönnë' chi'a.

Buzë' naguë' le gunabi yúdxida' Lë'.

⁷ Ní'irö gudödi budó' zxu', en guzxizi luyú.

Guzxízida' xilíbigaca yugu' guí'a sibi.

Guzxízigaca tu' gulénë' Lë'.

⁸ Birúaj dzön zxinë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

⁹ Benë' ga bötaj lúzxiba, en bötajë' Lë' cazë',

ate' guzóa znan ni'ë le naca chul-la.

¹⁰ Gudödë' lu bö'ös dxíë' tu le nayëpisë nazí'i le querubín.

Carelö gudödë' tu lu bö' budunu'.

¹¹ Busubaga' cuinë' le naca chúl-lasö.

Lë na' naca böaj gasaj le richë'lë'e nisa.

¹² Lu le rëpi yösa queë' lu böaj gasaj na'

bila'rúaj bo' yalaj, en guiöj bögui' yöla sunna.

¹³ Gunnë' guziú' que chi'ë Xanru' lúzxiba xitsá'.

Biyön chi'ë Dios nayëpisëtëre',

lu dzön, en yugu' lu bo' yalaj, en lu guiöj bögui' yöla sunna.

14 Gusöl-lë'ë yugu' yaga lahui tuchi' queë', en bësílásië' nupa na' tu'dí'i neda'.
Gusöl-lë'ë yugu' yösa queë' yugu' le bulu'cul-la léguequi.

15 Ní'irö bilá' lahui le zoa zxon nísado',
ate' bilá' lahui xilibi yödzölió,
cate' buzenu' bach nupa biti' ta'lé'e Li' dxi'a, Xan,
en lu yöl-la' rilé quiu' bulidza zi'u léguequi.

16 Bötjë' zaca' xitsá'alö, en gudélë'ë neda'.

Bubéajë' neda' lu nisa zili.

17 Busölë' neda' lu na' nu biti' rilé'e neda' dxi'a, en nál-latërö,
enca' lu ná'agaca nupa tu'dí'i neda', en nál-lágacatërö ca neda'.

18 Cate' ni' chizóa inítia' gula'zóa régu'ë neda',
pero Xanru' gúcalenë' neda'.

19 Bubéajë' neda', en buzóë' neda' tu lu lataj zxon.

Busölë' neda' tu' guyaza ládxe'ë neda'.

20 Bubi'ë Xanru' quia' tsca le tsahui' naca',
en benë' quia' le naca dxi'a tu' cabí nabága'a xigua',

21 tu' runa' ca naca le rusédinë' Xanru' neda',
en biti' ca' ridá'baga'a Lë'.

22 Runa' ca ta'nná xibá nunë' Xanru',
en biti' ridá'baga'a le rinná bë' naguixjë' Lë'.

23 Biti' bi le naca dö' nabága'a lahuë' Lë',
ate' ben chí'a le innía' para cabí gu'a dö'.

24 Que lë ni na' bubí'ë Xanru' quia' tsca le tsahui' naca',
en tu' cabí nabága'a xigua' lahuë' Lë'.

25 Ruhuéchi' ládxe'u nupa tu'huechi' ladxi' luzé'eguequi,
en nacu' idú dxi'a len nupa ná'agaca idú dxi'a.

26 Ruluí'i cuinu' idú ladxi' len nupa ná'agaca idú ladxi',
pero ridá'bagu'u nupa ta'dá'baga' xtídz'u.

27 Rusöló' nupa ta'guí'i ta'zaca',
pero ruzötju' nupa tun ba rahui.

28 Ruquéla' cazu' guí' quia', Xana' Dios,
en rigú'u quia' bení' cate' ridá' ga chul-la.

29 Lu yöl-la' huáca queë' Dios rucul-la' bönni' guizxi yu röjáquië' gudil-la.

Tu' zóalenë' Dios quia' neda',
rixíti'a ribixa' lu zö'ö run chí'i léguequi.

30 Idú dxi'a ná'agaca le runë' Dios.

Nurúaj tsahui' xtídzë'ë.

Rapa chí'ë yúgu'të nupa ta'nábini Lë' gácalenë' léguequi.

31 ¡Tuzë' Xanru' náquië' Dios!

¡Tuzë' Dios rapa chí'ë rë'u!

32 Dios ni ruzalë' neda',
en runë' ga naca' idú ládxa'a.

33 Runë' ga ná'agaca ni'a ca ní'agacaba' bidxina' guixi',
en ruzóë' neda' yugu' lu guí'a zxon.

34 Rusédinë' neda' para gaca tseja' gudil-la,
en para gaca uguna' dxin uxiti' yaga néquini guíë bronce.

35 Lu yöl-la' rusölá quiu' run chí'u neda'.

Len no'o nál-la rizönu' neda',
en lu yöl-la' dxi'i ladxi' quiu' nunu' ga nayëpisëtëra'.

³⁶ Ruchi'u nöza ga ral-la' töda',
en runu' ga biti' cuila'.

³⁷ Guzóa régu'a nupa tu'dí'i neda', en bucul-la' léguequi.
Biti' buécja' ga bidxintë busunítia' léguequi.

³⁸ Gudina' léguequi luyú, ate' biti' guca ulu'huóása.
Gula'dzö'ö zخان ni'a.

³⁹ Benu' neda' nál-la para tseja' gudil-la,
en benu' ga bucul-la' nupa gula'dá'baga' neda'.

⁴⁰ Benu' ga bulu'zxunnaj lahua' nupa biti' ta'lé'e neda' dxi'a,
ate' busunítia' nupa na' bulu'dí'i neda'.

⁴¹ Bulu'lidza nu gácalen léguequi,
pero cuntu nu zoa usölá léguequi.

Bulu'lidza ca' Xanru', pero biti' bubi'ë didza'.

⁴² Buzxuzxja' léguequi ca bëchtö yu naché' lu bö'ös.
Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa ta'dá'baga',
en nunu' ga rinná bé'eda' bönachi zían yödzö.
Tun ca rnna xtídza'a bönachi biti' núnbë'a zí'alö.

⁴⁴ Cate' ta'yöni neda', la' tun ca rnna xtídza'a.

Tadxi neda' bönachi zían yugu' yödzö izá'a.

⁴⁵ Ta'cuidi' ladxi', en lu yöl-la' rixizi quéguequi
ta'rúaj yugu' lu yödzö tsutsu quéguequi.

⁴⁶ ¡Zoë' nabanë' Xanru'!
¡Yöl-la' ba Nu na' run chi'i neda'!

¡Guli'gún zxön Dios Nu rusölá neda'!

⁴⁷ Náquië' Dios Nu rizi' la nupa tu'dí'i neda',
en runë' ga tadxi bönachi guizxi yu neda'.

⁴⁸ Rusölé' neda' lu ná'agaca nupa biti' ta'lé'e neda' dxi'a.
Le nácatë runë' ga rucul-la' nupa ta'dá'baga' neda',
en rusölé' neda' lu na' bönni' ridzá'a.

⁴⁹ Que lë ni na' guía' Li': Xclenu' Xan, lógaca bönachi zían yödzö,
en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',
en nadxí'ítica'sé' nu na' nabó cazë',
nu na' naca David, en yugu' zxi'ini xi'sóë' ga idxinrö dza udxi.

19

¹ Yugu' le nacúa' lúzxiba tu'luí'i lo yöl-la' zxön queë' Dios,
ate' yugu' le raca lu bö'ös nacagaca bë' le nunë'.

² Yugu' dza tu'zéajni'i,
en yugu' dzö' tu'luí'i lo yöl-la' réajni'i.

³ Biti' zoa didza' tuí'i, en biti' riyön tu le ta'nná.
Biti' riyön chí'iguequi.

⁴ Le tu'zéajni'i ridxín ga naguéla'të luyú,
en le tu'sedi ridxín idútë yödzölió.

Ga na' nacúa' nuzóë' Dios xilataj gubidza,

⁵ le naca ca tu bönni' utsaga në'ë rirúajë' yu'u,
en naca ca' ca tu bönni' nál-la rudzéjanë' cate' zéajë' carelö lu huitaj.

⁶ Ga naguela' lúzxiba rilén gubidza,
en ridödi ga ridxintë ga ribía.

Biti' bi zoa le cabí rutsë'e gubidza na'.

⁷ Tsahui' naca ca rinná bē'ë Xanru', en run ga huóaca ládxi'ru'.

Idútë li naca didza' nuzóë' Xanru', le run ga réajni'i nu naca nöxaj ladxi'.

⁸ Tsahui' nácgaca xibá queë' Xanru', le tun ga rudzeja ládxi'ru'.

Nácgaca idú dxi'a le gunná bē'ë Xanru', en ta'gú'u bení icja ládxi'do'oru'.

⁹ Dxi'ado' naca gádxiru'-në' Xanru', para sóatica'siru'.

Idú li naca ca ruchí'a rusöröë' Xanru' bönachi, en idú tsahui'.

¹⁰ Nazáca'gacatërö didza' na' ca oro, enca' ca oro ba nequi.

Nácgacatërö zxixi ca bidxina' buz, en ca le zxixi queëba'.

¹¹ Didza' na' tu'zéajni'i neda', huen dxin queë'.

Uzi'tërö xibé nu run ca rna xtídzë'ë na'.

¹² ¿Nuzxi caz gaca inöz channö richixi rinigui?

Busölá neda' lu dul-la' nuna' le cabí gúquibe'eda' bena'.

¹³ Ben chí'i neda' para cabí udödi cuina' lu dul-la',

para cabí inná be'e neda' lë na' naca dul-la'.

Ní'irö ugá'ana' tsahui', en bití' ibága'a xiguia'.

¹⁴ Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

20

¹ Rinábida'-në' Xanru' uzé naguë' li' cate' idxín dza qui'i sacu'u.

Dios queë' Jacob gácalenë' li'.

² Rinábida'-në' isól-lë'ë le gácalen li' le irúaj lataj lá'ayi queë'.

Lë na' irúaj Sión gun ga gacu' tsutsu.

³ Rinábida'-në' tsöjnenë' yúgu'të le gulú'u queë',

en si' lu në'ë le buzégui'u lahuë'.

⁴ Rinábida'-në' gunnë' quiu' tsca naca le rizé ládxi'u,

en gunë' ga gácatë yúgu'të le rizá' ládxi'u.

⁵ Udzéjatu' cate' usölë' li',

en uchísatu' le gaca bē' rulidztu'-në' Dios queëru'.

Rinábida'-në' Xanru' gunnë' quiu' yúgu'të le rinábinu' Lë'.

⁶ Na'a nözda' rusölë' Xanru' nu nabö cazë'.

Riyönnë' nu na' naböë' ga ni' zoë' yehua' yubá la'ayi queë'.

Isól-lë'ë yöl-la' huáca idú queë' le usölá nu na'.

⁷ Nacuá' nupa tu'zxöni ládxi' yugu' carreta que gudil-la,

ate' nacua' bönachi yúbölö tu'zxöni ládxi' yugu' böa',

pero rë'u ruzxöni ládxi'ru' Lë' Xanru' Dios.

⁸ Ta'cuídi'në' nupa na', en ta'dzö'ë,

pero rë'u ni zuíru', en zóaru' tsutsu.

⁹ Busölá netu', Xan, tu' nacu' Nu rinná be'e netu'.

Rinábitu' Li' uzé nagu' netu' cate' ulídzatu' Li'.

21

¹ Rudzéjanë' bönni' rinná bē'ë tu' zóalen lë' yöl-la' huáca quiu' Li', Xan.

Tu' busöló' lë', yénni'tërö rudzéjanë'.

² Bunödzu' queë' le rizé ládxi'ë.

Biti' gudá'bagu'u le gunábinë' Li'.

³ Tu' raza ládxi'u lë' ruzú' queë' yugu' le naca dxi'a.

Nudxíu' icjë' tu le néquini oro idú.

⁴ Gunábinë' Li' gu'u queë' yöl-la' na'bán, ate' bë'u le queë'.

Nunu' ga sóatica'së' ibanë' yugu' dza si' zaca.

⁵ Zxöntë naca yöl-la' zxön queë' tu' nusöló' lë'.

Nunu' lë' bal, en nunu' ga nayëpisë'.

⁶ Zóatica'sö le naca dxi'a nuzú' queë'.

Runu' ga rudzëjade'enë' tu' zóalenu' lë'.

⁷ Caní raca queë' bönni' na' rinná bë'ë tu' ruzxöni ládxi'ë Xanru'.

Biti' bi utsá' lë' tu' ruhuéchi' ládxi'ë Dios nayëpisëtëre' lë'.

⁸ Huadeli' no'o ga nacuá' yúgu'të nupa ta'dá'baga' Li'.

Huadeli' no'o ibëla ga nacuá' nupa tu'dí'i Li'.

⁹ Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítu' léguequi, Xan, lu yöl-la' rilé quiu',

ate' tséguiguequi tu lu guí' zxön.

¹⁰ Ucuítu' yugu' zxí'ini xi'sóagaca nupa na' luyú ni,

en ubéaju' yugu' zxí'iniguequi ládjagaca bönachi.

¹¹ Caní gunu' tu' gulë'ë'niguequinë' ilu'ë dö' quiu'.

Gulún xtídza'gaquië' bi ilunë', pero bití' gaca ilunë' ca rnna xtídza'gaquië',

¹² tu' gunu' Li' ga ulu'zxúnnajë'.

Ichisu' uxiti' yaga quiu', en gunu' léguequi huë'.

¹³ Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca quiu'.

22

¹ Dios quia', Dios quia', ¿bizx que nusán no'o neda'?

¿Bizx que bití' riyönnu' le rinnëda' ládxa'a, en bití' rácalenu' neda'?

² Dios quia', idú dza rulidza' Li', pero bití' bi didza' rubi'u.

Idú yëla rulidza', en bití' ca' rasia'.

³ Lá'ayi nacu' Li'.

Zu' ga riyön yöl-la' ba ta'gú'u bönachi Israel Li'.

⁴ Bulu'zxöni ládxi'ë xuz xtó'otu' Li'.

Bulu'zxöni ládxi'ë Li', ate' busöló' légaquië'.

⁵ Bulu'lidzë' Li', ate' gúcalenu' légaquië'.

Bulu'zxöni ládxi'ë Li', en bití' bulu'tuí'inë'.

⁶ Naca' neda' ca tuba' bëla guna', en calëga bönni'.

Tu'dí'i bönachi neda', en tu'cá'ana neda' cá'asö.

⁷ Yúgu'të nupa ta'lé'e neda' tu'titaj neda'.

Ta'salaj ruí'iguequi lu yöl-la' rutitaj, en tu'tá'ícjaguequi, ta'nná:

⁸ "Lë' buzxöni ládxi'ë Xanru' para usölë' lë'.

Xanru' usölë' lë' channö tsaza ládxi'ë lë'."

⁹ Nacu' Li' Nu guléaj neda' lé'ënu xiná'a.

Benu' ga ruzxöni ládxa'a Li'

cate' ni' gúdxá'a luchú'unu xiná'a.

¹⁰ Nagá'ana' lu no'o Li' ga gudéla'të gulja'.

Ga gudéla'të buzóanu xiná'a neda' nacu' Dios quia'.

¹¹ Bití' su' zi'tu' ga ni zoa', tu' zoa' gagu le gun neda' zi',

ate' cúnturö nu zoa nu gácalen neda'.

- 12 Gula'gu'ë neda' lë'ajlö ca tunba' yugu' bëdxi.
Ca yugu' bëdxi que yödzö Basán gula'bía di'ë neda'.
- 13 Ta'salaj ruá'agaquië' lahua' neda'
ca runba' bëdxi guixi', ridunba', en ribödxi'aba'.
- 14 Nuhuöaca' ca nisa nalalaj luyú, ate' nazángaca bëch dxita quia'.
Nuhuöaca ládxi'da'ahua' ca bidxina' buz la lu lë'a.
- 15 Nacuidi' yöl-la' huáca quia' ca tu rö'ö nalá'a,
ate' da' lúdx'a chichja'.
Nuzú' neda' lu bëchtö yu que yöl-la' guti.
- 16 Ta'gu'ë neda' lë'ajlö ca tunba' yugu' bö'cu'.
Nagú'ugaquië' neda' lë'ajlö bönni' tu'ë dö'.
Nuzóagaquië' yeru blaga na'a, en ni'a.
- 17 Nalá'gaca yúgu'të dxita néquinida'.
Ta'në'ë neda', en tu'yú yénnië' neda'.
- 18 Ta'guísië' zxa' que queëgaquië',
en tu'yúë' le gaca bë' lahui lari' rixóa cúdza'a.
- 19 Biti' gá'anú' zi'tu', Xan.
Gúcalentë neda', Li', Nu naca yöl-la' huáca quia'.
- 20 Busólá neda' lu guíë tuchi'.
Busólá yöl-la' na'bán quia' lu ruá'agacaba' bö'cu'.
- 21 Busólá neda' lu ruá'agacaba' bëdxi guixi',
en lu lúzugacaba' bëdxi gú'una.
Li' riyön quézinu' chi'a.
- 22 Usiyönda' yugu' böchi' luzá'a ca naca Lo'.
Gatsaj láhui'lö ga na' tu'dubi bönachi lo' cu'a Li' yöl-la' ba.
- 23 ¡Guli'cu'ë Xanru' yöl-la' ba, libí'ili' na' rádxili'-në'!
¡Guli'gun zxön Lë', yúgu'tëli' zxí'ini xi'sóë' Jacob!
¡Guli'gadxi Lë', yúgu'tëli' zxí'ini xi'sóë' Israel!
- 24 Caní ral-la' gunli' tu' cabí bucá'anë' cá'asö,
en bití' budí'inë' nupa gula'guí'i gula'zaca',
en bití' bucachi' lahuë' para cabí ilé'enë' léguequi,
pero cate' bulu'lidza Lë', biyönnë' léguequi.
- 25 Cu'a Li' yöl-la' ba ga tu'dubi bönachi guizxi yu lo'.
Lógaca nupa tadxi Li' usudxina' le guzxi' lu na'a guna' quiu'.
- 26 Ilágugaca nupa nácagaca nöxaj ladxi', en ulu'huölaj ulu'dzë'e.
Nupa ta'guilaj Xanru', en ta'gú'u Lë' yöl-la' ba ulu'zí'tica'sö xibë'.
- 27 Bönachi idútë yödzölió tsöjnégaca Xanru', en ulu'huöaca queë'.
Bönachi yúgu'të yödzö luyú ila'gú'u Lë' yöl-la' ba.
- 28 Caní gaca tu' dë lu në'ë Xanru' inná bë'ë.
Inná bé'enë' yúgu'të bönachi luyú.
- 29 Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.
Yúgu'të nupa ila'niti ulu'zechu zxíbigaca lahuë' Lë',
nupa na' bití' ca' gaca ilún chi'i yöl-la' na'bán quéguequi.
- 30 Zxí'ini xi'sóali' ilún xichinë'.
Ila'guixjö' lë ni ca naca queë' Xanru' para ila'yöni nupa tsöjsétëgaca luyú ni.
- 31 Ilidë', en ulu'luí'inë' lahui náquië' Xanru' tsahui'.
Ulu'siyönnë' ca' nupa ral-la' ilalaj ca naca yugu' le benë' Lë'.

23

¹ Ruyú cazë' Xanru' Dios neda' ca tu nu ruyú bö'cu' zxila'.

Biti' bi riyádzjada'.

² Runë' ga ruzí' ládxa'a ca túngacaba' bö'cu' zxila' tu'zì' ládxi'ba' gapa dëda' le iláguba'.

Ga naca ra' nisa rizá' tsahui' ládxi'do' richë'ë neda'.

³ Runë' ga ruhuóaca ládxa'a.

Richë'ë neda' ga naca nõza tsahui' tu' nadxí'inë' neda'.

⁴ Sal-la' ridá' ga zoa bönadxi gátia',

biti' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

⁵ Ga nacué' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guí'jada'.

⁶ Le nácatë dusóalengaca neda' le naca dxi'a,

en yöl-la' dxi'i ladxi' queë' yúgu'të dza soa' ibana',

ate' lu yu'u lidxë' Xanru' sóatica'sa'.

24

¹ Nequi queë' Xanru' Dios luyú ni, en yúgu'të le dë lahui.

Nequi queë' yödzölió, en yúgu'të nupa nacué' ni'.

² Naguixjë' le lahui nísado' rö'ö zxánilö,
en nuzóë' xilibi luyú ga rë' zxon nísado'.

³ ¿Nuzxi caz bönni' dë lu në'ë cuenë' guí'a lá'ayi queë' Xanru'?

¿Nuzxi caz gaca tsaza lu lataj lá'ayi queë'?

⁴ Huáca bönni' na' naca dxi'a ca runë', en ca rizá' ládxe'ë,
bönni' na' biti' runë' bal budó' guiöj budó' yaga,
en biti' rizí' yë'ë cate' rizí' lu në'ë bi gunë'.

⁵ Gunë' Xanru' ga gaca dxi'a queë' bönni' na'.

Caní gunnë' Dios, Nu rusólá lë', en náquië' tsahui'.

⁶ Caní nácacagaca nupa ta'dxín lahuë' Dios,
nupa na' ta'biga' lahuë' Dios quégaca zxí'ini xi'sóë' Jacob.

⁷ Guli'salaj ga nu riyaza yödzö la'ayi.

Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayépisëtë'rë'.

⁸ ¿Nuzxi caz Bönni' unná bë' nayépisëtë'rë' na'?

Náquië' Xanru' nál-latë'rë', en nápatë'rë' yöl-la' huáca,
Lë', Xanru', Nu rideli' lu gudil-la.

⁹ Guli'salaj ga nu riyaza yödzö la'ayi.

Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayépisëtë'rë'.

¹⁰ ¿Nuzxi caz Bönni' unná bë' nayépisëtë'rë' na'?

Náquië' Xanru' Dios quéguequi ni'a në'ë guizxi yu.
Lë' náquië' Bönni' unná bë' nayépisëtë'rë' na'.

25

¹ Idú ládxa'a rulidza' Li', Xan.

² Ruzxöni ládxa'a Li', Dios quia'.

Ben ga cabí utuí'ida',

en cabí ulu'dzeja nupa biti' ta'lé'e neda' dxi'a.

³ Biti' ila'bõ' bõniga nupa tun löza Li',
pero ulu'tuí'i nupa ta'dá'baga' xtídzú'u.

⁴ Buluí'i neda' le ré'ènu' guna', Xan,
en buzéajni'i neda' le raza ládxa'u Li'.

⁵ Busedi neda' para guna' ca naca le naca idútë li quiu'.
Tu' nacu' Dios, Nu rusölá neda'
gúntica'sa' löza Li'.

⁶ Yõjnë ca naca yõl-la' dxi'i ladxi' quiu', Xan,
en yõl-la' ruhuéchi' ladxi' quiu', yugu' le nacuá'tica'sõ.

⁷ Buniti lo neda' ca naca dul-la' bena',
en le gudá'baga'a Li' cate' ni' zoa' iz cuidi' quia'.
Lu yõl-la' ruhuéchi' ladxi' quiu',
en yõl-la' dxi'i ladxi' quiu' yõjnë neda', Xan.

⁸ Náquië' Xanru' dxi'a tsahui', en li ladxi'.
Que lë ni na' ruluí'inë' nupa tun dul-la' le ral-la' ilún.

⁹ Ca naca le naca tsahui' richë'ë Dios nupa nácgaca nõxaj ladxi',
en ruluí'inë' nupa nácgaca do' ladxi' le ré'ënë' ilún.

¹⁰ Lu yõl-la' ruhuéchi' ladxi' queë', en yõl-la' rusudxín didza' queë',
richë'ë Xanru' nupa tun ca rinná bë' xibá naguixjë',
en ca naca didza' rucá'ana tsahui' nunë'.

¹¹ Tu' nacu' dxi'i ladxi', Xan,
buniti lo neda' ca naca dul-la' nuna', le naca dul-la' zxön.

¹² Nupa tun bal Xanru'
uluí'i quézinë' léguequi le naca dxi'a le ral-la' ilún.

¹³ Ulu'zí' xibé le naca dxi'a gunnë' quéguequi,
ate' guequi quégacabi' zxí'ini xi'sóaguequi luyú ni.

¹⁴ Xanru' zóaléntica'së' nupa tun ca rnna xtídzë'ë,
en ruzéajni'inë' léguequi ca naca didza' rucá'ana tsahui' nunë'.

¹⁵ Ruyútica'sa' guídë' Xanru' gácalenë' neda',
tu' usölë' neda' lu na' nu ré'ëni sön neda'.

¹⁶ Buécja quia', Xan, en buéchi' ladxi' neda',
tu' zoa' tuza', en nacuí'da'.

¹⁷ Nayán le tu'quí'i tu'saca' neda'.
Busölá neda' lu le ruúbi ruguí'i ládxi'da'ahua'.

¹⁸ Buyú ca riguí'i rizáca'a, en rudú ládxa'a.
Buniti lo neda' ca naca yugu' dul-la' nabága'a.

¹⁹ Buyú ca nayán nupa tun neda' zi'.
Buyú ca tu'dí'i neda'.

²⁰ Ben chi'i neda', en busölá neda'.
Biti' gu'u lataj utuí'ida' tu' ruzxõni ládxa'a Li'.

²¹ Ben ga ilún chi'i neda' le naca idú ladxi',
en le naca li ladxi', tu' runa' löza Li'.

²² Buá'au' bõnachi Israel,
Dios lu yugu' le raza quéguequi.

26

¹ Guléaj neda' tsahui', Xan, tu' runa' le naca dxi'a,
en idú ládxa'a ruzxõni ládxa'a Li'.

² Buyú lu icja ládxi'da'ahua', Xan, en guzxí' bë' neda'.

Buyú le rizá' ládxa'a, en le ribequi icja',
³ tu' riché' yöl-la' dxi'i ladxi' quiu' neda',
 ate' runa' ca naca le naca idútë li quiu'.
⁴ Biti' runa' tsözxön nupa ta'zí' yë',
 en biti' ridálena' nupa tu'luí'isö cuínguequi tsahui'.
⁵ Biti' raza ládxa'a udúbilena' nupa tuá' dö',
 en biti' guna' tuz didza' len nupa nácagaca xihui'.
⁶ Richisa na'a lo' Li', Dios, cabí dxía dö' na'a,
 en idú ládxa'a ribíga'a lo bucugu quiu', Xan,
⁷ para gul-la' le guía' Li': "Xclenu"
 en usiyönda' bönachi ca nácagaca le zxön nunu'.
⁸ Nadxí'ida' yu'u lidxu' ga na' zu', Xan,
 enca' lataj ga na' yu'u bení' lá'ayi quiu'.
⁹ Biti' usunítu' neda' tsözxön len nupa tun dul-la',
 en biti' gútiu' neda' len nupa tuti bönachi,
¹⁰ nupa na' ta'yaza ladxi' tuá' dö',
 en nacuá'tica'sö ila'guixaj dumí para ulu'rúaj tsahui'.
¹¹ Gúntica'sa' neda' le naca dxi'a.
 Buzá' ladxi' quia', en buá'uö neda'.
¹² Nuzóë' Dios neda' ga zoa' tsutsu ladja bönachi guizxi yu
 nudúbigaca queë' para cu'a-në' yöl-la' ba Xanru'.

27

¹ Náquië' Xanru' Dios bení' quia', en Nu rusölá neda'.
 ¿Nuzxi caz ral-la' gádxida'?
 Rapa chi'ë Xanru' Dios caz yöl-la' na'bán quia'.
 ¿Nuzxi caz gaca gun ga gadxi idzöbida'?
² Cate' gula'dá'baga' neda' nupa tuá' dö' para iluti neda',
 nupa na' biti' ta'lé'e neda' dxi'a, en tu'dí'i neda',
 yöjchégu'gaca, en yöjbíxigaca.
³ Sal-la' ila'dá'baga' neda' bönachi guizxi yu,
 biti' ca' tsaza yöl-la' radxi ládxi'da'ahua'.
 Sal-la' ila'díl-lalen bönachi neda',
 naca' neda' tsutsu ladxi'.
⁴ Tu le rinaba' lahuë' Xanru' Dios, lë na' güi'i ládxi'sa',
 le naca para sóatica'sa' lidxë' Xanru' yúgu'të dza soa' ibana',
 para gaca uyúa' yöl-la' lachi queë' Xanru' Dios,
 en para sa' ládxa'a ca naca queë' lu yu'u lá'ayi queë'.
⁵ Cate' idxín dza soa bönadxi quia', ucáchë'ë Lë' neda' lu yu'u lidxë'.
 Ga nagachi' lu yu'u lidxë' ucáchë'ë neda'.
 Uzóë' neda' tsutsu ca tu lu guiöjto'o.
⁶ Gunë' ga ucul-la' nupa tu'dí'i neda',
 ate' lu yöl-la' rudzeja quia' cödxí'atica'sa'
 cate' bi unödza' queë' lu yu'u lidxë'.
 ¡Gul-la' queë'! ¡Ön, gul-la' queë' Xanru' yöl-la' ba!
⁷ Buzë' nagu', Xan, cate' ulidza' Li'.
 Buzá' ladxi' quia', en bubí'i didza' ca naca le inábida' Li'.
⁸ Cate' Li' gudxu' neda': "Buguilaj neda'",
 idú ládxa'a bubí'a didza', gunnía': Uguilja' Li', Xan.
⁹ Biti' ucachi' lo' lahua' neda'.
 Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.
 Biti' ucá'anu' neda', en bití' usán no'o neda'.
 Nacu' Dios, Nu rusólá neda'.

¹⁰ Huáca ulu'sán ládxe'ë xuz xiná'a neda',
 pero uzí' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.
 Buluí'i neda' para guna' le naca tsahui',
 tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e neda' dxi'a
 para cabí ilún quia' le tē'ëni.
 Ta'dá'baga' neda' nupa ta'zí' yë',
 en nupa tē'ëni iluá' dö' quia'.

¹³ Guzxí' lu në'ë Xanru' Dios gunë' ga ilé'eda' le naca dxi'a,
 en le naca tsahui' queë' ga nacuá' nupa nabángaca.
 La'tu' cabí réajlé'a lë ni, chibõaj ládxa'a.

¹⁴ ¡Guli'gún lözë' Xanru'!
 ¡Guli'gaca tsutsu, en buli'tipa ládxi'li'!
 ¡Ön, guli'gún lözë' Xanru'!

28

¹ Rulidza' Li', Xan.

Nacu' Guiõj le ruzóa neda' tsutsu.
 Ruzë nagu' chí'a, tu' channõ usayju' ru'u,
 gaca' ca tu bönni' razië' lataj chul-la.

² Ruzë nagu' le rulidza' Li' cate' rinábida' Li' gácalenu' neda',
 cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxõn len nupa tuá' dö',
 en tsözxõn len nupa ná'cagaca xihui',
 nupa na' tuí'i didza' dxi'a lahui' lógaca dzaga yu'u quéguequi,
 pero yu'u ládxi'do'guequi le cabí naca tsahui'.

⁴ Bubí'i quéguequi tsca naca le tun, en tsca naca dö' ruí'igaca.
 Bubí'i quéguequi tsca naca le tun në'eguequi.
 Bubí'i quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunë' Xanru',
 en bití' tun bal le nun në'ë.
 Uquínnajë' léguequi, en bití' ca' uchisë' léguequi.

⁶ ¡Yöl-la' ba Xanru',
 tu' riyönnë' cate' rinábida' Lë' gácalenë' neda'!

⁷ Xanru' caz ná'quië' yöl-la' huáca quia', en le run chí'i neda'.
 Ruzxõni ládxa'a Lë', ate' rácalenë' neda'.
 Que lë ni na' ruzí' xibë' ládxi'da'ahua',
 ate' gul-la' le guía' Lë': "Xclenu'."

⁸ Naca cazë' Xanru' yöl-la' huáca quéguequi bönachi queë',
 en ná'quië' ca' Nu run chí'i Bönni' na' bubéajë' quez queë' para inná bë'ë.

⁹ Busölá bönachi quiu', Dios, en ben ga gaca dxi'a quéguequi nupa néquiguequi quiu'.

Ben chí'i léguequi ca run tu nu ruyú bö'cu' zxila', en guché'tica'sö léguequi.

29

¹ ¡Guli'cu'ë yöl-la' ba Xanru', libí'ili', nácali' zxí'inigaquië' bönni' nayépisëgaquië'!

¡Guli'cu'ë yöl-la' ba Xanru', en guli'guié': "Napu' yöl-la' huáca idú'!"

² ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!

¡Guli'gún bal Xanru', tu' naca lachi le naca lá'ayi queë'!

³ Riyón chí'ë Xanru' lu nísado'.

Riyón chí'ë Xanru' nayépisë' ca riyón guziú' rinnë.

Riyón chí'ë Xanru' lu nísado'.

⁴ Nál-latërö naca chí'ë Xanru'.

Nayépisëtërö chí'ë Xanru'.

⁵ Chí'ë Xanru' rilá'a yugu' yaga zxön.

Ön, chí'ë Xanru' riguitsaj yugu' yaga lu guí'a Líbano.

⁶ Runë' Xanru' ga ta'xiti' guí'a ca tunba' bëdxido'.

Ta'xiti' guí'a Líbano, en guí'a Sirión ca tunba' bëdx guí'a.

⁷ Chí'ë Xanru' run ga rëpi yösa.

⁸ Ruxizi chí'ë Xanru' la' guixi' ga dë lataj.

Ruxizi chí'ë Xanru' la' guixi' nazí'i le Cades.

⁹ Chí'ë Xanru' run ga ta'bëquiba' bidxina' guixi' böa' hué'ënido' quégacaba',

en run ga ta'guínnaj yúgu'të laga' dxíagaca yugu' yaga.

Lu yudo' queë' tuí'i didza' yúgu'të le nacuá', ta'nná: "¡Yöl-la' ba Lë'!"

¹⁰ Gurö'ë gunná bë'ë Xanru' cate' gurö'ö nisa lu idútë yödzölió.

Ön, rö'ë rinná bë'tica'së' Xanru'.

¹¹ Rutipë' Xanru' ládxi'do' gaca bönachi queë'.

Gunë' Xanru' ga gaca dxi'a quégaca bönachi queë',

en gunë' ga ila'böza dxi'a tsáhui'do'.

30

¹ Guna' Li' zxön, Xan, tu' buchisu' Li' neda', en bití' bë'u lataj bi ilún quia' nupa bití' ta'lé'e neda' dxi'a.

² Rigu'a Li' yöl-la' ba, Xana' Dios, tu' bulidza' Li' gácalenu' neda', ate' bunu' neda'.

³ Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí tsu'a lataj chul-la ga dzö'ö nupa nátigaca.

⁴ ¡Guli'gul-la yöl-la' ba queë' Xanru', libí'ili' néquili' quez queë'!

¡Guli'guié': "Xclenu'" ca naca Lë' le naca lá'ayi!

⁵ Tu chí'isö rilenë', pero ruzá' ládxi'tica'së' queëru'.

Channö cödxiru' tu yëla,

lu yöl-la' rudzeja queëru' cödxí'aru' itö yu.

⁶ Cate' guca dxi'a quia', ní'irö gunnía':

"Gatga bi utsá' neda'."

⁷ Tu' buzá' ládxi'u quia', Xan, buzú' neda' ga zoa' tsutsu, en cate' bucachi' lo', gurö'a böniga.

⁸ Bulidza' Li', Xan,

en gúta'yua' lo'.

⁹ ¿Bizxi xibé uzi'tso' channö gátia', en tsöjtsázia'

lataj chul-la ga dzö'ö nupa nátigaca?

¿Naru' huácatsö cu'a Li' yöl-la' ba channö huöáca' bëchtö yu?

¿Naru' huácatsö ulu'a lo le naca idú quiu'?

¹⁰ Ruzě nagu', Xan, en ruzá' ládxa'u quia'.

Gúcalen neda', Xan.

¹¹ Buí'nida', ate' benu' ga buyá'a lu yöl-la' rudzeja quia'.

Bugú' lari' cá'asö gúcua', en bugacu' neda' le ruzi'a xibé.

¹² Bil-la bö' naca caza' yöl-la' ba quiu', en bití' soa dxisö.

Guíética'sa' Li': "Xclenu'", Xana' Dios.

31

¹ Ruzxöni ládxa'a Li', Xan.

Bití' gu'u lataj utuí'ida'.

Tu' nacu' tsahui', busölá neda'.

² Ruzě nagu' quia', en rusöló' neda'.

Gacu' ca tu guiöjto'o ga soa' tsutsu,

en ca tu ga soa' dxi'a tsáhu'i'do' lu gudil-la.

³ Nacu' Li' guiöjto'o ga zoa' tsutsu, en le run chi'i neda'.

Para gaca yöl-la' ba que Lo' guchě' neda', en buluí'i neda' le dxi'a guna'.

⁴ Ubéaju' neda' lu du yalaj nucáchi'gaquie' bönni' tu'ě dö',

tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Böá'au' neda', Xan, Dios idú.

⁶ Bití' rilé'eda' dxi'a nupa tun zxön budó' guiöj budó' yaga,

pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',

tu' bilé'e quézinu' le gudí'i guzxáca'a.

Nöz quézinu' yugu' le raca quia'.

⁸ Bití' bucá'anu' neda' lu na' nu bití' rilé'e neda' dxi'a,

pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhu'ini quia' ribödxá', en rudú ládxa'a.

¹⁰ Riyechi' dza quia' tu' ruhu'inide'eda',

en tu' rinně ládxa'a, en riyechi' iz quia'.

Rudú ládxa'a tu' nözi dö' nu'a,

ate' nadxita idútě le naca'.

¹¹ Tu' nözi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa núnbě'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nně bönachi zían quia' bagáchi'sö.

Gátí'tēs zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'tě dza soa' ibana'.

Busölá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busölá neda'.

¹⁷ Biti' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga biti' gaca bi inná nu rizi' yë',

nu na' rinné zi' queë' bönni' tsahui',

en run ba zxön cuini, en rulidza ditaj luzé'e.

¹⁹ ¡Bica' zxön yöl-la' dxi'i ladxi' quiu',

lë na' napu' para gácalenu' nupa tadxi Li'!

Runu' caní quégaca nupa tu'zxöni ladxi' Li'

lógaca nupa tun ba zxön cuíniguequi.

²⁰ Rucáchu'u légaquië' ga na' zu' bagáchi'sö,

ga biti' gaca idxín nu bönni' xihui'.

Run chi'u légaquië' bagáchi'sö ga biti' gaca idxín didza' bizxaj.

²¹ ¡Yöl-la' ba Xanru' Dios,

tu' buluí'inë' neda' ca nadxí'inë' neda' cate' ni' zoa' tu yödzö

ga nagú'ugaquië' lé'ajlö bönni' tu'tíl-lalenë' neda'!

²² Lu yöl-la' radxi ridzöbi quia' gunnía': "Ilútië' neda' lo' Li', Xan",

pero biyönnu' le gunábida' Li', cate' ni' bulidza' Li'.

²³ ¡Guli'dxí'i-në' Xanru', libí'ili' néquili' queë'!

Rapa chi'ë Xanru' nupa ta'yéajlë' Lë',

en rubi'ë ca sa'yéaj queë' bönni' run ba zxön cuinë'.

²⁴ ¡Guli'gaca tsutsu, en buli'tipa ládxi'li',

yúgu'tëli' na' runli' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca dö' bi'ë,

en bugüë' dul-la' queë'!

² ¡Bica' ba bönni' na' Dios rnnë' biti' nabáguë'ë xigua',

en biti' zóalen lë' yöl-la' rizi' yë'!

³ Cate' guzóa' dxisö ca naca dul-la' quia',

budú ládxa'a tu' gunnética'sö ládxa'a.

⁴ Rëla, en te dza buquí'i busácu'u neda', Dios.

Budú ládxa'a ca raca cate' rö' böchila.

⁵ Ní'irö guxóalëpa' dul-la' nabága'a lo' Li',

en biti' bucácha'a le xihui' bena'.

Gunnía': "Ixóalëpa' dö' bi'a lahuë' Xana",

ate' buniti lo' neda' ca naca xigua' gubága'a.

⁶ Que lë ni na', núti'tës nu nunbë' Li', Dios, ral-la' ulidza Li'

cate' dë lataj gü'ilen Li' didza'.

Cate' rö' nisa bach luyú ni, biti' ca' ideli' idxín ga zoa nu na'.

⁷ Li' nacu' ga gaca ucachi' cuina' cate' zoa bönadxi quia'.

Li' caz gun chi'u neda' para cabí bi gaca quia'.

⁸ Li' gunu' ga gúl-latíca'sa' quiu' Li' tu' rusöló' neda'.

Rnnë' Dios: "Neda' uzéajni'ida' li', en uluí'ida' li' le ral-la' gunu'.

Usédida' li', en uyútica'sa' li'.

⁹ Biti' gacu' ca tu böa' o tu mula cabí ta'yéajni'iba'.

Ral-la' cu'u guíë en du rú'ugacaba' para inná bé'enu' lé'gacaba'." Channö cabí gunu' caní, bití' ca' ilunba' ca rě'ënu'.

¹⁰ Zián le tun ga tu'huí'iniguequi nupa tuá' dö', pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

¹¹ Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'. Lu yöl-la' rudzeja queëli' guli'cödxí'a, libí'ili' nácali' idú dxi'a.

33

¹ Lu yöl-la' rudzeja queëli' guli'gul-la lahuë' Xanru', libí'ili' nácali' tsahui' lahuë' Lë'. Nupa ná'cagaca tsahui' ral-la' ila'gú'u Lë' yöl-la' ba.

² Guli'guíë' Lë': "Xclenu", quínnili' lë'e bihuél-la. Guli'gul-la yöl-la' ba queë', quínnili' le zë chi du que.

³ Guli'gul-la queë' tu le rul-la cubi.

Guli'quinnaj dxí'ado', en lu yöl-la' rudzeja queëli' guli'cödxí'a.

⁴ Xtídzë'ë Xanru' naca idú tsahui', ate' idú ládxe'ë runë' yúgu'të bi runë'.

⁵ Nadxí'inë' le naca dxí'a, en le naca tsahui'. Nalá' lahui yöl-la' dxi'i ladxi' queë' Xanru' idútë yödzölió.

⁶ Len didza' bë'ësë' Xanru', benë' lúzxiba, en benë' yúgu'të bö'läj bení' len bö' rirúaj ru'ë.

⁷ Rutubë' nisa rö'ö nísado' para gaca ca tu guí'a. Napa chi'ë nisa rö'ö zili ga na' nupë'ë xilataj.

⁸ Yúgu'të bönachi ral-la' ila'dxí'i Xanru'. Bönachi idútë yödzölió ral-la' ila'cuá' nöxaj lahuë' Lë'.

⁹ Bë'ësë' didza' Xanru', ate' la' gúcatë ca na' gunné'.

¹⁰ Gunná bë'ë, ate' guca tsutsu le nunë'.

Runë' Xanru' ga tu'huóaca cá'asö didza' túngaca bönachi yugu' yödzö. Runë' ga bití' ilaca le tē'ëni ilúngaca bönachi.

¹¹ Sóatica'sö tsutsu didza' nunë' Xanru'. Le rizá' ládxe'ë ulu'gá'anatica'sö quéguequi zxi'ini xi'sóaru'.

¹² Bica' bágaca bönachi yödzö na' náquië' Xanru' cazë' Dios quéguequi, bönachi na' nabö cazë' Dios para ilaca quez queë'.

¹³ Zoa cazë' Xanru' yehua' yubá, ruyúë' ga zóaru'. Rilé'enë' le tun yúgu'të bönachi nacué' idútë yödzölió.

¹⁴ Ga na' zoa cazë' ruyúë' idú gásibi'ilö, en rilé'enë' yúgu'të nupa nacué' idútë yödzölió ni.

¹⁵ Nun cazë' Lë' ládxi'do'gaca yúgu'tëguequi. Réajni'i quézinë' ca naca yúgu'të le túngaca.

¹⁶ Bití' ca' ulë' bönni' unná bë' nacué' queë' bönni' guizxi yu röjáquië' gudil-la. Bití' ulë' bönni' zoë' gudil-la tu' nál-latërë'.

¹⁷ Bití' nazaca' gunru' löza böa' para idéli'ru' lu gudil-la, tu' cabí gaca usö'labá' nu bönni' tu' nál-latëröba'.

¹⁸ Buli'yú, ruyútica'së' Xanru' nupa tadxi Lë', nupa na' tun löza yöl-la' dxi'i ladxi' queë',

¹⁹ para usölë' lé'guequi lu yöl-la' guti, en para ugahuë' lé'guequi cate' tsu'u gubín.

²⁰ Idú ládxi'ru' runru' löza Lë' Xanru'. Rácalen cazë' rë'u, en rapa chi'ë rë'u.

21 Rudzeja ládxi'lenru' Lë',
en uzxöni ládxi'ru' Lë', tu' náquië' lá'ayi.

22 Lu yöl-la' dxi'i ladxi' quiu' gúcalen netu', Xan,
tu' runtu' löza Li'.

34

1 ¡Innética'sa' queë' Xanru' náquië' dxi'a!
¡Cú'utica'sa' Lë' yöl-la' ba!

2 Bö' naca caza' gun zxön Xanru'.
Nupa nácacaca nöxaj ladxi' ila'yöni lë ni, en ulu'dzeja.

3 Guli'güi' zxönë' Xanru' tsözxön len neda',
en tsözxön usiyönru' bönachi ca naca Lë' La'ayi.

4 Bulidza'-në' Xanru', ate' bubí'ë didza' quia',
en busölë' neda' lu yugu' le gúdxida'.

5 Nupa nácacaca queë' bila'dxín lahuë', en bulu'zí' xibë'.
Bíti'rö caz ulu'tuí'i nupa na'.

6 Bulidza'-në' Xanru', ate' biyönnë' quia' neda', bönni' yechi',
en busölë' neda' lu yúgu'të le guca quia'.

7 Gubáz lá'ayi que ya'abá queë' Xanru' tapa chi'ë nupa tadxi Lë',
en tu'sölë' léguequi lu yúgu'të le raca quéguequi.

8 Guli'sí' bë'ë, ate' inözili' náquië' Xanru' dxi'a.
¡Bica' ba bönni' ruzxöni ládxi'ë Lë'!

9 Guli'gadxi Xanru', libí'ili' nácali' quez queë',
tu' cabí bi ila'yadzaj nupa tadxi Lë'.

10 Ta'yadzaj ta'yúdxiba' bëdxi guixi', en ta'dunba',
pero nupa tu'lidza Xanru' bití' ca' ta'yadzaj le naca dxi'a.

11 Guli'dá libí'ili', bí'ido', en buli'zë nágali' xtídza'a.
Uzéajni'ida' libí'ili' para gádxili'-në' Xanru'.

12 ¿Nuzxi caz bönni' ré'ënë' soë' ibanë',
en ré'ënë' soë' iz zían para uzi'ë xibé le naca dxi'a?

13 Ben chi'i lúdxu'u para cabí gu'u didza' xihui',
en para cabí si' yé'enu' luzó'o.

14 Bucá'ana le cabí naca tsahui', en ben le naca dxi'a.
Bë' ladxi' cözu' dxi'a tsahui'do',
en ben bayudxi gunu' yugu' lë ni.

15 Ruyútica'së' Xanru' nupa nácacaca tsahui',
en riyön quézinë' cate' tu'lidza Lë'.

16 Uzáguë'ë Xanru' xinözgaca nupa tuá' dö',
en gunë' ga cuntu nu tsöjné léguequi.

17 Nupa nácacaca tsahui' tu'lidza Xanru', ate' riyönnë' quéguequi,
en rusölë' léguequi lu yugu' le raca quéguequi.

18 Xanru' zóalen cazë' nupa tu'hu'ini ladxi',
en rusölë' nupa nácacaca nöxaj ladxi'.

19 Zían le riguí'i rizáquë'ë bönni' tsahui',
pero Xanru' rusölë' lë' lu yúgu'të lë na'.

20 Xanru' rapa chi'ë yúgu'të dxita yu'ë,
ate' bití' gatsaj nitú dxita queë'.

21 Le xihui' run nu ruá' dö' gun ga gati nu na',
ate' ila'baga' xiguaia' nupa bití' ta'lé'e dxi'a le naca tsahui'.

22 Xanru' caz ruhuóá'uè' bö' nácgaca caz huen dxin queë',
ate' biti' irugu que nitú nupa na' tu'zxöni ladxi' Lë'.

35

Tu le bil-lë' David

- 1 Xana' Dios, gudá'baga' nupa biti' ta'lé'e neda' dxi'a.
Butíl-lalen nupa ta'díl-lalen neda'.
- 2 Guzxön le gun chi'i neda' lu gudil-la,
en gudá gácalenu' neda'.
- 3 Guzxön yaga tuchi' quiu' para uzagu'u xinözguequi nupa ta'zóa regu' neda'.
Gudxi bö' naca caza' nacu' Li' Nu rusölá neda'.
- 4 Ben ga ulu'tuí'i, en ulu'gá'ana cá'asö nupa té'ëni iluti neda'.
Ben ga ulu'huécaj, en ulu'gá'ana cá'asö nupa té'ëni iluí'i dö' quia'.
- 5 Ben ga ilaca ca bëbu zxe café zeaj lu bö'ös,
en ben ga ulaguë' gubáz lá'ayi que ya'abá quiu' léguequi.
- 6 Ben ga gaca chul-la nöza yú'ugaca, en ga cuílagaca,
ate' soa régu'ë gubáz lá'ayi quiu' léguequi.
- 7 Bulu'cáchi' du yalaj le sön neda', en biti' bi nuna' quéguequi.
Gula'chö'öna yeru ga tsöjbixa', en biti' bi nuna' quéguequi.
- 8 Ben ga idxín quéguequi tsárido'os le usuniti léguequi,
en ben ga du yalaj na' bulu'cáchi' sön la' cuínguequi quez.
Ben ga ila'bixi lu yeru na' gula'chö'öna.
- 9 Udzeja ládxi'léna'-në' Xanru',
en uzi'a xibé yöl-la' rusölá queë'.
- 10 Ila'nná dxita néquinida': "Xan, ¿nuzxi caz naca ca nacu' Li'?
Rusöló' nu riguí'i rizáca' lu na' nu nál-latërö ca le.
Rusöló' nu riguí'i rizáca', en riyadzaj riyudxi lu na' bönni' ribané' le nequi
que."
- 11 Ta'dá'baguë'ë bönni' xihui' neda', en ta'nnë' quia'.
Ta'nabi yúdxinë' neda' ca naca yugu' le cabí nözda'.
- 12 Tu'bi'ë quia' le naca dö' cate' runa' le naca dxi'a,
ate' ruhuí'inide'e ládxa'a.
- 13 Pero neda' gúcua' lari' cá'asö cate' guláquië' huë'.
Bena' gubasa, en busaca' zi' bö' naca caza',
en uláz quéguequi bulidza'-në' Dios zían luzuí.
- 14 Bu'ínide'eda' tscá guca luzá'a o bi'i böchi' caza' nu na' guca huë'.
Gurödxí yecha'a ca huí'inide'eda' channö gátinu xiná' caza',
- 15 pero cate' guchixi guníguida' neda', bulu'dzëjade'e, en bulu'dubi tsözxön.
Yugu' bönni' na' bulu'cá'anë' neda' cá'asö bulu'dubë' para ilunë' ga cö'a
baguí'i.
- Yugu' bönni' na' biti' núnbë'a gulúnnatica'së' neda'.
- 16 Bulu'saca' zi'ë neda', en bulu'titjë' quia'.
Lu yöl-la' rilé quégaquië' neda' gulagu zxea láyi'gaquië'.
- 17 Xan, ¿gáca'xte caz uyú iná'asu' le tunë'?
Busölá neda' lu dö' tu'ë quia'.
Busölá neda' lu ná'agaquië' bönni' na' ná'cagaquië' ca yugu' bëdxi guixi'.
- 18 Guía' Li': "Xclenu'" lógaca bönachi zían ulu'dúbigaca quiu'.
Cu'a Li' yöl-la' ba ga nudúbigaca ziantë bönachi.
- 19 Biti' gu'u lataj ulu'dzeja nupa ta'dá'baga' neda', en ta'zí' yë',

en biti' gu'u lataj ulu'titaj quia', nupa na' tu'dí'i neda', en biti' bi nuna' quéguequi.

²⁰ Catu caz tuí'i didza' le gun ga soa dxisö didza' bizxaj.

Lu yöl-la' rizi' yë' quéguequi ta'nnë quégaca nupa ta'bö' dxi'a tsähui'do' yödzölió ni.

²¹ Bulu'salaj ruí'iguequi, en gula'nnë quia', gula'nná:

“¡Ön, bilé'e quézitu' le nunë'!”

²² ¡Bilé'e quézinu' Li' lë ni, Xan! ¡Biti' su' dxisö!

¡Biti' uca'anu' neda', Xan!

²³ ¡Guyasa, Xan! ¡Busubán ládxi'u, Xan, para uchi'a usöröu' quia'!

¡Gúcalen neda', Xana' Dios!

²⁴ ¡Tu' nacu' tsahui', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

²⁵ ¡Biti' gu'u léguequi lataj ila'nná:

“Ön, bidéli'ru' le guzë ládxi'ru'”!

¡Biti' gu'u lataj ila'nná: “Chibucúl-laru' lë”!

²⁶ ¡Ben ga ulu'tuí'i, en ulu'gá'ana cá'asö nupa tu'dzeja cate' ruhuí'inida'!

¡Ben ga ulu'tuí'i, en ulu'gá'ana cá'asö nupa ta'dá'baga' neda'!

²⁷ ¡Ben ga ila'bödxí'a lu yöl-la' rudzeja quéguequi,

en ulu'z'í' xibé nupa tuí'i ládxi'gaca urúaja' tsahui'!

¡Bë' lataj ila'nnática'sö: “Nayëpisëtëre' Xanru' Dios,

tu' raza ládxi'ë gunë' ga gaca dxi'a quégaca huen dxin queë”!

²⁸ Ní'irö guna' ba nalí quiu', innía': “¡Nacu' tsahui'!”

en cu'a Li' yöl-la' ba idú dza.

36

¹ Le naca xihui' ruí'ilen bönni' nucá'anë' Dios lu icja ládxi'da'ahuë'.

Biti' ca' rádxinë' Dios.

² Tu' run ba zxön cuinë'

réquinë' biti' nözinë' Dios nabáguë'ë lë' dul-la', en biti' ichúguië' Dios queë'.

³ Ru'ë didza' xihui', en rizi' yë'ë.

Biti' réajni'inë', en biti' runë' le naca dxi'a.

⁴ Cate' ni' dë' lu le ráti'në' rizá' ládxi'ë ca naca le xihui' gunë'.

Ruí'i ládxi'ë gunë' le cabí naca dxi'a,

en biti' rusanë' runë' le naca xihui'.

⁵ Zxöntëro ca yehua' yubá naca yöl-la' dxi'i ladxi' quiu', Xan,

ate' gúntica'su' ca rnna xtídz'u, tsca zoa yehua' yubá.

⁶ Naca tsutsu le tsahui' nacu' ca nácagaca tsutsu yugu' guí'a zxön quiu'.

Ca ruchi'a rusöröu' naca ca naca nísado', tu' cabí gaca nu gúnbë'e le.

Run chí'i cazu' bönachi, en yugu böa' guixi', Xan.

⁷ Nazáca'tëro yöl-la' dxi'i ladxi' quiu', Dios.

Run chí'u yúgu'të bönachi ca runba' yöjede, run chí'iba' yugu' bórado' zxan xílaba'.

⁸ Tu'huölaj tu'dzë'e bönachi quiu' le nayánda' lu yu'u lidxu',

ate' rugui'ju' léguequi le naca yöl-la' dxi'i ladxi' quiu'.

⁹ Yúgu'të le nacua' nabánigaca Li'.

Tu' naca cazu' bení' rilé'etu' bení'.

¹⁰ Bidxí'ítica'sö nupa núnbë'gaca Li',

en ben le naca dxi'a quégaca nupa nácagaca tsahui'.

¹¹ Biti' gu'u lataj bi ilún quia' nupa tun ba zxön cuínguequi,

en biti' gu'u nupa tuá' dö' lataj ulu'laga' neda'.

12 Nadzö'ögaca nupa tuá' dö'.
Déguequi luyú, en biti' ca' gaca ulu'huóása.

37

- 1 Biti' ubi uguí'i ládxi'do'oli' tu' tu'zígaca xibé nupa tuá' dö'.
Biti' uzzé'eli' nupa biti' tun le naca dxi'a.
- 2 Huadóditē quéguequi ca raca que guixi' nacuadi,
en udxi quéguequi ca raca quégaca guíxi'do' narúgugaca.
- 3 Buli'zxöni ládxi'ë Xanru', en guli'gún le naca dxi'a.
Buli'gá'ana luyú queë', en guli'cöz dxi'a tsáhui'do'.
- 4 Buli'sí' xibé' Xanru',
ate' gunnē' queéli' le rizé ládxi'li'.
- 5 Buli'dödi cuinli' lu nē'ë Xanru'.
Buli'zxöni ládxi'ë Lē', ate' gunē' le gácalen libí'ili'.
- 6 Gun cazē' Lē' ga urúajli' tsahui', en gácali' ca bení',
en cate' uchi'a usöröë' queéli', gaca queéli' ca lahui' dza.
- 7 Guli'sóa dxisö lahuē' Xanru', en guli'cöza le gunē'.
Biti' cuéqui ícjali' tu' nözi bönni' ruzi'ë xibé,
bönni' na' ru'ë dö'.
- 8 Bítirö leli', en buli'sán yöl-la' ridzá'a.
Biti' ubi uguí'i ládxi'do'oli' tu' gun lē ni ga guá'ali' dö'.
- 9 Dios caz uzáguë'ë xinözguequi nupa tuá' dö',
pero nupa tu'zxöni ladxi' Xanru', guequi quéguequi luyú.
- 10 Ia'látisö xidzé, en bítirö soë' bönni' na' ru'ë dö'.
Uguíjali' xilatjē', pero bítirö soë' ni'.
- 11 Nupa nácgaca nöxaj ladxi', guequi quéguequi luyú,
ate' ulu'zígaca xibé yöl-la' tsahui' que.
- 12 Tun didza' nupa tuá' dö' bi ilúngaca quégaca nupa nácgaca tsahui',
en lu yöl-la' rilé quéguequi tagu zxea láyi'guequi.
- 13 Ruzxidxi cazē' Xanru' quéguequi,
tu' rilé'enē' dza udxi quéguequi.
- 14 Nupa tuá' dö' chigula'béaj guíe tuchi' quéguequi,
en nuá'gaca uxiti' yaga quéguequi
para ulu'xicja nupa ta'zaca' zi', en ta'yadzaj ta'yudxi,
en para iluti nupa tun le naca dxi'a.
- 15 Guíe tuchi' quéguequi ila'chiza la' ládxi'do'guequisö,
ate' ila'guítsaj uxiti' yaga quéguequi.
- 16 Dxi'atērö le do' dēsö queë' bönni' tsahui'
ca le zían dē queë' bönni' ru'ë dö'.
- 17 Huayúzjagaca ná'agaca nupa tuá' dö',
pero Xanru' caz rácalenē' nupa nácgaca tsahui'.
- 18 Ruí'i ladxi' cazē' Xanru' nupa biti' bi xigua' nabága'gaca,
ate' guéquitica'sö xiyúgaca quéguequi.
- 19 Biti' ca' ulu'tuí'i cate' idxín dza biti' gaca dxi'a,
en cate' tsu'u gubín, gáta'dëra le ilágugaca.
- 20 Ulu'niti tsaz nupa tuá' dö',
ate' nupa biti' ta'lé'e dxi'a Xanru' ilaca ca yöl-la' lachi que guixi'.
La' töditē quéguequi, en ilaca ca dzön le rinítitē.
- 21 Ta'nábini nu bi gunna quéguequi tu chí'isö, pero biti' ca' ulu'bí'i lē na'.
Nu naca tsahui' ruzá ladxi' quéguequi, en runödzej quéguequi.
- 22 Gaca luyú quégaca nupa run lá'ayē' Xanru',
pero ila'niti tsaz nupa rudxiē' Lē' dö'.

23 Le runë' bönni' dxi'a naca le nuluí'inë' Xanru' lë',
 ate' raza ládxe'ë Lë' le runë' bönni' na'.
 24 Cate' röjtsö'ë, biti' ca' röjtsö'ë tsaz,
 tu' röjzönë' Xanru' caz bönni' na'.
 25 Guca' ra'bando', pero na'a nagula',
 en catu caz bilé'eda' nusán në'ë Dios bönni' tsahui',
 en catu caz bilé'eda' riyadzaj le ilágubi' zxi'inë'.
 26 Yugu' dza ruzá' ládxe'ë bönni' tsahui' quéguequi luzë'ë
 en runödzejë' le ta'nábini lë' unödzejë' tu chí'isö,
 Nácagacabi' zxi'ini xi'sóë' tu le run ga raza dxi'a queëru'.
 27 Buli'cá'ana le cabi' nácatë, en guli'gún le naca dxi'a.
 Channö caní gunli', sóali' tsaz,
 28 tu' nadxi'inë' Xanru' nu run le naca tsahui',
 en catu caz usán në'ë nupa néquiquequi quez queë'.
 Gun chí'itica'së' léguequi,
 pero usunítië' zxi'ini xi'sóagaca nupa tuá' dö'.
 29 Guequi luyú quégaca nupa nácagaca tsahui',
 ate' ila'cuá'tica'sö luyú na'.
 30 Ru'ë bönni' tsahui' didza' le napa yöl-la' réajni'i,
 ate' raza yöl-la' ruchi'a rusörö ni'a que didza' na' ru'ë.
 31 Yu'u icja ládxi'da'ahuë' le gunná bë'ë Dios.
 Que lë ni na' catu caz ichixi iníguinë'.
 32 Ruyuda' nu ruá' dö' le runë' bönni' tsahui',
 en riguilaj nacxi gaca guti lë'.
 33 Xanru' biti' gu'ë nu na' lataj bi gun queë' bönni' tsahui' na',
 en biti' gu'ë lataj irugu queë' cate' nu uchi'a usörö queë'.
 34 Buli'zxöni ládxe'ë Xanru', en guli'gún ca ré'ënë' gunli',
 ate' uchisë' libí'ili' para guequi queëli' luyú.
 Cate' udxi quégaca nupa tuá' dö', hualé'e quézili' le.
 35 Bilé'eda'-në' bönni' huía' dö'.
 Gúquië' ca tu yaga zxön, en buzí'de'enë' xibé.
 36 Ní'irö gudödi queë', en bíti'rö zoë'.
 Yöjdi'la' lë', pero biti' ca' guca udzöli'da' lë'.
 37 Buli'yú ca náquië' bönni' tsahui'.
 Cuntu nu gaca bi innë' queë',
 tu' ila'cuá'abi' zxi'ini xi'sóë' bönni' zxön ladxi'.
 38 Ulu'niti tsaz nupa tu'cá'ana le gunná bë'ë Dios.
 Usiúdxë' Xanru' yugu' zxi'ini xi'sóagaca nupa tuá' dö',
 39 pero rusölá cazë' nupa nácagaca tsahui'.
 Rutipë' ládxi'guequi cate' bi raza quéguequi.
 40 Rácalenë' léguequi, en rusölë' léguequi.
 Rubéajë' léguequi lu ná'agaca nupa tuá' dö', en rusölë' léguequi,
 tu' tu'zxöni ládxi'guequi Lë'.

38

1 Biti' ilenu' neda', Xan, en biti' uzenu' neda' bach.
 Biti' gunu' neda' xigua' lu yöl-la' rilé' quiu'.
 2 Ben zi'u neda', en budxiú' neda' huë'.
 Nuzötju' neda' len no'o.
 3 Yu'a yödzöhuë' zxön tu' rilenu' neda'.
 Dxía huë' idütë' le naca' tu' nözi dul-la' nabága'a.
 4 Xigua' nabága'a naca ca tu nísado' ga ruchicja' nisa.

Naca ca tu yua' zi'i nabága'a neda'.

⁵ Tu' bena' yugu' le cabí naca dxi'a,
dxía' huë' le rilá' siguti, en rudzu'.

⁶ Narecji' cúdza'a, en nagá'ana' cá'asö.

Idú dza ruhuí'inide'eda'.

⁷ Idútë le naca' yú'uda'a xilá,
ate' nazzí xipéla'a.

⁸ Rudú ládxa'a, en ricuídi'da'.

Rinnëda' ládxa'a tu' ruúbi ruguí'i ládxi'da'ahua'.

⁹ Nöz quézinu' Li', Xan, le rizé ládxa'a,
en riyönnu' le rinnética'sö ládxa'a.

¹⁰ Richunchu ládxi'da'ahua', en ricuidi' ládxa'a,
ga ridxintë richul-la guiöj lahua'.

¹¹ Bítirö ta'dzaga neda' yugu' luzá'a, en yugu' böcha'a, tu' nözi xihuë'a,
ate' tu'biga' di'a dza quia' ga zoa'.

¹² Nupa té'ëni iluti neda' ta'bequi le ila'zön neda',
ate' nupa té'ëni ulu'cul-la neda' tun xtídza'guequi nacxi ulu'suniti neda'.
Idú dza ta'bequi ícjaguequi bi ilún quia'.

¹³ Naca' ca tu bönni' nacödzuë', en bítirö riyönda'.

Naca' ca tu bönni' narugu lúdxë'ë, en biti' risaljë' ru'ë.

¹⁴ Naca' ca tu bönni' bítirö riyönnë',
en que lë ni na' biti' bi didza' rubi'ë.

¹⁵ Tuzu' Li' ruzxöni ládxa'a, Xan.

Ubí'i cazu' didza', Xana' Dios.

¹⁶ Biti' gu'u lataj ulu'dzeja ni'a que le raca quia'.

Biti' gu'u lataj ilún ba zxon cúnguequi tu' nagá'ana' cá'asö.

¹⁷ Chizóa' tsöjbixa',
en zóaléntica'sö xihuë'a neda'.

¹⁸ Que lë ni na' rixóalëpa' xiguia' nabága'a,
en risëbida' ládxa'a tu' nözi dul-la' nabága'a.

¹⁹ Nacuá' dxi'a, en nál-lagaca nupa téqui neda' zi'.

Nayánda' nupa tu'dí'i neda', en biti' bi nuna' quéguequi.

²⁰ Ta'dá'baga' neda' nupa tu'bí'i le cabí naca dxi'a que nu run le naca dxi'a.
Caní tun tu' ruí'i ládxa'a guna' le naca dxi'a.

²¹ Biti' usán no'o neda', Xan.

Biti' ubigu' ga zoa', Dios quia'.

²² Gudáchi gácalenu' neda', Xan,
tu' naca cazu' Li' Nu rusölá neda'.

39

¹ Gunnía': Gun chí'i cuina' ca naca le runa',
en biti' guna' dul-la' ca naca didza' ruá'a.

Biti' bi didza' gu'a
cate' nacuá' nupa tuá' dö' gal-la' ga zoa'.

² Guzóa' dxisö, en biti' bë'a didza' ga bidxintë
biti' gunnía' le naca dxi'a, pero biyali' xihuë'a.

³ Bubi buguí'i ládxi'da'ahua',
en cate' guzá' ládxa'a que, guyegui gulá ládxi'da'ahua'.

Que lë ni na' gunábida'-në' Xanru', gunnía':

⁴ Xan, ¿gáca'xte caz soa' ibana'?

Buluí'i neda' tsca iz soa' ibana'.

Ben ga inözda' channö chizóa caz gátia'.

⁵ Nabábasö dza nuzú' quia' soa' ibana'.
Yugu' iz soa' ibana' bití' bi zeaj naca lo' Li'.

Le nácatë bití' bi nácacaca yúgu'të bönachi nacué' luyú ni.

⁶ Nácacacasö ca tu zxul-la rigú'u böaj.
Nítisö tu'úbi tu'guí'i ládxi'do'guequi, en tun dxin.
Tu'tubi yöl-la' tsahui', pero bití' nözguequi nuzxi guequi que.

⁷ ¿Bizxi caz gaca guna' löza, Xan?

Ruzxöni ládxa'a Li'.

⁸ Busölá neda' lu xigua' nabága'a,
en bití' gu'u lataj ulu'titaj quia' nupa nácacaca canöz.

⁹ Soa' dxisö, en bití' bi didza' gu'a,
tu' ben cazu' Li' ga riguí'i rizáca'a lë ni.

¹⁰ Bítí'rö gunu' neda' xigua'.

Chizóa gátia' tu' rusaca' zi'u neda'.

¹¹ Runu'-në' xigua' bönni' dul-la', en ruzenu' lë' bach.

Ca tu'töba' bëlado' que le yú'uba', rusunítu' le ruí'i ládxi'ë bönni' na'.
Bití' bi naca cazë' bönni' dul-la' na'.

¹² Buzë nagu' le rulidza' Li', Xan, en le rinábida' Li'.

Bití' su' dxisö cate' ribödxá' lo' Li',
en bití' gaca' ca tu bönni' zi'tu' lo' Li',
en ca tu bönni' ridasë' ca guláquië' xuz xtó'otu'.

¹³ Benna neda' lataj idipa ládxa'a
zí'alö ca uzá'a yödzölió ni, en bítí'rö soa'.

40

¹ Lu yöl-la' riböza zxön ladxi' quia' gulöza' gácalenë' Xanru' neda'.

Ní'irö buzë naguë' quia', en biyönnë' le bulidza'-në'.

² Bubéajë' neda' ca tu lu yeru ga rë', en lu guna' zili.

Buzöë' neda' tu lu guiöjto'o, en guléquië' neda' tsutsu.

³ Busëdinë' neda' tu le cubi le rul-la' le naca yöl-la' ba queë' Dios queëru'.

Zián nupa ila'lé'eni lë ni, en ilún Lë' zxön,
ate' ulu'zxöni ladxi'-në' Xanru'.

⁴ Bica' ba bönni' ruzxöni ládxi'ë Xanru'.

Bití' runë' tsözxön nu run ba zxön cuini, nu na' run zxön yugu' dios núngaca
bönachi.

⁵ Ziántërö naca le nunu' queëtu', Xana' Dios, yugu' le tun ga rubánitu'.

Ziántërö le yu'u icja ládxi'do'o ca naca le gunu' queëtu'.

Bití' ca' gaca nu ulaba lo' Li' tsca nácacaca.

Channö gué'ënda' nu usiyönda' tsca nácacaca,
nayántërö tsca le gaca ulaba'.

⁶ Bití' rë'ënu' gütigaca'-ba' böa' guixi' lo', en calëga bi cu'a lo'.

Bití' rinabu' uzëgui'gaca'-ba' böa' bëdxi lo',
en calëga tu le guna' lo' para ugúa dul-la',
pero gusalju' naga' para yönda' le guío' neda'.

⁷ Que lë ni na' gunnía': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca rë'ënu' Li', Dios quia'.

Nagu'a icja ládxi'da'ahua' xibá naguixju' Li'.

⁹ Ga tu'dubi bönachi guizxi yu quiu', Xan,
busiyönda' léguequi nacu' tsahui'.

Biti' ca' guzóa' dxisö.

Nöz quézinu' lè ni, Xan.

¹⁰ Biti' bucáchi'za' icja ládxi'da'ahua' ca ruúnu' tsahui' bönachi.

Bulu'a lahui ca runu' ca rnno', en ca rusöló' bönachi.

Ga nudúbigaca bönachi quiu' biti' guzóa' dxisö,

pero bē'a didza' ca nacu' dxi'i ladxi', en ca ru'u didza' le nácatē.

¹¹ Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídz'u ilún chí'itica'sö neda'.

¹² Zián le raca quia' nagú'ugaca neda' lé'ajlö, le cabí gaca nu ulaba.

Nabága'a yugu' dö' bi'a, en bítirö gaca ilé'eda'.

Nayanrö ca guitsa' icja', ate' rudú ládxa'a.

¹³ ¡Busölá neda', Xan!

¡Gudáchi gácalenu' neda', Xan!

¹⁴ Ben ga ulu'tuí'i, en ila'bö' baguí'i

nupa na' tē'ēni ulu'suniti neda'.

Ben ga ulu'huécaj, en ulu'gá'ana cá'asö

nupa na' tē'ēni gaca quia' le cabí naca dxi'a.

¹⁵ Ben ga ulu'dú ládxi'gaca tu' nabíxigaca

nupa na' tu'titaj neda', ta'nná: “¡Buyútsöca' le raca queē'!”

¹⁶ Ben ga ulu'dzeja, en ulu'zí' xibó' yúgu'tē nupa tu'guilaj Li'.

Ben ga ila'nnática'sö nupa ta'dxi'i yöl-la' rusölá quiu',

ila'nná: “Nayépsētērē' Xanru'.”

¹⁷ Nacuídi'da', en biti' bi gaca guna',

pero ruí'i ladxi' cazu' Li' neda', Xan.

Naca cazu' Nu rácalen neda', en Nu rusölá neda'.

Biti' tsenu' guídu' quia', Dios quia'.

41

¹ Bica' ba bönni' ruí'i ládxi'ē nupa nácagaca yechi'.

Xanru' gácalen cazē' bönni' na' cate' bi gaca queē'.

² Xanru' Dios gun chí'ē lē', en gunē' ga soē' ibanē'.

Gunē' ca' ga uzi'ē xibé xiyú cazē'.

Biti' usán nē'ē lē' lu ná'agaca nupa biti' ta'lé'e lē' dxi'a.

³ Xanru' utipē' ládxi'ē bönni' na' cate' ré'enē'.

Uchisē' lē' lu da'a le ráti'nē', en gunē' ga soē' dxi'a.

⁴ Gunnía': Bena' dul-la' lo' Li', Xan.

Buéchi' ladxi' neda', en bun neda'.

⁵ Nupa biti' ta'lé'e neda' dxi'a ta'nnē' quia', ta'nná:

“¿Bátaxi gátie', en huáca gal-la ládxi'gaca bönachi lē'?”

⁶ Channö uduyúgaquiē' neda', ta'zí' yē'ē.

Ta'güē' didza' ca naca le raca quia',

en cate' ta'rúajē', tu'siyönnē' bönachi.

⁷ Tu'dubi nupa biti' ta'lé'e neda' dxi'a, en ta'nnē' quia'.

Ta'zá' ládxi'gaca zián le naca dö' le ilún quia'.

⁸ Ta'nnē' quia', ta'nná: “Yu'ē yödzhüé' le guti lē'.

Bítirö caz huóásē' ga na' dē' lu le denē'.”

⁹ Lē'sca' caní benē' böchi' luzá'a ruzxöni ládxa'a-nē'.

Bönni' gudágulenë' neda' tsözxön ridá'baguë'ë neda'.

¹⁰ Buéchi' ladxi' neda', Xan, en bun neda',
ate' ubí'i caza' quégaca nupa na' biti' ta'lé'e neda' dxi'a.

¹¹ Gácabe'eda' raza ládxi'u neda',
tu' cabí ulu'xicja neda' nupa biti' ta'lé'e neda' dxi'a.

¹² Gáclen cazu' neda' tu' runa' le naca dxi'a.
Gunu' ga sóatica'sa' lo' Li'.

¹³ ¡Yöl-la' ba Xanru', Dios quégaca bönachi Israel!
¡Guli'cu'ë yöl-la' ba na'a dza, en yugu' dza si' zaca!
¡Ca' gaca!
¡Ön, ca' gaca!

42

¹ Ca rizé ládxi'ba' bidxina' guixi' nisa yégudo',
lësca' caní rizé ládxa'a Li', Dios.

² Ribidxi ládxa'a Li' cazu', Dios.

¿Bátaxi udxina' ga dë quia', en tsu'a le yúbölö yudo' lá'ayi quiu'?

³ Rëla, en te dza ribödxá', en biti' bi rahua'.

Yugu' dza nacua' nupa ta'nábini neda', ta'nná: "¿Gazxi caz zoa Dios quiu'?"

⁴ Risëbi ládxa'a cate' röjneda' ca guca zí'alö,

cate' guzá'lena' bönachi guizxi yu, en yöjnörúa' láhuilöguequi ra' yu'u queë'
Dios.

Lu yöl-la' rudzeja queëtu' bíl-latu', en guyéaj ládxi'tu'-në' Xanru', en bentu' laní.

⁵ ¿Bizx que risébida' ládxa'a, en bizx que rö'a böniga?

Uzxöni ládxa'a-në' Xanru' Dios, tu' huadxín dza cu'a-në' yöl-la' ba le yúbölö.

Náquië' Nu rusölá neda', en náquië' Dios quia'.

⁶ Risébida' ládxa'a, Dios quia'.

Que lë ni na' tsöjneda' Li' tsanni ni zoa', ridá' rizxúnna' ra' yegu Jordán,
en tsanni ni ridá' lu guí'a Hermón, en lu guí'a Mizar.

⁷ Ca tu guziú' rinnë lu nísado', en ca bö ruí'i tu budoá' nísado' queë' Dios,
caní rinnë ladxi' bö' naca caza' lu yöl-la' risëbi ladxi'.

⁸ Rinábida'-në' Xanru' huéchi' ládxi'ë neda' yugu' dza.

Yugu' dzö' rul-la' yöl-la' ba queë' Lë',

en rulidza' Dios, ruí'ilena'-në' didza', Nu na' runna quia' yöl-la' na'bán.

⁹ Guía'-në' Dios, Nu ruzóa neda' tsutsu, innía': ¿Bizx que nál-la ládxi'u neda'?'
¿Bizx que run bayúdx quí'i sáca'tica'sa' lu ná'agaca nupa biti' ta'lé'e neda'
dxi'a?

¹⁰ Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bizx que risébida' ládxa'a, en bizx que rö'a böniga?

Uzxöni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

43

¹ Guléaj neda' tsahui', Dios, en bë' didza' uláz quia' lógaca bönachi tuá' dö' quia'.
Busölá neda' lu na' nu rizi' yë', en biti' naca tsahui'.

² Li' cazu' nacu' Dios, Nu rutipa ládxa'a. ¿Bizx que nusán no'o neda'?

¿Bix que ruhu' inida' tu' ta' bía no neda' nupa tu' dí' i neda'?

³ Gusól-la' quia' bení' quiu', en le naca idútë li quiu' para ulu' lu' i neda' nöza. Ben ga ila' chë' neda' ga naca lá' ayi quiu', ga na' zoa cazu' Li'.

⁴ Tsu'a ra' bucugu queë' Dios.

Ibíga'a lahuë' Dios, Nu run ga rudzëjade' eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bix que risëbida' ládxa'a, en bix que rö'a böniga?

Uzxöni ládxa'a-në' Xanru' Dios,
tu' huadxín dza cu'a-në' yöl-la' ba le yúbölö,
tu' náquië' Nu rusölá neda', en náquië' Dios quia'.

44

¹ Biyön quézitu' le, Dios.

Bulu'siyönnë' netu' xuz xtó'otu'
ca naca yugu' le zxön benu' dza ni'te,
cate' ni' gula'cu'ë légaquië' luyú ni.

² Bulaga cazu' Li' bönachi yugu' yödzö izá'a,
en bucuásu' légaquië' luyú ni.

Busaca' zi'u bönachi izá'a na', en gurú'unu' léguequi.

³ Biti' gula'déli'në' xuz xtó'otu' luyú ni rácasö quégaquië',
en biti' bulu'sölá la' cuíngacasë',
pero ben cazu' Li' lë na' len yöl-la' huáca zxön quiu',
en lu yöl-la' zxön que le naca cazu',
ate' bulú'u lahui ca nadxí'inu' légaquië'.

⁴ Naca cazu' Li' Dios quia', en Nu rinná be'e neda'.

Busölá bönachi quiu', yugu' zxí'ini xi'sóë' Jacob.

⁵ Uguntu' dxin yöl-la' huáca quiu', uxícjatu' nupa ta'dá'baga' netu',
ate' tu' zóalen cazu' netu', ucúl-latu' nupa biti' ta'lé'e netu' dxi'a.

⁶ Biti' uzxöni ládxa'a uxiti' yaga quia',
en biti' uzxöni ládxa'a guíë tuchi' quia' para ilácalen neda',

⁷ tu' rusölá cazu' Li' netu' lu ná'agaca nupa biti' ta'lé'e netu' dxi'a,
en ruzötju' nupa tu' dí' i netu'.

⁸ Cú'utica'stu' Li' yöl-la' ba,
en guíëtica'stu' Li': "Xclenu'."

⁹ Pero na'a nusán no'o netu', Dios, en bë'u lataj nu buxicja netu'.
Bíti'rö réajlenu' bönni' queëtu' röjáquië' gudil-la.

¹⁰ Benu' ga buzúnajtu' lógaca nupa ta'díl-lalen netu',
ate' gula'guë' yugu' le nequi queëtu'.

¹¹ Bë'u lataj gulútië' ziantu' ca nu rúti-gacaba' bö'cu' zxila'.
Bësilásiu' netu' ladjagaca yödzö izá'a.

¹² Naca tsca bëti'u netu', en láti'do'os guzxi'u.
Biti' ca' buzi'u xibé tsca guzxi'u.

¹³ Bönachi yugu' dzaga yödzö queëtu' bila'lé'e lë na' benu' queëtu',
ate' tu' cá'ana netu' cá'asö, en tu'titaj netu'.

¹⁴ Benu' ga tu'didza' yudxi bönachi yugu' yödzö netu'.
Tu'tá ícjaguequi lu yöl-la' rucá'ana netu' cá'asö.

¹⁵ Yugu' dza rutuí'ida' ca raca queëtu',
en rö'a böniga lu yöl-la' rutuí' i quia',

¹⁶ tu' riyönda' nupa tu'didza' yudxi neda', en tu' cá'ana neda' cá'asö,

nupa na' biti' ta'lé'e neda' dxi'a, en tu'dí'i neda'.

¹⁷ Guca queëtu' yúgu'të læ ni sal-la' biti' nál-la ládxi'tu' Li',
en biti' nucá'anatu' didza' dzaga bénlenu' netu'.

¹⁸ Biti' ca' böaj ládxi'tu' ca réajlë'ëtu' Li',
en biti' gudá'baga'tu' le buluí'inu' netu' guntu'.

¹⁹ pero nusán na' cazu' netu' ladaj nupa nácagaca ca yugu' böa' gui'a sínia',
en nucá'anu' netu' ga chizóa tseajtsázatu' lataj chul-la.

²⁰ La'tu' gul-la ládxi'tu' Li', Dios queëtu',
o la'tu' guyéaj ládxi'tu' tu dios izá'a,

²¹ la' gáquibe'etënu' læ ni, Dios,
tu' nöz quëzinu' le rizá' ládxi'tu'.

²² Tu' néquitu' quiu' Li' zóatica'sö nu guti netu'.
Nactu' ca yugu' bö'cu' zxíla'do' lo nu guti légacaba'.

²³ ¡Bubán, Xan! ¿Bizx que rásitso' Li'?

¡Guyasa! ¡Biti' usán no'o netu' chadía chacanna!

²⁴ ¿Bizx que nucachi' lo' lotu' netu'?

¿Naru' nál-la ládxi'u' ca raca queëtu', en ca riguí'i rizáca'tu'?

²⁵ Naguíngaquië' netu' luyú.

Nadínitu' lu bëchtö yu.

²⁶ ¡Gudáchi gácalenu' netu',
en lu yöl-la' dxi'i ladxi' quiu' busölá netu'!

45

¹ Rizá' ládxa'a tu le naca dxi'a.

Ru'a didza' que le runë' bönni' rinná bë'ë.

Naca lúdxa'a ca le ruzúajlenë' bönni' nabé'ede'enë' ru'ë didza'.

² Nácatëru' Li' lachi ca yúgu'të bönachi.

Nabé'ede'enu' ru'u didza'.

Que læ ni na' nunë' Dios gaca dxi'a quiu' chadía chacanna.

³ Bega' læ'u guíë tuchi' quiu', bönni' nayëpisë',
lu yöl-la' lachi quiu', en lu yöl-la' unná bë' quiu'.

⁴ Lu yöl-la' unná bë' quiu' idéli'nu' lu gudil-la,
ugunu' dxin le naca idútë li, en yöl-la' nöxaj ladxi', en le naca tsahui'.
Yöl-la' huáca zxön quiu' gun ga ilá' lahui yugu' le zxöntëro.

⁵ Natúchi'gacada' yaga lahui tuchi' quiu'.

Bönachi yugu' yödzo' zi'tu' ta'dzö'ö lo', nupa na' ta'díl-lalen li'.

Yugu' yaga lahui tuchi' quiu' nachöza'gaca ládxi'do'guequi.

⁶ ¡Chadía chacanna naguixju' ga rö'u rinná bë'u, Dios!

¡Ca naca le naca tsahui' rinná bë'enu' bönachi quiu'!

⁷ Nadxí'inu' le naca tsahui', en biti' rilé'enu' dxi'a le biti' nácatë.

Que læ ni na' Dios quiu' nabö cazë' li'.

Nachízirë' icja ládxi'do' o yöl-la' rudzeja ca le nápagaca ia'zíca'rö bönachi.

⁸ Rilá' zxixi lari' nacu' len zi' mirra, en zi' áloe, en zi' casia.

Tunë' bönni' huil-la ga rudzéjanu' lu yu'u lidxu' zxön.

⁹ Yugu' nigula zxí'inigaquië' bönni' ta'nná bë'ë
nútsa'gacabi' bi'i nigula nacuá'abi' lidxu'.

Nigula quiu' rinná bë'enu' zuínu' cuitu' ibëla,
en nácunu le nazí'i biquitaj oro nazaca'.

10 Bë' ladxi' neda', nigúlado'.
 Bë' ladxi' neda', en biyön xtídza'a.
 Gul-la ladxi' bönachi yödzö quiu', en yugu' di'a dza quiu'.
 11 Ní'irö së ládxe'ë bönni' rinná bë'ë yöl-la' lachi quiu'.
 Buzóa zxibu' lahuë' tu' náquië' xanu'.
 12 Ní'irö bönachi yödzö Tiro ila'dxín lo' nuá'gaca le nazáca'da' le ilunna quiu'.
 Yugu' bönni' ta'lé'enë' yöl-la' tsahui' ila'nábinë' li' bi unödzju' quégaquië'.
 13 Yugu' bi'i nigula queë' bönni' rinná bë'ë zóagacabi' lidxe', en nácatërögacabi'
 lachi.
 Lari' nácubi' nadíalen du oro.
 14 Ila'ché'ë-bi' lahuë' bönni' rinná bë'ë, nácubi' lari' nazáca'da'.
 Ila'dabi' yugu' bi'i nigula ra'bando' cúdzi'löbi',
 ate' ila'ché'ë légacabi' lahuë' bönni' na' rinná bë'ë.
 15 Lu yöl-la' rudzeja, en lu yöl-la' ruzí' xibé quégacabi' ila'dxinbi',
 en ila'yázabi' yu'u lidxe' bönni' na' rinná bë'ë.
 16 Ila'cuá'abi' bi'i bönni' quiu' uláz quégaquië' xuz xto'o.
 Gunu' ga ila'nná bë'ëbi' idútë yödzölió.
 17 Gunu' ga tsöjnégacatica'sö bönachi ca nacu' Li'.
 Que lë ni na' yúgu'të bönachi ilé li' "Xclenu" yugu' dza si' zaca.

46

1 ¡Náquië' Dios Nu run chi'i rë'u, en Nu ruzóa rë'u tsutsu!
 ¡Zóatica'së' gácalenë' rë'u cate' bi' raca queëru'!
 2 Que lë ni na' biti' gádxiru' sal-la' izxizi idútë yödzölió,
 en ila'niti yugu' guí'a lu nísado',
 3 en sal-la' chasa idxía, en tsu'u bö nísado' na',
 en ila'zxizi guí'ado' tu' nözi le raca.
 4 Zoa tu yegu le run ga tu'dzeja nupa nacué' ladzë' Dios,
 ga na' rö'ö yudo' lá'ayi ga zoë' Dios nayépisëtëre'.
 5 Zoa cazë' Dios yödzö na', le catu caz initi.
 Cate' ni' soa itö yu gácalenë' nupa nacué' ni'.
 6 Tadxí ta'dzöbi bönachi yugu' yödzö,
 ate' ta'bö' baguí'i nupa ta'nná bë',
 tu' ru'ë didza' Dios, ate' riniti luyú ni.
 7 Xanru' nayépisëtëre' zóalen cazë' rë'u.
 Dios quégaca zxi'ini xi'söë' Jacob rapa chi'ë rë'u.
 8 Guli'dá ilé'eli' le nunë' Xanru'.
 Buli'yú ca nusunítië' luyú ni.
 9 Ruzóa dxíë' gudil-la rácagaca idútë yödzölió.
 Riguitsjë' yugu' uxiti' yaga,
 en rusunítië' yugu' yaga lahui tuchi' que gudil-la.
 Ruzégui'ë yugu' carreta que gudil-la tu lu guí' zxön.
 10 Rnnë': "Guli'sóa dxisö, ate' guéquibe'eli' naca caza' Dios.
 Nayépisëtëra' yugu' lu yödzö, en lu idútë yödzölió."
 11 Xanru' nayépisëtëre' zóalen cazë' rë'u.
 Dios quégaca zxi'ini xi'söë' Jacob rapa chi'ë rë'u.

47

1 ¡Lu yöl-la' rudzeja queéli' guli'capa' ná'ali', bönachi yúgu'të yödzö!
 ¡Guli'cu'ë yöl-la' ba Dios, len yugu' le rül-lalenli'!

2 Ral-la' gunru' bal Xanru' Dios nayëpisëtërë'.
 Náquië' Nu rinná bé' idútë yödzölió.
 3 Benë' ga bidéli'ru' yugu' lu bönachi izá'a.
 Benë' ga rinná be'eru' yugu' yödzö.
 4 Gurö cazë' luyú ga ni nuzóë' rë'u.
 Naca tu luyú lachi quégaca xzí'ini xi'sóë' Jacob, nupa na' nadxí'i quézinë'.
 5 Len yöl-la' ba zxön ribenë' Dios ga rö'ë rinná bé'ë.
 Le zían le tu'cödxë' cate' ribenë' Xanru' ni'.
 6 ¡Guli'gul-la yöl-la' ba queë' Dios! ¡Guli'gul-la!
 ¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!
 7 ¡Rinná bé'ë Dios idútë yödzölió ni!
 ¡Idú ládxi'li' guli'gul-la yöl-la' ba queë'!
 8 ¡Zoa cazë' Dios lataj lá'ayi queë' ga rö'ë rinná bé'ë!
 ¡Rinná bé'enë' bönachi yúgu'të yödzö!
 9 Tu'dubi nupa ta'nná be'e yugu' yödzö
 tsözxön len bönachi queë' Dios queë' Abraham.
 10 ¡Nequi queë' Dios yöl-la' zxön quégaca yúgu'të yödzö nacué' yödzölió!
 ¡Nayëpisëtërë' Lë'!

48

1 Nayëpisëtërë' Xanru', ate' run bayudxi cú'uru'-në' yöl-la' ba idú ládxi'ru'
 ga zoa lu yödzö queë' Dios queëru' le zoa lu guí'a lá'ayi queë'.
 2 Lachi, en sibi naca guí'a lá'ayi na',
 ate' raza ládxi'gaca bönachi idútë yödzölió ca naca.
 Caní naca guí'a Siön le rö'ö tsölá'alö ga za' bö' ziaga.
 Lu yödzö na' dë ga zoa Bönni' Unná Bë' nayëpisë'.
 3 Rulu'ë lahui Dios sóaru' tsutsu cuitë' Lë'
 ga zoa lu yu'u lidxë'.
 4 Gula'dá'baga' nupa ta'nná bé' lu yu ni,
 en gula'bígui'ë ra' yödzö lá'ayi na'.
 5 Cate' bila'lé'enë' yödzö na' bulu'bánninë'.
 Gula'bö'ë böniga, en la' bulu'zxúnnajtë'.
 6 Ra' yödzö na' gula'zxízië'.
 Gula'zaca' zi'ë ca raza queënu nigula chizóa uzóanu-bi' bí'ido'.
 7 Risól-lë'ë Dios tu bö' budunu',
 le rusuniti yugu' barco zxön que yödzö Tarsis.
 8 Biyönru' ca náca gaca le zxön benë' Dios,
 ate' na'a rilé'e quéziru' le runë',
 lu yödzö lá'ayi queë' Dios quégaca ni'a në'ë guizxi yu,
 en náquië' ca' Dios queëru'.
 Tsaz naguixjë' yödzö na'.
 9 Ga zoa lu yudo' quiu', Dios,
 röjnetu' ca naca yöl-la' dxi'i ladxi' quiu'.
 10 Ca nayëpisëtërö Lo', Dios,
 ca' ta'gú'u Li' yöl-la' ba bönachi idútë yödzölió.
 Ca naca le naca tsahui' rinná bé'u.
 11 Ulu'dzeja bönachi nacué' yödzö Siön.
 Ulu'zí'inu xibé nigula xzí'ini xi'sóë' Judá
 tu' ruchi'a rusöröu' netu' ca naca le naca tsahui'.

12 Guli'dá idú gásibi'ilö ga dë yödzö Sión,
en buli'laba yugu' yu'u sibi tun chi'i yödzö na'.

13 Buli'yú ca naca zö'ö run chi'i yödzö na',
en buli'yú ca' le nuzóagaca le tsutsu,
para gaca quíxjöi'ili' xzí'ini xi'sóali' ca náquië' Dios zxön ni.

14 Tsaz náquië' Dios queëru', na'a dza, en dza si' zaca.
Ulu'inë' rë'u nöza tödi gátiru'.

49

1 Guli'yöni lë ni, libí'ili', bönachi yúgu'të yödzö.

Buli'zé nágali', libí'ili', zóali' idútë yödzölió.

2 Libí'ili', nayépsëtërolí', en libí'ili', nácali' cá'asö.
Libí'ili', dë yöl-la' tsahui' queéli', en libí'ili', nácali' yechi'.

3 Tsöjsá' ládxa'a ca naca le nápagaca yöl-la' réajni'i,
en gu'a didza' le nápagaca yöl-la' raca yenni'.

4 Güi'i ládxa'a ca naca tu le rucudzu' didza',
en quíxjö'a ca nápagaca tsanni quinnia' lë'e bihuël-la.

5 Biti' bi rádxida' cate' ridxín bi raca quia',
cate' ta'gu'ë neda' lë'ajlö bönni' tuá' dö' biti' ta'lé'enë neda' dxi'a.

6 Tu'zxöni ládxe'ë bönni' na' yöl-la' tsahui' quégaquië',
en tun ba zxön cuíngaquië' ca nápagaca le dë quégaquië'.

7 Biti' gaca huóá'uë' la' cuinsë' nitüë' bönni' na'.
Biti' gaca bi unödzjë' queë' Dios le gun ga usölë' lë',

8 tu' naca zxöntëro le huóá'u yöl-la' na'bán que nu bönni',
ate' catu caz gaca nu bönni' quizzjë' ca naca,

9 para idéli'në' sóatica'së' ibanë',
en cabí tsázië' yeru ba ga yú'ugaquië' bönni' nati.

10 Rilé'enë' tatië' ca' bönni' ta'yéajni'inë',
en ta'nitië' tuz ca tati nupa biti' bi nözigaca, en nupa biti' ta'yéajni'i,
ate' tu'cá'anë' yöl-la' tsahui' quégaquië' le ulu'zí' xibé bönachi yúbölö.

11 Téquinë' ila'cuá'tica'sö lídxigaquië' bönni' na',
ate' tsaz ila'cu'ë ni',

ate' ta'gu'ë lágaca xiyúgaquië' ca naca la' lágacasë'.

12 Pero yöl-la' ba zxön napë' bönni' na' biti' gun ga sóatica'së'.
Gati cazë' ca tátiba' böa' guixi'.

13 Caní naca le gaca quégaquië' bönni' tu'zxöni ládxe'ë yöl-la' tsahui' quégaquië',
enca' quégaca xzí'ini xi'sóagaquië',
yugu' bi'i na' ta'yaza ládxi'gacabi' didza' gulu'ë xúzgacabi' na'.

14 Ilátië' ca tátiba' bö'cu' zxila',
ate' yöl-la' guti gaca quégaquië' ca tu nu uyú bö'cu' zxila'.

Yugu' bönni' tsahui' ila'nná bé'enë' légaquië' cate' itó yu zila.

Ila'niti le guta' quégaquië', ate' ila'cuá'tica'së' lataj chul-la ga dzö'ö nupa
nátigaca.

15 Huóá'u cazë' Dios yöl-la' na'bán quia' lu yöl-la' guti,
tu' ichë'ë neda' ga tsöjsóalena' Lë'.

16 Biti' gádxinu' cate' idéli'në' nu bönni' yöl-la' tsahui' zxön,
en cate' xön yöl-la' lachi que yu'u lidxë',

17 tu' cabí bi u'ë cate' gátië',
en biti' tséajlen lë' yöl-la' lachi que le guta' queë'.

18 Sal-la' cate' ni' zoë' nabanë' buzí' xibé bö' naca cazë',
ate' gula'gú'u bönachi lë' yöl-la' ba cate' bidéli'në' yöl-la' tsahui' na'.

19 Tsázië' ga na' dzö'ë xuz xtá'ahuë',

en bíti'rö ilé'enë' bení'.

²⁰ Náquië' bönni' napë' yöl-la' zxön, pero riyádzjanë' yöl-la' réajni'i, ca böa' guixi' tati cázaba'.

50

¹ Ru'ë didza' Xanru' Dios nayépisëtë'rë'.

Nutubë' dërö nupa nacuá' yödzülió ga naguéla'të ga rilén gubidza ga ridxintë ga ribía.

² Lu yödzü Sión rigu'ë Dios bení'.

Napa yödzü na' yöl-la' lachi idú.

³ Zë'ë Dios queëru', en biti' soë' dxisö.

Tsöjnöru lahuë' tu guí' zxön, ate' tsecja tu bö' budunu' idú gasibí'ilë'.

⁴ Ulidzë' lúzxiba xitsá', enca' luyú cate' uchi'a usöröë' quégaca bönachi queë'.

⁵ Rnnë' Dios: "Guli'túbi nupa néquiguequi quez quia', nupa na' gulunlen neda' didza' dzaga, en bulu'lalaj rön lahua' le ben tsutsu didza' dzaga na'."

⁶ Naca bë' náquië' tsahui' Dios lúzxiba xitsá', tu' uchi'a usöröë' Dios bönachi queë'.

⁷ Rnnë': "Buli'zë nágali', bönachi quia', ate' gu'a didza'. Buli'zë nágali', bönachi Israel, ate' uzéguia' libí'ili' didza'. Naca caza' Dios.

Ön, naca' Dios queëli'.

⁸ Biti' uzéguia' libí'ili' didza' ca naca le rúnnali' quia', en calëga ca nácagacaba' böa' bëdxi ruzégui'li'-ba' lahua'.

⁹ Biti' riquinda'-ba' bëdxi queëli', en calëga chivo biguiú' nacuá'aba' queëli',

¹⁰ tu' néquigacaba' quia' yúgu'tëba' böa' guixi', enca' böa'-bëdxi nacuá'aba' lu gayuá' gayuá' guí'ado'.

¹¹ Néquigacaba' ca' quia' yúgu'tëba' böa' zoa xíligacaba', enca' yúgu'të le zoa nabán la' guixi'.

¹² La'tu' riduna' biti' guía' ca' libí'ili', tu' nequi quia' yödzülió, enca' yúgu'të le nacuá' ni'.

¹³ ¿Naru' gágutsa' xipéla'gacaba' bëdxi, o guí'jatsa' xichöngacaba' chivo?"

¹⁴ Le ral-la' unödzejali' queë' Dios naca yöl-la' rë Lë': "Xclenu"

ate' ral-la' gunli' lahuë' Dios nayépisëtë'rë' ca naca le guzxí' lu ná'ali' gunli'.

¹⁵ Rnnë' ca': "Ral-la' ulídzali' neda' cate' bi gaca queëli'.

Gácalen caza' libí'ili', ate' gunli' neda' bal."

¹⁶ Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlena' bönachi?

¹⁷ Biti' runnu' lataj usédida' li', pero rucá'anú' cá'asö didza' ruá'a.

¹⁸ Cate' rilé'enu'-në' bönni' gubán rácalenu' lë', en runu' tsözxön nupa ta'guitsaj xibá que yöl-la' nutsaga na'.

¹⁹ Zóatica'su' gu'u didza' xihui', en ruí'ítica'su' didza' biti' nácatë.

20 Zóatica'su' uzéguiu'-në' böchi' cazu',
en rudidza' yudxu' böchi'-zan cazu'.

21 Caní benu', ate' biti' bi gunniá',
ate' gúquínu' naca' ca naca cazu' li',
pero na'a uzégua' li' didza', en ulu'a lahui le nunu'.

22 Buli'zë nágali' didza' ni, núlöli' ruzóali' neda' tsölá'alö.
Channö cabí, usunítia' libí'ili', ate' cuntu nu gaca usölá libí'ili'.

23 Nu rë neda': Xclenu', runna quia' le run neda' bal,
ate' nu run ca rnna xtídza'a, usölá caza' nu na'."

51

1 Dios quia', buzá' ladxi' quia' tsca naca yöl-la' dxi'i ladxi' zxön quiu',
en tsca naca le zían le ruzá' ládxi'u quia', bugúa yugu' le gudá'baga'a lo' Li'.

2 Buguíbitica'sö neda' tsca naca dö' bi'a.

Buchi'a neda' lu dul-la' nuna'.

3 Nöz quézida' le gudá'baga'a,
en röjnétiqi'sida' yugu' dul-la' nuna'.

4 Lo' Li' cazu' bena' dul-la',
en lo' Li' ca' bi'a dö'.

Naca bë' nacu' tsahui' cate' ru'u didza',
en idú dxi'a, en tsahui' nacu' cate' ruchí'a rusöröu' queëtu'.

5 Buyútsöca', nabága'a dö' cate' gusí lotë gulja',
en lu dul-la' zoa caza' cate' buzóanu xiná'a neda'.

6 Ré'ënu' soa le naca idútë li icja ládxi'do'otu'.

Guchiza icja ládxi'da'ahua' yöl-la' réajni'i.

7 Buchi'a neda' len le ruchí'aninu', ate' gaca' dxi'a.

Buguibi neda', ate' huóaca' zxíla'do'os.

8 Ben ga yönda' le nachë' yöl-la' ruzí' xibé, en yöl-la' rudzeja,
para huóaca ládxa'a lu le raca quia' tu' benu' ga réquibe'eda' nabága'a dul-la'.

9 Biti' uyú' yugu' dul-la' nuna',
en busulu yúgu'të le naca dö' nabága'a.

10 Dios quia', bun dxi'a ládxi'da'ahua',
en guchiza neda' tu bö' cubi le nuzú' tsutsu.

11 Biti' ucuítu' neda' ga zoa' lo' Li',
en biti' ugú' Dios Bö' Lá'ayi quiu' Nu zóalen neda'.

12 Bunna quia' yöl-la' rudzeja que yöl-la' rusölá quiu',
en ben ga guna' ca rnna xtídz'u idú ládxa'a.

13 Ní'irö usédida' nupa ta'guitsaj xibá quiu' ca nácagaca le ré'ënu' ilúngaca,
ate' yugu' bönni' dul-la' ulu'huécja quiu'.

14 Dios quia', benna neda' lataj cabí ibága'a xiguia'.
Naca cazu' Dios, Nu rusölá neda'.

Lu yöl-la' rudzeja quia' gul-la' ca naca cazu' tsahui'.

15 Xana' Dios, gusalaj ruá'a,
ate' usiyönda' bönachi yöl-la' ba quiu'.

16 La'tu' raza ládxi'u-ba' böa'-bëdxi gútitu'-ba' lo', la' gúntea' caní.
Biti' raza ládxi'u-ba' nu böa' uzégui'tu'-ba' lo'.

17 Le ré'ënë' Dios le naca ca tu le cú'uru' lahuë'
naca bö' naca cáziru' le nõtaj nagula ladxi'.

Dios quia', biti' ucá'anu' cá'asö ládxi'do'otu'
le ruhuí'ini ladxi', en le naca nöxaj ladxi'.

18 Lu yöl-la' ruzá' ladxi' quiu' ben le naca dxi'a

quégaca bönachi yödzö Sión.
Buchisa zö'ö le run chi'i yödzö Jerusalén.

¹⁹ Ní'irö tsaza ládxi'u yugu' le cú'utu' lo' le naca idú dxi'a,
yugu' böa' guíxi'do' gútitu'-ba' lo',
en yugu' böa'-bëdxido' uzégui'tu'-ba' lo'.
Ní'irö ilútië'-ba' yugu' bëdxi biguiú'do',
en ila'gu'ë-ba' lu bucugu quiu'.

52

¹ ¿Bizx que run ba zxön cuinu' ni'a que dö' ru'u, bönni' nál-la?
Zóatica'sö yöl-la' dxi'i ladxi' queë' Dios.

² Len lúdxu'u rúnlenu' luzó'o didza' para usunítu' bönachi.
Naca lúdxu'u, bönni' rizi' yë', ca tu guíë tuchi'.

³ Nadxí'irönu' le naca dö' ca nadxí'inu' le naca dxi'a,
en nadxí'irönu' le cabí nácatë ca nadxí'inu' le naca idútë li.

⁴ Nadxí'inu' yúgu'të didza' tun ditaj bönachi,
li' na', bönni' rizi' yë'ë.

⁵ Tsaz uzötaj cazë' Dios li'.
Sönë' li', en ubéajë' li' lu yu'u lidxu',
en ucuítë' li' ga nacua' nupa nabángaca.

⁶ Yugu' bönni' tsahui' ila'lé'enë' lë ni, en iládxinë' Dios.
Ulu'zxidxë' queë' bönni' na' rizi' yë'ë, ila'në':

⁷ “¡Buli'yútsöca'! Bönni' ni bití' gú'unnë' uzxöni ládxi'ë' Dios,
pero buzxöni ládxi'ë' yöl-la' tsahui' queë',
en le zían le guzé ládxi'ë' le cabí bi nazaca'.”

⁸ Naca' neda' ca tu yaga olivo ya'a le rö' ra' yu'u lidxë' Dios.
Uzxöni ládxi'a yöl-la' dxi'i ladxi' queë' Dios yugu' iz si' zaca.

⁹ Guíetica'sa' Li': “Xclenu” tu' ben cazu' Li' ga naca caní,
ate' guna' löza Lo' le naca dxi'a lógaca nupa néquiquequi quez quiu'.

53

¹ Ta'zá' ládxi'ë' bönni' canöz, ta'nnë':
“Bití' ca' zoë' Dios.”

Nácagaquië' xihui' bönni' caní, en núngaquië' le nácatë'rö xihui'.
Cuntu nu bönni' zoë' runë' le naca dxi'a.

² Ga na' zoë' Dios yehua' yubá ruyüë' gátí'tës,
en rilé'enë' bönachi nacua' idútë yödzölió,
para inözinë' channö zoa nu réajni'i,
o channö zoë' nu bönni' ruí'i ládxi'ë' Dios.

³ Yúgu'të bönachi sőjáquië' ga yúbölö.
Yúgu'të' nácagaquië' xihui'.

Cuntu nu zoa run le naca dxi'a, nitúë' bönni'.

⁴ ¿Naru' cabí nápagaquië' yöl-la' réajni'i bönni' na' tu'ë dö'?
Tu'sunítie' bönachi quia' ca tu nu ragu yöta,
en bití' ca' tu'lidzë' neda'.

⁵ Tadxi ta'dzöbinë' bönni' caní, en bití' bi nuna' quégaquië'.
Caní raca tu' rusunítie' Dios caz nupa ta'díl-lalen libí'ili'.
Gunli' ga ulu'tuí'inë' tu' chigurú'unë' Dios légaquië'.

⁶ Raca ládxi'ru' irúaj Sión Nu usölá bönachi Israel.
Cate' uchisa cazë' Dios bönachi queë' nadzúngaca,

ulu'dzeja zxi'ini xi'söe' Jacob, en ulu'zi' xibé bönachi Israel.

54

- ¹ Busölá neda', Dios, para gaca yöl-la' ba que Lo'.
 Len yöl-la' huáca quiu' guléaj neda' tsahui'.
² Ruzé nagu' le rulidza' Li', Dios.
 Ruzé nagu' didza' ruá'a.
³ Ta'díl-lalen bönni' zi'tu' neda',
 tu' té'ëné' bönni' zidzaj ilútié' neda'.
 Biti' ca' tádxinē' Dios.
⁴ Buli'yútsöca', naca cazē' Dios Nu rácalen neda'.
 Ruzöé' tsutsu Xanru' yöl-la' na'bán quia'.
⁵ Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

- ⁶ Idú ládxa'a gútia'-ba' böa'-bédxi lo'.
 Guía' Li': "Xclenu" Xan, tu' naca dxi'a Lo'.
⁷ Busölá cazu' Li' neda' lu yugu' le guca quia',
 ate' rilé'eda' zeaj nanítitica'sö nupa ta'díl-lalen neda'.

55

- ¹ Ruzé nagu' le rulidza' Li', Dios,
 en biti' tá'bagu' le rinábida' Li'.
² Ruzé nagu' neda', en rubí'u didza'.
 Rulidza yúdxida' Li', en rö'a böniga
³ ni'a que chi'ë bönni' biti' rilé'ené' neda' dxi'a,
 en tu' tu'tsá' neda' nupa tuá' dö', en tu'saca' zi' neda',
 en lu yöl-la' rilé quéguequi ta'bía no neda'.
⁴ Réqui zi' ládxi'da'ahua',
 ate' yöl-la' radxi que yöl-la' guti röjtsaza ládxi'da'ahua'.
⁵ Chigula'yaza yöl-la' radxi, en yöl-la' rizxizi neda',
 ate' nabaga' yöl-la' radxi ridzöbi neda'.
⁶ Gunnía': "Gaca ládxa'a gata' quia' xílaba' gu'dödo',
 para gaca töda' lu bö'ös, en idxina' tu lataj ga gaca uzí' ládxa'a.
⁷ Raca ládxa'a tseja' zi'tu',
 en tsöjsóa' la' guixi' ga dē lataj.
⁸ Uyija' carelö tu lataj ga tsöjsóa' tsutsu,
 para cabí bi gun quia' le naca ca bö' budunu'."
⁹ Busuniti légaquié', Xan, en buxí ruá'agaquié',
 tu' bilé'eda' ta'dil-lé', en tu'tsatsē' lu yödzö.
¹⁰ Rëla, en te dza ta'dödē' nöza lu yödzö.
 Tu'ë dö', en tunē' le xihui' idú gásibi'ilö yödzö.
¹¹ Tu'sunítie' le nacua' ni'.
 Tu'saca' zi'ë bönachi, en ta'zi' yē'ë la' nöza que yödz.

- ¹² Calëga bönni' biti' rilé'ené' neda' dxi'a nu rudidza' yudxi neda',
 tu' huáca guá' ilena' le gunē',
 en calëga bönni' rudí'inē' neda' nu ridíl-lalen neda',
 tu' huáca ucachi' cuina' lahuē',
¹³ pero nacu' li', tu bönni' ca neda'.
 Nacu' böchi' luzá'a, en nacu' tuz len neda'.
¹⁴ Lu yöl-la' dxi'i ladxi' queëru' gúcaru' tuz.
 Ladaj bönachi zián gudarú', en bidxinru' lidxē' Dios.

15 Xana' Dios, bë' yöl-la' guti lataj idxín quégaquië' bagáchi'sö.
Ben ga tsöjtsázagaquië' nabángaquië' lataj chul-la ga nacuá' nupa nátigaca,
tu' yu'u le xihui' lídxigaquië', en lu yu'u ca' gapa tu'dubë'.

16 Pero neda' ulidza'-në' Dios,
ate' usölá cazë' Xanru' neda'.

17 Chi'i dzö'ölö, en zílado', en gatsaj dza ulidza yúdxida' Lë',
en innë ládxa'a lahuë', ate' yön cazë' chi'a.

18 Huöá'uë' yöl-la' na'bán quia' lu na' nupa ta'díl-lalen neda'
en uzóë' neda' lataj ga cöza' dxi'a tsáhui'do',
tu' nayánda' nupa ta'díl-lalen neda'.

19 Huayön quézinë' Dios, en ubi'ë quégaquië'.
Rö'ë rinná bë'tica'së' Lë'.

Caní gunë' Dios tu' cabí tu'sanë' ca tunë',
en bití' tádxinë' Dios.

20 Bönni' ru'ë dö' ribía nahuë' nu riböza dxi'a tsáhui'do',
en rucá'anë' cá'asö didza' dzaga nunë'.

21 Bë'ë didza' yúlado',
pero yu'u icja ládxi'da'ahuë' yöl-la' ridzá'a.
Bë'ë didza' zxíxido',
pero didza' na' bë'ë gulaca ca guíë tuchi'.

22 Gulú'u le nabágu'u lu në'ë Xanru', ate' utipa cazë' ládxi'u.
Biti' gu'ë lataj iguinnaj tsaz nu naca tsahui'.

23 Chú'unë' bönni' tu'ë dö' na' lataj chul-la
ga nacuá' nupa nátigaca ga na' ila'nítigaquië'.

Biti' ila'cuá' gatsaj tsca ral-la' ila'cu'ë nabángaquië' bönni' tutië' bönachi,
en bönni' ta'zì' yë'ë.

Pero neda' uzxöni ládxa'a Li'.

56

1 Buéchi' ladxi' neda', Dios, tu' ta'dá'baga' bönachi neda'.
Yugu' dza nupa tu'dí'i neda' ta'bía no neda'.

2 Yugu' dza nupa bití' ta'lé'e neda' dxi'a tuá' dö' quia'.
Zián nupa ta'díl-lalen neda' lu yöl-la' run ba zxön cuínguequi.

3 Cate' radxi ridzöbida', uzxöni ládxa'a Xanru'.

4 Ruzxöni ládxa'a-në' Dios, en rigu'a yöl-la' ba xtídzë'ë.
Ruzxöni ládxa'a-në', en bití' bi gádxida'.

¿Bizxi caz gaca ilún quia' bönachi?

5 Yugu' dza tun nigui neda' nupa bití' ta'lé'e neda' dxi'a.
Ta'zá' ládxi'tica'sö nacxi iluá' dö' quia'.

6 Tu'dubë' ga nagáchi'sö, en tu'yúlanë' yúgu'të le runa',
para gata' quégaquië' lataj ilútië' neda'.

7 Bubi'ë quégaquië', Dios, ca naca dö' tu'ë,
en lu yöl-la' rilé quiu' busuniti légaquië'.

8 Nöz quézinu' Li' ca rö'a böniga.

Nurixu' Li' nisa ribödxí quia'.

¿Naru' cabí nuzú' léguequi lu guichi quiu'?

9 Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.
Nöz quézida' rácalen cazu' neda', Dios.

10 Ruzxöni ládxa'a-në' Dios, en rigu'a yöl-la' ba xtídzë'ë.
Ruzxöni ládxa'a-në' Xanru', en rigu'a yöl-la' ba xtídzë'ë.

11 Ruzxöni ládxa'a-në', en biti' bi gádxida'.
¿Bizxi caz gaca ilún bönachi quia'?

12 ¿Gunna' quiu', Dios yugu' le guzxí' lu na'a!
¿Cu'a Li' yöl-la' ba!

13 Busöló' neda' lu yöl-la' guti, en nuzú' neda' tsutsu.
Ridá caza' lo' Li', Xantu' Dios, lu beni' ru'u quégaca nupa nabángaca.

57

1 ¿Buéchi' ladxi' neda', Dios!
¿Buéchi' ladxi' neda' tu' ruzxöni ládxa'a Li' gun chi'u neda'!
Guxóa no'o neda' ca runba' bōra run chí'igacaba' bōrado' znan xílaba',
ga idxinrō tōdi bōnadxi raca quia'.

2 Rulidza'-në' Dios nayépisëtërë'.
Náquië' Dios Nu run ga raca dxi'a quia'.
3 Ga zoa cazë' yehua' yubá ubi'ë didza', en usölë' neda'.
Usölë' neda' lu na' nu ribía no neda'.
Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

4 Naca quia' tsca zoa' ládjagacaba' bēdxi guixi'.
Yugu' bōnni' zidzaj nagú'ugaquië' neda' lë'ajlö.
Nácagaca láyi'gaquië' ca yugu' yaga tuchi' que gudil-la,
ate' nácagaca lúdxí'gaquië' ca yugu' guíë tuchi'.

5 Dios quia', buluí'i lahui lúzxiba yöl-la' zxön quiu',
en yōdzōlió ni buluí'i lahui yöl-la' beni' quiu'.

6 Nupa tu'dí'i neda' nucáchi'gaca du yalaj le sön neda'.
Rudú ládxa'a tu' rō'a bōniga.
Gula'chō'ōnë' yeru ga tsōjbixa' neda',
pero gula'bixë' la' légacasë' lu yeru na'.

7 ¿Chinabá'a quia', Dios!
¿Chinabá'a quia'!
¿Gul-la' quiu', en cu'a Li' yöl-la' ba!

8 ¿Bubán, bö' naca caza'!
¿Guli'bán arpa, en bihuël-la!
¿Zílado' ubana',
9 en gul-la' quiu' Li', Xan, ladaj bōnachi yugu' yōdzō!
¿Cu'a Li' yöl-la' ba lógaca yúgu'të bōnachi!

10 Zxöntërō naca yöl-la' ruhuéchi' ladxi' quiu', le ridxintë yehua' yubá,
ate' ridxintë yöl-la' idú ladxi' quiu' lúzxiba xitsá'.

11 Dios quia', buluí'i lahui lúzxiba yöl-la' zxön quiu',
en yōdzōlió ni buluí'i lahui yöl-la' beni' quiu'.

58

1 ¿Naru' ruí'ili' didza' idútë li, libí'ili' na', rinná bë'ëli'?
¿Naru' ruchí'a rusöröli' ca naca le naca tsahui'?
2 ¿Biti' ca'! Rizá' ládxi'li' yugu' le xihui',

en rusaca' zí'ili' bönachi len yugu' le cabí nácatë runli'.

³ Ta'dödi tsölá'alö nupa tuá' dö' ga gudéla'të gúl'jagaca.

Ta'zì' yè' ga gudéla'të bulu'cuá'anu xiná'aguequi léguequi.

⁴ Yu'u ruí'iguequi le naché' yöl-la' guti ca le dxía láyi'gacaba' bëla sínia'.

Nácagaca ca tuba' bëla sínia' nacöd'zuba',

⁵ bëla na' biti' riyönba' chi'ë bönni' gudzá',
o le rul-lë' bönni' runë' gudzá'.

⁶ ¡Dios quia'! ¡Buzxuzxaj láyi'gaquië'!

¡Guladzu' yugu' layi' tuchi' quégaquië'

nácagaca ca layi' tuchi' quégacaba' bëdxi guixi'!

⁷ ¡Ben ga ila'nítië' ca raca que nisa yegu gubó'o cate' ruhuí'i!

¡Ben ga ila'cuádië' ca raca que guixi' rö'ö la' nöza!

⁸ ¡Ben ga ila'nítië' ca yugu' böruhuinna tu'únaba' lu gubidza,

o ca tubi' bí'ido' nuzóanu-bi' nigula zí'alö ca ral-la' gáljabi', en chinátitëbi'!

⁹ Zí'alö ca gaca utsë'e yusu' tu guí' zxön,

ugüë' Dios légaquië' lu yöl-la' ridzá'a queë',

bönni' nabángaquië', en bönni' chizóa ilátië'.

¹⁰ Ulu'dzeja nupa nácagaca tsahui' cate' ila'lé'e

uzí' lëbë' Dios bönni' tu'ë dö' na'.

Ulu'zxinë' len ná'agaquië' xichöngaca nupa na' tuá' dö'.

¹¹ Ila'nná bönachi: "Le nácatë zoa le rubi'ë Dios quégaca nupa nácagaca tsahui'.

Le nácatë zoë' Dios Nu ruchi'a rusörö quégaca nupa nacuá' yöd'zölió."

59

¹ Busölá neda', Dios, lu ná'agaca nupa ta'zóa regu' neda'.

Buzóa neda' tsutsu ga biti' gaca ila'dxín nupa ta'díl-lalen neda'.

² Busölá neda' lu ná'agaca nupa tuá' dö',

en guléaj neda' lu ná'agaca nupa tuti bönachi.

³ Buyútsöca', ta'bör' nísie' neda' para ilútië' neda'.

Ta'zóa régu'ë bönni' zidzaj neda',

calëga tu' gudá'baga'a légaquië', o tu' ben zi'a légaquië', Xan,

⁴ en calëga tu' bëtia' bönachi, pero ta'zë'ë carelö para tíl-lalenë' neda'.

Gudá gácalenu' neda', ate' ilé'enu' naca caní.

⁵ Xantu' Dios quégaca ni'a no'o guizxi yu,

en Dios quégaca bönachi Israel,

gudá dujenu' xiguia' bönachi yúgu'të yöd'zö.

Biti' uzá' lád'xu'u quégaca nupa tuá' dö' lu yöl-la' rizí' yè' quéguequi.

⁶ Tu'dxinë' chi'i dzö'ölö, ta'böd'xi yechë'ë ca runba' bö'cu' ragu yéchi'ba' beo',

ate' ta'dödë' idú gásibi'ilö yöd'zö.

⁷ Buyútsöca', didza' tu'ë nácagaca ca le rëbigaquië'.

Nácagaca didza' tu'ë ca yugu' guíë tuchi'.

Ta'nnë': "¿Nuzxi caz yöni?"

⁸ Ruzxidxu' ca naca le tunë', Xan.

Rutitju' ca naca le tun bönachi yúgu'të yöd'zö.

⁹ Tu' nal-la cazu' Li' guna' löza Li'.

Nacu' Dios Nu run chi'i neda'.

¹⁰ Tu' náquië' Dios quia' dxi'i ladxi', dutságuië' neda'.

Uxicja cazë' Dios nupa ta'díl-lalen neda'.

11 Biti' gútiu' nupa na' tuá' dö' para cabí ilal-la ladxi' bönachi ladza'.
Lu yöl-la' huáca zxön quiu' bésilasi nupa tuá' dö', en buzötaj léguequi luyú.
Naca cazu' Xantu', Nu run chi'i netu'.

12 Ben ga sön légaquië' yöl-la' run ba zxön cuíngaquië'
tu' nözi dul-la' tunë' ca tu'isë' didza',
enca' tu' tu'dxië' dö' luzá'agaquië', en ta'z'í' yë'ë.

13 Lu yöl-la' rilé quiu' busuniti légaquië'.
Busuniti légaquië' tsaz para cabí ila'cuá'arë',
en para iléquite'e bönachi Dios caz rinná bé'enë' zxí'ini xi'sóë' Jacob,
ga ridxintë idútë yödzölió.

14 Tu'dxinë' chi'i dzö'ölö, ta'bödxí yechë'ë ca runba' bö'cu' ragu yéchi'ba' beo',
ate' ta'dödë' idú gásibi'ilö yödzö.

15 Ta'dë' ta'guiljë' le ilahuë',
ate' ta'bödxí'ë channö cabí ulu'huölaj ulu'dzé'enë'.

16 Gul-la' neda' ca naca yöl-la' huáca zxön quiu'.
Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
tu' naca cazu' Li' Nu run chi'i neda',
en nacu' Nu rácalen neda' cate' bi raca quia'.

17 ¿Naca cazu' Li' Nu rutipa ládxa'a!
¿Gul-la' quiu' yöl-la' ba,
tu' nacu' Li' Nu run chi'i neda', Dios, en Nu nadxí'i neda'!

60

1 Nusán no'o netu', Dios, en nuzötju' netu'.
Buéca queëtu' na'a, en gúcalen netu'.

2 Ben cazu' ga gudödi budó' zxu', en guyalaj luyú.
Bun luyú ni tu' chizóa iguínaj.

3 Sizxöni busaca' zi'u bönachi quiu'.
Le guca queëtu' guca tsca bugui'ju' netu' xis uva nal-la
le ben ga yöjchégu'tu' ca tu bönni' nazúdxinë'.

4 Bunödzju' quégaca nupa tadxi Li' tu lari' ulu'chisa,
le sőjácalen cate' bi raca quéguequi,

5 para ulu'lágaca nupa na' nadxí'i quézinu'.

Len yöl-la' huáca zxön quiu' busölá netu', en bubí'i didza' cate' rulidztu' Li'.

6 Lu le naca lá'ayi queë' bë'ë didza' Dios, gunné':

“Uzi'a xibé, en quísia' xiyúgaca bönachi Siquem, en urixa' luyú dë cuita yegu
Sucot.

7 Nequi quia' xiyúgaca bönachi Galaad, enca' xiyúgaca zxí'ini xi'sóë' Manasés.

Naca ca tu le rusubín icja' xiyúgaca zxí'ini xi'sóë' Efraín.

Xiyúgaca zxí'ini xi'sóë' Judá naca ga rinná bë'a.

8 Xiyúgaca bönachi Moab naca ca tu ga riguibí na'a,
ate' cu'a löla' uléaja' xiyúgaca bönachi Edom.

Cödxí'a tu' uxicja' bönachi Filistea.”

9 ¿Nuzxi caz gaca ichë' neda' lu yödzö zoa zö'ö idú gásibi'ilö le run chi'i yödzö
na'?

¿Nuzxi caz ichë' neda' lu xiyúgaca bönachi Edom?

10 ¿Naru' cabí nusán ládXu'u netu', Dios?
 ¿Naru' cabí tséajlenu' bönni' queëtu' röjáquië' gudil-la?
 11 Gúcalen netu' cate' tíl-lalenu' nupa ridíl-lalen netu',
 tu' cabí gaca gácalen netu' nu naca bönáchisö.

12 Len yöl-la' huáca queë' Dios idéli'ru'
 tu' uxicja cazë' Lë' nupa ta'díl-lalen netu'.

61

1 Ruzë nagu' le rulidza' Li', Dios.
 Ruí'i ládXu'u le rinábida' Li'.
 2 Ga ni zoa' zi'tu' ga dë ladza' rulidza' Li' tu' rudú ládxa'a.
 Guchë' neda' ga zoa Nu na' naca ca tu guiöjto'o, Nu na' nál-latërö ca neda'.
 3 Nacu' Li' Nu run chi'i neda'.
 Nacu' Nu rácalen neda' cate' zoa nu ribía no neda'.
 4 Bë' lataj sóatica'sa' ga zoa casu' Li'.
 Bë' lataj sóalena' Li', guna' neda' ca tunba' börado' ta'yázaba' zXan xílaba'
 yöjede.
 5 Biyön quëzinu' Li' le guzxí' lu na'a guna' quiu' Li', Dios.
 Benu' ga nequi quia' le runödZju' quégaca nupa tadxi Li'.
 6 Gunu' ga soë' xidzé bönni' na' rinná bë'e uláz quiu'.
 Zián iz soë' ibanë'.
 7 Sóatica'së' lo' Li', Dios.
 Bë' queë' yöl-la' dxi'i ladxi', en le naca idútë li, yugu' le ilún chi'i lë'.
 8 ¡Gúl-latica'sa' yöl-la' ba que Lo',
 para gaca guna' tu tu dza le guzxí' lu na'a!

62

1 ¡Tuzë' Dios ruzxöni ládxa'a, en rizë ládxa'a Lë'!
 ¡Lë' cazë' rusölë' neda'!
 2 ¡Tuzë' Lë' rapa chi'ë neda', en rusölë' neda'!
 ¡Ruzöë' neda' tsutsu, ate' biti' gaca nu uzötaj neda'!
 3 ¿Gáca'xte caz gü'i ládxi'li' ucúl-lali' neda'?
 Ré'ënisili' uzötjali' neda' ca tu zö'ö chizóa iguínnaJ,
 o ca tu lë'aj yaga le chinatëbi.
 4 Ré'ënisili' uzötjali' neda' ga ni tunë' neda' bal.
 Ruzí'ili' xibé yugu' didza' biti' nácatë.
 Ruí'ili' dxi'a didza' láhui'sö,
 pero lu icja ládxi'do'oli' rudidza' yúdxili' neda'.
 5 ¡Tuzë' Dios ruzxöni ládxa'a,
 en runa' löza Lë'!
 6 ¡Tuzë' Lë' rapa chi'ë neda', en rusölë' neda'!
 ¡Ruzöë' neda' tsutsu, ate' biti' gaca nu uzötaj neda'!
 7 ¡Tuzë' Dios rusölë' neda', en runë' ga naca' bica' ba!
 ¡Dios nuzöë' neda' tsutsu, en rapa chi'ë neda'!
 8 Libí'ili', bönachí, buli'zxöni ládXë'ë Dios yúgu'të dza.
 Buli'siyönnë' yugu' le raca queéli', tu' run chi'i cazë' rë'u.
 9 Le nácatë nácgaca yúgutë bönachí ca tu bö' ridódisö,
 en biti' bi nazáca'gaca nupa na' nadéli'gaca lataj lo.
 Tu lu zXigóns biti' bi nál-lí'guequinë'.

Nácagacarë' dzá'asö ca tu bö' riguéla'siru'.

¹⁰ Biti' uzxöni ládxi'li' bi idéli'li' len yöl-la' nál-la queézili'.

Biti' uzi'ili' xibé le cuanli'.

Channö gata' queéli' yöl-la' tsahui', biti' güf'i ládxi'li' le.

¹¹ Tu luzuísö bē'ē didza' Dios.

Chopa luzuí biyönda' ca naca lē ni rnna:

“Nápatērē' Dios yöl-la' huáca,

¹² ate' zóatica'sö yöl-la' dxi'i ladxi' queē'.”

Ubí'i cazu', Xan, quégaca bönachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.

Ribidxi ládxa'a Li', ate' idútē le naca' rizé ladxi' Li'.

Zoa' tu luyú bidxi ga ni rudú ládxa'a, ate' biti' bi dē nisa.

² Ben ga ilé'eda' Li' lu lataj ga na' zoa cazu',

para ilé'eda' yöl-la' huáca quiu', en yöl-la' bení' quiu'.

³ Tu' nácatērö dxi'a yöl-la' dxi'i ladxi' quiu' ca yöl-la' na'bán caz.

Que lē ni na' cu'a Li' yöl-la' ba.

⁴ Guía' Li': “Xclenu” tsanni ni zoa' nabana'.

Uchisa' na'a, en ulidza' Lo'.

⁵ Ruhüölaj rudzé'e icja ládxi'da'ahua' le nácatērö dxi'a,

ate' lu yöl-la' rudzeja quia' rigu'a Li' yöl-la' ba.

⁶ Røjneda' Li' cate' déa' lu le ráti'da'.

⁷ Rizá' ládxa'a ca nacu' cate' rina'sa' yēla.

Rácalen cazu' neda',

en tu' run chí'u neda', lu yöl-la' rudzeja quia' rul-la' quiu'.

⁸ Nazön cazu' Li' bö' naca caza'.

Rizön cazu' Li' neda',

⁹ pero ila'yaza lataj chul-la

nupa té'ēni iluti neda'.

¹⁰ Ilátigaca lu guíē tuchi'.

Ilágugaca bö'cu' zuga' léguequi.

¹¹ Nu rinná bē' uláz queē' Xanru' udzeja ladxi' lahuē' Dios.

Ulu'zí' xibé yúgu'tē nupa tu'zxöni ladxi' Lē',

tu' usayaj cazē' Lē' ruí'igaca nupa ta'zí' yē'.

64

¹ Dios, buzē nagu' chí'a le rinabi yúdxida' Li',

para gun chí'u yöl-la' na'bán quia' tu' rádxi'da' bi gun nu ridíl-lalen neda'.

² Bucachi' neda' para cabí bi ilún quia' bagáchi'sö nupa tuá' dö',

en para cabí ila'bía dí'ē neda' bönni' tutiē' bönachi.

³ Nácagaca lúdxigaquiē' ca yugu' guíē tuchi',

ate' nácagaca didza' zi' tu'ē ca yugu' yaga lahui tuchi'.

⁴ Bagáchi'sö tu'zē yugu' yaga lahui tuchi' na'

para ilunē' huē' nupa biti' bi nabága'gaca.

Tsárido'os tu'zē léguequi, en biti' bi tádxinē'.

⁵ Biti' ca' tu'cá'anē' le naca dö' té'ēnē' ilunē'.

Tu'ē didza' ca gaca ulu'cáché'ē yugu' du yalaj quégaquiē', ta'nnē':

“¿Nuzxi caz gaca ilé'e yugu' du na'?”

⁶ Tunē' didza' ca naca le naca dö' ilunē', ta'nnē': “Chinabá'a le gunru'.”

Tu'cáchi'gaquiē' le ta'zá' ládxi'ē, en le ta'bequi icjē'.

7 Uzal-lë' Dios tu yaga lahui tuchi' le ideli' légaquië'.
 Tsálido'os gunë' légaquië' huë'.
 8 La' didza' tu'isë' ilún ga tseajchégu'gaquië'.
 Lu yöl-la' rubani quéguequi ulu'tá ícjaguequi nupa ila'lé'e légaquië'.
 9 Ní'irö yúgu'të bönachi iladxi Dios,
 en ulu'siyön luzé'eguequi ca naca le nunë' Dios,
 en ila'zá' ládxi'gaca ca naca lë na' nunë'.
 10 Nu bönni' tsahui' uzi'ë xibë' Xanru', en gunë' löza Lë'.
 Yúgu'të nupa nácagaca idú ladxi' ulu'zí' xibë'.

65

1 Dios, nupa nacuá' yödzö Sión ila'gú'u Li' yöl-la' ba,
 en ilunna quiu' le gula'zí' lu në'eguequi,
 2 tu' riyön quézinu' Li' cate' tu'lidza Li',
 ate' yúgu'të bönachi ila'dxín lo'.
 3 Tun nigui neda' dul-la' nuna',
 pero runiti lo cazu' netu' ca naca le ridá'baga'tu' Li'.
 4 Bica' ba nupa nabõ cazu' quiu', en nulidzu' quiu',
 para ila'cuá' yugu' lataj lá'ayi quiu'.
 Huölaj udzé'etu' le nácagaca dxí'a yú'ugaca lidxu',
 enca' le yú'ugaca yudo' lá'ayi quiu'.
 5 Tu' nacu' tsahui' rubi'u didza', en runu' yugu' le zxön le tácalen netu'.
 Naca cazu' Dios Nu rusölá netu'.
 Nupa nacuá' idútë yödzölió ulu'zxöni ladxi' Li',
 enca' nupa nacuá' zi'tu' ia'tsölá'alö nísado'.
 6 Len yöl-la' huáca quiu' nucu'u yugu' guí'a zxön,
 le naca bë'gaca nál-latërö cazu' Li'.
 7 Ruzóa dxíu' le riyasa ridxía lu nísado', en le ru'u bö que.
 Ruzóa dxíu' bönachi cate' tu'tsatsa.
 8 Bönachi idútë yödzölió tadxi Li' ni'a quégaca le zxön nunu'.
 Le run cazu' Li' tun ga tu'dzeja bönachi idapa la'a yödzölió.
 9 Ruí'i ládxi'u luyú, en risöl-lu'u nisa guiöj.
 Runu' ga ruhuóaca yu ya'a.
 Nucu'u luyú na' yugu' yegu yúdzugaca nisa zila,
 le run ga dética'sö zxoá'-za, tu' caní raza ládxi'u Li'.
 10 Risöl-lu'u nisa guiöj gapa dégaca na, en rusubisu' gapa chinadúz.
 Ruúnu' yúludo' luyú zidzaj, en runu' ga ta'gula guixi' cuando'.
 11 Runu' ga rulá' yödx yana' le nadúz luyú ni tu iz tu iz,
 en ga zóatica'sö le ilë'aj ilágugaca bönachi.
 12 Nacuá'aba' böa'-bëdxi la' guixi',
 ate' tu'dzeja bönachi yugu' lu guí'ado'.
 13 Gapa naca lachi' nacuá'aba' bö'cu' zxila',
 ate' dxíada' zxoá' xtila la' yëla.
 Lu yöl-la' rudzeja quéguequi ta'bödxí'a,
 en tul-la bönachi quiu'.

66

1 ¡Guli'güí' zidzaj didza' lahuë' Dios
 lu yöl-la' rudzeja queéli' yúgu'tëli' zóali' yödzölió!
 2 ¡Guli'gul-la ca naca yöl-la' ba que Lë'!
 ¡Guli'cu'ë yöl-la' ba!
 3 Guli'guíë' Dios: "¡Zxöntërö nácagaca le nunu'

tu' naca zxöntëro yöl-la' huáca quiu'!"
 Nupa biti' ta'lé'e Li' dxi'a ulu'lu'i cuini
 ca nupa tun ca rnna xtídz'u.

⁴ Yúgu'të nupa nacuá' yödzölió ilún Li' zxön,
 en ilúl-la yöl-la' ba quiu'.
 Ilúl-la yöl-la' ba que Lo'.

⁵ Guli'dá ilé'eli' yugu' le nunë' Dios.
 Nayëpisëtëre' Dios lu le runë' quégaca bönachi.

⁶ Benë' ga böáca ca luyú bidxi ga dë nísado'.
 Gula'dödë' gatsaj láhui'lö yegu, ta'zë'esö ní'agaquië'.
 Ni' udzëjade'eru' ca náquië' Lë'.

⁷ Len yöl-la' unná bë' queë' rinná bë'tica'së'.
 Ruyútica'së' bönachi yúgu'të yödzö.
 Biti' ral-la' ilún ba zxön cuínguequi nupa ta'dá'baga' xtídzë'ë.

⁸ ¡Guli'gún zxönë' Dios queëtu', libí'ili' bönachi yúgu'të yödzö,
 en guli'cu'ë yöl-la' ba gáti'tës!

⁹ ¡Run cazë' Lë' ga zóaru' nabanru',
 en biti' ru'ë lataj cuila ní'atu'!

¹⁰ Guzxí' bë' cazu' netu', Dios.
 Buchi'u netu' ca run nu ruchí'a guié plata lu guí'.

¹¹ Bë'u lataj bidzuntu' lu du yalaj.
 Busubágu'u netu' tu yua' z'i'.

¹² Benu' ga gula'libë' icjtu' bönni' dxíagaquië'-ba' böa'.
 Gudödítu' lu guí', en lu nisa,
 pero guché' cazu' netu' tu lataj ga böläj budzé'etu'.

¹³ Tsu'a lidxu', en cu'a-ba' lo' böa'do' uzégui'a-ba' lo'.
 Guna' lo' Li' le guzxí' lu na'a guna',

¹⁴ lë na' bë'a didza' que,
 le gunní'a cate' ni' riguí'i rizáca'a.

¹⁵ Cu'a-ba' lo' Li' böa'-bëdxi renni' uzégui'a-ba' lo',
 tsözxön len dzön quégacaba' chivo biguiú'.

Gútia'-ba' lo' yugu' bëdxi, en yugu' chivo biguiú'.

¹⁶ Guli'dá uzë nágali', yúgu'tëli' rádxili'-në' Dios,
 ate' usiyönda' libí'ili' yugu' le benë' le gulácalen neda'.

¹⁷ Len ruá' cuinsa' bulidza' Lë',
 en bena' Lë' zxön len lúdx'a'a.

¹⁸ Channö rucácha'a le naca dö' lu ládxi'da'ahua',
 biti' yönnë' Xanru' Dios didza' gu'a,

¹⁹ pero le nácatë biyönnë' Dios didza' bë'a.
 Buzë naguë' cate' bulidza' Lë'.

²⁰ ¡Yöl-la' ba Dios!
 ¡Biti' gudá'baguë'ë neda' cate' bulidza'-në',
 en biti' bugúë' yöl-la' nadxí'i queë' neda'!

67

¹ Xantu' Dios, buzá' ladxi' queëtu', en ben ga gaca dxi'a queëtu'.
 Lu yöl-la' dxi'i ladxi' quiu' buyú netu',

² para gaca bë' le ré'ënu' guntu' yödzölió ni,

en para ila'nözi bönachi yúgu'të yödzö ca naca yöl-la' rusölá quiu'.

³ Ral-la' ila'gú'u bönachi Li' yöl-la' ba, Dios.
Yúgu'të bönachi ral-la' ila'gú'u Li' yöl-la' ba.

⁴ Ral-la' ulu'dzeja bönachi yúgu'të yödzö,
en ilúl-la lu yöl-la' rudzeja quéguequi.
Tu' uchi'a usöröu' bönachi ca naca le naca tsahui',

⁵ ral-la' ila'gú'u Li' yöl-la' ba bönachi, Dios.
Yúgu'të bönachi ral-la' ila'gú'u Li' yöl-la' ba.

⁶ Yödxí yana' runödzej luyú ni.
Dios queëru' runë' ga raca dxi'a queëru'.

⁷ Runë' Dios ga raca dxi'a queëru',
para iladxi Lë' yúgu'të nupa nacuá' yödzölió.

68

¹ Raca ládxi'ru' chasë' Dios, en usulásië' nupa ta'díl-lalen Lë',
en gunë' ga ulu'zxunnaj nupa biti' ta'lé'e Lë' dxi'a.

² Ca rulaga tu bö' recja dzön, ca' bulaga léguequi.

Ca na' ruúna' lu guí' quíxí'ba' buz,
ca' ila'niti nupa tuá' dö' lahuë' Dios.

³ Ulu'dzeja nupa nácgaca tsahui', en ulu'zí' xibë' Dios.
Lu yöl-la' rudzeja quéguequi ulu'zí' xibë'.

⁴ ¡Guli'gul-la queë' Dios!
¡Guli'gul-la yöl-la' ba que Lë'!
Buli'pá'a nöza ga tödë' gapa dë lataj.
¡Nazí'i lë' Xanru'!
¡Buli'dzeja lahuë' Lë'!

⁵ Náquië' ca xúzgacabi' bi'i uzëbido',
enca' Nu ruchí'a rusörö quégacanu nigula uzëbi.
Caní náquië' Dios ga na' zoë' lataj lá'ayi queë'.

⁶ Rucu'ë Dios nupa nagá'anagaca bayechi' tu yu'u.
Rubéajë' nupa nadzúngaca, en runë' ga raca dxi'a quéguequi,
pero ulu'gá'ana tu luyú bidxi nupa ta'dá'baga' Lë'.

⁷ Yöjnöru cazu' lógaca bönachi quiu', Dios,
cate' guchë'u léguequi la' guixi' ga na' dë lataj.

⁸ Gudödi budó' zxu' dza ni'.
Lësca' gula guiöjsiu' lahuë' Dios.
Guzxizi guí'a Sinaí lahuë' Dios quégaca bönachi Israel.

⁹ Benu' ga gulaj guiöjsiu', Dios.
Benu' ga bóaca ya'a xiyú' ga ni' guca yu bidxi.

¹⁰ Yöjcuá' nupa néquiguequi quiu' luyú na'.
Lu yöl-la' dxi'i ladxi' quiu', Dios,
bucözu' le gácalen nupa nácgaca yechi' luyú na'.

¹¹ Bë' cazë' didza' Xanru' Dios.
Ta'guísinu nigula zían didza' dxi'a queë', ta'nnanu:

¹² "¡Ta'zxúnnajë'! ¡Ta'zxúnnajë' bönni' ta'nná bë'ë,
enca' bönni' röjáquië' gudil-la guizxi yu quégaquië'!"

Nigula gula'bōzanu lídxigacanu bulu'zí'ínu xibé le gutá' quégaquië'.

13 Sal-la' bucachi' loli' gapa tun chí'ili' bö'cu' zxila',
gáculi' le naca lachi ca nácacacaba' gu'dōdo' néquiguequiniba' guië plata,
en xitúbigacaba' néquiguequini guië oro.

14 Cate' bēsílásië' Dios bönni' na' gula'nná bē'ë lu guí'a Salmón,
benë' ga gula guiōj bögui' lu guí'a na'.

15 Nequi queë' Dios guí'a Basán.
Naca guí'a Basán na' tu guí'a zxön.

16 ¿Bizx que ruzxé'eli', yugu' guí'a zxön?
¿Bizx que ruzxé'eli' guí'a na' guzë lādxë'ë Dios tsöjsóë' ga na'?
Le nácatë tsaz soë' Dios ni'.

17 Gayuá', en gayuá' nácacaca carreta que gudil-la queë' Dios.
Rizë'ë Xanru' lu guí'a Sinaí ga na' tseajtsazië' lataj lá'ayi queë'.

18 Buëpu' yehua' yubá richë'u bönachi zían gula'dzúngaca.
Nu'u yugu' le bulu'nōdzaj bönachi quiu',
en le gulunna quiu' nupa ta'dá'baga' Li',
para tsöjsóë' Dios ni' tsaz.

19 ¡Yöl-la' ba Dios, Nu ruá' sua'ru' tu dza tu dza!
¡Náquië' Dios Nu rusölá rë'u!

20 ¡Dios queëru' rusölë' rë'u!
¡Rusölë' Xanru' Dios rë'u lu yöl-la' guti!

21 Le nácatë Dios udxíë' huë' ícjagaca nupa ta'dá'baga' Lë'.
Udxíë' huë' icjë' bönni' biti' gusanë' ca naca dö' ru'ë.

22 Ru'ë didza' Xanru', rnnë': "Ubéaja' léguequi lu guí'a Basán,
en ubéaja' léguequi lu nísado',

23 ate' ulíbili' léguequi ga idxintë irúaj rön quéguequi,
ate' ilë'ajba' zxículi' xichōngaca nupa ta'dil-lalen libí'ili'."

24 Ta'lé'e yúgu'të bönachi nupa ta'dalen Li', Dios.
Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

25 Nupa tul-la, en nupa ta'guínnaj lë'egaca bihuël-la, ta'dá ni',
ate' bí'i nigula ra'bando' tunbi' léguequi tsözxön, ta'gápabi' lë'egaca guídido'.

26 Buli'lidzë' Dios dxi'a tsáhui'do' gapa na' rudúbili' queë',
tu' náquië' Xanru', libí'ili' zxí'ini xi'sóë' Israel.

27 Nacu'ë zxí'ini xi'sóë' Benjamín ga na', bönni' gúcarë' cuidi', ate' ta'nná bē'ë.
Bönni' lo quégaquië' zxí'ini xi'sóë' Judá nútsa'gaquië' lādajagaquië',
enca' lādajagaquië' bönni' lo quégaquië' zxí'ini xi'sóë' Zabulón, en Neftalí.

28 Buluí'i lahui yöl-la' huáca quiu', Dios.
Buluí'i lahui yöl-la' huáca quiu', Dios, tu' chibenu' zían le gulácalen netu'.

29 Tu' dë yudo' quiu' lu yōdzō Jerusalén,
bönni' ta'nná bē'ë ila'chë'ë ni' le ilunnë' quiu'.

30 Buzé le bach bönachi yōdzō na' nácacaca ca böa' guixi',
enca' bönachi yugu' yōdzō nácacaca ca yugu' bēdxi tsözxön len zxí'iniguequi.
Tu'libi bönachi yechi' tu' ta'zë lādxi'gaca dumí.
Bēsílási nupa na' ta'yaza lādxi' rōjaca gudil-la.

31 Bönni' gubáz quégaca bönachi Egipto ila'dxinë' lo'.
Bönni' Etiopía ila'chisa ná'agaquië' lo', Dios.

32 ¡Guli'gul-la queë' Dios, bönachi yúgu'të yödzö!
¡Guli'gul-la yöl-la' ba queë' Xanru'!

33 Rö'ë yehua' yubá xitsá'tërö, le zoa caz dza ni'te.
Buli'yútsöca', ru'ë zidzaj didza', en naca chi'ë ca guziú' rinnë.

34 ¡Guli'gún zxönë' Dios!
Yöl-la' nayëpisë queë' rusubaga' bönachi Israel.
Yöl-la' huáca zxön queë' nalá' lúzxiba xitsá'.

35 Rubániru' ca nacu' Li', Dios, lu lataj lá'ayi quiu'.
Runnu' quégaca bönachi quiu' yöl-la' nal-la, en yöl-la' huáca.

Náquië' Dios quégaca bönachi Israel.
¡Yöl-la' ba Lë' Xanru' Dios!

69

1 Busölá neda', Xana' Dios,
tu' raca quia' tsca nabága'a nisa ga ridxintë ruchicja' nisa.
2 Raca quia' tsca ruhuötja' ga rë' lu guna', en biti' zoa ga gaca uliba'.
Zoa' ca tu lu nisa zila, en chizóa uchicja' nisa.

3 Rudú ládxa'a tu' rulidza' nu gácalen neda', ate' da' lubá'a.
Chirichul-la guiöj lahua' tu' ruyúa' ga guídu' dusöló' neda'.

4 Nayántërö ca guitsa' icja' nupa biti' ta'lé'e neda' dxi'a,
en biti' bi nuna' quéguequi.
Nál-lagaca nupa ta'díl-lalen neda', en té'ëni iluti neda',
en biti' bi nuna' quéguequi.
Tunë' bayúdx ubí'a dumí le cabí gulana'.

5 Nöz quézinu' Li', Dios, yöl-la' canöz quia',
en biti' nagachi' lo' Li' dul-la' nuna'.

6 Biti' gu'u lataj nupa tu'zxöni ladxi' Li' ulu'tuí'i ni'a quia' neda',
Xana' Dios nayëpisëtëru'.

Biti' gu'u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.

7 Tu' nadxí'ida' Li' tu'lidza ditjë' neda',
en que lé ni na' rutuí'ida'.

8 Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquië' di'a dza quia'.

9 Tu' ruí'i ládxa'a yudo' quiu' régui rilá ládxi'da'ahua'.
Naca ca tu'lidza ditaj neda' nupa tu'lidza ditaj Li'.

10 Ruzötaj cuina', en runa' gubasa,
en que lé ni na' tu'didza' yudxi neda'.

11 Rácua' lari' cá'asö ca run nu ribödx yechi',
ate' tu'titaj neda'.

12 Ta'nnë' quia' yugu' la' nöza,
ate' nupa nazúdxigaca tul-la ca naca quia',

13 pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'
tu' nadxí'ide'enu' neda',

en tu' guzxí' lu no'o usöló' neda'.

14 Guléaj neda' para cabí huötja' lu le naca ca guna'.

Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

15 Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',
enca' cabí huötja' tu lu yeru ba.

16 Bubí'i didza', Xan, tu' nacu' dxi'i ladxi',
en tu' ruhuéchi' ládxi'u neda', gudá quia'.

17 Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

18 ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

19 Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'të nupa bití' ta'lé'e neda' dxi'a.

20 Rudú ládxa'a tu' tu'didza' yudxi neda', en bití' bi gaca guna'.

Gulöza' nu huéchi' ladxi' neda', pero cuntú nu guzóa.

Gú'unida' nu huë tsahui' neda', pero cuntú nu bidzöli.

21 Cate' guduna' bulu'gahuë' neda' tu le silá',

en cate' gubidxa' nisa, bulu'gui'jë' neda' nupe zi.

22 Ben ga huöáca laní quégaquië' ca tu le sön légaquië',
en ben ga huöáca le tu'zi'ë xibé ca tu le gun ga ila'chixi ila'níguinë'.

23 Ben ga ichul-la guiöj lógaquië' para cabirö ila'lé'enë'.

Ben ga ila'zéchutica'sö cúdzu'gaquië' zxa' yua' nuá'gaquië'.

24 Busubaga' légaquië' lu yöl-la' rilé quiu',

en bë' quégaquië' yöl-la' ridzá'a quiu'.

25 Ben ga cuntú nu soa ládza'gaquië',

en ga bíti'rö nu soa lu yu'u lídxigaquië'.

26 Ta'zóa régu'ë nupa na' benu' léguequi xigua'.

Tu'siyönnë' ca ta'guí'i ta'zaca' nupa na' nunu' léguequi huë'.

27 Buzúaj lu guichi yugu' dul-la' tunë',

en bití' gu'u légaquië' lataj ila'déli'në' yöl-la' rusölá quiu'.

28 Busulu lágaquië' nazúajgaca lu guichi quégaca nupa nabángaca.

Bití' gu'u légaquië' lataj ila'bábalenë' nupa nácagaca tsahui'.

29 Neda' riguí'i rizáca'a, en rudú ládxa'a.

Guchisa neda', Dios, en busölá neda'.

30 ¡Cu'a-në' yöl-la' ba Dios len tu le gul-la'!

¡Guna' Lë' zxön, en guía'-në': "Xclenu"!

31 Chaza ládxi'ë Xanru' Dios lë ni

ca raza ládxi'ë-ba' böa'-bëdxi rúti'a'-ba' lahuë',

o ca raza ládxi'ë-ba' tuba' bëdxi zxön chinagúlaba'.

32 Nupa ta'guí'i ta'zaca' ila'lé'eni lë ni, en ulu'dzeja.

Ila'dipa ládxi'gaca nupa tu'guilaj Dios.

33 Ruzë nague' Xanru' Dios nupa ta'yadzaj ta'yudxi,

en bití' ral-la ládxi'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni, enca' nísado', en yúgu'të le nacua' tu tu lataj na'!

35 Usölä cazë' Dios bönachi Sión, en uchisë' yugu' yödzö quégaca zxi'ini xi'sóë' Judá. Ila'cuá' bönachi queë' ga na', ate' guequi quéguequi luyú na'.

36 Zxi'ini xi'sóagaquië' huen xichinë' ila'z'ibi' luyú na', ate' ila'cuá'tica'sö ni' nupa nadxí'igaca Lë'.

70

1 ¡Busölä neda', Dios!

¡Gudáchi gácalenu' neda', Xan!

2 Ben ga ulu'tuí'i, en ila'bö' böniga nupa na' té'ëni iluti neda'.

Ben ga ulu'huécja, en ulu'gá'ana cá'asö nupa na' té'ëni gaca bi gaca quia'.

3 Ben ga ulu'huécja lu yöl-la' rutuí'i quéguequi

nupa na' tu'titaj neda', ta'nná: "Ja, ja."

4 Ben ga ulu'dzeja, en ulu'z'í' xibó' yúgu'të nupa tu'guilaj Li'.

Ben ga iluí'tica'sö didza' nupa ta'dxi'i yöl-la' rusölä quiu', ila'nná:

"¡Zxöntëro náquië' Dios!"

5 Neda' nacuí'da', en biti' bi gaca guna'.

¡Gudáchi gácalenu' neda', Dios!

Nacu' Nu rácalen neda', en Nu rusölä neda'.

¡Biti' ca' tsenu' guídu' quia', Xan!

71

1 Nuzóa cazu' neda' dxi'a tsáhui'do' ga na' zu', Xan.

¡Biti' gu'u lataj utuí'ida'!

2 ¡Tu' nacu' tsahui' gúcalen neda', en busölä neda'!

¡Buzë' nagu' neda', en busölä neda'!

3 Nacu' le uzóa neda' tsutsu,

en le gun chí'i neda' ga gaca ucachi' cuina'.

Chigunná bé'enu' nu usölä neda' tu' nacu' Nu ruzóa neda' tsutsu,

en Nu run chí'i neda'.

4 Dios quia', busölä neda' lu na' nu ruá' dö',

en lu na' nu ridá'baga' Li', en run dzatsa.

5 Tuzu' Li' runa' löza, Xan.

Ruxöni ládxa'a Li' ga gudéla'të naca' bí'ido'.

6 Ruxöni ládxa'a Li' ga gudéla'të gulja',

tu' guzóalen cazu' neda' cate' ni' buzóanu xiná'a neda'.

¡Cú'utica'sa' Li' yöl-la' ba!

7 Zián nupa tu'bani ca naca quia',

tu' run chí'i cazu' Li' neda'.

8 ¡Rigú'utica'sa' Li' yöl-la' ba,

en tu dza tu dza rulu'a lahui yöl-la' ba quiu'!

9 ¡Biti' usán no'o neda' na'a, ni naca' bönni' gula!

¡Biti' ucá'anú' neda' na'a cate' ni rudú ládxa'a!

10 Tuí'i didza' nupa biti' ta'lé'e neda' dxi'a ca gaca bi ilún quia',

ate' tun tuz xtídza'gaca nupa té'ëni iluti neda'.

11 Ta'nná: "¡Nusán në'ë Dios lë'!

¡Gulí'dá sönru'-në' tu' cuntú nu zoa gácalen lë'!"

12 ¡Dios, biti' su' zi'tu' ga ni zoa'!

¡Dios quia', gudáchi gácalenu' neda'!

13 Ben ga ulu'tuí'i, en ila'niti nupa té'ëni iluti neda'.
Ben ga ulu'tuí'iné', en ila'bö'ë böniga bönni' té'ëné' ilu'ë dö' quia'.

14 ¡Neda' gúntica'sa' löza Li',
en cú'utica'sa' Li' yöl-la' ba!

15 Idú dza usiyönda' bönachi nacu' tsahui',
en rusöló' yúgu'të bönachi.
Biti' nözda' bal-laxi luzuí busöló' neda'.

16 ¡Gu'a didza' ca nácagaca le zxön benu' Li', Xana' Dios!
¡Usiyönda' bönachi tuzu' Li' nacu' tsahui'!

17 Dios, rusédinu' neda' ga gudéla'të ni' naca' bí'ido',
ate' ga ridxintë na'a dza ruá'a didza' ca nácagaca le zxön nunu'.

18 Na'a naca' bönni' gula, en chinagucha'.
¡Biti' usán no'o neda', Dios!
Benna neda' lataj usiyönda' yugu' zxí'ini xsoa' ca naca yöl-la' huáca quiu',
ate' quíxjöi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxintë lúzxibal!
¡Nunu' Li' yugu' le zxóntërö!
¡Cúnturö nu zoa nu naca ca nacu' Li', Dios!

20 Gusöl-la' casu' quia' yugu' le guca quia' le gulún neda' zi',
pero ruúnu' neda' tsutsu,
en le yúbölö uchisu' neda' para cabí gátia'.

21 Gunu' ga tsépisea',
en huë tsahú'u neda' le yúbölö.

22 ¡Le nácate cu'a Li' yöl-la' ba, en gul-la' tu bihuël-la, Dios!
¡Gul-la' ca runu' ca rnno', en nacu' Nu naca lá'ayi lógaca bönachi Israel!

23 ¡Lu yöl-la' rudzeja quia' cödxí'a cate' gul-la' quiu',
en idú ládxa'a gul-la' tu' busöló' neda'!

24 ¡Idú dza gu'a didza' ca nacu' tsahui'!
¡Tu'tuí'i, en ta'bö' baguí'i nupa gulë'ëni iluá' dö' quia'!

72

1 Dios, buzéajni'iné' bönni' rinná bë'ë
para gaca uchi'a usöröë' ca ruchí'a rusöröu' Li'.
Ben ga ilácagacabi' tsahui' zxí'iné' ca nacu' Li' tsahui'.

2 Bë'ë lataj uchi'a usöröë' quégaca bönachi quiu' ca naca le naca tsahui',
enca' quégaca bönachi quiu' ta'guí'i ta'zaca'.

3 Ben ga ila'cuá' dxi'a tsáhui'do' bönachi quiu' yugu' lu guí'a,
en ilácagaca tsahui' yugu' lu guí'ado'.

4 Bë'ë lataj ubéajë' tsahui' nupa ta'guí'i ta'zaca' ladaj bönachi quiu',
en usölë' yugu' zxí'inigaca nupa ta'yadzaj ta'yudxi,
en ucul-lë' nu ribía no léguequi.

5 Ben ga iladxi bönachi quiu' Li' tsanni ni' soa gubidza,
enca' tsanni ni' soa beo' ga idxintë dza udxi.

6 Ben ga gáquië' bönni' rinná bë'ë ca nisa guiöj ribixi lu guíxi'do',
en ca yugu' guiöj gúpa'do' tu'subisa luyú.

7 Ben ga gaca dxi'a quégaca nupa nácagaca dxi'a yugu' dza inná bë'ë lë',

en ila'cuá' dxi'a tsáhu'i'do' ga idxintë bíti'rö soa beo'.

⁸ Ben ga inná bē'ē idapa la'a yödzölió,
ga naguela' ra' yegu Eufrates ga idxintë idútë luyú.

⁹ Ben ga ulu'zechu zxíbigaca lahuë' lē' nupa nacuá' luyú bidxi,
en iladxi lē' nupa ta'díl-lalen lē'.

¹⁰ Ben ga ila'dxinē' lahuë' bönni' ta'nná bē'ē luyú Tarsis en yugu' lu yödzö,
nuá'gaquiē' yugu' le ulu'nödzjē' queē'.

Bönni' ta'nná bē'ē luyú Sabá, en luyú Seba ilá'dxinē' bi ulu'nödzjē' queē'.

¹¹ Ben ga ulu'zechu zxíbigaquiē' lahuë' yúgu'tē bönni' ta'nná bē'ē,
en ilúngaca xichinē' bönachi yúgu'tē yödzö.

¹² Usölē' nu riyadzaj riyudxi cate' ulidza lē',
enca' nu riguí'i rizaca', en nu bití' zoa nu gácalen nu na'.

¹³ Huéchi' ládxē'ē nupa nácgaca yechi', en nupa ta'yadzaj ta'yudxi,
en gun chí'ē yöl-la' na'bán quégaca nupa nácgaca yechi'.

¹⁴ Usölē' léguequi lu ná'agaca nupa tun léguequi zí',
en lu ná'agaca nupa tuá' dö',

en gü'i ládxē'ē léguequi cate' nu guē'ēni guti léguequi.

¹⁵ Soē' ibanē', ate' iluá'gaca bönachi queē' oro que lu xiyúgaca bönachi Sabá.
Ben ga ulu'lidza Dios bönachi, ila'nábitica'sö Li' gácalenu' lē'.

Ben ga ulu'lidza lē' dxi'a tsáhu'i'do' idú dza.

¹⁶ Ben ga unödzjada' zxoá' luyú queē', enca' yugu' lu guí'ado',
le unödzaj yödxi yana' xiyúē' ca run guí'a Líbano.

Ben ga ila'yán nupa nacuá' ladzē' ca rö'ö guíxi'do' lu xiyúē'.

¹⁷ Ben ga tsöjnégaca le lē' ga idxintë dza udxi.

Ben ga gaca yöl-la' ba que lē' tsanni ni' soa gubidza.

Ben ga ila'nabi bönachi Li' yúgu'tē yödzö

gunu' ga gaca dxi'a quéguequi ca benu' queē' lē'.

Ben ga ila'gú'u lē' yöl-la' ba bönachi yúgu'tē yödzö.

¹⁸ ¡Yöl-la' ba Xanru' Dios, Dios quégaca bönachi Israel!

¡Tuzē' Lē' runē' le túngaca ga rubániru'!

¹⁹ ¡Yöl-la' ba Lē' le naca lachi ga idxintë dza udxi!

¡Rizē' láchixi'ru' ilí idútë yödzölió le naca bení' queē'!

¡Ca' gaca! ¡Ön, ca' gaca!

²⁰ Chibudxi le rinábida'-nē' Dios neda', David, zxí'inē' Isai.

73

¹ Le nácatë runē' Dios ga raca dxi'a quégaca bönachi Israel,
nupa na' naca dxi'a tsahui' láchixi'do'guequi.

² Ia'látí'sö guchixi guníguida'.

Ia'látí'sö tsöjdöda' tsölá'alö,

³ tu' buzzé'eda' nupa tun ba zxön cuínguequi,
en tu' dēda' yöl-la' tsahui' quégaca nupa tuá' dö'.

⁴ Bití' ca' téquinē' zí' bönni' tu'ē dö' na'.

Nácagaquiē' tsutsu, en nacu'ē dxi'a.

⁵ Bití' ta'guí'i ta'záquē'ē ca ta'guí'i ta'zaca' ia'zícá'rö bönachi.

Bití' ca' raca quégaquiē' ca raca quégaca bönachi yúbölö.

⁶ Naca yöl-la' run ba zxön cuini quégaquiē'

ca tu le néquini oro dxía ícjagaquiē'.

Yöl-la' rutsatsa quégaquiē' naca ca zxágaquiē' nácugaquiē'.

7 Tu'zi'ë xibé le ta'dödi bë'ë të'aj tahuë',
en ta'zá' ládxi'gaquië' quégaca le zían le ila'déli'në'.

8 Tu'titjë' ia'zica'rö bönachi,
en tu'ë didza' lu yöl-la' run ba zxön cuini quégaquië'.

Tun ba zxön cuíngaquië',
en të'ënë' ila'bía nahuë' ia'zica'rö bönachi.

9 Ta'nné' queë' Dios zoë' yehua' yubá,
en tu'didza' yudxë' nupa nacuá' yödzölió.

10 Que lë ni na' ta'dá' bönachi queë' Dios légaquië',
en ta'yéajlë' didza' tu'ë.

11 Ta'nné': "Biti' ca' nözinë' Dios,
en biti' ilé'e lë ni Nu na' zoa xitsá'alö."

12 Caní nácagaca nupa tuá' dö'.

Dëda' yöl-la' tsahui' quéguequi, en ta'zí'tica'sö ia'lati'.

13 ¿Naru' nítisö ben chi'i cuina' para gaca' dxi'a
en para cabí ibága'a dul-la'?

14 Dios, benu' ga gudí'i guzxáca'a idú dza.
Yugu' zila benu' neda' zi'.

15 La'tu' bë'a didza' ca nácagaca lë ni
guzxí' yé'eda' bönachi quiu'.

16 Que lë ni na' bë' ládxa'a tséajni'ida' lë ni,
sal-la' gúcada' böniga

17 ga bidxintë dza guyu'a yudo' quiu'
en guyéajni'ida' ca gaca quégaca nupa tuá' dö'.

18 Le nácate nuzú' léguequi ga ta'chixi ta'nigui,
en runu' ga ila'niti tsaz.

19 La' ila'nítitë,
en ila'yaza ga udxi quéguequi.

20 Nácagaca ca tu le rinetu' yëla le ridödi que cate' ritö yu.
Cate' chasu', Xan, la' udöditeu' léguequi tsölá'alö.

21 Cate' yöjdín icja' le nácagaca ca tu le silá',
en guzá' ládxa'a yugu' le gúquida' zi',

22 guca' tu' canöz, en biti' bi guyéajni'ida'.
Guca' ca tuba' böa' guixi' lo' Li'.

23 Zóatica'sa' lo' Li',
ate' rizón cazu' neda'.

24 Rigú'u yöl-lu'u neda' le rugú'u neda' nöza quiu',
en ga údxitë uzi'u neda', en gunu' neda' bal.

25 ¿Núzxirö zoa yehua' yubá nu gácalen neda'?'
¡Tuzu' Li'!

Tu' rácalenu' neda' cúnturö nu zoa yödzölió nu riquinda'.

26 Ricuidi' le naca', en rudú ládxa'a.

Le ruzóa tsutsu ládxi'da'ahua',
en le ruzí'tica'sa' xibé naca cazu' Li', Xan.

27 Le nácate ila'niti nupa tu'cá'ana Li'.

Usunítiu' yúgu'të nupa tu'zóa Li' tsölá'alö.

28 Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'
para ulu'a lahui yúgu'të le nun cazu'!

74

- 1 Dios, ¿naru' tsaz nusán ládxi'u netu'?
¿Riléde'enu' netu', bö'cu' zxila' queë cazu'?
- 2 Yöjné netu', bönachi tu'dubi quiu', nupa böá'u cazu' dza ni'te,
nupa böá'u cazu' para gácatu' bönachi queë cazu'.
Yöjné guí'a Sión, ga ni guzóa cazu' Li'.
- 3 Gudá tödu' ga ni naguinnajdërö yödzö lá'ayi quiu'.
Bulu'sunítidërö nupa gula'dá'baga' Li'
yúgu'tè le gula'cuá' lataj lá'ayi quiu'.
- 4 Tu'tsatsa nupa na' gula'dá'baga' Li'
idú gásibi'ilö ga ni budúbitu' quiu'.
Nucúa'gaquië' ni le naca bë'gaca
nuxícjagaquië' yödzö lá'ayi quiu'.
- 5 Nalá' lahui yödzö ni ca nalá' tu guí'a cate' nu gulú'u le bidín,
en nurixi nu na' yugu' yaga gula'cuá' lu guí'a na'.
- 6 Bulu'zxuzxjè' le náacagaca lachi lu yödzö ni
len yugu' guíë huága quégaquië', en yugu' yaga zidzaj.
- 7 Bulu'zégui'è idútè lataj lá'ayi quiu'.
Nucá'anagaquië' cá'asö lataj ga benru' bal Lo'.
- 8 Lu icja ládxi'do'gaquië' gula'nè': "Nuxícjadërötu' bönachi ni."
Idútè lu xiyutu' bulu'zégui'è yúgu'tè yu'u ga na' budúbitu' lo'.
- 9 Bítirö caz rilé'etu' yugu' le bulu'subán ládxi'tu' gulísatu' lu xiyutu'.
Bítirö zoa nu bönni' ru'è didza' uláz quiu'.
Bítirö zóalen netu' nu bönni' nözinë' gáca'xte caz gaca caní queëtu'.
- 10 Dios, ¿gáca'xte caz ulu'lidza ditaj netu' nupa ta'díl-lalen netu'?
¿Gáca'xte caz ulu'cá'ana ditaj Lo' nupa ta'dá'baga' Li'?
- 11 ¿Naru' cabí gácalenu' netu'?
¿Bizx que nucáchu'u yöl-la' huáca zxön quiu'?
- 12 Rinná be'e quézinu' netu' Li', Dios, dza ni'te quez,
en rusölá cazu' bönachi idútè yödzölió.
- 13 Len yöl-la' huáca zxön quiu' bubéaj cazu' choplö nísado'.
Gulá'a cazu' ícagacaba' böa' zxön nacúa'aba' nísado'.
- 14 Bzxuzxja cazu' ícagacaba' böa' sínia' lëba' Leviatán.
Ben cazu' ga guláguba' yugu' böa' guixi' xipéla'ba' böa' sínia' na'.
- 15 Gusalaj cazu' yugu' beaj nisa, en gapa rálajda' nisa.
Busubidxi cazu' yugu' yegu nisa gula'yúdzutica'sö nisa.
- 16 Nequi queë cazu' lahui' dza, en nequi ca' quiu' chi'i dzö'ölö.
Ben cazu' Li' bení, enca' gubidza.
- 17 Naguixaj cazu' Li' yúgu'tè buzá' nacúa' yödzölió.
Nun cazu' Li' beo' la, en beo' ziaga.
- 18 Yöjné lë ni, Dios. Nupa ta'dá'baga' Li' nucá'anagaca ditaj Lo',
ate' nupa náacagaca canöz nucá'anagaca cá'asö Lo'.
- 19 Biti' usán no'o nupa nadxí'inu' lu ná'agaca nupa náacagaca ca yugu' böa'
guixi' sínia'.
Biti' gal-la ládxi'u tsaz nupa néquiguequi quiu', en ta'guí'i ta'zaca'.
- 20 Yöjné didza' dzaga na' núnlenu' netu',
tu' nacúa' nupa tuti bönachi gapa naca chul-la lu xiyutu'.
- 21 Biti' gu'u lataj ulu'gá'ana cá'asö nupa náacagaca bayechi'.
Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.
- 22 ¡Guyasa, Dios, en ben ca rnna xtídzu'u!

¡Ruzě nagu' ca rulidza ditjě' Li' bönni' canöz idú dza!
²³ Biti' gal-la ládxa'u didza' zi' tuí'i nupa ta'dá'baga' Li'.
 Yöl-la' dzatsa tun nupa tu'cá'ana Li' cá'asö riyöntica'sö.

75

¹ ¡Rětu' Li': "Xclenu', Dios!"
 ¡Rětu' Li': "Xclenu'",
 tu' zóatica'su' gal-la' ga zóatu'!
 ¡Tuí'i didza' bönachi ca nácagaca le zxön nunu'!

² Rnně' Dios: "Nuzóa' dza cate' uchi'a usöróa' bönachi.
 Uchi'a usöró caza' léguequi ca naca le nácate.
³ Tu'suniti yödzólió, en nupa nacúa' ni',
 pero tsaz nuzóa caza' le."
⁴ Gudxa' nupa tun ba zxön cuínguequi, gunnía': "Biti' gun ba zxön cuinli'",
 en gudxa' nupa tuá' dö': "Biti' huě tsahui' cuinli'.
⁵ Biti' huě tsahui' cuinli',
 en biti' gü'ili' didza' lu yöl-la' run ba zxön cuinli'."

⁶ Calěga ga rilén gubidza, en calěga ga ribía gubidza,
 en calěga la' guixi' ga dě lataj irúaj le huě tsahui' bönachi,
⁷ pero uchi'a usöró cazě' Dios bönachi.
 Uzötjě' tuě' bönni', en uchisě' ia'túě'.

⁸ Nuá' cazě' Xanru' lu ně'ě tu zxiga' yudzu xisa le ribía lubá uva le ribixi rilěbi.
 Chinugútsi'dě'rě' le, ate' rigu'ě le para ilě'aj le nupa tuá' dö' yödzólió ni,
 ate' ilě'jadě'rö le silá' que.

⁹ Neda' usiyöntica'sa' bönachi lě ni,
 en gul-la' yöl-la' ba queě' Dios queě' Jacob.

¹⁰ Ugúě' yöl-la' unná bě' quégaca nupa tuá' dö'.
 Quíxjě' tsaz yöl-la' unná bě' quégaca nupa nácagaca tsahui'.

76

¹ Zxí'ini xi'sóě' Judá núnbě'gaquiě' Dios.
 Nayěpisě le lě' ladaj bönachi Israel.

² Zoa caz lataj lá'ayi queě' lu yödzö Jerusalen,
 ate' nazí'i le Sión lataj ga na' zoa cazě'.

³ Ni' guditsjě' yugu' yaga lahui tuchi' zoa guí' láhuiguequi,
 enca' yugu' guíě la, en yugu' le ta'díl-lalen bönachi lu gudil-la.

⁴ ¡Yöl-la' ba Li', Dios!
 ¡Nayěpisětěru' ca yugu' guí'a zxön!

⁵ Buxicju' bönni' nál-lagaquiě'.
 Gudödi yěla guiój lógaquiě' bönni' röjáquiě' gudil-la,
 en biti' guca ila' chisa ná'agaquiě'.

⁶ Cate' Li', Dios queě' Jacob, gudíl-lalen cazu' légaquiě'
 gulátiba' böa', ate' gulati ca' nupa dxíagaca légacaba'.

⁷ Li' caz ral-la' gádxitu',
 tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usöröu' bönachi.

Ní'rö guladxi nupa nacúa' lu yu, en gula'cuá' dxisö,
⁹ cate' guzuíně' Dios para uchi'a usöröě' quégaca bönachi,

para usölë' nupa nácagaca nōxaj ladxi' yōdzōlió ni.

¹⁰ Sal-la' ta'léde'e bōnachi, gaca yōl-la' ba queë' Lë'.

Uzi'ë xibégaca nupa ulu'gá'ana ladjaguequi.

¹¹ Guli'sí' lu ná'ali' bi gunli' lahuë' Xanru' Dios,
en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nōdzaj queë',
tu' náquië' Nu ral-la' gádxiru'.

¹² Ubéaj cazë' bö' nácagaca caz nupa nadéli'gaca lataj lo.
Bōnni' ta'nná bē'ë luyú ni tádxiné' Lë'.

77

¹ Rulidza'-në' Dios, en ruá'a zidzaj didza'.

Rulidza'-në' Dios, ate' riyōnnë' chí'a.

² Cate' bi guca quia' bulidza'-në' Dios.

Chí'i dzō'ölö guchisa na'a lahuë', en biti' busana' rulidza'-në'.

Biti' guca nu huë tsahui' neda'.

³ Cate' rōjneda'-në' Dios, rō'a bōniga.

Cate' rinnë lādxa'a, ní'irō rudú lādxa'a.

⁴ Bubéaj casu' yëla guiōj lahua'.

Tu' ribō'a bōniga biti' gaca gu'a didza'.

⁵ Chiguzá' lādxa'a ca guca dza ni'te,

ca guca yugu' iz chigula'dōdi.

⁶ Tsōjneda' le bulá' chí'i dzō'ölö,

en tsōjsá' lādxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirō uzá' lādxë'ë quia'?

⁸ ¿Naru' cabirō gáquië' dxi'i ladxi'?

¿Naru' cabirō tsōjnenë' le guzxi' lu në'ë gunë'?

⁹ ¿Naru' nál-la lādxë'ë Dios tu' cabirō ruzá' lādxë'ë queëru'?

¿Naru' bíti'rō huéchi' lādxë'ë rë'u tu' rilenë'?

¹⁰ Ní'irō gudxi cuina': Raca caní quia' tu' risëbida' lādxa'a,

en que lë ni na' réquida' nadzá' yōl-la' unná bē' queë' Dios nayëpisë'.

¹¹ Tsōjneda' yugu' le nun casu' Li', Xantu'.

Tsōjneda' yugu' yōl-la' huáca benu' dza ni'te.

¹² Sa' lādxa'a ca nácagaca le nunu',

en cuéqui icja' ca nácagaca le runu'.

¹³ Naca lá'ayi ca run casu' Li', Dios.

Cúnturō nu zoa naca dios ca nacu' Li', Dios queëtu'.

¹⁴ Naca casu' Li' Dios, runu' yugu' yōl-la' huáca zxön.

Bulú'u lahui yōl-la' huáca quiu' lógaca bōnachi yúgu'të yōdzö.

¹⁵ Len yōl-la' huáca zxön quiu' busóló' bōnachi quiu',

nupa nácagaca zxí'ini xi'sóagaquië' Jacob, en José.

¹⁶ Bila'lé'e yugu' nísado' Li', Dios.

Bila'lé'e yugu' nísado' Li', en gula'bō' bōniga.

Gula'zxízilé'e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnëda' guziú'.

Guyëpi yösa ca yugu' yaga lahui tuchi'.

¹⁸ Lu bö' budunu' biyön guziú' quiu' gunnëda'.

Yösa gula'yëpi bulu'zeni' luyú.

Gudödida' budó' zxu', en guzxizi luyú.

¹⁹ Bilá' lahui nöza quiu' gatsaj láhui'lö nísado',
ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

²⁰ Guché' casu' bönachi quiu' ca runë' bönni' riché'ë-ba' bö'cu' zxila' huë'ënido'.
Guchë'u léguequi lu ná'agaquië' Moisés, en Aarón.

78

¹ Buli'zë nágali' le uzéajni'ida' libí'ili', bönachi quia'.

Buli'zë nágali' didza' gu'a.

² Usalja' ruá'a, en ucúdzu'a didza'.

Gu'a didza' tu le nagachi' dza ni'te quez,

³ tu didza' chibiyönru', en núnbë'ëru',

le gulé' xuz xtó'oru' rë'u.

⁴ Biti' ucáchi'ru' didza' na' lógacabi' xzí'iniru'.

Usiyönru' yugu' xzí'ini xi'sóaru' yöl-la' ba queë' Xanru',
ca naca yöl-la' huáca queë', en yugu' le zxön benë'.

⁵ Gudixjë' tu didza' naca bë' queë' Jacob,
en nuzóë' le rinná bë'ë quégaca bönachi Israel,
le gunná bé'enë' yugu' xuz xtó'oru'.

Ulu'zéajni'inë' xzí'inigaquië' ca naca,

⁶ para ilúnbë'gacabi' le, bi'i si' zá'gacabi', enca' bi'i si' iláljabi',
para ulu'luí'ibi' ca' xzí'inigacabi' ca naca lë na' gunná bë'ë Dios.

⁷ Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácagaca le gunná bë'ë,

⁸ en biti' ilácagacabi' ca guláquië' xuz xtó'ogacabi'.

Guláquië' zidzaj ladxi' tu' gula'dá'baguë'ë xtídzë'ë Dios,
en biti' guláquië' nöxaj ladxi',

ate' lu icja ládxi'do'gaquië' bití' gula'yéajlë'ë Dios.

⁹ Yugu' xzí'ini xi'sóë' Efraín guluá'gaquië' yaga uxiti',
pero bulu'zxúnnajë' lu gudil-la.

¹⁰ Biti' gula'dá'gaquië' didza' dzaga Dios bénlenë' légaquië',
en bití' gulunë' ca naca le gunná bé'enë' légaquië'.

¹¹ Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

¹² Benë' Dios le gulún ga bulu'bánninë' xuz xtó'ogaquië'
luyú Egipto, en luyú Zoán.

¹³ Gusaljë' nísado', en benë' ga gula'dödë' gatsaj láhui'lö nísado' na'.
Benë' ga guca nísado' na' ca yugu' guí'ado' tsölá'a huéaj.

¹⁴ Bulu'inë' légaquië' nöza lahui' dza, bugunë' dxin tu böaj,
ate' chí'i dzö'ölö bugunë' dxin tu böaj ruzeni' ca guí'.

¹⁵ Bulë'ë tu guiöj ga naca la' guixi' ga dë lataj,
en bë'ë le gulé'ajë' le guca ca tu nísado'.

¹⁶ Gulé'ajë' nisa yegu le gulén lu guiöjto'o.

Benë' ga birúaj nisa ca tu yegu zxön lu guiöjto'o na'.

¹⁷ La' ní'sö gulunë' dul-la' lahuë' Lë',
en gula'dá'baguë'ë Dios nayëpisëtëre' la' guixi' na'.

¹⁸ Lu icja ládxi'do'gaquië' gula'zí' bë'ë Dios quégaquië',
cate' gula'nábinë' Lë' ugahuë' légaquië' ca gula'zësö ládxi'gaquië'.

19 Ní'irö gula'nně' queë' Dios, gula'nně':
 “¿Naru' huáca cu'ë Dios le gáguru' la' guixi' ni ga dë lataj?
 20 Buli'yútsöca', bē'ë guiöjto'o, ate' birúajda' nisa,
 le guca ca nisa yegu gubó'o zxön.
 ¿Naru' huáca gunnē' ca' queéru' yöta gáguru'?
 ¿Naru' gaca ugahuē' bönachi queë' le naca bēla'?”
 21 Biyönnē' Xanru' Dios didza' ni, en guléde'enē',
 ate' gulén tu guí' le buzegui zían zxi'ini xi'sóë' Jacob,
 tu' guléde'enē' bönachi Israel,
 22 tu' cabí gula'yéajlě'ë Dios,
 en biti' bulu'zxöni ládxi'gaquiē' Lē' usölē' légaquiē'.
 23 Gunná bé'enē' Lē' yugu' böaj lúzxiba,
 en gusaljē' yehua' yubá.
 24 Gusöl-lē'ë yöta maná le ilahuē',
 en bugahuē' légaquiē' la' huagu que yehua' yubá.
 25 Gulahuē' bönni' ni' yöta tahuē' gubáz que yehua' yubá.
 Gusöl-lē'ë guizxi yu le ilahuē'.
 26 Benē' ga guyecja bö' birúaj ga rilén gubidza,
 ate' len yöl-la' huáca queë' gunná bé'enē' bö' recja
 le birúaj tsölá'alö ga ridödi gubidza beo' ziaga.
 27 Benē' ga böxaj bēla' ca bēchtö yu ládjalö ga na' nacu'ë,
 le naca böa' zoa xiligacaba' gurö'öba' ca yuzxi dë tu ra' yegu zxön.
 28 Benē' ga böxjagacaba' gatsaj láhui'lö ga na' nacu'ë,
 en ládjagaca yugu' yu'u guídido' quégaquiē'.
 29 Ca' guca, gulahuē', en bulu'huöläj gula'dzé'enē',
 tu' bē'ë quégaquiē' le gula'zēsö ládxi'gaquiē'.
 30 Zí'alö ca budxi bulu'huöläj gula'dzé'enē',
 tsanni ni' yu'u ruá'agaquiē' le tahuē',
 31 gulénē' Dios légaquiē',
 en bētiē' bál-lagaquiē', bönni' nál-latērögaquiē' ládjagaquiē',
 en bucul-lē' bönni' Israel nayēpisētērögaquiē'.
 32 Sal-la' guca caní, gulunrē' dul-la',
 en biti' gula'yéajlě'ë Lē' ni'a quégaca le zxön benē'.
 33 Que lē ni na' benē' ga böáca nítisö dxin gulunē',
 ate' lu yöl-la' radxi gula'zöë' yugu' lu iz quégaquiē'.
 34 Cate' bētiē' zíangaquiē', ní'irö bulu'lidzē' Lē'.
 Bulu'bí'i ládxi'gaquiē', en yöjtá'gaquiē' Dios.
 35 Ní'irö yöjnéguequinē' náquiē' Dios Nu run chi'i légaquiē',
 en náquiē' Dios nayēpisētērē' Nu böá'uö légaquiē'.
 36 Gula'zí' yé'enē' Lē' len didza' gulu'ë,
 tu' gulu'ë diza' biti' nácatē lahuē' Lē' len ruá'agaquiē'.
 37 Biti' gudá'gaquiē' Lē' idú ládxi'gaquiē',
 en biti' gulunē' ca rna didza' dzaga na' bēnlenē' légaquiē'.
 38 Tu' buéchi' ládxi'ë Dios légaquiē',
 buniti lahuē' ca naca xigua' gulunē', en biti' busunítiē' légaquiē'.
 Bubequi lahuē' quégaquiē', en bítirö gulénē' légaquiē',
 en biti' benē' ca sa'yéaj yöl-la' ridzá'a queë'.
 39 Ca' guca, yöjnenē' nácagaquiē' bönáchisö.
 Nácagaquiē' ca tu bö' recja le ridödisö, en biti' rudxín.
 40 Zían luzuí gula'dá'baguē'ë Lē' ga na' naca la' guixi',
 en bulu'suhuí'inē' Lē' lu yu bidxi na'.

- 41 Zián luzuí gula'zí' bē'ē Dios,
 en gulunē' zī' Dios Lá'ayi quégaca bönachi Israel.
- 42 Biti' yójnéguequinē' yöl-la' huáca zxön queē',
 le bulu'e lahui dza ni' böá'uē' légaquiē'
 lu ná'agaca nupa biti' bila'lé'e légaquiē' dxi'a,
- 43 cate' ni' benē' le gulaca bē' luyú Egipto,
 en benē' yugu' yöl-la' huáca queē' luyú Zoán,
- 44 cate' benē' ga böáca nisa rön yugu' lu yegu luyú Egipto,
 enca' nisa yugu' lu beaj quégaquiē' para cabí guca ilé'ajē' le.
- 45 Gusöl-lē'ē ladjagaquiē' bōtsugayu guizxi yu,
 böa' gula'guídxiba' légaquiē'.
 Gusöl-lē'ē ca' riu bulu'sunítiba' le nequi quégaquiē'.
- 46 Budödē' le naz nuzóagaquiē' lu ruá'agacaba' böchi' zu,
 ate' guláguba' böchi' zu na' le rö'ö yugu' la' yēla quégaquiē'.
- 47 Busunítie' yugu' lubá uva quégaquiē' len nisa guiój yōla sunna na',
 en busunítie' yugu' yaga higo quégaquiē' len bögui'.
- 48 Bētie'-ba' böa'-bēdxi quégaquiē' len nisa guiój yōla sunna na',
 en lu yōsa gula'yēpi.
- 49 Lu yöl-la' rilé queē' gusöl-lē'ē quégaquiē' yugu' lē ni,
 en lu yöl-la' ridzá'a queē' busaca' zī'ē légaquiē',
 en gusöl-lē'ē quégaquiē' gubáz que yehua' yubá para bulu'sunítie' légaquiē'.
- 50 Biti' bubequi lahuē' quégaquiē' para cabirō lenē' légaquiē',
 en biti' buniti lahuē' légaquiē' para cabí ilátie'.
 Budödē' légaquiē' lu yöl-la' guti,
- 51 en bētie' yúgu'tēbi' bi'i bönni' lo quégaquiē' bönni' Egipto,
 yugu' bi'i bönni' lo quégaquiē' xzi'ini xi'sóē' Ham.
- 52 Guchē'ē bönachi queē' ca yugu' bö'cu' xzila'do',
 en buluí'inē' légaquiē' nöza la' guixi' ga dē lataj.
- 53 Guchē'ē légaquiē' lu nē'ē para cabí bi iládxinē',
 pero gubaga' nísado' nupa biti' bila'lé'e légaquiē' dxi'a.
- 54 Ca' guca, guchē'ē légaquiē' ga zoa luyú lá'ayi queē',
 luyú ni bidéli'nē' uláz quégaquiē' len yöl-la' huáca queē'.
- 55 Bulágui'ē bönachi izá'a luyú ni lógaca bönachi queē',
 en burixē' que quégaquiē' xiyúgaquiē' ga ila'cu'ē,
 en benē' ga gula'cu'ē bönachi Israel yugu' lu yu'u guídido'.
- 56 Le yúbölö gula'zí' bē'ē Lē', en gula'dá'baguē'ē Dios nayēpisētērē',
 en biti' gulunē' yugu' le gunná bé'enē' légaquiē'.
- 57 Bulu'huóa ládxi'gaquiē', en bulu'cá'anē' Lē' ca gulunē' xuz xtó'gaquiē'.
 Gula'dödē' tsölá'alö ca run tu yaga lahui tuchi' biti' nácatē li.
- 58 Gulún lenē' Lē' tu' gulunē' xilátjagaca budó' guiój budó' yaga yugu' lu guí'a,
 en gulunē' ga budúli'nē' légaquiē' ni'a quégaca budó' na'.
- 59 Cate' bilé'enē' lē ni Dios, guléde'enē',
 en budí'inē' bönachi Israel.
- 60 Ní'irö bucá'anē' xilatjē' lu yödzo Siló,
 ga na' guzóa yu'u lá'ayi queē' ladjagaquiē' bönni' ni'.
- 61 Bē'ē lataj gula'ché'ē bönni' zī'tu' guí'ina lá'ayi queē',
 guí'ina na' buluí'i lahui yöl-la' zxön queē'.
- 62 Budödē' bönachi queē' lu ná'agaca nupa bétigaca léguequi,
 63 en gúquinē' zī' nupa náagaca quez queē'.
 Buzegui tu guí' zxön yugu' bi'i bönni' quégaquiē',
 ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

- 64 Yugu' bixúz quégaquië' gulátië' lu guíë tuchi',
ate' biti' guca ila'bódxinu nigula uzëbi quégaquië'.
- 65 Ní'irö gúquië' Xanru' ca tu bönni' rubanë' lu yöl-la' rasi.
Gúquië' ca bönni' rejë' gudil-la gudödi bë'ë gu'ë xisi lubá uva nál-la.
- 66 Bulágui'ë yugu' bönni' gula'díl-lalenë' bönachi queë',
en tsárido'os burixë' légaquië'.
- 67 Lësca' budödë' tsölá'alö yugu' zxí'ini xi'sóë' José,
en biti' guröë' yugu' zxí'ini xi'sóë' Efraín.
- 68 Guröë' yugu' zxí'ini xi'sóë' Judá,
en yödzö Sión le nadxí'i quézinë' Lë'.
- 69 Ni' benë' tu lataj lá'ayi queë' le naca ca tu guí'a zxön,
le zoa tsutsu ca yödzölió ni nuzóë' tsaz.
- 70 Guröë' ca' David, huen dxin queë',
en bubéajë' lë' ga na' zoë' ruyúë'-ba' yugu' bö'cu' zxíla'do'.
- 71 Bubéajë' lë' ga na' rapa chi'ë-ba' yugu' bö'cu' zxíla' guná',
nacuá'aba' böa' huë'ënido' quégacaba',
para gáquië' nu uyú bönachi queë', yugu' zxí'ini xi'sóë' Jacob,
en bönachi Israel, nupa na' nácagaca quez queë'.
- 72 Ca' guca, idú ládxe'ë buyúë' David bönachi na',
en lu yöl-la' rácada' queë' guchë'ë légaquië' lu në'ë.

79

- 1 Dios, nacué' bönachi izá'a lu xiyúgaca bönachi quiu'.
Nucá'anagaca cá'asö yudo' lá'ayi quiu',
en nusunítigaca yödzö Jerusalén.
- 2 Bulu'cá'anë' bönachi quiu' nátigaca luyú para iláguba' bíchulab léguequi,
en bëla' rön quégaca huen xichinu' ga iláguba' böa' guixi' le.
- 3 Bulu'laljë' xichóngaca bönachi quiu' ca nisa idütë lu yödzö Jerusalén,
ate' cuntu nu bugá'ana nu ucache' léguequi.
- 4 Bönachi yugu' dzaga luyú queëtu' tu'titaj netu'.
Tu'zxidxë', en tu'didza' yudxi netu'.
- 5 ¿Naru' tsaz ilenu' netu', Xan?
¿Naru' sóatica'sö yöl-la' rilé quiu' ca tu guí' ruzegui netu'?
- 6 Gulégaca bönachi yugu' yödzö zi'tu' biti' tun Li' bal,
enca' bönachi biti' tu'lidza Li'.
- 7 Bétigaca bönachi quiu' nácagaca zxí'ini xi'sóë' Jacob,
en nusunítigaca xiyutu' ga zoa cazu' Li'.
- 8 Biti' gunu' netu' xiguia' tu' nözi dul-la' gulunë' xuz xtó'otu'.
Buéchi' ladxi' netu' na'a, tu' rudú ládxi'tu'.
- 9 Gúcalen netu', Dios, Nu rusölá netu', para guntu' bal Lo'.
Busölá netu', en buniti lo netu' ca naca dul-la' nabága'tu' para idxí'itu' Lo'.
- 10 ¿Bizx que ta'nabi bönachi yugu' yödzö izá'a netu',
ta'nná: "Gázxité zoa Dios queëli"?"
Bë' lataj ilé'etu', en ben ga gaca bë' lógaca yúgu'të bönachi
rizí' lo' nupa tu'lalaj xichóngaca huen xichinu'.
- 11 Buzë nagu' ca ta'nnë ládxi'gaca nupa nadzúngaca.
Len yöl-la' huáca zxön quiu' busölá nupa na' narugu quéguequi ilátigaca,
- 12 en bubí'i quégaca bönachi yugu' dzaga yödzö queëtu'
ia'gadxi cö'lö ca' tsca naca didza' zi' gula'nnë quiu' Li', Xan.
- 13 Netu', bönachi quiu', enca' bö'cu' zxíla' ruyú cazu' Li',

guiética'stu' Li': "Xclenu",
en cú'utica'stu' Li' yöl-la' ba na'a dza, en dza si' zaca.

80

¹ Ruzé nagu' netu', Dios, Nu rapa chi'i bönachi Israel.

Nacu' Nu ruyú yugu' zxi'ini xi'sóe' José ca nu ruyú yugu' bö'cu' zxila'.

Buzení' queétu', Li' na' rö'u rinná bē'u ga nacua'
nupa nál-lágacatērō quiu' lēgaca querubín.

² Buluí'i yöl-la' huáca quiu' lógaca zxi'ini xi'sóagaquiē' Efraín, en Benjamín, en
Manasés.

Gudá queétu', en busölá netu'.

³ Ben ga huécjatu' quiu' Li', Dios.

Buluí'i netu' nadxí'inu' netu', ate' ulatu'.

⁴ Xantu' Dios quéguequi ni'a no'o guizxi yu,

¿gáca'xte caz ilenu' netu', en biti' yönnu' le rulidztu' Li'?

⁵ Rugagu' netu' nisa ribödxi queétu',
en rugui'ju' netu' sizxöni nisa ribödxi.

⁶ Nunu' ga bönachi dzaga yödzö queétu' tu'zxidxi queétu',
ate' nupa biti' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí'inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bönachi izá'a yugu' lu yödzö luyú ni, en budó'o lubá na' ni.

⁹ Buchi'u lataj ga guzxön lubá na'.

Benu' ga ben luí ga rē', ate' bulí idütē luyú ni.

¹⁰ Gulú'u zxul-la lubá na' yúgu'tē lu guí'ado',
ate' ni'a nē'e gula'baga' yugu' guí'a zxön.

¹¹ Gula'tunna ni'a nē'e ga bidxintē ra' nísado',
enca' ga bidxintē ra' yegu Eufrates.

¹² ¿Bizx que buquínaju' yugu' lē'aj gulún chi'i lubá na',
en ru'u lataj nupa ta'dōdisō ta'bán le ribía lubá uva na'?

¹³ Tu'líbigacaba' cuchi guixi' le,
ate' táguba' böa' guixi' le.

¹⁴ Buécja queétu', Dios quégaca ni'a no'o guizxi yu.

Ga ni' zu' yehua' yubá buyú ca raca que lubá quiu', en busölá netu'.

¹⁵ Gudá dusöló' lubá ni budá' cazu',

le naca ca tu lubá huě'ēni buxön cazu' Li'.

¹⁶ Nupa biti' ta'lé'e netu' dxi'a gula'chugu ni'a nē'e lubá na', en bulu'quela' le
guí'.

Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' gurō cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bítirō ucá'anatu' Li'.

Bunna queétu' yöl-la' na'bán, ate' uzxöni lādxi'tu' Lo'.

¹⁹ Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí'inu' netu', ate' ulatu'.

81

- ¹ Lu yöl-la' rudzeja queéli' guli'gul-la queë' Dios.
Lë' náquië' yöl-la' näl-la queéli'.
- Lu yöl-la' rudzeja queéli' guli'cödxí'a lahuë' Dios queë' Jacob.
- ² Guli'gul-la tu le gúl-lali', cápa'li' lë'e guídido'.
- Guli'quinnaj lë'egaca bihuël-la.
- ³ Guli'cödxí luzu chivo cate' zoa beo' hué'ëni,
en cate' zoa beo' näl-la, en cate' raca laní.
- ⁴ Lë ni naca tu xibá quégaca bönachi Israel,
le naca tu le gunná bé'enë' Xanru' Dios zxi'ini xi'sóë' Jacob.
- ⁵ Gudixjë' le para gaca tu le gun ba nälí queë' lógaca zxi'ini xi'sóë' José,
le gudixjë' cate' gudödë' luyú Egipto,
ga ni' biyönda' didza' izá'a bití' guyéajni'ida'.
- ⁶ Rnnë' Dios: "Gudúa' yua' zxa ya'zxicjagaquië',
en bucuíta' le nuá'gaquië' le bulu'subaga' légaquië'
nupa bití' bila'lé'e légaquië' dxi'a.
- ⁷ Bulídzali' neda' cate' bi guca queéli', ate' busölá' libí'ili'.
- Bubi'a didza' cate' bi gunábili' neda', ni' nucachi' cuina' tu lu böaj gasaj.
Guzxí' bë'a libí'ili' ga zoa nisa na' lë Meriba.
- ⁸ Bulí'zé nágali', libí'ili', bönachi quia', ate' uxösa' libí'ili'.
- Raca ládxa'a uzé nágali' neda', bönachi Israel.
- ⁹ Bití' ral-la' soa tu dios izá'a ga na' zóali',
en bití' gunlí' zxon tu dios quégaca bönachi zi'tu'.
- ¹⁰ Neda', Xanlí', naca' Dios queéli'.
- Guléaja' libí'ili' luyú Egipto.
- Guli'salaj ruá'ali', ate' cu'a ruá'ali' le gáguli'.
- ¹¹ Bití' bulu'zé nágagaca bönachi quia' chí'a.
- Bití' gulún bönachi Israel ca rnna xtídza'a.
- ¹² Que lë ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.
- ¹³ Guz' ládxa'a ulu'zé nágagaca bönachi quia' xtídza'a,
para ilún bönachi Israel ca ré'ënda' neda'.
- ¹⁴ La'tu' ilún caní, uxicja caza' nupa bití' ta'lé'e léguequi dxi'a,
en tíl-lalena' nupa ta'díl-lalen léguequi.
- ¹⁵ Ulu'lu'i' cuínguequi nupa bití' ta'lé'e neda' dxi'a,
ca nupa tun ca rnna xtídza'a,
pero tsaz guna' léguequi xigua'.
- ¹⁶ Lësca' ugahua' libí'ili', bönachi quia', zxa' xtila dxí'ado',
en guna' ga huölaj idzé'eli' le zxixi que buz, le irúaj lë'e guiöj."

82

- ¹ Zuínë' Dios ladaj nupa tu'dubi queë' ni' yehua' yubá.
Ruchi'a rusöröë' nupa ta'nná bë'.
- ² Rnnë': "¿Gáca'xte caz uchi'a usöröli' quégaca bönachi
lu yöl-la' bití' naca tsahui' queéli'?
- Caní naca tu' rubéajli' tsahui' nupa tuá' dö'.
- ³ Bulí'béaj tsahui' nupa ta'cuidi', en yugu' bi'i uzëbi.
Guli'gún le naca tsahui' quégaca nupa ta'gu'i ta'zaca',
en quégaca nupa ta'yadzaj ta'yudxi.
- ⁴ Bulí'sölá nupa ta'cuidi', en nupa nácagaca yechi'.
Bulí'sölá léguequi lu ná'agaca nupa tuá' dö'.

⁵ Biti' nöziguequi, en biti' ta'yéajni'i.

Ta'dá ga chul-la.

Rixxizi xilibi yödzölió."

⁶ Rnna caza' neda': "Nácali' ca yugu' dios.

Nácali' yúgu'téli' zxí'inë' Dios nayépisëtëre',

⁷ pero gátili' ca tati bönachi,

en ibíxili' lu gudil-la ca ta'bixi zxí'inë' bönni' lo."

⁸ Guyasa, Dios, en buchi'a busörö quégaca bönachi yödzölió ni,

tu' nácacaca queë cazu' yúgu'të yödzö bönachi.

83

¹ Biti' ugá'anu' dxisö, Dios.

Biti' su' dxisö, Dios, en biti' usayaj ru'u,

² tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxön cuínguequi.

³ Tun tuz xtídza'guequi bi ilún quégaca bönachi queë cazu',

en tu'pá yugu' le ilún quégaca nupa nadxí'i quézinu', ta'nná:

⁴ "Guli'dá, usunítiru' léguequi para cabirö ilaca tu yödzö bönachi,

en para cúnturö nu tsöjné bönachi Israel."

⁵ Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

⁷ en yugu' bönni' Gebal, en yugu' bönni' Amón, en yugu' bönni' Amalec,

en yugu' bönni' Filisteo, en yugu' bönni' Tiro,

⁸ enca' yugu' bönni' Asiria núngaquië' légaquië' tsözxön.

Rácalengaquië' yugu' bönni' zxí'ini xi'sóe' Lot.

⁹ Ben quégaquië' ca benu' quégaca bönachi Madián, nupa na' busunítiru' dërö,

en ca na' benu' queë Sísara, en ca na' benu' queë Jabín ra' yegu Cisón,

¹⁰ nupa na' busunítiru' lu yödzö Endor,

ate' gulaca ca xiqué'ëba' bëdxi luyú ni'.

¹¹ Ben quégaquië' bönni' lo quéguequi

ca benu' quégaquië' Oreb, en Zeb,

en ben quégaquië' bönni' ta'nná bé'enë' léguequi

ca benu' quégaquië' Zeba, en Zalmuna,

¹² nupa na' gula'nná: "Ilequi queëru' yugu' lataj gapa na' gulequi queë' Dios."

¹³ Dios quia', ben ga ilácagaquië' ca bëchtö yu le richë' bö',

en ca bëbu zxe café le ruá' bö' budunu'.

¹⁴ Ca run tu guí' zxön, ruzegui' yugu' yaga zxön,

o ca run tu guí', ruzegui' tu guí'a zxön,

¹⁵ gusí regu' léguequi tu lu bö' budunu',

en ben gadxi léguequi tu lu nisa guiöjsiu' zili.

¹⁶ Ben ga ulu'tuí'i

para ulu'guilaj Li', Xan.

¹⁷ Ben ga ulu'tuí'i, en ila'bö' tsaz böniga.

Ben ga ulu'gá'ana cá'asö, en tsaz ila'niti,

¹⁸ para iléquibe'e nayépisëtëru' tuzu' Li' idútë yödzölió

en ulu'zóa zxíbiguequi lo', Xantu' Dios.

84

1 ¡Bica' lachi gapa zoa cazu' Li', Dios!
¡Nacu' Xángaca ni'a no'o guizxi yu!

2 Rizé ládxa'a soa' lu yu'u lidxu', Xana' Dios.

Lu yöl-la' rudzeja quia' idú ládxa'a rul-la' quiu' Li', Dios ban.

3 Bidzöliba' biguínni chulí' lataj ga nuzóaba' lídxiba',
en bidzöliba' xiguichi guziú' ga budxíaba' xicá'aba',
ga na' rigú'uba' biguínido' queéba',
gala' ga dē lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

4 ¡Bica' ba nupa ta'yaza lu yu'u lidxu'!

¡Ta'gú'utica'sö Li' yöl-la' ba!

5 ¡Bica' ba bönni' nápagaquiē' yöl-la' nál-la le nequi queē cazu',
en ta'zé ládxi'gaquiē' ila'yu'ē nöza le ridxín yödzö Sión!

6 Cate' ta'dödē' lu yu bidxi tunē' ga ruhuóaca gapa ralaj nisa beaj.

Tun ga rizí' xibé yu bidxi na' yugu' nisa guiój ta'dxin bayón.

7 Lu yöl-la' huáca quégaquiē' rójáquiē', en tu'zí'rönē' yöl-la' huáca.
Ta'dxinē' yúgu'tēgaquiē' lo' Li', Dios, lu yödzö Sión.

8 Ruzé nagu' le rulidza' Li', Dios, Xángaca ni'a no'o guizxi yu.

Ruzé nagu' neda', Dios queē' Jacob.

9 Buyúē' bönni' rinná bé'enē' netu', Dios.

Buyúē' bönni' na' nabö cazu'.

10 Nácarö dxi'a soa' tu dza lu yu'u lidxu' ca le soa' idú chi gayuá' dza ga yúbölö.
Cóa' zí'alö gaca' huen dxin ga nu riyaza yu'u lidxē' Dios
ca le soa caza' tu yu'u zxön ga bití' zoa Dios.

11 Náquiē' Xanru' Dios ca gubidza, en le rusubín rē'u.

Xanru' caz runnē' queēru' yöl-la' ruzá' ladxi' queē', en yöl-la' zxön queē'.

Bití' ugúē' nitú le naca dxi'a gapa nacuá' nupa tun le naca tsahui'.

12 ¡Li', Xángaca ni'a no'o guizxi yu,

bica' ba bönni' ruzxöni ládxi'ē' Li'!

85

1 Buzá' ládxi'u quégaca bönachi quiu', Xantu' Dios.

Buchē'u Li' xzí'ini xí'sóē' Jacob gula'dzunē'.

2 Buniti lo' bönachi quiu' ca naca xiguia' gula'baga'.

Bucáchu'u yugu' dul-la' gulúngaca.

3 Buzóa dxíu' yöl-la' rilé quiu'.

Bugú' yöl-la' ridzá'a quiu'.

4 Buzóa netu' xilátjatu' le yúbölö, Dios, Nu rusölá netu',
en bíti'rö lenu' netu'.

5 ¿Naru' tsaz ilenu' netu'?

¿Naru' tsaz ilenu' yugu' xzí'ini xsoatu'?

6 ¿Naru' cabí usubanu' ládxi'tu' le yúbölö,
para udzeja ládxi'lentu' Li' netu', bönachi quiu'?

7 Lu yöl-la' dxi'i ladxi' quiu' gúcalen netu',
en busölá netu', Xan.

- 8 Uzé naga' didza' gu'ë Xanru' Dios.
 Le guíë' bönachi queë' gun ga gaca dxi'a quéguequi,
 nupa na' nácagaca quez queë',
 pero run bayúdx biti' ulu'huõa ládxi'gaca.
 9 Le nácatë chizóë' usölë' nupa tun Lë' bal,
 para soa yöl-la' ba queë' luyú queëtu'.
 10 Dzágagaca yöl-la' dxi'i ladxí', en le naca idútë li.
 Tagu zxixi luzë' eguequi nu naca tsahui', en nu riböza dxi'a tsahui'do'.
 11 Luyú caz rilén le naca idútë li,
 ate' yehua' yubá rirúaj le naca tsahui'.
 12 Le nácatë Xanru' unödzejë' queëru' le naca dxi'a,
 ate' xiyuru' unödzej le uláparu'.
 13 Le naca tsahui' röjnöru lahuë' Xanru',
 en gun ga soa nöza gáti'tës ga ulibë'.

86

- 1 Ruzé nagu', Xana' Dios, en rubí'u didza',
 tu' zoa nu rusaca' zi' neda', ate' riyadzaj riyúdxida'.
 2 Ben chí'i bö' naca caza', Dios, tu' naca' quiu' Li'.
 Busölá neda', huen dxin quiu', Dios quia', tu' ruzxöni ládxa'a Li'.
 3 Buzá' ladxí' quia', Xan,
 tu' rulidza' Li' idú dza.
 4 Ben ga udzeja ládxa'a neda', huen dxin quiu',
 tu' rigú'a lu no'õ bö' naca caza', Xan.
 5 Nacu' dxi'a, Xan, en chizú' uniti lo' bönachi quiu'.
 Nadxí'ítica'su' yúgu'të nupa tu'lidza Li'.
 6 Ruzé nagu' le rulidza' Li', Xan,
 en ruí'i ládxi'u gunu' yugu' le inábida' lo'.
 7 Cate' bi gaca quia' ulidza' Li',
 tu' ubí'i cazu' didza' bi gunu' quia'.
 8 Cúnturö nu zoa ládjagaca dios nu naca ca nacu' Li', Xan,
 en biti' zoa ia'tú nu run ca nácagaca le runu' Li'.
 9 Ila'dxín bönachi yúgu'të yödzö naguixju' Li', Xana' Dios,
 en ila'yéaj ládxi'gaca Li', en ilún zxön Lo'.
 10 Nayëpisëtërosu' Li', en tuzu' Li' runu' yugu' yöl-la' huáca zxön.
 Tuzu' Li' nacu' Dios.
 11 Busëdi neda' ca naca le rë'ënu' guna', Xan.
 Guna' ca naca le naca idútë li naguixju' Li'.
 Ben ga gádxida' Lo' idú ládxa'a.
 12 Idú ládxa'a guía' Li': "Xclenu", Xana' Dios,
 en guna' zxön Lo' yugu' iz si' zaca.
 13 Nadxí'ide'enu' neda',
 en chibusóló' bö' naca caza' lu lataj chul-la ga nacua' nupa chinátigaca.
 14 Dios quia', nupa ta'dá'baga' neda' ta'díl-lalen neda',
 ate' yugu' bönni' zidzaj ladxí' té'ënë' ilútië' neda',
 yugu' bönni' na' biti' tunë' Li' bal.
 15 Nacu' Dios ruhuéchi' ládxi'u netu', Xan, en ruzá' ládxi'u queëtu'.
 Ridzenu' para ilenu' netu', en nadxí'ide'enu' netu', en runu' ca rnna xtídzu'u.
 16 Buyú neda', en buzá' ladxí' quia'.
 Butipa ládxa'a neda', huen dxin quiu',
 en busölá neda', zxi'ininu nigula huen dxin quiu'.
 17 Buluí'i neda' tu le gaca bë' gaca dxi'a quia',

para ila'lé'e le nupa biti' ta'lé'e neda' dxi'a.
 Ulu'tuí'i, tu' gúcalenu' neda',
 en buë tsahú'u neda', Xan.

87

- ¹ Nuzóë' Dios xilibi zö'ö que yödzö queë' lu guí'a lá'ayi.
² Nadxí'irönë' Xanru' lataj ga na' tu'chi'a tu'sörö bönachi Sión
 ca nadxí'inë' ia'zica'rö lataj gapa nacuá' bönachi Israel.
³ Zián le lachi ta'nná bönachi ca naca
 yödz na' nequi queë' Dios.
⁴ Cate' ulidza' bönachi núnbë'gaca neda', Dios,
 ulidza' bönachi nníta'gaca Egipto, en Babilonia.
 Ca naca quégaca bönachi Filistea, en Tiro, en Etiopía
 innía' nabábagaca yödzö lá'ayi na'.
⁵ Cate' gu'a didza' que yödzö Sión innía':
 Bönachi ni, en bönachi izá'a ni nabábagaca le,
 ate' neda', Dios nayëpisëtërë', uzóa' tsutsu yödzö na'.
⁶ Cate' ulabë' Xanru' nupa nácagaca queë' innë':
 "Bönni' ni nababë' yödzö quia'."
⁷ Ní'irö iluí'i didza' nupa tul-la, en nupa tu'cödxí gui, ila'ná:
 "Ruzí'itu' xibé tuzi yödzö ni."

88

- ¹ Xana' Dios, Nu rusölá neda',
 rulidza' Li' rëla, en te dza.
² Bë' lataj idxín lo' le rulidza' Li'.
 Ruzé nagu' le rinaba yúdxida' Li'.
³ Ruúbi ruguí'i ládxi'da'ahua',
 en chizóa tsöjtsázia' lataj chul-la.
⁴ Chinabábalena' nupa chinátigaca.
 Naca' ca tu bönni' nudú dërö lãdxë'ë,
⁵ en nagá'anë' cá'asö ladaj nupa chinátigaca,
 en ca nupa dëgaca yeru ba,
 nupa na' bíti'rö röjnenu',
 en nusán no'o léguequi.
⁶ Nuzú' neda' tu lu yeru zila,
 ga naca chul-la, en le nácada' zila.
⁷ Rilenu' neda',
 en rusaca' zi'u neda' tu lu nísado' quiu'.
⁸ Nucuásu' yúgu'të nupa núnbë'a.
 Nunú' neda' ca tu le ta'guti bönachi.
 Nadzuna', en biti' gaca irúaja'.
⁹ Tu' riguí'i rizáca'a nudú guiöj lahua'.
 Tu dza tu dza rulidza' Li', Xan.
 Richisa na'a zaca' ga na' zu'.
¹⁰ ¿Naru' guntso' yugu' yöl-la' huáca zxön
 para gácalenu' nupa chinátigaca?
 ¿Naru' ulu'yasa nupa yú'ugaca lataj chul-la,
 en ila'gú'u Li' yöl-la' ba?
¹¹ ¿Naru' ulu'luí'i lahui yöl-la' dxi'i ladxi' quiu'

nupa nagáchi'gaca yeru ba?
 ¿Naru' ulu'lu'i lahui nupa yú'ugaca lataj chul-la
 ca runu' ca rnna xtídz'u?
 12 ¿Naru' gaca bë' le zxön runu' ga na' naca chul-la?
 ¿Naru' gaca bë' nacu' tsahui' ga na' cuntu nu bi röjné?

13 Rulidza' Li' neda' para gácalenu' neda',
 ate' yugu' zila ridxín lo' le rinábida' Li'.
 14 ¿Bizx que nusán ládzu'u neda', Xan?
 ¿Bizx que rucachi' lo' lahua' neda'?
 15 Riguí'i rizáca'a, en chizóa gátia' ga gudela' naca' bí'ido'.
 Réquida' zi' tu' ruxösu' neda', en rudú ládxa'a.
 16 Nabága'a neda' yöl-la' rilé quiu',
 ate' chizóa usuniti neda' le ruxösu' neda'.
 17 Idú dza naca quia' ca nabaga' neda' nisa.
 Nagú'ugaca neda' l'é'ajlö yugu' nisa.
 18 Nucúásu' ga zoa' nu nadxí'i neda', enca' luzá'a.
 Zóalensö le naca chul-la neda'.

89

1 Gúl-latica'sa' ca naca yöl-la' dxi'i ladxi' quiu', Xan.
 Usiyönda' zxí'ini xsoatu' ca runu' ca rnna xtídz'u.
 2 Gunnía': "Sóatica'sö yöl-la' dxi'i ladxi' quiu'.
 Tsaz naca bë' yehua' yubá ca runu' ca rnna xtídz'u."
 3 Rnnë' Dios: "Naguixja' tsaz didza' dzaga núnléna' nupa nabö caza' quia'.
 Bena' tsutsu xtídz'a ca guna' queë' David, huen dxin quia'.
 4 Gunnía': Ucuá'a tsaz zxí'ini xi'sú'.
 Guna' ga sóatica'sö nu inná bë' uláz quiu'."
 5 Nupa nacué' yehua' yubá quiu' ila'gú'u yöl-la' ba le nunu' le tun ga rubánitu',
 Xan.
 Ga nudúbigaca nupa náccagaca quez quiu' ila'gú'u yöl-la' ba ca runu' ca rnna
 xtídz'u.
 6 ¿Nuzxi caz zoa ni' yehua' yubá naca ca nacu' Li', Xan?
 ¿Nuzxi caz zoa ladaj nupa nayépiségaca naca ca nacu' Li', Xan?
 7 Nupa náccagaca lá'ayi tun Li' bal, Dios.
 Ral-la' gúnöröru' Li' bal ca tun nupa nacué'len Li'.
 8 Dios, Xángaca ni'a no'o guizxi yu, ¿nuzxi caz naca ca nacu' Li', Xantu'
 nayépisëtërou'?
 Naca bë' rúntica'su' ca rnna xtídz'u.
 9 Rinná be'e quézinu' le riyasa ridxía que nísado'.
 Cate' riyasa ridxía nísado', ruzóa cazu' le dxisö.
 10 Busuniti cazu' bönachi Egipto, ate' gulaca ca nupa chinátigaca.
 Bësilásiu' léguequi len no'o nál-la.
 11 Nequi quiu' yehua' yubá,
 en nequi ca' quiu' luyú ni, tu' nuzóa cazu' léguequi.
 12 Naguixaj cazu' le dë tsölá'a ga za' bö' ziaga,
 en le dë tsölá'a ga ridödi gubidza beo' ziaga.
 Lu yöl-la' rudzeja quéguequi ta'bödxi'a guí'a Tabor,
 en guí'a Hermón cate' ta'yöni Lo'.

13 ¡Nál-latëro naca no'o!

¡Nápatērō no'o yōl-la' huáca!
 ¡Nayēpisētērō no'o ibēla!

14 Le naca dxi'a, en le naca tsahui' tun tsutsu le rinná bē'u.
 Nacuá'len Li' yōl-la' dxi'i ladxi', en le naca idútē li.

15 Bica' bágaca nupa ta'yōni didza' que yōl-la' rudzeja.
 Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,
 en tu' zóalen léguequi le naca tsahui' quiu', le nayēpisētērō.

17 Naca cazu' Li' yōl-la' zxōn que yōl-la' huáca quéguequi,
 en tu' ruzá' ládxi'u queétu' nazxōnda' yōl-la' nál-la queétu'.

18 Nequi queē' Xanru' le run chi'i rē'u,
 ate' néquinē' queē' Dios bōnni' rinná bé'enē' rē'u.
 Dios na' náquiē' lá'ayi ladaj bōnachi Israel.

19 Dza ni'te bē'lenu' nupa néquiguequi quiu' didza'
 lu yugu' le bulu'ínu' léguequi,
 gunnó': "Gúcalena' tu nu nayēpisētērō.

Nuchisa' tu nu gurō caza' quia' ladaj bōnachi.

20 Budzōlida'-nē' David, huen dxin quia'.

Gulu'a-nē' le za le naca lá'ayi quia'.

21 Len na' caza' naguixja' lē',
 ate' len na'a ca' utipa' ládxi'ē.

22 Biti' si' ye'e lē' nu rilé lē',
 en biti' usaca' zi' lē' nu ruá' dō'.

23 Uquínna' lahuē' nupa ta'díl-lalen lē',
 en gu'a nupa biti' ta'lé'e lē' dxi'a.

24 Sóalena' lē' lu yōl-la' run ca rnna xtídza'a,
 en lu yōl-la' dxi'i ladxi' quia',
 ate' tu' ulidzē' La', uxōna' yōl-la' nál-la queē'.

25 Guna' ga inná bē'ē ga naguela' ra' nísado',
 ga idxintē ra' yegu Eufates.

26 Ulidzē' neda', innē': Li' nacu' Xuza', en Dios quia',
 enca' Nu run chi'i neda', en Nu rusólá neda'.

27 Gun caza' neda' ga gáquiē' ca bi'i lo queē' caza',
 ate' tsēpisētērē' ca yugu' bōnni' ta'nná bē'ē yōdzōlió.

28 Lu yōl-la' dxi'i ladxi' quia' gun chí'itica'sa' lē',
 en uzóa' tsaz queē' didza' dzaga quia'.

29 Ucuá'a tsaz xzí'ini xi'sóē',
 ate' sóatica'sō lataj ga inná bē'ē, tsca soa yehua' yubá.

30 Channō ulu'cá'anē' xzí'ini xi'sóē' xibá quia',
 en cabí ilunē' ca naca le buchi'a busörōa',

31 en channō ila'guitsjē' xibá que le gunná bē'a,
 en cabí ilunē' ca nácagaca le gunná bé'eda' légaquiē',

32 ní'irō guna' légaquiē' xigua' ca sa'yéaj le ta'dōdi bē' tunē',
 en gu'a léguequi ca naca xigua' nabága'gaquiē'.

33 Pero biti' ugúa' queē' yōl-la' dxi'i ladxi' quia',
 en biti' usana' guna' ca rnna le guzxi' lu na'a guna'.

34 Biti' ucá'ana' cá'asō didza' dzaga nuna',
 en biti' utsá'a didza' bē'a.

35 Tu le nuzóa' tsutsu, en nuna' ba nalí que le naca lá'ayi quia'.

Biti' ca' si' yé'eda' David.

³⁶ Gunníá' íla'cuá'tica'sè' zxi'ini xi'sóè',
en ga rō'è rinná bē'è sóatica'sō lahua' ca gubidza.

³⁷ Naguixja' le tsaz ca nuzóa' tsaz beo',
ate' nacuá'tica'sō lúxiba le tun ba nalí."

³⁸ Pero nuzú' tsölá'alö, en nusán lādxi'u,
en riléde'enu' nupa na' gurō cazu' quiu'.

³⁹ Nuzú' tsölá'alö didza' dzaga bēnlenu' huen dxin quiu'.
Nuzötju' luyú yöl-la' unná bē' queë'.

⁴⁰ Nuquínaju' zō'ö gulún chi'i lē',
en nusunítu' yugu' lataj tsutsu queë'.

⁴¹ Yúgu'tē nupa ta'dōdisō ta'bán le nequi queë',
ate' bönni' dzaga yu'u queë' tu'cá'ana lē' cá'asō.

⁴² Nuchisu' nupa ta'dá'baga' lē',
en runu' ga tu'dzeja nupa biti' ta'lé'e lē' dxi'a.

⁴³ Runu' ga biti' sequi' idéli'nē' lu gudil-la,
ate' cuntu nu sequi' ucul-lē' lu gudil-la na'.

⁴⁴ Bugú' yöl-la' lachi queë',
en nuzötju' yöl-la' unná bē' queë' lu yu.

⁴⁵ Benu' ga chinagulē' sal-la' ni zoë' iz cuidi',
en nunu' ga rutuí'inē'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sō yöl-la' rilé quiu' ca tu guí' réguide'e?

⁴⁷ Yōjné nabábasō iz soa' ibana',
en tu chí'isō nacuá' bōnachi yōdzölió ni.

⁴⁸ ¿Nuzxi caz bönni' gaca sóatica'sē' ibanē', en cabí gátíē'?

¿Naru' huáca usölá cuin cazē' lu yöl-la' unná bē' que lataj chul-la?

⁴⁹ ¿Gáxité zoa yöl-la' dxi'i ladxi' quiu' guzóa zí'alö, Xan,
lē' na' buzú' tsutsu xtídz'u' gunu' queë' David,
len yöl-la' run ca rna xtídz'u'?

⁵⁰ Yōjné ca tu'cá'ana cá'asō netu', huen dxin quiu', Xan,
enca' ca tu'cá'ana neda' cá'asō bōnachi zían yōdzö izá'a.

⁵¹ Tu'cá'ana neda' cá'asō nupa biti' ta'lé'e Li' dxi'a, Xan.
Tu'cá'ana cá'asō yugu' le runa' neda', bönni' gurō cazu' quiu'.

⁵² ¡Yöl-la' ba Xanru' Dios iz si' zaca!

¡Ca' gaca! ¡Ön, ca' gaca!

90

¹ Naca cazu' Li', Xan, ca yu'u lidxa'.

² Zí'atëlö ca gulata' yugu' guí'a, o ca guta' yōdzölió,
ga naguela' cate' gusí lo ga idxintē dza udxi, tsaz naca cazu' Dios.

³ Runu' ga tu'huóáca bōnachi bēchtö yu cate' rno':
"Guli'huóáca le néquinili', bōnachi."

⁴ Quiu' Li' chi gayuá' iz nácagaca
ca dza neje le chigudödi que,
o ca tu chí'isö chí'i dzö'ölö.

⁵ Bugacu' bōnachi ca tu lu yegu gubó'o, ate' gúacagaca ca tu yēla rineru'.
Cate' naca zila zéaj naca ca tu guíxi'do' rilentē luyú.

6 Cate' naca lahui' dza rixxõn, en rø' ni'a nẽ'e,
pero cate' chiral-la, ricuadi', en ridödi que.

7 Rinítitu' tu' rilenu' netu',
ate' tu' ridzó'o ruúbi ruguí'itu'.

8 Nuzú' lo' xigua' nabága'tu',
en nubéaju' lu bení' quiu' dul-la' yu'u ládxi'do'otu'.

9 Tu' riléde'enu' netu' ridödi quégaca dza queétu',
ate' chibú'u iz queétu' ca tu le rinné ládxi'tu'.

10 Tsónnalalaj yu' chi ízisö zóatu' nabantu',
o channö nál-latu', huazóatu' idú tápalalaj iz,
pero runtu' dxin bayudxi, en ruhuí'initu' yugu' iz na',
tu' ridödité quéguequi iz na', ate' uzá'atu'.

11 ¿Nuzxi caz réajni'i tsca naca yöl-la' rilé quiu'?'
¿Nuzxi caz nözi ca naca tsöbi yu'u nu na' rilenu'?

12 Que læ ni na' busëdi netu' para guéquiibe'etu' tsca gácagaca iz zóatu',
para gácatu' bönachi ta'yéajni'i lo' Li'.

13 ¿Gáca'xte caz biti' huéchi' ládxi'u netu', Xan?
Buéchi' ladxi' netu', yugu' huen dxin quiu'.

14 Tu zila tu zila buluí'i netu' ca naca yöl-la' dxi'i ladxi' quiu',
para gúl-latu' lu yöl-la' rudzeja queétu', en uzí'itu' xibé yugu' dza na'.

15 Ben ga udzëjatu' tsca chigulaca dza busaca' zi'u netu',
en tsca gulaca iz biti' guca dxi'a queétu'.

16 Buluí'i netu', yugu' huen dxin quiu', ca naca le nunu',
en buluí'i zxi'initu' ca naca yöl-la' zxõn quiu'.

17 ¡Buzá' ladxi' queétu', Xantu' Dios,
en ben ga irúaj dxi'a dxin runtu'!
¡Ön, ben ga gaca dxi'a lo' dxin runtu'!

91

1 Nu bönni' ruzxõni ládxi'ë Dios para gun chi'ë læ',
en rizi'ë Dios Nu napa idütë yöl-la' huáca, para gácalenë læ',

2 gaca guië' Xanru': "Nacu' Nu run chi'i neda', en Nu ruzóa neda' tsutsu.
Nacu' Dios quia', ate' ruzxõni ládxi'a Li'."

3 Usölá cazë' Dios Li' lu du yalaj que nu rizõn bönachi,
en lu yödzhüé' le rusuniti.

4 Usubágüë'ë li' ca rusubága'ba' böra yugu' bõrado' queëba',
ate' gaca chi'u lu nẽ'ë ca raca quégacaba' bõrado' znan xílaba' yøjede.
Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.

5 Biti' gádxinu' le run gadxi bönachi chi'i dzö'ölö,
en biti' gádxinu' yaga lahui' tuchi' tu'së bönachi lahui' dza,

6 en biti' gádxinu' yödzhüé' le rilén ga naca chul-la,
en biti' gádxinu' le naca xihui' le ruti bönachi lahui' dza.

7 Ilátigaca chi gayuá' bönachi cuitu' li',
en ia'chí cö' chi gayuá' cuitu' ibëla,
pero biti' bi gaca quiu' li'.

8 Le nácatë uyú iná'asu',
en ilé'enu' le rubí'i quégaca nupa tuá' dö'.

9 Tu' nuzú'-në' Xanru' Nu run chi'i li',
nuzú'-në' Dios nayëpisëtërë' Nu gácalen li',

10 biti' bi gaca quiu' le cabí naca dxi'a,
en nitú le nachë' yödzhüé' biti' tsu'u lidxu',

11 tu' cu'u cazë Dios li' lu ná'agaquië' gubáz lá'ayi queë',
para ilún chi'ë li' gáti'tës ga ridó'.

12 Lu ná'agaquië' ila'chë'ë li',
para cabí tsöjchégu'u guiöj.

13 Uléaj ulibu' bëdxi guixi', en bëla sínia'.
Usunu' lë'e labu' bëdxi guíxi'do', en bëla xitsiní'.

14 Rnnë' Dios: "Nadxi'inë' neda', ate' que lë ni na' usölä' lë'.
Uzóa'-në' tsaz xitsá'tërö tu' núnbë'ë La'.

15 Ulidzë' neda', ate' ubi'a didza'.
Sóalena' lë' cate' bi gaca queë'.

Usölä' lë', en guna' lë' bal.

16 Uzánda'a dza soë' ibanë',
en uluí'ida'-në' ca gaca usölä' lë'."

92

1 ¡Bica' tsahui' naca rigú'utu' Li' yöl-la' ba, Xan,
en rúl-latu' le tun Li' bal, Dios nayëpisëtërë',

2 en rusiyöntu' bönachi yugu' zila ca ruhuéchi' ládxi'u netu',
en ruluí'itu' lahui yugu' dzö' ca runu' ca rnna xtídzu'u!

3 Rúl-latu' len yugu' bihuël-la,
en rúl-latu' yugu' le lachi ca tul-la.

4 Le zxön nunu' Li', Xan, run ga rudzëjatu',
ate' ruzi'tu' xibé le núngaca lu no'o.

5 Bica' zxön nácgaca le nunu' Li', Xan.
Zxöntërö le rizá' ládxi'u gunu'.

6 Zoa tu le cabí gaca inözinë' bönni' nazxi' icjë',
en biti' gaca tséjni'inë' bönni' canöz le.

7 Nupa nucá'anagaca Dios ila'yán ca ta'yán guíxi'do',
en ulu'zì' xibé le tun nupa tuá' dö', pero ila'niti tsaz,

8 tu' nayëpsëtëru' Li' tsaz, Xan.

9 Naca bë' le gaca quégaca nupa biti' ta'lé'e Li' dxi'a, Xan.
Naca bë' ila'niti nupa biti' ta'lé'e Li' dxi'a.

Ulu'gá'ana cá'asö yúgu'të nupa tuá' dö'.

10 Nunu' ga nácatëra' nal-la ca nácabá' bëdxi.
Nagú'u neda' le za le run ga rudzëjada'.

11 Ilé'e quézida' cate' uxicju' nupa biti' ta'lé'e Li' dxi'a,
en yönda' cate' ila'bödxi yechi' nupa tuá' dö', nupa na' ta'díl-lalen neda'.

12 Ila'yán nupa nácgaca tsahui' ca ta'yán yaga zina' ca'.
Ila'zxön ca ta'zxön yaga rögaca lu guí'a Líbano.

13 Nácgaca ca yaga nudá'gacu' ra' yu'u lidxu', Xan,
le ta'zxön lu lö'a lataj quiu', Dios queëtu'.

14 Cate' ni' yú'ugaca iz zían ila'bía le zxixi quéguequi.
Ilácgaca tsutsu, en ila'cuá'tica'sö ya'a.

15 Caní gaca para gaca bë' náquië' tsahui' Xanru', Nu run chi'i neda'.
Biti' bi zóalen Lë' le cabí naca tsahui'.

93

1 ¡Rinná bë'ë Xanru'!

¡Nácuë' yöl-la' ba zxön queë'!

¡Nácuë' zxë' Xanru', en núguië' lë'ë yöl-la' unná bë'!

¡Nuzóë' tsutsu yödzölió, ate' biti' utá cuini!

- 2 ¡Tsaz nuzú' tsutsu ga rö'u rinná bē'u, Xan,
en zóatica'su' Li'!
- 3 Riyasa ridxía nisa yugu' lu nísado', Xan.
Riyasa ridxía nisa, en ru'u bö que.
Riyasa ridxía nisa yugu' lu nísado', en yugu' lu yegu.
- 4 Xanru' Dios yehua' yubá nápatērē' yöl-la' unná bē'
ca bö ru'u lu nísado' le riyön ca guziú' rinnē,
enca' ca le riyasa ridxía nisa lu nísado'.
- 5 Tsaz naguixju' xibá quiu', Xan,
ate' idú lá'ayi naca ga zoa cazu' Li'.
Caní zóatica'sö na'a dza, en dza si' zaca.

94

- 1 Nacu' Dios, Xan, Nu ruzí' lēbi bönachi.
Buluí' i cuinu', Dios, Nu ruzí' lēbi.
- 2 Ruchi'a rusörö cazu' yúgu'tē bönachi.
Guzē, ate' len yöl-la' huáca zxön quiu' bubí' i quégaca nupa tun ba zxön
cuínguequi.
- 3 ¿Gáca' xte caz ulu' zí' xibé nupa tu' cá' ana Li', Xan?
¿Gáca' xte caz ulu' zí' xibé?
- 4 ¿Gáca' xte caz ilún ba zxön cuínguequi, en iluf' i didza' zi'?
¿Gáca' xte caz ilún ba zxön cuínguequi ni' a que dö' tuá' gaca?
- 5 Tu' sunítiē' nupa néquiguequi quiu', Xan.
Tu' saca' zi' ē nupa néquiguequi quez quiu'.
- 6 Tútigaquiē' nigula uzēbi, enca' yugu' bi' i uzēbido',
en tunē' le naca xihui' ladaj bönachi zi' tu'.
- 7 Ta' nnē': "Biti' ilé' enē' Xángaquiē' rē' u,
en bití' ruí' i ládxi' ē Dios queē' Jacob lē ni."
- 8 Guli' tséajni' i, bönachi bití' nözguequi,
ate' libí' ili', bönachi catún bal, ¿bátaxi tséajni' ili'?
- 9 Benē' Dios guídi nágaru'. ¿Naru' cabí riyön quézinē'?
- Benē' Dios guiōj loru'. ¿Naru' cabí rilé' e quézinē'?
- 10 Ruzéajni' i quézinē' Dios bönachi yúgu'tē yödzo.
¿Naru' cabí gunē' léguequi xiguaia'?
- Ruchiza cazē' icja ládxi' do' oru' yöl-la' réajni' i.
¿Naru' cabí réquibe' enē' bi runli'?
- 11 Nöz quézinē' Xanru' yugu' le ta' zá' ládxi' gaca bönachi.
Nözínē' canöz naca le ta' zá' ládxi' gaca.
- 12 Bica' ba bönni' na' ruzéajni' i quézinu' -nē', Xan,
en rusedi quézinu' -nē' ca naca xibá naguixju' Li'.
- 13 Gunu' ga uzí' ládxi' ē cate' bi gaca queē',
ga idxinrö dza tsú' ugaca yeru ba nupa tuá' dö'.
- 14 Biti' usán nē' ē Xanru' bönachi queē',
en bití' ucá' anē' nupa néquiguequi quez queē'.
- 15 Ca naca le naca tsahui' uchi' a usöröē' rē' u le yúbölö,
ate' ulu' zí' xibé nupa náca gaca tsahui'.
- 16 ¿Nuzxi caz tíl-lalen nupa tuti bönachi para gácalen neda'?
¿Nuzxi caz gácalen neda' cate' nacuá' nupa tuá' dö' quia'?

17 La'tu' cabí gúcalenë' Xanru' neda',
la' yöjtsú'utea' lataj chul-la que yöl-la' guti.

18 Gunnía': "Chizóa' ibixa",
ate' lu yöl-la' dxi'i ladxí' quiu' guzxönu' neda', Xan.

19 Cate' ruúbi ruguí'i ladxí'da'ahua',
ruhuë tsahú'u neda', en runu' ga rudzėjada'.

20 Biti' ca' gunu' tsözxön nupa tu'chi'a tu'sörö netu' ca naca le cabí naca
tsahui',
nupa na' tu'béaj tsahui' le cabí naca tsahui'.

21 Tu'dubë' tsözxön para ilútië' nupa nácagaca tsahui',
en ta'chúguië' quégaca nupa bití' bi nabága'gaca ilátigaca,

22 pero run chí'i cazë' Xanru' Dios neda'.

Nuzóë' neda' tsutsu, ate' ruzxöni ládxa'a lë'.

23 Ubi'ë quégaquië' ca naca dö' tu'ë,
en usunítië' légaquië' tu' nözi xiguia' nabága'gaquië'.
Usunítië' dërö Xanru' Dios légaquië'.

95

1 Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxí'aru' que Nu na' naca ca tu guiöjto'o ga nuláru'.

2 Uyéajru' lahuë', en guiëru'-në': "Xclenu'."

Lu yöl-la' rudzeja queëru' cödxí'aru' lahuë', gúl-laru' yugu' salmo.

3 Xanru' Dios náquië' Dios nayëpisëtërë'.

Nápatërë' yöl-la' unná bë' ca yúgu'të dios izá'a.

4 Lu na' cazë' yu'u le dë ga rë' znan luyú,
ate' néquiguequi ca' queë' gu'a sibi.

5 Nequi queë' nísado', tu' nun cazë' le,
en len ná'asë' benë' luyú bidxi.

6 Guli'dá, gunru'-në' zxon, en uzóa zxíbiru' lahuë'.

Uzóa zxíbiru' lahuë' Xanru' Nu ben rë'u.

7 Naca cazë' Lë' Dios queëru',

ate' nácaru' bönachi rugagu cazë', en ca bö'cu' zxila' richë' cazë'-ba' lu në'ë.

Rnna cazë' Dios: "Na'a, channö ré'ënili' yönili' chí'a,

8 bití' gunlí' zidzaj icja ládxi'do'oli' ca gulunë' xuz xtó'oli' lataj na' lë Meriba,
en calëga ca gulunë' la' guixi' ga dë lataj lë Masa,

9 cate' ni' gula'zí' bë'ë xuz xtó'oli' neda'.

Gula'zí' bë'ë neda' sal-la' bila'lé'enë' yugu' le bena'."

10 Idú choá' iz gúquida' zi' bönachi gula'cuá' dza ni',
ate' gunnía': "Ta'chixi ta'níguinë' lu icja ládxi'do'gaquië',
en bití' nözguequinë' le ré'ënda' ilunë'."

11 Que lë ni na' lu yöl-la' rilé quia' bena' tsutsu xtídza'a,
gunnía': "Biti' ca' ila'yázië' ga ulu'zí' ládxe'ë tsözxön len neda'."

96

1 ¡Guli'gul-la queë' Xanru' tu le cubi!

¡Guli'gul-la queë' Xanru', yúgu'tëli' zóali' yödzölió!

2 ¡Guli'gul-la queë' Xanru'! ¡Guli'gún zxon lë'!

Tu dza tu dza buli'siyön bönachi didza' dxi'a ca rusölë' rë'u.

3 Buli'siyön bönachi yúgu'të yödzö yöl-la' ba queë'.

Buli'siyõn yúgu'të bõnachi le nácagaca zxõn nunë'.

⁴ Zxõntërõ náquië' Xanru', ate' runda' bayúdx cú'uru'-në' yõl-la' ba. Ral-la' gádxitëru' Lë' ca tadxi bõnachi izá'a dios quéguequi.

⁵ Yugu' dios quégaca bõnachi izá'a nácagacasõ budó' guiõj budó' yaga, pero Xanru' Dios nunë' lúzxiba xitsá'.

⁶ Nacuá' yõl-la' bení', en yõl-la' ba lahuë' Lë'.

Nacuá' yõl-la' huáca, en yõl-la' lachi ga zoa cazë'.

⁷ ¡Guli'cu'ë Xanru' yõl-la' ba, bõnachi yúgu'të yõdzõ!

¡Guli'cu'ë yõl-la' ba, en yõl-la' huáca!

⁸ ¡Guli'cu'ë Xanru' yõl-la' ba ni'a que Lë'!

¡Guli'guá' le unõdzjali', en guli'dá lahuë'!

⁹ ¡Guli'gún Lë' zxõn, náculi' le naca ba'a!

¡Guli'zxizi lahuë', bõnachi idútë yõdzõlió!

¹⁰ Guli'nná lógaca bõnachi yúgu'të yõdzõ: "Rinná bë'ë Xanru'.

Naguixjë' tsaz luyú, ate' bití' utá cuini.

Ca naca le naca tsahui' uchi'a usõrõë' quégaca yúgu'të bõnachi."

¹¹ Ral-la' udzeja lúzxiba, en ulu'zì' xibé luyú.

Ral-la' cõdxi'a nísado', en ila'bõdxi yúgu'të le nacuá' lu nísado'.

¹² Ral-la' udzeja guixi' caz, en yúgu'të le nacuá' la' guixi'.

Lu yõl-la' rudzeja quéguequi ilúl-la yaga

¹³ lahuë' Xanru', tu' si' ulé'.

Guídë' duchi'a dusõrõë' nupa nacuá' yõdzõlió.

Ca naca le naca tsahui' uchi'a usõrõë' quégaca yúgu'të bõnachi, enca' quégaca bõnachi yúgu'të yõdzõ para ilunë' ca rnna xtídzë'ë.

97

¹ ¡Rinná bë' cazë' Xanru' Dios!

¡Ral-la' ulu'dzeja bõnachi idútë yõdzõlió!

Buli'sí' xibë', libí'ili' zóali' yúgu'të yõdzõ izá'a.

² Rõ'gaca böaj, en le chul-la idú gásibi'ilõ ga na' zoë'.

Le naca dxi'a, en le naca tsahui' tu'zóa tsutsu le rinná bë'ë.

³ Rinõru tu guí' zxõn lahuë',

le uzegui' nupa ta'dá'baga' Lë'.

⁴ Tu'zení' le ta'yëpi yõsa yõdzõlió.

Rilé'e luyú lë ni, en rizzizi.

⁵ Tu'úna' guí'ado' ca ruún bidxina' buz lahuë' Xanru'.

Náquië' Xani idútë yõdzõlió.

⁶ Lúzxiba xitsá' naca bë' náquië' tsahui',

ate' ta'lé'e bõnachi yúgu'të yõdzõ yõl-la' zxõn queë'.

⁷ Tu'tuí'i yúgu'të nupa tun zxõn budó' guiõj budó' yaga,

nupa na' tun ba zxõn cuínguequi ni'a quégaca budó' quéguequi na'.

Ulu'gá'ana cá'asõ yúgu'të dios quégaca bõnachi izá'a lahuë' Xanru'.

⁸ Bila'yõni bõnachi Siõn, en bulu'dzeja,

enca' yugu' zxí'ini xi'sóë' Judá.

Tu'dzéjanë' ca ruchi'a rusõrõu' netu', Xan.

⁹ Nayëpisëtëro cazu' Li', Xan, ca yúgu'të nupa nacuá' yõdzõlió.

Nayëpisëtëro cazu' Li' ca yúgu'të dios quégaca bõnachi izá'a.

10 Núlöli' nadxí'ili'-në' Xanru', guli'guequi zi' le naca dö'.
Run chi'i cazë' bö' nácgaca caz nupa néquiguequi queë'.
Rusölë' léguequi lu ná'agaca nupa tuá' dö'.

11 Ruzení'tica'sö bení' queë' nupa nácgaca tsahui',
ate' tu'zi' xibë' nupa nácgaca dxi'a.

12 ¡Buli'sí' xibë' Xanru' núlöli' nácali' tsahui'!
¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98

1 ¡Guli'gul-la queë' Xanru' tu le cubi,
tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-
la.

2 Nunë' Xanru' ga naca bë' le nadéli'në'.
Nuluí'inë' bönachi yúgu'të yödzö náquië' tsahui'.

3 Len yöl-la' dxi'i ladxi' queë', en yöl-la' li ladxi' queë'
benë' ca rnna xtídzë'ë le guzxi' lu në'ë gunë' quégaca bönachi Israel.
Bila'lé'e bönachi idútë yödzölió ca busölé' rë'u Dios queëru'.

4 ¡Lu yöl-la' rudzeja queéli' guli'gul-la queë' Xanru', yúgu'tëli' zóali' yödzölió!
¡Idú ládxi'li' guli'cu'ë yöl-la' ba, en guli'gul-la queë' le naca lá'ayi!

5 ¡Guli'gul-la queë' Xanru' yugu' salmo, en guli'quinnaj yugu' bihuël-la!
¡Guli'quinnaj lé'egaca arpa, en guli'gul-la yöl-la' ba queë'!

6 ¡Guli'cödxí lúzugacaba' chivo, en lúzugacaba' bëdxi
lahuë' Xanru' Dios, Nu rinná bë'!

7 ¡Buli'lidza zidzaj, nísado', en yúgu'të le nacué' nisa na'!
¡Guli'gul-la yödzölió, en yúgu'të nupa nacué' ni'!

8 ¡Guli'capa' ná'ali', yugu' yegu,
ate' lu yöl-la' rudzeja queéli' guli'gul-la lahuë' Xanru', libí'ili', guí'ado',

9 tu' zë'ë duchi'a dusöröë' quégaca bönachi yödzölió!

Ca naca le naca tsahui' uchi'a usöröë' quéguequi,
en ca naca le naca dxi'a tsahui' inná bé'enë' yúgu'të bönachi.

99

1 ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatërö yöl-la' huáca,
légaca Querubín, ate' rixxizi luyú.

2 Nayëpisëtërë' Xanru' lu yödzö Sión,
ate' rinná bé'enë' bönachi yúgu'të yödzö izá'a.

3 Ral-la' ila'gú'u Lë' yöl-la' ba yúgu'të bönachi,
tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxí'i quézinu' le naca tsahui', Li', Bönni' unná bë' nayëpisë.
Tsaz naguixju' le naca dxi'a tsáhui'do',
en nuzú' quégaquië' zxí'ini xi'sóë' Jacob le naca tsahui', en le naca idútë li.

5 ¡Guli'gún zxönë' Xanru' Dios!

Buli'zechu zxíbili' lahuë' Lë' ga rö'ë rinná bë'ë.
¡Lá'ayi náquië' Lë'!

⁶ Guláquië' Moisés, en Aarón bixúz queë',
ate' benë' Samuel tsözxõn nupa gula'yéaj ladxí'gaca Lë'.
Bulu'lidzë' Xanru', ate' bubí'i cazë' didza'.

⁷ Tu lu böaj bé'lenë' légaquië' didza'.

Gulunë' ca ta'nná bë' xibá queë', en yugu' le gunná bé'enë' légaquië'.

⁸ Bubi'u didza' lógaca bönachi quiu', Xantu' Dios.
Bulu'ínu' légaquië' nacu' Dios, en runiti lo' bönachi,
pero rubi'u quégaquië' ca sa'yéaj dö' tu'ë.

⁹ ¡Guli'gún zxönë' Xanru' Dios!
¡Buli'zechu zxíbili' lahui' lo guí'a lá'ayi ga zoa cazë',
tu' náquië' lá'ayi Xanru' Dios!

100

¹ ¡Lu yöl-la' rudzeja queéli' guli'gul-la queë' Xanru',
libí'ili' zóali' idútë yödzülió!

² ¡Lu yöl-la' rudzeja queéli' guli'cu'ë yöl-la' ba Xanru'!
¡Guli'dá lahuë' Lë', en lu yöl-la' rudzeja queéli' guli'gul-la queë'!

³ ¡Guli'tsöjné Xanru', náquië' Dios!

Buzá' cazë' rë'u, en calëga rácasö queëru' zóaru'.
Nácaru' bönachi queë', en nácaru' ca bö'cu' zxila' queë'.

⁴ Guli'tsaza zaca' ra' yu'u queë', guiéli'-në': "Xclenu'."
Guli'tsaza gapa naca lö'a queë', cú'uli'-në' yöl-la' ba.
Guli'guíë': "Xclenu'", en guli'gunë' zxön.

⁵ ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxí' queë'!
¡Zóatica'sö yöl-la' run ca rnna xtídzë'ë queë'!

101

¹ ¡Gul-la' ca runu' ca rnna xtídzü'u, en ca nacu' tsahui'!
¡Gul-la' yöl-la' ba quiu' Li', Xan!

² Güf'i ladxá'a guna' le naca idú dxi'a.

¿Bátaxi huécju' quia' neda'?

Lu yu'u lidxa' guna' le naca idú ladxí'.

³ Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxõn.

⁴ Biti' ca' gaca' chopa ladxí'.

Biti' ca' guna' le naca dö'.

⁵ Usunítia' dërö nu bönni' rinnë' que luzë'ë balándo'os.

Biti' ca' guá' ilena' nu run ba zxön cuini.

⁶ Uyúa' dxi'a tsahui'do' nupa tun ca rnna xtídzá'guequi luyú ni, para ila'cuá'len
neda'.

Nu biti' bi xiguia' nabaga' huáca gun xichina'.

⁷ Biti' ca' tsöjsóala lidxa' nu rizí' yë'.

Biti' gu'a lataj ugá'ana lahua' nu ruí'i didza' le cabí naca.

⁸ Yugu' zila usunítia' yúgu'të nupa tuá' dö' luyú ni,

para ucuita' lu yödzo queë' Xanru' yúgu'të nupa tuti bönachi.

102

¹ ¡Buzé nagu' le rulidza' Li', Xan!

¡Bë' lataj idxín lo' le rinaba yúdxida' Li'!

² Biti' ucache' cuinu' lahua' cate' bi rusaca' zi' neda'.
Buzé nagu' neda', en gudáchi ubi'u didza' cate' rulidza' Li'.

³ Yöl-la' na'bán quia' ruúlu ca dzön,
ate' régui rilá lu dxita lu bin quia' ca tu guí'.

⁴ Rudú ládxa'a ca raca que guixi' nabidxi,
en bíti'rö rizé ládxa'a bí gahua'.

⁵ Tu' rinnëda' ládxa'a nadxítalë'a.

⁶ Naca' ca tuba' biguínni zóaba' luyú bidxi,
o ca tuba' cuturú dxíaba' tu lu yu'u nadachi.

⁷ Nabéaj yëla guiöj lahua',
ate' naca' ca tuba' biguínido' dxíaba' túziba' ícjo'o yu'u.

⁸ Yugu' dza nupa bití ta'lé'e neda' dxi'a tu'didza' yudxi neda'.
Nupa tu'titaj neda' tu'gún dxin la' cate' nu tu'dxía dö'.

⁹ Naca le rahua' ca dödo'sö,
en nutsi' nisa ribödxá le rë'ja'.

¹⁰ Caní raca quia' tu' rilenu' neda', en réquinu' neda' zi'.
Gulisu' neda', en gurú'unu' neda' tsölá'alö.

¹¹ Naca yöl-la' na'bán quia' ca tu zxul-la rilá' cate' ribía gubidza,
en rudú quia' ca raca que guixi' ricuádi.

¹² ¡Li', Xan, zóatica'su',

en zóaléntica'sö Lo' bönachi!

¹³ ¡Chasu', en huéchi' ládxi'u bönachi yödzo Sión!

¡Chibidxín dza gü'i ládxi'u léguequi!

¡Ön, chibidxín dza na'!

¹⁴ Netu', huen dxin quiu', nadxí'itu' yugu' guiöj nacué' lu zö'ö run chi'i yödzo
Sión,

en ruí'i ládxi'tu' ga ridxintë bëchtö rö'ö la' nöza que.

¹⁵ Bönachi yugu' yödzo izá'a iladxi Lë' Xanru',
ate' nupa ta'nná bë' yödzo'lió iladxi yöl-la' zxön queë'.

¹⁶ ¡Nuchisë' Xanru' caz yödzo Sión,
ate' ulu'í' lahuë' ni' lu yöl-la' zxön queë'!

¹⁷ Riyönnë' le tu'lidza Lë' nupa ta'yadzaj ta'yudxi.

Biti' ca' uzóë' tsölá'alö le tu'lidza yudxi Lë'.

¹⁸ Buli'zúaj lë ni lu guichi para ulu'laba xzí'ini xi'sóali' le,
ate' nupa si' ilalaj ila'gú'u Xanru' yöl-la' ba.

¹⁹ Ga ni' ribözë' Xanru' xitsá' lu lataj lá'ayi queë',
ga ni' zoë' Xanru' yehua' yubá, ruzé naguë'.

²⁰ Riyönnë' le ta'nné ladxí' nupa nadzúngaca,
en usanë' nupa narugu quéguequi ilátigaca.

²¹ Soa nu usiyöni bönachi yödzo Sión ca naca Lë' Xanru',
ate' ila'gú'u Lë' yöl-la' ba lu yödzo Jerusalén,

²² cate' ulu'dubi tsözxön bönachi yugu' yödzo izá'a,
en bönachi yugu' luyú,

ate' tsözxön ila'gú'u yöl-la' ba Xanru'.

²³ Benë' Xanru' ga gucuídi'da' la' nöza,
en nunë' ga soa' nabábasö dza.

²⁴ Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.
Zóatica'sö cazu' Li'.

²⁵ Dza ni'te gudixju' yödzölió,
ate' len na' cazu' benu' lúzxiba.

²⁶ Huadödi quéguequi, pero Li', tsaz idi'u.

Ilexu' yúgu'téguequi ca riyexu' lari',
en ca tu lari' utubu' léguequi, en utsó'o léguequi.

²⁷ Li', biti' ca' utsá' cuinu', en biti' ca' guexu'.

²⁸ Zxí'inigaca huen dxin quiu' ila'böza dxi'a tsáhui'do',
ate' ucú'u tsutsu zxí'ini xi'sóagaquië' lo'.

103

¹ ¡Bil-la yöl-la' ba queë' Xanru', li', bö' naca caza',
ate' idútë le naca', bil-la yöl-la' ba que Lë' lá'ayi!

² ¡Bil-la yöl-la' ba queë' Xanru', li', bö' naca caza',
en biti' gal-la ládxi'u yúgu'të le ruzi'u xibë'!

³ Runiti lo cazë' neda' ca naca yúgu'të dul-la' nabága'a,
en rugúë' yúgu'të xihuë'a.

⁴ Ruhuöá'uë' neda' lu lataj chul-la,
en ruzá' ládxië' quia' yöl-la' dxi'i ladxi', en yöl-la' ruhuéchi' ladxi'.

⁵ Rigu'ë xinöza' yugu' le naca dxi'a,
lë na' run ga ruhuöáca' ca tu bönni' zoë' iz cuidi' queë',
ca na' raca queëba' bisiá'.

⁶ Runë' yugu' le naca dxi'a,
en ruchí'a rusöröë' quégaca yúgu'të nupa zoa nu rusaca' léguequi zi'.

⁷ Buzéajni'inë' Moisés yugu' le gun cazë' Lë',
en buluí'inë' bönachi Israel yugu' le zxön runë'.

⁸ Xanru' ruhuéchi' ladxi' cazë' bönachi, en ruzá' ládxië' quéguequi.
Biti' rilétenë', pero nadxí'itiqui'sinë' léguequi.

⁹ Biti' ruzétiqui'sinë' rë'u le bach,
en biti' rilétiqui'sinë'.

¹⁰ Biti' runë' rë'u xigua' ca sa'yéaj dö' nuá'aru',
en biti' rubi'ë queëru' ca naca le xihui' nabága'ru'.

¹¹ Naca caní tu' ca na' naca xitsá'tërö lúzxiba ca luyú ni,
la' canísö naca zxön ca nadxí'inë' Xanru' nupa tadxi Lë'.

¹² Tsca nácatërö zi'tu' ga rilén gubidza ga ridxintë ga ribía,
la' canísö rucuitë' yugu' le ta'bága'ru' Lë'.

¹³ Ca na' ruhuéchi' ládxië' xúzgaca cázabi' yugu' zxí'inë',
la' canísö ruhuéchi' ládxië' Xanru' nupa tadxi Lë'.

¹⁴ Caní runë' tu' nözinë' le nácaru'.
Röjnenë' néquiniru' bëchtö yu.

¹⁵ Tsca nácgaca dza zóaru' nabanru',
nácagaca ca raca que xiyija guíxi'do'.

¹⁶ Cate' recaj bö', ruúlu runítisö xiyija na',
en biti' naca bë' ga na' guzóa.

¹⁷ Xanru', tsaz nadxí'inë' nupa tadxi Lë',

en runë' quégaca zxi'iniguequi le naca dxi'a.

¹⁸ Caní runë' quégaca nupa tun ca rnna xtídzë'ë,
en quégaca nupa tun ca rinná bë' xibá queë'.

¹⁹ Naguixjë' Xanru' xilatjë' yehua' yubá ga na' rō'ë rinná bë'ë.
Rinná bé'enë' yúgu'të le dë.

²⁰ ¡Guli'cu'ë yöl-la' ba Xanru', libí'ili', gubáz lá'ayi queë',
nápateröli' yöl-la' huáca zxön, en runli' ca rnna xtídzë'ë,
libí'ili' na' runli' ca rnna didza' ru'ë!

²¹ ¡Guli'cu'ë yöl-la' ba Xanru', libí'ili' nácali' ni'a në'ë guizxi yu,
libí'ili', huen dxin queë' na', runli' ca rë'ëni quézinë' Lë'!

²² ¡Guli'cu'ë yöl-la' ba Xanru', yúgu'tëli' na' nucu'ë libí'ili',
libí'ili' zóali' yúgu'të lataj ga na' rinná bë'ë Lë'!
¡Bil-la yöl-la' ba queë' Xanru', li', bö' naca caza'!

104

¹ ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

² ¡Nusubaga' cuinu' bení' ca zxo' nacu' cazu',
ate' naguixaj cazu' lúzxiba ca tu lari' zxön!

³ Naguixju' xilataj lidxu' lahui nisa dë xitsá'alö.

Dxía cazu' lu böaj ca tu lu carreta, en ridó' lu bö'ös.

⁴ Rugunu' dxin bö' raca ca tu gubáz quiu',
enca' yugu' guí' ca huen dxin quiu'.

⁵ Nuzú' tsutsu luyú ni lu xilibi,
en bití' ca' gaca nu utsá' xilataj.

⁶ Gudixju' nisa zxön luyú ni ca tu lari' nabaga' le,
ate' yöjbaga' nísado' na' yugu' guí'a.

⁷ Buzenu' le bach nisa na', ate' burúaj,
en cate' biyön chi'u, bayúdx buzunnaj nisa na'.

⁸ Gurén yugu' lu guí'a, en bötaj ga naca ra' yegu,
ga bidxintë yöjsóa ga nupó'o que nisa na'.

⁹ Gudixju' buzá' que nísado' ga bití' gaca tōdi.
Bítí'rō caz tseajbaga' nisa na' luyú bidxi.

¹⁰ Runu' ga ralaj beaj yugu' lë'e guí'ado',
enca' ga ta'dōdi yegu ga rō'ögaca rōga'.

¹¹ Yudzu yugu' yegu na' nisa té'ajba' böa' guixi',
le rugúa yöl-la' ribídx quégacaba' burro ta'dásiba' la' guixi'.

¹² Yugu' ra' yegu rō'ögaca yaga ga tu dxíaba' biguínido' xcá'agacaba',
en túl-laba' yugu' lu ni'a në'eguequi.

¹³ Rigú'u nisa guiōj quiu' yugu' lu guí'a,
en runu' ga tu huōla tu dzé'e yugu' le dzō'ō luyú.

¹⁴ Runu' ga rizxön yō le táguba' böa' bēdx,
en yugu' cuan guixi' tu gún dxin bōnachi,
le ilagu ni'a que le nudó'o luyú,

¹⁵ en xisi uva le run ga tudzeja lādxi'guequi,
en za olivo le ta'gú'u láhuiguequi lu yöl-la' ruzí' xibé quéguequi,
en yōta le nabániguequi.

¹⁶ Tu'zí' xibé nisa guiōj yaga cedro dzō'ō lu guí'a Líbano,
yugu' yaga na' budó'o, Xantu'.

17 Ni' tu'dxiaba' biguínni xcá'agacaba',
 ate' tunba' biyúz lídxigacaba' ni'.
 18 Nunu' Li' yugu' guí'a sibi ga dzö'öba' bdxina' guixi',
 enca' yugu' znan bulóaj gapa tapa chi'i cuíngacaba' bizzidxu'.
 19 Benu' beo' le naca bë' yugu' beo' que iz,
 ate' ribía gubidza ga ral-la' cuía.
 20 Benu' chi'i dzö'ölö, en cate' naca chul-la
 ta'rúajba' ta'daba' böa' guixi'.
 21 Ta'bödxí'aba' bédxi guíxi'do', ta'zóa régu'ba' le ila'zönba'.
 Tu'guíajba' le nuzóë' Dios iláguba'.
 22 Cate' rilén gubidza tu'dxinba' lídxigacaba',
 en röjõxagacaba' yugu' lu znan bulóaj quégacaba'.
 23 Ní'irö ta'rúaj bönachi söjaca huen dxin,
 en tun caz dxin ga ridxintë ribía gubidza.
 24 Xan, ziántërö yugu' le nunu' Li'.
 Len yöl-la' réajni'i zxon quiu' nunu' yúgu'të.
 Nalí luyú yödzülió ni yugu' le dxi'a nunu'.
 25 Ni' zoa nisa nácatërö zxon,
 ga na' nacuá'aba' böa' guizxi yu,
 böa' cuidi', enca' böa' zxon.
 26 Ni' ta'dödi barco zxon,
 enca' böa' zxon lëba' leviatán, böa' na' nuzóa cazu'.
 27 Yúgu'tëba' ta'bözaba' Li',
 cate' idxinrö ugagu' légacaba'.
 28 Rugagu' légacaba', ate' táguba'.
 Runödzu' le iláguba', ate' tu'huólaj ta'dzé'eba'.
 29 Cate' ruhuecju' quiu', tádxiba',
 en cate' ruzi'u bö' quiu', tátiba',
 en ruhuóaca yu le néquinigacaba'.
 30 Cate' rigú'u légacaba' bö', nabángacaba'.
 Rucubu' yúgu'të le nacuá' yödzülió.

31 ¡Ral-la' gácatíca'sö yöl-la' ba queë' Xanru'!
 ¡Ral-la' ila'yaza ládxi'tíca'sö bönachi le nun cazë' Lë'!

32 Ruyúë' Xanru' luyú, ate' rizzizi.
 Riganë' yugu' guí'a, ate' rirúaj dzön.

33 ¡Gul-la' queë' Xanru' yúgu'të dza soa' ibana'!
 ¡Gul-la' yöl-la' ba queë' Dios tsanni ni zoa' nabana'!
 34 ¡Zxixi naca le rizá' ládxa'a ca naca queë'!
 ¡Udzéjalenda'-në' Xanru'!

35 Ila'nítië' bönni' dul-la' nacu'ë yödzülió ni,
 en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!
 ¡Yöl-la' ba Lë' Xanru'!

105

1 ¡Guli'guíë' Xanru' Dios: "Xclenu"!
 ¡Buli'lidzë' Lë'!
 ¡Buli'siyõn bönachi ca nácacaca le benë'!

2 ¡Guli'gul-la queë'! ¡Guli'gul-la yöl-la' ba queë'!
 ¡Guli'gü' didza' ca nácgaca le zxön nunë'!

3 ¡Buli'sí' xibé Lë' lá'ayi!

Ral-la' ulu'dzeja ladxi' yúgu'të nupa ta'guilaj Xanru'.

4 Guli'guiljé' Xanru', enca' yöl-la' huáca queë'.

Guli'gü' ládxi'tica'sö idxinli' lahuë'.

5 Guli'tsöjné le nácgaca zxön benë' Lë',

lë na' tun ga rubániru', enca' ca nácgaca didza' bë'ë cate' buchi'a busöröë'
 bönachi,

6 libí'ili', zxí'ini xi'sóë' Abraham, huen dxin queë' Dios,

en libí'ili', zxí'ini xi'sóë' Jacob, nácali' nupa gurö cazë' queë'.

7 Lë' náquië' Xanru' Dios.

Idütë yödzölió naca bë' ca buchi'a busöröë' bönachi.

8 Röjnétiqüi'sinë' didza' dzaga nunë',

didza' na' gunná bë'ë ila'zí' lu ná'agaquië' chi gayuá' cö' zxí'ini xi'sóë' Abra-
 ham,

9 didza' dzaga na' bénlenë' Abraham,

le naca didza' na' benë' tsutsu Dios ca gunë' queë' Isaac.

10 Ní'irö benë' tsutsu didza' na' lahuë' Jacob,

le naca tu le rinná bé'enë' lë' gunë',

para gaca quégaca bönachi Israel tu didza' dzaga le zoa tsaz.

11 Gunnë': "Gonna' queëli' xiyúgaca bönachi Canaán,

le guequi tsaz queëli', en quégaca zxí'ini xi'sóali'."

12 Caní gunné' Dios cate' ni' gula'cu'ë nabábagaquië' bönni' Israel.

Tu chópasë' guláquië', en guláquië' bönni' zi'tu' luyú.

13 Gula'dë' tu ia'tú yödzö izá'a.

Bulu'zë'ë tu ga nu gunná bë', en bila'dxínë' ga nacuá' bönachi izá'a,

14 pero biti' bë'ë lataj Dios nu usaca' zi' bönachi queë' na',

en buzenë' le bach bönni' gula'nná bë'ë para gulácalenë' bönachi queë'.

15 Gunnë': "Biti' bi gunli' quégaca bönachi nabö caza' quia',

en biti' bi dö' guá'ali' quégaquië' bönni' tu'ë didza' uláz quia'."

16 Benë' ga guyú'u gubín yödzölió,

en benë' ga biyadzaj yöta ilahuë'.

17 Gusöl-lë'ë tubi' bi'i bönni', bi'i bidxinbi' ni' zí'alö ca légaquië',

tu' gulúti'ë-bi' José para gácabi' bi'i nadó'o.

18 Gulúgui'ë bönni' Egipto ní'abi' len du guié,

en bulu'dë'ë yen ná'abi' bregui' guié,

19 ga bidxintë dza budxín xtídzë'ë Xanru',

tu' guzxí' bë'ë Xanru' Dios José na'.

20 Ní'irö gusöl-lë'ë bönni' gunná bë'ë luyú Egipto nu busán-bi'.

Bönni' na' gunná bé'enë' yödzö izá'a zían busölë'-bi'.

21 Benë' ga gúcabi' xan yu'u queë',

ate' guta' lu ná'abi' yúgu'të le dë queë' bönni' na' rinná bë'ë.

22 Guta' lu ná'abi' gulú'ubi' lidxi guié bönni' ta'nná bë'ë tsca rë'ëni quézibi',

para busédibi' bönni' gula queë' yöl-la' réajni'i.

23 Ní'irö bila'dxín ca' bönachi Israel luyú Egipto.

Caní guca, guzóë' Jacob lu xiyúgaca zxí'ini xi'sóë' Ham.

24 Benë' Dios ga gula'yántëro bönachi queë' luyú ni',

ate' guláquië' zíanterë' ca nupa gula'díl-lalen légaquië'.

25 Benë' Dios ga gulunë' zi' bönni' Egipto bönachi queë'.

Lu yöl-la' banís quégaquië' gula'zì' yé'enë' nupa na' nácagaca huen dxin queë'
Lë'.

²⁶ Ní'irö gusöl-lë'ë Moisés, huen dxin queë', lógaquië',
enca' Aarón, bönni' na' nabö cazë' Lë'.

²⁷ Gulunë' chopë' ni zían yöl-la' huáca zxön queë' Dios lógaca bönachi Egipto
na'.

Gulunë' zían yöl-la' huáca que yehua' yubá lu xiyúgaca zxí'ini xi'sóë' Ham.

²⁸ Gusöl-lë'ë Dios le naca chul-la, ate' böáca chul-la lahui' dza,
en bití' guca ila'dá'baguë'ë xtídzë'ë.

²⁹ Benë' ga nisa yegu nacué' lu yegu quégaquië' böáca rön,
en benë' ga gulátiba' böla dzö'öba' yugu' yegu na'.

³⁰ Gula'yanba' riu lu xiyúgaquië',
ga bidxintë gula'yázaba' yu'u lidxë' bönni' rinná bé'enë' légaquië'.

³¹ Bë'ë didza' Dios, ate' gulátsjaba' bötsugayu guizxi yu,
en gulátsjaba' ca' bö'iyudo' idútë lu xiyúgaquië'.

³² Benë' ga gurö'ö guiöj bögui' yöla sunna uláz que nisa guiöj,
ate' böxaj ca' guí' lu xiyúgaquië'.

³³ Guditsjë' yugu' lubá uva quégaquië', en yugu' yaga higo,
en busunítië' yaga rö'gaca lu xiyúgaquië'.

³⁴ Bë'ë didza', ate' bila'dxinba' böchi'zu guizxi yu,
enca' böchi'zu huë'énido', cuntú nu gaca ulaba légacaba',

³⁵ ate' guláguba' idútë guixi' cuan rö'ö lu xiyúgaquië',
en guláguba' ca' idútë le naz nudá'agaquië' lu xiyúgaquië'.

³⁶ Benë' ga gulátibi' yúgu'tëbi' bi'i bönni' lo idútë lu xiyúgaquië'.
Bi'i lo na' quégaquië' bönni' nál-la.

³⁷ Ní'irö bubéajë' Dios yugu' bönni' Israel luyú na', nuá'agaquië' dumí plata,
en oro,

ate' cuntú nu yöjchegu' nu nutsa' légaquië'.

³⁸ Bulu'dzeja bönachi Egipto cate' bulu'zë'ë bönni' Israel lu xiyúgaquië',
ate' guladxi gula'dzöbi tu' nöziguequinë' bönni' Israel na'.

³⁹ Gusöl-lë'ë Dios tu böaj le gulú'u bönachi queë' zxul-la,
ate' chi'i dzö'ölö gusöl-lë'ë guí' le buzení' quégaquië'.

⁴⁰ Gula'nábinë' Lë', ate' gusöl-lë'ë böra guíxi'do' zían le ilahuë',
en benë' ga bulu'huölej gula'dzé'enë' yöta que yehua' yubá.

⁴¹ Bulu'ë lahui tu guiöjto'o, ate' gulalaj nisa yégudo'.
Gudödi nisa na' luyú bidxi ni' ca tu nisa yegu gubó'o.

⁴² Caní benë' Dios tu yöjnenë' didza' lá'ayi queë',
le guzxi' lu në'ë gunë' queë' Abraham, huen dxin queë'.

⁴³ Bubéajë' bönachi queë' lu yöl-la' rudzeja quéguequi,
ate' lu yöl-la' rudzeja quéguequi gula'bödxí'a bönachi gurö cazë' queë'.

⁴⁴ Bunödzejë' xiyúgaca bönachi yugu' yödzö izá'a quégaquië'.
Bulu'zi'ë xibé le ilá' luyú ni'a que dxin gulún bönachi izá'a na'.

⁴⁵ Caní benë' Dios para ilunë' ca rnna le gunná bé'enë' légaquië' ilunë',
en ilunë' ca rinná bë' xibá gudixjë' Lë'.

¡Guli'cu'ë yöl-la' ba Xanru'!

106

¹ ¡Guli'cu'ë yöl-la' ba Xanru'!

¡Guli'guíë' Xanru': "Xclenu" tu' náquië' idú dxi'a!

¡Zóatica'sö yöl-la' dxi'i ladxi' queë'!

2 ¿Nuzxi caz gaca quixjö' ca nácgaca le zxön nunë' Xanru',
en ulu'í lahui ca naca yöl-la' ba queë'?

3 ¡Bica' ba nupa tun le naca tsahui',
nupa na' túntica'sö le naca dxi'a!

4 Yöjné neda', Xan, cate' ruzá' ládxi'u quégaca bönachi quiu'.
Buzá' ladxi' quia' yöl-la' rusölá quiu',

5 para gaca ilé'eda' gata' yöl-la' tsahui' quégaca nupa narö cazu' quiu',
en para gaca udzéalenda' bönachi quiu' cate' tu'dzeja,
en para gaca uzí'lena' xibé nupa néquiguequi quiu'.

6 Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

7 Cate' gula'cu'ë xuz xtó'otu' luyú Egipto,

biti' gula'yéajni'inë' le nácgaca zxön benu'.

Biti' yöjnéguequinë' yugu' le benu' quégaquië' lu yöl-la' dxi'i ladxi' quiu',
pero gula'dá'baguë'ë xtídz'u cate' gula'cu'ë ra' nísado' lë Nísado' Xiná.

8 Busölë' Xanru' Dios légaquië' para gaca bë' runë' ca rnna xtídzë'ë,
en para ulu'e lahui yöl-la' huáca zxön queë'.

9 Caní guca, buzenë' le bach Nísado' Xiná na', ate' la' gubídxitë.

Guchë'ë légaquië' ga rë'do' lu nísado' na',
ate' gula'dé' lu yu bidxi ga na' gurö'ö nisa.

10 Caní guca, busölë' légaquië' lu na' nu na' benë' légaquië' zi',
en buá'uë' légaquië' lu na' nu na' gudíl-lalen légaquië'.

11 Ní'irö gubaga' nísado' na' nupa gula'sí regu' légaquië'.

Cuntu nu bugá'ana nu bidzaga léguequi.

12 Ní'irö gula'yéajlë' bönachi queë' xtídzë'ë,
ate' gulul-la' yöl-la' ba queë'.

13 Pero la' gulál-latë ládxi'gaquië' yugu' le benë'.

Biti' gula'nábinë' Lë' ulu'í'inë' légaquië' le ral-la' ilunë'.

14 Zián le gula'zé ládxi'ë cate' ni' gula'cu'ë la' guixi' ga dë lataj,
en gula'zí' bë'ë Dios la' guixi' na'.

15 Ní'irö bë'ë Dios quégaquië' le gula'nábinë' Lë',
pero gusöl-lë'ë quégaquië' tu yödzöhuë' le bëti zióngaquië'.

16 Cate' bulu'zxé'enë' Moisés ga ni' gula'cu'ë tsözxön,
en bulu'zxé'enë' ca' Aarón, bönni' nubéajë' Xanru' quez queë',

17 la' ná'asö gualaj luyú, en bucachi' Datán.

Bucachi' ca' nupa gulún tsözxön Abiram.

18 Gulaj tu guí' zxön ga na' nudúbigaquië',
en buzegui' nupa na' guluá' dö'.

19 Lu guí'a Horeb gulunë' tu bëdxido' néquiniba' oro,
en gula'yéaj ládxi'ë budó' oro na'.

20 Caní guca bulu'cá'anë' Dios nayëpisëtërë',
para gula'yéaj ládxi'ë budó' oro le naca ca tu bëdxi ráguba' guixi'.

21 Gulal-la' ládxi'ë Dios Nu busölá légaquië'.

Lë' benë' zión le zxön le gulácalen légaquië' luyú Egipto.

22 Benë' zión le tun ga rubániru' lu xiyúgaca zxi'ini xi'sóë' Ham,
en zión le tun ga rádxiru' Lë' le benë' ra' Nísado' Xiná.

23 Que lë ni na' gunné' Dios usunítië' légaquië', ate' la' cá'asö gunë'
la'tu' cabí guzuínë' Moisés, bönni' rö queë', lahuë' Lë',
en buzóa dxië' yöl-la' rilé queë' para cabí usunítië' légaquië'.

- 24 Ní'irö bití' gulé'ëné' ila'yázié' luyú dxi'a na' dē lógaquié' tu' cabí gula'yéajlë'ë xtídzë'ë Dios.
- 25 Gula'nné' zí'ë queé' Dios gapa naca lu yu'u guídi quégaquié', en bití' bulu'zë' náguié' chí'ë Xanru'.
- 26 Que lë ni na' bené' tsutsu Dios xtídzë'ë le bē'lené' légaquié', gunné' guné' ga ilátié' ga na' naca la' guixi' ga dē lataj.
- 27 Gunné' guné' ga ilasi lásié' xzí'ini xí'sógaquié' ladaj zían yödzo izá'a, en gúsié' légaquié' gapa nacuá' bönachi zí'tu'.
- 28 Ní'irö bulu'dödi cúngaquié' lu na' budó' guié' lë Baal-peor, en gulahué' xipéla'gacaba' böa' guixi' gulútié'-ba' para guluné' zxön yugu' dios nati.
- 29 Ca' guca, gulún lené' Dios ni'a que le guluné', ate' gulén tu yödzöhué' zxön ladjagaquié'.
- 30 Ní'irö guzuíné' Finees, en bené' le raza ladxé'ë Dios, ate' guzóa dxi yödzöhué' zxön na'.
- 31 Buzóé' Dios queé' Finees na' náquié' tsahui' ni'a que lë na' bené' le nuzóé' tsaz ca naca queé'.
- 32 Lësca' gulún lené' Dios ga na' zoa nisa lë Meriba, ate' Dios guléné' Moisés tu' nözi lë na' guluné'
- 33 tu' gula'dá'baguë'ë xtídxë'ë Bö' Lá'ayi queé', ate' Moisés, lu yöl-la' ridzá'a queé', gunné' lizé'.
- 34 Bití' bulu'sunítié' bönachi tuá' dö' gula'cuá' lu yu ni, ca na' gunná bé'ené' Xanru' légaquié' iluné'.
- 35 Guluné' léguequi tsözxön en bila'zédé' iluné' ca gulún bönachi na',
- 36 ate' gula'yéaj ladxé'ë budó' guiöj budó' yaga quéguequi, le guca quégaquié' ca tu du yalaj le guzxön légaquié'.
- 37 Gulútié'-bi' xzí'inigaquié' lógaca bö' xihui', yugu' bi'i bönni', en nigúlado',
- 38 en bulu'laljé' xichöngaca nupa bití' bi nabága'gaca tu' bulu'laljé' xichöngacabi' bi'i bönni' quégaquié', en bi'i nigula quégaquié', yugu' bi'i na' gulútié'-bi' lógaca budó' guiöj budó' yaga nacuá' luyú Canaán, ate' gúcada' xihui' luyú ni tu' nözi rön na' bulu'laljé'.
- 39 Ca' guca, guláquié' xihui' ni'a que le guluné'. Guláquié' ca tu nigula udá dzaga tu' bulu'cá'ané' Dios quégaquié'.
- 40 Que lë ni na' guléde'ené' Xanru' Dios bönachi queé', en bití' bilé'ené' dxi'a nupa na' néquiquequi queé'.
- 41 Ní'irö budödé' légaquié' lu ná'agaca bönachi zían yödzo izá'a, ate' nupa bulu'dí'i légaquié' gula'nná be'e légaquié'.
- 42 Nupa na' bití' bila'lé'e légaquié' dxi'a gulunda' légaquié' dxin, en bulu'zxicaj légaquié' lu yöl-la' unná bē' quéguequi.
- 43 Zían luzuí gú'uné' Dios usölé' légaquié', pero gula'dá'baguë'ë le ré'ené' iluné', ate' guzxöntëro xigua' nabága'gaquié'.
- 44 Bilé'ené' Dios yöl-la' bayechi' quégaquié' en biyönné' ta'bödxí yeché'ë.
- 45 Yöjnené' didza' dzaga núnlené' légaquié', ate' bubequi lahué' quégaquié' tu' nazxöntëro yöl-la' dxi'i ladxi' queé'.
- 46 Bené' Dios ga bulu'huéchi' ladxi' légaquié' nupa na' gula'ché' légaquié' nadzúngaquié'.

47 ¡Busölá netu', Xantu' Dios!
 Guléaj netu' ladjagaca yödzö izá'a
 para guíetu' Li': "Xclenu" ni'a que Lo' lá'ayi,
 en lu yöl-la' rudzeja zxön queétu' cú'utu' Li' yöl-la' ba.
 48 ¡Yöl-la' ba Lë' Xanru', Dios quégaca bönachi Israel
 na'a dza, en yúgu'të dza si' zaca!
 Ral-la' ila'nná yúgu'të bönachi: "¡Ca' gaca!
 ¡Guli'cu'ë yöl-la' ba Xanru' Dios!"

107

- 1 ¡Guli'guíë' Xanru': "Xclenu" tu' náquië' dxi'a,
 en tu' zóatica'sö yöl-la' dxi'i ladxi' queë'!
- 2 Ral-la' ila'nná caní nupa na' buá'uë' Xanru',
 nupa na' buá'uë' lu ná'agaca nupa gulún léguequi zi',
 3 en nubéajë' léguequi zían lu yödzö izá'a,
 saca' ga rilén gubidza, en saca' ga ribía,
 saca' ga za' bö' ziaga, en saca' ga ridödi gubidza beo' ziaga.
- 4 Bal-lë' gula'dë' nanítigaquië' la' guixi' ga dë lataj,
 en ga ni' bití' zoa nöza.
 Bití' guca ulu'dzölinë' tu yödzö ga gaca tsöjcu'ë.
 5 Gula'dunë', en gula'bidxë' nisa,
 en gudú ladxí'gaquië'.
- 6 Ní'irö lu lë na' raca quégaquië' bulu'lidzë' Xanru',
 ate' busölë' légaquië' lu zían le gula'guí'i gula'záquë'ë.
- 7 Guchë'ë légaquië' tu la' nöza tsahui',
 en guchë'ë légaquië' tu lu yödzö ga tsöjcu'ë.
- 8 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.
- 9 Rugui'jë' nupa ta'bidxi ladxi',
 en rugahuë' nupa ta'dún le nácagaca dxi'a queë'.
- 10 Bal-lë' gula'cu'ë ga chul-la, en ga zoa bönadxi ilátië'.
 Gula'dzunë' yugu' lu du guíë, en gula'guí'i gula'záquë'ë
 11 tu' gula'dá'baguë'ë xtídzë'ë Xanru' Dios,
 en bulu'zóë' tsölá'alö le rigu'ë icja ladxí'do'gaquië'.
 12 Tu' gulunë' bayúdx dxin, gudú ladxí'gaquië'.
 Gula'dzö'ë lu yu zcan yua' nuá'agaquië',
 ate' cuntu nu zoa gácalen légaquië'.
- 13 Ní'irö lu lë na' raca quégaquië' bulu'lidzë' Xanru',
 ate' busölë' légaquië' lu zían le gula'guí'i gula'záquë'ë.
- 14 Bubéajë' légaquië' ga na' gula'cu'ë ga chul-la,
 en ga guzóa bönadxi ilátië',
 ate' guditsjë' yugu' du guíë núga'gaquië'.
- 15 Ral-la' ilë' Xanru': "Xclenu" tu' nadxí'inë' légaquië',

en tu' benë' yugu' le zxön, gúcalenë' légaquië'.

16 Ruquínajë' le tá'baga' gapa nu riyaza lidxi guié le néquiniguequi guié
 bronce,
 en ruzxuzxjë' yugu' vara néquiniguequi guié.

17 Bal-lë' gula'guí'i gula'záquë'ë tu' gula'dá'baguë'ë Dios,
 en tu' nözi dö' gulu'ë.

18 Gula'gúti'në' bíti'tës la' huagu,
 en gula'zóa ilátië'.

19 Ní'irö lu lë na' raca quégaquië' bulu'lidzë' Xanru',
 ate' busölë' légaquië' lu zián le gula'guí'i gula'záquë'ë.

20 Gusöl-lë'ë quégaquië' xtídzë'ë, en bunë' légaquië',
 en busölë' légaquië' lu yöl-la' guti.

21 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.

22 Ral-la' ilë' Dios: "Xclenu", en bi ulu'nödzjë' queë',
 en lu yöl-la' rudzeja quégaquië' ilul-lë' ca nácagaca le nunë'.

23 Bal-lë' gula'dödë' lahui nísado' yugu' lu barco zxön,
 en gulunë' dxin yugu' lu nísado'.

24 Bila'lé'enë' yugu' le nunë' Xanru',
 en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',
 ate' guyasa gudxía nísado'.

26 Gula'yasa barco ca tu lu guí'ado' nisa,
 en la' bötjatë ga rö'ö röga' lu nisa na'.

Tu' guzóalë'ë bönadxi ilátië' gudú ládxi'gaquië'.

27 Gula'zxízië', en yöjchégu'gaquië' ca bönni' ta'zúdxinë',
 ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',
 ate' busölë' légaquië' lu zián le gula'guí'i gula'záquë'ë.

29 Benë' Dios ga guzóa dxisö bö' budunu' na' recja,
 ate' guzóa dxi le rasa ridxía lu nísado'.

30 Bulu'dzéjanë' tu' guzóa dxi lu nísado',
 en tu' guchë'ë Dios légaquië' dxi'a tsáhui'do' ga na' sōjáquië'.

31 Ral-la' ilë' Xanru': "Xclenu" tu' nadxí'inë' légaquië',
 en tu' benë' yugu' le zxön, gúcalenë' légaquië'.

32 Ral-la' ulu'lu'ë lahui yöl-la' zxön queë' ga nudúbigaca bönachi queë',
 en ila'gu'ë Lë' yöl-la' ba ga nudúbigaquië' bönni' gula tu'chi'a tu'söröë'.

33 Runë' Xanru' Dios ga tu'huí'i dërö yugu' yegu,
 enca' yugu' beaj nisa.

34 Ga naca yu ya'a runë' ga ruhuóaca yu bidxi,
 ni'a que le xihui' nabága'gaca nupa nacuá' ni'.

35 Ga naca yu bidxi runë' ga ruhuóaca yu nabisa,
 ate' ralaj nisa ga bití' bi nisa guzóa.

36 Ni' ru'ë lataj ila'cuá' nupa ta'dún
para ilunë' ni' yödzö ga ila'cu'ë.

37 Tazë' yugu' le tazë', en tu'dë'ë yugu' lubá uva,
yugu' le ta'bía yödxí yana'.

38 Runë' Xanru' ga raca dxi'a quégaquië',
en ga ta'cuá'bi' zíanbi' bi'i quégaquië',
en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjë' bönachi queë',
en tu'zötjë' léguequi,

en tu'saca' zi'ë léguequi, en tu'ë dö' quéguequi,

40 rucá'anë' Dios bönni' na' dë lu ná'agaquië' cá'asö,
en runë' ga ta'dë' la' guixi' ga dë lataj, en tu luyú bidxi.

41 Rusölë' yugu' bönni' yechi' lu le ta'gu'i ta'záquë'ë,
en runë' ga ta'yanbi' zxi'inigaquië' ca ta'yánba' bö'cu' zxi'la'do'.

42 Ta'lé'e lë ni nupa nácagaca tsahui', en tu'dzeja,
pero biti' bi ta'nná nupa tuá' dö'.

43 Nupa ta'yéajni'i ral-la' sa' ládxi'gaca ca nácagaca lë ni,
ate' iléquië'e náquië' Xanru' Dios dxi'i ladxi'.

108

1 ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

2 ¡Guli'bán, libí'ili' riguinnali' bihuël-la!

¡Gúl-laru' cate' ni' ritö yu!

3 ¡Guía' Li': "Xclenu" Xan, ládjagaca bönachi yugu' yödzö izá'a!

¡Gul-la' yöl-la' ba quiu' lógaca yúgu'të bönachi!

4 ¡Zxöntëro naca yöl-la' dxi'i ladxi' quiu', le ridxintë lúzxiba xitsá'!

5 Bulu'i lahui lúzxiba yöl-la' zxön quiu', Dios,

ate' lahui yödzölió ni bulu'i lahui yöl-la' bení' quiu',

6 para usöló' netu', bönachi quiu', nupa nadxí'inu'.

Len yöl-la' huáca zxön quiu' busölá netu', en bubí'i didza'.

7 Lu lataj lá'ayi queë' bë'ë didza' Dios, gunné':

"Uzi'a xibé, en quisia' xiyúgaca bönachi Siquem,

en urixa' luyú dë cuiti yegu Sucot.

8 Nequi quia' xiyúgaca bönachi Galaad,

enca' xiyúgaca zxi'ini xi'sóë' Manasés.

Naca ca tu le rusubín icja' xiyúgaca zxi'ini xi'sóë' Efraín.

Naca ga rinná bë'a xiyúgaca zxi'ini xi'sóë' Judá.

9 Naca ca tu ga riguibí na'a xiyúgaca bönachi Moab,

ate' lu xiyúgaca bönachi Edom chú'una' löla'.

Cödxí'a tu' uxicja' bönachi Filistea."

10 ¿Nuzxi caz gaca iché' neda' lu yödzö

dë zö'ö idú gásibi'ilö le run chi'i yödzö na'?

¿Nuzxi caz gaca iché' neda' lu xiyúgaca bönachi Edom?

11 ¿Naru' cabí nusán ládxi'u netu', Dios?

¿Naru' cabí tséajlenu' bönni' queëtu' röjáquië' gudil-la?

12 Gúcalen netu' cate' tíl-lalentu' nupa dutíl-lalen netu',
tu' naca dádusö gácalen netu' nu naca bönáchisö.

13 Len yöl-la' huáca queë' Dios idéli'ru'
tu' uxicja cazë' Lë' nupa ta'díl-lalen rë'u.

109

1 Rigu'a Li' yöl-la' ba, Xana' Dios.

Biti' su' dxisö,

2 tu' ta'nná quia' nupa tuá' dö', en ta'zí' yë'.

Lu yöl-la' rizí' yë' quéguequi tuí'i didza' le tu'zegui' neda'.

3 Nagú'ugaca neda' lë'ajlö,

en lu yöl-la' biti' rilé'e neda' dxi'a tuí'ítica'sö didza'.

4 Sal-la' nadxí'ida' léguequi, tu'zegui' neda' didza',

pero neda' rulidza' Li'.

5 Bena' quéguequi le naca dxi'a, pero bulu'bí'i quia' le naca dö'.

Nadxí'ida' léguequi, pero biti' ta'lé'e neda' dxi'a.

6 Buzóa tu bönni' huía' dö'

para uchi'a usöröë' que nu na' biti' rilé'e neda' dxi'a.

Ben ga soa gagu nu uzegui' nu na' didza'.

7 Cate' nu uchi'a usörö bönni' na', biti' gu'u lataj urúajë' dxi'a.

Buyú le rinábinë' Li' tsca naca dul-la' nabáguë'ë.

8 Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

9 Ben ga ilácabi' zxí'inë' bi'i uzëbi,

en ga gácanu nigula queë' nigula uzëbi.

10 Ben ga ila'dásöbi' zxí'inë' ila'nábibi' nu bi unödzej quégacabi'.

Ben ga ila'guíjabi' le ilágubi' zi'tu' ga zoa lídxigacabi' le nadachi.

11 Ben ga ugúa nu bi benna lë' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

12 Ben ga biti' soa nu huéchi' ladxi' lë',

en biti' soa nu uzá' ladxi' quégacabi' zxí'inë' nácagacabi' bi'i uzëbi.

13 Ben ga udxí' quégaca zxí'ini xi'sóë',

en ga idxín dza bíti'rö soa nu si' la ca guzxí'i lë'.

14 Yöjnética'sö le xihui' gula'báguë'ë xuz xtá'ahuë', Xan,

en biti' gal-la ládxi'u dul-la' bennu xinë'ë.

15 Ben ga ila'cuá'tica'sö dul-la' na' lo' Li', Xan,

para cabirö nu soa yödzölió nu tsöjné lë'.

16 Biti' buéchi' ládxi'ë luzë'ë,

pero gudxía nahuë' nupa gula'guí'i gula'zaca',

en nupa gula'yadzaj gula'yudxi,

enca' nupa gula'sëbi ladxi', ate' bëtië' léguequi.

17 Bidxí'inë' le rudxía luzë'ë dö'.

Ben ga ulu'bí'i ca' queë'.

Biti' raza ládxi'ë gaca dxi'a que luzë'ë.

Ben ga biti' gaca dxi'a queë'.

18 Gulaca ca zxë' nácuë' didza' xihui' bë'ë,

ate' gula'yaza le nayá' nabanë' ca nisa,

en gula'yú'u ca' dxita queë' ca le za.

19 Ben ga ilaca queë' ca tu lari' rixóa cúdzë'ë,

en ca xipanë' rúgui'ë lë'ë.

20 Bubi'í caní quégaca nupa tu'zegui' neda' didza', Xan,

enca' quégaca nupa tuí'i didza' zí' que bö' naca caza'.

21 Li', Xana' Dios, ben quia' le naca dxi'a

para gaca bē' runu' ca rnna xtídz'u.
 Tu' naca dxi'a yöl-la' dxi'i ladxi' quiu', busölá neda'.
²² Riguí'i rizáca'a, en riyadzaj riyúdxida',
 en raca zi' ládxi'da'ahua'.
²³ Ridôdi quia' ca raca que tu zxul-la cate' ribía gubidza.
 Naca' ca tuba' böchi'zu, riché' bö' recja lēba'.
²⁴ Ta'cuidi' zxiba' tu' runa' gubasa.
 Nadxita', en bítirö rō'ō za lu bēla' rōn quia'.
²⁵ Nupa biti' ta'lé'e neda' dxi'a tu'titaj neda'.
 Cate' ta'lé'e neda', tu'tá ícjaguequi.
²⁶ Gúcalen neda', Xana' Dios.
 Lu yöl-la' dxi'i ladxi' quiu' busölá neda'.
²⁷ Ben ga iléquibe'e rácalen cazu' neda'.
 Nun cazu' Li' lē ni, Xan.
²⁸ Tu'dxía neda' dō', pero Li', ben ga gaca dxi'a quia'.
 Cate' ila'yasē', ulu'tuí'inē',
 pero udzējada' neda', huen dxin quiu'.
²⁹ Ben ga ulu'gá'ana cá'asō nupa tu'zegui' neda' didza',
 en ben ga gaca yöl-la' rutuí'i quéguequi ca tu lari' nabaga' léguequi.
³⁰ Len ruá' cuina', zían luzuí guía'-nē' Xanru': "Xclenu",
 en ladaj bōnachi zían cu'a Lē' yöl-la' ba,
³¹ tu' zuínē' cuita lē'e ibēla nu riyadzaj riyudxi
 para usölē' nu na' lu ná'agaca nupa tu'siúdxí bö' naca caz nu na'.

110

¹ Xanru' Dios gudxē' Xana': "Gurō'i cuita lē'a ibēla
 cate' gunra' ga ulu'zechu zxíbigaca lo'
 nupa biti' ta'lé'e Li' dxi'a."
² Ga zoē' yōdzō Sión gusöl-lē'ē Xanru' yöl-la' unná bē' quiu',
 gunné': "Gunná be'e nupa biti' ta'lé'e Li' dxi'a."
³ Ulu'dōdi cúnguequi lu no'ō bōnachi quiu'
 cate' si'u yöl-la' unná bē' quiu'
 tu' napu' yöl-la' lachi que le naca lá'ayi."
 Ila'cuá' bí'i bōnni' ga zu' ca ribō'ō buzén zílado'.
⁴ Runē' tsutsu xtídzē'ē Xanru', en biti' utsē'ē le, rnnē':
 "Tsaz nacu' bixúz ca na' gúquiē' Melquisedec bixúz."
⁵ Zoa cazē' Xanru' cuita lē'u ibēla.
 Ucul-lē' bōnni' ta'nná bē'ē cate' idxín dza usiúdxē' luyú.
⁶ Uchi'a usörōē' quégaca bōnachi yúgu'tē yōdzō izá'a,
 ate' ilí yōdzólió len bēla' rōn quéguequi.
 Uzötjē' nupa ta'nná bē' zían lu yōdzō izá'a.
⁷ Guí'jē' nisa beaj ra' nōza,
 en ní'a que lē ni huōáca ládxe'ē.

111

¹ ¡Guli'cu'ē yöl-la' ba Xanru'!
 Idú ládxa'a rea'-nē' Xanru': "Xclenu'."
 Runa' caní tsazxōn len bōnni' tsahui' zían ga na' nudúbigaca bōnachi queē'.
² Zxōn náagaca le nunē' Xanru'.
 Yúgu'tē nupa ta'yaza ládxi'gaca lē na' benē' tu'sēda ca náagaca.
³ Idútē dxi'a náagaca, en nayēpisētērōgaca le nunē' Lē',

ate' idiá'tica'sö le naca tsahui' queë'.

⁴ Chinunë' ga tsöjneru' yugu' le benë', le tun ga rubániru'.

Náquië' Xanru' dxi'i ladxi', en ruí'i ládxe'ë rë'u.

⁵ Rugahuë' nupa tadxi Lë'.

Röjné'tica'së' didza' dzaga núnlënë' bönachi queë'.

⁶ Buzéajni'inë' bönachi queë' ca naca yöl-la' huáca quégaca le nunë', le benë' ga gula'déli'në' xiyúgaca bönachi izá'a.

⁷ Tsahui', en idútë li nácagaca le núngaca lu në'ë.

Nácagaca tsutsu yúgu'të xibá gunná bë'ë.

⁸ Rucua'tica'së' tsutsu xibá queë',

en rusudxinë' léguequi lu le naca idútë li, en le naca tsahui'.

⁹ Gusöl-lë'ë Nu buá'uö bönachi queë'.

Tsaz nuzóë' didza' dzaga nunë'.

Lá'ayi, en ba'a ladxi' naca Lë'.

¹⁰ Lu yöl-la' radxi queëru' Lë' risí loru' ridéli'ru' yöl-la' réajni'i.

Yúgu'të nupa tun ca ta'nná bë' xibá queë' nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

112

¹ ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',

bönni' na' raza ládxe'ë runë' ca gunná bë'ë Dios!

² Tsépiségaca zxi'ini xi'sóë' bönni' na' yödzölió ni.

Gáquië' bica' ba bönni' na' runë' le naca dxi'a.

³ Lu yu'u lidxë' gata' yöl-la' tsahui',

ate' idiá'tica'sö le naca tsahui' runë'.

⁴ Gulén bení' ga ridë' bönni' tsahui' ga na' naca chul-la.

Ruzá' ládxe'ë que luzë'ë, en ruí'i ládxe'ë lë', en runë' le naca dxi'a.

⁵ Gaca dxi'a queë' bönni' ruzá' ládxe'ë que luzë'ë,

en runnë' que tu chí'isö le riyadzaj que.

Urúajë' dxi'a cate' nu uchi'a usörö queë'.

⁶ Catu caz gaca nu utsá' bönni' na',

ate' sóatica'sö nu tsöjné lë'.

⁷ Biti' gádxinë' cate' nu usiyöni lë' le cabí raca dxi'a.

Ridipa ládxe'ë tu' ruzxöni ládxe'ë Xanru' Dios.

⁸ Dios rutipë' ládxe'ë, ate' biti' gádxinë'

cate' idxinrö dza ilé'enë' nuhuótjagaca nupa ta'díl-lalen lë'.

⁹ Idú ládxe'ë runödzejë' quégaca bönachi yechi'.

Idiá'tica'sö le naca dxi'a runë'.

Dios uchisë' lë' ga tsépisë'.

¹⁰ Ila'lé'e lë' ni nupa tuá' dö', en ila'bö' baguí'isö.

Ilagu zxe láyi'gaca, en ila'niti cúnguequi.

Tsaz initi le ta'zë ládxi'gaca nupa tuá' dö'.

113

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

² ¡Cú'uru' yöl-la' ba Lë' Xanru',

cate' risí lo na'a, en yugu' iz sí' zaca!

³ ¡Ga nagueła' ga rilén gubidza ga ridxintë ga ribía,
cú'uru' yöl-la' ba Lë' Xanru'!

⁴ ¡Nayëpisëtëre' Xanru' Dios ca yúgu'të yödzo izá'a!
¡Nazxöntëro yöl-la' zxön queë' ca naca lúzxiba!

⁵ ¿Nuzxi caz zoa naca ca náquië' Xanru' Dios?
Rö'ë rinná bë'ë ga na' nayëpisëtëre'.

⁶ Ruzötaj cuinë' para uyúë'
le dë lúzxiba, en le dë luyú ni.

⁷ Ruchisë' nupa nácgaca yechi', rubéajë' léguequi lu bëchtö yu.
Ruchisë' nupa ta'yadzaj, rubéajë' léguequi lu dö bëbu.

⁸ Runë' ga ta'bö'len nupa ta'nná bë'.
Ta'bö'len nupa ta'nná be'e bönachi queë'.

⁹ Runë' ga zóanu nigula huödx yu'u lídxinu.
Rudzeja ládxi'nu tu' runë' ga nacuá'abi' zxí'ininu.

¡Guli'cu'ë yöl-la' ba Xanru'!

114

¹ Cate' bila'rúaj bönachi Israel luyú Egipto
bila'rúajë' zxí'ini xi'sóë' Judá ladaj nupa tu'i didza' izá'a.

² Zxí'ini xi'sóë' Judá guláquië' ca lídxë' Xanru' Dios,
ate' gulaca bönachi Israel nupa rinná bé'enë' Dios.

³ Lahuë' Dios bubiga' nísado',
ate' bubí'i nisa yegu Jordán.

⁴ Gula'xiti' guí'a zxön ca yugu' bö'cu' zxila' biguiú',
ate' gula'xiti' ca' guí'ado' ca yugu' bö'cu' zxíla'do'.

⁵ ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

⁶ ¿Bi raca queëli', guí'a zxön, tu' rixíti'li' ca yugu' bö'cu' zxila' biguiú'?

¿Bi raca queëli', guí'ado', tu' rixíti'li' ca yugu' bö'cu' zxíla'do'?

⁷ Guzxizi lahuë' Xanru', yödzoíó.

Guxxizi lahuë' Dios queë' Jacob.

⁸ Benë' Dios ga gulaj nisa tu lë'e guiöjto'o,
en benë' ga böáca le guca guiöj jara tu ga rilén nisa.

115

¹ Calëga queëtu', Xan, calëga queëtu',
pero que lo' gaca yöl-la' ba
tu' nacu' dxi'i ladxi', en le naca idútë li.

² ¿Bizx que ta'nná bönachi yugu' yödzo izá'a:
“Gazxi caz zoë' Dios quégaquië'”?

³ Zoë' Dios queëru' yehua' yubá.
Runë' le raza ládxi'ë gunë'.

⁴ Néquiguequi plata, en oro budó' quégaca bönachi izá'a na',
yugu' le núngaca lu ní'a lu na' bönachi.

⁵ Nacuá' ruí'iguequi, pero biti' gaca iluí'i didza'.
Nacuá' guiöj lógaca, pero biti' gaca ila'lé'e.

⁶ Nacuá' nággaca, pero biti' gaca ila'yöni.
Nacuá' zxíniguequi, pero biti' gaca ila'lé'e.

7 Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

8 Nupa tun budó' guiöj budó' yaga ilaca ca nácagaca budó' na',
núti'tës nu ruzxöni ladxi' budó' guiöj budó' yaga.

9 Libí'ili', bönachi Israel, buli'zxöni ládxe'ë Xanru' Dios.

Rácalen cazë' libí'ili', en rapa chi'ë libí'ili'.

10 Libí'ili', zxí'ini xi'sóë' Aarón, buli'zxöni ládxe'ë Xanru' Dios.

Rácalen cazë' libí'ili', en rapa chi'ë libí'ili'.

11 Libí'ili' na' rádxili'-në' Dios, buli'zxöni ládxe'ë Xanru' Dios.

Rácalen cazë' libí'ili', en rapa chi'ë libí'ili'.

12 Xanru' Dios ruí'i ládxe'ë rë'u, en gunë' ga gaca dxi'a queëru'.

Gunë' ga gaca dxi'a quégaca bönachi Israel.

Gunë' ga gaca dxi'a quégaca zxí'ini xi'sóë' Aarón.

13 Gunë' ga gaca dxi'a quégaca nupa tadxi Lë',
nupa na' nácagaca cá'asö, en nupa na' nayëpisëgaca.

14 Gunë' Xanru' Dios ga tsan le nequi queëli',
lë na' nequi queëli', en le nequi quégaca zxí'inili'.

15 Raca ládxa'a gunë' Xanru' ga gaca dxi'a queëli'.

Náquië' Nu ben lúzxiba, en luyú ni.

16 Nequi queë' Xanru' Dios lúzxiba xitsá',
pero nudödë' lu ná'agaca bönachi luyú ni.

17 Nupa chinátigaca biti' gaca ila'gú'u Xanru' yöl-la' ba,
en calëga nupa nacué' dxisö lataj chul-la que yöl-la' guti.

18 ¡Cú'uru' yöl-la' ba Xanru' Dios
na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

1 Nadxí'ida'-në' Xanru' Dios, tu' riyönnë'
le rulidza' Lë', en le rinábida'-në'.

2 Ruzë' naguë' chi'a.

Que lë ni na' ulidza' Lë' tsanni ni zoa' nabana'.

3 Guzóa bönadxi quia' gátia',
en guyu'a tsöbi que lataj chul-la que yöl-la' guti,
ate' gusëbi ládxa'a, en buí'inide'eda' ládxa'a.

4 Ní'irö bulidza'-në' Xanru' Dios, gunnía':
"Ráta'yua' lo', Xan, usöló' neda'."

5 Xanru' Dios ruzá' ládxe'ë queëru', en náquië' tsahui'.
Dios queëru' ruí'i ládxe'ë rë'u.

6 Rapa chi'ë Xanru' nupa nácagaca do' ladxi'.
Bulu'xicja bönachi neda', ate' busölë' neda'.

7 Buzí' ladxi' bö' naca caza',
tu' runë' Xanru' Dios ga raca dxi'a quia'.

8 Busöló' bö' naca caza', Xan, lu yöl-la' guti.
Benu' ga buí'i nisa ribödxi guiöj lahua',
en ga bíti'rö cuílagaca ni'a.

9 Ta'a lahuë' Xanru' Dios
ga nacua' nupa nabangaca.

10 Guyéajlë'a Lë' cate' gunnía':

“Zoa le rusaca' neda' zi'.”

11 Lu yöl-la' rö' böniga quia' gunnía':

“Ta'zi' yë' yúgu'të bönachi.”

12 ¿Bizxi caz gu'a-në' Xanru' Dios
ní'a que yugu' le runë' le ruzi'a xibé?

13 Si' lu na'a yöl-la' rusölá queë' Xanru',
en ulidza'-në' Xanru' Dios.

14 Unödza' queë' Xanru' le guzxi' lu na'a unödza'.
Raca ládxa'a gaca guna' caní lógaca yúgu'të bönachi queë'.

15 Rúndë'ë Xanru' bal
yöl-la' guti quegaca nupa néquiquequi quez queë'.

16 Le nácatë naca' huen dxin quiu', Xan.
Naca' huen dxin quiu', enca' zxi'ininu nigula huen dxin quiu'.
Busedxu' le biröli neda'.

17 Cu'a lö' le unödza' quiu', en guía' Li': “Xclenu”,
en ulidza' Li', Xan.

18 Unödza' queë' Xanru' le guzxi' lu na'a unödza'.
Raca ládxa'a gaca guna' caní lógaca yúgu'të bönachi queë'.

19 Ga zoa lö'a que yu'u lidxë' Xanru',
lu yödzö Jerusalén guna' caní.

¡Guli'cu'ë yöl-la' ba Xanru' Dios!

117

1 ¡Guli'cu'ë yöl-la' ba Xanru' Dios, libí'ili', bönachi yúgu'të yödzö izá'a!

¡Guli'cu'ë yöl-la' ba yúgu'tëli',

2 tu' buxönë' queëru' yöl-la' dxi'i ladxi' queë',
en zóatica'sö le naca idú ladxi' queë'!

¡Yöl-la' ba Lë'!

118

1 ¡Guli'guié' Xanru': “Xclenu”, tu' náquië' dxi'a!
¡Zóatica'sö yöl-la' dxi'i ladxi' queë'!

2 Ral-la' ila'nná bönachi Israel:
“¡Zóatica'sö yöl-la' dxi'i ladxi' queë'!”

3 Ral-la' ila'nná zxi'ini xi'sóë' Aarón:
“¡Zóatica'sö yöl-la' dxi'i ladxi' queë'!”

4 Ral-la' ila'nná nupa tadxi Xanru' Dios:
“¡Zóatica'sö yöl-la' dxi'i ladxi' queë'!”

5 Cate' gudí'i guzácá'a bulidza'-në' Xanru',
ate' bubí'ë didza', en busölë' neda'.

6 Zoë' Xanru' cuita' neda', ate' bití' bi gádxida'.
¿Bizxi caz gaca ilún bönachi quia'?

7 Zoë Xanru' cuita' neda' ladaj nupa tácalen neda'.
Que læ ni na' idéli'da' láhuigaca nupa bití' ta'lé'e neda' dxi'a.

8 Nácarö dxi'a uzzöni ládxa'a-në' Xanru',
en bití' uzzöni ládxa'a nu naca bönáchisö.

9 Nácarö dxi'a uzzöni ládxa'a-në' Xanru',
en bití' uzzöni ládxa'a nupa ta'nná bë'.

10 Bönachi yúgu'të yödzo izá'a gula'gú'u neda' læ'ajlö.
Len yöl-la' huáca queë' Xanru' buxicja' léguequi.

11 Gula'gu'ë neda' læ'ajlö. Ön, gula'gu'ë neda' læ'ajlö,
pero len yöl-la' huáca queë' Xanru' buxicja' léguequi.

12 Gula'gu'ë neda' læ'ajlö ca yugu' buzú' rön,
pero gula'nítië' ca tu lu guí' guixi' yötsi' bidx.
Len yöl-la' huáca queë' Xanru' buxicja' léguequi.

13 Bulu'dxíguë'ë neda' ga bidxintë guzóa tsöjtsö'a,
pero gúcalenë' Xanru' neda'.

14 Naca cazë' Xanru' yöl-la' huáca quia', en le rul-la'.
Naca cazë' yöl-la' rusölá quia'.

15 Lu yu'u lídxigaca nupa náca'gaca tsahui'
ru'u bö que nupa ta'bódxí'a lu yöl-la' rudzeja quéguequi tu' nulágaca.

¡Runda' dxin në'ë ibëla Xanru'!

16 ¡Nayëpisëtë'rö në'ë ibëla Xanru'!

¡Runda' dxin në'ë ibëla Xanru'!

17 Bití' ca' gátia', pero soa' ibana',
ate' usiyönda' bönachi le nunë' Xanru'.

18 Xanru' béndë'ë neda' xigua',
pero bití' budödë' neda' lu yöl-la' guti.

19 Guli'salaj quia' ga ta'yazë' bönni' tsahui'.
Tsu'a ni', en guía'-në' Xanru': "Xclenu'."

20 Naca lataj ni ga riyaza cazë' Xanru' Dios.
Ila'yazë' ni bönni' tsahui'.

21 ¡Guía' Li': "Xclenu'" Xan, tu' bubí'u didza' quia',
en tu' nacu' Nu rusölá neda'!

22 Zoa tu guiöj bulu'zöë' tsölá'alö bönni' tu'cu'ë zö'ö.
Na'a naca guiöj na' guiöj len squin zö'ö.

23 Benë' Xanru' Dios ga naca caní.
Naca tu le run ga rubániru'.

24 Dza ni naca dza nunë' Xanru' Dios.
Udzéjaru', en uzí'iru' xibé.

25 Ráta'yutu' lo', Xan, usöló' netu'.
Ráta'yutu' lo', Xan, gunu' ga gaca dxi'a queëtu'.

26 Bica' ba bönni' na' zë'ë uláz queë' Xanru'.
Guntu' Li' zxön lu yu'u lidxë' Xanru'.

27 Dios náquië' Xanru', ate' bennë' queëru' bení'.
Buli'nödzej queë' Dios yugu' bëdxi renni' uzégui'ru'-ba' lahuë' lu bucugu queë'.

28 Naca cazu' Li' Dios quia', ate' guía' Li': "Xclenu'."
Naca cazu' Li' Dios quia', ate' guna' Li' zxön.

29 ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' rë'u

1 ¡Bica' ba nupa nácacaca idú dxi'a tsáhui'do',
nupa na' tun ca rnna xibá naguixjë' Xanru'!
2 ¡Bica' ba nupa tun ca nácacaca le benë' ba nalí,
en idú ládxi'gaca ta'zë ladxi' Lë'!
3 Biti' bi le cabí naca tsahui' tun,
pero tun ca nácacaca le nulu'ë lahui.
4 Nuzú' queëtu' xibá quiu', Xan,
para idú ládxi'tu' guntu' ca ta'nná.
5 Raca ládxa'a gúntica'sa' ca ral-la' guna',
en guna' yugu' le gunná bë'u.
6 Ní'irö bití' ca' utuí'ida'
channö gapa chí'a yugu' le gunná bë'u.
7 Lu yöl-la' ba'a ladxi' quia' guía' Li': "Xclenu'"
cate' chinazi'a le buchi'a busöröu' le naca tsahui'.
8 Guna' ca ta'nná le gunná bë'u.
Biti' usán no'o neda' tsaz.

Ral-la' gunru' ca gunné' Dios

9 ¿Nacxi gaca gunbi' tu bi'i bönni' ga ugá'ana tsahui' ládxi'do'obi'?
Ral-la' gunbi' ca rnna xtídz'u.
10 Idú ládxa'a rizë ládxa'a Li', Xan.
Biti' gu'u lataj ucá'ana' yugu' le gunná bë'u.
11 Lu icja ládxi'da'ahua' runa' ca rnna xtídz'u,
para cabí guna' dul-la' lo' Li'.
12 ¡Bica' xibó', Xan!
Busedi neda' yugu' le gunná bë'u.
13 Len ruá' cuina' ru'a didza'
ca nácacaca yúgu'të le rusedi quëzinu' netu'.
14 Rudzëjada' ca nácacaca le nunu' ba nalí
ca nu rudzeja tu' dë yöl-la' tsahui' que.
15 Sa' ládxa'a ca nácacaca xibá quiu'
en gü'i ládxa'a yugu' le nulú'u lahui.
16 Udzëjada' ca nácacaca le gunná bë'u.
Biti' gal-la ládxa'a xtídz'u.

Rudzëjade' eru' runru' le rnna cazë' Dios

17 Ben ga gaca dxi'a quia' neda', huen dxin quiu', Xan,
para soa' ibana', en guna' ca rnna xtídz'u.
18 Gusalaj guiöj lahua' para gaca ilé'eda'
le tun ga rubánitu' nazúajgaca lu xibá naguixju' Li'.
19 Zoa' yödzölió ca tu bönni' ridasö.
Biti' ucachu'u yugu' xibá nunu' ga bití' gaca ilé'eda' léguequi.

20 Yúgu'të dza ruhuí'ini ládxa'a tu' rizě ládxa'a yugu' le nusédinu' netu' ca ral-la' guntu'.

21 Ruzenu' le bach nupa tun ba zxon cuínguequi, en nupa nudxiágaca dö', nupa na' tu'zóa tsölá'alö yugu' xibá gunná bē'u.

22 Biti' gu'u lataj nu guequi neda' zi' o nu ucá'ana neda' cá'asö, tu' runa' ca ta'nná le nunu' ba nalí.

23 Sal-la' ta'bö' nupa ta'nná bē', en ta'nně quia', rizá' ládxa'a neda', huen dxin quiu', ca nácagaca le gunná bē'u.

24 Raza ládxa'a yugu' le nunu' ba nalí.

Nácagaca le tu'zéajni'i neda'.

Idú ládxi'ru' gunru' ca gunná cazē' Dios

25 Nadinni lu yu bö' naca caza'.

Busubán ládxa'a, ugunu' dxin xtídz'u.

26 Buluí'ida' Li' yugu' le nuna', ate' bubí'u didza'.

Busedi neda' yugu' le gunná bē'u.

27 Buzéajni'i neda' ca nácagaca xibá quiu', ate' sa' ládxa'a ca nácagaca le nunu', le tun ga rubánitu'.

28 Ribödxí bö' naca caza' tu' risěbida' ládxa'a.

Butipa ládxa'a, ugunu' dxin xtídz'u.

29 Ben ga bití' guna' le cabí sa'yéaj, en buzá' ladxi' quia' xibá naguixju' Li'.

30 Guröa' le naca idútě li para guna' ca rna.

Nuzóa' lahua' yugu' le nusédinu' netu'.

31 Nazi' lu na'a yugu' le nunu' liná' lo.

Biti' gu'u lataj bi gun ga utuí'ida', Xan.

32 Guna' ca ta'nná xibá gunná bē'u,

tu' rutipa cazu' ládxa'a.

Rě'éniru' tséajni'iru' xtídzě'ě Dios

33 Busedi neda', Xan, ca ta'nná le gunná bē'u, ate' gun chí'a léguequi ga idxinrö dza udxi.

34 Benna quia' yöl-la' réajni'i para gun chí'a xibá quiu', en para idú ládxa'a guna' ca ta'nná.

35 Ben ga guna' ca ta'nná le gunná bē'u, tu' raza ládxa'a guna' ca ta'nná xibá na'.

36 Ben ga güí'i ládxa'a yugu' le nunu' ba nalí, para cabí güí'i ládxa'a yöl-la' ruhuidí'.

37 Buchi'a guiöj lahua' para cabí uyúa' le cabí nazaca'. Butipa ládxa'a para guna' le uluí'inu' netu'.

38 Ben tsutsu didza' bē'lenu' neda', huen dxin quiu', para gádxida' Li'.

39 Bucuita ga zoa' nu rudidza' yudxi neda', lě na' rádxida' tu' nácagaca dxi'a tsahui' le nusédinu' netu' ca guntu'.

40 Buyútsöca', rizě ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzě'ě Dios

41 Lu yöl-la' dxi'i ladxi' quiu' buyú neda', Xan, en busölá neda' ca rna xtídz'u gunu'.

42 Ubi'a didza' bi guía' nu run ga rutuí'ida', innía': "Ruzxöni ládxa'a xtídz'u", Xan.

43 Biti' ucuítu' tsaz didza' idútě li lu ru'a

tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li'
yúgu'të dza, en yúgu'të iz si' zaca.

45 Lu yöl-la' rusölä quiu' soa' ibana'
tu' bë' ládxa'a guna' ca ta'nná bë' xibá quiu'.

46 Gu'a didza' que le nunu' ba nalí lógaquië' bönni' ta'nná bë'ë
en biti' ca' utuí'ida'.

47 Tsaza ládxa'a yugu' xibá gunná bë'u,
yugu' lë na' nadxí'ida'.

48 Guna' ca' ca ta'nná xibá nunu', lë na' së ládxa'a,
en sa' ládxa'a ca nácgaca le gunná bë'u.

Zóatica'sö xtídzë'ë Dios

49 Yöjné didza' na' bë'lenu' neda', huen dxin quiu',
tu' benu' ga runa' löza le.

50 Didza' na' ruhuë tsahui' neda' cate' riguí'i rizáca'a,
tu' tu' subán ládxa'a didza' bë'u.

51 Tu'títjalë'e neda' nupa tun ba zxön cuínguequi,
pero biti' ca' usana' xibá naguixju' Li'.

52 Röjneda' yugu' le busédinu' netu' dza ni'te, Xan,
ate' lë na' ruhuë tsahui' neda'.

53 Lu yöl-la' ridzá'a quia' rö'a böniga ni'a quégaca nupa tuá' dö',
nupa na' tu' cá'ana xibá naguixju' Li'.

54 Rul-la' ca nácgaca le gunná bë'u.

Zoa' ni ca tu bönni' ridé' zi'tu'.

55 Chi'i dzö'ölö röjneda' Lo', Xan,
en run chi'a xibá naguixju' Li'.

56 Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxi'ru' xtídzë'ë Dios

57 Nacu' Li', Xan, le ruzi'a xibé.

Chigunnía' guna' ca rnna xtídzü'u.

58 Idú ládxa'a inábida' Li' sóalenu' neda'.

Buéchi' ladxí' neda' ca rnna xtídzü'u gunu'.

59 Guzá' ládxa'a ca nácgaca le runa',
ate' bubí'i ládxa'a para guna' ca rnna le nunu' liná' lo.

60 Bénda'a bayúdx, en biti' gudzedá'
para guna' ca rinná bë' xibá quiu'.

61 Bönachi zían bönachi tuá' dö' gula'gú'u neda' lë'ajlö,
pero biti' gul-la ládxa'a xibá naguixju' Li'.

62 Gulahuëla riyasa', en rigú'a Li' yöl-la' ba
tu' nácgaca tsahui' yugu' le nusédinu' netu'.

63 Runa' tsözxön nupa tadxí Li',
enca' nupa tun ca rnna xibá quiu'.

64 Ridxín idútë yödzölió yöl-la' dxi'i ladxí' quiu', Xan.
Busedi neda' yugu' le gunná bë'u.

Naca le saca' le gunná cazë' Dios

65 Benu' quia' neda', huen dxin quiu', le naca dxi'a,
ca rnna xtídzü'u gunu', Xan.

66 Busedi neda' yöl-la' réajni'i idú, en yöl-la' raca yenni',
tu' réajlë'a yugu' xibá gunná bë'u.

67 Zí'alö cate' buzötju' neda' gudá' nanitia',

pero na'a runa' ca rnna xtídz'u.

⁶⁸ Idú dxi'a tsahui' nacu', en runu' le naca dxi'a.

Busedi neda' yugu' le gunná bë'u.

⁶⁹ Nupa tun ba zxön cuínguequi ta'zí' yë' ca naca quia',
pero idú ládxa'a guna' ca rnna xibá quiu'.

⁷⁰ Chul-la niti naca icja ládxi'do'guequi,
pero raza ládxa'a neda' xibá naguixju' Li'.

⁷¹ Naca dxi'a buzötju' neda'
para bizédida' yugu' le gunná bë'u.

⁷² Nácagacarö dxi'a quia' xibá rinná bë'u
ca nácagaca gayuá' gayuá'sö dumí oro, en plata.

Naca tsahui' le gunná cazë' Dios

⁷³ Len no'o benu' neda', en buzú' neda'.

Buzéajni'i neda' para gúnbë'a xibá gunná bë'u.

⁷⁴ Nupa tadxi Li' ila'lé'e neda', en ulu'dzeja ládxi'guequi,
tu' runa' löza xtídz'u.

⁷⁵ Nözda' naca tsahui' ca ruchi'a rusöröu' quia' neda', Xan,
ate' lu yöl-la' li ladxi' quiu' busaca' zi'u neda'.

⁷⁶ Na'a, lu yöl-la' dxi'i ladxi' quiu' buë tsahui' neda',
ca rnna didza' chibë'lenu' neda', huen dxin quiu'.

⁷⁷ Gudá duhuechi' ládxi'u neda' para soa' ibana',
tu' raza ládxa'a xibá naguixju' Li'.

⁷⁸ Ben ga ulu'tuí'i nupa tun ba zxön cuínguequi,
tu' gula'nnë quia', en biti' bi bena' quéguequi,
pero neda' sa' ládxa'a ca naca xibá quiu'.

⁷⁹ Ral-la' udxín quia' nupa tadxi Li',
nupa na' núnbë'gaca le nunu' ba nalí.

⁸⁰ Ben ga udxín ca rnna le gunná bë'u,
para cabí utuí'ida'.

Runë' Dios ca rnna xtídzë'ë

⁸¹ Rudú ládxa'a tu' riböza' yöl-la' rusölá quiu',
pero runa' löza xtídz'u.

⁸² Chirequi ichul-la lahua' tu' rizëda' ládxa'a xtídz'u,
rnnía': "¿Bátaxi huë tsaú'u neda'?"

⁸³ Caní raca tu' naxú'unida' ca tu buzudi guídi nal-la' lahui guí',
pero catu caz gal-la ládxa'a yugu' le gunná bë'u.

⁸⁴ ¿Bál-laxi dza soa' ibana' neda', huen dxin quiu'?
¿Bátaxi usiúdxu' nupa ta'bía no neda'?

⁸⁵ Nupa tun ba zxön cuínguequi gula'chö'öna tu yeru ga tsöjbixa',
nupa na' biti' tun ca rnna xibá naguixju' Li'.

⁸⁶ Idútë li nácagaca yúgu'të xibá gunná bë'u.
Lu yöl-la' rizí' yë' quéguequi ta'bía no neda'.

¡Gúcalen neda'!

⁸⁷ Gula'zóa ulu'sunítië' neda' lu yödzölió ni,
pero biti' busán na'a xibá quiu'.

⁸⁸ Lu yöl-la' dxi'i ladxi' quiu' busubán ládxa'a,
para gapa chí'a le nunu' ba nalí len ruá' cuinu'.

Réajlë'ëru' xtídzë'ë Xanru'

⁸⁹ Rulidza' Li', Xan.

Tsaz naguixju' xtídz'u yehua' yubá.

90 Gunu' ca rnna xtídz'u quégaca bönachi na'a dza, en yúgu'të dza si' zaca.
Gudixaj cazu' yödzölió, ate' idía'tica'sö.

91 Ni'a que le gunná bë'u nacuá' caz yúgu'të ga ridxintë na'a dza,
tu' tun xichinu' yúgu'të lë na'.

92 La'tu' cabí raza ládxa'a xibá naguixju' Li',
chigunítia' lu le busaca' zi' neda'.

93 Catu caz gal-la ládxa'a yugu' xibá quiu',
tu' busubanu' ládxa'a ni'a quéguequi.

94 Néquida' quiu'.
¡Busölá neda', tu' ruí'i ládxa'a xibá quiu'!

95 Nupa tuá' dö' ta'bó' nisi neda' para ulu'suniti neda',
pero neda' güi'i ládxa'a le nunu' ba nalí.

96 Chibilé'eda' ruúdx'i que yúgu'të le naca idútë yödzölió ni,
pero catu caz udxi que le gunná bë'u guntu'.

Nadxí'iru' xtídzë'ë Xanru'

97 Nadxí'ide'eda' xibá naguixju' Li'.
Idú dza rizá' ládxa'a ca naca que.

98 Réajni'iröda' ca nupa ta'dá'baga' neda'
tu' ruí'i ládxa'a yugu' le gunná bë'u, en tu' dá'tica'sa' léguequi.

99 Réquibe'eröda' ca yúgu'të nupa tu'sedi neda',
tu' rizá' ládxa'a le nunu' ba nalí.

100 Réajni'iröda' ca yugu' bönni' gula,
tu' rapa chi'a xibá quiu'.

101 Gudapa chi'i cuína' para cabí guna' le cabí naca tsahui',
en para guna' ca rnna xtídz'u.

102 Biti' ca' nucá'ana' yugu' le nusédinu' netu',
le nusedi quézinu' neda'.

103 Bica' zxixi náacagaca xtídz'u.
Ön, náacagacarö zxixi ca le zxixi que buz.

104 Tu'zéajni'i xibá quiu' neda'.
Que lë ni na' réquida' zi' yúgu'të le cabí naca.

Xtídzë'ë Dios ruzení' lu icja ládximo'oru'

105 Ca tu bení' naca xtídz'u ga ridá',
en le ruzení' nöza ga ral-la' tóda'.

106 Guzxí' lu na'a bi guna', en nuna' tsutsu xtídz'a.
Gapa chi'a le nusédinu' netu' le naca tsahui'.

107 Zoa le rusaca' zi' neda'.
Busubán ládxa'a, Xan, ugunu' dxin xtídz'u.

108 Guzxí' yöl-la' ba rigu'a Li' len ru'a, Xan,
en buzéajni'i neda' yugu' le nusédinu' netu'.

109 Zóatica'sö bönadxi gátia',
pero biti' ral-la ládxa'a xibá naguixju' Li'.

110 Nupa tuá' dö' bulu'zë tu du yalaj le sön neda',
pero biti' bucá'ana' xibá quiu'.

111 Tsaz nazí' lu na'a le nunu' ba nalí,
ate' run ga rudzeja ládxa'a.

112 Ruí'i ládxa'a gúntica'sa' ca ta'nná le gunná bë'u.
Guna' caní ga idxintë dza udxi.

Nagá'anaru' dxi'a ni'a que xtídzë'ë Dios

113 Réquida' zi' nupa náacagaca chopá ladxi',

pero nadxí'ida' xibá naguixju' Li'.

114 Nacu' ca tu ga rucachi' cuina', en le run chi'i neda'.

Runa' löza xtídzu'u.

115 Guli'cuíta ga zoa', libí'ili' ruá'ali' dö',
tu' guna' ca ta'nná le gunná bë'ë Xana' Dios.

116 Buzóa neda' tsutsu, ugunu' dxin xtídzu'u, ate' soa' ibana'.

Biti' gu'u lataj utuí'ida' ca naca le runa' löza.

117 Buzóa neda' tsutsu, ate' ulá',
en güi'ítica'sa' ládxa'a le gunná bë'u.

118 Nusán no'o yúgu'të nupa nusángaca le gunná bë'u,
tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bëbu.

Que læ ni na' nadxí'ida' le nunu' ba nalí.

120 Rixizi idútë le nayá' nabana' tu' rádxida' Li',
en rádxida' le gaca cate' usiúdxu' bönachi.

Ral-la' gunru' ca rnna xtídzë'ë Dios

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bë' gaca dxi'a quia'.

Biti' gu'u lataj ulu'saca' zi' neda' nupa tun ba zxön cuínguequi.

123 Richí guiøj lahua' tu' riböza' yöl-la' rusölá quiu',
enca' didza' tsahui' quiu'.

124 Lu yöl-la' dxi'i ladxi' quiu' ben quia' neda', huen dxin quiu',
ca rë'ëni quézinu' gunu'.

Busedi neda' yugu' le gunná bë'u.

125 Naca' huen dxin quiu'.

Benna quia' yöl-la' réajni'i para gaca gúnbë'a le nunu' ba nalí.

126 Chibidxín dza bi gunu', Xan,
tu' gula'guítsjë' xibá naguixju' Li'.

127 Que læ ni na' nadxí'iröda' xibá naguixju' Li' ca nadxí'ida' oro.

¡Ön, ca oro banéquini,

128 en réquida' nácacagarö dxi'a xibá quiu' ca yúgu'të le dë!

Biti' rilé'eda' dxi'a yúgu'të le cabí naca.

Raca ládxi'ru' gunru' ca rnna xtídzë'ë Dios

129 Run ga rubánida' le nunu' ba nalí.

Que læ ni na' bö' naca caza' nazí' lu në'e le.

130 Cate' nalá' lahui xtídzu'u, ruzení' queétu'.

Run ga ta'yéajni'i nupa nácacagaca nöxaj ladxi'.

131 Gusalja' ru'a, en gunné ládxa'a,
tu' guzé ládxa'a xibá gunná bë'u.

132 Buyú neda', en buzá' ladxi' quia',
ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',
para gaca guna' ca naca xibá quiu'.

135 Ben ga gaca bë' nazí' lu no'o neda', huen dxin quiu',
en busedi neda' yugu' le gunná bë'u.

136 Raca nisa ribödxí guiøj lahua' ca tu yegu gubó'o,
tu' cabí tun bönachi ca rinná bë' xibá quiu'.

Idutë li naca le rnna cazë' Xanru'

137 Nacu' Li' tsahui', Xan.

Dxi'a tsahui' naca le ruchi'a rusöröu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' riböza' le naca quiu' run ga régui rilá ládxi'da'ahua',
ate' gulal-la ladxi' xtídz'u nupa ta'dá'baga' neda'.

140 Idú dxi'a tsahui' naca xtídz'u.

Que lë ni na' neda', huen dxin quiu', nadxí'ida' le.

141 Nöxaj ladxi' naca', ate' tu' cá'ana bönachi neda' cá'asö,
pero bití' ral-la ládxa'a le gunná bë'u.

142 Zóatica'sö le naca tsahui' quiu',
en idütë li naca xibá naguixju' Li'.

143 Ba bidxín le raca quia', en le rusaca' zi' neda',
pero raza ládxa'a xibá gunná bë'u.

144 Nácatíca'sö tsahui' le nunu' ba nalí.

Buzéajni'i neda' para soa' ibana'.

Ral-la' ulaba ládxi'ru' le gunná cazë' Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bë'u.

146 Rulídzatica'sa' Li'.

Busölá neda', ate' guna' ca naca le nunu' ba nalí.

147 Riyasa' zí'alö ca ritö yu zila, en rulidza' Li' para gácalenu' neda'.
Riböza' yugu' didza' gu'u.

148 Chi'i dzó'ölö rubéaja' yëla guiöj lahua',
para ulaba ládxa'a ca naca xtídz'u.

149 Lu yöl-la' dxi'i ladxi' quiu' buzë nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,

ate' idütë li naca le gunná bë'u.

152 Dza ni'te quez núnbë'a le nunu' ba nalí,
en nözda' tsaz nuzú' le.

Le gunná cazë' Dios run rë'u tsahui'

153 Buyú le rusaca' zi' neda', en busölá neda',
tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídz'u.

155 Zi'tu' zoa yöl-la' rusölá ga nacué' nupa tuá' dö',
tu' cabí tuí'i ládxi'gaca le gunná bë'u.

156 Zxöntëro naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bía no neda', en ta'dá'baga' neda',
pero bití' nucá'ana' le nunu' ba nalí.

158 Bití' rilé'eda' dxi'a nupa nucá'anagaca Li',
en bití' tun ca rnna xtídz'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idütë li nácatíca yúgu'të xtídz'u,
en tsaz nacué' yúgu'të le nusédinu' netu' le nácatíca tsahui'.

Ral-la' udödi cuinru' lu nëë Dios

161 Ta'bía no neda' nupa ta'nná bē', en bití' bi bena' quéguequi,
pero runa' bal xtídz'u lu icja ládxi'da'ahua'.

162 Rudzéalenda' xtídz'u,
ca rudzeja nu rudzöli tu yöl-la' tsahui' zxön.

163 Réquida' zi', en bití' rilé'eda' dxi'a le cabí nácatē,
pero nadxí'ida' xibá naguixju' Li'.

164 Gadxi luzuí tu dza rigu'a Li' yöl-la' ba,
ni'a que le nusédinu' netu', le naca tsahui'.

165 Ta'böza dxi'a tsáhui'do' nupa nadxí'igaca xibá naguixju' Li',
en bití' bi run ga røjchégu'gaca.

166 Runa' löza yöl-la' rusölá quiu', Xan,
en runa' ca rnna xibá nunu'.

167 Yugu' le nunu' ba nalí tun chi'i bö' naca caza',
ate' nadxí'ide'eda' léguequi.

168 Runa' ca ta'nná xibá quiu', en yugu' le nunu' ba nalí
tu' rilé'e quézinu' yúgu'tē le runa'.

Rudzéjalenu' xtídzē'ē Dios

169 Ruzē nagu' le rulidza' Li', Xan.
Ruzéajni'i neda' ca rnna xtídz'u.

170 Ruzē nagu' le rinábida' Li',
en busölá neda' ca rnna xtídz'u gunu'.

171 Bē' neda' lataj cu'a Li' yöl-la' ba,
tu' rusédinu' neda' le gunná bē'u.

172 Bē' lataj gul-la lúdx'a ca naca xtídz'u,
tu' nácgaca tsahui' yúgu'tē xibá nunu'.

173 Guzóatē gácalenu' neda',
tu' naböa' xibá quiu'.

174 Rizē ládxa'a yöl-la' rusölá quiu', Xan,
en raza ládxa'a xibá naguixju' Li'.

175 Bē' lataj soa ibán bö' naca caza' para cu'a Li' yöl-la' ba,
en ben ga gácalen neda' le nusédinu' netu'.

176 Ridöda' tsölá'alö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-la ládxa'a xibá nunu'.

120

1 Cate' gudí'i guzxáca'a bulidza'-nē' Xanru',
ate' Lē' bubí'ē didza'.

2 Busölá bö' naca caza', Xan, lu na' nu rizí' yē',
en lu na' nu bití' run ca gunná caz.

3 ¿Bizxi gunē' quiu' Dios, en bizxi ubi'ē quiu', li' na' rizí' yē'u?

4 Ichizē' li' yugu' yaga lahui tuchi' que nu reaj gudil-la,
en cu'ē icju' bo' yalaj que ya' yörido'.

5 Bica' bayechi' neda' tu' zóasa' yödzo Mesec,
en zoa' tu lu yu'u guídi quégaca bönachi Cedar.

6 Xidzélē'ē chiguzóa bö' naca caza'
len nupa tu'suniti yöl-la' riböza dxi'a tsáhui'do'.

7 Ré'ēnda' cöza' dxi'a tsáhui'do', pero cate' ruá'a didza'
té'ēnnē' ila'díl-lalen neda'.

121

1 Uchisa icja' uyúa' le raca yugu' lu guí'a.
¿Gazxi za' le gácalen neda'?

- 2 Le gácalen neda' za' lu në'ë Xanru'.
Lë' benë' lúzxiba, en luyú.
3 Biti' gu'ë lataj cuilu' ga ridó'.
Biti' cá' gasi Nu na' run chi'i li'.
4 Buyútsöca', biti' ridödi yëla guiöj lahuë',
en biti' rásie', Lë' na' rapa chi'ë bönachi Israel.
5 Run chi'ë Xanru' Dios li'.
Zoë Xanru' Dios cuitu' ibëla, rigu'ë li' zxul-la.
6 Biti' uzegui' gubidza li' lahui' dza,
en biti' bi gun beo' quiu' chi'i dzö'ölö.
7 Gun chi'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.
8 Xanru' Dios gun chi'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

- 1 Budzėjada' cate' gulë bönachi neda', gula'nná:
"Uyeajru' yu'u lidxë' Xanru' Dios."
2 Na'a zuíru' ni
ga nu riyaza yödzo Jerusalén.
3 Dxi'ado' gulunë' yödzo Jerusalén,
ate' naca lachi, en tuz ca röjlözgaca yu'u zxön que.
4 Ta'yaza yugu' cö' bönachi queë' Xanru' ga ni
ca na' nusédinë' Dios bönachi Israel,
para ila'gú'u yöl-la' ba Xanru' Dios.
5 Ta'bö' nupa tu'chi'a tu'sörö queëru' ga ni,
ga ta'bö' ta'nná bë' zxí'ini xi'sóë' David.
6 Guli'nábinë' Dios gunë' ga gaca dxi'a que Jerusalén,
en ga ulu'zí' xibé nupa ta'dxí'i yödzo ni yöl-la' tsahui'.
7 Dios gunë' ga ila'böza dxi'a tsáhu'ido' nupa nacuá' yödzo ni,
en ga ulu'zí' xibé nupa ta'nná bë' yöl-la' tsahui'.
8 Tu' nadxí'ida' yugu' böcha'a, en yugu' böchi' luzá'a,
rnná': "Gaca yöl-la' riböza dxi'ladxi' lu yödzo ni."
9 Tu' nadxí'ida' lidxë' Xanru' Dios,
rinábida'-në' gunë' ga gaca dxi'a que yödzo ni.

123

- 1 Uchisa lahua' uyúa' ga zu' Li',
rö'u rinná bë'u yehua' yubá ni'.
2 Ca runë' bönni' nadó'o, ruyúë' bi ulu'ë xanë',
ate' ruyubi' bi'i nigula nadó'o bi ulú'unu nigula xanbi',
lësca' caní ruyuru' rë'u bi ulu'ë Xanru' Dios,
ga idxinrö dza uzá' ladxë'ë queëru'.
3 Buzá' ladxi' queëtu', Xan. Buzá' ladxi' queëtu',
tu' nacuá' nupa tu'cá'ana netu' cá'asö.
4 Rudú ladxí'tu' tu' tu'titaj netu' nupa tu'zí' xibé yúgu'të le dë,
en tu' tu'cá'ana netu' cá'asö nupa tun ba zxön cuínguequi.

124

- 1 "La'tu' cabí gúcalenë' Xanru' rë'u",
ral-la' ila'nná bönachi Israel:
2 "La'tu' cabí gúcalenë' Xanru' rë'u
cate' nupa biti' ta'lé'e rë'u dxi'a gula'díl-lalen rë'u,

³ la' gulútitë rë'u
tu' gula'léde'e rë'u.

⁴ Guca queëru' ca la' usubága'të rë'u nisa,
en la' uchíjcatëru' lu nisa na'.

⁵ La' uchíjcatëru' tu lu nisa zila."

⁶ ¡Bica' lá'ayi Xanru' Dios
tu' cabí bi'ë lataj nupa bití' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.
Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.
Lë' benë' lúxiba, en lu yu.

125

¹ Nupa tu'zxöni ládxi'gaca Xanru' Dios nácagaca ca guí'a Sión,
tu' cabí bi gaca utá guí'a na', pero tsaz zoa caz.

² Ca rő'gaca guí'a idú gásibi'ilö yödzö Jerusalén,
la' canísö zoë' Xanru' Dios idú gásibi'ilö bönachi queë',
na'a dza, en yúgu'të dza si' zaca.

³ Bití' ral-la' ila'nná bë' nupa tuá' dö' lu xiyúgaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa nácagaca dxi'a,
en quégaca nupa idú ládxi'gaca tun ca rnna xtídzu'u.

⁵ Nupa tu'dödi cuínguequi lu le cabí nácatë,
ben léguequi xigua' tsözxön len nupa tuá' dö'.
Ben ga ila'cuá' bönachi Israel dxi'a tsahui'do'.

126

¹ Cate' Xanru' Dios buchë'ë bönachi yödzö Sión
nupa gula'dzún zi'tu', gúquiru' yélasö rineru'.

² Ní'irö idú ládxi'ru' buzxidxiru',
en lu yöl-la' rudzeja queëru' gurödxí'aru'.
Ní'irö guluí'i didza' bönachi yugu' yödzö izá'a, gula'nná:
"Dios, Xángaquië', benë' le nácagaca zxön, gúcalenë' légaquië'."

³ Xanru' Dios benë' le nácagaca zxön, gúcalenë' rë'u,
ate' ruzí'iru' xibë'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bödxí'a cate' ila'lapa
nupa lu yöl-la' ribödxí quéguequi röjözagaca.

⁶ Nu bönni' lu yöl-la' ribödxí rizë'ë, nu'ë bínnedo' röjözë',
lu yöl-la' rudzeja cödxí'ë cate' udxinë', nu'ë le nulapë'.

127

¹ Channö cabí runë' tsutsu Xanru' Dios tu yu'u,
nítisö tunë' dxin bönni' tunë' yu'u na'.

Channö cabí run chi'ë Xanru' Dios tu yödzö,
nítisö ruyúë' bönni' na' yu'u lu në'ë yödzö na'.

² Nítisö naca rubanu' zílado', en röjöxu' cate' chigúl-lada',
en ragu' le guzxi'u ni'a que le busaca' zi' cuinu',
tu' runnë' Xanru' Dios que nu nadxí'inë' cate' ni' rasi nu na'.

³ Buli'yú, nácagacabi' zxi'iniru' le runnë' Xanru' Dios queëru',
ate' bí'ido' tu'cuá'anu nigula queëru'
nácagacabi' le rubi'ë Xanru' Dios queëru'.
⁴ Ca nácagaca yaga lahui' tuchi' lu na' nu bönni' rejë' gudil-la
nácagacabi' zxi'inë' bönni' zoë' iz cuidi' queë'.
⁵ Bica' ba bönni' nacuá'abi' queë' ziántëröbi'.
Biti' ca' utuí'inë' cate' ru'ë didza' láhui'gaquië'
bönni' tu'chi'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
nupa na' tun ca rë'ëni quëzinë' Lë'.
² Cate' gagu' le gata' quiu' ni'a que dxin nun cazu',
uzi'u xibé lë na', en gaca dxi'a quiu'.
³ Gácanu nigula quiu' ca tu lubá uva dxía ga naca lö'a lidxu',
ate' ilácabi' zxi'inu' ca yugu' yaga olívodo' ta'bö'öbi' ga ni' ráguli'.
⁴ Buli'yútsöca', caní gáquië' bica' ba
bönni' na' rádxinë' Xanru' Dios.
⁵ Xanru' Dios zoë' Sión gunë' ga gaca dxi'a quiu',
en gu'ë li' lataj ilé'enu' le dxi'a gaca que yödzo Jerusalén
yúgu'të dza su' ibanu'.
⁶ Dios gu'ë li' lataj ilé'enu' yugu' zxi'ini xi'sú',
en gunë' ga ila'böza dxi'a tsáhui'do' bönachi Israel.

129

¹ “Zian luzuí gula'bía no netu' ga gudela' nácatu' ra'bando”,
huáca ila'nná bönachi Israel:
² “Zian luzuí gula'bía no netu' ga gudela' nácatu' ra'bando',
pero biti' gula'deli' ulu'xicja netu'.
³ Guca tsca bulu'gá'ana-ba' bëdxi lu bëla' cúdzu'tu',
en gulún tunna ga gudödi xiyágaba' bëdxi quégaquië'.”
⁴ Tsahui' náquië' Xanru' Dios.
Chinachúguë' du quégaca nupa tuá' dö' le gulúgui'ni netu'.
⁵ Ben ga ulu'tuí'i, en ulu'huécja guz cúdzu'lö
yúgu'të nupa biti' ta'lé'e dxi'a netu', bönachi Sión.
⁶ Ben ga ilácagaca ca guíxi'do' da' ícjo'olö yu'u,
le ribídxitë cate' ni' naca hué'ënido'.
⁷ Biti' gaca ulí në'e nu tsójchugu le,
en biti' gaca nu gachi tsölén guizxi que,
⁸ en biti' ta'nná nupa ta'dödi ni':
“Rinábitu'-në' Xanru' Dios gunë' ga gaca dxi'a quiu'.
Lu Lë' Xanru' rinábitu' Lë' gunë' ga gaca dxi'a quiu'.”

130

¹ Ga ni nótjada' rulidza' Li', Xan.
² Ruzë nagu' chi'a, Xana' Dios.
Ruzëda' nagu' le rinábida' Li'.
³ La' nnaru' tsöjnenu' xigua' nabága'gaca bönachi,
¿nuzxi caz urúaj tsahui' lo', Xan?
⁴ Runiti lo cazu' netu', Xan,
para guntu' Li' bal.

⁵ Runa' löza Li', Xana' Dios. Run löza bö' naca caza' Li',
ate' runa' löza gaca ca rnna xtídz'u.

⁶ Bö' naca caza' runrö löza Li', Xan,
ca tunë' bönni' tapa chi'ë yödzö chi'i dzö'ölö ta'bözë' itö yu zila,
ca tunë' löza itö yu zila yugu' bönni' na'.

⁷ Guli'gún löza Xanru' Dios, libí'ili', bönachi Israel,
tu' náquië' dxi'i ladxi' Xanru',
en ruhua'uë' bönachi Israel.

⁸ Xanru' Dios huóá'uë' bönachi Israel
lu yúgu'të xigua' nabága'gaca.

131

¹ Biti' run ba zxön cuina', Xan, en bití' rigú'u cuina' yöl-la' ba,
en bití' ulapa' na'a le nácgaca zxön, en le nácgaca böniga.

² Idú ládxa'a nuzóa cuina' nöxaj, en zoa' dxisö.
Ca runbi' bi'i huë'ëni ruzí' ládxi'bi' cuítanu xiná'abi',
ca' riböza bö' naca caza' lu icja ládxi'da'ahua'.

³ ¡Libí'ili', bönachi Israel, guli'gunë' löza Xanru' Dios
ga naguea' na'a dza, en yúgu'të dza si' zaca!

132

¹ Rinábida' Li', Xan, uláz queë' David tsöjnénu'
yúgu'të le gudí'i guxzáquë'ë,

² en ca benë' tsutsu xtídzë'ë, Xan, en guzxi' lu në'ë bi gunë' lo',
nacu' Nu nál-latëro láhuigaquië' xzí'ini xi'sóë' Jacob, gunné':

³ "Biti' ca' tsu'a lidxa',
en bití' gáta'a le ráti'da',

⁴ en bití' gu'a lataj tödi yëla guiöj lahua',
en bití' utsudi' lahua',

⁵ ga idxinrö dza ucöza' tu lataj ga soë' Xanru' Dios,
le gaca yu'u lidxi Nu na' nál-latëro láhuigaquië' xzí'ini xi'sóë' Jacob."

⁶ Biyönitu' didza' que guí'ina lá'ayi queë' Dios cate' ni' zóatu' Efrata,
ate' budzölitu' le lu xiyúë' Jaar.

⁷ Uyéajru' ga na' zoa cazë' Xanru' Dios.
Tseaj ládxi'ru'-në' ga naca xilibi ni'ë.

⁸ Gudödi, Xan, ga na' soa cazu' Li'.

Gudá tsözxön len guí'ina lá'ayi que yöl-la' zxön quiu'.

⁹ Ben ga sóalen le naca tsahui' yugu' bixúz quiu'
ca tu lari' ta'xóë' cúdzugaquië'.

Ben ga ilúl-la bönachi quiu' lu yöl-la' rudzeja quéguequi.

¹⁰ Uláz queë' David, huen dxin quiu', rinábida' Li'
cabí ucá'anu' bönni' na' gurö cazu' Li'.

¹¹ Xanru' Dios benë' tsutsu xtídzë'ë bi gunë' queë' David,
le naca idütë li, ate' Lë' bití' unítië' xtídzë'ë na', gunné':
"Uzóa' tuë' xzí'ini xi'sú' xilatju' ga inná bë'ëbi'.

¹² Channö ilunbi' xzí'ini xi'sú' ca rnna didza' dzaga quia',
en le nuna' ba nalí para uzéajni'ida' légacabi',
ila'nná bë'ëbi' ga rö'u rinná bë'u yúgu'të dza si' zaca."

¹³ Xanru' Dios nabö cazë' queë' yödzö Siön.

Raca ládxe'ë gaca Sión ga soa cazë' Lë'.

¹⁴ Rnnë': "Nácatica'sö lataj ni ga soa caza' neda'.

Soa' ni tu' raca ládxa'a soa' ni.

¹⁵ Guna' ga gátada' le ilágugaca bönachi ni,
en guna' ga ulu'huölej ila'dzé'e yöta xtila
nupa ta'yadzaj ta'yudxi lu yödzö ni.

¹⁶ Guna' ga sóalen yöl-la' rusölä yugu' bixúz quia'
ca tu lari' ila'xóa cüdzu'gaquië',
ate' ilúl-la bönachi quia' lu yöl-la' rudzeja quéguequi.

¹⁷ Guna' ni ga ilá' lahui yöl-la' unná bë' queë' David.

Guna' ga sóatica'sö nu inná bë' xilatjë' bönni' na' nabö caza'.

¹⁸ Guna' ga sóalen nupa biti' ta'lé'e lë' dxi'a yöl-la' rutuí'i
ca tu lari' ilácuguequi, pero tsëpi yösa bení' le dxía icjë'."

133

¹ Buli'yútsöca': ¡Bica' dxi'a tsahui' naca

cate' nupa nácagaca böchi' luzë'e
ta'böza lu yöl-la' tuz quéguequi!

² Naca ca le za ta'gú'u ícjaguequi bönachi,
le ridzún lu guitsa' láhuiguequi,
en bidzún lu guitsa' lúzxuë' Aarón,
le bidzún ga ridxintë lu yeni zxë'.

³ Naca ca buzén le ridinni lu guí'a Hermón,
en ca le ribö'a lu guí'a Sión,
tu' gunná bë'ë Xanru' gaca dxi'a queëru' lu guí'a na',
en gata' yöl-la' na'bán idú queëru'.

134

¹ ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',
yúgu'tëli' na' zóali' yu'u lidxë' Xanru' chi'i dzö'ölö!

² ¡Guli'chisa ná'ali' ga zóali' lataj lá'ayi queë',
en guli'nná dxi'a queë'!

³ Xanru' Dios, zoa cazë' yödzö Sión, gunë' ga gaca dxi'a queëli'.
Naca cazë' Nu ben yehua' yubá, en yödzölió ni.

135

¹ ¡Guli'cu'ë yöl-la' ba Xanru' Dios!

¡Guli'cú'u yöl-la' ba La la'ayi queë' Xanru' Dios!

¡Guli'cu'ë yöl-la' ba, libí'ili' runli' xichinë' Xanru',

² libí'ili' na' zuíli' yu'u lidxë' Xanru',
ga na' zóali' lö'a que yu'u lidxë' Dios queëru'!

³ ¡Guli'cu'ë yöl-la' ba Xanru' Dios tu' náquië' dxi'a!

¡Guli'gul-la yöl-la' ba que La la'ayi queë', tu' naca lachi!

⁴ Nabö cazë' Xanru' zxí'ini xi'sóë' Jacob para ilaca quez queë'.
Guröë' bönachi Israel para ilequi queë'.

⁵ Nözda' nayëpisë' Xanru' Dios.

Nayëpisëtërë' ca yugu' dios quégaca bönachi izá'a.

⁶ Run cazë' Xanru' ca riyaza ladxi' cazë' yehua' yubá ni',
en luyú ni, en lu nísado', en znan lu yu.

⁷ Runë' ga rö' böaj gáti'tës luyú ni,

en runë' ga rëpi yösa cate' ralaj guiöj.

Rubéajë' bö' recja ga rapa chi'ë le nequi queë'.

⁸ Bëtië' yugu' bi'i bönni' zí'alö quégaca bönachi Egipto,
zxí'inigaca bönachi, en böa' huë'ënido' quégacaba' böa' guixi'.

⁹ Benë' yugu' yöl-la' huáca zxön le gulaca bë' luyú Egipto,
yugu' lë na' gulaca queë' Faraón, en quégaca huen xichinë'.

¹⁰ Busunítië' Dios bönachi zían yödzö izá'a,
en bëtië' bönni' lo ta'nná bëë'.

¹¹ Bëtië' Sehón, bönni' gunná bé'enë' bönachi Amorreo,
en Og, bönni' gunná bé'enë' bönachi Basán,
en bönni' gula'nná bé'enë' bönachi yödzö nacua' luyú Canaán.

¹² Budödë' xiyúgaquië' bönni' na'
lu ná'agaquië' bönni' Israel, bönachi queë' cazë'.

¹³ Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

¹⁴ tu' uchi'a usöröu' bönachi queu', Xantu' Dios,
en huéchi' ladxu'u nupa tun xichinu'.

¹⁵ Budó' quégaca bönachi yugu' yödzö izá'a néquiniguequi
plata, en oro, yugu' le núngaca lu ni'a lu ná'agaca bönachi.

¹⁶ Zóagaca ru'iguequi, pero biti' bi didza' tu'í.

Zóagaca guiöj lóguequi, pero biti' bi ta'lé'e.

¹⁷ Zóagaca náagaca, pero biti' bi ta'yöni,
en biti' ta'guela' bö' ru'igaca.

¹⁸ Nupa tun léguequi ilaca ca náagaca budó' na',
en caní ilaca yúgu'të nupa tu'zxöni ladxí' léguequi.

¹⁹ Libí'ili', bönachi Israel, guli'guíë' Xanru' náquië' dxi'a.

Libí'ili', zxí'ini xi'sóë' Aarón, guli'guíë' Xanru' náquië' dxi'a.

²⁰ Libí'ili', zxí'ini xi'sóë' Leví, guli'guíë' Xanru' náquië' dxi'a.

Libí'ili', núlöli' rádxili'-në' Xanru', guli'guíë' Xanru' náquië' dxi'a.

²¹ Núlöli' zóali' yödzö Sión ral-la' guiëli'-në' Xanru' náquië' dxi'a,
tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

136

¹ ¡Xclenë' Xanru' Dios tu' náquië' dxi'a!

Zóatica'sö yöl-la' dxi'i ladxí' queë'.

² ¡Xclenë' Dios nayëpisëtëre' ca yugu' dios izá'a!

Zóatica'sö yöl-la' dxi'i ladxí' queë'.

³ ¡Xclenë' Xanru', nayëpisëtëre' ca yugu' xángaca bönachi!

Zóatica'sö yöl-la' dxi'i ladxí' queë'.

⁴ ¡Xclenë' Dios, tuzë' Lë' runë' yugu' yöl-la' huáca zxön!

Zóatica'sö yöl-la' dxi'i ladxí' queë'.

⁵ ¡Xclenë' Dios, len yöl-la' rácada' queë' benë' lúzxiba!

Zóatica'sö yöl-la' dxi'i ladxí' queë'.

⁶ ¡Xclenë' Dios, gudixjë' luyú láhuilö nísado'!

Zóatica'sö yöl-la' dxi'i ladxí' queë'.

⁷ ¡Xclenë' Dios, benë' gubidza, en beo'!

Zóatica'sö yöl-la' dxi'i ladxí' queë'.

8 ¡Benë' Dios gubidza para tsení' lahui' dza!
 Zóatica'sö yöl-la' dxi'i ladxi' queë'.
 9 ¡Benë' Dios beo', en yugu' bôlaj para ulu'zeni' chi'i dzö'ölö!
 Zóatica'sö yöl-la' dxi'i ladxi' queë'.
 10 ¡Xclenë' Dios, bëtië' yugu' bi'i bönni' lo quégaca bönachi Egipto!
 Zóatica'sö yöl-la' dxi'i ladxi' queë'.
 11 ¡Bubéajë' bönachi Israel ladaj bönachi Egipto na'!
 Zóatica'sö yöl-la' dxi'i ladxi' queë'.
 12 ¡Len yöl-la' huáca zxön queë', en lu yöl-la' nadxí'i queë' benë' caní!
 Zóatica'sö yöl-la' dxi'i ladxi' queë'.
 13 ¡Xclenë' Dios, bubéajë' choplö Nísado' Xiná!
 Zóatica'sö yöl-la' dxi'i ladxi' queë'.
 14 ¡Benë' ga gula'dödi bönachi Israel gatsaj láhui'lö nísado' na'!
 Zóatica'sö yöl-la' dxi'i ladxi' queë'.
 15 ¡Lu nísado' na' busunítië' Faraón, en bönni' queë' röjáquië' gudil-la!
 Zóatica'sö yöl-la' dxi'i ladxi' queë'.
 16 ¡Xclenë' Dios, guchë'ë bönachi queë' la' guixi' ga ni' naca yu bidxi!
 Zóatica'sö yöl-la' dxi'i ladxi' queë'.
 17 ¡Xclenë' Dios, bëtië' bönni' gula'nná bë'ë, guláquië' nal-la!
 Zóatica'sö yöl-la' dxi'i ladxi' queë'.
 18 ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!
 Zóatica'sö yöl-la' dxi'i ladxi' queë'.
 19 ¡Bëtië' Sehón, bönni' gunná bé'enë' bönachi Amorreo!
 Zóatica'sö yöl-la' dxi'i ladxi' queë'.
 20 ¡Bëtië' Og, bönni' gunná bé'enë' bönachi Basán!
 Zóatica'sö yöl-la' dxi'i ladxi' queë'.
 21 ¡Budödë' xiyúgaquië' lu ná'agaca bönachi queë'!
 Zóatica'sö yöl-la' dxi'i ladxi' queë'.
 22 ¡Budödë' le lu ná'agaca bönachi Israel, bönachi tun xichinë'!
 Zóatica'sö yöl-la' dxi'i ladxi' queë'.
 23 ¡Yöjnenë' rë'u cate' ni' bugá'anaru' cá'asö!
 Zóatica'sö yöl-la' dxi'i ladxi' queë'.
 24 ¡Busölë' rë'u lu ná'agaca nupa gula'díl-lalen rë'u!
 Zóatica'sö yöl-la' dxi'i ladxi' queë'.
 25 ¡Rugahuë' yúgu'të bönachi!
 Zóatica'sö yöl-la' dxi'i ladxi' queë'.
 26 ¡Xclenë' Dios, zoa cazë' yehua' yubá!
 Zóatica'sö yöl-la' dxi'i ladxi' queë'.

137

1 Ra' yegu nacué' lu yu Babilonia gurö'ötu',
 en gurödxí yéchi'tu', cate' yöjnetu' yödzö Sión.
 2 Lu yaga ró'gaca yugu' ra' yegu ni'
 bugála'tu' yugu' le rúl-lalentu'.
 3 Caní bentu' tu' gula'nabi yudxi nupa gulachë' netu' nadzuntu' ni' gúl-latu'.
 Nupa bulu'saca' zi' netu' gula'naba queëtu' yöl-la' ruzxidxi, gula'nná:
 "Gulí'gul-la queëtu' tu le rul-la que yödzö Sión."
 4 ¿Nacxi caz gaca gúl-latu' le rul-la queë' Xanru'
 ga ni nadzuntu' tu lu yödzö izá'a?
 5 Channö gal-la ládxa'a yödzö Jerusalén,
 rinábida'-në' Dios ugúë' yöl-la' raca que na'a ibëla.

⁶ Rinábida'-në' gunë' ga ta' lúdxa'a chichja'
channö cabí tsöjneda' ladza',
en channö cabí hui' zxönra' yödzo Jerusalén ca ia'tú le ruzí'ida' xibé.

⁷ Yöjné le gulunë' zxi'ini xi'sóë' EDOM, XAN,
le gulunë' dza busiúdxu' yödzo Jerusalén,
ca na' gula'nnë': "Guli'quinnaj dëra.
Guli'quinnaj dëra ga idxintë xilibi zö'ö yödzo na'."

⁸ Libí'ili', bönachi Babilonia, libí'ili' rusunítili',
bica' ba nu ubí'i queéli' ca na' benli' queétu'.

⁹ Bica' ba nu quela' yugu' bí'ido' queéli'
en uzuzxaj légacabi' yugu' lu guiöj.

138

¹ Idú ládxa'a guía' Li', "Xclenu" XAN.

Gul-la' yöl-la' ba quiu' lógaca le tun zxön bönachi yugu' yödzo izá'a.

² Uzóa zxiba' saca' yudo' lá'ayi quiu', en guía' Li', "Xclenu"
ni'a que Lo', tu' nacu' dxi'i ladxi', en runu' ca rna didza' bë'u,
tu' benu' ca naca lu xtídzu'u, en lu le naca ca nazí'i lo.

³ La' dza ná'asö cate' bulidza' Li', bubi'u didza'.
Tu' butipu' ládxa'a, guca' rugu ladxi'.

⁴ Yúgu'të bönni' ta'nná bë'ë ilé' Li': "Xclenu" XAN,
cate' ila'yönnë' didza' ru'u.

⁵ Ilul-lë' ca ná'agaca le runë' Xanru' Dios,
tu' nácatërö zxön yöl-la' ba queë' Xanru'.

⁶ Sal-la' nayëpisëtërë' Xanru' Dios
ruí'i ládxe'ë nupa ná'agaca cá'asö,
pero zi'tu' zítu'sö ruyüë' nupa tun ba zxön cuínguequi.

⁷ Sal-la' ridá' ga zoa bönadxi quia', Li' utipa cazu' ládxa'a.
Tíl-lalen cazu' nupa ta'díl-lalen neda',
ate' len yöl-la' huáca quiu' usöló' neda'.

⁸ Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'i ladxi' quiu', XAN.
Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', XAN, en nunbë' cazu' neda'.

² Nöz quézinu' cate' ribö'a, en cate' riyasa'.
Nözinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nözinu' yúgu'të le runa'.

⁴ Zí'atëlö ca bi didza' ru'a,
chi nöz quézinu' bi innía', XAN.

⁵ Röjnöru cazu' lahua', en za' cazu' cúdza'a,
en naxóatica'sö no'o neda'.

⁶ Run ga rubánida' tu' nöz quézinu' Li'.
Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bö' quiu'?

¿Naru' huáca izxúnnaja' ga biti' zoa cazu' Li'?
 8 La'tu' huabena' lúzxiba, ni' soa cazu' Li',
 en la'tu' huötja' lataj chul-la, ni' zoa cazu' ca'.
 9 La'tu' uyija' ga rilén gubidza,
 o la'tu' huadóda' ia'tsölá'alö nísado',
 10 ni' caz ichë'u neda',
 ate' len no'o ibëla sön cazu' neda'.
 11 La'tu' innía': "Ucachi' neda' le naca chul-la",
 en la'tu' huóaca chul-la bení' zóalen neda',
 12 biti' gaca chul-la lo' Li' lê na' naca chul-la quia',
 pero chi'i dzö'ölö gaca quiu' ca lahui' dza.
 Tuz ca nácagaca lo' Li' le naca chul-la, en le naca lahui' dza.
 13 Nun cazu' Li' le zoa icja ládxi'da'ahua'.
 Benu' ga guyá' lë'ënu xiná'a le naca caza'.
 14 Guía' Li': "Xclenu" tu' run ga rubánida' ca nun cazu' neda',
 ate' rádxi'da' Li' tu' tun le nunu' ga rubánida',
 ate' bö' naca caza' nözi caz naca caní.
 15 Biti' bigachi' lo' le naca caza' cate' ni' si' galja',
 cate' ni' yu'a lë'ënu xiná'a.
 16 Bilé'e quézinu' neda' cate' ni' si' galja',
 tu' chinuzúajgaca lu guichi quiu'
 yugu' dza ral-la' soa' ibana',
 sal-la' biti' ridxini nitú dza na'.
 17 Nazáca'tërögaca quia' le rizá' ládxi'u, Dios.
 Ziántërö nácagaca lê na' rizá' ládxi'u.
 18 La'tu' huáca nu ulaba léguequi,
 ilácagaca ziántërö ca nácagaca guiój yuzxi.
 Cate' rubana', ni' zóalena' Li'.
 19 Raca ládxa'a usunítu' nupa tuá' dö', Dios.

Que lê ni na', guli'cuíta ga zoa', núlöli' rútili' bönachi.

20 Tuí'i didza' zi' ca nacu' Li', Dios,
 ate' nupa ta'dá'baga' Li' ta'nné liz que Lo'.
 21 ¿Naru' cabí rileda' nupa ta'lé Li', Xan?
 ¿Naru' cabí ruzóa' tsölá'alö nupa ta'dá'baga' Li'?
 22 Idú ládxa'a biti' rilé'eda' léguequi dxi'a.
 Nuzóa' léguequi ca nupa ta'díl-lalen neda'.

23 Buyú neda', Dios, en gúquibe'e le zoa icja ládxi'da'ahua'.
 Guzí' bë' neda', en gúquibe'e le rizá' ládxa'a.
 24 Buyú channö zóalen neda' le naca dö',
 en buluí'i neda' nöza tsahui' quiu' zóatica'sö.

140

1 Busölá neda', Xan, lu ná'agaca nupa tuá' dö'.
 Ben chi'i neda' para cabí bi ilunë' bönni' zi' quia'.
 2 Ta'zá' ládxi'ë le nácagaca xihui' ilunë',
 en tunë' ga ila'díl-lalen bönachi luzé'eguequi.
 3 Didza' tu'ë tun ga nácagaca lúdxigaquië' ca yugu' bëla sínia'.
 Yu'u ruá'agaquië' le naché' yöl-la' guti ca le dxía lu láyi'ba' bëla na'.
 4 Ben chi'i neda', Xan, para cabí bi ilunë' bönni' tu'ë dö' quia'.
 Ben chi'i neda' para cabí bi ilunë' bönni' zidzaj quia',

bönni' na' té'ënë' ilunë' ga ichixi iníguida'.

⁵ Nupa tun ba zxon cuínguequi nucáchi' gaca le sön neda', enca' du yalaj iröli neda'.

Nucáchi' gaca du yalaj ga ral-la' töda'.

Nucözagaca le ila' zön neda'.

⁶ Gudxa'-në' Xanru': "Nacu' Dios quia'.

Ruzë nagu', Xan, yugu' le rinábida' Li'.

⁷ Xana' Dios, naca cazu' Nu rusölá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

⁸ Biti' gu'u lataj, Xan, gaca quia' le ré'ënë' gunë' bönni' ru'ë dö'.

Biti' gu'u lë' lataj idéli'në' le rizá' ladxë'ë, para cabí tsépisë'.

⁹ Nacuá' nupa nagú'ugaca neda' lë'ajlö.

Busubaga' ícjagaquië' dö' té'ënë' ilu'ë quia'.

¹⁰ Ben ga ila' bixaj bo' yalaj lahui ícjagaquië'.

Bë' lataj tsöjtsázagaquië' tu lu guí' zxon,

en yugu' lu yeru zila ga bití' ila' zéqui'në' ulu'rúajë'.

¹¹ Biti' gu'u lataj soë' bönni' rizí' yë'ë luyú ni.

Ben ga udxín queë' bönni' zidzaj dö' ru'ë."

¹² Nözda' gunë' Xanru' ga ulu'rúaj tsahui' nupa ta' guí' ta' zaca', en uchi'a usöröë' quégaca bönachi yechi'.

¹³ Le nácatë ilé Li': "Xclenu" nupa nácgaca tsahui' tu' tu'lidza Lo'.

Ila'cuá' ga zoa cazu' Li' nupa nácgaca dxi'a.

141

¹ Rulidza' Li', Xan. Gudáchi ga zoa'.

Ruzë nagu' chí'a cate' rulidza' Li'.

² Buyú le rulidza' Li' ca dzön yalaj le ridxín lo', en cate' richisa na'a, buzí' le ca tu böa'do' uzégui'a-ba' lo'.

³ Ben chi'i ruá'a, Xan, en gudapa chi'i guídi ruá'a para cabí gu'a didza' zi'.

⁴ Biti' gu'u lataj gaca ladxá'a le cabí nácatë,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxön.

⁵ Bë' lataj gu'ë neda' bönni' tsahui' lu yöl-la' nadxí'i queë' para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ila'ládzugaquië' bönni' lo quéguequi lë'e guí'a guiöj, ate' iléquibe'e gulaca dxi'a didza' bë'a.

⁷ Ca raca cate' nu rugá'ana-ba' bëdxi, en rulá'a yu, ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lë na' nucáchi' gaca, en ga bití' tsöjtsaza' lu du yalaj nucözagaca nupa tuá' dö'.

¹⁰ Bë' lataj ila'yaza la' cuíngacasö lu du yalaj bulu'cachi' nupa tuá' dö',

pero benna lataj tódisa' neda' ga na' nagachi' du yalaj na'.

142

¹ Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' ládxe'ë quia'.

² Rudöda' lahuë' yöl-la' rinaba yudxi quia',
en rusiyönda' Lë' le rácagaca quia'.

³ Cate' budú ládxa'a,
gunözi quézinu' Li' le guca quia'.

La' nöza ga ridá' neda'
bulu'cachi' le sön neda'.

⁴ Buyú cuita' ibëla
tu' cuntu nu zoa nu ru'i ladxi' neda'.
Biti' bi zoa le gácalen neda'.

Cuntu nu run chi'i bö' naca caza'.

⁵ Gurödxí'a lo' Li', Xan, gunnía':

Run chi'i cazu' neda' Li',
en naca cazu' Nu rácalen neda' ladaj nupa nabángaca.

⁶ Ruzé nagu' le rulidza' Li',

tu' nagá'ana' cá'asö.

Busölá neda' lu ná'agaca nupa ta'zóa regu' neda',
tu' nácatërögaca nál-la ca neda'.

⁷ Guléaj bö' naca caza' lu yu'u lidxi guié,
para gaca guía' Li': "Xclenu" tu' rulidza' Lo'.

Nupa nácatögaca tsahui' ulu'dubi idú gásibi'ilö ga zoa',
tu' gunnu' sizxöni quia' le riquinda'.

143

¹ Ruzé nagu' le rulidza' Li', Xan.

Ruzé nagu' le rinabi yúdxida' Li'.

Tu' runu' ca rna didza' bë'u, en nacu' tsahui' gunnúu'

² biti' ichë'u neda' lo' ga uchi'a usöröu' quia', huen dxin quiu'.

Cuntu nu zoa naca tsahui' lo' Li'.

³ Nu biti' rilé'e neda' dxi'a zoa regu' bö' naca caza'.

Nuzötjé' yöl-la' na'bán quia' lu yu.

Benë' ga zoa' lataj naca chul-la ca raca quégaca nupa gulati dza ni'te.

⁴ Que lé ni na' rudú ládxa'a, en rö'a böniga.

⁵ Røjneda' dza chigula'dödi.

Rizá' ládxa'a ca nácatögaca le benu' Li'.

Ribequi icja' ca nácatögaca le nun no'o.

⁶ Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiöj.

⁷ Bubí'itë didza', Xan, tu' rudú ládxa'a.

Biti' ucachi' lo' lahua' neda',

para cabí gaca' ca tu bönni' ru'ë lataj chul-la ga nacua' nupa nácatögaca.

⁸ Ben ga yönda' yugu' zila ca naca yöl-la' dxi'i ladxi' quiu',

tu' ruzxöni ládxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

⁹ Busölá neda', Xan, lu ná'agaca nupa biti' ta'lé'e neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca rë'ënu' Li',

tu' naca cazu' Li' Dios quia'.
 Bë' lataj ichë' Bö' Lá'ayi quiu' neda' lu nöza tsahui'.
 11 Butipa ládxa'a, Xan, para gaca yöl-la' ba que Lo'.
 Tu' nacu' tsahui' busölä neda' lu le raca quia'.
 12 Lu yöl-la' dxi'i ladxi' quiu' guchugu quégaca nupa biti' ta'lé'e neda' dxi'a.
 Busuniti yúgu'të nupa tu'saca' zi' bö' naca caza',
 tu' naca' huen dxin quiu'.

144

1 ¡Yöl-la' ba Lë', Xanru' Dios!
 ¡Náquië' ca tu guiöj ga zoa' tsutsu!
 Rutipë' na'a para gaca tseja' gudil-la,
 en rutipë' ca' xibön na'a para gaca tíl-lalena' bönni' nácagaquië' nál-la.
 2 Naca cazë' Xanru' yöl-la' dxi'i ladxi' quia',
 enca' ca tu ga zoa' tsutsu lu gudil-la.
 Rusölë' neda', en náquië' ca tu ga zoa' tsaz.
 Náquië' ca tu le run chi'i neda' lu gudil-la, ate' rucachi' cuina' ga na' zoë'.
 Runë' ga tun nupa rinná bé'eda' ca rnna didza' ru'a.
 3 ¿Bíxatë caz náquië' bönni' tu' runu' lë' ba lá'ana, Xan?
 ¿Bíxatë caz náquië' bönni' tu' ruí'i ladxi' cazu' lë'?
 4 Naca cazë' bönni' na' ca tu bö'do' recja,
 ate' yugu' dza zoë' nabanë' nácagacasö ca tu zxul-la le rigú'u tu böaj ridödisö.
 5 Buzötaj lúzxiba, en bdinne ni, Xan.
 Gudán yugu' guí'a, ate' irúaj dzön lë'eguequi.
 6 Ben ga tsëpi yösa quiu', en bésilasi léguequi.
 Busé yugu' yaga lahui tuchi', en ben ga ila'bö' baguí'isö.
 7 Bulí no'o ga na' zu' xitsá'alö.
 Busölä neda', en guléaj neda' lu ná'agaca bönachi zi'tu',
 le gaca ca rubéaju' neda' lu nisa zila.
 8 Ta'zí' yë' bönachi na',
 ate' le cabí nácatë naca yöl-la' unná bë' quéguequi.
 9 ¡Gul-la' quiu' Li', Dios, tu le cubi!
 ¡Gul-la' quiu' yöl-la' ba, en quínnia' bihuël-la nuá' chi du que!
 10 Rusölá cazu' bönni' ta'nná bë'ë.
 Busöló' David, huen dxin quiu', lu guíë tuchi' queë' bönni' ru'ë dö'.
 11 Gúcalen neda', en busölä neda' lu ná'agaca bönachi zi'tu'.
 Ta'zí' yë' bönachi na',
 ate' le cabí nácatë naca yöl-la' unná bë' quéguequi.
 12 Ben ga ilácabi' bi'i bönni' queëtu' ni yu'ugacabi' iz cuidi'
 ca yugu' yaga nazxöngaca,
 en ben ga ilácabi' bi'i nigula queëtu'
 ca nácagaca ya'zxén que tu yu'u nazaca'.
 13 Ben ga ilígaca yu'u queëtu' zxoá' za utúbitu',
 en ben ga iláljaba' gayuá' gayuá'aba' chíbodo',
 en bö'cu' zxíla'do' ga nucuá'atu'-ba'.
 14 Ben ga ulu'cuá'aba' böa' huë'ënido' quégaca böa' guixi' queëtu',
 en ga biti' bi gaca quégacaba' bédxi zxön, en bédxido' ca'.

Biti' gu'u lataj soa nu cödxí yechi' la' nöza que ládzatu'.

15 ¡Bica' bágaca bönachi raca caní quéguequi!
¡Bica' bágaca bönachi na' Xanru' Dios náquië' Dios quéguequi!

145

1 ¡Guna' Li' zxön, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

2 ¡Tu dza tu dza cu'a Li' yöl-la' zxön,
en cú'utica'sa' Lo' yöl-la' ba!

3 ¡Nayëpisëtë'rë' Xanru' Dios, ate' cú'uru'-në' yöl-la' ba!
¡Biti' ca' gaca gúnbë'ëru' ca naca yöl-la' zxön queë'!

4 Yúgu'të bönachi ila'gú'u yöl-la' ba le nun cazu' Li',
para ulu'siyón zxí'inigaca,

en ulu'luí'i lahui le nácagaca zxön benu'.

5 Sa' ládxa'a ca naca yöl-la' zxön que yöl-la' unná bë' quiu',
en ca nácagaca yöl-la' huáca zxön runu'.

6 Iluí'i didza' yúgu'të bönachi ca naca yöl-la' zxön
quégaca yöl-la' huáca runu'.

Úsiyönda' bönachi ca naca yöl-la' zxön quiu'.

7 Idú ládxi' gaca ilu'í'i didza' cate' tsöjnégaca yöl-la' dxi'i ladxi' zxön quiu'.
Lu yöl-la' rudzeja quéguequi ila'bödxí'a tu' nacu' tsahui'.

8 Xanru' Dios ruzá' ládxe'ë queëru', en ruhuéchi' ládxe'ë rë'u.

Biti' ilética'së', ate' zxöntë'rö naca yöl-la' dxi'i ladxi' queë'.

9 Runë' Xanru' Dios le naca dxi'a quégaca yúgu'të bönachi,
en ruhuéchi' ládxe'ë yúgu'të le nunë'.

10 Yúgu'të le nunu' ilë Li': "Xclenu" Xan,
ate' nupa néquiguequi quez quiu' ilún Li' zxön.

11 Iluí'i didza' ca naca yöl-la' zxön que le rinná bë'u,
en ulu'luí'i lahui yöl-la' zxön quiu',

12 para ulu'siyón bönachi ca nácagaca le zxön runu',
en ca naca yöl-la' zxön que le rinná bë'u le nayëpisëtë'rö.

13 ¡Zóatica'sö le rinná bë'u,
ate' idía'tica'sö yöl-la' unná bë' quiu'!

¡Lu le naca idú ladxi' queë' runë' Dios ca rnnágaca yúgu'të didza' ru'ë,
en lu yöl-la' dxi'i ladxi' queë' runë' yúgu'të le runë'!

14 ¡Röjzönë' Xanru' yúgu'të nupa röjtsö'ögaca,
en ruchisë' yúgu'të nupa ndínnegaca!

15 ¡Yúgu'të bönachi tu'yú Li', Xan,
ate' runödzu' le ilágugaca cate' ridxín dza que!

16 ¡Rusalaj cazu' no'o
en rugagu' yúgu'të le nacuá' nabángaca!

17 Náquië' tsahui' Xanru' Dios ca naca yúgu'të le runë'
en náquië' ca' dxi'i ladxi'.

18 Zoë' Xanru' gala' ga nacuá' yúgu'të nupa tu'lidza Lë',
nupa na' tu'lidza Lë' idú ládxi' guequi.

- 19 Gunnë' le ta'zë ládxi'gaca quégaca nupa tadxi Lë'.
 Riyönnë' cate' tu'lidza Lë', en rusölë' léguequi.
 20 Run chi'i cazë' Xanru' yúgu'të nupa nadxí'igaca Lë',
 pero usunítië' nupa tuá' dö'.
 21 Len ru'a cuina' cu'a-në' Xanru' yöl-la' ba,
 ate' yúgu'të bönachi ilúntica'sö Lë' zxön.

146

- 1 ¡Guli'cu'ë yöl-la' ba Xanru'!
 ¡Li', bö' naca caza', gulu'ë yöl-la' ba Xanru'!
 2 ¡Cu'a-në' Xana' yöl-la' ba tsanni ni zoa' nabana'!
 ¡Gul-la' yöl-la' ba queë' Dios quia' tsanni ni zoa bö' naca caza'!
 3 Biti' uzxöni ládxi'li' bönni' ta'nná bë'ë,
 en calëga bönni' tati cazë', bönni' biti' ca' gaca ulu'sölë' rë'u.
 4 Rurúaj bö' yu'ë nu bönni', ate' ruhuóáquië' yu.
 La' dza ná'asö riniti le rizá' ládxi'ë gunë'.
 5 Bica' ba bönni' rácalenë' Dios queë' Jacob lë',
 bönni' na' runë' löza Xanru' Dios.
 6 Nunë' Xanru' Dios lúzxiba, en luyú ni,
 enca' nísado', en yúgu'të le nacué' yugu' lataj na'.
 Rúntica'së' Lë' ca rna didza' bë'ë,
 7 en ruchi'a rusöröë' nupa zoa nu rusaca' zi' léguequi.
 Rugagu cazë' nupa ta'dún.
 Rusanë' Xanru' Dios nupa nadzúngaca.
 8 Rusaljë' Xanru' Dios guiój lógaca nupa nácagaca lo chul-la.
 Ruchisë' Xanru' Dios nupa nadzö'ögaca.
 Nadxí'inë' Xanru' Dios nupa nácagaca tsahui'.
 9 Rapa chi'ë Xanru' Dios yugu' bönni' zi'tu'.
 Rácalenë'-bi' yugu' bi'i uzëbi, enca' yugu' nigula uzëbi,
 pero ruzaguë' xinözguequi nupa tuá' dö'.
 10 Inná bë'tica'së' Xanru' Dios.

Náquië' Dios queëli', bönachi Sión.
 ¡Guli'cu'ë yöl-la' ba Xanru'!

147

- 1 ¡Guli'cu'ë yöl-la' ba Xanru'!
 ¡Tsahui' naca gúl-laru' yöl-la' ba queë' Dios queëru'!
 ¡Naca lachi, en le ral-la' gunru', cú'uru'-në' yöl-la' ba!
 2 Runë' Xanru' Dios ga rizxön yödzö Jerusalén.
 Rutubë' bönni' Israel násilasigaquië'.
 3 Ruúnë' bönni' nácagaquië' yechi' ladxi',
 en rudë'ë lari' ga dxíagaquië' huë'.
 4 Rulabë' tsca nacué' bölaj lúzxiba.
 Nucué' lágacaba' tu tuba' yúgu'të bölaj na'.
 5 Nayëpisëtërë' Xanru' Dios, en nál-latërë'.
 Ga rë'ë dzu réajni'inë' yúgu'të.
 6 Xanru' Dios rácalenë' nupa ta'guí'i ta'zaca'.
 Ruzötjë' nupa tuá' dö' lu yu.

7 ¡Guli'gul-la queë' Xanru' Dios, guiëli'-në': "Xclenu"!
 ¡Guli'gul-la yöl-la' ba queë' Xanru', quínnili' lë'egaca bihuël-lado'!

8 Riguísië' yugu' böaj lúzxiba,
 en risöl-lë'ë nisa guiöj luyú.
 Runë' ga rilén yö yugu' lu guí'ado'.

9 Rugahuë' yugu' böa' guíxi'do',
 enca' bóiquiajdo' ta'bödxí'aba'.

10 Biti' raza ládxë'ë yöl-la' nál-la queë'ba' böa',
 en biti' ruzi'ë xibé yöl-la' nál-la queë' bönni'.

11 Raza ládxë'ë Xanru' Dios nupa tadxi Lë',
 nupa na' tun löza yöl-la' dxi'i ladxi' queë'.

12 ¡Guli'cu'ë yöl-la' ba Xanru', libí'ili' zóali' Jerusalén!
 ¡Guli'cu'ë yöl-la' ba Dios queë'li', libí'ili' zóali' Sión!

13 Bucu'ë tsutsu le tu'baga' gapa nu riyaza yödzö queë'li',
 en runë' ga raca dxi'a quégaca zxí'inili' ga na' zóali'.

14 Runë' ga ribözali' dxi'a tsáhui'do',
 en runë' ga ruhuölaj ridzé'eli' zxoá' xtila dxí'atërö.

15 Rinná bé'enë' yödzölió ni,
 ate' xtídzë'ë ridóditë gátitës.

16 Risöl-lë'ë guiöj bögui' ca zxila',
 en riguísië' buzén ca dö.

17 Riguísië' bögui' ca yugu' guiöj ruaj.
 ¿Nuzxi caz gaca guá' ilén le naca ziaga queë'?

18 Risöl-lë'ë xtídzë'ë, ate' ruúna' bögui' na'.
 Runë' ga recja bö', ate' ruhuóaca nisa.

19 Ruí'ilenë' zxí'ini xi'sóë' Jacob didza',
 en riguíxjë' xibá queë' para ilún bönachi Israel ca rnna.

20 Biti' benë' caní ni'a quégaca bönachi ia'tú yödzö izá'a,
 ate' biti' nözigaca ca nácagaca le gunná bë'ë.

¡Guli'cu'ë yöl-la' ba Xanru'!

148

1 ¡Guli'cu'ë yöl-la' ba Xanru'!
 ¡Guli'cu'ë yöl-la' ba, libí'ili' zóali' yehua' yubá!
 ¡Guli'cu'ë yöl-la' ba, libí'ili' zóali' xitsá'aló!

2 ¡Guli'cu'ë yöl-la' ba, libí'ili' gubáz lá'ayi queë'!
 ¡Guli'cu'ë yöl-la' ba, libí'ili' tscali' dá'ali' Lë'!

3 ¡Guli'cu'ë yöl-la' ba, libí'ili' gubidza, en beo'!
 ¡Guli'cu'ë yöl-la' ba, libí'ili' bölj bení'!

4 ¡Guli'cu'ë yöl-la' ba, libí'ili' zóali' znan lúzxiba!
 ¡Guli'cu'ë yöl-la' ba, libí'ili' nisa, zxóali' láhuilö lúzxiba!

5 ¡Guli'cu'ë yöl-la' ba La la'ayi queë' Xanru', yúgu'tëli',
 tu' bë'ësë' didza', en canísö benë' libí'ili'!

6 Naguixjë' tsaz libí'ili'.
 Naguixjë' xtídzë'ë le catu caz tödi que.

7 ¡Guli'cu'ë yöl-la' ba Xanru' idútë yödzölió,

en libí'ili' böa' ridali' lu nísado', en nísado' caz,
 8 en libí'ili' guí', en guiöj bögui' yöla sunna, bögui', en böaj,
 enca' li', bö' budunu', runu' ca rnna xtídzë'ë,
 9 en libí'ili' yugu' guí'a, en yúgu'të guí'ado',
 en libí'ili' yaga dxíagaca le ta'bía, en yugu' yaga dxi'a,
 10 en libí'ili' böa' guixi', en böa' bëdxi,
 böa' tá'ayöj lë'ëba' lu yu, en böa' zoa xíligacaba',
 11 enca' libí'ili' rinná bë'ëli' yödzölió, en bönachi yugu' yödzö izá'a,
 yugu' zxí'inigaquië' bönni' ta'nná bë'ë, en bönni' ruchí'a rusöröli' yödzölió,
 12 enca' libí'ili' bi'i bönni', en bi'i nigúlado',
 yugu' bönni' zxön, en yugu' bí'ido'!
 13 ¡Guli'cú'u yöl-la' ba La la'ayi queë' Xanru'
 tu' nayëpisëtëro tuzë' Lë'!
 ¡Nayëpisëtëro yöl-la' ba queë' ca luyú ni, en ca lúzxiba xitsá'!

14 Nuchisë' tu le nuzóa tsutsu bönachi queë',
 le naca yöl-la' ba ta'gú'u Lë' nupa néquiguequi queë',
 yugu' zxí'ini xi'sóë' Israel, nupa na' nadxí'inë'.

¡Guli'cu'ë yöl-la' ba Xanru'!

149

1 ¡Guli'cu'ë yöl-la' ba Xanru'!
 ¡Guli'gul-la queë' Xanru' Dios tu le cubi,
 en guli'gul-la yöl-la' ba queë' ga nudúbigaca nupa néquiguequi quez queë'!

2 Ral-la' ulu'zí' xibë' Xanru' Dios bönachi Israel,
 tu' náquië' Nu ben léguequi.
 Ral-la' ulu'dzéjalen Dios nupa nacué' Sión,
 tu' náquië' Nu rinná be'e léguequi.
 3 Ral-la' ila'gú'u yöl-la' ba La la'ayi queë',
 en lu yöl-la' rudzeja ulu'yá'a lahuë'.
 Ral-la' ilúl-la yöl-la' ba queë', ila'capa' lë'e guídi,
 en ila'quínni lë'egaca bihuél-lado',
 4 tu' raza ládxe'ë Xanru' Dios bönachi queë'.
 Uchisë' nupa ta'guí'i ta'zaca', en usölë' léguequi.
 5 Nupa néquiguequi quez queë' ral-la' ulu'dzeja ládxi'gaca lu bení' queë'.
 Lu yöl-la' rudzeja quéguequi ral-la' ilúl-la queë' cate' ni' dëgaca lu le ráti'gaca.
 6 Yöl-la' ba queë' Xanru' Dios ral-la' sóatica'sö ruí'iguequi,
 en tu guíë tuchi' natuchi' iropa la'a lu ná'agaca,
 7 para ulu'zí' lëbi bönachi yugu' yödzö izá'a,
 en ilún xiguia' bönachi izá'a na',
 8 para ilúguë'ë bregui' guíë ná'agaquië' bönni' ta'ná bé'enë' bönachi yödzö izá'a
 na',
 en ulu'cu'ë bregui' guíë yen ná'agaquië' bönni' lo quégaquië',
 9 para ilunë' quéguequi ca nachuguë' Dios gaca quéguequi.
 Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

150

1 ¡Guli'cu'ë yöl-la' ba Xanru'!
 ¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë!
2 ¡Guli'cu'ë yöl-la' ba ca náca gaca le zxön nunë!
¡Guli'cu'ë yöl-la' ba ca naca yöl-la' zxön queë!
3 ¡Guli'cu'ë yöl-la' ba, ucödxili' lúzugacaba' chivo!
¡Guli'cu'ë yöl-la' ba, quínnili' lë'egaca bihuël-la ca'!
4 ¡Guli'cu'ë yöl-la' ba, cápa'li' lë'e guídi, en uya'ali'!
¡Guli'cu'ë yöl-la' ba, quínnili' lë'egaca bihuël-la, en ucödxili' gui!
5 ¡Guli'cu'ë yöl-la' ba, utíl-lali' guië lë'e luzé'e!
¡Guli'cu'ë yöl-la' ba, utíl-lali' guië zxön lë'e luzé'e!
6 ¡Guli'cu'ë yöl-la' ba Xanru', tscali' rizí'ili' bö'!
¡Guli'cu'ë yöl-la' ba Xanru'!

DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönachi Israel, ate' butsaga ná'alene'-nu nigula na' gúcanu zí'aló nigula queë' Urías, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acáz.

Acáz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queënu María, ate' María ni gúcanu xinë'ë Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'ché'ë léguequi ga bidxintë dza guljë' Cristo.

*Yugu' le guca cate' guljë' Jesucristo
(Lc. 2:1-7)*

¹⁸ Caní guca cate' guljë' Jesucristo. Cate' ni' chinazí' lu ná'abi' María, xinë'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'aleni'-bi' bagáchi'sö. ²⁰ Tsanni ni' rizá' lédxë'ë José ca na' gunë', buluí'i lahuë' gubáz lá'ayi queë' Xanru' lahuë' José lu yëla béchigal, en gudxë' lë':

—José, zxi'ini zxi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. ²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca', tu nigula ra'bando',
tsú'ubi' bí'ido' lë'ëbi',
ate' gáljabi' tubi' bi'i bönni'do',
ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴ Cate' hubanë' José lu yëla béchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵ Biti' guzóaleni'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

¹ Cate' gúljabi' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. ² Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' bölaj bení' naca bë' chigúlajbi', ate' za'tu' ni para tseaj lédxi'tu'-bi'.

³ Cate' gúquibe'enë' Herodes, bönni' rinná bë'ë, lë ni, gurö'ödë' böniga, en lësca' caní gula'bö' böniga yúgu'të bönachi nacua' Jerusalén. ⁴ Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjë' Cristo, bönni' na' tunë' löza bönni' judío ilá' lahuë' para inná bé'enë' légaquië'. ⁵ Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

⁶ Biti' nácarö cá'asö yödzo Belén luyú Judá lahuë' Dios ca nácgaca yödzo gapa nacua' nupa ta'nná bë' luyú ni, tu' irúajë' tu bönni' yödzo Belén, en gáquië' lo, bönni' na' gun chi'ë bönachi Israel quia'.

⁷ Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca'xte chiguca bulu'i lahui böljaj na' bila'lé'enë'.

⁸ Ní'irö gusöl-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queëbi' bí'ido' na'. Cate' chibidzölili'-bi', ididíxjöi'ili' neda', para tseja' ca' neda', tseaj ládxa'a-bi'.

⁹ Gudödi bila'yönnë' didza' bë'ë Herodes na', sójáquië' bönni' ta'yéajni'inë' na', ate' böljaj na' bila'lé'enë' cate' ni' nacu'ë ládzagaquië' söjnöruba' lógaquië' ga bidxintë yöjsóa ga na' dëbi' bí'ido' na'. ¹⁰ Cate' bila'lé'enë' böljaj na', bulu'dzéjade'enë'. ¹¹ Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládxi'gaquië'-bi'. Gudödi na' gula'saljë' yugu'yöxaj quégaquië', ate' bulu'nödziejë' queëbi' oro, en yalaj, en nörido' rilá' zxixi que yaga mirra. ¹² Tu' chibuzéajni'inë' Dios légaquië' lu yëla bëchigal para cabi tsöjhuöjquië' ga zoë' Herodes na', que lë ni na' yöjhuöjquië' ládzagaquië' nöza yúbölö.

José, en María, ta'chë'ë-bi' Jesús luyú Egipto

¹³ Gudödi bulu'zë'ë yugu' bönni' ta'yéajni'inë' ni', bulu'i lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzunnaj ni. Guyéaj luyú Egipto, ate' ugá'anu' ni' cate' guiëra' li' ia'tú. Cani' gunu' tu' uguiljë' Herodes bí'ido' ni para gútië'-bi'.

¹⁴ Ní'irö guyasë' José, en ni' naca chi'i dzö'ölö, guchë'ë-bi' bí'ido' na', enca' xiná'abi', ate' yöjáquië' luyú Egipto. ¹⁵ Bulu'gá'anë' ni' cate' gútië' Herodes. Cani' guca para gaca lë na' gunné' Xanru' Dios lu ru'ë tu bönni' bë'ë didza' uláz queë', gunné': "Ga naca luyú Egipto bulidza' Zxí'ina'."

Risöl-lë'ë Herodes bönni' ilútië'-bi' bi'i huë'ënido' nacuá'abi' yödzö Belén

¹⁶ Cate' gúquibe'enë' Herodes biti' gulunë' bönni' ta'yéajni'inë' ca rnnë', gulënë', ate' gunná bé'enë' bönni' tsójáquië' ni' para ilútië'-bi' yúgu'tëbi' bi'i bönni'do' nacuá'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido' nahuë'ë'nigacaröbi'. Cani' benë' ca busáquië' queë' Herodes na', tsca chiguca dza bulu'i lahui böljaj na', dza na' bulu'zéajni'inë' bönni' ta'yéajni'inë' na' lë'. ¹⁷ Cani' guca, bidxín lë na' gunné' Jeremías, bönni' bë'ë didza' uláz queë' Dios, gunné':

¹⁸ Lu yödzö Ramá riyön chí'igaca

nupa ta'bödxi, en nupa ta'bödxi yechi'.

Raquel ribödxi nu ni'a quégacabi' zxí'ininu.

Biti' gaca nu huë tsahui' lënu, tu' chinátigacabi'.

¹⁹ Gudödi gútië' Herodes na', ní'irö bulu'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

²⁰—Guyasa. Guchë'-bi' bi'i bönni'do' ni, enca' xiná'abi', ate' böaj luyú Israel, tu' chigulátië' bönni' ni' gulë'ënnë' ilútië'-bi' bi'i bönni'do' ni.

²¹ Ní'irö guyasë' José, ate' guchë'ë-bi' bi'i bönni'do' na', enca' xiná'abi', ate' yöhuöjquië' luyú Israel. ²² Cate' gúquibe'enë' José rinná bë'ë Arquelao luyú Judea tu' chigútië' Herodes, xuzë' Arquelao na', que lë ni na' gúdxinë' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea.

²³ Cate' bidxinë' ni', yöjsóë' lu yödzö Nazaret. Cani' guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea. ² Juan na' rnnë':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxi'do'oli'.”

⁴ Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'. ⁵ Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. ⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilé' nisa, gudxë' légaquië':

—Libí'ili', di'a dza quégacaba' bëla sínia'. ¿Zoa nu buzéajni'i libí'ili' para izxúnnajli' yöl-la' rusiúdxí na' si' gaca quégaca bönachi? ⁸ Guli'gún le gaca bë' chibubí'i ládxi'li'. ⁹ Biti' cuéqui ícjali', bití' innali' nácali' tsahui' tu' naca Abraham xuz gudödi queéli'. Rea' libí'ili', huáca gunë' Dios ga ulu'huóaca yugu' guiöj nacua' ni di'a dza queë' Abraham. ¹⁰ Chizóa riböza guíë huága para ichugu yugu' yaga le ruluí'i ca gaca queéli'. Yúgu'të yaga bití' ta'bía le naca dxi'a, irúgugaca, ate' ila'gu'ë léguequi lu guí'. ¹¹ Le nácatë neda' ruquila' libí'ili' nisa lu nisa, núlöli' chibubí'i ládxi'li', pero Bönni' na' ral-la' guíde' cate' tödi quia' neda', Lë' gunë' le ruluí'isö yöl-la' ridila nisa ni, uchízië' libí'ili' Dios Bö' Lá'ayi len guí' queë'. Bönni' ni nácatërë' lo ca neda', ate' neda' bití' naca' lesaca' ilecja' xiráchuë' nudë'ë. ¹² Zönë' lu në'ë böcö' queë', le ulúbinë' ga ridxi'a zxoa' xtila queë'. Cu'ë zxoa' xtila queë' lu yu'u ga ni' gun chí'ë le, pero uzégui'ë bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. ¹⁴ Juan buzáguë'ë xinözë', en rë' Jesús:

—Neda' ral-la' idila' nisa lu no'o Lí'. ¿Za'tso' Lí' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idútë le naca tsahui'.

Ní'irö Juan bë'ë Lë' lataj. ¹⁶ Cate' chinadilë' Jesús nisa, la' burúajtë' lu nisa. Ní'irö gualaj lúzxiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dödo'. ¹⁷ Ní'irö biyón chí'i nu ruí'i didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla bití' bi gudahuë' Jesús, ate' gudödi ni' ridunë'.
³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huöáca guiöj nacué' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'. ⁶ Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li',
 ate' ulu'chisé' Li' lu ná'agaquië',
 para cabí tsöjchégu'u guiöj, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Bití' ugunu' dxin Xanu' Dios.”

⁸ Ní'irö tu' xihui' guchë' Jesús ga naca tu lu guí'a sibi, ate' ni' buluí'i Lë' yúgu'të yödzö nacué' yödzölió ni, en yúgu'të yöl-la' tsahui' quéguequi. ⁹ Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxi'u, en udödi cuinu' lu na' tuzë' Lë'.”

¹¹ Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi guië, guyijë' luyú Galilea.

¹³ Buzë'ë yödzö Nazaret, ate' yöjsöë' lu yödzö Capernaum ga naca ra' nísado', lu buzá' quégaca bönachi Zabulón, en bönachi Neftalí. ¹⁴ Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

¹⁵ Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacué' bönachi bití' nácagaca judío.

¹⁶ Bönachi chul-la niti ni' bila'lé'e bení',
 ate' bönni' ni' nácagaquië' ca nupa chinátigaca, gulén quégaquië' bení'.

¹⁷ Cate' ní'irö gusí lahuë' Jesús runë' libán, en rë' bönachi ni':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

Jesús rulidzë' tapë' bönni' uzxön böla para tsöjtá'gaquië' Lë'

(Mr. 1:16-20; Lc. 5:1-11)

¹⁸ Cate' gudë' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' böchë'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxön böla. ¹⁹ Jesús rë' légaquië':

—Guli'dutá' neda', ate' guna' ga ichë'ëli' bönachi quia', gunli' ca runli' rizönli'-ba' böla.

20 Chopë' ni la' bulu'cá'anatë' yugu' yöxaj böla quégaquië', ate' sôjâcalenë' Jesús.

21 Cate' gudödë' Jesús ia'lati' ní'ilö, bilé'enë' ia' chopë' bönni'. Tuë' lë' Jacobo, ate' dzáguië' Juan, bönni' böchë'ë lë'. Nácagaquië' zxi'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'. 22 La' bulu'cá'anatë' bárcodo' na', enca' xúzgaquië', ate' sôjâcalenë' Jesús.

Jesús rusédinë' bönachi zían
(Lc. 6:17-19)

23 Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sedë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsca naca yödzöhuë' té'eguequi. 24 Guzë didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzöhuë' que queégaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. 25 Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsölá'alö yegu Jordán saca' ga rilén gubidza, ate' rójâcalen Jesús.

5

Libán benë' Jesús ga naca lu guí'ado'
(Lc. 6:20-23)

1 Cate' bilé'enë' Jesús bönachi zían sôjâcalen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'. 2 Gusí lahuë' rusédinë' légaquië', rnnë':

3 —Bica' ba yugu' bönni' téquibe'enë' ta'yádzjanë' le naca queë' Dios, tu nadéli'gaquië' lataj ga rinná bë'ë Bönni' na' zoë' yehua' yubá.

4 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu huë tsahuë'ë Dios caz légaquië'.

5 'Bica' ba yugu' bönni' nácagaquië' nöxaj ladxi' lahuë' Dios, tu' gata' quégaquië' luyú ni.

6 'Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zë ládxi'gaquië'.

7 'Bica' ba yugu' bönni' tu'huechi' ládxi'gaquië' luzá'agaquië', tu' huechi' ládxi'ë Dios légaquië'.

8 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

9 'Bica' ba yugu' bönni' ta'bequi dxië' didza' bizxaj, tu' ila'zí' lágagaquië' zxi'ini cazë' Dios.

10 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

11 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizi' yë' ta'nnë' queéli' le xihui' tu' dá'ali' neda'.

12 Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

Bönachi dá'gaca Cristo ilaca ca zödi', en ca bení'
(Mr. 9:50; Lc. 14:34-35)

¹³ Gunné' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, bití' gaca gunru' ga huó'aca siná'a. Bítí'rö naca lesaca', pero chinaca tu le chú'unaru', ate' ulu'libi bönachi le.

¹⁴ Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí gaca igachi' yödzö na'. ¹⁵ Cate' ruquéla' ru' guí', bití' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacua' lu yu'u. ¹⁶ Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

¹⁷ Gunné' ca' Jesús:

—Bití' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'. ¹⁸ Le nácatë rea' libí'ili'. Tsanni nacua' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. ¹⁹ Que lë ni na', nútí'tës bönni' quítsjë' tu xibá cuídí'do'os le zoa lu xibá na', en usédinë' bönachi para ilún caní, bönni' ni gácatërë' cuídí'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútí'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. ²⁰ Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

Rusédinë' Jesús ca naca que nu rilé luzë'e
(Lc. 12:57-59)

²¹ Gunné' ca' Jesús:

—Chibiyónili' ca gula'nnë' bönni' guta' lu ná'agaquië' le gulë' xuz xtó'oli': "Bití' gútili' bönachi. Nu bönni' gútië' bönachi, nabáguë'ë xíguia', ate' huadxiné' ga uchi'a usöröë' Dios lë'." ²² Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxiné' ga uchi'a usöröë' Dios lë'. Lësca' caní, nu bönni' innë' zì'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guié' luzë'ë: "¡Böa' canöz!" nabáguë'ë xíguia' tsöjtsu'ë lu guí' gabila.

²³ 'Caní naca, channö chizóa cu'u tu le unödzju' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li', ²⁴ bucá'ana lë na' unödzju' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzju' lë na' nu'u.

²⁵ 'Channö zoa nu bönni' rinábinë' li' bi ubi'u queë', en ichë'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nöza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guié, ate' lë' cu'ë li' lidxi guié na'. ²⁶ Le nácatë rea' li', bití' ca' uruju' ni' cate' idxinrö dza quizxju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

²⁷ Gunné' ca' Jesús:

—Chibiyónili' ca na' gula'nnë': "Bití' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Nútí'tës bönni' ruyúë' tu nigula len yöl-la' rizë' ladxi' le ruá' dö', chibenë' dul-la' len lënu lu icja ládxi'da'ahuë'.

29 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítii' tu guiöj lo', en calëga idúteo' tsöjtsú'u lu guí' gabila. 30 Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítii' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'
(Mt. 19:9; Mr. 10:11-12; Lc. 16:18)

31 Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." 32 Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

33 Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídz'u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídz'u ni'a queë' Lë'." 34 Na'a, neda' rea' libí'ili', biti' ca' gun tsutsu xtídz'a'li'. Biti' gun tsutsu xtídz'a'li' ni'a que yehua' yubá, tu' naca ga rö'ë rinná bë'ë Dios. 35 Biti' gun tsutsu xtídz'a'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bë'ë. 36 Biti' gun tsutsu xtídz'u ni'a que icju', tu' cabí gaca gunu' ga huöáca chiguichi o gasaj nitú guitsa' icju'. 37 Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácagaca didza' ni.

Rusédinë' Jesús ca naca que nu ruzí' lëbi luzë'e
(Lc. 6:29-30)

38 Gunnë' ca' Jesús:

—Chibiyönili' ca naca le gunná bë'ë Moisés, gunné': "Nu bi run que guiöj lahui luzë'e, ubí'i ca' que, enca' nu bi run que layi' luzë'e, ubí'i ca' que." 39 Na'a, neda' rea' libí'ili': Biti' tá'baga'li' nu guá' dö' queëli', ate' channö nu capa' xagu' ibëla, bë' lataj capa' ca' ia'tú xagu' yögöla. 40 Channö zoa nu gun ga uchi'a usöröë' tu bönni' li', en cuë' zxo', bë' ca' queë' lari' rixóa cúdzu'u. 41 Channö zoa nu gun bayudxi gu'u yua' que tu chi'i, guyéajlen nu na' chopa chi'i. 42 Nu bi rinábini li', bunödzej que, en nu bi guë'ëni gunnu' que tu chi'i, biti' tá'bagu'u lë na' inabi li'.

Rusédinë' Jesús ca ral-la' idxí'iru' nupa biti' ta'lé'e rë'u dxi'a
(Lc. 6:27-28, 32-36)

43 Gunnë' ca' Jesús:

—Lësca' caní biyönili' lë na' gula'nnë': "Ral-la' idxí'inu' nu nadxí'i li', en udí'inu' nu biti' rilé'e li' dxi'a." 44 Na'a, neda' rea' libí'ili', guli'dxí'i nupa biti' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'në' gunë' ga gaca dxi'a quégaca nupa ta'nnë' queëli', en tuá' dö' queëli'. 45 Channö gunli' caní, gácali' xzí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacué' bönachi tuá' dö', enca' ga nacué' bönachi tsahui'. Risöl-lë'ë tu nisa guiöj lu yu quégaca bönachi tsahui', enca' lu yu quégaca bönachi biti' nácagaca tsahui'. 46 Channö nadxí'isili' bönni' nadxí'iguequinë' libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' biti' nácagaca tsahui' na', bönni' tu'quizxjë' uláz que yödzo zi'tu',

nadxi'iguequinë' luzá'agaquië'. ⁴⁷ Channö rugápali' Dios tuzë' böchi' luzá'ali', ¿bizxi caz runli' le nácatërö dxi'a? Lësca' caní tunë' bönni' biti' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesús ca ral-la' gácalenru' bönachi

¹ Gunnë' ca' Jesús:

—Guli'güí ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, biti' bi gunnë' Xúziru' Dios zoë' yehua' yubá queëli'. ² Cate' bi unödzu' que nu bi riyadzaj, biti' gunu' ga ilá' lahui lë na' runu' ca tunë' bönni' tu'lu'isö tsahui' cuíngaquië' ga naca lu yu'u ga tu'dubë' bönni' judío, en tu'sëdë' queë' Dios, enca' ga naca lu yë'ëyi. Caní tunë' para ila'gú'u bönachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégaquië'. ³ Pero li', cate' bi unödzu' que nu bi riyadzaj, biti' ca' gu'u lataj nu inözi. ⁴ Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë ubi'ë quiu'.

Rusédinë' Jesús ca ral-la' ulídzaru'-në' Dios (Lc. 11:2-4)

⁵ Gunnë' ca' Jesús:

—Cate' ulídzali'-në' Dios, biti' gunli' ca tunë' bönni' tu'lu'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yë'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë ubi'ë queëli'.

⁷ Cate' ulídzali'-në' Dios biti' gunli' la' yë'ëyi la' lez ca na' tunë' bönni' biti' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yë'ëyi la' lez. ⁸ Biti' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinöz quézinë' le riyadzaj queëli'. ⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li'
ca na' raza yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'
ca runtu' netu', runiti lotu' nupa bi tun queëtu'.

¹³ Biti' gu'u lataj si' bë' tu' xihui' netu',
pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní ré'ënitú' gácatíca'sö. ¡Ca' gaca!

¹⁴ Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', biti' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

—Cate' gunli' gubasa, biti' gunli' bayechi' loli' ca tunë' bönni' tu'lu'isö tsahui' cuíngaquië', tu' tunë' bayechi' lógaquië' para iléquiibe'e bönachi tunë'

gubasa. Le nácatë rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli'pá'a ícjali', en guli'quibi loli', ¹⁸ para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queëzili', Lë' ubi'ë queëli'.

Yehua' yubá ral-la' utúbiru' yöl-la' tsahui' queëru'
(Lc. 12:33-34)

¹⁹ Gunnë' ca' Jesús:

—Biti' utúbili' yöl-la' tsahui' luyú ni, ga ni bélado' que tu'töba' le, ate' raca ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá, ga ni' bélado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'. ²¹ Ga ni' dë yöl-la' tsahui' queëli', ni' güi'i ládxi'li' idxinli'.

Le rigú'u bení icja ládxi'do'oru'
(Lc. 11:34-36)

²² Gunnë' ca' Jesús:

—Guiöj loru' naca ca tu le rigú'u bení icja ládxi'do'oru'. Que lë ni na', channö guiöj loli' naca tsahui', idútëli' tsépili' yösa bení. ²³ Channö guiöj loli' bití' naca tsahui', idútëli' nachúl-lali'. Que lë ni na', channö bení zóalen libí'ili' nuhuóaca le naca chul-la, yënni'tërö nachúl-lali'.

Dios, en dumí
(Lc. 16:13)

²⁴ Gunnë' ca' Jesús:

—Cuntu nu bönni' gaca gunë' xichíngaquië' chopá xané', tu' uzóë' tuë' tsölá'alö, ate' ia'tué' na' idxí'inë', o ugá'analënë' tuë', ate' ia'tué' na' usán ládxi'ë. Biti' gaca gunli' xichinë' Dios, enca' dumí.

Dios rapa chi'ë nupa néquiquequi queë'
(Lc. 12:22-31)

²⁵ Gunnë' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queëli' ca le gáguli', ate' nácatërö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en bití' tu'lápaba', en bití' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rő'gaca la' guixi' ca ta'zxön. Biti' tun dxin, en bití' tun du lari'. ²⁹ Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'. ³⁰ Dios caz runë' lachi yöj guíxi'do', le rő'gaca la' guixi', le nacúa' na'a dza, ate' cuxö huidzaj ila'yegui lu guí'. Channö caní ruí'i ládxi'ë yöj guíxi'do', runë' léguequi lachi, gúnda'arë' ca' queëli', sal-la' bití' réajlé'ëli'-në' idú ládxi'li'. ³¹ Que lë ni na', bití' ubi uguí'ili', en bití' innali': “¿Bizxi gágutsatu?” o “¿Bizxi guí'jatsatu?” o “¿Bizxi lari' gácutsatu?” ³² Bönachi yödzölió ni tu'úbi tu'guí'i ni'a que yúgu'të lë ni, pero zoë' Xúziru' yehua' yubá, ate' Lë' nözinë' naquínili' yúgu'të lë ni. ³³ Na'a, guli'güi'irö ládxi'li' inná bë'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. ³⁴ Que lë ni na', bití' ubi uguí'ili' ni'a que le ral-la' gaca cuxö huidzaj, tu' huáca güi'i ládxi'li' cuxö huidzaj le gaca queëli' dza na'. Tu tu dza ilaca le ral-la' güi'i ládxi'li' dza na'.

7

Biti' ral-la' ichugu bë'ëru' böchi' luzá'aru'
(Lc. 6:37-38, 41-42)

¹ Gunnë' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queëli', ² tu' ichugu bë'ë Lë' queëli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asó urixi udödë' Dios queëli'. ³ ¿Bizx que ruyú' bëbudo' yu'u guiöj lahuë' böchi' luzó'o, en biti' réquibe'enu' yu'u le zxöntëro guiöj lo' li'? ⁴ ¿Guíëtso' böchi' luzó'o: “Gulöz, cueja' bëbudo' yu'u guiöj lo'”, ate' li', le zxöntëro ca' yu'u guiöj lo' li'? ⁵ Li', bönni' rulu'isó tsahui' cuinu'. Guléaj zí'aló le zxön yu'u guiöj lo' li', ate' ní'rö ilé'enu' tsáhui'do' para gaca cueju' bëbudo' yu'u guiöj lahuë' böchi' luzó'o.

⁶ 'Biti' güi'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u
(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idzöli queëli'. Buli'lidza ra' yu'u, ate' Lë' isaljë' queëli'. ⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ 'Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzjë'-bi' guiöj? ¹⁰ Channö inábibi' lë' tuba' böla, ¿naru' unödzjë'-bi' bëla? ¹¹ Libí'ili' nácali' huiá' dö', pero nözili' unödzjali' zxí'inili' le naca tsahui'. Nácatëro löza, Xúzili' zoë' yehua' yubá unödzjë' nupa ta'nábini Lë' le naca dxi'a.

¹² 'Que lë ni na', ca na' rë'enili' ilún bönachi queëli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'
(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zían ni'. ¹⁴ Tsúpi'do' naca ga nu riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'
(Lc. 6:43-45)

¹⁵ Gunnë' ca' Jesús:

—Guli'gún chi'i cuinli' para cabí ila'zí' yé'enë' bönni' ta'zí' yëë libí'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'lu'i cuíngaquië' nöxaj ládxi'do' ca nácacacaba' bö'cu' zxíla'do', pero lu icja ládxi'do'gaquië' nácaquië' ca bö'cu' guí'a sínia'. ¹⁶ Yugu' le tunë' ilaca bë' le nácaquië'. Biti' ruchíbiru' le ribía lubá uva lu yaga yötsi', en biti' ruchíbiru' le ribía yaga higo lu guixi' legui lásido'. ¹⁷ Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. ¹⁹ Yúgu'të yaga bití' ta'bía le naca dxi'a ila'rugu, ate' ila'gu'ë léguequi lu guí'. ²⁰ Caní naca, yugu' le tunë' bönni' na' ilaca bë' le nácaquië'.

Nupa biti' ila'yázië' ga rinná bé'ë Dios
(Lc. 13:25-27)

²¹ Gunnë' ca' Jesús:

—Zian nupa të neda': "Xan, Xan", pero calëga yúgu'të' ila'yázië' ga rinná bé'ë Dios yehua' yubá. Ila'yázasë' ni' bönni' tunë' ca rë'ënë' Xuza' Dios, zoë' yehua' yubá. ²² Cate' idxín dza údxí que yödzülió ni, bönni' zían ilé' neda', ila'nnë': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxon." ²³ Ní'irö neda' guía' légaquië': "Biti' ca' núnbë'a libí'ili'. Guli'cuíta ga zoa', libí'ili' ruá'ali' dö'."

Chopa ca gaca udxíaru' xilibi zö'ö
(Lc. 6:47-49; Mr. 1:22)

²⁴ Gunnë' ca' Jesús:

—Ia'stú ca', nu bönni' riyönnë' xtídzá'a ni, en gunë' ca rnna, bönni' ni náquië' ca tu bönni' réajni'inë', budxië' lidxë' ga naca lu guiöj. ²⁵ Cate' gulaj guiöjsiu', en guzxón yegu gubó'o, en guyecja bö', gudibi nisa cuita yu'u na', pero biti' gubixi, tu' dxía xilibi lu guiöj. ²⁶ Na'a, nu bönni' riyönnë' xtídzá'a ni, en biti' runë' ca rnna, bönni' ni náquië' ca tu bönni' biti' réajni'inë', budxië' lidxë' lu yu dzöbi. ²⁷ Cate' gulaj guiöjsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxité, en tsaz biguinnaj.

²⁸ Cate' Jesús budxi bé'lenë' légaquië' didza' ni, bulu'bani bönachi zían nacuá' ni' ca naca le rusédinë', ²⁹ tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quëgaquië'.

8

Ruhuöáquië' tu bönni' ré'enë' huë' nudzu' ruzödi
(Mr. 1:40-45; Lc. 5:12-16)

¹ Cate' bötjé' Jesús lu guí'a na', söjácálen bönachi zían Lë'. ² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö rë'ënu', huáca unu' neda'.

³ Ní'irö Jesús la' bulité në'ë, en gudanë' lë'. Rë' lë':

—Rë'ënda'. Huöácu' dxi'a.

La' bunítité xihuë'ë bönni' huë' na'. ⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnödzej le gunná bé'ë Moisés le uluí'i bönachi chiböácu'.

Jesús ruúnë' bi'i huen dxin queë' tu bönni' rinná bé'ë lu gudil-la
(Lc. 7:1-10)

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' röjáquië' gudil-la, ate' gúta'yuë' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacu'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús: —Xan, biti' naca' zi tsáziu' lidxa', pero tsa innasu' quia', ate' huöácabi' bi'i huen dxin quia'. ⁹ Lësca' neda', zoa nu rinná be'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë': "Guyéaj ni", rejë'. Cate' rea'-në' ia'túë': "Gudá ni", ridë'. Cate' rea'-në' bönni' huen dxin quia': "Ben dxin ni", la' runtë' dxin na'.

¹⁰ Cate' biyönnë' Jesús didza' ni, bubáinë', ate' gudxë' bönni' sôjácálenë' Lë', rnnë':

—Le nácatë rea' libí'ili', ga nacuá' bönachi Israel, cuntu nu bönni' rójxéqui'da'-në' réajlë'ë neda' ca runë' bönni' ni. ¹¹ Ia'stú rea' libí'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxön Abraham, en Isaac, en Jacob, yehua' yubá ni' ga rinná bë'ë Dios, ¹² pero yugu' bönni' na' guró cazë' Dios para ila'yázië' ga na' rinná bë'ë Lë', chú'unë' légaquië' ní'lö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhuí'ini quégaquië'.

¹³ Ní'irö Jesús gudxë' bönni' na' rinná bé'enë' bönni' rójáquië' gudil-la, rnnë': —Böaj lidxu'. Ca na' réajlë'u, ca' gaca quiu'.

La' ná'asö böácátëbi' bí'i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunödžjanu le gulahuë'.

Jesús ruúnë' zían nupa te'e

(Mr. 1:32-34; Lc. 4:40-41)

¹⁶ Cate' chiridzö' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e. ¹⁷ Caní guca para gaca ca na' gunné' Isaías, bönni' bë'ë didza' uláz queë' Dios, gunné': “Lë' bu'ë yugu' le rizáca'ru', en bu'ë ca' yugu' yödzöhuë' queëru'.”

Nupa gulë'ëni tsöjácálen Jesús

(Lc. 9:57-62)

¹⁸ Cate' bilé'enë' Jesús nacuá' bönachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'. ¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gátitës ga tseju'.

²⁰ Jesús rë' lë':

—Yugu' böza' nacuá' zıan guiöj quégacaba', ate' yugu' biguínido', nudxiagacaba' xicá'agacaba', pero neda', Bönni' Guljë' Bönachi, bití dë ga quíxaj icja'.

²¹ Ia'túë' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

²² Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquië'.

Jesús ribequi dxíë' bö' budunu'

(Mr. 4:35-41; Lc. 8:22-25)

²³ Gurenë' Jesús lë'e bárcodo', ate' dzágagaquië' Lë' bönni' usëda queë'. ²⁴ Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza nisa lë'e bárcodo' na'. Dë' rásie' Jesús lë'e barco na'. ²⁵ Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë': —Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi. ²⁷ Bulu'báinë' bönni' na', ta'nnë':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'
(Mr. 5:1-20; Lc. 8:26-39)

²⁸ Cate' bidxinë' Jesús ia'tsölá'a nísado' ga na' naca lu xiyú yödzö Gadara, bila'rúajë' chopë' bönni' ga nacua' ba quegaca nupa nátigaca, dutságagaquië' Jesús. Nácagaquië' sínia', ate' cuntú nu gaca tödi la' nöza ni'. ²⁹ La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxi'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

³⁰ Ga ni' nacué' nacua'aba' cuchi zían ta'daba' táguba', nacua'aba' láti'do' ga naca zi'tu'. ³¹ Gula'naba yechi' bö' xihui' na' Jesús, en té Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

³² Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zían ni'.

Ní'irö yúgu'tëba' cuchi zían na' yöjbíxítëgacaba' ga naca lë'e guiöj, en yöjcházagacaba' lu nísado', ga ni' gula'yëpiba' nisa, en gulátiba'.

³³ Guládxinë' bönni' tu'yúë'-ba' cuchi na', ate' bulu'zxúnnajë'. Cate' bila'dxinë' lu yödzö, gula'guíxjö'ë yúgu'të lë na' guca quegaquië' bönni' ni' gula'yú'u bö' xihui' légaquië'. ³⁴ Ní'irö bila'rúaj bönachi lu yödzö ni', yöjtságagaquië' Jesús. Cate' bila'lë'enë' Lë', guláta'yue' lahuë' uzë'ë lu xiyúgaquië' na'.

9

Jesús ruúnë' tu bönni' nacú'unië' bin

(Mr. 2:1-12; Lc. 5:17-26)

¹ Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. ² Ni' dujuá'gaquië' tu bönni' nacú'unië' bin ga zoë' Jesús, xzoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxi'u, zxi'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': "Didza' ru'ë bönni' ni ruzóa Dios tsölá'alö."

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'? ⁵ Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga huóásë', en uzé'enë'. ⁶ Na'a, uluí'ida' libí'ili' neda', Bönni' Guljé' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'. ⁸ Cate' bila'lë'enë' bönni' nacué' ni' lë ni, bulu'bánninë', ate' gula'gu'ë Dios yöl-la' ba tu' bunödzjë' yöl-la' huáca caní quegaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquízxjë' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quízxjë', en yugu' bönni' cá'asö bila'dxinë' ga zoë', ate' gula'bö'lenë' Jesús

tsözxõn len yugu' bönni' usëda queë'. ¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxõn bönni' tu'quíxjë', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. ¹³ Guli'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴ Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití' tunë' gubasa?

¹⁵ Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacué' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacué'. Dza ní'irö ilunë' gubasa.

¹⁶ Bucúdzü'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichõza'rö lari' tëbi na'. ¹⁷ Lë'sca' caní, cuntu nu bönni' rigué'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzzuxxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë taca chi'i.

Rubanbi' bi'i nigula queë' Jairo, en ruhuöácanu tu nigula gudannu lari' nácuë' Jesús

(Mr. 5:21-43; Lc. 8:40-56)

¹⁸ Tsanni ni' Jesús ru'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxibë' lahuë' Jesús, en rë' Lë':

—Bi'i nigúlado' quia' la' gútitébi'. Gudá ixóa no'o lëbi', ate' ubanbi'.

¹⁹ La' guzuítënë' Jesús, en sa'yéajlenë' lë'. Dzágagaquië' bönni' usëda queë' Lë'.

²⁰ Ní'irö bidxinnu tu nigula zaca' cúdzü'lë' Jesús, chiguca chinnu iz ré'enu, bití' ruhuí'i rön queënu que huë' quégaca cázanu nigula, ate' gudannu lari' nácuë' Jesús. ²¹ Caní bennu tu' rizá' ládxi'nu, rnnanu: Channö cansa' zxë', huóaca'. ²² Ní'irö buécjë' Jesús, en ruyúë' lënu, ate' rë'ë-nu:

—Butipa ládxi'u, zxi'ina'do'. Chiböácateu' tu' réajlë'u neda'.

La' ná'asö böácatënu.

²³ Cate' bidxinë' Jesús lidxë' bönni' unná bë' na', bilé'enë' nacué' ni' bönni' tu'cödxë' gui, en nupa ta'bödxi yechi'. ²⁴ Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacué' ni' bulu'titaj Lë'.

²⁵ Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. ²⁶ Guzë didza' ca guca lë ni, ate' bila'yöni bönachi nacué' idútë luyú na'.

Jesús ruúnë' bönni' nachul-la guiöj lógaquië'

²⁷ Cate' Jesús burúajë' ni', chopë' bönni' nachul-la guiöj lógaquië' sójacalenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queé'li'.

³⁰ La' böáljatë' guiöj lógaquië'. Ní'irö Jesús buzenë' bach légaquië', rnnë':

—Guli'güi'ítica'sö ládxi'li' cuntu nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bábinë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxi'ë bönachi zían

³⁵ Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'. ³⁶ Cate' Jesús bilé'enë' bönni' zían ni', buéchi' ládxi'ë légaquië', tu' ta'guí'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légacaba'.

³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. ³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí'i ta'zaca'.

² Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),

Andrés, (böché'ë Simón na'),

Jacobo, (zxí'inë' Zebedeo),

Juan, (böché'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ruí'i ládxi'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

Jesús risöl-lë'ë gubáz queë' tsöjéngaquië' libán
(Mr. 6:7-13; Lc. 9:1-6)

⁵ Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacué' bönachi biti' nácagaca judío, en biti' tsú'uli' ládzagaca bönachi nacué' luyú Samaria. ⁶ Guli'tséaj ga nacué' bönachi Israel, nácagaquië' ca bö'cu' zxíla'do' nanítigacaba'. ⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bë' ni. Buli'gún dxin le, en biti' bi uquié'xjali'.

⁹ Biti' bi guá'ali' lu buzudi queëli', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yöxaj yöta queëli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queëli', tu' idzöli quézínë' bönni' huen dxin le gahué'.

¹¹ Gátitës yödzö zxön o yödzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'. ¹² Cate' tsú'uli' tu lu yu'u, buli'gapa Dios bönachi nacué' lu yu'u na', inábili'në' Dios unödziejë' quégaquië' le cuéqui dxi icja ládxi'do'gaquië'. ¹³ Channö bönachi nacué' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi. ¹⁴ Gátitës ga idxinli' ga bönachi ni' biti' ilún libí'ili' bal, en biti' ulu'zë nagui xtídza'li', buli'rúaj lu yu'u ni' o yödzö ni', ate' guli'cuíbi bëchtö da' lë'e lábali', le ulu'i léguequi nabága'gaca xíguia'. ¹⁵ Le nácate' rea' libí'ili', cate' idxín dza ichúguië' Dios quégaca bönachi, ila'guí'ila'zaca'rö bönachi yödzö na' ca ila'guí'ila'zaca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

Nupa biti' ta'yéajlë' ulu'saca' zi' nupa dá'gaca Cristo

¹⁶ Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxi' ca nácagacaba' gu'dödo'. ¹⁷ Guli'gún chi'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios. ¹⁸ Lësca' caní, ila'chë'ë libí'ili' lógaquië' bönni' lo, en lógaquië' bönni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquië' bönni' ni', en lógaquië' bönni' biti' nácagaquië' judío. ¹⁹ Ní'irö cate' ulu'dödë' libí'ili' lu ná'agaquië' bönni' unná bë' na', biti' cö'öli' böniga nacxi innali', tu' ichizë' Dios icja ládxi'do'oli' didza' güi'ili', en ca innali' la' dza ná'asö. ²⁰ Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queëli', Lë cazë' sóalenë' libí'ili', en gu'ë didza'.

²¹ 'Ila'cuá' bönachi ulu'dödi böchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxí'inigaquië', ate' ila'cuá'abi' bi'ila'dá'baga'bi' xúzgacabi', en ilunbi' ga ilátië' xúzgacabi' na'. ²² Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. ²³ Cate' ulu'saca' zi' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacué' yugu' yödzö quégaca bönachi Israel.

²⁴ Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'. ²⁵ Nu na' naca bönni'

usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'
(Lc. 12:2-9)

²⁶ Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándos, ate' huáca bë' yúgu'të le nagachi'. ²⁷ Yugu' didza' ru'ílëna' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi. ²⁸ Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu guí'gabila.

²⁹ Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní. ³⁰ Lësca' caní, nabábagaca yúgu'të guitsa' ícjali' lahuë' Dios. ³¹ Que lë ni na', biti' gádxili'. Ru'ítërö ládxe'ë Dios libí'ili' ca ru'í ládxe'ë-ba' zianba' biguínido'.

Yugu' bönni' ta'z' lu ná'agaquië' Cristo lógaca bönachi
(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. ³³ Bönni' ta'dá'baguë'ë lógaca bönachi, ila'nnë' biti' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi
(Lc. 12:51-53; 14:26-27)

³⁴ Gunnë' ca' Jesús:

—Biti' guéquili' za'a idigu'a le ribequi dxi bönachi yödzülió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi. ³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lídxigacanu ila'dá'baga'nu xto' zxi'ininu. ³⁶ Caní gaca, la' di'a dzasö quégaca bönachi ulu'saca' zi' luzé'eguequi.

³⁷ Nu nadxí'irö xuz xinë'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'. ³⁸ Nu biti' si' lu në'e gaca ca tu bönni' söjtë'ë lë'e yaga cruz, en ta' neda', biti' naca bachi guequi quia' neda'. ³⁹ Nu ru'í ladxi' gun chí'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'
(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'. ⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. ⁴² Núti'tës nu unödzej queë' tu bönni'do' ni tu zxibíndo'os nisa

tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús

(Lc. 7:18-35)

¹ Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsëdinë' bönachi, en röjenë' libán yugu' lu lądzagaca bönachi na'.

² Juan, bönni' buquilé' bönachi nisa, ni' yu'ë lidxi guíë, ate' biyönnë' ca nácagaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. ³ Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'tué' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyönili', en rilé'eli'. ⁵ Guli'tsöjödxe' ca raca, tu'lé'enë' bönni' guchul-la guíöj lógaquië', ate' tu'zë'ë bönni' biti' guca ila'dé'. Nuhuöácagaquië' bönni' gü'iguequinë' huë' nudzu' ruzödi, ate' ta'yönnë' bönni' gula'cödzüë'. Nnita' nabángaquië' bönni' gulatië', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquië' chopa lądxë'ë, biti' ubéaj lądxë'ë neda'.

⁷ Cate' yugu' bönni' na' dá'gaquië' Juan bulu'zë'ë söjhuöjgaquië', ní'irö gusi lahuë' Jesús ru'ilenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? ⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácugaquië' lari' dxí'ado' nacu'ë lıdxigaquië' bönni' ta'nná bë'ë. ⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'ë' lo ca ia'zıca'rë' bönni' gulu'ë didza' uláz queë' Dios. ¹⁰ Canı naca, tu' náquië' Juan bönni' na' ru'ı didza' le nazúaj lu guıchi lá'ayi ca naca queë', le rna:

Buyú, risöl-la'a bönni' gubáz quia', inöruë' ca Li'.

Lë' upë'ë nöza ga tödu'.

¹¹ Le nácatë rea' libí'ili'. Idütë yödzölió ni, cuntu nu zoa nácarö lo ca Juan, bönni' ni' buquilé' bönachi nisa, pero nu naca cuıdi'do'os ga rinná bë' Nu na' zoa yehua' yubá nácatë'ë' lo ca Juan na'.

¹² 'Cate' ni' gusi lahuë' buquilé' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. ¹³ Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guıchi yúgu'të bönni' gulu'ë didza' uláz queë' Dios gulu'ı didza' ca rinná bë'ë Bönni' na' zoë' yehua' yubá.

¹⁴ Channö ré'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunné' ral-la' ilá' lahuë' leyúbölö dza ni zóaru' na'a. ¹⁵ Nu zoa nagui, en riyöni ral-la' uzë' nagui.

¹⁶ '¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquië' ca yugu' bí'ido' ta'bö'öbi' lu yë'eyi. Zidzaj tu'lıdzabi' luzá'agacabi',

¹⁷ ta'nnabi': "Rucódxitu' queéli' gui. ¿Bizx que biti' ruyá'ali'? Rul-la yéchi'tu' queéli'. ¿Bizx que biti' ribödxı yéchi'li'?" ¹⁸ Canı nácalı, tu' bidë' Juan, ate' tu' cabı gü'ı gudahuë' ca ráguli' libí'ili', gunnéli' queë', gunnali': "Tu' xihui' dzágui lë'." ¹⁹ Nı'irö bidxına' neda', Bönni' Guljë' Bönachi, ate' re'aj rahua', ate' rnnëli' quia', rnnali': "Náquië' bönni' huágulë'ë, en bönni' re'jë'. Náquië' luzá'agaquië'

bönni' uquízxaj, en ia'zica'rö huen dul-la'." Yöl-la' réajni'i queë' Dios naca bë' ni'a que le tun nupa ta'zì' lu n'ë'eguequi le.

Le gaca que nu biti' run ca rnna xtídzë'ë Dios
(Lc. 10:13-15)

²⁰ Ní'irö gusí lahuë' Jesús ruzenë' bach bönachi nacua' yugu' yödzö gapa ni' benë' zian' yöl-la' huáca, tu' cabí tu'bí'ini ládxi'guequi. ²¹ Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'tëlö ulu'bí' ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dö ícjaguequi, le ulu'luí' tu'bí' ládxi'gaca bönachi na'. ²² Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi yödzö Tiro, en yödzö Sidón, nupa na' busunítie' Dios. ²³ Libí'ili', bönachi Capernaum, guca queéli' ca bidxíntēli' ga nu riyaza yehua' yubá. Huötjali' lu guí' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintē na'a dza. ²⁴ Na'a, neda' rea' libí'ili', cate' idxín dza ichúguië' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi Sodoma na'.

Rnnë' Jesús: "Guli'dá ga zoa', uzí' ládxi'li'"
(Lc. 10:21-22)

²⁵ Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lē ni, para cabí ila'lé'enë' bönni' ta'yéajni'ide'enë' le, pero buluí'inu' nupa nácagaca ca yugu' bí'ido' le. ²⁶ Ca' gaca, Xuza', tu' caní guyaza ládxi'u Li'. ²⁷ Yúgu'tē nudödē' Xuza' lu na'a. Cuntu nu nunbē' neda', Zxí'inē' Dios, pero tuzē' Dios Xuz, en cuntu nu nunbē' Dios Xuz, pero tuza' neda', Zxí'inē' Dios, enca' nupa na' rē'ēnda' ulu'ida' léguequi Dios Xuz. ²⁸ Guli'dá ga zoa' yúgu'tēli' rōjxéqui'li' tu' rúntica'sili' dxin que yöl-la' yudo', en nuá'ali' yua' zì'í quégaca xibá que, ate' neda' guna' ga uzí' ládxi'li'. ²⁹ Lu yöl-la' nōxaj lādxi' queéli' guli'gún xichina', gácali' ca bēdxi ta'zì'iba' yugu' quégacaba'. Guli'sēda lu na'a neda', tu' naca' nōxaj lādxi', en do' lādxi', ate' idzōli yöl-la' ruzí' lādxi' queéli', le cuéqui dxi ládxi'li'. ³⁰ Yugu' na' ugu'a libí'ili', le naca le inná bé'eda' libí'ili', biti' naca böniga, ate' yua' ugu'a libí'ili' le naca le rusédida', dzá'do'os naca.

12

Ta'lecjē' do bönni' usēda queë' Jesús dza lá'ayi
(Mr. 2:23-28; Lc. 6:1-5)

¹ Dza ni', le naca dza lá'ayi quégaquië' bönni' judío, gudödē' Jesús gapa dē yōla zxoá' xtila, ate' ta'dunē' bönni' usēda queë', en gusí lógaquië' ta'lecjē' do ga dxía zxoá' xtila, en tahuë' zxoá' xtila na'. ² Cate' bila'lé'enë' bönni' yudo' fariseo lē ni, tē' Jesús:

—Buyútsōca', tunē' bönni' usēda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunē', ate' gula'dún ca' nupa gula'cuá'len lē? ⁴ Guyu'ë lu yu'u queë' Dios, en gudahuë' yugu' yōta xtila nagú'ugaquië' lu bucugu lá'ayi, le cabí ral-la' gahuë' lē', en biti' ral-la' ilahuë' bönni' gula'cuá'lenē' lē', pero légacsē' bixúz dē lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunē' bixúz yugu' dza lá'ayi? Tunē' dxin lö'a yudo' yugu' dza lá'ayi, en biti' ta'báguë'ë xíguia'.

⁶ Na'a, neda' rea' libí'ili', zoa' neda' ni, en naca' bönni' nácarē' lo ca yudo'.

⁷ Biti' réajni'ili' lē na' nazúaj lu guichi lá'ayi, le rnna: "Rē'ēnda' huéchi' ládxi'li'

luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'." La'tu' réajni'ili' lë ni, bití' ichúguli' quégaca nupa bití' nabága'gaca xíguia'. ⁸ Ca' naca, tu' naca' neda', Bönni' Guljè' Bönachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

⁹ Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sedë' queë' Dios. ¹⁰ Lu yu'u na' zoë' tu bönni' narequi' në'ë, ate' tu' t'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? ¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsölá'a në'ë.

¹⁴ Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunné' tu bönni' bë'ë didza' uláz queë' Dios ca ral-la' gaca queë' Jesús

¹⁵ Cate' réquibe'enë' Jesús lë ni, buzë'ë ni', ate' sójácalen bönachi zían Lë'. Jesús bunë' yúgu'të nupa te'e lada'j bönachi na', ¹⁶ en gunná bé'enë' léguequi bití' usiyönguequi bönachi Nu náquië'. ¹⁷ Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

¹⁸ Buli'yútsöca', Bönni' ni náquië' Huen Dxin quia', na' guró caza' neda' Lë'.

Nadxí'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna', uchi'a usöröa' quéguequi.

¹⁹ Cuntu nu tíl-lalenë' didza', en bití' ulidzë' zidzaj.

Cuntu nu yöni chí'ë ga naca zi'tu'.

²⁰ Tu guído' zoa bö bití' quítsjë' le, ate' guí' chizóa ulu, bití' usúluë' le, cate' uzóarë' le naca tsahui' queë'.

²¹ Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irö dujuá'gaquië' tu bönni' ga zoë' Jesús, nachul-la lahuë', en bití' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en bití' guca gu'ë didza'.

²³ Que lë ni na' bulu'bani yúgu'të bönachi nacua' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

²⁴ Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

²⁵ Réquibe'enë' Jesús lë na' ta'zá' ládxi'gaquië', ate' rë' légaquië':

—Gátit'ës ga ta'nná bë' bönachi, channö bönachi ni' ila'rúaj choplö, en ila'díl-lalen luzé'guequi, initi yöl-la' unná bë' quéguequi. Lësca' caní, channö ila'rúaj choplö bönachi nacua' tu yödzö o tu yu'u, en ila'dil-la, bití' gaca ila'día' bönachi

nacuá' yödzo na' o yu'u na'. ²⁶ Lësca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bē' que tu' xihui'? ²⁷ Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lē ni na' le túngaca caz naca bē' nachíxili'. ²⁸ Na'a, channö neda' rubéaja' yugu' bö' xihui' tu' zóalen yöl-la' huáca queē' Dios Bö' Lá'ayi neda', le nácatē chibidxín le rinná bē'ē Dios ga zóali'.

²⁹ ¿Naru' huácatsö nu bönni' tsu'ē lidxē' bönni' nal-la, en cuéajē' yöl-la' tsahui' dzö'ö lidxē' channö cabí gúguē'ē bönni' nal-la na' zí'alō? Ní'irō gaca tsu'ē, en ulatjē' lidxē' bönni' nal-la na'.

³⁰ Nu bití' run neda' tsözxön, ridá'baga' neda', en nu bití' rutubi tsözxön len neda', rusilasi nu na'.

³¹ 'Que lē ni na' rea' libí'ili', ca naca yúgu'tē dul-la' tun bönachi, en yugu' didza' xihui' ta'nná, uniti lahuē' Dios léguequi, pero nu bönni' innē zí'ē queē' Dios Bö' Lá'ayi, bití' ca' uniti lahuē' Dios lē'. ³² Lësca' caní, nu bönni' innē' quia' neda', Bönni' Guljē' Bönachi, Dios uniti lahuē' lē', pero nu bönni' innē' queē' Dios Bö' Lá'ayi, bití' ca' uniti lahuē' Dios lē'. Bití' uniti lahuē' lē' dza ni zóaru' na'a, en bití' uniti lahuē' lē' dza si' za'.

Le runru' naca bē' le nácaru'
(Mt. 7:15-20; Lc. 6:43-45)

³³ Gunnē' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bē' yaga na'. ³⁴ Libí'ili' nácali' di'a dza quégacaba' bēla sínia'. ¿Nacxi gaca gü'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'í didza'. ³⁵ Tu bönni' tsahui' ru'ē didza' tsahui' tu' yu'u le naca tsahui' icja ládxi'da'ahuē', pero tu bönni' huiá' dö' ru'ē didza' bití' naca tsahui' tu' yu'u le cabí naca tsahui' icja ládxi'da'ahuē'. ³⁶ Que lē ni na' rea' libí'ili', cate' idxín dza ichúguiē' Dios quégaca bönachi, uchi'a usöröē' tu tu bönni' ca naca yúgu'tē didza' gula'nnazē' ca'. ³⁷ Ca naca didza' ru'u, uchi'a usöröē' lí', ate' uruju' tsahui' o ibágu'u xíguia' ni'a que didza' na' bē'u.

Ta'nábinē' Jesús gunē' le gaca bē' nu náquiē'
(Mr. 8:12; Lc. 11:29-32)

³⁸ Ní'irō bulu'bi'ē didza' yugu' bönni' yudo' fariseo, en yugu' bönni' yudo' tu'sédinē', en tē' Jesús:

—Bönni' Usedi, ré'ēnitu' ilé'etu' tu le gunu' le gaca bē' dē lu no'o yöl-la' unná bē'.

³⁹ Bubi'ē didza' Jesús, en ré' légaquiē':

—Yugu' bönni' tuá' dö' ni, bití' zoa idú ládxi'do'gaquiē', ta'nábinē' neda' guna' tu le gaca bē' nu naca'. Bití' bi le gaca bē' ila'lé'enē', pero le naca bē'sö na' ca guca queē' Jonás, bönni' bē'ē didza' uláz queē' Dios. ⁴⁰ Ca na' guca queē' Jonás na', bugá'anē' lē'ēba' tu böla zxön idú tsonna dza tsonna yēla, lësca' caní gaca quia' neda', Bönni' Guljē' Bönachi, tsonna dza tsonna yēla ugá'ana' zxan yu. ⁴¹ Ila'yasē' bönni' gula'cu'ē yödzo Nínive dza ichúguiē' Dios quégaca bönachi cate' uchi'a usöröē' bönachi nacua' dza ni zóaru' na'a, ate' le gulunē' usubaga' bönachi ni xíguia' tu' bulu'bí'i ládxi'gaquiē' bönni' Nínive na' cate' ni' busiyönnē' Jonás légaquiē' xtídzē'ē Dios, ate' na'a zoa' ni neda', en nácatēra' lo ca Jonás na'. ⁴² Lësca' caní, nigula ni' gunná bé'enu yödzo dē saca' ga ridödi gubidza beo' ziaga chásanu dza ichúguiē' Dios quégaca bönachi cate' uchi'a usöröē' bönachi nacua' dza ni zóaru' na'a, ate' le bennu usubaga' légaquiē' xíguia', tu' birúajnu

nigula na' ga nácatërö zi'tu' para yõninu didza' réajni'i bē'ē Salomón, ate' na'a zoa' ni neda', en nácatëra' lo ca Salomón na'.

Cate' ruxín tu bö' xihui' xilataj

(Lc. 11:24-26)

⁴³ Gunnē' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzí' ladxi'. Channö cabí idzöli ga na' uzí' ladxi', ⁴⁴ ní'irö inná: “Huõja' xilatja' ga ni' birúaja'.” Cate' udxín ga ni' birúaj, tsõjxaca' bönni' na', náquiē' ca tu yu'u nadachi', en nalúaj, en chinabá'a para nu tsõjsóa ni'. ⁴⁵ Ní'irö tseaj, tsõjzxi' ia'gadxi bö' xihui' nácatëcatërö xihui' ca le, ate' ila'yaza yúgu'të, en ila'cuá' icja ládxiida'ahuē' bönni' na', ate' ga údxi huayáli'tërö ca gaca queē' bönni' na' ca guca queē' zí'alö. Lësca' caní gaca quégaca bönachi tuá' dö' ni.

Xinë'ē Jesús, en yugu' bönni' böchē'ē

(Mr. 3:31-35; Lc. 8:19-21)

⁴⁶ Cate' ni' ruí'ilenē' Jesús bönachi didza' ni, xinē'ē, en yugu' bönni' böchē'ē bila'dxinē' ni'. Gula'cu'ē lö'alö, en gulē'ēniguequinē' ilu'í'ilenē' Jesús didza'.

⁴⁷ Ní'irö tu bönni' busiyönnē' Jesús, en rē' Lē':

—Buyútsöca', nacu'ē xinó'o, en yugu' bönni' böchu'u lö'alö, en tē'ēnnē' ilu'í'ilenē' Li' didza'.

⁴⁸ Bubi'ē didza' Jesús, en rē' bönni' na' busiyönnē' Lē' caní, rnnē':

—¿Nõzili' nuzxi caz xiná'a, en nupxi caz bönni' böcha'a?

⁴⁹ Ní'irö bulí' nē'ē, en bulu'e yugu' bönni' usēda queē', en rnnē':

—Buli'yútsöca', bönni' ni nácaqaquiē' ca xiná' caza', en yugu' böchi' caza'.

⁵⁰ Núti'tēs nu run ca rē'ēni quéziné' Xuza' zoē' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzu'ē didza' Jesús ca naca queē' tu bönni' guz

(Mr. 4:1-9; Lc. 8:4-8)

¹ La' dza ní'isö birúajē' Jesús niu' yu'u, ate' yõjchö'ē ra' nísado'. ² Tu' bila'dxín bönachi zían ga zoē' Jesús, gurenē' tu lē'e bárcodo', en gurö'ē ni', ate' bönachi zían na' gula'cuá' luyú bidxi ra' nísado' na'. ³ Ní'irö Jesús bē'lenē' légaquiē' didza', zían le busédinē' légaquiē'. Bucúdzu'ē didza', rnnē':

—Buli'yútsöca', birúajē' tu bönni' guz, sõjēsiē' xisedo'. ⁴ Tsanni ni' sõjēsiē', bal-la xisedo' na' gulasi ra' nõza, ate' bila'dxinba' biguínido', en gulē'ajba' xisedo' na'. ⁵ Gulasi ia'zica'rö xisedo' na' luyú ga rö'ö guiõj, ga na' rö'ö látisö yu, ate' la' gula'lentē, tu' cabí rö'öda' yu ni'. ⁶ Ní'irö cate' budzá'a gubidza, lē na' bēsiē' la' gula'cuáditē, en gula'bidxi, tu' cabí dē ga ilún luí. ⁷ Gula'lén ia'zica'rö xisedo' na' ga bulu'lén lubá yõtsi', ate' gula'zxõn lubá yõtsi' na', en bila'röli lē na' bēsiē', en gulún ditaj le. ⁸ Gulasi ia'zica'rö xisedo' na' ga naca luyú bēbu, ate' bulu'nõdzaj. Bal-la lē na' bēsiē' bulu'nõdzaj ia'tú gayuá'tërö ca'. Ia'zica'rö bulu'nõdzaj ia'tsónnalalaj ca', ate' ia'zica'rö bulu'nõdzaj ia'chí uruá' ca'. ⁹ Nu zoa nagui, en riyõni, ral-la' uzē nagui.

Le tē'ēni ilún le bucúdzu'ē Jesús didza'

(Mr. 4:10-12; Lc. 8:9-10)

¹⁰ Ní'irö bila'dxinē' bönni' usēda queē' Jesús ga zoē', en gula'nábinē' Lē', ta'nnē':

—¿Bizx que ruí'ilenu' bönachi didza' yugu' le rucúdzu'u didza'?

¹¹ Bubi'ē didza' Jesús, en rē' légaquiē':

—Dios ru'ē libí'ili' lataj tséajni'ili' le nagachi' ca rinná bē'ē Lē' yehua' yubá, pero bönachi ni bití' tē'ēni ila'yéajni'i. ¹² Nu si' xtídzē'ē, Dios unõdzjē' que ia'lati',

ate' gáta'da'arö que, pero nu biti' si' le, la's dui le dë que udúa. ¹³ Que lë ni na' ruí'lena' légaquië' didza' yugu' le rucúdu'a didza', tu' tu'yúë' pero biti' ta'lé'enë'. Ta'yönnë' pero biti' tu'zë nágagaquië', en biti' ta'yéajni'inë'. ¹⁴ Caní raca quégaquië' para gaca ca na' gunné' Isaías, bönni' bënë didza' uláz queë' Dios, gunné':

Le nácatë yönili' pero biti' tséajni'ili'.

Uyuli' iná'ali' pero biti' ilé'eli'.

¹⁵ Caní raca tu' nazidi ládxi'do'gaca bönni' ni,

en biti' bi riyaza icja nágagaquië'.

Nadzudi' guiöj lógaquië',

para cabí ila'lé'enë' len guiöj lógaquië' na'.

Biti' ulu'zë nágagaquië',

en biti' ulu'zéajni'i ládxi'gaquië',

en biti' ulu'huóáquië' quia' neda'

para gaca una' légaquië'.

¹⁶ 'Na'a, bica' ba libí'ili', tu' rilé'e guiöj loli', en riyöni nágali'. ¹⁷ Le nácatë rea' libí'ili', zían bönni' gulu'ë didza' uláz queë' Dios en yugu' bönni' tsahui' gulé'ennë' ila'lé'enë' le rilé'eli' libí'ili' pero biti' bila'lé'enë' le. Gulé'ennë' ila'yönnë' le riyönili' libí'ili' pero biti' bila'yönnë' le.

Riguúxjö'ë Jesús le bucúdu'ë didza'

(Mr. 4:13-20; Lc. 8:11-15)

¹⁸ Gunné' ca' Jesús:

—Buli'zë nágali' ca naca le bucúdu'a didza' que bönni' guz. ¹⁹ Núti'tës nu riyöni didza' ca rinná bënë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nöza. La' za'të tu' xihui', en rugúa didza' na' guyú'u icja ládxi'da'ahuë' bönni' na'. ²⁰ Xisedo' na' gulasi luyú ga rö'ö guiöj rulu'i ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë', ²¹ pero ca na' biti' ridía' xisedo' na' tu' cabí dë ga gun luí, lësca' caní raca queë' bönni' ni. Cate' idxín tu le usaca' zi' lë', ate' ila'bía nágaca bönachi lë' tu' nazí lu nënë didza' na', la' gácatë chopa ládxe'ë. ²² Xisedo' na' gulasi ga na' bulu'lén lubá yötsi' rulu'i ca raca queë' bönni' na' riyönnë' didza' na', pero ruí'i ládxe'ë yugu' le dë yödzölió ni, ate' nazí yë'ë bönni' na', tu' ruí'i ládxe'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'. ²³ Xisedo' na' gulasi luyú bëbu rulu'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzej ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla zxoá' xtila

²⁴ Ia'tú le bucúdu'ë didza' Jesús, ate' rë' légaquië':

—Ca gaca cate idxín ni le rinná bënë Dios yehua' yubá naca ca guca que xisedo' dxi'a le guzë' tu bönni' ga naca lu xiyúë'. ²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjöza lu xiyúë' xisedo' guíxi'do' cané le nalá' ca naca yöla zxoá' xtila, ate' böaj xilataj. ²⁶ Cate' gulén zxoá' xtila na', en gurö'ö do que, ga na' dxía xui'i, ní'irö gulaca bë' guíxi'do' cané na'. ²⁷ Ní'irö bila'dxinë' bönni' huen dxin ga zoë' bönni' xan la' yëla na', en tē' lē': “Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?” ²⁸ Xan yu na' gudxë' légaquië', rnnë': “Tu bönni' biti' rilé'enë' neda' dxi'a benë' caní.” Ní'irö gula'nábinë' huen dxin queë' lë',

ta'nné: “¿Ba rě'ënu' tséajtu' tsöjölajtu' guíxi'do' cané na'?” ²⁹ Xángaquië' rě' légaquië': “¡Biti' ca'! Nadx ca' cate' iládzu'li' guíxi'do' cané na', iládzu'lentéli' ca' yöla zxoá' xtila. ³⁰ Gácarö dxi'a güi'ili' lataj ila'zxöngarö tsözxön cate' idxinrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' zxoá' xtila lu yu'u quia'.”

Rucúdzu'ë didza' Jesús ca naca que xisé mostaza
(Mr. 4:30-32; Lc. 13:18-19)

³¹ Ia'tú le bucúdzu'ë didza' Jesús, ate' rě' légaquië':

—Ca gaca ga idxín le rinná bē'ë Dios yehua' yubá, gaca ca raca que tu xisé mostaza, le guzē' tu bönni' ga naca lu xiyüē'. ³² Le nácatē xisé mostaza na' nácatērö cuidi' ca yúgu'tē xisedo' ia'zícá'rö, pero cate' chinadúz, rizxöntērö ca yúgu'tē guixi' cuan, en rizxön ca naca tu yaga, ate' ta'dxinba' biguinnido', en tunba' xicá'agacaba' lu ni'a nē'e.

Rucúdzu'ë didza' Jesús que cúa zi que yöta xtila
(Lc. 13:20-21)

³³ Ia'tú le bucúdzu'ë didza' Jesús, ate' rě' légaquië':

—Ca gaca ga idxín le rinná bē'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza zxoá' xtila, ate' guyazxa idütē cúa na'.

Le rě'ëni gun le rucúdzu'ë didza' Jesús
(Mr. 4:33-34)

³⁴ Yúgu'tē lē ni bucúdzu'ë didza' Jesús, le bē'lenē' bönachi nacuá' ni' didza', en biti' bi didza' bē'lenē' légaquië' le cabí bucúdzu'ë didza'. ³⁵ Caní benē' para gaca lē na' buzúajē' lu guichi tu bönni' bē'ë didza' uláz queē' Dios, gunnē': Gu'a didza' yugu' le ucúdzu'a didza'. Innía' yugu' le nagachi' cate' ni' gusí lo si' guta' yödzölió.

Rigúxjö'ë Jesús le bucúdzu'ë didza' que guíxi'do' cané

³⁶ Ní'irö buzenē' Jesús bönachi nacuá' ni' didza', en gusöl-lē'ë légaquië', ate' guyu'ë yu'u. Ní'irö bila'dxinē' bönni' usēda queē' ga zoē', en tē' Lē':

—Gudíxjöi'i netu' le rě'ëni inná lē na' bucúdzu'u didza' que guíxi'do' cané le nalá' ca naca yöla zxoá' xtila.

³⁷ Bubi'ë didza' Jesús, ate' rě' légaquië':

—Bönni' razē' xisedo' dxi'a naca' neda', Bönni' Guljē' Bönachi. ³⁸ La' yēla na' naca yödzölió ni, ate' xisedo' dxi'a na' tu'luí'i ca nácgaca nupa nabábagaca ga rinná bē'ë Dios. Guíxi'do' cané na' le nalá' ca naca yöla zxoá' xtila tu'luí'i ca nácgaca nupa néquiguequi que tu' xihui'. ³⁹ Nu na' biti' rilé'e dxi'a xan la' yēla na', en yöjza guíxi'do' cané na', tu' xihui' caz naca. Dza ulu'tubē' na' ruluí'i ca gaca dza údxi que yödzölió ni, ate' nupa na' tu'tubi nácgaca gubáz lá'ayi queē' Dios. ⁴⁰ Ca na' guca, bulu'tubē' guíxi'do' cané na', en bulu'zégui'ë le lu guí', lēscá' caní gaca cate' údxi que yödzölió ni. ⁴¹ Neda', Bönni' Guljē' Bönachi, isól-la'gaca'-nē' gubáz lá'ayi quia', ate' ulu'béajē' ga rinná bē'ë Dios yúgu'tē nupa tun ga tun dul-la' luzé'eguequi, enca' nupa tuá' dö'. ⁴² Yugu' gubáz lá'ayi na' ila'gu'ë bönni' tuá' dö' na' lu guí' gabila. Ní' ila'bödxē', en ulu'tíl-la láyi'gaquië'. ⁴³ Ní'irö ila'yēpi yösa bení' bönachi tsahui', en ilácagaquië' ca gubidza ga ni' rinná bē'ë Dios yehua' yubá. Nu zoa nagui, en riyöni ral-la' uzé nagui.

Rucúdzu'ë didza' Jesús que tu yöl-la' tsahui' nagachi'

⁴⁴ Lēscá' caní bucúdzu'ë didza' Jesús, rnnē':

—Le rinná bē'ē Dios yehua' yubá naca ca tu yöl-la' tsahui' nagachi' tu la' yēla. Cate' bidzölinē' tu bönni' le, bucáchē'ē le leyúbölö ga na' bigachi', ate' lu yöl-la' rudzeja queē' guyijē', yöjēti'ē yúgu'tē le dē queē' ate' gú'uē' la' yēla na' para gata' yöl-la' tsahui' na' queē'.

Rucúdzu'ē didza' Jesús que tu bugá le nazáca'da'

⁴⁵ Gunnē' ca' Jesús:

—Ca ral-la' sē ládxi'li' le rinná bē'ē Dios yehua' yubá naca ca benē' tu bönni' rá'uē', en ruúti'ē, en riguiljē' bugá nazáca'gaca. ⁴⁶ Cate' bidzölinē' tu bugá le nazáca'da', guyijē', yöjēti'ē yúgu'tē le dē queē', ate' gú'uē' bugá na'.

Rucúdzu'ē didza' Jesús que tu yöxaj böla

⁴⁷ Lēasca' caní gunnē' Jesús:

—Ca gaca ga ridxín le rinná bē'ē Dios yehua' yubá, gaca ca run tu yöxaj böla le ta'chiljē' bönni' lu nísado', le röjxi' zían böla izá'a. ⁴⁸ Cate' chibidzá' yöxaj na', bulu'béajē' le luyú bidxi ra' nísado' na', ate' gula'bö'ē ni', en gula'gu'ē-ba' yugu' böla dxi'a tu lu ga'böra, pero gula'rú'unē'-ba' yugu' böla cá'asö. ⁴⁹ Lēasca' caní gaca cate' údxi que yödzölió ni. Ila'rúajē' gubáz lá'ayi queē' Dios, ate' ulu'béajē' quez yugu' bönachi tsahui', ate' ulu'cuítie' légaquie' ladaj bönachi tuá' dö'.

⁵⁰ Ní'irö ila'gu'ē bönachi tuá' dö' na' lu guí' gabila. Ní' ila'bödxē', en ulu'tíl-la láyē'ē.

Yöl-la' tsahui' le naca gula, en le naca cubi

⁵¹ Ní'irö Jesús gunábinē' yugu' bönni' usēda queē', rnnē':

—¿Ba réajni'ili' yúgu'tē lē ni?

Bulu'bi'ē didza', tē' Lē':

—Ön, Xan.

⁵² Jesús gudxē' légaquie':

—Cate' tu bönni' yudo' usedi chinazí' lu nē'ē le rinná bē'ē Dios yehua' yubá, náquie' ca tu bönni' xan yu'u, rubéajē' ladaj yöl-la' tsahui' queē' le naca cubi, en le naca gula, le náagaca tsahui' le ruzi'ē xibé.

Le benē' Jesús lu yödzö Nazaret

(Mr. 6:1-6; Lc. 4:16-30)

⁵³ Cate' budxi bucúdzu'ē Jesús yugu' didza' ni, buzē'ē ni'. ⁵⁴ Cate' budxinē' ladzē', busédinē' bönachi nacua' lu yu'u ga tu'dubē' bönni' judío, en tu'sedē' queē' Dios, ate' bulu'báninē, ta'nnē':

—¿Gazxi caz guzēdē' bönni' ni yöl-la' réajni'i ni? ¿Nacxi caz naca, runē' yugu' yöl-la' huáca ni? ⁵⁵ Náquie' bönni' ni zxi'inē' bönni' gubēdxi yaga, ate' xinē'ē lēnu María. Náquie' böchi'gaquie' Jacobo, en José, en Simón, en Judas. ⁵⁶ Lēasca' nigula zanē' nacua'lennu rē'u ni. ¿Gazxi caz guzēdē' yúgu'tē lē ni?

⁵⁷ Que lē ni na' gulaca chopá ládxi'gaquie', ate' bulu'cá'anē' Lē'. Ní'irö Jesús gudxē' légaquie':

—Yúgu'tē bönachi tun bal tu bönni' ru'ē didza' uláz queē' Dios, pero bönachi uláz queē', en bönachi nacua' lidxē' biti' tun lē' bal.

⁵⁸ Que lē ni na' biti' benē' Jesús zían yöl-la' huáca ni', tu' cabí ta'yéajlē'ē Lē'.

14

Ca bētgaquie' Juan, bönni' buquile' bönachi nisa

(Mr. 6:14-29; Lc. 9:7-9)

¹ Lu dza ni', biyönnē' Herodes, bönni' rinná bē'ē luyú Galilea, ca náagaca yugu' yöl-la' huáca runē' Jesús. ² Herodes na' gudxē' yugu' ni'a nē'ē, rnnē':

—Bönni' na' Juan, bönni' buquile' bönachi nisa. Chibubanē' lu yöl-la' guti. Que lē ni na' dē lu nē'ē yöl-la' huáca zxon na'.

³ Caní gunnë' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guíë, ate' gula'gu'ë lë' lidxi guíë tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'. ⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë' ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiquequi bönachi náquië' Juan na' tu bönni' ru'ë didza' uláz queë' Dios. ⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza ládxë'ë Herodes le benbi'. ⁷ Guzxí' lu në'ë Herodes, en benë' tsutsu xtídzë'ë unödzejë' queëbi' bíti'tës bi inábibi' lë'. ⁸ Tu' chibusédinu-bi' zí'aló xiná'abi', gúdxibi' lë':

—Benna quia' na'a icjë' Juan, bönni' buquilé' bönachi nisa. Gulú'u le tu lu zxiga' zxön.

⁹ Ní'irö bu'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë' ni na' gunná bé'enë' nu tsöjnödzej icjë' Juan na' queëbi'. ¹⁰ Caní guca, gusöl-lë'ë nu tsöjrixí yenë' Juan ga ni' yu'ë lidxi guíë. ¹¹ Bönni' na' nasöl-lë'ë bu'ë icjë' Juan na', zxoa lu zxiga' zxön, ate' bunödzejë' le queëbi' bi'i nigula na', ate' lëbi' buá'abi' le queënu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cächë'ë lë'. Gudödi ni', yöjtíxjöi'iguequinë' Jesús ca gulaca lë' ni.

Jesús rugahuë' zíanrö ca chi-un gayuá' bönachi
(Mr. 6:30-44; Lc. 9:10-17; Jn. 6:1-14)

¹³ Cate' réquibe'enë' Jesús lë' ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzo ni', en yöjaca ga ni' idxinë' Jesús, ta'zë'e ní'aguequi. ¹⁴ Cate' burúajë' Jesús lë'e barco, bilé'enë' nacua' bönachi zían ni', ate' buéchi' ládxë'ë léguequi, en bunë' nupa te'e, nútsa'gaca ladjaguequi. ¹⁵ Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzo' para gá'ugaca bi ilagu.

¹⁶ Ní'irö Jesús gudxë' légaquië':

—Biti' run bayudxi tsöjácië'. Buli'nödzej libí'ili' le ilahuë'.

¹⁷ Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélé'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzuxzjë' yöta xtila na', en budödë' le lu ná'agaquië' bönni' usëda queë', ate' légaquië' gula'guísië' le lógaca bönachi zían na'. ²⁰ Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuë' guláquië' idú chi-un gáyu'ë, pero cuntu nu bulaba yugu' nigula, en bí'ido'.

Jesús rizë'e ni'ë lu nísado'
(Mr. 6:45-52; Jn. 6:16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsöjácië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. ²³ Cate' chibusöl-lë'ë Jesús bönachi na', gurenë' tu lu guí'ado' ga ni' yöjsöë' tuzë'. Ni' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacu'ë bönni' usëda queë' ridödi gatsaj láhui'lö

nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacué, rizé'e ni'ë lu nísado'. ²⁶ Cate' yugu' bönni' usëda queë' bila'lé'enë' Lë', rizé'e ni'ë lu nísado', gula'bö'dë'ë böniga tu' tádxinë'. Gula'bö'dxi'ë, ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxoní ládxi'li'. Neda' ni. Biti' gádxili'.

²⁸ Ní'irö bubí'ë didza' Pedro, rë' Jesús:

—Xan, channö nacué Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. ³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölá neda'.

³¹ Jesús la' bulitë' në'ë. Buguélë'ë lë', en rë' lë':

—Látí'sö réajlë'u neda'. ¿Bizx que guca chopa ládxi'u?

³² Cate' bulu'benë' lë'e bárcodo' na', gurö'ö dxi bö' na' recja. ³³ Ní'irö bönni' nacué lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacué.

Jesús ruúnë' yugu' bönni' huë' nacué yödzo Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzo Genesaret. ³⁵ Cate' bulu'únbë'ë bönni' yödzo ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Guláta'yue' lahuë' Jesús gu'ë légaquië' lataj ila'gansë' ruí'lari' nácuë', ate' la' bulu'huóacaté yúgu'të nupa na' bila'gán lari' na'.

15

Le tun ga bití' nácaru' tsahui' lahuë' Dios

(Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tē' Lë':

² —¿Bizx que tunë' bönni' usëda quiu' le ridödi bē' ca naca le nulaga loru' runru' ca gulunë' xuz xtó'oru'? Biti' ta'guíbi nē'ë ca naca que yudo' cate' si' ilahuë'.

³ Bubí'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'? ⁴ Caní' raca, tu' gunná bé'enë' Dios libí'ili', gunné': “Ben bal xuz xino'o”, en gunné' ca': “Nu innë' zi' que xuz xinë'e, tsaz gati nu na'.” ⁵ Pero libí'ili' rnnali': “Channö nu guíë xuz xinë'e: Biti' bi gaca gunna' quiu' tu' chiguzxí' lu na'a gunna' yúgu'të queë' Dios, ⁶ bítí'rö bi run bayudxi gun nu na' que xuz xinë'e.” Caní' runli', rucá'anali' cá'asö le gunná bē'ë Dios, para gunli' le nulaga loli' runli'. ⁷ Libí'ili', bönni' rulu'isö tsahui' cuinli', idú ca nácali' gudá'xjö'ë Isaías, bönni' bē'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bē' bönachi.

¹⁰ Ní'irö bulidzë' Jesús bönachi nacué' ni', en rë' léguequi:

—Buli'zě nágali' le guía' libí'ili', en guli'tséajni'i. ¹¹ Calëga le riyaza ru'ë nu bönni' run ga biti' náquië' tsahui' lahuë' Dios, pero le rirúaj ru'ë, lë ni run ga biti' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígui'ë ga zoë', en tē' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bē'u?

¹³ Ní'irö bubi'ë didza' Jesús, en rē' légaquië':

—Yúgu'tē le nadúz, le cabí guzē' Xuza' zoë' yehua' yubá, huadúl'jagaca idú lui. ¹⁴ Buli'cá'ana légaquië'. Chinachúl-la lógaquië', en ta'chē'ë nupa nachul-la lógaca. Channö tu bönni' lo chul-la ichē'ë ia'tué' bönni' lo chul-la, iropë' ila'bixë' tu lu yeru.

¹⁵ Ní'irö bubi'ë didza' Pedro, en rē' Jesús:

—Buzéajni'i netu' lë ni rucúdz'u didza'.

¹⁶ Jesús rē' légaquië':

—¿Naru' cabí réajni'itseli' ca' libí'ili'? ¹⁷ ¿Naru' cabí réajni'itseli' riyaza lē'ëru' yúgu'tē le riyaza ruá'aru', ate' rurúaj lē'ëru'? ¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga biti' nácali' tsahui' lahuë' Dios. ¹⁹ Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xihui'li'. ²⁰ Yugu' le caní tun ga biti' náquië' tu bönni' tsahui' lahuë' Dios, pero channö cabí nayari nē'ë ca naca que yudo' cate' bi gahuë', biti' gun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mr. 7:24-30)

²¹ Ní'irö buzë'ë Jesús ni', en guyéajë' lu xiyú yödzö Tiro, en yödzö Sidón. ²² Tu nigula nabábanu luyú Canaán birúajnu yödzö ni', ate' bē'ënu zidzaj didza', rënu Jesús:

—Xan, xzí'ini xi'sóë' David, buéchi' ladxi' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

²³ Biti' bi didza' bubi'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anu cúdz'u'ru' ribödxu'anu.

²⁴ Ní'irö bubi'ë didza' Jesús, ate' rē'ë-nu:

—Dios nasöl-lë'ë neda' gácalena' bönachi Israel, nupa nácagaca ca bö'cu' xzí'la'do' nanítigacaba'.

²⁵ Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

²⁶ Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

²⁷ Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

²⁸ Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rē'ënnu'.

La' ní'isö böácatëbi' bi'i nigúlado' queënu.

Jesús ruúnë' zían nupa te'e

²⁹ Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guádo', ate' gurö'ë ni'. ³⁰ Bönachi zían dujuá'gaquië' nupa biti' guca ila'zá', en nupa nachul-la guiój lógaca, en nupa biti' guca ila'nnë', en nupa

narugu ni'a ně'eguequi, en ia'zica'rö zian nupa te'e, ate' gula'guíxaj léguequi xini'ë Jesús, ate' Lë' bunë' léguequi. ³¹ Bulu'bani bönachi ni' ca naca le benë' Jesús, tu' bila'lé'e tu'nnë nupa biti' guca ila'nnë, ate' nuhuöácagaca nupa gurugu ni'a ně'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zianrö ca choá' gayuá' bönachi
(Mr: 8:1-10)

³² Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zian ni, tu' chiguca tsonna dza zá'lenguequi neda', en biti' bi dë le ilagu. Biti' rë'ëndá' usöl-la'gaca'-në' tsöjhuöajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zian lu lataj cá'asö ni, le ugágotu' bönachi zian ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zian na' ila'bör' lu yu. ³⁶ Gudélé'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzxuxjë' iroptë na', en bunödziejë' quégaquië' bönni' usëda queë', ate' légaquië' gula'guísië' le lógaca bönachi zian na'. ³⁷ Gulahuë' yúgu'të', en bulu'huöljanë'. Gudödi ni' bulu'tubë' le bizzaj nagá'anagaca, ate' bulu'lié' gadxi ga'böra. ³⁸ Yugu' bönni' na' gulahuë' nácaquië' choá' gáyü'ë, pero cuntú nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsöjhuöajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

16

Ta'nábinë' Jesús gunë' tu le gaca bë' nuzxi náquië'
(Mr: 8:11-13; Lc: 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zì' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. ² Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxó, tu' rö'ö böaj xiná lúzxiba."

³ Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë ya'alí' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a.

⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuöjë'.

Le tu'sédinë' bönni' yudo' naca ca cúa zi que yöta xtila
(Mr: 8:14-21)

⁵ Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. ⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'. ⁹ ¿Naru' cabí réajni'itseli', en bití' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? ¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? ¹¹ ¿Naru' cabí réajni'ili'? Bití' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' bití' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo

(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzo Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilë' bönachi nisa." Ia'zíca'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zíca'rë' ta'nnë': "Jeremías nacu', o ia'túë' bönni' bë'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí bulu'ínë' nu bönni' li' lë ni. Xuza' zoë' yehua' yubá bulu'ínë' li' lë ni. ¹⁸ Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bë' que tu' xihui' bití' sequi' uzaga' xinözgaquië'. ¹⁹ Gunna' quiu' yugu' zxí'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

Jesús riguíxjö'ë ca si' ilútië' Lë'

(Mr. 8:31-9:1; Lc. 9:22-27)

²¹ La' dza ní'isö gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. ²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za'sö ládxi'gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' ré'enë' të'ë neda', ral-la' uzóë' tsölá'alö yugu' le ré'eni quézine', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'. ²⁵ Nu bönni' guë'ënnë' gun chi'ë yöl-la' na'bán queë', unítië' le, pero bönni' unítië' yöl-la' na'bán queë' tu' dë'ë neda', gata' yöl-la' na'bán idú

quee'. ²⁶ ¿Naru' uzi'tsë' xibé tu bönni' channö utubë' yúgu'të le dë yödzölió ni pero unítie' yöl-la' na'bán idú queë'? Biti' bi gaca unödzejë' tu bönni' para gata' yöl-la' na'bán idú queë'. ²⁷ Caní rnnía', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca. ²⁸ Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bë'a neda', Bönni' Guljë' Bönachi."

17

Ridzá' ca nalá' lahuë' Jesús (Mr. 9:2-13; Lc. 9:28-36)

¹ Gudödi xopa dza, Jesús gudélë'ë Pedro len Jacobo, en Juan, böché'ë Jacobo na', en guchë'ë légaquië', ate' yöjáquië' quez tu lu guí'a sibi. ² Ní' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzeni' gubidza, ate' lari' nácuë' böaca chiguíchido'os ca bení'. ³ Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tu'ilenë' Jesús didza'. ⁴ Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ní' ru'ë Pedro didza' ni, la' gurö'ötë tu böaj bení' le guzxóa légaquië', ate' lu böaj na' biyön chí'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

⁶ Cate' bila'yönnë' bönni' usëda queë' chí'i na', gula'dzö'ë gusurú'alö, en guladxi bila'dzöbinë'. ⁷ Ní'irö gubígui'ë Jesús ga na' nacu'ë, ate' gudanë' légaquië', rnnë':

—Guli'chasa. Biti' gádxili'.

⁸ Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

⁹ Cate' ní' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guiëli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

¹¹ Bubi'ë didza' Jesús, rë' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të. ¹² Neda' rea' libí'ili': "Chibuluí'i lahuë' Elías na', pero bití' bulu'únbë'ë lë', ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zí'ë neda'.

¹³ Ní'irö gula'yéajni'inë' bönni' usëda queë', bë'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesús tubi' bi'i bönni' ré'ebi' xjote' (Mr. 9:14-29; Lc. 9:37-43)

¹⁴ Cate' bila'dxinë' ga na' nacuá' bönachi zían, gubígui'ë tu bönni' ga zoë' Jesús, ate' buzóa zxibë' lahuë' Lë', ¹⁵ en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zían luzuí' ridzö'öbi' lu guí' o lu nisa. ¹⁶ Chidiguá'a-bi' lógaquië' bönni' usëda quiu' pero bití' guca ulu'únë'-bi'.

¹⁷ Bubi'ë didza' Jesús, rnnë':

—Libí'ili', bönachi cabí réajlë'ëli', en bití' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queéli'?' Guli'diguá'-bi' quia' ni.

¹⁸ Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatëbi' bi'i bönni'do' na'.

¹⁹ Ní'irö, yugu' bönni' usëda queë' Jesús gula'biguë'e quez ga zoë', ate' gula'nábinë' Lë', ta'nnë':

—¿Bizx que na' bití' guca ubéajtu' netu' bö' xihui' na'?

²⁰ Jesús rë' légaquië':

—Bití' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuidi'sö naca yöl-la' réajlë' queéli' Dios, nácatë ca tu xisedo' mostaza, huáca guiéli' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Bití' bi zoa le cabí gaca gunli' channö réajlë'ëli' Dios idú ládxi'li'. ²¹ Tu bö' xihui' caní gácasö ubéajli' channö uládzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

²² Tsanni ni' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi. ²³ Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguíxaj lazë' que yudo'

²⁴ Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quízajjë' bönachi lázagaca que yudo' ga zoë' Pedro, ate' tē' lē':

—¿Naru' cabí quízaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguízajjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bē'ë luyú ni, ¿nupxi tu'quízajjë' le riguíxaj laz, en lazaj que yu? ¿Naru' tu'quízajjë' bönachi uládz quégaquië' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quízajjë'.

Ní'irö Jesús rë' lë':

—Que lë' ni na', bití' run bayudxi quízajjaj laza' que yudo' tu' naca' Zxí'inë' Dios ca na' bití' bi ta'guízajjaj nupa náacagaca bönachi uládz queë' bönni' na' ruquízajjë'. ²⁷ Na'a, para cuntú nu gun leri', guyéaj ra' nísado', yöjzaj lu nisa le rizöninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu dumí lásido'. Guzxí'i le, ate' gudízajjaj laza', en lazu'.

18

¿Núzxilö gaca lo?

(Mr. 9:33-37; Lc. 9:46-48)

¹ La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bönni' ni gáquië' lo ga rinná bē'ë Dios yehua' yubá?

² Bulidzë'-bi' Jesús tubi' bi'i bönni'do', ate' buzóë'-bi' gatsaj láhui'lö ga na' nacü'ë. ³ Ní'irö rë' légaquië':

—Le nácatë rea' libí'ili', channö cabí huöácali' ca zeaj nácabi' bí'ido', bití' ca' tsú'uli' ga ni' rinná bē'ë Dios yehua' yubá. ⁴ Que lë' ni na', núti'tës nu gaca nöxaj ladxi', en huöáca ca nácabi' bí'ido' ni, nu ni gaca lo ga ni' rinná bē'ë Dios

yehua' yubá. ⁵ Núti'tës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'
(Mr. 9:42-48; Lc. 17:1-2)

⁶ Gunné' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guiöj riyëtuni yaga yenë', ate' tsöjsuladzu' cuinë' lu nísado'. ⁷ Bica' bayechi' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ 'Que læ ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacua' chopá no'o, en chopá ni'u ate' tsöjtsáziu' lu guí' gabila le catu caz ulu. ⁹ Channö gun guiöj lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiöj lo', en calëga nacua' chopá guiöj lo', ate' tsöjtsáziu' lu guí' gabila.

Jesús rucúdzu'ë didza' que tu bö'cu' zxila' nanítiba'
(Lc. 15:3-7)

¹⁰ Gunné' ca' Jesús:

—Guli'gún chi'i cuinli' para cabí uzóali'-bi' tsölä'alö tubi' bí'ido' caní. Neda' rea' libí'ili', gubáz lá'ayi tapa chi'ë légacabi' nacua'tica'së' lahuë' Xuza' zoë' yehua' yubá. ¹¹ Bida' ni neda', Bönni' Guljë' Bönachi, para usölä' nu ni naniti.

¹² '¿Nacxi rusáca'li' queëli'? Tu bönni', nacua'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chënnaba' na', ate' tsejë' gapa naca lu guí'a, para tsöjtiljë'-ba' bö'cu' zxila'do' na' nanítiba'?

¹³ Channö udzölinë'-ba', le nácatë' rea' libí'ili', udzëjarönë' ni'a queëba' bö'cu' zxila'do' na' ca gunë' quégacaba' ia'tápalalaj yu' chënnaba' ni' biti' gula'nítiba'.

¹⁴ Lësca' caní, Xúziru' Dios, zoë' yehua' yubá, biti' rë'ënë' nítibi' tubi' bí'ido' caní.

Ca ral-la' uniti loru' böchi' luzá'aru'
(Lc. 17:3)

¹⁵ Gunné' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tsahui' la' libí'isili'. Channö uzé náguië' li', chibuguélu'u böchi' luzó'o. ¹⁶ Channö cabí uzé náguië' xtídz'u, guché'ë ia'tué' o ia'chopë' bönni' para urúaj li xtídz'u lógaquië' chopá tsonné' bönni', nupa gaca ilún ba nali' que xtídza'li'. ¹⁷ Channö cabí uzé náguië' xtídz'a'gaquië', gudxi ca' bönachi tu'dubi tu'sëdi queë' Dios, en channö cabí uzé náguië' xtídz'a'gaca bönachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquízxjë' uláz que yödzö zi'tu'.

¹⁸ 'Le nácatë' rea' libí'ili', yúgu'të le inná bë'ëli' lu yödzölió ni, naca le chigunná bë'ë Dios yehua' yubá, ate' yúgu'të le güi'ili' lataj lu yödzölió ni, naca le chibë'ë lataj Dios yehua' yubá.

¹⁹ 'Lësca' caní rea' libí'ili', channö chópasili' gun tuz xtídz'a'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, læ na' rinábili'-në'. ²⁰ Ga nacua' chopá tsonna nupa ni nudúbigaca quia' neda', zoa caza' neda' gatsaj láhui'lö ga na' nacu'ë.

²¹ Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' læ':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdu'ë didza' que tu bönni' huen dxin biti' buniti lahuë' luzë'ë

²³ Gunnë' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bönni' rinná bē'ë. Gú'unnē' ucá'analenē' tsahui' yugu' bönni' huen dxin queë'. ²⁴ Cate' gusí lahuë' rucá'analenē' légaquiē' tsahui', dujuá'gaquiē' ga zoë' tu bönni' ral-lē'ë queë' zían gayuá' dumí. ²⁵ Tu' cabí guca quizxjē', gunná bē'ë xanē' idó'ogaquiē' lē', en nigula queë', en yugu' bi'i queë', en yúgu'tē le dē queë', ate' ní'irö gazxaj le ral-lē'ë queë' xanē' na'. ²⁶ Ní'irö bönni' huen dxin na' buzóa zxibē' lahuë' xanē', en gunábinē' lē', rnnē': "Xan, ben zxon ladxu'u neda'. Huaguizxaj caza' li' idutē." ²⁷ Ní'irö xanē' na' buéchi' ladxē'ë bönni' huen dxin queë' na', en buniti lahuë' lē' lē' na' ral-lē'ë queë', ate' busanē' lē'. ²⁸ Cate' burúajē' bönni' huen dxin na', la' yöjtsáгатē' tu bönni' rúnlenē' lē' tsözxön dxin, ate' bönni' na' ral-lē'ë queë' láti'do'os dumí. Ní'irö guzxönē' lē', en guzxínnajē' yenē', ate' rē' lē': "Gudíxjate lē' na' ral-lu'u quia'." ²⁹ Ní'irö luzë'ë na' buzóa zxibē' lahuë', en gunaba yechē'ë lahuë', rnnē': "Ben zxon ladxu'u neda'. Huaguizxaj caza' li' idutē." ³⁰ Biti' gú'unnē' bönni' huen dxin na', ate' yöjlu'ë lē' lidxi guíe dza quíxjarē' lē' na' ral-lē'ë queë'. ³¹ Cate' bila'lē'enē' lē' ni ia'zica'rē' huen dxin, bulu'huí'inide'enē' ni'a queë', ate' yöjtíxjōi'iguequinē' xángaquiē' yúgu'tē lē' na' guca. ³² Ní'irö xángaquiē' bulidzē' bönni' huen dxin na', ate' rē' lē': "Li', huen dxin catsahui'. Yúgu'tē dumí na' gúl-lu'u quia' buniti lahua' li'. Busúlua' lē' na' gúl-lu'u quia' tu' gunaba yechu'u lahua'. ³³ ¿Naru' cabí ral-la' huéchi' ladxu'u ca' luzó'o ca na' bena' neda', buéchi' ladxá'a li'?" ³⁴ Ní'irö guléde'enē' xanē', en budödē' lē' lu ná'agaca nupa ulu'saca' zi' lē' dza quíxjarē' idútē le ral-lē'ë queë'.

³⁵ Ní'irö rnnē' Jesús:

—Lésca' caní gunē' Xuza' zoë' yehua' yubá queëli' channö cabí uniti loli' idú ladxí'li' yugu' böchi' luzá'ali'.

19

Nupa tu'lá'a yöl-la' nutsaga na'

(Mr. 10:1-12; Lc. 16:18)

¹ Cate' budxi bē'ë Jesús yugu' didza' ni, buzë'ë luyú Galilea, ate' bidxinē' luyú Judea le dē ia'tsölá'a yegu Jordán saca' ga rilén gubidza. ² Bönachi zían söjácálen Jesús, ate' bunē' léguequi ni'.

³ Ní'irö bila'dxinē' bal-lē' bönni' yudo' fariseo ga zoë' Jesús para ila'zí' bē'ë Lē', ate' gula'nábinē' Lē', ta'nnē':

—¿Naru' dē lataj bönni' nutsaga nē'ë usanē' nigula queë' tu' nözi bíti'tēs bi raca?

⁴ Bubi'ë didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bönachi cate' si' benē' yödzölió? Bönni', en nigula benē' légaquiē'. ⁵ Caní gunnē' Dios: "Que lē' ni na', ral-la' usanē' tu bönni' xuz xinē'ë, ate' tsaz tsöjsóalenē'-nu nigula queë', ate' iropē' na' ulu'huóáquiē' tuz bönachi." ⁶ Caní naca, bíti'rö nácagaquiē' chopē' pero tuz bönachi chinuhuóáquiē'. Que lē' ni na', biti' ral-la' ulu'lē'ë bönni' nupa na' benē' Dios tuz.

⁷ Ní'irö bönni' yudo' na' gula'nábinē' Jesús, ta'nnē':

—¿Bizx que na' gunná bé'enē' Moisés légaquiē' le ruí'i lataj nu bönni' unödzejē' tu guichi queënu nigula queë' le rnna nulá'a yöl-la' nutsaga na', ate' usanē'-nu nigula queë' na'?

⁸ Jesús rë' légaquië':

—Caní benë' Moisés tu' nazidi icja láchxi'do'oli'. Bennë' libí'ili' lataj usanli'-nu nigula queéli', pero cate' gusí lo guta' gurö'ö yödzölió, bití' guca caní.
⁹Neda' rea' libí'ili', channö tu' bönni' usanë'-nu nigula queë', en bití' gudálennu bönni' yúbölö, ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alënë'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usëda queë' Jesús gulë' Lë', ta'nnë':

—Channö caní naca queë' tu' bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Bití' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi. ¹²Nacu'ë bönni' bití' tu'tsaga ná'alengaquië' nigula tu' cabí ná'agacacabi' idú bönni' biguiú', tu' gulaljé' ca', ate' ia'zica'rë' bönni' bití' tu'tsaga ná'alengaquië' nigula tu' bulu'zaga' bönachi xinözgaquië', ate' ia'zica'rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë lé'gacabi', en ulidzë' Dios ni'a quégacabi', ate' bönni' usëda queë' bulu'zágui'ë xinözgaquië'. ¹⁴Ní'irö Jesús rë' légaquië', rnnë':

—Guli'gü'i-bi' yugu' bí'ido' lataj ila'dxinbi' ga zoa', en bití' uzága'li' xinözgacabi', tu' ila'zí' lataj nupa ná'agacaca ca yugu' bí'ido' caní ga ni' rinná bë'ë Dios yehua' yubá.

¹⁵ Jesús guxóa në'ë lé'gacabi', ate' ní'irö buzë'ë ni'.

Tu bönni' unná bë' cuidi' dë'yöl-la' tsahui' queë'

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyüë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nöztsenu' lë na' rnno' quia', rnno' naca' idú tsahui'? Cuntu nu bönni' ná'quië' idú tsahui'. Tuzë' Dios ná'quië' idú tsahui'. Channö ré'ënu' gata' yöl-la' na'bán idú quiu', ben ca rinná bë' xibá queë' Dios.

¹⁸ Ní'irö bönni' na' rë' Jesús, rnnë':

—¿Bí'xilö xibá na'?

Jesús rë' lë':

—Xibá na' gunná bë'ë Moisés:

Bití' gútiu' bönachi.

Bití' gunu' dul-la' le riguitsaj xibá que yöl-la' nutsaga na'.

Bití' cuanu'.

Bití' innió' que böchi' luzó'o le cabí ná'cate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channö ré'ënu' gacu' tsahui', guyéaj, yöjēti' le dē quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnē' didza' ni, söhuöjē' ruhu'innē' tu' dēda' yöl-la' tsahui' queë'.

²³ Ní'irö Jesús gudxē' yugu' bönni' usēda queë', rnnē':

—Le nácatē rea' libí'ili', böniga naca tsáziē' nu bönni' dē yöl-la' tsahui' queë' ga rinná bē'ē Dios yehua' yubá. ²⁴ Ia'stú rea' libí'ili', nácarö böniga tsáziē' tu bönni' dē yöl-la' tsahui' queë' ga ni' rinná bē'ē Dios ca tōdiba' bōa' lu nagui yōtsi'.

²⁵ Cate' bila'yönnē' yugu' bönni' usēda queë' didza' ni, bulu'bánnē, ta'nnē':

—¿Nuzxi caz gaca ulá, channö?

²⁶ Jesús buyúē' légaquiē', en rē' légaquiē':

—Biti' gaca ilún bönachi lē ni, pero Dios huáca gunē' yúgu'tē.

²⁷ Ní'irö bubí'ē didza' Pedro, en rē' Jesús:

—Buyútsōca', netu' chibucá'anatu' yúgu'tē, en zá'lentu' Li'. ¿Bízxi rō gata' queētu'?

²⁸ Jesús rē' légaquiē':

—Le nácatē rea' libí'ili', dza ni' cate' ucubi yōdzōlió, ate' cō'a inná bē'a neda', Bönni' Guljē' Bönachi, ga ni' gácatēra' lo, lēscá' libí'ili' zá'lenli' neda' na'a, cō'ōli' chinnu lataj ga inná bē'ēli', en uchi'a usöröli' quégaca idxinnu cō'tē yōdzō quégaca zxí'ini xi'sóē' Israel. ²⁹ Nu bönni' rucá'anē' lidxē', o yugu' böchē'ē, o yugu' zanē', o xuzē', o xinē'ē, o nigula queë', o yugu' zxí'inē', o yugu' xiyúē', para gunē' xichina', bönni' ni si'ē ia'tú gáyua'tērō ca' queë', en gata' ca' yöl-la' na'bán idú queë'. ³⁰ Zián nupa nácatēca lo na'a, ulu'gá'ana cá'asō, ate' nupa nagá'anagaca cá'asō na'a, hualácagaca lo.

20

Rucúdzu'ē didza' Jesús ca tunē' bönni' huen dxin

¹ Gunnē' ca' Jesús:

—Ca gun Bönni' na' rinná bē'ē yehua' yubá naca ca benē' tu bönni' xan yu'u. Burúajē' zílado', yōjdiljē' yugu' bönni' ilunē' dxin ga naca lu xiyúē' ga na' nadúzgaca lubá uva. ² Cate' chibugá'analenē' tsahui' yugu' bönni' huen dxin na', quizxjē' légaquiē' tu dumí lazxaj que tu dza, gusól-lē'ē légaquiē' ilunē' dxin ga naca lu xiyúē'. ³ Cate' burúajē' idú xsila, bilé'enē' ia'zícá'rē' bönni' nacua'asē' ca' ga naca lu yé'ēyi. ⁴ Rē' légaquiē': “Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'.” La' yōjácátē' ca' légaquiē'. ⁵ Burúajē' bönni' xan yu'u na' leyúbölö idú huagubidza, enca' idú xihuö udzō', en la' tuz ca benē', gusól-lē'ē yugu' bönni' yōjxáquiē' lu xiyúē'. ⁶ Burúajē' ca' cate' ni' zoa ia'látí'do'os gubidza, en yōjxáquiē' ia'zícá'rē' bönni' nacua'asē' ca' ni', ate' rē' légaquiē': “¿Bizx que zóatsali' ni cá'asō idú dza, biti' bi dxin runli'?” ⁷ Yugu' bönni' na' tē' lē', ta'nnē': “Cuntu nu benna xichintu'.” Ní'irö rē' légaquiē': “Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'.” ⁸ Cate' chizóa gal-la, bönni' xan yu na' rē' bönni' yu'u lu nē'ē yugu' huen dxin na', rnnē': “Bulidza yugu' bönni' huen dxin na', ate' gu'u lázxjagaquiē'. Quizxju' zí'alö yugu' bönni' na' bila'dxinē' yōjsetē. Udxí na' quizxju' yugu' bönni' na' bila'dxinē' zí'atēlō.” ⁹ Ní'irö bila'dxinē' bönni' yōjéngaquiē' dxin cate' ni' zoa ia'látí'do'os gubidza, en gula'zi'ē tu tuhuéajē' dumí lazxaj que tu dza. ¹⁰ Cate' bila'dxinē' bönni' yōjéngaquiē' dxin zí'atēlō, guléquinē' huazí'gaquiē' ia'lati', pero lēscá' gula'zi'ē tu tuhuéajē' dumí lazxaj que tu dza. ¹¹ Cate' gula'zi'ē le, gula'nnédē'ē queë' bönni' xan yu'u na', ¹² ta'nnē': “Yugu' bönni' ni bila'dxinē'

ga yössetë, tu chí'sö gulunë' dxin, en tuz ca gudízxjatso' légaquië' ca netu', ate' netu' ni bentu' dxin idú dza, en gúguida'atu' gubidza." ¹³ Bubi'ë didza' xan yu na', en rë' tuë': "Böcha'a, bití' bi runa' quiu' le cabí naca tsahui'. ¿Naru' cabí bugá'ana tsáhuiru' si'u tu dumí lazxaj que tu dza? ¹⁴ Guzxí' lazxju', en böaj lidxu'. Neda' rë'ënda' quízxja' bönni' ni yöjenë' dxin ga yössetë la' leze ca na' riguízxja' li'. ¹⁵ ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etsenu'-në' luzó'o tu' rúnnada'a queë'?" ¹⁶ Caní naca, bal-lë' bönni', tu' cá'ana bönachi légaquië' cá'asö, ilácagaquië' lo, ate' ia' zíca' rë' bönni', nácagaquië' lo na'a, ulu'gá'anë' cá'asö. Zían nupa nulidza', pero nabábasö nupa narögaca.

Rigúxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nöza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dödë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

²⁰ Ní'irö bidxinnu xiná'agaquië' Jacobo, en Juan, yugu' xzi'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxë'ë queënu. ²¹ Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cö'öbi' tubi' xzi'ina' ni cuita lë'u ibëla, en ia'tubi' cö'öbi' cuita lë'u yögöla ga ni' inná bë'u.

²² Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que cö'öli' cuita lë'a ibëla o cuita lë'a yögöla, bití' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

²⁴ Cate' ia'chíë' bönni' usëda queë' Jesús bila'yönnë' lë ni, gula'lenë'. ²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité bë' ta'nná bé'enë' légaquië', ate' nupa ni' nácagacarö lo ta'nná be'e la' luzë'eguequisö. ²⁶ Biti' gaca caní queëli'. Núti'tëslöli' libí'ili' nu rë'ëni gaca zxön ga zóali', nu ni ral-la' gun dxin que ia'zíca'röli'. ²⁷ Lësca' caní, núti'tëslöli' libí'ili' nu guë'ëni gaca lo, ral-la' gaca ca tu bönni' nadó'o que ia'zíca'röli'.

²⁸ Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ni'a quégaca bönachi zían para ulu'lágaca.

Ruúne' Jesús chopë' bönni' nachul-la lógaquië'

(Mr. 10:46-52; Lc. 18:35-43)

29 Cate' ni' tu'ru'ajë' yödzo Jericó, bönachi zían sójácalen Jesús. 30 Nacu'ë chopë' bönni' nachul-la lógaquië' ni', rő'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

31 Bönachi zían nacuá' ni' gulë légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

32 Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënili' guna' queëli'?

33 Të' Jesús:

—Xan, rë'ënitü' gunu' ga huöälaj guiöj lotu'.

34 Ní'irö Jesús buéchi' ládxë'ë légaquië', ate' gudanë' guiöj lógaquië'. La' böäljatëgaca guiöj lógaquië', ate' yöjácalenë' Jesús.

21

Ridxinë' Jesús yödzo Jerusalén len yöl-la' ba zxön

(Mr. 11:1-11; Lc. 19:28-40; Jn. 12:12-19)

1 Cate' bila'dxíngalë' yödzo Jerusalén, en ni' nacu'ë ga dë yödzo Betfagé ga na' zoa Guí'a Yaga Olivo, ní'irö gusöl-lë'ë Jesús chopë' bönni' usëda queë', 2 ate' rë' légaquië':

—Guli'tséajtsöca' yödzo do' ni' ca dödilö ga ni zóaru', ate' la' tsöjxáca'tëli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjsedxi-ba', en ichë'ëli'-ba' quia' ni. 3 Channö nu bi guié libí'ili', guli'guié nu na': "Xanru' riquinnë'-ba'." Ní'irö isöl-lë'ë léga'caba' quia'.

4 Caní guca para gaca lë na' buzúajë' lu guichi bönni' bë'ë didza' uláz queë' Dios, gunnë':

5 Guli'guié nupa nacuá' yödzo Sión,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzu'ba' búrrodo' nácaba' xzí'iniba' böa' ruá'aba' yua'.

6 Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'. 7 Gula'chë'ë-ba' burro guná' na', en burro biguiú'do' na', ate' bulu'dxíë' cúdzu'gacaba' yugu' lari' guitsa' quégaquië', ate' gudxië' Jesús lahui' lari' na'. 8 Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza. 9 Gulu'í zidzaj didza' bönachi na' nanörugaca, en nupa na' sójácalen Jesús, ta'nná:

—¡Yöl-la' ba Lë', xzí'ini xi'sóë' David! ¡Bica' ba nu ni za' ní'a que Lë' Xanru'! ¡Yöl-la' ba Dios!

10 Cate' guyázië' Jesús yödzo Jerusalén, bulu'dzatsa yúgu'të bönachi lu yödzo na', ate' zían nupa gulë luzë'eguequi, ta'nná:

—¿Nuzxi caz bönni' ni?

11 Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyá Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

12 Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsë'ë dumí yödzo zi'tu', en yugu' le ta'bö'i nupa tuti' gu'dödo'. 13 Rë' légaquië':

—Nazúaj lu guichi lá'ayi le rnna: “Lidxa' si'i le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

¹⁴ Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. ¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en bila'yönnë' tu'íbi' bí'ido' zidzaj didza' ga naca chila yudo', ta'nnabi':

—¿Bica' ba Lë', zxi'ini xi'sóë' David!

¹⁶ Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú.”

¹⁷ Ní'irö Jesús bucá'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

¹⁸ Cate' za' rení', ate' ni' söhuöjë' Jesús Jerusalén, ridunë'. ¹⁹ Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxité yaga higo na'. ²⁰ Cate' bila'lé'enë' bönni' usëda queë' lë ni, bulu'bábinë', ate' gula'nábinë' Jesús, ta'nnë':

—¿Nacxi caz guca, gubídxité yaga ni?

²¹ Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxi'li', calégasö huáca gunli' ca na' bena' que yaga ni, pero channö guiëli' gu'a ni: Gucuíta, en yöjsóa lu nísado', gaca ca na' innali'. ²² Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunnë' Dios queéli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

²³ Ní'irö guyazië' Jesús chila yudo', ate' tsanni ni' rusédinë' bönachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquilé' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: “¿Bizx que biti' guyéajlë'ëli' lë'?” ²⁶ Na'a, channö innaru': Gula'söl-lë'ë yugu' bönni' lë', rádxi'ru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Bíti' nöztu'.

Jesús rë' légaquië':

—Neda' ca', bití' guía' libí'ili' bizxi yöl-la' unná bē' dē lu na'a runa' lē ni.

Rucúdzu'ē didza' Jesús ca gulunbi' chópabi' zxí'inē' tu bönni'

²⁸ Ní'irō Jesús gudxē' yugu' bönni' yudo' na':

—¿Nacxi rusáca'li' queéli'? Guzóē' tu bönni' nacuá'abi' chópabi' bi'i bönni' queē', ate' yōjōdxē'-bi' tubi' bi'i queē' na', gunné': "Zxí'ina', guyéaj na'a tsōjenu' dxin ga naca luyú quia' ga rō'gaca lubá uva." ²⁹ Bubí'ibi' didza' bi'i na', gúdxibi'-nē': "Biti' rē'ēnda' tseja'." Gudōdi ni' bubí'i lādxi'bi', ate' yōjenbi' dxin. ³⁰ Ní'irō bönni' na' yōjōdxē'-bi' ia'tubi' bi'i queē' na', en la' tuz ca gunné', ate' bubí'ibi' didza' bi'i ni, gúdxibi'-nē': "Huaca, Dad. Uyéaja'." Biti' guyéajbi' bi'i ni. ³¹ ¿Núzxilōbi' bi'i chopa ni benbi' le guyaza lādxi'ē' xúzibi'?

Bulu'bi'ē didza', tē' Jesús:

—Bi'i zí'alō na'.

Ní'irō Jesús rē' légaquiē':

—Le nácatē rea' libí'ili', ila'nōruē' bönni' uquízaxj tuá' dō', en yugu' nigula udá dzaga ca libí'ili', ate' ila'yáziē' ga ni' rinná bē'ē Dios. ³² Caní gaca, tu' bidē' Juan, bönni' buquile' bōnachi nisa, ga zóali', en busédinē' libí'ili' le naca tsahui' ca ral-la' gunli', ate' libí'ili' bití' guyéajlē'ēli' lē', pero yugu' bönni' uquízaxj, en yugu' nigula udá dzaga gula'yéajlē'ē lē'. Sal-la' bilé'eli' lē ni, bití' bubí'i lādxi'li' para tséajlē'ēli' lē'.

Rucúdzu'ē didza' Jesús ca béngaquiē' bönni' huen dxin bití' nácagaquiē' tsahui' (Mr. 12:1-12; Lc. 20:9-19)

³³ Gunnē' ca' Jesús:

—Buli'zē nágali' ia'tú le ucúdzu'a didza'. Guzóē' tu bönni' xan yu'u, ate' bönni' ni budē'ē yugu' lubá uva luyú queē'. Guléquiē' lē'aj que, en guchō'ōnē' tu lerui guiōj ga isié' xisi uva na'. Benē' ca' tu yu'u xitsá' ga gaca nu uyú idútē luyú queē'. Ní'irō budōdē' luyú na' lu ná'agaquiē' bönni' huen dxin, para ila'zi'ē quégaquiē' gatsaj huéaj, ate' sa'yéajē' yōdzō zi'tu'.

³⁴ 'Cate' chibidxín dza ulu'chibē' yugu' lubá uva na', gusól-lē'ē bönni' xan luyú na' bal-lē' ni'a nē'ē ga na' nacu'ē bönni' huen dxin ni' para ulu'zi'ē lu ná'agaquiē' uláz queē'. ³⁵ Ní'irō gula'zōnē' bönni' huen dxin na' yugu' ni'a nē'ē na'. Gulunē' huē' tuē', en ia'túē' bétigaquiē' lē', en ia'túē' bulu'lādxi' lē' guiōj. ³⁶ Leyúbölō bönni' xan luyú na' gusól-lē'ē ca' ia'zícá'rē' ni'a nē'ē, ate' guláquiē' zióntērē' ca nupa na' gusól-lē'ē zí'alō, ate' la' tuz ca gulunē' bönni' huen dxin ni' quégaquiē'.

³⁷ 'Ga yōjsete, gusól-lē'ē ca' zxí'inē' ga na' nacu'ē. Guzá' lādxi'ē, rnnē': Hualunē' bal bi'i quia'. ³⁸ Cate' yugu' bönni' huen dxin na' bila'lē'enē'-bi' zxí'inē', la' gula'nnatē' la' légacasē': "Bi'i ni guequi queēbi' luyú ni. Guli'dá, gútiru'-bi', ate' le ral-la' guequi queēbi' guequi queēru'." ³⁹ Ní'irō gula'zōnē'-bi', ate' bulu'béajē'-bi' ní'ilō luyú ga na' rō'gaca lubá uva, ate' bétigaquiē'-bi' ni'.

⁴⁰ Ní'irō Jesús gunábinē' légaquiē', gunné':

—Cate' udxinē' bönni' xan luyú na', ¿nacxi gunē' quégaquiē' bönni' huen dxin ni'?

⁴¹ Bulu'bi'ē didza' bönni' yudo' na', tē' Jesús:

—Usunítiē' bönni' tuá' dō' na', ate' luyú queē' na' udōdē' lu ná'agaquiē' ia'zícá'rē' bönni' huen dxin, bönni' ilu'ē lē' uláz queē' cate' idxín dza ulu'chibē' le.

⁴² Ní'irō Jesús gudxē' légaquiē':

—¿Naru' catu caz nulábanili' lē na' nazúaj lu guichi lá'ayi ca naca lē ni? Caní rna: Guiōj na' gula'rú'unē' bönni' tu'cu'ē zō'ō,

la' guiöj ná'asö chinaca guiöj len zö'ö.
Lë cazë' Xanru' benë' ga naca caní,
ate' naca tu le run ga rubániru'.

⁴³ 'Que lë ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadelí' lataj ni'. ⁴⁴ Nu tsöjchegu' lu guiöj ni, la' cuinsi quitsaj, ate' channö guiöj ni tseajbaga' bönni' na', uzuzuxaj lë'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë na' bucúdzu'ë didza' Jesús, téquibe'enë' bë'ë Jesús didza' ca naca quégaquië'. ⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zían nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús bë'lenë' légaquië' didza' leyúbölö, ate' bucúdzu'ë didza', rnnë':

² —Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza utsaga ná'abi' bi'i bönni' queë'. ³ Gusöl-lë'ë ni'a në'ë tsöjxí'gaquië' yugu' bönni' chinulidzë' para guídagaquië' laní queëbi', pero bití' gulé'ënë' guídagaquië'. ⁴ Ní'irö gusöl-lë'ë ia'zíca'rë' ni'a në'ë, en gudxë' légaquië': "Guli'tsöjödixitsöca' nupa na' chinulidza', na' guiëli' légaquië': Buli'yútsöca', chinupá'a la' huagu. Chibëtia'-ba' yugu' xpëdxa', en yugu' böa' bëdxi renni' quia'. Yúgu'të chinupá'a. Guli'dá, sóaru' laní queëbi' bi'i bönni' quia' utsaga ná'abi'." ⁵ Yugu' bönni' na' yöjlídzagaquië' bití' gulunë' légaquië' bal, ate' yöjáquië' que queëgaquië'. Tuë' yöjenë' dxin, en ia'tué' guyijë' tsöjö'u tsöjëti'ë. ⁶ Ia'zíca'rë' gula'zönë' yugu' ni'a në'ë na', ate' gulu'ë dö' quégaquië', en bëtgaquië' légaquië'. ⁷ Cate' bönni' na' rinná bë'ë biyönnë' lë ni, gulënë', en gusöl-lë'ë yugu' bönni' queë' röjáquië' gudil-la, ate' bëtigaquië' yugu' bönni' hueti bönachi na', en bulu'quélé'ë guí ládzagaquië'. ⁸ Ní'irö bönni' na' rinná bë'ë gudxë' yugu' ni'a në'ë, gunné': "Le nácatë chinupá'a que laní na', pero yugu' bönni' bulidza' bití' guláquië' lesaca' guídagaquië' laní quia'. ⁹ Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queëbi' bi'i bönni' quia' utsaga ná'abi'." ¹⁰ Ní'irö bila'rúajë' ni'a në'ë na', söjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

¹¹ 'Cate' guyázië' bönni' na' rinná bë'ë para uyúë' nupa ni' nudúbigaca, bilé'enë' tu bönni' bití' nacué' lari' tsahui' le bunödzejë' quégaquië' bönni' nacu'ë laní na'. ¹² Ní'irö gudxë' bönni' na': "Bönni'do', ¿zóatso' ni, en bití' nacu' lari' tsahui' bunödzejä' quégaca nupa nacuá' laní?" Bönni' na' busayaj ru'ë. ¹³ Ní'irö bönni' na' rinná bë'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsöjchú'un-në' ní'ilö ga na' rö'ö chul-la. Ni' cödxë', en utíl-la láyë'ë, lu yöl-la' ruhu'ini queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rögaca.

Jesús ru'ë didza' ca naca le riguíxaj lázaru' (Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'. ¹⁶ Para ilunë' caní, gula'söl-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulé Jesús:

—Bönni' Usedi, nöztu' Li' ru'u didza' cätēze naca, en naca idütē li ca rusédinu' ca naca queē' Dios, en biti' ruí'i ládXu'u le ta'nná quiu' bönachi, tu' cabí ruchi'a rusöröu' bönachi ca naca le ta'nnasö bönachi na'. ¹⁷ Gudíxjöi'i netu'. ¿Nacxi runi li'? ¿Naru' run bayudxi, o biti' run bayudxi quizzaj laztu' queē' César, bönni' yödzo zi'tu' na' rinná bé'enē' rē'u?

¹⁸ Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Libí'ili', bönni' ruluí'isö tsahui' cuinli', ¿bizx que ruí'ili' didza' le ruzóa neda' ra' guí'a? ¹⁹ Buli'luí'i neda' dumí le riguízXaj lázali'.

Ní'irö bulu'luí'inē' Lē' tu dumí que yödzo Roma. ²⁰ Jesús gunábinē' légaquiē', rnnē':

—¿Nuzxi lahui da' ni, en nuzxi le nazúaj lē'e dumí ni?

²¹ Tē' Lē':

—Queē' César na'.

Ní'irö Jesús gudxē' légaquiē':

—Guli'guíxjē' César le nequi queē' César, ate' Dios le nequi queē' Dios.

²² Cate' bila'yönnē' lē ni, bulu'bábinē' ca naca didza' tsahui' bubí'ē Jesús, ate' bulu'cá'anē' Lē', söhuöajtēgaquiē'.

Ta'nabi yúdxinē' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nnē' biti' ulu'bán nupa chinátigaca, bila'dxinē' ga zoē' Jesús, ate' gula'nábinē' Lē', ²⁴ ta'nnē':

—Bönni' Usedi, Moisés gunné': "Channö gátie' tu bönni' zóanu nigula queē', en cuntu nu bi'i zóabi' queē', ní'irö bi'i böché'ē bönni' na' ral-la' utsaga ná'alēnbi'-nu nigula uzēbi' queē', para cabí initi dí'a dza queē' bönni' böchi'bi' na'." ²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alēnbi'-nu nigula, ate' gútitébi'. Tu' cuntu nu bi'i queēbi' zóabi', bi'i buropi na' butsaga ná'alēnbi'-nu nigula uzēbi' queēbi' bi'i böchi'bi' na'.

²⁶ Lē'sca' caní guca queēbi' bi'i buropi na', enca' queēbi' bi'i bunní, en la' tuz ca guca quégacabi' igádxitébi', gulátibi' yúgu'tēbi'. ²⁷ Ga búdxité gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ní' guéquinu nigula na' queēbi', tu' bulu'tsaga ná'alēnbi'-nu yúgu'tēbi' nigula na'?

²⁹ Ní'irö bubí'ē didza' Jesús, ate' rē' légaquiē':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbē'ēli' yöl-la' huáca queē' Dios. ³⁰ Cate' idxín dza ulu'bán nupa chinátigaca, bítirö gaca yöl-la' rizóalen nigula, en biti' ulu'tsaga ná'agaquiē', pero gácagaquiē' ca nácagaquiē' gubáz lá'ayi queē' Dios nacu'ē yehua' yubá.

³¹ Ca na' ral-la' ulu'bán nupa chinátigaca, ¿naru' cabí nulábanili' lē na' gudxi cazē' Dios libí'ili'? ³² Caní gunné': "Neda' naca' Dios queē' Abraham, en Dios queē' Isaac, en Dios queē' Jacob." Dios na' biti' náquiē' Dios quégaca nupa nátigaca tsaz, pero náquiē' Dios quégaquiē' bönni' ni nabángaquiē' sal-la' gulátie'.

³³ Cate' bila'yöni bönachi nacuá' ní' didza' ni, bulu'bani ca naca lē na' rusédinē' Jesús léguequi.

Xibá queē' Dios le naca lo

(Mr. 12:28-34)

³⁴ Cate' guléquibe'enē' bönni' yudo' fariseo ca benē' Jesús, busayjē' ruá'agaquiē' bönni' yudo' saduceo, ní'irö bulu'dubē' yúgu'tē'. ³⁵ Tuē' bönni' nútsē'ē ládjagaquiē', en nazēdē' xibá queē' Moisés, gú'unnē' si' bē'ē Jesús.

³⁶ Que lē ni na' gunábinē' Jesús, rnnē':

—Bönni' Usedi, ¿bízxilö xibá queē' Dios naca lo?

³⁷ Jesús rē' lē':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' rájni'i quiu'. ³⁸ Xibá ni naca lo, en nazáca'tërö. ³⁹ Xibá na' naca buropi, la' ca nácatë, en caní rna: “Idxi'inu' böchi' luzó'o ca nadxi'i cuinu'.” ⁴⁰ Chopa xibá ni nácgaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

*¿Nuzxi zxi'ini náquië' Cristo?
(Mr. 12:35-37; Lc. 20:41-44)*

⁴¹ Tsanni ni' nacu'ë tsözxön bönni' yudo' fariseo na', Jesús gunábinë' légaquië', ⁴² rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

⁴³ Ní'irö Jesús rë' légaquië':

—¿Bizx que na' lë' cazë' David bulidzë' Lë', gunné': “Xana”’? Caní gunné' cate' ni' bë'ë didza' uláz queë' Dios Bö' Lá'ayi, gunné':

⁴⁴ Xanru' Dios gudxë' Xana':

“Gurö'ö cuita lë'a ibëla, cate' gunra' ga ulu'zachu zxi'bigaca Lo' nupa tequi Li' zi'.”

⁴⁵ Channö David na' gunné' queë' náquië' Xanë', ¿nacxi caz naca, rnnali' náquië' zxi'ini xi'sóë' David na'?

⁴⁶ Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

23

*Jesús ruzéqui'ë yugu' bönni' yudo' didza'
(Mr. 12:38-40; Lc. 11:37-54; 20:45-47)*

¹ Ní'irö Jesús bé'lenë' bönachi nacuá' ni' len yugu' bönni' usëdi queë' didza'.
² Rë' légaquië':

—Yugu' bönni' yudo' fariseo, en yugu' bönni' yudo' usedi nuhuóázagaquië' xilatjë' Moisés, en tu'sédinë' bönachi. ³ Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'. ⁴ Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxicjagaca bönachi, pero légaquië' biti' té'ënnë' ulu'tenë' le, calëga len tuze xibön ná'agaquië'. ⁵ Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. ⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sedë' queë' Dios. ⁷ Lësca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilë' bönachi légaquië': “Padiux, bönni' usedi.”

⁸ Pero libí'ili', biti' ral-la' gunli' ga nu guië libí'ili': Bönni' Usedi, tu' zoa tuz Nu naca Bönni' Usedi queëli', neda', Cristo, ate' yúgu'tëli' nácali' böchi'li' tuli' ia'tuli'. ⁹ Cuntu nu guiëli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá. ¹⁰ Biti' gunli' ga nu guië libí'ili': Xan, tu' zoa tuz Nu naca Xanli', neda', Cristo. ¹¹ Nu nutsa' ladjali' nu run xichinli' ia'zica'röli', nu ni na' gácarö lo ga zóali'. ¹² Channö nu uzóa cuini lataj lo, cá'asö ugá'ana nu na', pero nu naca nóxaj ladxi', gaca lo.

¹³ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójácalen bönachi para ila'dxín ga ni' rinná bë'ë Dios yehua' yubá. La' libí'isili' biti' sequi' tsú'uli', en biti' ruí'ili' lataj ila'yú'u nupa té'ëni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzébidó', en para ulu'isö tsahui' cuinli', xidzé rulídzali'-në' Dios. Que læ ni na', zítërö irugu queéli' quí'i sáca'li'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridödili' idú lu nísado', en idú yödzölió ni para gunli' ga tseaj ládxë'ë tu bönni' Dios tsözxön len libí'ili', en cate' chiguzxéqui'li'-në', runli' ga nabága'rë' xíguia' ca libí'ili', ate' tsöjtsu'ë lu guí' gabila.

16 'Bica' bayechi' libí'ili'. Nachul-la loli', ate' rë'ënili' ulu'ili' nöza bönachi. Caní naca queéli' tu' rnnali': "Channö bi rizí' lu në'ë tu bönni' ni'a que yudo', biti' run bayudxi, pero channö runë' le ni'a que oro dzö'ö yudo', bayudxi gun." 17 Libí'ili', bönni' lo chul-la, en tu' caréajni'i. ¿Bízxilö nácarö lo? ¿Naru' oro na', o yudo' le run lá'ayi oro na'? 18 Lësca' caní rnnali': "Channö nu bönni' gunë' le ni'a que bucugu lá'ayi, biti' gun bayudxi, pero channö gunë' le ni'a que gun zxoá lahui, bayudxi gun." 19 Libí'ili', nazídili', en nachul-la loli'. ¿Bízxilö nácarö lo? ¿Naru' gun zxoá láhuisö, o bucugu lá'ayi na' run lá'ayi gun na'? 20 Que læ ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxoágaca láhuisö. 21 Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjë' ni'. 22 Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

23 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxí'li' luzá'ali', en biti' réajlë'ëli'-në' Dios. Yugu' læ ni run bayudxi gunli', en læs biti' ucá'anali' ia'zica'rö læ na' runli', le riguízxjali' que yudo'. 24 Libí'ili', nachul-la loli', en rë'ënili' ulu'ili' nöza bönachi. Ca na' runli' naca ca rudödili' bödzádzado' le ré'jali', rubéajgacali'-ba' bö'iyudo', pero ré'jali'-ba' böa' ta'bië'-ba' bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Nácali' ca zxíga'do' ré'jali', en yö'öna ráhuili'. Riguíbili' le nuá' cuita læ'e, pero lu icja ládxí'do'oli' nalí yugu' le ribanli', en yugu' le ruá' dö' runli'. 26 Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, læ na' sa'yéaj gácali' tsahui' lu icja ládxí'do'oli', para gácali' ca' tsahui' cuita læ'ëli'.

27 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácgaca chiguíchido'os cuita læ'e, en le nácatë lachi nalá'gaca, pero nalígaca dxita quégaca nupa chinátigaca, enca' yúgu'të le siguti. 28 Lësca' caní nácali' libí'ili'. Le nácatë láhuisö rulu'i cuinli' tsahui' lógaca bönachi, pero lu icja ládxí'do'oli' nalili' yugu' le rulu'isö tsahui' cuini, en le ruá' dö' runli'.

29 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'ili' biquitaj gapa nagáchi'gaca bönachi tsahui'. 30 Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxön cate' gulútië' yugu' bönni' gulu'ë didza' uláz queë' Dios." 31 Tu' rnnali' caní, la' libí'isili' runli' ba nalí

nácali' zxi'ini xi'sóagaca nupa ni' bétigaca yugu' bönni' gulu'ë didza' uláz queë' Dios. ³² Caní naca, rusubaga' cuinli' xíguia' na' gula'báguië' xuz xtó'oli'.

³³ 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? ³⁴ Que lë ni na', neda' isól-la'a queëli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. ³⁵ Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, zxi'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bëdxido' lahuë' Dios. ³⁶ Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

Jesús ribödxë' ni'a que yödzö Jerusalén

(Lc. 13:34-35)

³⁷ Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiöj nupa nasöl-lë'ë Dios. Zián luzuí' gú'unida' utuba' libí'ili' quia', ca runba' yöjede, rutúbiba' bórado' queëba' zcan xíliba', pero bití' gú'unili'. ³⁸ Buli'yútsöca', cá'asö ugá'ana yu'u lídxili'. ³⁹ Caní gaca, tu' rea' libí'ili', na'a isí lo bití' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

24

Rigúxjö'ë Jesús ca si' ulu'quínmajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígui'ë bönni' usëda queë' ga na' zoë', ate' bulu'luí'inë' Lë' ca nácacaga zö'ö nagú'ugaca lë'a yudo'.

² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', bití' ca' ugá'ana guiöj nabaga' luzë'e ni, le cabí iguínaj.

Le ilaca bë' chizóa idxín dza údxi que yödzölió

(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjö'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', ⁵ tu' zá'gaquië' zián bönni' légaquië' ca lea' neda'. Ila'nnë' nácacaguië' Cristo, en ila'zi' yé'enë' bönachi zián.

⁶ Huayónili' raca gudil-la, en le ruí'i didza' que gudil-la, pero bití' cõ'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. ⁷ Tilla tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zián lataj tödi budó' zxu'. ⁸ Yúgu'të lë ni nácacaga le isí lógaca yugu' le ila'guí'i ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí'i libí'ili' tu' dá'ali' neda', en ilútië' bál-lali' libí'ili'. ¹⁰ Cate' gaca caní, gaca chopá ládxi'gaca zián bönachi, en ulu'cá'ana neda', ate' udödi tu ia'tú luzë'e, en tu ia'tú udí'i luzë'e. ¹¹ Ní'irö ulu'luí'i lógaguië' zián bönni' ta'zi' yë'ë. Ulu'luí'i cuíngaguië' ca yugu' bönni' tu'ë didza' uláz queë' Dios, en ila'zi' yé'enë'

bönachi zían. ¹² Iluá'ada' dö' bönachi, ate' que lë ni na' bítirö ila'dxí'i böchi' luzé'eguequi. ¹³ Nu guequi tsaz queë' Dios ga idxintë dza údxi, nu ni ulá. ¹⁴ Idú yödölió gaca libán que didza' dxi'a ca rinná bē'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

¹⁵⁻¹⁶ 'Nu ulaba lë ni ral-la' uzéajni'i ladxi'. Gunnë' Daniel, bönni' bē'ë didza' uláz queë' Dios, gunnë': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzúnajli' saca' guí'ado'. ¹⁷ Nu dxía ícjo'olö biti' gal-la' huötaj tsöjzxi' bi dë que lu yu'u, pero ral-la' izxúnajtë. ¹⁸ Nu zoa la' guixi', biti' gal-la' huöaj tsöjzxi' lari' que. ¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxinu-bi' bí'ido' quégacanu cate' idxín dza ni'. ²⁰ Buli'lidzë' Dios inábili'-në' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'guí'i ila'záca'tërö bönachi dza ni' ca gula'guí'i gula'záca' bönachi dza ni'te cate' si' guta' gurö'ö yödölió, ga ridxintë na'a dza, en calëga dza zá'gaca biti' ila'guí'i ila'záca' caní. ²² Cate' idxín dza ni', channö Dios biti' cuéqui lahuë' quégaquië', cuntu nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

²³ 'Ní'irö biti' tséajlë'ëli' channö nu idxín queëli', en guíë libí'ili': "Buli'yútsöca', ni zoë' Cristo", o inná: "Ní' zoë'." ²⁴ Ulu'luí'i lógaquië' zían bönni' ta'zí' yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bē', en le ilún ga ulu'bani bönachi, ate' ila'zí' yé'enë' nupa gurö cazë' Dios channö huala'zéqui'në'. ²⁵ Buli'yútsöca', chigudxi caza' libí'ili' yúgu'të lë ni zí'atëlö ca si' ilaca. ²⁶ Que lë ni na', biti' irúajli' channö ila'dxín queëli' nupa ilë libí'ili': "Buli'yútsöca', ni zoë' Cristo lu lataj cá'asö." Lësca' caní, biti' tséajlë'ëli' channö ila'nná: "Buli'yútsöca', lu yu'u zoë'." ²⁷ Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljë' Bönachi. ²⁸ Ilácatë caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

Ca gaca cate' huödë' Bönni' Guljë' Bönachi

(Mr. 13:24-37; Lc. 21:25-33; 17:26-30, 34-36)

²⁹ Gunnë' ca' Jesús:

—Tödi yugu' dza ni' cate' ila'guí'i ila'záca' bönachi caní, ichul-la gubidza, ate' beo' biti' gunna bení' que. Ila'guínnajba' böljaj lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahui lúzxiba le gaca bē' huöda' neda', Bönni' Guljë' Bönachi, ate' ila'bödxi yechi' yúgu'të bönachi yödölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bē', en yöl-la' huáca zxon. ³¹ Ní'irö isöl-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'atë yödölió, en yúgu'të lataj znan lúzxiba.

³² 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inözili' chizóa idxín cusubá. ³³ Lësca' caní, cate' ilé'eli' taca yúgu'të lë ni, inözili' chizóa idxín dza údxi na', en chiridzaga lahui. ³⁴ Le nácatë rea' libí'ili', yúgu'të lë ni ilaca zí'atëlö ca ilátigaca bönachi nacuá' dza ni'. ³⁵ Huadödi quégaca lúzxiba, en luyú ni, pero yugu' xtídza'a biti' ila'dödi cá'asö.

³⁶ 'Cate' idxín dza ni' cuntu nu nözi. Biti' nözguequinë' gubáz lá'ayi queë' Dios nacu'ë yehua' yubá, en biti' nözda' neda', Zxí'inë' Dios, pero tuzë' Dios Xuz nözinë'.

³⁷ 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi. ³⁸ Yugu' dza ni' zí'atëlö ca si' idxín nisa guiój le busuniti yödölió, gulë'aj gulahuë', bulu'tsaga ná'agaquië', en bulu'dödë' zxi'inigaquië'

lu yöl-la' rutsaga na' ga bidxintë dza guyázië' Noé lë'e barco zxon ni' benë',
³⁹ en biti' guléquié' enë' cate' bidxintë nisa guiój le busuniti yödölió, ate'
 gula'nítië' yúgu'të'. Lësca' caní gaca cate' si' huöda' neda', Bönni' Guljé' Bönachi,
 cuntu nu guéquié'e. ⁴⁰ Dza huöda' ila'cu'ë chopë' bönni' la' guixi'. Tuë' uchë'a-
 në' quia', ate' ia'tué' ucá'ana'-në'. ⁴¹ Ila'cuá'anu chópanu nigula nacua'anu
 huëtu. Tunu uchë'a-nu quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nözili' bizxi dza huöda' neda', Xanli'. ⁴³ Na'a,
 guli'tséajni'i lë ni. La'tu' nözinë' xan yu'u bizxi dza guídë' gubán, huanë'ë yëla,
 en biti' gu'ë lataj nu quidaj zö'ö para cuan le dzö'ö lidxë'. ⁴⁴ Que lë ni na',
 buli'subán ládxi'li' ca' libí'ili', tu' huöda' neda', Bönni' Guljé' Bönachi, tu dza biti'
 nuzóa icjali'.

Bönni' huen dxin tsahui', en bönni' huen dxin biti' náquië' tsahui'
 (Lc. 12:41-48)

⁴⁵ Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin
 na', xanë' cu'ë lu në'ë bönachi nacua' lidxë' para gu'ë le ilágugaca cate' idxín
 dza? ⁴⁶ Bica' ba bönni' huen dxin na' náquië' tsahui', bönni' na', cate' udxinë'
 xanë', uduxáquië' lë' caní runë' le nudödë' xanë' lu në'ë. ⁴⁷ Le nácatë rea'
 libí'ili', yúgu'të le dë queë' xanë', udödë' lu në'ë bönni' huen dxin na' runë'
 caní. ⁴⁸ Channö huöáquië' bönni' huen dxin queë' huiá' dö', en sa' ládxië',
 innë': "Huadzenë' xana', en biti' huödatië'", ⁴⁹ en channö isí lahuë' gundë' zí'
 bönni' túnlenë' lë' tsözxön dxin, en isí lahuë' ca' gu'aj gágulenë' nupa ta'zudxi,
⁵⁰ ní'irö huödë' xanë' bönni' huen dxin na' tu dza cate' biti' zoë' ribözë', o tu yëla
 biti' réquinë'. ⁵¹ Ní'irö xanë' na' usaca' zídë'ë bönni' huen dxin na', en gunë' ga
 gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö
 cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

¹ Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca
 ca guca quégacabi' chibi' bi'i nigula ra'bando'. Gula'z'í'ibi' le nuá'gaca
 guí' quégacabi', ate' bila'rúajbi' tsöjtságagacabi' bönni' utsaga në'ë. ² Gáyu'bi'
 nácacacabi' bi'i biti' ta'yéajni'ibi' ate' ia'gáyu'bi' nasína'gacabi'. ³ Yugu' bi'i
 nigula biti' ta'yéajni'ibi' na' gula'z'í'ibi' le nuá'gaca guí' quégacabi' pero biti'
 guluá'abi' ia'lati' za régui. ⁴ Yugu' bi'i sina' na' guluá'abi' za régui lu böga'do'
 quégacabi' len le nuá'gaca guí' quégacabi'. ⁵ Tu' gudzenë' bönni' utsaga në'ë,
 gudödi yëla lógacabi', en gulásitëbi'. ⁶ Cate' bidxín idú guluhuëla, biyön chi'i
 nu rinnë zidzaj, rnna: "¡Chizë'ë bönni' utsaga në'ë! ¡Guli'rúaj tsöjtságali'-në'!"
⁷ Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí'
 quégacabi'. ⁸ Gulu'í'ibi' didza' bi'i biti' ta'yéajni'ibi' na', en gulëbi' yugu' bi'i
 sina' na': "Guli'gunna queëtu' láti'do' za régui queëli' tu' tu'úlu le nuá'gaca
 guí' queëtu' ni." ⁹ Bulu'bí'ibi' didza' bi'i sina' na', gula'nnabi': "Biti' gaca, tu'
 cabí bi' ugá'ana queëtu', en queëli'. Guli'tséajtsöca' ga ridó'o za régui, tsöj'ö'uli'
 queëli'." ¹⁰ Tsanni ni' söjácabi' söjxí'gacabi' le, bidxinë' bönni' utsaga në'ë.
 Yugu' bi'i na' nacua'abi' sina', en ta'bözabi' lë' gula'yú'ulentëbi' lë' ga na' raca
 laní que utsaga na', ate' la' guyáyajtë yu'u. ¹¹ Gudödi ni' ia'z'í'aröbi' bi'i nigula
 ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan,
 gusalaj queëtu'." ¹² Lë' bubí'ë didza', rnnë': "Le nácatë rea' libí'ili', biti' nözda'
 gazxi libí'ili'."

13 Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljë' Bönachi.

Rucúdzu'ë didza' Jesús ca naca que dumí zaca'

14 Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zi'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

15 'Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopá dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zi'tu'. 16 Guyijë' bönni' huen dxin na' guzxi'ë gayu' dumí nazaca' na', en yöjtíljalenë' le ia'gayu' dumí nazaca'. 17 Lësca' caní, bönni' na' guzxi'ë chopá dumí na', yöjtíljalenë' le ia'chopá ca'. 18 Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

19 'Cate' chigudzé, budxinë' xángaquië' bönni' huen dxin na', ate' bucá'analënë' légaquië' tsahui'. 20 Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíljalena' le." 21 Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzëjalenu' neda'." 22 Gudödi ni' bidxinë' ca' bönni' huen dxin na' guzxi'ë chopá dumí nazaca', ate' rnnë': "Xan, chopá dumí gulú'u lu na'a. Ni dë ia'chopá dumí ca' yöjtíljalena' le." 23 Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzëjalenu' neda'." 24 Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu rulapu' ga bití' guzu', en rutubu' ga bití' guchilju'. 25 Que lë ni na' gúdxida' li', ate' guyija', yöjchá'a dumí quiu' lu yu. Ni dë na'a le nequi quiu'." 26 Ní'irö bubí'ë didza' xanë', en rë' lë': "Nacu' huen dxin bití' naca tsahui', en xöhuëdi. Nöz quézinu' rulapa' ga bití' guza', en rutuba' ga bití' guchilja'. 27 Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'gulíjalenë' le ia'lati', para cate' huöda' neda', uzi'a le nequi quia' len icja ca'." 28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí." 29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'e, la's dui le dë queë' idúa. 30 Na'a, bönni' huen dxin bití' naca tsahui' ni, guli'tsöjchú'una-në' ní'ilo ga naca chul-la. Ni' cödxí yéchë'ë, en gagu zxea láyë'ë.

Cristo uchi'a usöröë' quégaca bönachi

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. 32 Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'. 33 Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla. 34 Ní'irö, neda', bönni' unná bë', guía' nupa nacuá' cuita lë'a ibëla, inniá': "Guli'dá ga zoa', libí'ili' bubéajë' Xuza' libí'ili' quez queë'. Nequi queëli' lataj ga na' rinná bë'ë, lë na' bupë'ë queëli' dza ni'te cate' ni' benë' yödzölió. 35 Caní nequi queëli'

tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. ³⁶ Biyadzaj le gácuá', ate' bugáculi' neda' le ráculi'. Güí'ida', ate' buduyúli' neda'. Guyu'a lidxi guíë, ate' buduyúli' neda'." ³⁷ Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güí'inu', o guyú'u lidxi guíë, ate' buduyútu' Li'?" ⁴⁰ Ubi'a didza' neda', bönni' unná bë', ate' guía' légaquië': "Le nácatë rea' libí'ili', tu' benli' caní queë' nu bönni' böcha'ado' ni, sal-la' náquië' bönni' cá'asö, quia' neda' caz benli' ca'."

⁴¹ 'Ní'irö guía' nupa nacua' cuita lë'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' biti' ulu, lë na' bupé'ë Dios ni'a que tu' xihui', en quéguequi gubáz dá'gaca le. ⁴² Caní gaca queëli' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. ⁴³ Guca' ca bönni' ridé' zi'tu', ate' biti' gulú'uli' neda' lídxili'. Biyadzaj le gácuá', ate' biti' bugáculi' neda' le ráculi'. Güí'ida', enca' guyu'a lidxi guíë, ate' biti' buduyúli' neda'." ⁴⁴ Ní'irö ila'nná ca' nupa na', ilë neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zi'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" ⁴⁵ Ní'irö ubi'a didza' neda', bönni' unná bë', guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacua' ni, sal-la' naca cá'asö nu na', biti' bi benli' quia' neda'." ⁴⁶ Ní'irö bönachi tuá' dö' na' la' tsöjtsázagacatë ga ni' ila'guí' ila'záca'tica'sö, pero bönachi tsahui' ni' gata' yöl-la' na' bán idú quéguequi.

26

Tun xtídza'gaquië' bönni' yudo' ila'zönë' Jesús (Mr. 14:1-2; Lc. 22:1-2; Jn. 11:45-53)

¹ Cate' budxi bë'ë Jesús yugu' didza' ni, gudxë' yugu' bönni' usëda queë',
² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás. ⁴ Ni' gulún xtídza'gaquië' ila'zönë' Jesús, lu yöl-la' rizi' yë' quégaquië', para ilútië' Lë'. ⁵ Ta'nnë':

—Biti' gunru' lë ni dza laní, para cabí ila'dzatsa bönachi.

Tu nigula rigú'unu le rilá' zxixi icjë' Jesús (Mr. 14:3-9; Jn. 12:1-8)

⁶ Cate' ni' zoë' Jesús lu yödzö Betania lu yu'u lidxë' Simón, bönni' na' güi'inë' huë' nudzu' ruzödi, ⁷ bidxinnu cúdzu'lë' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. ⁸ Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'. ¹¹ Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gáti'tës luyú yödzölió

ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu në'ë Judas udödë' Jesús lu ná'agaquië' bönni' unná bë'
(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá' analenë' lë' tsahui' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'
(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígú'ë bönni' usëda queë' Jesús ga zoë', en të' Lë':

—¿Gazxi rë'ënu' tsöj pá'atu' queëru' para gáguru'-ba' bö'cu' zxi'la'do' dzö' Laní Pascua?

¹⁸ Jesús rë' légaquië':

—Guli'tséajtsöca' yödzo ni' ga na' zoë' tu bönni', en guli'guíë': “Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxi'la'do' dzö' Laní Pascua.”

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

²⁰ Cate' chigudzö' dza na', Jesús gurö'lenë' idxínnutë' bönni' usëda queë' tahuë'. ²¹ Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ladjali' ni udödi neda'.

²² Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'. ²⁴ Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

²⁵ Ní'irö bubí'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, lí' na'.

²⁶ Tsanni ni' tahuë', gudélë'ë Jesús yöta xtila, en gudxë' Dios: “Xclenu'.” Ní'irö buzzuxjë' le, en bunödzejë' quégaquië' bönni' usëda queë', rnnë':

—Guli'sí, guli'gagu. Lë ni le naca caza'. Ca bena' que yöta xtila ni ruluí'i ca gaca que le naca caza'.

²⁷ Gudélë'ë ca' tu zxi'ga'do', en gudxë' Dios: “Xclenu'.” Ní'irö bunödzejë' ca' quégaquië', rnnë':

—Guli'gui'aj yúgu'tëli'. ²⁸ Lë ni ruluí'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'. ²⁹ Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro bití' núnbë'ë Lë'
(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo.

³¹ Ní'irö Jesús rë' légaquië':

—Yúgu'téli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: “Guna' ga gátië' Bönni' Uyú Bö'cu' Zxila', ate' ilásilasiba' bö'cu' zxila' na'.” ³² Cate' ubana' lu yöl-la' guti, ní'irö tséaja' tsöjnörua' loli' saca' luyú Galilea.

³³ Ní'irö bubi'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' xzí'inë' Zebedeo, ate' gusí lahuë' ruhuí'innë', en risëbi ládxe'ë. ³⁸ Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ládxi'. Guli'gá'ana ni, en guli'ná' yëla tsözxön len neda'.

³⁹ Gudödë' Jesús ia'látido' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacué bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'? ⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí güf'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuídi'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxi'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'. ⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunny luzuí, ate' tuz ca gunnë' zí'alö rnnë'. ⁴⁵ Leyúbölö böajë' ga na' nacué bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. ⁴⁶ ¿Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'ché'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guië tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasöl-la'gaquië' légaquië'. ⁴⁸ Judas, bönni' na' rudödë' Jesús, chibuluí'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotè' Lè'. ⁵⁰ Jesús rè' lè':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. ⁵¹ Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo. ⁵² Jesús gudxë' lè':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca. ⁵³ ¿Naru' cabí nözinu' huáca ulidza' Xuza', ate' Lè' la' isöl-la'të' zióntërö ca chinnu cö' gubáz lá'ayi le naca zión gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'. ⁵⁶ Raca caní yúgu'të lè' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lè', en bulu'zxúnnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zóngaqüë' Jesús gula'ché'ë Lè', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'. ⁵⁸ Pedro söjnáhuë' Jesús zí'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gátië'. ⁶⁰ Cuntu nu bila'dzölinë' sal-la' bila'dxinë' bönni' zión, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizi' yë' quégaquië' gula'nnë' queë', ⁶¹ ta'nnë':

—Bönni' ni gunné': "Huaca uquínna' yudo' queë' Dios, ate' uchisa' le ia'tsonna dzasö."

⁶² Ní'irö guzuínë' bixúz lo na', en rè' Jesús:

—¿Naru' cabí rubí'itso' didza'? ¿Bizxi caz lè' ni ta'nnë' bönni' ni quiu'?

⁶³ Jesús biti' bi gunné'. Ní'irö bixúz lo gudxë' Lè':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjö'i netu' channö nacu' Li' Cristo, Zxí'inë' Dios.

⁶⁴ Jesús rè' lè':

—Ca na' rnno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zí'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zí' bë'ë queë' Dios. ⁶⁶ ¿Nacxi rusáca'li' queéli'?

Bulu'bi'ë didza', gula'nnë':

—Nabáguë'ë xíguia' gátië'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', ⁶⁸ en të' Lè':

—¿Nácatso' Li' Cristo? Gunnëya'atsöca' na'a, ¿nuzxi na' gudapa' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoë, ate' rnnanu:

—Lësca' li' gudálenü' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni' gudálenë' ca' Jesús, bönni' Nazaret na'.

⁷² Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni.

⁷³ Iá'láti'do'os gudzé, gula'biga' nupa nacuá' ni' ga na' zoë Pedro, en të' lë':
—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

⁷⁴ Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' ni.

La' ná'asö gurödxitéba' böra. ⁷⁵ Ní'irö yöjnenë' Pedro didza' gudxë' Jesús lë', gunnë': Cate' si' cödxilöba' böra, tsonna luzuí chigunnó' biti' núnbë'u neda', ate' burúajë' Pedro ni', en gurödxí yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zëajni'inë' bönni' judío para ilútië' Jesús. ² Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', bu'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cö'ötu' böniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxië' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. ⁸ Que lë ni na', ga ridx-intë na'a dza nazí'i le lataj na', La' Yëla Rön. ⁹ Caní guca ca na' gunnë' Jeremías, bönni' bë'ë didza' uláz queë' Dios, gunnë': "Gula'guélé'ë chi uruá' dumí plata na', tsca le gula'zéqui'në' bönni' Israel Lë', ¹⁰ ate' dumí na' gulá'uinë' la' yëla queë' tu bönni' huen rö'ö. Lë ni bulu'inë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödz Roma, bönni' ni' gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rno'.

12 Cate' yugu' bixúz unná bē' len bönni' gula tu'zėjni'inē' bulu'zégui'ē Jesús didza', biti' bi didza' bubī'ē Jesús. 13 Ní'irō Pilato rē' Jesús:

—¿Naru' cabí riyóntsenu' cate' xō le ta'nnē' quiu'?

14 Jesús biti' bi didza' bubī'ē. Caní guca, bubáninē' bönni' unná bē' na'.

Rirugu queē' Jesús gátie'

(Mr. 15:6-20; Lc. 23:13-25; Jn. 18:38-19:16)

15 Cate' naca dza Laní Pascua na', dē caz tu le runē' Pilato, bönni' unná bē' na', ca ta'naba bönachi rusanē' tuē' bönni' yu'ē lidxi guíē, núti'tēs nu tē'ēni usanē'. 16 Dza na' tu bönni' nabáguē'ē xíguia', lē' Barrabás, yu'ē lidxi guíē ni'.

17 Cate' bulu'dubi bönachi zían ni', Pilato gunábinē' légaquiē', rnnē': —¿Nuzxi ré'ēnili' usana' queéli'? ¿Naru' Barrabás o Jesús, Bönni' na' lē' Cristo?

18 Caní gunnē' Pilato tu' réquibe'enē' bulu'dödē' bönni' yudo' Jesús lu nē'ē tu' tu'zxé'enē' Lē'.

19 Tsanni ni' rō'ē Pilato ga na' ruchí'a rusörōē', nigula queē' gusöl-la'nu nu tsöjödxi lē', rna:

—Biti' bi gunu' queē' bönni' tsahui' ni, tu' gúdxide'eda' guduyēla lu yēla béchigal tu' nözinē' Lē'.

20 Yugu' bixúz unná bē' len bönni' gula tu'zėjni'inē' gula'gú'u yöl-lē'ē bönachi zían na' para ila'nabi Pilato usanē' Barrabás na', ate' gútiē' Jesús.

21 Leyúbölö bē'ē didza' bönni' unná bē' na', rē' légaquiē':

—¿Núzxilē' chopē' ni ré'ēnili' usana'-nē' queéli'?

Gula'nnē':

—Barrabás.

22 Ní'irō Pilato gunábinē' légaquiē', rnnē':

—¿Nacxi guna' queē' Jesús, bönni' na' lē' Cristo?

Yúgu'tē' ta'nnē':

—¡Budē'ē lē'e yaga cruz!

23 Ní'irō bönni' unná bē' na' rē' légaquiē':

—¿Bizxi dö' benē'?

Zídzajrō gulu'ē didza', ta'nnē':

—¡Budē'ē lē'e yaga cruz!

24 Cate' réquibe'enē' Pilato biti' birúaj xtídzē'ē, pero gula'dzátarö bönachi, ní'irö gudélē'ē nisa, en gudibi nē'ē lógaquiē', rnnē':

—Biti' bi xíguia' nabága'a neda' tu' nözi yöl-la' guti queē' bönni' tsahui' ni. Le gun cázali' libí'ili' lē' ni.

25 Bulu'bí'i didza' yúgu'tē' bönachi ni', ta'nná:

—¡Yöl-la' guti queē' bönni' ni ibága'tu' netu', en ila'baga' ca' xzí'initu'!

26 Ca' guca, Pilato busanē' Barrabás na' lu ná'agaquiē'. Ní'irö gunná bé'enē' bönni' röjáquiē' gudil-la ila'guínē' Jesús, ate' gudödi ni' budödē' Lē' lu ná'agaquiē' para ulu'dē'ē Lē' lē'e yaga cruz.

27 Yugu' bönni' röjáquiē' gudil-la nacu'ē lu nē'ē bönni' unná bē' na' gula'ché'ē Jesús lu yu'u yúlahui' nazí'i le pretorio, ate' ni' bulu'tubē' yúgu'tē' bönni' röjáquiē' gudil-la nacu'ē ni' ga na' zoē' Jesús. 28 Ní'irö gula'lecjē' lari' nácuē' Jesús, en bulu'gácuē' Lē' tu lari' xiná chul-la, ca rácugaca nupa ta'nná bē'.

29 Bulu'dxiē' icjē' tu le néquini ni'a nē'e yaga yötsi' le naca ca le dxia icjē' bönni' rinná bē'ē, en bulu'zöē' tu guído' lu nē'ē ibēla le rulu'í' ca tu yaga que bönni' yúlahui'. Ní'irö bulu'zóa zxibē' lahuē', en bulu'titjē' Lē', ta'nnē':

—¡Bica' ba Li', rinná bé'enu' bönachi judío!

30 Ní'irö bulu'chejē' Lē' zxöna', ate' bulu'guélē'ē gui na', en gula'guínē' icjē'.

31 Gudödi bulu'titjē' Jesús, gula'lecjē' lari' na' nácuē', ate' bulu'gácuē' Lē' lari' que cazē'. Ní'irö gula'ché'ē Lē' para tsöjdá'agaquiē' Lē' lē'e yaga cruz.

*Tu'dě'ě Jesús lě'e yaga cruz**(Mr. 15:21-32; Lc. 23:26-43; Jn. 19:17-27)*

³² Cate' ni' bila'rúajě' bönni' na', yöjxáca'gaquiě' Simón, tu bönni' Cirene, ate' guluně' ga bi'ě yaga cruz queě' Jesús.

³³ Cate' bila'dxině' lataj nazi'i le Gólgota, le rna lu didza' xidza', Lataj Que Böga' Íjaru', ³⁴ bulu'gui'jě' Jesús nupi zi nutsí'i zxícala'aba' böa' guixi'. Cate' buxi'i ru'ě Jesús, biti' gú'unně' guí'jě'.

³⁵ Cate' chinudá'agaquiě' Lě' lě'e yaga cruz, gula'guísiě' lari' nácuě', en bulu'quitjě' lahui le gaca bě' núzxilě' guequi queě'. Caní guca, budxín lě na' gunně' bönni' bě'ě didza' uláz queě' Dios, gunně': "Gula'guísiě' lari' nácuá', en bulu'quitjě' lahui le gaca bě'." ³⁶ Ní'irö gula'bö'ě ni', tu'yúě' Jesús. ³⁷ Lěsca' bulu'zóě' lě'e yaga cruz ícjale' Jesús tu didza' le riguixjö' le nabáguě'ě le rna caní: "Bönni' ni Jesús, Bönni' rinná bé'eně' bönachi judío."

³⁸ Ga ni' dě'ě Jesús, bulu'dě'ě ca'lě'egaca yaga cruz chopě' bönni' gubán. Tuě' bulu'dě'ě cuita lě'ě iběla, en ia'túě' na' cuita lě'ě yögöla. ³⁹ Gula'dödě' ni' yugu' bönni' bulu'lidza zi'ě Jesús, en bulu'tá ícjagaquiě', tu'titjě' Lě', ⁴⁰ ta'nně':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Zxí'ině' Dios! ¡Bötjatsöca' lě'e yaga cruz na'!

⁴¹ Lěsca' caní bulu'titjě' Lě' yugu' bixúz unná bě' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'ině', ta'nně':

⁴² —Yugu' nu yúbölö busölě' bönni' ni, pero biti' gaca usölá cuině'. Channö náquiě' Bönni' inná bé'eně' bönachi Israel, huótjatsöquiě' na'a lě'e yaga cruz, ate' tséajlě'ěru' Lě'. ⁴³ Lě' buzxöni ládxe'ě Dios. Dios usölá cazě' Lě' na'a channö raza ládxe'ě Lě', tu' gunně': "Zxí'ině' Dios naca'."

⁴⁴ Lěsca' caní yugu' bönni' gubán na' dá'gaquiě' lě'egaca yaga cruz ga ni' dě'ě Jesús bulu'lidza zi'ě Lě'.

*Ratiě' Jesús**(Mr. 15:33-41; Lc. 23:44-49; Jn. 19:28-30)*

⁴⁵ Cate' bidxín huagubidza, guchul-la idútě' yödzölió ga bidxintě' idú ridödi xihuó. ⁴⁶ Idú ridödi xihuó na', bě'ě zidzaj didza' Jesús, rnně':

—Elí, Elí, ¿lama sabactani?

Didza' ni rna lu didza' xidza': "Dios quia', Dios quia', ¿bizx que nubéaj ládxi'u neda'?"

⁴⁷ Cate' nupa nacua' ni' bila'yöni didza' ni, ta'nná:

—Bönni' ni rulidzě' Elías, bönni' ni' bě'ě didza' uláz queě' Dios.

⁴⁸ La' guxíti'tě' tuě' bönni' núsě'ě ládjagaquiě', en gudělě'ě tu le bululu rizxupi nisa, ate' buxúpině' le nupi zi, en buzóě' le tu lu gui, ate' butságuíě' le ru'ě Jesús para xupě'. ⁴⁹ Ní'irö ia'zíca'rě' bönni' ni' ta'nně':

—¡Gulözagarö! ¡Uyútsöca'ru' channö huidě' Elías usölě' Lě'!

⁵⁰ Leyúbölö gurödxí'ě zidzaj Jesús, ate' burúajtě' bö' naca cazě', gútitě'. ⁵¹ La' ná'asö biröza'tě' lari' nal-la' lu yudo', birúaj choplö, le gudela' icjlö ga bidxintě' xiní'i. Ní'irö gudödi budó' zxu', en gula'lá'a guiöj. ⁵² Gula'yala' yeru ba quégaca nupa chinátigaca, nupa ni' gula'yéajlě' Dios, ate' bulu'bán bönachi na'. ⁵³ Gudödi bubaně' Jesús, bulu'rúajě' bönni' na' yeru ba quégaquiě', en gula'yáziě' yödzö lá'ayi Jerusalén, ga ni' bila'lě'e bönachi zían légaquiě'.

⁵⁴ Ní'irö gúdxině' bönni' na' rinná bé'eně' bönni' röjáquiě' gudil-la, enca' yugu' bönni' röjáquiě' gudil-la nacua'leně' lě' tu'yúě' Jesús, ate' gunně':

—Le nácatě' bönni' ni gúquiě' Zxí'ině' Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzě'ě luyú Galilea, ate' gulunnu xichině', gula'gú'unu le

gulahuë'. ⁵⁶ Lësca' María Magdalena, en María, xiná'agaquië' Jacobo, en José, nútsa'gacanu ladjagacanu, ate' zóanu ca' ni' xiná'agaquië' yugu' zxi'inë' Zebedeo.

Ta'gu'ë Jesús yeru ba le nadaj lë'e gu'a guiöj

(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. ⁵⁸ Bönni' ni yöjyüë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús. ⁵⁹ Guzxi'ë José Lë', en buchölinë' Lë' tu lari' nazaca'. ⁶⁰ Ní'irö gulu'ë Lë' lu yeru ba cubi queë' le naguidjë' lë'e gu'a guiöj. Budë'ë tu guiöj blaga zxön ga nu riyaza yeru ba na', ate' söhuöjë'. ⁶¹ Gula'cuá'anu María Magdalena, en ia'tunu María ni', rögacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

⁶² Cate' za' rení' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³ Të' Pilato:

—Bönni', röjnetu' bi gunné' bönni' rizi' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la' guti." ⁶⁴ Que lë ni na' gunná be'e nupa ilún chi'i ba ni' ga idxintë dza bunny, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: "Bubanë' Jesús lu yöl-la' guti." Channö caní gaca, didza' cabí nácatë ni ilu'ë gúntërö huiá' dö' ca ben didza' cabí nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' röjáquië' gudil-la. Guli'ché'ë queëli'. Guli'tséaj, guli'gún chi'i yeru ba na' tsa séqui'li' gunli'.

⁶⁶ Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. ² Tsárido'os gudödi budó' zxu'. Caní guca, tu' bötjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudüë' guiöj blaga zxön na', en gurö'ë lu guiöj na'. ³ Nalá' lahui gubáz lá'ayi na' ca yösa bení', ate' zxi'á'do'os naca lari' nácuë'. ⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxi'zië'. Gula'dzö'ë lu yu, en guláquië' ca bönni' nati caz. ⁵ Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' rugu'ljali'-në' Jesús, bönni' na' bulu'dë'ë lë'e yaga cruz.

⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. ⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë' cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácana söjtíxjöi'iguequinu yugu' bönni' usëda queë'. ⁹ Tsanni ni' söjácana, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'. ¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi'i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquië' gudil-la

¹¹ Tsanni ni' söjácanu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca. ¹² Cate' chibulu'tubë' yugu' bönni' gula tu'zéajni'inë', gulún xtídza'gaquië'. Ní'irö bulu'nödzjë' dumí zían quégaquië' bönni' na' röjáquië' gudil-la. ¹³ Të' légaquië':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'." ¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga bití' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu guí'ado' na' chibulu'i'inë' Jesús légaquië'. ¹⁷ Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'.

¹⁸ Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. ¹⁹ Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunlí' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. ²⁰ Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

DIDZA' DXI'A BUZÚAJĚ' MARCOS

Libán beně' Juan, bönni' buquile' bönachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Caní gusí lo didza' dxi'a ca guca queë' Jesucristo, Zxí'ině' Dios.

² Budxín lě na' buzúajě' lu guichi Isaías, bönni' bě'ě didza' uláz queë' Dios, le gunně' Dios:

Buyútsöca', risól-la'a bönni' gubáz quia', inöruë' Lo'.

Lě' upě'ě nōza ga tödu'.

³ Yön chi'ě tu bönni' ulidzě' zidzaj lu lataj cá'asö, inně':

“Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tödē'.”

⁴ Caní budxín, tu' ruquile' Juan bönachi nisa lu lataj cá'asö, en runě' libán para ila'dila bönachi nisa, bönni' na' bulu'bí'i lądxi'gaquiě' para uniti lahuě' Dios dul-la' nabága'gaquiě'. ⁵ Bila'rúaj bönachi zían yúgu'tě yödzö luyú Judea, enca' yödzö Jerusalén, en yöjáquiě' ga na' zoě' Juan, ate' Juan na' buquile' légaquiě' nisa lu yegu Jordán, bönni' na' gula'xóalěpě' dul-la' nabága'gaquiě'.

⁶ Náciu' Juan lari' néquini lítsa'ba' böa', en núguě'ě lě'ě tu guídi. Rahuě'-ba' böchi'zu, en re'jě' le zxixi que buzdo'. ⁷ Runě' Juan libán, rnně':

—Si' zě'ě bönni' tödi na'a, náparě' yöl-la' unná bě' ca neda'. Biti' naca' neda' lesaca' yéhua', para ilecja' xiráchuě' nudě'ě. ⁸ Neda' ruquila' libí'ili' nisa, pero Lě' guně' le rulu'isö yöl-la' ridila nisa ni, uchíziě' libí'ili' Dios Bö' Lá'ayi.

Ridilě' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yödzö Nazaret luyú Galilea, ate' Juan na' buquile' Lě' nisa lu yegu Jordán. ¹⁰ Cate' burúajě' Jesús lu nisa, la' ná'asö bilé'eně' gualaj lúzhiba, en ruhuötjě' Dios Bö' Lá'ayi, rulu'i cuiné' ca tuba' gu'dodo', en bidisóaleně' Lě'. ¹¹ Biyön chi'i nu ru'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza lądxa'a Li'.

Rě'ěni tu' xihui' gun ga ibáguě'ě Jesús dul-la'

(Mt. 4:1-11; Lc. 4:1-13)

¹² Ní'irö Dios Bö' Lá'ayi guchě'ě Jesús bayudxi lu lataj cá'asö. ¹³ Guzóě' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguě'ě Jesús dul-la'. Guzóě' Jesús ga ni' ta'daba' böa' guixi' dzö'öba' gu'ado'. Yugu' gubáz lá'ayi queë' Dios gulácaleně' Jesús, en gula'gu'ě le gudahuě'.

Rusédině' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudödi gula'gu'ě Juan na' lidxi guíě, sa'yéajě' Jesús luyú Galilea. Runě' libán ni' que didza' dxi'a ca rinná bě'ě Dios. ¹⁵ Caní rnně':

—Chibidxín dza. Chizóa idinná bě'ě Dios. Buli'bí'i lądxi'li', en guli'tséajlě' didza' dxi'a ni.

Rulidzě' Jesús tapě' bönni' uzxön böla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bönni' böchě'ě Simón na'. Nácagaquiě' uzxön böla, en ta'chiljě' yöxaj böla quégaquiě' lu nisa na'. ¹⁷ Jesús gudxě' légaquiě', rnně':

—Guli'dutá' neda', ate' guna' ga ichě'ěli' bönachi quia' neda', gunli' ca runli' rizönli'-ba' böla.

18 La' bulu'cá'anatë' yöxaj quégaquië', en söjácalenë' Jesús.

19 Gudödë' Jesús ia'láti'do' ní'ilö, ate' bilé'enë' Jacobo, en Juan, yugu' zxi'inë' Zebedeo, nacu'ë lë'e bárcodo' quégaquië', tu'únë' yöxaj böla quégaquië'. 20 Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' söjácalenë' Jesús.

Tu bönni' yu'u lë' bö' xihui'

(Lc. 4:31-37)

21 Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'. 22 Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. 23 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

24 —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

25 Jesús buzenë' le bach, rnnë':

—Busayaj ru'u, en burúaj lu bönni' ni.

26 Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë. 27 Bulu'bánninë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

28 La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anu nigula queë' Pedro

(Mt. 8:14-15; Lc. 4:38-39)

29 Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. 30 Ni' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. 31 Ní'irö gubígui'ë Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

32 Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. 33 Yúgu'të bönachi lu yödzö bila'guíró ga nu riyaza yu'u ga na' zoë' Jesús. 34 Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

35 Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. 36 Simón, en nupa nacuá'len lë' söjdíljagaquië' Jesús. 37 Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

38 Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

39 Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sédinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi
(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö ré'ënu', huáca unu' neda'.

⁴¹ Jesús buéchi' ládxe'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuöácu'.

⁴² Ca gunné' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busöl-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjluí' cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë na' uluí' bönachi chinuhuöácu'.

⁴⁵ Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, bití'rö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të yödzö bila'dxin ga na' zoë' Jesús.

2

Bönni' ré'enë' huë' nacú'unië' bin
(Mt. 9:1-8; Lc. 5:17-26)

¹ Cate' chigudödi chopá tsonna dza, buázië' Jesús yödzö Capernaum, ate' guzé didza' zoë' yu'u. ² La' bulu'dúbitë bönachi zían ga na' zoë' Jesús, ga bidxintë bití'rö guxzéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'. ³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. ⁴ Bití' guca ila'dxinë' lahuë' Jesús tu' nacúa' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yeru na', ni' bulu'zötjë' le denë' bönni' huë' na'. ⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

⁶ Rö'ögaquië' bal-lë' bönni' yudo' usedi ni'. Ta'zá ládxi'gaquië', ta'nnë': ⁷ ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. ⁸ La' gúquibe'etenë' Jesús le ta'zá ládxi'gaquië', ate' gudxë' légaquië':

—¿Bizx que rizá ládxi'li' caní? ⁹ Bití' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huóasë', en u'ë le denë', en uzë'e ni'ë. ¹⁰ Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

¹¹ —Li' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacúa' ni'. Bulu'bájinë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

Jesús rulidzë' Leví
(Mt. 9:9-13; Lc. 5:27-32)

¹³ Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. ¹⁴ Cate' ridödë' Jesús ni', bilé'enë' Leví, zxi'inë' Alfeo, rö'ë ga ruquíxjé' uláz que yödzö zítu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rö'ölengaquië' tsözxön Jesús, en yugu'

bönni' usëda queë'. Caní guca, tu' rōjaca bōnachi zián len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rō'ë rágulenë' tsözxōn yugu' bönni' uquízxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

¹⁷ Biyōnnë' Jesús didza' ni tu'ë, en gudxë' légaquië':

—Nupa nacué' dxi'a bití' naquíniguequi nu un bōnachi, pero nupa te'e naquíniguequi nu un bōnachi. Za'a neda', calëga dulídzagaca' bōnachi tsahui', pero rulídzagaca' bōnachi dul-la' para ulu'bí'i lādxi'gaca.

Ru'ë Jesús didza' que yöl-la' run gubasa

(Mt. 9:14-17; Lc. 5:33-39)

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacué' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. ²⁰ Idxín dza cate' udúë' bönni' na' rutsaga në'ë, en bíti'rō sóalenë' légaquië', ate' dza ní'irō ilunë' gubasa.

²¹ Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachōza' lari' tēbi na', ate' huarōza'rō lari' tēbi na'. ²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië' Jesús ta'lecjë' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' bönni' usëda queë' gula'sí lógaquië' ta'lecjë' do ga dxía zxoá' xtila. ²⁴ Ní'irō bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacué'len lë' ²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacué'lenë' lë'.

²⁷ Ní'irō Jesús gudxë' légaquië':

—Dios benë' dza lá'ayi le ulu'zí' xibé bōnachi, calëga benë' bōnachi para ilún chí'i dza lá'ayi. ²⁸ Que lë ni na', neda', Bönni' Guljë' Bōnachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sedë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacué'ë ni' tu'yúë' Jesús

channö únë' bönni' na' dza lá'ayi, tu' té'ennë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. ⁵ Ní'irö len yöl-la' rilé queë', buyúë' Jesús bönachi na' nacuá' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böacatë dxí'ado' në'ë. ⁶ Ní'irö bulu'rúajë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zían ra' nísado'

⁷ Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sójacalen Lë' bönachi zían narúajgaca luyú Galilea, en luyú Judea. ⁸ Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzo nacuá' idú gásibi'ilö ga nacuá' yödzo Tiro, en yödzo Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. ⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zían na' Lë'. ¹⁰ Caní guca tu' chibunë' zían nupa te'e, ate' bila'guirö bönachi zían na' ga zoë' para ila'gán Lë'. ¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

¹² Jesús buzenë' le bach bö' xihui' na', cabí ila'guixjö' nu náquië' Lë'.

Riböë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa rë'enë'. Gula'biguë'ë bönni' ni gásibi'ilë'. ¹⁴ Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán. ¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi. ¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzóë' ia'tú lágaquië', Boanerges, le rna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ruí'i ládxe'ë yödzo queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. ²⁰ Leyúbölö bila'guirö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. ²¹ Cate' di'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'nnë': Richixi icjë'.

²² Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? ²⁴ Channö ila' rúaj choplö bönachi tu yödzö, en ila' dí-lalen luzé' eguequi, biti' gaca idía' yödzö na'. ²⁵ Lësca' caní channö ila' rúaj choplö bönachi nacua' tu yu'u, en ila' dí-lalen luzé' eguequi, biti' gaca ila' dí' bönachi nacua' yu'u na'. ²⁶ Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Biti' gaca idía' yöl-la' unná bë' que, pero chizóa údxi que.

²⁷ 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

²⁸ 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága' gaca, en ca naca yúgu'të didza' schanní' ta'nná, ²⁹ pero nútí'tës nu innë schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunné' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús. ³² Bönachi zían na' rögaca cuitë' Jesús gulé Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

³⁴ Ní'irö buyüë' nupa na' rögaca gásibi'ilë', rnnë':

—Buli'yútsöca'. Nupa ni nátagaca ca xiná'a, en yugu' bönni' böcha'a. ³⁵ Nu run ca ré'ënë' Dios, nu ni naca ca bi'i böcha'a, en bi'i zana' enca' xiná'a.

4

Rucúdzu'ë didza' Jesús ca naca queë' bönni' guz

(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. ² Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³ —Guli'zë nágali' didza' ni. Birúajë' tu bönni' guz, söjësië' xisedo'. ⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguinnido', gulé'ajba' le. ⁵ Gulasi ia'bal-la xisedo' na' ga rö'ö guiöj ga biti' rö'ö yenni' yu. Bayön gula'lén xisedo' na' tu' cabí rö'ö yenni' yu. ⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzaj. ⁸ Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bö'. Bulu'nödzaj lë na' bësië'. Tu dxigu' xisedo' na' bësië' bunödzaj ia'chí uruá' xisedo' ca'. Ia'tú bunödzaj ia'tsónnalaj ca', ate' ia'tú na' bunödzaj ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

Rigúxjö'ë Jesús bizx que rucúdzu'ë didza'
(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxön idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'. ¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácgaca tuz len rë'u, ru'ilena' légaquië' didza' yugu' le rucúdzu'a didza'.

¹² Caní runa' para gaca lë na' nazúaj lu guichi lá'ayi, rnna: Ulu'yúë', en biti' ila'lé'enë'.

Ulu'zë nágagaquië', en biti' ila'yéajni'inë'.

Biti' ulu'b'i ládxi'gaquië' para gaca uniti lahua' légaquië' ca naca dul-la' nabága'gaquië'.

Rigúxjö'ë Jesús le bucúdzu'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zica'rö le ucúdzu'a didza'? ¹⁴ Bönni' guz na' náquië' nu ruzë xtídzë'ë Dios.

¹⁵ 'Nácgaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácgaca ia'bal-la bönachi ca xisedo' na' gulasi ga rö'ö guiöj. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxi'do'gaquië', ate' tu chí'sö ta'dë'ë le. Cate' bi raca quégaquië', o zoa nu ribía ládxi' légaquië' tu' ta'dë'ë didza' na', la' tu'huóatë ládxi'gaquië'.

¹⁸ 'Nácgaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', ¹⁹ pero tu'i ládxi'gaquië' le nácgaca que yödzölió ni. Nazi' yé'eguequinë' tu' nadxí'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácgaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'z'í lu ná'agaquië' le, ate' run dxin lu icja ládxi'do'gaquië'. Nácgaca bal-la bönachi caní ca xisedo' na' bulu'nödzaj ia'chí uruá' huéaj. Nácgaca ia'bal-lë' ca xisedo' na' bulu'nödzaj ia'tsónnalalaj ca', ate' nácgaca ia'bal-la bönachi ca xisedo' na' bulu'nödzaj ia'tú gayuá' ca'.

Rucúdzu'ë didza' Jesús que tu le rigú'u bení'
(Lc. 8:16-18)

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'.

²² Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'.

²³ Nu zoa nagui, en riyöni ral-la' uzé nagui.

²⁴ Gudxë' ca' légaquië':

—Guli'güí ládxi'li' le riyönili'. Ca naca le ruríxili', la' leze urixë' Dios queëli', ate' gunné' queëli' ia'lati'. ²⁵ Nu nazí'i le za' que, gu'ë que ia'lati', pero nu biti' nazí'i le, la's dui le dë que, udúa.

Rucúdzu'ë didza' Jesús ca rizxön zxoá' xtila

²⁶ Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxoá' xtila lu yu. ²⁷ Chi'i dzö'ölö rásië', en riyasë' cate' za' rení'. Ta'lén zxoá' xtila na', en ta'zxön, pero biti' nözinë' lë' nacxi raca ta'zxön. ²⁸ La' cuinsi luyú na'

ruxõn le nadúzgaca luyú na', zí'alõ xiyazi, ní'irõ za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajté' tsõjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza
(Mt. 13:31-32; Lc. 13:18-19)

³⁰ Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácatërõ cuidi' ca yúgu'të xisedo' dzõ'õ luyú, ³² pero cate' chinadúz, rilén, en rizzõntërõ ca yúgu'të guixi' cuan rõ'gaca luyú. Tsca run yana' ní'a në'e, gaca ila'dxinba' biguínido', en ulu'dxíaba' xicá'agacaba' lu zzul-la que.

Ca rugunë' dxin Jesús le rucúdzu'ë didza'
(Mt. 13:34-35)

³³ Caní guca, busédinë' Jesús légaquië', en zíanrõ ca' le bucúdzu'ë didza' tsca guca ila'yéajni'inë'. ³⁴ Yúgu'të didza' bé'lenë' bõnachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bõnni' usëda queë'.

Jesús ribequi dxíë' bö' budunu'
(Mt. 8:23-27; Lc. 8:22-25)

³⁵ La' dza ná'asõ, cate' ridzõ', Jesús gudxë' yugu' bõnni' dá'gaquië' Lë', rnnë':
—Tõditsõca'ru' ia'tsõlá'a nísado' ni.

³⁶ Ní'irõ bulu'lá'alënë' bõnachi zían nacuá' ni', ate' bulu'së'ë bárcodo' ga na' chizõasë' Jesús. Gula'cuá' ca' ni' ia'zica'rõ bárcodo' sõjácálen légaquië'. ³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. ³⁸ Dë' rásië' Jesús lu xicúgüë' ga naca xitsá'alõ lë'e bárcodo' na', ate' bulu'subanë' Lë'. Të' Lë':

—¿Bõnni' Usedi! ¿Naru' cabí ru'i ládxi'tso' netu'? ¿Huáti caztu' lu nisa ni!

³⁹ Ní'irõ guyasë' Jesús, en gunná bé'enë' bö' na' recja, gunné':

—Gurõ'õ dxi.

Gudxë' ca' nisa na', gunné':

—Dxisõ guzóa.

Gurõ'õ dxi bö' na' guyecja, en guzóa dxi lu nísado' na'. ⁴⁰ Ní'irõ Jesús gudxë' yugu' bõnni' dá'gaquië' Lë', rnnë':

—¿Bizx que radxi ridzõbili' caní? ¿Naru' cabí réajlë'ëli' Dios?

⁴¹ Ní' tádxinë' gulë' luzë'ë tuë' ia'tuë':

—¿Nuzxi caz bõnni' ni? ¿Tun bö' recja, en nísado' ca rnna xtídzë'ë!

5

Bõnni' Gadara yu'u bö' xihui' lë'
(Mt. 8:28-34; Lc. 8:26-39)

¹ Ní'irõ bila'dxinë' Jesús, en yugu' bõnni' dá'gaquië' Lë' ia'tsõlá'a nísado' ga naca lu xiyúgaca bõnachi Gadara. ² Cate' burúajë' Jesús lë'e bárcodo' na', tu bõnni' rirúajë' znan bulóaj ga nacuá' yeru ba la' dutságatë' Lë'. Bõnni' ni yu'u bö' xihui' lë', ³ ate' nun xilatjë' ga na' nacuá' yeru ba. Cuntu nu guca guga' bõnni' na', calëga len du guíë. ⁴ Zían luzuí bulu'zõë' bregui' guíë yen në'ë, en ní'ë, en gulúguí'ë lë' du guíë. Yugu' du guíë na' bulë'ë, ate' bregui' guíë na' guditsjë'. Biti' rizéqui'në' nu bõnni' inná bé'enë' lë'. ⁵ Ridática'së' ribõdxi'ë rëla, en tã dza ga na' nacuá' yeru ba, en gapa naca lu guí'ado', run huë' cuinë' yugu' lu guíõj dzõ'õ ní'. ⁶ Cate' bilë'enë' zë'ë zi'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. ⁷ Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayëpisëtërë'? Ní'a queë' Xanru' Dios ráta'yua' lo', biti' usaca' zi'u neda'.

⁸ Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

¹⁰ Gula'nabi yechi' yugu' bö' xihui' na' Jesús para cabí isöl-lë'ë léguequi zi'tu' luyú ni'. ¹¹ Nacuá'aba' cuchi zián lu guí'ado' ní'isö, ta'daba' táguba' ni'.

¹² Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

¹³ La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' gu'a, yöjcházagacaba' nísado'. Lu nísado' na' gula'yëpiba' nisa, gulátiba', en nácagacaba' ca galaj gayuá'aba'.

¹⁴ Ní'irö bulu'zxunnaj nupa ni' gulún chi'i cuchi zián na'. Yöjtíxjöi'igüequinë' bönachi lu yödzö ni', enca' bönachi nacuá' la' guixi' ni'. Bila'rúaj bönachi lu yödzö, söjyúgaquië' bizxi na' guca ni'. ¹⁵ Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. ¹⁶ Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quegacaba' cuchi na'. ¹⁷ Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

¹⁸ Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. ¹⁹ Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

²⁰ Söhuöjë' bönni' na', en ruzë' didza' yugu' yödzö Decápolis ca nácagaca le zxön benë' Jesús queë', ate' bulu'bani yúgu'të bönachi nacuá' yugu' yödzö ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

²¹ Cate' budxinë' Jesús ia'tsölá'a nísado' na', ní'irö bulu'dubi bönachi zián ga na' zoë' ra' nísado'. ²² Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë', ²³ en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

²⁴ Sa'yéajlenë' Jesús lë', ate' bönachi zián söjácalen Jesús, tu'quirö Lë'. ²⁵ Tu nigula, chinaca chinu iz ré'enu, zóanu ca' ni'. Biti' ruhuí'i rön queënu que huë' quegaca cázanu nigula. ²⁶ Yenni' chigudí'i guzxáca'nu lu ná'agaquië' zián bönni' tu'ünë' bönachi. Nítisö chibutönu dëra le dë queënu, tu' cabí bi gúcalen lënu, pero riyali' queënu. ²⁷ Cate' biyöninu tu'i didza' bönachi ca naca queë' Jesús, gudódinu ládjalö bönachi zián na', en bidxinu zaca' cúde' lë' Jesús, en gudannu lari' nácuë'. ²⁸ Caní bennu tu' rnnanu: "Channö cansa' le nácuë', huóaca'." ²⁹ La' buíitë rön queënu, ate' réquibe'enu chibóacanu que le guca queënu.

³⁰ La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zián na'. Rnnë':

—¿Nuzxi na' gudán neda'?

³¹ Ní'irö bönni' dá'gaquië' Lë' të' Lë', ta'nnë':

—Rilé'e quézinu' bönachi zián ni tu'quirö Li', en rnnatso': “¿Nuzxi na' gudán neda?”

³² Ruyúë' Jesús gásibi'ilë' para il'é'enë' nuzxi na' gudán Lë'. ³³ Ní'irö nigula na' gubíga'nu lahuë'. Rádxinu, en rizxízinu tu' chinózinu bi na' guca queénu, ate' buzóa zxíbinu lahuë' Jesús, en gúdxinu Lë' idútë le nácatë. ³⁴ Jesús rë'ë-nu:

—Nigúlado'. Chibóácu' tu' réajlë'u neda'. Böaj lidxu' idú ládXu'u. Tsaz nuhuóácu' que le guca quiu'.

³⁵ Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

³⁶ Biti' bë' ládXë'ë Jesús lë na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

³⁷ Biti' bë'ë lataj Jesús tsöjácálen Lë' ia'zíca'rö bönachi, pero légacasë' Pedro, en Jacobo, en Juan, böché'ë Jacobo na'. ³⁸ Cate' bidxinë' lidxë' bönni' na' rinná bë'ë ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'. ³⁹ Guyázië' Jesús, en gudxë' légaquië':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacué'len Lë', ate' guyázië' ga na' dëbi'. ⁴¹ Gudélé'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. ⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacué' ni'. ⁴³ Ní'irö Jesús gunná bé'enë' légaquië' cuntú nu ulu'siyönnë' lë na' guca. Gudxë' légaquië':

—Guli'gü' le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

¹ Buzë'ë Jesús ni', budxinë' ladzë', ate' yugu' bönni' dá'gaquië' Lë' söjácálenë' Lë'. ² Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zián ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácacaca bë' na' zá'gaca yehua' yubá? ³ Náquië' bönni' ni gubëdxi yaga na', en zxi'ininu María. Náquië' böchi'gaquië' Jacobo, en José, en Judas, en Simón. Nigula zanë' nacué'lennu ca' rë'u.

Que lë ni na' bulu'cá'anë' Lë' cá'asö. ⁴ Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi dí'a dza queë', en bönachi nacué' lidxë' bití' tun lë' bal.

⁵ Que lë ni na' bití' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. ⁶ Bubáninë' Jesús tu' cabí ta'yéajlë' Lë'. Gudödi na' gudödë' yugu' yöldzödo' nacué' gásibi'ilö, rusédinë' bönachi ni'.

Risöl-lë'ë Jesús bönni' dá'gaquië' Lë' tsöjéngaquië' libán

(Mt. 10:5-15; Lc. 9:1-6)

⁷ Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopá huéajgaquië'. Budödë' lu ná'agaquië' yöl-la' unná bë'

ulu'béajë' yugu' bö' xihui' yú'ugaca bönachi. ⁸ Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'. ⁹ Ral-la' ulu'dë'ë xiráchugaquië', pero calëga chopa lari' ulu'xóa yéngaquië'. ¹⁰ Gudxë' ca' légaquië':

—Gáti'tës ga tsú'uli' tu yu'u, guli'sóa yu'u na' cate' uzá'aröli' yödzö na'. ¹¹ Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë nágagaquië' xtídza'li', buli'rúaj ni', en buli'quínaj bëchtö da' lë'e lábali'. Lë ni gaca bë' nabága'gaquië' xíguia'. Le nácatë rea' libí'ili', cate' idxín dza ichúguië' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'záca' bönachi Sodoma, en Gomorra, yugu' yödzö na' busunítië' Dios.

¹² Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládxi'gaca bönachi. ¹³ Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

Ca bëtigaquië' Juan, bönni' buquilë' bönachi nisa
(Mt. 14:1-12; Lc. 9:7-9)

¹⁴ Biyönnë' Herodes, bönni' unná bë', ca naca le runë' Jesús, tu' rizë didza' gáti'tës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunné' Herodes tu' gusöl-lë'ë lë cazë' bönni' yöjxóngaqië' Juan na', ate' gulúgui'ë lë' du guíë lu yu'u lidxi guíë. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudúë'-nu Herodías na', en butsa ná'alënë'-nu.

¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusí gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu ²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chí'ë lë', en buzë náguië' lë' idú ládxi'ë sal-la' lë na' rnnë' Juan ben ga gurö'ë böniga Herodes na'. ²¹ Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' náca'gaquië' lo luyú Galilea. ²² Guyázabi' bi' i nigula queënu Herodías ga na' tē'aj tahuë', en buyá'abi' lógaquië'. Guyaza ládxi'ë Herodes ca runbi', en gula'yaza ládxi'gaca ca' nupa tē'aj tágulen lë'. Ní'irö Herodes gudxë'-bi' bi' i nigula na', gunné':

—Gunaba bi ré'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatēbi' ga na' zoë' Herodes, en rēbi'-nē':

—Rē'ēnda' ixú' quia' na'a lu zxiga' zxön icjē' Juan, bönni' na' buquile' bönachi nisa.

²⁶ Ní'irō buí'innē' Herodes, pero tu' buzötjē' Dios, en tu' bila'yöni ca' nupa tágulen lē', bití' gú'unnē' initi xtídzē'ē na' guzxi' lu nē'ē queēbi'. ²⁷ Herodes la' gusöl-la'tē' tu bönni' rejē' gudil-la zoë' rapa chi'ē, ate' gunná bé'enē' lē' tsöjxi'ē icjē' Juan. ²⁸ Bönni' na' rejē' gudil-la guyijē' lidxi guié, yöjrixē' yen Juan na', ate' bu'ē icjē', nuxóē' le tu lu zxiga' zxön. Budödē' le lu ná'abi' bi'i nigula na', ate' lēbi' bunödzbabi' le queēnu xiná'abi'.

²⁹ Cate' bönni' dá'gaquiē' Juan na' bila'yönnē' didza' chiguca lē na', bila'dxinē' ni', en bulu'ú'ē lē', ate' yöjčáchi'gaquiē' lē' yeru ba.

Rugahuē' Jesús zíanrō ca chi-un gayuá' bönachi

(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubē' bönni' gubáz queē' Jesús ga zoë', en gula'guíxjöi'inē' Lē' yúgu'tē le gulunē', en yugu' le bulu'sēdinē' bönachi. ³¹ Nacuá' bönachi zían ni', nupa zá'gaca, en nupa sōjaca, ga bidxintē bítí'rō dē lataj ilahuē' Jesús, en yugu' bönni' dá'gaquiē' Lē'. Que lē ni na' Jesús gudxē' légaquiē', rnnē':

—Guli'dá. Uyéaj cázaru' ga naca lataj cá'asō, en uzí' lādxi'ru' tu chi'i.

³² La' légacasē' yöjáquiē' tu lē'e bárcodo', ate' bila'dxinē' tu lataj cá'asō. ³³ Bila'lē'e bönachi zían légaquiē' sōjáquiē' ni', en núbē'gaca Jesús. Que lē ni na' bönni' yúgu'tē yödzō ni' carelō yöjáquiē' ni'. Gula'zē'e ní'agaquiē', ate' bila'dxinē' ni' zí'atēlō ca Jesús, en yugu' bönni' dá'gaquiē' Lē'. ³⁴ Cate' burúajē' Jesús lē'e bárcodo' na', bilé'enē' bönachi zían na', ate' buéchi' lādxi'ē légaquiē' tu' náca'gaquiē' ca bö'cu' zxi'la'do' bití' zoa nu gapa chi'i légacaba'. Gusí lahuē' rusēdinē' légaquiē' le zían. ³⁵ Cate' chiridzō' dza na', yugu' bönni' dá'gaquiē' Jesús bila'dxinē' ga zoë', en tē' Lē':

—Chiridzō', ate' lataj cá'asō naca ni. ³⁶ Busöl-la' bönachi zían ni para tsōjaca yugu' yú'udo', en yugu' yödzōdo' nacuá' gásibi'ilō, tsöjō'ugaca yöta, tu' cabí bi dē ni le ilagu.

³⁷ Bubi'ē didza' Jesús, gudxē' légaquiē':

—Guli'güi' libí'i cázali' le ilahuē'.

Gulē' Lē':

—¿Naru' tsöjō'utsatu' yöta xtila len lászjatu' que idú xunu' beo', ate' güi'itu' le ilahuē'?

³⁸ Jesús gudxē' légaquiē':

—¿Bal-laxi yöta xtila dē queéli'? Guli'tsöjyútsöca'.

Cate' chinóziguequinē', tē' Lē':

—Gáyu'sō yöta xtila dē, en chópasöba' böla dēba'.

³⁹ Ní'irō gunná bē'ē Jesús ilunē' ga ila'bō' bönachi zían na', ila'cuá' tu cō' huéajguequi ga naca lachi' lu daca'. ⁴⁰ Gula'cu'ē tu cō' huéajgaquiē', tu gayuá' huéajgaquiē', en chi-un huéajgaquiē'. ⁴¹ Ní'irō gudélē'ē Jesús igáyu'tē yöta xtila na', en irópaba' böla na'. Buyúē' zaca' lúzxiba, en gudxē' Dios: "Xclenu'." Ní'irō buzzuxjē' yöta xtila na', en bē'ē quégaquiē' bönni' usēda queē' para ila'guísiē' quégaca bönachi zían na'. Gudísiē' ca' irópatēba' böla na' quégaca yúgu'tē bönachi na'. ⁴² Gulahuē' yúgu'tē, en bulu'huöljanē'. ⁴³ Ní'irō bulu'tubē' le bizxaj que yöta xtila na', en quégacaba' böla, ate' chinnu ga'bōra bulu'lié'. ⁴⁴ Guláquiē' ca chi-un gáyu'ē bönni' na' gulahuē'.

Rizē'e ni'ē Jesús lu nísado'

(Mt. 14:22-27; Jn. 6:16-21)

⁴⁵ La' bentē' Jesús ga gula'benē' yugu' bönni' dá'gaquiē' Lē' lē'e bárcodo', para ila'nōruē' lahuē', ila'dödē' lu nísado' na', para ila'dxinē' lu yödzō Betsaida,

tsanni ni' Lë' rusöl-lë' bönachi zían na' lídxiguequi. ⁴⁶ Cate' chibudxi busöl-lë' légaquië', guyijë' tu lu gu'ado', ate' ni' ru'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gu'unnë' tödisë' ga na' nacu'ë. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë ⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'bánninë'. ⁵² Biti' ta'yéajni'ininë' le rulu'í lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruúnë' Jesús nupa te'e lu yödzö Genesaret
(Mt. 14:34-36)*

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yójaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. ⁵⁶ Gáti'tës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nōza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huöácate' dxí'ado'.

7

*Le tun ga bití' náca'gaca bönachi tsahui' lahuë' Dios
(Mt. 15:1-20)*

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, bití' nuchí'agaquië' ná'agaquië', lë na' rnná: Bití' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zícá'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', bití' ca' tahuë'. ⁴ Cate' tu'dxinë' röj'ö'ugaquië' lu yë'ëyi, channö cabí ta'guibë' lë na' ca nalëbiguequinë' tunë', bití' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yö'öna, en yugu' zxiga' guíë, en yugu' le tátí'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta bití' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queéli'. Buzúajë' lu guichi, gunné': Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Ní'ti'sö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bē'ē Dios, ate' runli' yugu' le nazí' láhuili' lu ná'agaca bōnachi.

⁹ Gudxē' ca' légaquiē':

—Idú lādxi'li' rucá'anali' cá'asō le gunná bē'ē Dios para gunli' ca' naca le nulaga loli' runli'. ¹⁰ Moisés gunnē' caní: “Ben bal xuz xinó'o.” Gunnē' ca': “Nu ulidza zi' xuzi o xinē'e, guli'gútītē nu na'.” ¹¹⁻¹² Libí'ili' rnnali' caní: “Channō nu bōnni' guié' xuzē' o xinē'ē: Biti' gaca bi gunna' queēli', tu' naca Corbán.” (Didza' ni rna lu didza' xidza': Tu' nuzóa' quez queē' Dios yúgu'tē.) Ní'irō rnnali': “Biti' run bayudxi bi gunē' bōnni' na' quégaquiē' xuz xinē'ē.” ¹³ Caní naca, rucá'anali' cá'asō xtídzē'ē Dios para gunli' le nulaga loli' runli', yugu' le rudōdili' lu ná'agaca xz'ini xi'sóali'. Ziánrō ca' le caní runli'.

¹⁴ Ní'irō Jesús bulidzē' bōnni' zían na' nacu'ē ni', en rē' légaquiē':

—Guli'zē' nágali' didza' gu'a, yúgu'tēli', en guli'tséajni'i. ¹⁵ Biti' bi dē le riyaza nu bōnni' le gaca gun ga bití' náquiē' tsahui' lahuē' Dios, pero le rirúaj lē', lē ni gaca gun ga bití' náquiē' tsahui' lahuē' Dios. ¹⁶ Channō zoa nágali', en riyōnili', buli'zē' nágali'.

¹⁷ Cate' Jesús bulá'alenē' bōnachi zían na', guyu'ē tu yu'u, ate' yugu' bōnni' usēda queē' gula'nábinē' Lē' ca' naca lē na' bucúdzu'ē didza'. ¹⁸ Jesús gudxē' légaquiē':

—¿Riyádzjatsō ca' queēli' yōl-la' réajni'i? ¿Naru' cabí réajni'ili', yúgu'tē le riyaza nu bōnni', bití' gaca gun ga bití' náquiē' tsahui' lahuē' Dios? ¹⁹ Naca caní tu' cabí riyaza icja lādxi'da'ahuē', pero lē'ēsē' riyaza, ate' rurúaj lē'ē.

Tu' gunnē' caní Jesús, bulu'inē' rē'u naca dxi'a yúgu'tē le rē'aj ráguru'.

²⁰ Gunnē' ca' Jesús:

—Le rirúaj lu bōnni' run ga bití' náquiē' tsahui' lahuē' Dios. ²¹ Caní naca, tu' ta'rúaj icja lādxi'do'gaquiē' bōnni' yugu' le ta'zá' lādxi'gaquiē' le naca xihui', yugu' le tun ga tunē' dul-la' ta'guitsjē' xibá que yōl-la' nutsaga na', en yugu' le ruá' dō'. Tun ga tútiē' bōnachi, ²² en ta'banē', en ta'zē' lādxi'gaquiē' le dē que luzá'agaquiē', en tu'ē dō', en ta'zí' yē'ē, en tu'zxē'ē, en ta'nná' zī'ē que luzá'agaquiē', en tun ba zxōn cuíngaquiē', en tunē' le canōz. ²³ Yúgu'tē le xihui' caní ta'rúaj icja lādxi'da'ahuē' nu bōnni', en tun ga bití' náquiē' tsahui' lahuē' Dios.

Tu nigula izá'a réajlē'ēnu Jesús

(Mt. 15:21-28)

²⁴ Buzē'ē Jesús ni', ate' bidxinē' gala' ga nacuá' yōdzō Tiro, en yōdzō Sidón. Guyáziē' tu yu'u ni', en gú'unnē' cuntu nu inōzi, pero bití' ca' guca ucachí' cuinē'. ²⁵ Tu nigula zóabi' bi'i nigúlado' queēnu, yu'u bō' xihui' lēbi', biyōninu didza' rizē ca' naca queē' Jesús, ate' la' bídatēnu ga zoē' Jesús, en buzóa' xz'ibinu xini'ē. ²⁶ Nigula ni' bití' nácanu judío, pero nabábanu bōnachi Sirofenicia. Gúta'yunu lahuē' Jesús ubéajē' bō' xihui' na' yu'u-bi' bi'i nigúlado' queēnu.

²⁷ Ní'irō Jesús gudxē'-nu, rnnē':

—Bē' lataj ulu'huōlaj zí'alō nupa nácagaca ca' xz'ini xan yu'u, tu' cabí naca dxi'a ugúaru' yōta quégacabi' bi'i na', en chú'unaru' le lógacaba' bō'cu'do'.

²⁸ Bubí'inu didza' nigula na', gúdxinu Jesús:

—Ōn, Xan, pero yugu' bō'cu'do' nacuá'aba' zxani ga tágubi', táguba' le bizxaj tu'huōxaj ga na' tágubi'.

²⁹ Ní'irō Jesús gudxē'-nu, rnnē':

—Tu' gunnó' caní, huáca huōaju'. Chiburúaj bō' xihui' na' guyu'u-bi' bi'i nigúlado' quiu'.

³⁰ Cate' budxinu lídxinu, bilé'enu-bi' bi'i nigúlado' queēnu na', dēbi' lu da'a, en chinurúaj bō' xihui' na' guyu'u lēbi'.

Jesús ruúnë' tu bönni' nacödzuë', en biti' gaca innë'

³¹ Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea. ³² Bönachi ni' dujuá'gaca tuë' bönni' nacödzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'. ³³ Jesús bubéajë' lë' tsólá'aló ladjagaca bönachi na', ate' bunë'ë xibón në'ë yeru náguië' bönni' na'. Gurú'unë' zxóna'do', en gudanë' lúdxë'ë. ³⁴ Ní'irö buyúë' lúzxibálö, en gunné lúdxë'ë, rnnë':

—Efata.

Didza' hebreo ni rna lu didza' xidza': Guyalaj.

³⁵ La' böáljatë náguië', en la' buguítjatë lúdxë'ë, en gunnëtë' dxí'ado'. ³⁶ Jesús gunná bé'enë' légaquië' cuntu nu ilé' ca', pero tsca gunná bé'enë' légaquië', bulu'zëtëre' ca' didza' que lë na' benë'. ³⁷ Bulu'bánninë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tu'í didza' nupa biti' guca ila'nnë.

8

Rugahuë' Jesús zíanrö ca choá' gayuá' bönachi

(Mt. 15:32-39)

¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. ² Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacué'len neda' ni, en biti' dë le ilágugaca. ³ Channö usöl-la'a léguequi lúdxigaca ta'dunsö ca', huala'cuídí' la' nöza, tu' zá'gaca zi'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guízxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

⁶ Ní'irö Jesús gunná bé'enë' bönachi zían na' ila'bó' lu yu. Gudélé'ë gadxi yöta xtila na', ate' gudxë' Dios: "Xclenu'." Ní'irö buzxuzxjë' léguequi, en bë'ë quégaquië' bönni' usëda queë' para ila'guísië' lógaca bönachi zían na'. ⁷ Guta' ca' quégaquië' tu chópaba' böla cuidí'. Jesús gudxë' Dios: "Xclenu'", ate' gunná bé'enë' légaquië' ila'guísië' ca' léga'caba' lógaca bönachi. ⁸ Gulagu yúgu'të bönachi na', en bulu'huólaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. ⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lúdxigaca, ¹⁰ ate' gurenë' lë'e bárcodo' tsözxón len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulé'ënnë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. ¹² Gunnëda' lúdxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', biti' ca' ilé'eli' tu le naca bë' za' yehua' yubá.

¹³ Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsólá'a nísado'.

Le tu'sëdinë' bönni' yudo' naca ca cúa zi que yöta xtila

(Mt. 16:5-12)

14 Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. 15 Ní'irö Jesús buzéajni'inë' légaquië', rnnë':

—Buli'yútsöca' queëli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

16 Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

17 Réquibe'enë' Jesús le ta'nnë', ate' rë' légaquië':

—¿Bizx que ru'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'? 18 ¿Zóatsö guiöj loli', en bití' rilé'eli', en zóatsö guídi nágali', en bití' riyönili'? ¿Naru' cabí röjnétseli'? 19 Cate' ni' buzuxzja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

20 Gunnë' ca' Jesús:

—Cate' ni' buzuxzja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

21 Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

Jesús ruúnë' bönni' Betsaida nachul-la lahuë'

22 Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'. 23 Jesús gudélë'ë në'ë bönni' na' nachul-la lahuë', ate' guchë'ë lë' ní'ilo ra' yödzö. Ni' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

24 Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

25 Leyúbölö guxóa në'ë Jesús guiöj lahuë', ate' buyúdë'ë bönni' na' nachul-la lahuë', ate' böácatë dxí'ado' guiöj lahuë'. Na'a rilé'enë' dxí'ado' yúgu'të.

26 Ní'irö Jesús gusöl-lë'ë lë' lidxë', rnnë':

—Bití' tsöjdödu' lahui' yödzö, en cuntú nu guío' le bena' nu zoa lu yödzö ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

27 Gudödi na', bulu'zé'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

28 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

29 Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

30 Ní'irö Jesús gunná bé'enë' légaquië' cuntú nu ulu'siyönnë' Nu náquië'.

Rigúxjö'ë Jesús ca sí' ilútië' Lë'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zëajni'inë', en yugu' bixúz unná bë', en bönni' yudo' tu'sëdinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

³² Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. ³³ Buécjë' Jesús, en buyúë' ia'zíca'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' lãdxu'u biti' za' lu në'ë Dios, pero ca ta'zá' lãdxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacuá' ni', en gudxë' légaquië':

—Channö rë'ënë' nu bönni' të'ë neda', ral-la' uzöë' tsölá'alö le rë'ëni quëzinë', en gáquië' ca tu bönni' sa'yëajë' söjtë'ë lë'e yaga cruz, ate' ní'irö huáca të'ë neda'. ³⁵ Nu bönni' ruí'ida' lãdxë'ë yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. ³⁶ ¿Naru' uzi'tsë' xibé tu bönni' channö utubë' yúgu'të le dë yödzölió ni, pero uniti cuinë'? ³⁷ Biti' bi gaca unödzjë' tu bönni' le huóá'ui cuinë'. ³⁸ Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lëasca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacuá' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yöjáquië' tu lu guí'a sibi. Ní' bidzá'a ca riná' lahuë' Jesús lógaquië' yonnë' na'. ³ Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntu nu ra' lari' yödzölió ni gaca gun chiguíchido'os ca guca lari' na'. ⁴ Bulu'luí'i lógaquië' Elías, en Moisés, tuí'ilenë' Jesús didza'.

⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nözinë' bi na' rnnë', tu' tádxinë' bönni' usëda queë' Jesús na'. ⁷ Ní'irö gurö'ö böaj le gulú'u zxul-la légaquië', ate' biyön chí'i nu ruí'i didza' lu böaj na', rnna:

—Bönni' ni Zxí'ina'. Nadxí'ida' Lë'. Buli'zë' nágali' Lë'.

⁸ La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

⁹ Tsanni ni' yú'ugaquië' nöza, tu'dínnië' lu guí'a sibi na', Jesús gunná bë'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. ¹⁰ Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yëaj didza' na' bë'ë, gunné' ubanë' lu yöl-la' guti. ¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yëaj le nazúaj lu guichi rnna run bayudxi qui'i sáquë'ë Bönni' Guljë' Bönachi,

ate' cá'asö ulu'cá'ana bönachi Lë'? ¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'
(Mt. 17:14-21; Lc. 9:37-43)

¹⁴ Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacuá' bönachi zián ni', ate' bönni' yudo' tu'sëdinë' ta'díl-lalenë' yugu' bönni' usëda queë' na' didza'. ¹⁵ Cate' bönachi zián na' bila'lé'e Jesús, bulu'bani, en carelö zá'gaca ga na' zë'ë, dijödxi'gaca Lë': "Padiux."

¹⁶ Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

¹⁷ Bubi'ë didza' tu bönni' nútsë'ë lada'j bönachi zián na', rnnë':

—Bönni' Usedi, nachë'a-bi' bi'i bönni'do' quia' ni' quiu', yu'u lëbi' bö' xihui' le run ga biti' raca innëbi'. ¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zëqui'në'.

¹⁹ Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

²⁰ Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízité lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. ²¹ Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bí'ido' ré'ebi' caní. ²² Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

²³ Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

²⁴ La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

²⁵ Cate' bilé'enë' Jesús zá'gaca bönachi zián, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bíti'rö tsu'u lëbi'.

²⁶ Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'í didza' bönachi zián ni', ta'nná:

—Chinátibi'.

²⁷ Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

²⁸ Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús riguúxjö'ë leyúbölö ca si' ilútië' Lë'
(Mt. 17:22-23; Lc. 9:43-45)

³⁰ Cate' bulu'zě'ě Jesús, en yugu' bönni' dá'gaquiē' Lē' ni', gula'dödē' luyú Galilea. Biti' rě'ēnē' Jesús nu inözi ga na' zoē' ³¹ tu' rusēdinē' yugu' bönni' usēda queē'. Rē' légaquiē':

—Ulu'dödē' neda', Bönni' Guljē' Bönachi, lu ná'agaquiē' bönni' ilútiē' neda', pero tōdi gátia', cate' gaca tsonna dza ubana'.

³² Biti' gula'yéajni'inē' didza' ni rē' légaquiē', ate' tu' tádxinē', bití' bi gula'nábinē' Lē'.

Nu naca lo

(Mt. 18:1-5; Lc. 9:46-48)

³³ Ní'irō Jesús, en bönni' dá'gaquiē' Lē' bila'dxinē' yōdzō Capernaum, ate' tsanni ni' nacu'ē lu yu'u, Jesús gunábinē' légaquiē', rnnē':

—¿Bizxi didza' na' gudíl-lalen luzá'ali' cate' ni' yú'uli' nōza?

³⁴ Légaquiē' bulu'sayaj rú'ugaquiē', tu' gula'díl-lalen luzá'agaquiē' didza' la' nōza ni' núzxilōgaquiē' gáquiē' bönni' lo. ³⁵ Ní'irō gurō'ē Jesús, en bulidzē' idxínnutē' bönni' usēda queē'. Rē' légaquiē':

—Nu rě'ēni gaca lo ral-la' gaca ca tu bönni' cuídi'sō, enca' ca ni'a ná'ali' yúgu'tēli'.

³⁶ Ní'irō Jesús gudélē'ē-bi' tubi' bí'ido', en buzōē'-bi' gatsaj láhui'lō ga na' nacu'ē. Ní' runidē'-bi', rē' légaquiē':

³⁷ —Nu bönni' si' lu nē'ē tu bí'ido' caní tu' néquibi' quia', si' lu nē'ē ca' neda', ate' nu bönni' si' lu nē'ē neda', calēga néda'sō si' lu nē'ē, pero si' lu nē'ē ca' Xuza', Bönni' na' nasōl-lē'ē neda'.

Nu bití' ridá'baga' rē'u, rácalen rē'u

(Mt. 10:42; Lc. 9:49-50)

³⁸ Ní'irō Juan gudxē' Jesús:

—Bönni' Usedi, bilé'etu'-nē' tu bönni' rubéajē' yugu' bö' xihui', rugunē' dxin lo'. Gunná bé'etu' lē' bí'ti'rō gunē' ca', tu' cabí dē'ē rē'u.

³⁹ Ní'irō Jesús gudxē' lē':

—Biti' inná bé'eli'-nē', tu' channō zoē' nu bönni' runē' tu yōl-la' huáca le za' yehua' yubá, en rugunē' dxin La' neda', bití' ca' gaca bönni' na' innē' zī'ē quia'.

⁴⁰ Caní naca, nu bití' ridá'baga' rē'u, rácalen nu na' rē'u. ⁴¹ Núti'tēs nu gunna queéli' tu zxi'ga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

Zoa bōnadxi queēru' gunru' ga nu gun dul-la'

(Mt. 18:6-9; Lc. 17:1-2)

⁴² Gunnē' ca' Jesús:

—Núti'tēs nu gun ga gunbi' dul-la' tubi' bí'ido' caní réajlē'ēbi' neda', gácarō dxi'a ugal-la' nu na' guichi riyētu yaga yeni, en tsōjchú'una cuini lu nísado'.

⁴³ Channō tu no'o gun ga gunu' dul-la', guchugu le. Dxí'arō gaca quiu' tsōjtsáziu' ga su' ibanu' zoa tuz no'o, calēga zoa chopa no'o, ate' tsōjtsáziu' lu guí' gabila, ga ni' bití' ulu guí' que. ⁴⁴ Lataj ni' bití' ilátiba' buzuga' yú'ugacaba' nupa tsōjcuá' ni', ate' guí' na' bití' ca' ulu. ⁴⁵ Lē'sca' caní, channō tu ni'u gun ga gunu' dul-la', guchugu le. Gácarō dxi'a quiu', tsōjtsáziu' ga su' ibanu' zoa tuz ni'u, calēga zoa chopa ni'u, ate' tsōjtsáziu' lu guí' gabila, ga ni' bití' ulu guí' que. ⁴⁶ Lataj ni' bití' ilátiba' buzuga' yú'ugacaba' nupa tsōjcuá' ni', ate' guí' na' bití' ca' ulu. ⁴⁷ Lē'sca' caní, channō tu guí'ōj lo' gun ga gunu' dul-la', guléaj le. Gácarō dxi'a quiu' tsōjtsáziu' ga rinná bē'ē Dios zoa tuz guí'ōj lo', calēga zoa chopa guí'ōj lo', ate' tsōjtsáziu' lu guí' gabila. ⁴⁸ Lataj ni' bití' ilátiba' buzuga' yú'ugacaba' nupa tsōjcuá' ni', ate' guí' na' bití' ca' ulu.

⁴⁹ 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huöáca dxi'a yúgu'të bönachi. Lësca' caní, rë'ënë' Dios izxi'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. ⁵⁰ Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

10

Rusëdinë' Jesús que nu rulá' yöl-la' nutsaga na'

(Mt. 19:1-12; Lc. 16:18)

¹ Buzë'ë Jesús yödzö Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. ² Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usanë'-nu nigula queë'?

³ Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alënë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli', ⁶ pero cate' gusí lo rata' yödzölió, Dios benë' légaquië' bönni', en nigula. ⁷ Gunnë': "Que lë ni na' ucá'anë' bönni' xuz xinë'ë, en tsöjsóalënë'-nu nigula queë', ⁸ ate' chopë' ni ulu'huöáquië' ca tuz bönachi." Que lë ni na' bítirö nácagaquië' chopë' pero tuz chinácagaquië'. ⁹ Que lë ni na' ca', nu naca bönachi bití' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. ¹¹ Jesús gudxë' légaquië':

—Núti'tës bönni' ulá'alënë'-nu nigula queë', en utsaga ná'alënë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalënë'-nu zí'alö. ¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

¹³ Ní'irö bila'dxín bönachi ga zoë' Jesús dujuá'gaquië' bí'ido' quéguequi. Té'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'. ¹⁴ Cate' bilë'enë' Jesús lë ni, gulënë' légaquië', en gunné':

—Guli'güi'gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios. ¹⁵ Le nácate rea' libí'ili': Nu cabí sí' lu në'e le rinná bë'ë Dios ca runbi' tu bí'ido', bití' ca' tsaza ga ní' rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

18 Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. 19 Chinöz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

20 Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

21 Len yöl-la' dxi'i ladxi' queë', Jesús buyüë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

22 Cate' biyönnë' didza' ni, buí'innë', ate' söhuöjë' risëbi lãdxë'ë tu' dëda' yöl-la' tsahui' queë'.

23 Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

24 Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'zxöni lãdxi'gaquië' yöl-la' tsahui' quégaquië' ga rinná bë'ë Dios. 25 Nácarö böniga tsázië' nu bönni' rilë'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

26 Cate' bila'yönnë' didza' ni, bulu'bánnitëronë' ca'. Ta'nnë' la' légacasë':

—¿Nuzxi caz gaca ulá, channö?

27 Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

28 Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

29 Bubi'ë didza' Jesús, rnnë':

—Le nácatë rea' libi'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyüë', tu' runë' xichina' o tu' runë' libán que didza' dxi'a quia', 30 bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyüë', enca' yugu' le ila'bía lãdxi'gaca bönachi lë', ate' lu yödzölió si' za', gata' yöl-la' na'bán idú queë'. 31 Zián nupa nácgaca lo na'a, ilaca cuídí'sö ni', ate' nupa nácgaca cuídí'sö na'a, ilaca lo ni'.

Leyúbölö rigúxjö'ë Jesús ca si' ilútië' Lë'

(Mt. 20:17-19; Lc. 18:31-34)

32 Cate' ni' yú'ugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'. 33 Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'.

34 Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'
(Mt. 20:20-28)

³⁵ Ní'irö gula'bigüë'ë Jacobo, en Juan, zxí'inë' Zebedeo, lahuë' Jesús, en të Lë':

—Bönni' Usedi, ré'ënitü' gunu' queëtu' le inábatu'.

³⁶ Jesús gudxë' légaquië':

—¿Bizxi ré'ënili' guna' queëli'?

³⁷ Gulë' Lë':

—Cate' idxín dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nözili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idíalali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idíalali' ca' nisa, ⁴⁰ pero biti' dë lu na'a cöa' nu cuía cuita' ibëla, en nu cuía cuita' yögöla. Dios unödzejë' quégaquië' bönni' chinupë'ë quégaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. ⁴² Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzo, tu'zenë' bach bönachi, ate' nupa nácgaca lo ladjagaquië' ta'nná be'e luzë'eguequi. ⁴³ Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zica'röli', ⁴⁴ ate' nútí'tësölí' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

Jesús ruúnë' Bartimeo, bönni' lo chul-la
(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzo Jericó. Cate' ni' rurujë' Jesús yödzo ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, zxí'inë' Timeo. Rinabë' nu bi gúnna'sö queë'. ⁴⁷ Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, zxí'ini xi'sóë' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejë' bulidzë', rnnë':

—¡Zxí'ini xi'sóë' David! ¡Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' ré' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ladxu'u! ¡Guyaschi! ¡Rulidzë' li'!

⁵⁰ Ní'irö gurú'unë' tsólá'alö lari' naxóa yenë'. La' guyásatë', en bidë' ga na' zoë' Jesús. ⁵¹ Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huóálaj guiöj lahua'.

⁵² Jesús gudxë' lë':

—Böaj lidxu'. Chinuhuóácu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

11

Riyazië' Jesús yödzo Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzo Betfagé, en yödzo Betania, en ga na' dë ca' Guí'a Yaga Olivo. Ní'irö Jesús gusöl-lë'ë chopë' bönni' usëda queë', ² en rë' légaquië':

—Guli'tséaj lu yödzo'do' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lëba'. Guli'sedxi-ba', en guli'chë'-ba' quia' ni. ³ Channö nu bi guié libí'ili' tu' runli' lë ni, guli'guié nu na': "Xanru' riquinnë'-ba', ate' la' usöl-la'të'-ba' quiu'."

⁴ Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵ Nupa nacuá' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'chë'-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'.

⁸ Zían bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'í zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'!

¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyazië' lö'a yudo'. Cate' budxi buyüë' yúgu'të le nacuá' idú gásibi'ilö ni', burúajë' zaca' yödzo Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzo Betania, ridunë' Jesús. ¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' bití' bi yöjxáquië' le ribía. Xilágui'sö dxía tu' cabí ridxini dza cuía. ¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzo Jerusalén, guyazië' Jesús lö'a yudo', en gusi lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dodo'. ¹⁶ Biti' ca' bë'ë lataj nu bi guá', uzóa nöza ga naca lö'a yudo'. ¹⁷ Busëdinë' nupa nacuá' ni', rnnë':

—Nazúaj lu guichi lá'ayi, rnna: "Lidxa' si'í le, yu'u ga bönachi idútë yödzo'lió ulu'lidza Dios." Libí'ili' chinunli' le ca naca lídxigaca gubán.

¹⁸ Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, bití' bi gulunë' queë', tu' tu'bani yúgu'të bönachi ca naca le rusëdinë' Jesús.

¹⁹ Cate' chiridzö' burúajë' Jesús lu yödzo na'.

Ribidxi yaga higo bulidza zi'ë Jesús

(Mt. 21:20-22)

²⁰ Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí.

²¹ Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios. ²³ Le nácatë rea' libí'ili', channö nu bönni' guíë' guí'ado' ni: "Gucuíta ni, yöjsóa lu nísado'", en bití' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca. ²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queëli' lë na' rinábali', ate' gunnë' queëli'. ²⁵ Cate' ni' rulídzali'-në' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channö cabí uniti loli' bönachi, bití' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bë' dë lu në'ë Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lë' yöjhuöjgaquië' Jerusalén. Cate' ni' ridë' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. ²⁸ Gula'nábinë' Jesús, ta'nnë':

—¿Bizxi yöl-la' unná bë' dë lu no'o runu' yugu' lë ni? ¿Nuzxi caz budödi lu no'o yöl-la' unná bë' gunu' caní?

²⁹ Bubi'ë didza' Jesús, rë' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bë' rúnida' yugu' lë ni. ³⁰ ¿Nuzxi budödi lu në'ë Juan uquilë' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquië' tun xtídzagaquië' la' légacasë', ta'nnë':

—Channö innaru' Dios gusöl-lë'ë lë', guíë' rë'u: "¿Bizx que bití' guyéajlë'ëli' lë'?" ³² ¿Naru' guíëtsaru'-në': Gula'söl-lë'ë bönni' lë'?

Caní ta'zá' ládxi'gaquië' tu' tádxinë' le ilún bönachi zían nacuá' ni' tu' téquiquequi yúgu'të bönachi na' bë'ë didza' Juan na' uláz queë' Dios. ³³ Que lë ni na' gulë' Jesús:

—Bití' nöztu'.

Ní'irö Jesús gudxë' légaquië':

—Neda' ca' bití' quíxjöi'ida' libí'ili' bi yöl-la' unná bë' dë lu na'a rúnida' yugu' lë ni.

12

Rucúdzü'ë didza' Jesús ca gaca quégaca huen dxin bití' náca gaca tsahui'

(Mt. 21:33-46; Lc. 20:9-19)

¹ Ní'irö gusí lahuë' Jesús ruí'ilenë' yugu' bönni' dá'gaquië' Lë' didza' yugu' le rucúdzü'ë didza', rnnë':

—Guzóë' tu bönni', budë'ë lubá uva zían ga naca lu xiyúë'. Guléquië' lë'a que, en guchö'önë' tu röga' guiöj ga isíë' xisi uva na'. Budxië' tu yu'u gupa ga naca xitsá' ga nu uyú xiyúë' na'.

'Ní'irö budödë' xiyúë' na' lu ná'agaquië' huen dxin, ila'zi'ë gatsaj huéaj le unödzej, ate' guyijë' yödzö zi'tu'. ² Cate' bidxín dza ulu'chibë' le ribía, gusöl-lë'ë-bi' bi'i huen dxin tsöjxi'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'. ³ Ní'irö yugu' huen dxin na' gula'guélë'ë-bi' bi'i na', en gulundë'-bi' zi', ate' bulu'söl-lë'ë-bi' cá'asöbi'. ⁴ Ní'irö bönni' xan luyú na' gusöl-lë'ë-bi' ia'tubi' bi'i huen dxin queë', ate' bi'i ni bulu'laxë'-bi' guiöj. Bulu'lë'ë ícjabí'. Gulu'ë dö' queëbi'. ⁵ Ní'irö bönni' xan luyú na' gusöl-lë'ë-bi' ca'

ia'tubi' bi'i huen dxin queë', ate' bi'i ni gulútië'-bi'. Gusöl-lë'ë-bi' ca' ziánröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

⁶ 'Cúnturö nu nagá'ana queë' xan luyú na'. Nagá'anasibi' zxí'inë', ate' nadxí'ide'enë'-bi'. Ga yöjsetë, gusöl-lë'ë-bi' zxí'inë', rnnë': "Ilunë' bal zxí'ina'."

⁷ Ní'irö yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni." ⁸ Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ '¿Naru' cabí nulábanili' lë na' nazúaj lu guichi lá'ayi? Caní rna:

Guiöj na' gula'ru'unë' bönni' tu'cu'ë zö'ö, na'a naca guiöj len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zián nacuá' ni', en que lë ni na' bulu'cá'anë' Lë', söhuöjgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. ¹⁴ Bila'dxinë' bönni' ni ga na' zoë' Jesús, en tē Lë':

—Bönni' Usedi, nözitu' ru'u didza' idútë li. Biti' ru'i ládxi'u bi ta'nnasö bönachi, tu' cabí ruyusu' le tu'lu'isö cuínguequi bönachi, pero rusédinu' ca nácatë le rë'enë' Dios ilún bönachi. ¿Ru'i netu' lataj xibá queë' Moisés quíxaj laztu' le tu'quíxjé' uláz queë' César? ¿Naru' uguíxajtu' o bití' quíxajtu'?

¹⁵ Réquibe'enë' Jesús tu'ë didza' lu yöl-la' riguílaj ladxi' quégaquië', ate' rë' légaquië':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

¹⁷ Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bábinë' ca naca didza' bubí'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

¹⁸ Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulë' Jesús, ta'nnë':

¹⁹ —Bönni' Usedi, Moisés nuzúajé' queëru' lu guichi channö gátië' tu bönni' bití' zoa bi'i queë', ate' ugá'ananu nigula queë', bi'i böché'ë bönni' na' ral-la' utsaga ná'alénbi'-nu, en uzóabi' bí'ido' gácabi' bi'i queëbi' böchi'bi'.

²⁰ Gula'cuá'abi' gádxibi' bi'i ná'cagacabi' böchi'gacabi'. Bi'i huáca na' butsga ná'alénbi'-nu nigula, ate' gútibi', cuntú nu zoa bí'ido' queëbi'. ²¹ Bi'i buropi na' butsga ná'alénbi'-nu nigula uzëbi' na', ate' gútibi' ca', cuntú nu zoa bí'ido' queëbi'. Lësca' caní guca queëbi' bi'i bunny. ²² Caní guca, bulu'tsaga ná'alénbi'-nu yúgu'tëbi', cuntú nu zoa bí'ido' qué'gacabi'. Ga yöjsetë, gútinu' ca'

nigula na'. ²³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

²⁴ Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios. ²⁵ Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá. ²⁶ Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí' didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunnë' caní quégaquië', naca bë' nabángaqië' sal-la' gulátië' zí'alö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitëröli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ílenë' Jesús didza', en nözinë' dxí'ado' ubi'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rna: "Guli'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácatërö lo. ³¹ Le gunná bë'ë le naca buropi, lébisö ca naca. Caní rna: "Ral-la' idxí'inu' luzó'o ca nadxí'i cuinu'." Biti' ca' zoa ia'tú le gunná bë'ë le nácarö lo ca chopa ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë rno'. Tuzë' náquië' Dios, en cúnturö nu zoa naca Dios. ³³ Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bédxido' rútigacaru'-ba' lu bucugu lá'ayi queë' Dios, enca' ca yúgu'të böa' bédxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'látisö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi zxi'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusëdinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxi'ini xi'sóë' David?

³⁶ Lë cazë' David na' bë'ë didza', zóalenë' Dios Bö' Lá'ayi lë', gunnë':

Xanru' Dios gudxë' Xana':

"Gurö'ö cuita lë'a ibëla cate' gunra' ga ulu'zóa zxi'bigaca lo' nupa biti' ta'lé'e Li' dxi'a."

³⁷ ¿Naru' nácatsë' Cristo zxi'ini xi'sóë' David channö lë cazë' David na' rnnë' queë' náquië' Xanë'?

Bönachi zían nacuá' ni' tu'zë' nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sëdinë'

(Mt. 23:1-36; Lc. 11:37-54; 20:45-47)

³⁸ Ni' rusédinē Jesús yugu' bönni' dá'gaquiē' Lē, rē' légaquiē':
—Guli'gún chi'i cuinli' quégaquiē' bönni' yudo' tu'sédinē'. Ta'yaza lādxi'gaquiē' ta'dē' nilō na'lō, nácugaquiē' lari' tunna. Ta'yaza lādxi'gaquiē' ca' tu'lidza tsahui' bönachi légaquiē' gapa naca lu yē'ēyi. ³⁹ Ta'bō'ē yugu' lataj lo lu yu'u ga tu'dubē' tu'sedē' queē' Dios, enca' gapa tu'dubē' tē'aj tahuē'. ⁴⁰ Rugúagaquiē' lídxigacanu nigula uzēbi, en para ulu'lu'isō tsahui' cuíngaquiē', xidzé tu'lidzē' Dios. Bönni' ni, gúnda'rē' Dios légaquiē' xíguia'.

Le bunödjanu tu nigula uzēbido' queē' Dios

(Lc. 21:1-4)

⁴¹ Tsanni ni' rō'ē Jesús chila yudo' ga zoa gu'ina ga ta'gú'u bönachi dumí que yudó', ruyúē' ca tun bönachi ta'gú'u dumí lu gu'ina. Dumí zían ta'gu'ē bönni' dē yöl-la' tsahui' quégaquiē'. ⁴² Ní'irō bidxinnu tu nigula yechi' uzēbido' ni', ate' gulú'unu chopa dumí lásido', le nazáca'gaca láti'do'os. ⁴³ Ní'irō bulidzē' Jesús yugu' bönni' usēda queē', en rē' légaquiē':

—Le nácatē rea' libí'ili', nigula yechi' uzēbido' ni gulú'urōnu ca yúgu'tē nupa bi ta'gú'u lu gu'ina que yudo'. ⁴⁴ Yúgu'tē bönni' ni ta'gu'ē que le nagá'anasō quégaquiē', pero nigula ni, lu yöl-la' yéchi'do' queēnu gulú'unu idútē la's dui tsca le dēsō queēnu, le ral-la' gáhuinu.

13

Rigúxjö'ē Jesús ca si' ulu'quínajē' yudo'

(Mt. 24:1-2; Lc. 21:5-6)

¹ Cate' burúajē' Jesús chila yudo', tuē' bönni' usēda queē' gudxē' Lē, rnnē':
—Bönni' Usedi, buyútsōca' náctiga yugu' yu'u zxön ni, en náctiga yugu' guiöj lē'e zō'ō quéguequi.

² Bubi'ē didza' Jesús, rē' lē':

—Rilé'enu' yugu' yu'u zxön ni, pero biti' ca' ugá'ana guiöj lahui luzē'e ni, tu ulu'quínaj bönachi léguequi.

Le ilaca bē' cate' si' údxi que yödzülió

(Mt. 24:3-28; Lc. 21:7-24; 17:22-24)

³ Ní'irō yōjáquiē' Jesús, en yugu' bönni' dá'gaquiē' Lē' lu Gu'á Yaga Olivo, gu'á na' dē ca dōdilō ra' yudo'. Cate' chirō'ē Jesús ni', la' légacasē' Pedro, en Jacobo, en Juan, en Andrés, gulē' Lē', ta'nnē':

⁴ —Gudíxjö'i' netu' bātáxi ilaca lē ni. ¿Bizxi gaca bē' chizóa ilaca yúgu'tē lē ni?

⁵ Bubi'ē didza' Jesús, rusédinē' légaquiē', rnnē':

—Guli'gún chi'i cuinli' para cabí nu si' ye'e libí'ili'. ⁶ Ila'lá' lahuē' zían bönni' si' lágaquiē' ca lea' neda', ila'nnē' nácagaquiē' Cristo. Caní ila'zí' yé'enē' bönachi zían.

⁷ Ní'irō cate' yōnili' raca gudil-la nilō ná'alō, biti' gádxili'. Yúgu'tē lē ni ral-la' ilaca, pero biti' ridxini dza údxi. ⁸ Tu yödzü tíl-lalen ia'tú yödzü, en tu ga nu rinná bē' tsöjtíl-lalen ia'tú ga nu rinná bē'. Zían lataj tödi budó' zxu', en tsu'u gubín. Ila'tsatsa bönachi. Yugu' lē ni ilaca le isí lo ila'gu'i' ila'zaca' bönachi dza ni.

⁹ Ní'irō guli'gún chi'i cuinli', tu' ulu'dödē' libí'ili' lu ná'agaquiē' bönni' yúlahui'. Ila'guiné' libí'ili' gapa tu'dubē' tu'sedē' queē' Dios bönni' judío. Idxinli' lógaquiē' bönni' ta'nná bé'enē' libí'ili', en lógaquiē' bönni' ta'nná bé'enē' yödzü zi'tu'. Ilunē' caní queéli' tu' dá'ali' neda', pero gunli' ba nalí quia' neda' ni. ¹⁰ Zí'alō ca idxín dza údxi, run bayudxi gaca libán que didza' dxi'a quia' lógaca bönachi idútē yödzülió. ¹¹ Cate' ni' ila'ché'ē libí'ili', en ulu'dödē' libí'ili' lu ná'agaquiē' bönni' yúlahui', biti' gü'i' lādxi'li' bizxi innali'. La' dza ní'isō

Dios gunnë' queéli' didza' gü'ili', ate' lë ni innali'. Cate' ni' gü'ili' didza', calëga libí'isili' na' innali', pero Dios Bö' Lá'ayi innë'. ¹² Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacua'abi' bi'i quégaquië' ulu'dödë' la' zxi'inigaca cazë' ca', ate' zxi'inigaquië' na' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'. ¹³ Yúgu'të bönachi ulu'zóa libí'ili' tsólá'alö tu' dá'ali' neda', pero nülöli' guá' ilenli' lë na' ga idxinrö dza údxi, uláli'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsöjaca gapa naca lu guí'ado'. ¹⁵ Nu zoa ícjo'olö dza ni' ral-la' izxúnnajtë, en biti' huötaj zxan yu'u para tsöjzxi' bi' dë que lu yu'u. ¹⁶ Nu zoa la' guixi' ral-la' izxúnnajtë, en biti' huöaj tsöjzxi' lari' rixóa yeni. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxinu-bi' bí'ido'. ¹⁸ Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. ¹⁹ Yugu' dza ni' ila'guí'i ila'zaca' rö bönachi ca le guca zí'atëlö cate' si' guta' yödölió le benë' Dios ga ridxintë na'a dza, ate' dza zá'gaca biti' gaca caní. ²⁰ La'tu' cabí nunë' Dios ga ulu'huóaca nabábasö yugu' dza ni', cuntú nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

²¹ 'Na'a, channö nu gufé libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", biti' ca' tséajlë'ëli' nu na'. ²² Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'lu'ínë' le ilaca bë', en ilunë' yugu' yöl-la' huáca zxon. Huala'zí' yé'enë' ca' nupa gurö cazë' Dios channö ila'zéqui'në'. ²³ Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi
(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en biti' cu'u bení' beo'. ²⁵ Ila'guínnaj böljaj lúzxiba, en ila'zxizi le nálagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxon, en yöl-la' bení' quia'. ²⁷ Isöl-la'gaca'në' gubáz lá'ayi quia', ate' ulu'tubë' bönachi gurö caza' quia' nacua' idapa la'a yödölió, ga naguëla'të luyú bidxi, ga ridxintë ga naguëla' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e huë'ënido', en rubía xilagui' yulu, nözili' chizóa idxín beo' cusubá. ²⁹ Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo. ³⁰ Le nácate' rea' libí'ili', yúgu'të lë ni ilaca zí'atëlö ca ilátigaca nupa nacua' dza na'. ³¹ Huadödi que lúzxiba, en que luyú ni, pero xtídza'a catu caz tödi que.

³² 'Cate' idxín dza ni' o rëla ni', cuntú nu nözi. Biti' nözguequinë' gubáz lá'ayi nacua' yehua' yubá, en biti' nözda' neda', Zxi'inë' Dios. Tuzë' Dios Xuz nözinë'. ³³ Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni. ³⁴ Gaca ca raca cate' sa'yéajë' zi'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chi'i ga nu riyaza. ³⁵ Guli'sóa libí'ili' ban ladxi' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. ³⁶ Guli'gún caní, para cabí idixáquië' libí'ili' rásili' channö huödë' tsálido'os. ³⁷ Lë ni rea' libí'ili', rea' ca' yúgu'të bönachi: Guli'sóa ban ladxi'.

14

Tun xtídza'gaquië' bönni' yudo' ila'zönë' Jesús

(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'sö para ilútië' Lë'. ² Ta'nnë':

—Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús

(Mt. 26:6-13; Jn. 12:1-8)

³ Zoë' Jesús yödzö Betania, lu yu'u lidxë' Simón, bönni' güi'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús. ⁴ Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bizx que guca ditaj le zxixi na'? ⁵ La'tu' nu guti' lë na', huazí' que ia'lati' ca lázxjaru' que tu iz para nu quisi le quegaca bönachi yechí'.

Gula'nnë'dë'ë queënu.

⁶ Ní'irö Jesús bë'ë didza', rnnë':

—Guli'güi'-nu lataj. ¿Bizx que rinnë' zí'ili' queënu? Naca dxi'a le bennu quia'. ⁷ Nacuá'lentica'sö bönachi yechi' libí'ili', en bátati'tës guë'ënili', huáca gunli' dxi'a quégaquië', pero neda' bití' sóatica'sa' ga zóali'. ⁸ Tsca le guxzéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba. ⁹ Le nácatë rea' libí'ili', gátit'tës ga gaca libán que didza' dxi'a quia' idú yödzölió, soa nu quixjö' ca' lë ni bennu nigula ni quia'. Caní gaca para nu tsöjné lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹ Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahuë' yöta xtila bití' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpa'atu' le gáguru' xtsö' que Laní Pascua?

¹³ Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ní' huadzágali' tu bönni' nu'ë tu rö'ö nisa. Guli'tséajlenë'. ¹⁴ Ga na' tsázië', guli'guië' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?” ¹⁵ Ní'irö uluí'në' libí'ili' tu yu'u zxön ga naca buropí cuía ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

¹⁷ Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'. ¹⁸ Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

¹⁹ Ní'irö bulu'huí'innë', en gula'sí lógaquië' tu tuë' të' Lë':

—¿Naru' neda'?

Ia'tuë' ca' gunné':

—¿Naru' neda'?

²⁰ Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna. ²¹ Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le. ²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían. ²⁵ Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajë' sôjáquië' Guí'a Yaga Olivo. ²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rna: "Gutia'-në' uyú bö'cu' zxila', ate' ilásilasiba' bö'cu' zxila' na'." ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë. ³⁴ Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

³⁵ Ní'irö guzë'ë Jesús ia'látido', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. ³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

³⁷ Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? ³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuúdi'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunné'. ⁴⁰ Cate' böajë' leyúbölö ga na' nacu'ë, yöjxáquië' légaquië' tasië' tu' nadödité yëla lógaquië'. Biti' nözguequinë' bizxi didza' ulu'bi'ë, le ilë' Lë'. ⁴¹ Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tscá'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadóda' lu ná'agaca bönachi dulla'! ⁴² ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'. ⁴⁴ Judas, bönni' na' rudödë' Jesús lu ná'agaquië' chinulu'ínë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'chë'ë Lë' nadzunë'.

⁴⁷ Ní'irö tuë' bönni' ni' dë'ë Jesús guléajë' guíë tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'. ⁴⁸ Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán? ⁴⁹ Yugu' dza guzóalena' libí'ili' rusédigacada' bönachi ga naca chila yudo', ate' bití' guzxönli' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rizxúnnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' ⁵² pero busanbi' lari' na', en xiguídisöbi' buzúnnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. ⁵⁴ Pedro yöjnahuë' Jesús zítu' zítu'sö, en guyázië' lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guí'.

⁵⁵ Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero bití' bi bulu'dzölinë'. ⁵⁶ Bönni' zían gula'nnë' queë' Jesús le cabí nácatë, pero bití' yöjlozagaca le gula'nnë' queë'. ⁵⁷ Ní'irö gula'zuínë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyõnitu' didza' bē'ē bönni' ni, gunnē': "Uquínnaja' yudo' ni, lē ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi."

59 Lē'sca' lē ni, biti' yöjlözagaca xtídza'gaquiē'.

60 Ní'irö guyasē' bixúz lo na' gatsaj lähui'lö bönachi nacua' ni', en gunábinē' Jesús, rnnē':

—¿Naru' cabí rubi'itso' didza'? ¿Bizxi na' ta'nnē' quiu' bönni' ni'?

61 Jesús, dxisö zoē'. Biti' bi didza' rubi'ē. Gunábinē' Lē' leyúbölö bixúz lo na', rnnē':

—¿Naru' nacu' Li' Cristo, Zxí'inē' Dios Lá'ayi?

62 Bubi'ē didza' Jesús, rnnē':

—Naca'. Ilé'eli' neda', Bönni' Guljē' Bönachi, soa' cō'a cuitē' ibēla Dios napa cazē' yöl-la' huáca cate' ni' huöda' lu böaj lúzxiba.

63 Ní'irö bixúz lo na', lu yöl-la' rilé queē' guchözē' lari' nácuē', rnnē':

—¿Núzxirö naquíniru' nu quixjō'? 64 ¿Riyõn quézili' rucá'anē' Dios cá'asö len didza' ru'ē! ¿Nacxi rusáca'li' queéli'?

Yúgu'tē' gula'chúguiē' queē' gátie'.

65 Ní'irö gula'sí lógaquiē' bal-lē' tu'chejē' Jesús zxöna'. Bulu'sayjē' lahuē', en gulundē' Lē' zi', ta'nnē':

—Gunnē' yá'atsöca' nuzxi na' bē' Li'.

Yugu' bönni' ni'a nē'ē bixúz lo gula'gápē'ē ru'ē Jesús.

Rnnē' Pedro biti' núnbē'ē Jesús

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoē' Pedro lö'a zxan yu'u, bidxinbi' tubi' bi'i nigula huen dxin queē' bixúz lo na' ga na' zoē'. 67 Cate' bilé'ebi' Pedro, rö'ē rutsē'e cuiné' ra' guí', buyubi' lē', rnnabi':

—Do'ocá' li' Jesús, bönni' Nazaret na'.

68 Gudá'baguiē' Pedro, rnnē':

—Biti' núnbē'a-nē', en biti' nözda' bizxi na' rno'.

Burúajē' Pedro yöjsóē' ga nu riyaza lö'a. Ní'irö gurödxiba' böra. 69 Buyubi' lē' leyúbölö bi'i nigula huen dxin na', en gusí lobi' rēbi' nupa nacua' ni':

—Bönni' ni' dzáguiē' légaquiē'.

70 Leyúbölö gudá'baguiē' Pedro. Ia'lati' gudzé nupa nacua' ni' tē Pedro, ta'nná:

—Le nácatē dzagu' légaquiē', tu' nacu' bönni' Galilea. Yöl-la' ru'isö quiu' didza' naca bē'u, tu' tuz ca ru'ili' didza'.

71 Gusí lahuē' Pedro rudxía dö' cuiné', en ruzötjē' Dios, rnnē':

—Biti' ca' núnbē'a-nē' bönni' na' ru'ili' didza' ca naca queē'.

72 La' gurödxitēba' böra le buropi luzuí. Ní'irö yöjnenē' Pedro didza' na' bē'ē Jesús, gudxē' lē': "Zi'alö cödxiba' böra le buropi luzuí, tsonna luzuí innó' biti' núnbē'u neda'." Cate' yöjnenē' didza' ni, gusí lahuē' ribödxidē'ē.

15

Ridxinē' Jesús lahuē' Pilato, bönni' rinná bē'ē

(Mt. 27:1-2, 11-14; Lc. 23:1-5; Jn. 18:28-38)

1 Ni' naca zílado', yugu' bixúz unná bē' len bönni' gula tu'zéajni'inē', en yugu' bönni' yudo' usedi, en yúgu'tē bönni' yúlahui' lo gulún xtídza'gaquiē'. Ní'irö gula'ché'ē Jesús náguē'ē, en bulu'dödē' Lē' lu nē'ē Pilato, bönni' rinná bē'ē uláz que yödz Roma. 2 Pilato gunábinē' Jesús, rnnē':

—¿Naru' nacu' Li' Bönni' inná bé'enē' bönachi judío?

Bubi'ē didza' Jesús, rnnē':

—Ca nácatë rno’.

³ Yugu’ bixúz unná bë’ bulu’zéguië’ Jesús didza’ le zían. ⁴ Ní’irö Pilato gunábinë’ Lë’ leyúbölö, rnnë’:

—¿Naru’ cabí rubi’itso’ didza’? Buzëtsöca’ nagu’ cate’ xö zían le ta’nnë’ quiu’.

⁵ Biti’ bi didza’ bubí’ë Jesús. Ca’ guca, bubábinë’ Pilato.

Ta’chúquië’ queë’ Jesús gátië’

(Mt. 27:15-31; Lc. 23:13-25; Jn. 18:38–19:16)

⁶ Dë tu le runë’ Pilato cate’ raca laní na’, rusanë’ lu ná’agaca bönachi tu bönni’ nadzunë’ lidxi guíë, núti’tës nu ta’naba. ⁷ Nadzunë’ tu bönni’ lë’ Barrabás lidxi guíë, ate’ dzágagaquië’ lë’ ia’bal-lë’ luzë’ë, yugu’ bönni’ gulútië’ bönachi cate’ gula’dá’báguië’ yúlahui’. ⁸ Cate’ bila’dxín bönachi zían ní’, gula’sí lógaquië’ ta’nabë’ lahuë’ Pilato gunë’ quégaquië’ ca run cazë’. ⁹ Bubi’ë didza’ Pilato, rnnë’:

—¿Rë’ënili’ usana’-në’ queëli’ Bönni’ Inná Bé’enë’ Bönachi Judío?

¹⁰ Caní gunné’ Pilato tu’ réquibe’enë’ bulu’dödë’ yugu’ bixúz unná bë’ Jesús lu në’ë tu’ tu’zxé’enë’ Lë’. ¹¹ Yugu’ bixúz unná bë’ na’ gula’gu’ë xilá ládxi’gaca bönachi zían na’, para ila’nabë’ lahuë’ Pilato usanë’ lu ná’agaquië’ Barrabás.

¹² Ní’irö Pilato gunábinë’ légaquië’ leyúbölö, rnnë’:

—¿Bizxi rë’ënili’ guna’ queë’ bönni’ na’ ru’íli’ lë’, Bönni’ Inná Bé’enë’ Bönachi Judío?

¹³ Gulu’ë zidzaj didza’, ta’nnë’:

—¡Budë’ë lë’e yaga cruz!

¹⁴ Gunábinë’ Pilato légaquië’, rnnë’:

—¿Bizxi caz dö’ nu’ë?

Leyúbölö tu’ë zidzaj didza’, ta’nnë’:

—¡Budë’ë lë’e yaga cruz!

¹⁵ Tu’ gú’unnë’ Pilato gunë’ ga ila’yaza ládxi’gaca bönachi zían na’, busanë’ Barrabás lu ná’agaquië’. Ní’irö gunná bé’enë’ nu quin Jesús, ate’ budödë’ Lë’ lu ná’agaquië’ bönni’ ulu’dë’ë Lë’ lë’e yaga cruz.

¹⁶ Ní’irö yugu’ bönni’ röjáquië’ gudil-la gula’ché’ë Jesús lö’a yúlahui’, ate’ bulu’tubë’ luzá’agaquië’ ní’. ¹⁷ Bulu’gácuë’ Jesús tu lari’ xiná gul-la, en gulunë’ tu bregui’ ní’a në’e yötsi’, le bulu’dxië’ icjë’. ¹⁸ Ní’irö gula’sí lógaquië’ tu’lidzë’ Jesús, ta’nnë’:

—¡Yöl-la’ ba li’, rinná bé’enu’ bönachi judío!

¹⁹ Gula’guíne’ gui icjë’, en bulu’chejë’ Lë’ zxöna’. Bulu’zóa zxíbigaquië’ lahuë’, en lu yöl-la’ rutitaj gulunë’ Lë’ bal. ²⁰ Cate’ budxi bulu’titjë’ Lë’, bulu’gúë’ lari’ xiná chul-la na’ nácuë’ ate’ bulu’gácuë’ Lë’ lari’ que cazë’. Ní’irö gula’ché’ë Lë’ ní’ilö yúlahui’ na’ para tsöjda’gaquië’ Lë’ lë’e yaga cruz.

Tu’dë’ë Jesús lë’e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunë’ ga bi’ë tu bönni’ Cirene yaga cruz queë’ Jesús, ridödisë’ ní’ suzë’ë la’ guixi’. Lë’ Simón, xúzgacabi’ Alejandro, en Rufo.

²² Gula’ché’ë Jesús lataj na’ nazí’i le Gólgota, tu didza’ hebreo le rna lu didza’ xidza’, Lataj Que Böga’ Ícjaru’. ²³ Gulu’ë le guí’jë Jesús xisi uva nutsi’ nöri silá’ que yaga mirra, pero Lë’ bití’ gu’ë le. ²⁴ Ní’irö bulu’dë’ë Jesús lë’e yaga cruz, ate’ gula’guísië’ lari’ nácuë’, le gula’zí’ que queëgaquië’ bönni’ na’ röjáquië’ gudil-la. Bulu’béajë’ le gaca bë’ para ila’nözinë’ bízxilö idela’ que queëgaquië’.

²⁵ Naca idú xsila cate’ bulu’dë’ë Lë’ lë’e yaga cruz. ²⁶ Didza’ na’ bulu’zóë’ lë’e yaga cruz ícjälë’ Jesús ca naca le tu’quíë’ Lë’ rna caní: “Bönni’ Rinná Bé’enë’

Bönachi Judío.” ²⁷ Bulu'dá'lenë' Jesús tsözxön lë'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yögöla. ²⁸ Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

²⁹ Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—¡Ön! ¿Naru' uquínnajtso' yudo' queë' Dios, ate' tsonna dzasö uchísatsu' le?

³⁰ ¡Busölá cuinu' na'a, en bötaj lë'e yaga cruz na'!

³¹ Lësca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'túë':

—Bönachi yúbölö busölë', pero biti' gaca usölá cuinë'.

³² Ta'nnë' ca':

—¡Ön! ¿Nácatsu' Cristo, Bönni' Inná Bé'enë' Bönachi Israel? ¡Bötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idútë yödzölió. Guca caní ga bidxintë idú ridödi xihuó. ³⁴ Idú ridödi xihuó na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj ládxu'u neda'?

³⁵ Yugu' bönni' nacué'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

³⁶ Ní'irö guxíti'ë tu bönni' nútsë'ë ladjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

³⁷ Gurödxí'ë zidzaj Jesús, en la' gútitë'. ³⁸ Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö. ³⁹ Bönni' na' rinná bé'enë' bönni' röjáquië' gudil-la zuinë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

⁴⁰ Nacuá'anu ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidi', en José.

⁴¹ Nigula ni yöjácalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

⁴² Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío. ⁴³ Que lë ni na' bidë' José, bönni' yödzö Arimatea, bönni' lo ladjagaquië' bönni' yúlahui' lo. Ribözë' ca' dza idinná bë'ë Dios. Idú ládxë'ë guyázië' ga na' zoë' Pilato, en gunábinë' lë' gu'ë'lë' lataj u'ë Jesús. ⁴⁴ Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús. ⁴⁵ Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús. ⁴⁶ Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e guí'a guiöj. Budë'ë tu guiöj blaga zxon ga nu riyaza ba na'. ⁴⁷ María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'zíninu yugu' le rilá' zxixi para tsöjlú'ugacanu Jesús. ² Ni' naca zílado' dza risí lo, yójácanu ra' yeru ba queë'. Bila'dxinnu ni' cate' si' gulén gubidza. ³ Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxon naca. ⁵ Gula'yú'unu yeru ba lë'e guí'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rõ'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. ⁶ Ní'irö bi'i na' gúdxibi' légacanu, rnnabi':

—Biti'rö gádxili'. Ruguílajli' Jesús, Bönni' Nazaret, Bönni' na' gudé'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. ⁷ Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiéli' légaquië': "Tsejë' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena

(Jn. 20:11-18)

⁹ Cate' bubanë' Jesús zílado' dza na', bulu'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. ¹⁰ Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'. ¹¹ Cate' bila'yöni didza' ruí'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'

(Lc. 24:13-35)

¹² Gudödi na', nadzá'alö bulu'i lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. ¹³ Ní'irö bulu'dxinë', dutíxjöi'igüequinë' ia'zíca'rë', ate' ni xtídza'gaquië' biti' gula'yéajlë'ë.

Le rigu'ë Jesús lu ná'agaquië' bönni' gubáz queë'

(Mt. 28:16-20; Lc. 24:36-49; Jn. 20:19-23)

¹⁴ Ga yöjsetë, bulu'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. ¹⁵ Ní'irö gudxë' légaquië', rnnë':

—Guli'tséaj idütë yödzölió tsöjenli' libán que didza' dxi'a lógaca yúgu'të bönachi. ¹⁶ Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. ¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. ¹⁸ Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. ²⁰ Bila'rúajë' légaquië', yöjégaquië' libán

yúgu'të yödzö. Gúcalenë' Xanru' légaquië', en benë' ga gulunë' le nácgaca bë'
naca idútë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'lu'i rë'u, en bulu'zë didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguilaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Díos, ate' idú ládxi'gaquië' tunë' ca rna xtídzë'ë Díos, en le rinná bë' xibá queë'. Caní guca, cuntu nu guca bi innë' queégaquië'. ⁷ Cuntu nu zoa bi'i queégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Díos, lu yöl-la' bixúz queégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégu'ë yalaj lahuë' Xanru' Díos. ¹⁰ Tsanni ni' ruzégu'ë Zacarías na' yalaj, gula'cuá' yúgu'të bönachi ní'ilö, tu'lidza Díos. ¹¹ La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Díos le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zián nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' zxön lahuë' Díos. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Díos Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóaca zián bönachi Israel queë' Xanru'. ¹⁷ Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Díos dza ni'te. Caní gunë' para únë' tuz nupa nácagaca xuz len zxí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu në'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Díos. Lë cazë' gusöl-lë'ë neda' para gü'ílena' li' didza', en usiyönda' li' didza' dxi'a ni. ²⁰ Na'a, tu' cabí guyéajlë'u xtídzä'a, icödzü', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacuá' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. ²² Cate' burúajë' Zacarías, biti' guca gü'ílenë' légaquië' didza', ate' guléquië' enë' bilé'enë' tu le bulu'inë' Díos lë' lu lataj lá'ayi. Bulá'a bulu'isë' Zacarías, buzéajni'inë' légaquië', tu' cabí raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. ²⁴ Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu: ²⁵ "Canírunë' Xanru' quia'. Ruzá' ládxië'ë quia' bí'ido', en runë' ga bití'rö utuí'ida' lógaca bönachi."

Rigúxjö'ë gubáz lá'ayi ca si' gálajbi' Jesús

²⁶ Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea. ²⁷ Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'aleni' -në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. ²⁸ Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxië'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'.

³⁰ Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxië'ë Dios quiu'. ³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

³² Jesús ni tsépisëtë'rë', en si' Lë' Zxí'inë' Dios, Nu nayépisëtë'rö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. ³³ Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. ³⁶ Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anu-bi' lë'ënu bí'ido' na'. ³⁷ Biti' bi zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'. Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzo luyú Judea. ⁴⁰ Ni' guyázabi' lidxë' Zacarías, en gúdxibi'-nu Elisabet:

—Padiux.

⁴¹ Cate' biyöninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bö' Lá'ayi. ⁴² Ní'irö bë'ënu Elisabet zidzaj didza', rnnanu:

—¿Chinunë' Dios ga nácaru' li' bica' ba ca yúgu'të nigula, en chinunë' ca' ga nácabí' bica' ba bí'ido' na' yú'ubi' lë'u! ⁴³ ¿Núxité neda', zá'anu xinë'ë Xana' quia'? ⁴⁴ Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a. ⁴⁵ ¿Bica' ba li' tu' guyéajlé'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irö gunabi' María:

¡Idütë le naca' rigú'u Xanru' yöl-la' ba,

47 en rudzeja ládxi'lena'-në' Dios, Nu rusölá neda'!

48 ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

49 ¡Zxöntërö naca le benë' Dios unná bë' quia'!

¡Lá'ayi naca Lë'!

50 Lë' ruhuéchi' ládxi'tica'së' bönachi tadxi Lë'
na'a dza, en dza zá'gaca.

51 Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéguequi.

52 Bugúë' yöl-la' unná bë' quégaca nupa gulaca lo,
en benë' ga gulaca lo nupa gulaca nõxaj ladxí'.

53 Benë' ga bulu'huölej bulu'dzë'e nupa gula'dún,
en bucá'anë' cá'asö nupa bila'lé'e yöl-la' tsahui'.

54 Gúcalenë' bönachi Israel, nupa na' tun xichinë',
tu' yöjnenë' légaquië', en buéchi' ládxi'ë légaquië'.

55 Benë' ca guzxí' lu në'ë gunë' quégaquië' xuz xtó'oru'
enca' queë' Abraham, en quégaca di'a dza queë'.

56 María bugá'analenbi'-nu Elisabet idú ca tsonna beo', ate' gudödi ni'
böajbi' lídxibi'.

Le guca cate' gúlajbe' Juan, bönni' uquilë' bönachi nisa

57 Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i
bönni'do'. 58 Bila'yöni dzaga yu'u queënu, en yugu' di'a dza queënu ca na'
guca, buéchi' ládxi'ë-nu Dios, ate' bulu'dzëjalén lënu. 59 Cate' chiguca xunu' dza
zóabi' bí'ido' na', bila'dxinë' di'a dza queënu para ila'chúguië' lu xipéla'bi' bi'i
bönni'do' na' lë na' gaca bë' néquibi' queë' Dios, ate' té'ennë' ilu'ë labi' Zacarías
ca na' lë' xúzibi'. 60 Ní'irö bubí'ínu didza' Elisabet, xiná'abi', rnnanu:

—Calëga. Juan si' labi'.

61 Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

62 Ní'irö bulu'lá' bulu'lu'isinë', gula'nábinë' xúzibi' nacxi rë'ënë' gu'ë labi'.

63 Zacarías na' gunabë' tu blágado', ate' buzúajë' lahui caní: Juan lëbi'.
Bulu'bábinë' yúgu'të'. 64 La' ní'sö böáljatë ru'ë Zacarías na', en buguítjatë
lúdxë'ë, ate' bë'ë didza' le gulu'ë Dios yöl-la' ba. 65 Ní'irö guládxinë', en
bulu'bábinë' yúgu'të dzaga yu'u quégaquië', ate' yúgu'të yödzödo' nacuá' lu
gu'ado' luyú Judea, guzé didza' ca guca lë ni. 66 Gula'zá' ládxi'gaca yúgu'të
nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le
nácate Xanru' zóalenë'-bi'.”

Didza' bë'ë Zacarías uláz queë' Dios

67 Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza'
uláz queë' Dios, rnnë':

68 ¡Yöl-la' ba Dios, Xángaca bönachi Israel

tu' buduyüë' rë'u, bönachi queë', en böá'uë' rë'u!

69 ¡Gusöl-lë'ë queëru' Bönni' usölë' rë'u,

len yöl-la' huáca zxön queë'!

Bönni' ni guljë' ládajgaca di'a dza queë' David,

huen dxin queë' Dios.

70 ¡Dza ni'te guzxí' lu në'ë gunë' ga gaca caní!

Raca ca na' gunné' lu ruá'agaquië' bönni' gulu'ë didza' uláz queë'.

71 Guzxí' lu në'ë usölë' rë'u

lu ná'agaca nupa tequi rē'u zi,
enca' lu ná'agaca nupa biti' ta'lé'e rē'u dxi'a.

⁷² Guzxí' lu nē'ë huéchi' ládxe'ë xuz gudödi queëru',
en tsöjnenë' le guzxí' lu nē'ë le naca lá'ayi.

⁷³ Lē ni benë' tsutsu xtídzē'ë, en guzxí' lu nē'ë,
le gunë' queë' Abraham, xuz gudödi queëru',
le naca tu le ral-la' gunë' queëru' rē'u.

⁷⁴ Guzxí' lu nē'ë usölē' rē'u
lu ná'agaca nupa biti' ta'lé'e rē'u dxi'a
para cabirö gádxiru' gunru' xichinë' Lē',

⁷⁵ en para gácaru' ba'a ladxi', en idú dxi'a
lahuë' Lē' yúgu'tē dza sóaru' ibanru'.

⁷⁶ Li', zxi'ina'do', si' lo' bönni' ru'ë didza' uláz queë' Dios unná bē'
tu' tsöjnoru' ca Xanru' caz, en upó'o nöza ga tödē'.

⁷⁷ Gunu' ga ila'nözi bönachi queë' ca gaca ulu'lágaca,
en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' ládxe'ë Dios rē'u,
en runë' ga tsení' queëru' Bönni' na' náquië' bení' idú.

⁷⁹ Lē' uzení'ë quégaca nupa nacuá' gapa naca chul-la,
en gapa nacuá' nupa chizóa ilátigaca
para ugu'ë rē'u nöza ga cō'ö dxi ládxi'do'oru'.

⁸⁰ Guzxönbi' bi'i bönni'do' na', en bidipa ládxi'bi'. Guzóasibi' gapa naca lu
lataj cá'asö cate' bidxinrö dza bulu'i lobi' lógaca bönachi Israel.

2

Le guca cate' gúlajbi' Jesús (Mt. 1:18-25)

¹ Lu dza na' gunná bē'ë Augusto César, bönni' Roma, ila'yaza lu guichi
yúgu'tē bönachi nacuá' yödzo'lió. ² Cate' gusí lo ta'yaza lu guichi caní, rinná bē'ë
bönni' lē' Cirenio luyú Siria. ³ Yúgu'tē bönachi yöjaca yödzö que queëguequi
ga na' zeaj nababa para ila'yaza lu guichi. ⁴ Guzé'ë José yödzö Nazaret luyú
Galilea, sa'yéajē' luyú Judea, en bidxinē' yödzö Belén, ga ni' guljē' David, tu'
guljē' José ládajgaca di'a dza queë' David na'. ⁵ Guyijē' José ni' para tsáziē'
lu guichi, ate' dzágabi'-nē' María, bi'i nigula nazi' lu ná'abi' utsaga ná'alēnbi'
lē', en chizóa sóabi' bí'ido' queëbi'. ⁶ Cate' ni' nacu'ë lu yödzö Belén, bidxín
dza sóabi' bí'ido' queëbi'. ⁷ Buzóanu-bi' tubi' bi'i bönni'do', bi'i huáca queënu.
Buchölinu-bi' yugu' lári'do', ate' gudíxjanu-bi' tu lu yú'udo' ga tun chí'i le
táguba' böa' quégaca bönachi yú'ugaca nöza. Caní guca, tu' cabí bidzöli lataj
ila'cu'ë lu yu'u ga ni' ta'dxín bönachi yú'ugaca nöza.

Tu'lu'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi',
tapa chí'igaquië'-ba' chí'i dzö'ölö. ⁹ La' bulu'itē lahuë' gubáz lá'ayi queë'
Xanru' ga na' nacu'ë. Yöl-la' bení' queë' Xanru' buzení' ga na' nacu'ë, ate'
guládxinë'. ¹⁰ Ní'irö gubáz lá'ayi na' gudxe' légaquië', rnnē':

—Biti' gádxili'. Na'a rusiyönda' libí'ili' didza' le gun ga udzédjade'eli', le ulu'zí'
ca' xibé yúgu'tē bönachi. ¹¹ Na'a chigúlajbi' lu ladzē' David Nu usölá libí'ili'. Nu
ni naca Cristo, Xanru'. ¹² Lē ni gaca bē'ëbi'. Udzölili'-bi' Bí'ido' na', narölibi'
yugu' lári'do', en dēbi' tu lu yú'udo' ga tun chí'i le táguba' böa' quégaca bönachi
yú'ugaca nöza.

¹³ Ga na' zoë' gubáz lá'ayi na', tsárido'os bulu'lu'i lógaquië' ziánrö ca' gubáz
lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnē':

14 ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxe'ë Dios légaquië'!

15 Cate' bulu'zë'ë gubáz lá'ayi na' ga ni' nacu'ë, söjhuõjgaquië' yehua' yubá,
ní'irö gulé luzë'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru'
rë'u.

16 La' yöjácatië', ate' yöjxáca'gaquië' María len José, enca' bí'ido' na', dëbi' tu
lu yú'udo' ga tun chi'i le táguba' böa' quégaca bönachi yú'ugaca nöza. 17 Cate'
bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië'
ca naca queëbi' bí'ido' na'. 18 Bulu'bani yúgu'të nupa bila'yöni didza' gulu'ë
bönni' tu'yúé' bö'cu' zxila' na'. 19 María gulú'usö icja náganu didza' ni, ate'
guzá ládxi'nu ca naca que. 20 Söjhuõjgaquië' bönni' na' tu'yúé'-ba' bö'cu' zxila',
tunë' zxon Dios, en ta'gu'ë Lë' yöl-la' ba ni'a que yúgu'të lë na' bila'yönnë', en
bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

21 Cate' chiguca xunu' dza zóabi' bí'ido' na', gula'chúguië' lu xipéla'bi' lë na'
naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz
lá'ayi na' zí'alö cate' si' tsú'ubi' lë'ënu xiná'abi'.

22 Cate' chibizá'a dza que le tu'pá'a cuíngacanu nigula ca rinná bë' xibá
queë' Moisés, gula'ché'ë-bi' bí'ido' Jesús yödzö Jerusalén para ila'gu'ë-bi' lu
në'ë Xanru' Dios. 23 Caní gulunë', tu' nazúaj lu guichi lu xibá queë' Xanru'
le rnna: “Yúgu'tëbi' bi'i bönni'do' nácagacabi' bi'i zí'alö queënu xiná'agacabi',
ulu'béajë'-bi' quez queë' Xanru' Dios.” 24 Que lë ni na' yöjácië' ni' para ilútië'-
ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná
bë' xibá queë' Xanru' Dios.

25 Dza ní'sö zoë' tu bönni' lë' Simeón lu yödzö Jerusalén. Bönni' ni náquië'
tsahui', en reaj ládxe'ë Dios. Ribözë' Bönni' na' isöl-lë'ë Dios, Bönni' na'
gácalenë' bönachi Israel. Dios Bö' Lá'ayi zóalenë' Simeón na', 26 en chibuluí'inë'
lë' biti' gátie' cate' ilé'erönë' Cristo, Bönni' na' isöl-lë'ë Xanru' Dios. 27 Bidxinë'
Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi'
gula'ché'ë-bi' bí'ido' Jesús chila yudo' para ilunë' queëbi' ca rinná bë' xibá na',
28 ní'irö bunidë'-bi' Simeón na', en guyéaj ládxe'ë Dios, rnnë':

29 Xana', na'a huáca gunnu' neda' lataj gátia', soa dxi ládxa'a
tu' chiguca le gudxu' neda', huen dxin quiu'.

30 Chibilé'eda' Nu na' buzóa cazu', Nu usólá bönachi,

31 Nu na' ulú'u lahui lógaca yúgu'të bönachi.

32 Lëbi' nácabi' bení' le uzení' bönachi izá'a,
en nácabi' ca' bení' quégaca bönachi Israel quiu'.

33 Bulu'bábinë' José, en María, xiná'abi' bí'ido' Jesús, ca naca lë na' gunné'
Simeón ca naca queëbi' Jesús. 34 Simeón na' gunábinë' Dios gunë' ga gaca dxi'a
quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate'
ulu'huóása bönachi zían ladaj bönachi Israel. Gácabi' tu le naca bë', ate' ila'nnë'
bönachi queëbi'. 35 Gaca caní para ila'lá' lahui le ta'zá' ládxi'gaca bönachi zían.
Yugu' lë ni ilaca quiu' ca tu guié' tuchi' le tsaza ládxi'do'o.

36 Ana, nigula ruí'inu didza' uláz queë' Dios, zóanu ca' ni'. Nácanu zxí'inë'
Faniel, bönni' nababë' di'a dza queë' Aser. Chinagúlada'anu Ana na',
tu' guzóalennu bönni' queënu idú gadxi iz gudödi gúcanu ra'bando', 37 ate'
bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti'
ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios,

runnu gubasa, en rulídzanu-në' Dios. ³⁸La' ná'asö bidxíntënu ni', rënu-në' Dios: "Xclenu'." Gudíxjöi'inu yúgu'të bönachi ca naca queëbi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuöjgaquië' José, en María yödzo Nazaret

³⁹Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzaqaquië' Nazaret luyú Galilea. ⁴⁰Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá' ládxië'ë queëbi' Dios.

Rudxinbi' bí'ido' Jesús chila yudo'

⁴¹Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴²Cate' chiyú'ubi' chinu iz bi'i Jesús, yöjáquië' Jerusalén ca tun cazë' cate' raca laní na'. ⁴³Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María, xiná'abi' Jesús. ⁴⁴Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bi' gapa nacuá' di'a dza queégaquië', en gapa nacuá' nupa núnbë'gaquië' ⁴⁵biti' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

⁴⁶Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'. ⁴⁷Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. ⁴⁸Cate' bila'lë'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi ruguí' neda', en xuzu' buguúljatú' lí'.

⁴⁹Ní'irö gúdxibi' Jesús légaquië', rnnabi':

—¿Bizx que buguúljalí' neda'? ¿Naru' cabí nözili' run bayudxi guna' xichinë' Xuza'?

⁵⁰Biti' gula'yéajni'inë' xuz xiná'abi' didza' na' gúdxibi' légaquië'.

⁵¹Jesús böajlenbi' légaquië', budxinbi' Nazaret, ate' benbi' ca rnna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'önu yúgu'të lë ni. ⁵²Ráta'rö yöl-la' réajni'i queëbi' bi'i Jesús, en rizxönbi'. Burúajbi' dxi'a lahuë' Dios, en lógaca bönachi.

3

Libán runë' Juan, bönni' ruquilë' bönachi nisa

(Mt. 3:1-12; Mr. 1:1-8; Jn. 1:19-28)

¹Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisánias rinná bë'ë luyú Abilinia. ²Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, zxí'inë' Zacarías, didza' cate' ni' zoë' Juan lu lataj cá'asö. ³Ridë' Juan ni yúgu'të lataj nacuá' ra' yegu Jordán, runë' libán ca ral-la' ila'dila nisa nupa tu'bi'i ládxi'gaca para uniti lahuë' Dios dul-la' nabága'gaca. ⁴Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnna:

Riyön chi'ë bönni' rulidzë' lu lataj cá'asö, rnnë':

“Buli'pá'a nöza lu icja ládxi'do'oli' para idxín Xanru' queëli'.

Buli'béaj li yugu' nöza lasi ga tödë'.

⁵ Ral-la' ulígaca yúgu'të gapa naca röga',
en ulu'huöáca lachi' yúgu'të guí'a sibi, en guí'ado'.
Ral-la' ulu'rúaj li nöza nayecja nabí'igaca,
ate' ulu'huöáca dxi'a nöza guiöj.

⁶ Ila'lé'eni yúgu'të bönachi Bönni' na' isöl-lë'ë Dios,
Nu usölá bönachi."

⁷ Cate' bila'rúaj bönachi zían para ila'dila nisa lu në'ë Juan, lë' gudxë'
légaquië':

—Libí'ili', di'a dza quégacaba' bëla sínia'. ¿Zoa nu buluí'i libí'ili' ral-la'
ixxúnajli' yöl-la' rusiúdxí si' gaca quégaca bönachi? ⁸ Na'a, guli'gún le ilaca bë'
chibubí'i ládxi'li', en bití' sa' ládxi'li', bití' innali': "Nácatu' tsahui' tu' nácatu'
di'a dza queë' Abraham", tu' rea' libí'ili', huáca quelë'ë Dios yugu' guiöj ni, en
gunë' ga ulu'huöáca di'a dza queë' Abraham. ⁹ Nácali' ca yugu' yaga. Chizóa
riböza guíë huága para ichugu yugu' yaga. Yúgu'të yaga bití' ta'bía le naca
dxi'a, ila'chúguië' yaga na', en ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu bití' dë que, ate' nu dë le gagu,
lësca' caní ral-la' quisi quégaca nupa bití' dë le ilágugaca.

¹² Bal-lë' bönni' tu'quixjë' lázagaca bönachi uláz que yödzö zi'tu' bila'dxinë'
ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Bití' uquixjaröli' tsca le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli'
quégaca bönachi le cabí nácatë para gunli' ga ila'guixaj libí'ili', pero guli'tsaza
ládxi'li' tsca rázjali'.

¹⁵ Ta'zá ládxi'gaca bönachi na' ta'böza Bönni' na' ral-la' isöl-lë'ë Dios, channö
náquië' Juan na' Bönni' lë' Cristo. ¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-
la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni
náparë' yöl-la' unná bë' ca neda', ate' neda' bití' naca' lesaca' ilecja' le nudë'ë
ni'e. ¹⁷ Zönë' lu në'ë böcö' queë', ate' ulubë' ga rilubi zxoá' xtila queë', lë ni
rulu'í le gaca quégaca bönachi. Utubë' zxoá' xtila, en cu'ë le xilataj, pero bëbu
que uzégui'ë lu guí' le catu caz ulu.

¹⁸ Ca nácgaca didza' ni, en ia'zica'rö zían didza' le guchízië' icja nágagaca
bönachi, benë' libán Juan lógaquië' que didza' dxi'a. ¹⁹ Juan na' buzégui'ë didza'
Herodes, bönni' rinná bë'ë, tu' zóalenë'-nu Herodías, nigula queë' Felipe, bönni'
böchë'ë, enca' tu' runë' zían le ruá' dö'. ²⁰ Ní'irö benë' Herodes tu le nácarö
huiá' dö', gulu'ë Juan na' lidxi guíë.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guíë, cate' ni' ruquilë' bönachi
nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²² ate' bötjë'
Dios Bö' Lá'ayi, bidxinë' ga na' zoë' Jesús. Buluí' lahuë', rinë'ë ca riná' tuba'
gu'dödo', ate' biyön chi'i Nu ruí' didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús
(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxi'inë' Matat,
nu ni guca zxi'inë' Leví,
nu ni guca zxi'inë' Melqui,
nu ni guca zxi'inë' Jana,
nu ni guca zxi'inë' ia'túë' José.

²⁵ José ni gúquië' zxi'inë' Matatías,
nu ni guca zxi'inë' Amós,
nu ni guca zxi'inë' Nahum,
nu ni guca zxi'inë' Esli,
nu ni guca zxi'inë' Nagai.

²⁶ Nagai na' gúquië' zxi'inë' Mat,
nu ni guca zxi'inë' ia'túë' Matatías,
nu ni guca zxi'inë' Semei,
nu ni guca zxi'inë' ia'túë' José,
nu ni guca zxi'inë' Judá.

²⁷ Judá na' gúquië' zxi'inë' Joana,
nu ni guca zxi'inë' Resa,
nu ni guca zxi'inë' Zorobabel,
nu ni guca zxi'inë' Salatiel,
nu ni guca zxi'inë' Neri.

²⁸ Neri na' gúquië' zxi'inë' ia'túë' Melqui,
nu ni guca zxi'inë' Adi,
nu ni guca zxi'inë' Cosam,
nu ni guca zxi'inë' Elmodam,
nu ni guca zxi'inë' Er.

²⁹ Er na' gúquië' zxi'inë' Josué,
nu ni guca zxi'inë' Eliezer,
nu ni guca zxi'inë' Jorim,
nu ni guca zxi'inë' ia'túë' Matat.

³⁰ Matat na' gúquië' zxi'inë' Leví,
nu ni guca zxi'inë' Simeón,
nu ni guca zxi'inë' Judá,
nu ni guca zxi'inë' ia'túë' José,
nu ni guca zxi'inë' Jonán,
nu ni guca zxi'inë' Eliaquim.

³¹ Eliaquim na' gúquië' zxi'inë' Melea,
nu ni guca zxi'inë' Mainán,
nu ni guca zxi'inë' Matata,
nu ni guca zxi'inë' Natán.

³² Natán na' gúquië' zxi'inë' David,
nu ni guca zxi'inë' Isaí,
nu ni guca zxi'inë' Obed,
nu ni guca zxi'inë' Booz,
nu ni guca zxi'inë' Salmón,
nu ni guca zxi'inë' Naasón.

³³ Naasón na' gúquië' zxi'inë' Aminadab,

nu ni guca zxi'inë' Aram,
 nu ni guca zxi'inë' Esrom,
 nu ni guca zxi'inë' Fares,
 nu ni guca zxi'inë' ia'tué' Judá.

³⁴ Judá na' gúquië' zxi'inë' Jacob,
 nu ni guca zxi'inë' Isaac,
 nu ni guca zxi'inë' Abraham,
 nu ni guca zxi'inë' Taré,
 nu ni guca zxi'inë' Nacor.

³⁵ Nacor na' gúquië' zxi'inë' Serug,
 nu ni guca zxi'inë' Ragau,
 nu ni guca zxi'inë' Peleg,
 nu ni guca zxi'inë' Heber,
 nu ni guca zxi'inë' Sala.

³⁶ Sala na' gúquië' zxi'inë' Cainán,
 nu ni guca zxi'inë' Arfaxad,
 nu ni guca zxi'inë' Sem,
 nu ni guca zxi'inë' Noé,
 nu ni guca zxi'inë' Lamec.

³⁷ Lamec na' gúquië' zxi'inë' Matusalén,
 nu ni guca zxi'inë' Enoc,
 nu ni guca zxi'inë' Jared,
 nu ni guca zxi'inë' Mahalalel,
 nu ni guca zxi'inë' ia'tué' Cainán.

³⁸ Cainán na' gúquië' zxi'inë' Enós,
 nu ni guca zxi'inë' Set,
 nu ni guca zxi'inë' Adán,
 nu ni guca ca zxi'ini cazë' Dios.

4

Satanás tu' xihui' rë'ëni usubaga' Jesús dul-la' (Mt. 4:1-11; Mr. 1:12-13)

¹ Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asö. ² Guzöë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³ Ní'irö tu' xihui' na' gudxi Jesús, rna:

—Channö naca cazu' Li' Zxi'inë' Dios, gunnátsöca' ulu'huóaca guiöj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irö guchë' tu' xihui' na' Jesús ga naca tu lu guí'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió. ⁶ Tu' xihui' na' rë Jesús, rna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë' ni, ate' nu rë'ënisida' ruá'a que.

⁷ Channö Li' uzóa zxibu' lahua', en gunu' neda' zxön, yúgu'të lë' ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rna: “Xanu' Dios tseaj ladxu'u-në', en tuzë' Lë' gunu' xichinë'.”

⁹ Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisë' Li' para cabí tsøjchégu'u guiøj, en biti' gunu' zi' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bë'u Xanu' Dios."

¹³ Cate' biti' budzöli tu' xihui' na' ia'tú le si' bë' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bőajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzë didza' ca naca queë', ate' bila'yöni bönachi nacua' yúgu'të yödzö idú gásibi'ilö. ¹⁵ Busédinë' Jesús bönachi gapa naca lu yu'u ga tu'dubë' tu'sedë' bönni' judío queë' Dios, ate' yúgu'të bönachi gulún Lë' zxon.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sedë' bönni' judío queë' Dios, ate' guzuínë' para ulabë' tu le nazúaj lu guichi lá'ayi. ¹⁷ Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi' ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zi',

¹⁹ en guna' libán que dza ruzá' ládxi'ë Xanru' Dios quégaca bönachi.

²⁰ Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

²² Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxí'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: "Li', bönni' ruún bönachi, bun cuinu'." Lësca' caní huëli' neda': "Yugu' le biyönitu' benu' Capernaum, ben ca' ga ni naca ladzu'."

²⁴ Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uládz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guiøj idú ca tsonna iz yu' xopa beo', ate' guca gubín luyú na', ²⁶ pero Dios biti' gusöl-lë'ë Elías na' ga nacua'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios,

pero biti' böáquië' nu bönni' nútsë'ë ladaj bönachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. ²⁹ Ní'irö gula'yasë', en bulu'béajë' Jesús ní'lö ra' yödzö. Gula'chë'ë Lë' ga naca lë'e guí'a guiöj ga na' dë ládzagaquië' para ulu'suláduë' Lë' ga naca lë'e guí'a guiöj na'. ³⁰ Ní'irö gudödë' Jesús gatsaj láchui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. ³² Bulu'bájinë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza', ³⁴ rnnë':

—¡Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacua' ni'. Burúajtë lu bönni' na', en bíti'rö bi ben queë'. ³⁶ Bulu'bájinë' yúgu'të', en gulu'ë didza' tuë' len ia'tué', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bë'enë' yugu' bö' xihui', ate' tu'rúajtë bö' xihui' na'.

³⁷ Guzë didza' ca naca queë' Jesús, ate' bila'yöni bönachi yúgu'të yödzö idú gásibi'lö.

Ruúnë' Jesús xiná'anu nigula queë' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacua'len léguequi nupa na' te'e que queëguequi yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. ⁴¹ Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guílaj Jesús. Cate' bila'dxinë' ga na' zoë', gulë'ëniaguequinë' ulu'tsenë' Lë', para cabí uzë'ë ga na' nacu'ë. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacua' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzo luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

5

Ta'dzunba' böla zían
(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. ² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lé'egaca bárcodo' na', en ta'guibë' yöxaj böla quégaquië'. ³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látido' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rő'ösë' ca' ni' rusédinë' bönachi zían nacua' lu yu bidxi na'. ⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rő'ö zila, ate' ni' guli'zalaj yöxaj böla queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' zióntëröba' böla, ate' réquitiqui' iröza' yöxaj böla na'. ⁷ Ní'irö bulu'lá'a bulu'lu'isinë', bulu'lidzë' luzá'agaquië' nacué' ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa. ⁸ Cate' bilé'enë' Simón Pedro lë' ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzöbinë' Pedro ni'a quégacaba' böla zían na' gula'zöngaquië'-ba', en lësca' caní guca quégaca nupa nacua'len lë'. ¹⁰ Guladxi gula'dzöbinë' ca' Jacobo, en Juan, yugu' zxí'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sőjácalenë' Jesús.

Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)

¹² Cate' zoë' Jesús tu lu yödzo ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yue' lahuë', rnnë':

—Xan, channö rë'ënu', huáca unu' neda'.

¹³ Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxitë huë' nudzu' queë' bönni' na'. ¹⁴ Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjlu'i cuinu' lahuë' bixúz, ate' yöjnödzej que yudo' le rulu'i nuhuóácu' dxi'a ca gunná bë'ë Moisés, lë' na' ulu'i légaquië' chiböácu'.

¹⁵ Guzëtërö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugüë' yödzo huë' té'eguequi. ¹⁶ Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)

17 Ia'tú dza, cate' ni' rusédinë' Jesús bönachi, rō'ōgaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzo luyú Galilea, en luyú Judea, en lu yödzo Jerusalén. Naca bē' dē lu nē'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'.

18 Ní'irō bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljē' nacxi ilunë' para ila'gu'ë lē' lu yu'u para ila'guixjē' lē' lahuë' Jesús. 19 Cate' biti' gula'dzölinë' nacxi ilunë', tu' nacua' bönachi zían ni', gula'benë' ícjo'olō yu'u na', en gula'saljē' ícjo'o na'. Ní'irō bulu'zōtjē' le denë' bönni' huë' na', ate' gula'guixjē' lē' gatsaj lāhui'lō bönachi ni' lahuë' Jesús.

20 Cate' gúquibe'enë' Jesús ca na' ta'yéajlë'ë Lē', gudxë' bönni' huë' na':

—Bönni', yugu' dul-la' nabágu'u chibuníti lahua'.

21 Ní'irō gula'sí lógaquië' ta'zá' lādxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni' rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

22 Réquibe'enë' Jesús le ta'zá' lādxi'gaquië', ate' rē' légaquië':

—¿Bizx que rizá' lādxi'li' caní? 23 Biti' naca böniga nu guië'sö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en sē'e ni'ë. 24 Guna' ga inözili' dē lu na'a neda', Bönni' Guljē' Bönachi, yöl-la' unná bē' uniti lahua' dul-la' luyú ni.

Ní'irō gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

25 La' guyásatë' bönni' huë' na' lógaquië', ate' bu'ë lē' na' gúti'në', en söhuöjē' lidxë', rigu'ë Dios yöl-la' ba. 26 Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

27 Gudödi gulaca yugu' lē' ni burúajē' Jesús ni', ate' bilé'enë' tu bönni' uquízxaj lāzagaca bönachi, lē' Leví, rō'ë ga na' ruquízxjē', ate' Jesús rē' lē':

—Gudá' neda'.

28 La' guyásatë' Leví, ate' bucá'anë' yúgu'të, en sa'yéajlenë' Jesús.

29 Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lē' bönni' ta'bō'lenë' légaquië' tahuë'. 30 Ní'irō bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rē'aj rágulenli' yugu' bönni' uquízxaj, en ia'zica'rē' bönni' dul-la'?

31 Bubi'ë didza' Jesús, rē' légaquië':

—Yugu' bönni' nacú'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. 32 Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i lādxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

33 Ní'irō bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' tē'aj tahuë'?

34 Jesús rē' légaquië':

—¿Naru' huácatsö gunli' ga ilunë' gubasa bönni' nacú'ë laní que yöl-la' rutsaga na' tsanni ni' bönni' rutsaga nē'ë zóalenë' légaquië'? 35 Huadxín dza cate' udúë' bönni' rutsaga nē'ë ga nacú'ë. Dza ní'irō ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tēbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlöza lari' tēbi na'. ³⁷ Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chi'i. ³⁹ Channö zoa nu rë'aj xisi uva gula, bití' guë'ënitë guí'aj xisi uva cubi, tu' rna: “Nácarö sizxí' xisi uva gula na'.”

6

Bönni' usëda queë' Jesús ta'lecjë' do zxoá' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoá' xtila, ate' bönni' usëda queë' ta'lecjë' do ga dxía zxoá' xtila. Ta'zxúbi'ni ná'agaquië' le, en tahuë'. ² Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacué'len lë'? ⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' bití' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacué'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busëdinë' nupa nacué'ni'. Zoë' ca' tu bönni' ni' narequi' në'ë ibëla. ⁷ Yugu' bönni' yudo' tu'sëdinë', en yugu' bönni' yudo' fariseo tu'yüë' Jesús para ila'lé'enë' channö ünë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸ Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. ⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. ¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bë'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),
Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i ládxe'ë yödzo queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

¹⁷ Jesús böjtalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo' dëgaca ra' nísado' ga na' nacuá' yödzo Tiro, en yödzo Sidón. Bila'dxín bönachi ni ga ni' para ulu'zë nágagaca xtídzë'ë Jesús, en ulu'huóaca lu yödzo'hué' té'eguequi. ¹⁸ Bulu'huóaqië' ca' bönni' ni' ta'guí'i ta'záquië' lu ná'agaca bö' xihui'. ¹⁹ Yúgu'të bönachi zían na' tuí'i ládxi'gaca ila'gán Jesús tu' ruúnë' léguequi len yöl-la' huáca queë'.

Nupa nácagaca bica' ba, en nupa nácagaca bica' bayechi'

(Mt. 5:1-12)

²⁰ Ní'irö buyüë' Jesús yugu' bönni' usëda queë' nacu'ë ni', en gudxë' légaquië': —Bica' ba libí'ili', réquibe'eli' riyadzjali' le naca queë' Dios, tu' gata' queéli' lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queéli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxidxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nnë' zi' queéli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljë' Bönachi. ²³ Buli'sí' xibé dza na', en buli'dzeja, tu' naca zxön le guequi queéli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' libí'ili', dë yöl-la' tsahui' queéli', tu' chidé le ruzí'ili' xibé.

²⁵ 'Bica' bayechi' libí'ili' nuhuö'aj nudzé'eli' na'a, tu' huadunli'.

'Bica' bayechi' libí'ili' ruzxidxili' na'a, tu' huí'nili', en cödxí yéchi'li'.

²⁶ 'Bica' bayechi' libí'ili' ta'nnë' yúgu'të bönachi dxi'a queéli'. Lësca' caní gulunë' xuz xtó'oli', gula'nnë' dxi'a quégaquië' bönni' gula'zí' yë'ë, gula'nnë' nácagaquië' bönni' tu'ë didza' uláz queë' Dios.

Ral-la' idxí'iru' nupa biti' ta'lé'e rë'u dxi'a

(Mt. 5:38-48; 7:12)

²⁷ Gunnë' ca' Jesús:

—Libi'ili' zóali' ni, en riyönili' xtídz'a'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. ²⁸ Guli'nabi Dios gaca dxi'a quégaca nupa tua' dö' queéli', en buli'lidzë' Dios inábili'-në' gácalenë' nupa ta'nnë' zi' queéli'. ²⁹ Channö nu capa' tsölá'a xagu', buzë ia'tsölá'a ca' xagu'. Channö nu cúa lari' naxó'a cúdzu'u, bë' lataj cúa ca' xzo'. ³⁰ Núti'tës nu bi inaba le dë quiu', bunödzaj que, ate' nu cúa le nequi quiu', biti' unabu' le. ³¹ Ca rë'ënili' ilún bönachi queéli', lësca' caní guli'gún quéguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquië'.

³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'. ³⁴ Channö runödzjali' quégaca nupa

runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzjë' quégaca nupa tun dul-la', tu' tunë' löza ulu'bí'i quégaquië' lë na' bulu'nödzjë'. ³⁵ Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nödzaj quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazë' Dios, Nu nácatërö lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'. ³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

Biti' ral-la' ichugu bë'ëru' que luzá'aru'
(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzaj que luzá'ali', ate' Dios gunnë' queéli'. Ulu'nödzjë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzü'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'tué' bönni' lo chul-la? Biti' ca' gaca, tu' ila'bixë' iropë' tu lu yeru. ⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'? ⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiöj lo”, en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'
(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. ⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. ⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u
(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'? ⁴⁷ Ulu'í'da' libí'ili' ca naca nu na' za' quia', en riyöni xtí'dza'a, en run ca rnna xtí'dza'a. ⁴⁸ Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj. ⁴⁹ Na'a, nu riyöni xtí'dza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

7

Jesús ruúnë'-bi' bi'i huen dxin queë' tu bönni' unná bë'
(Mt. 8:5-13)

¹ Cate' Jesús budxi bë'lenë' légaquië' didza' ni, guyázië' yödzö Capernaum.
² Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la' gusöl-la'të' bal-lë' bönni' gula tu'zëajni'inë' bönni' judío ga na' zoë' Jesús, tsöjóta'yugaquië' lahuë' Lë' guidé' uduhuénë'-bi' bi'i huen dxin queë' na' ré'ebi'. ⁴ Bönni' gula tu'zëajni'inë' na' bila'dxinë' ga zoë' Jesús, ate' guláta'yuë' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, ⁵ tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' ugu'ínu', tu' cabí naca' lesaca' tsáziu' lidxa', ⁷ en biti' naca' lesaca' guída' ga zu'. Que lë ni na' biti' burúguida' guída' ga zu'. Bë'sö didza', ate' huöácatebi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹ Cate' biyönnë' Jesús didza' ni, bubáinë' queë' bönni' na', ate' buécjë', en gudxë' bönachi na' zá'gaca cúdzulë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusöl-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chiböácabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían. ¹² Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjçáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' söjácálen-nu. ¹³ Cate' Xanru' bilé'enë'-nu, buéchi' ládxië'-nu, ate' gudxë'-nu:

—Bíti'rö cödxu'.

¹⁴ Ní'irö gubíguië' Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

¹⁵ Ní'irö bubanbi'. Gurö'öbi' bi'i na' zí'alö nátibi', ate' gusí lobi' ru'íbi' didza'. Jesús budödë'-bi' lu ná'anu xiná'abi'. ¹⁶ Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

Le rinabë' Juan, bönni' buquilë' bönachi nisa
(Mt. 11:2-19)

¹⁸ Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ní' yu'ë Juan lidxi'guíë, bulidzë' chopë' bönni' na' dá'gaquië' lë, ¹⁹ ate' gusöl-lë'ë

légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guidë', o naru' ral-la' cöztu'-në' bönni' yúbölö?" ²⁰ Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasöl-lë'ë netu' para inábitu' Li', inatu': "¿Nacu' Li' Cristo, bönni' na' ral-la' guidë', o naru' ral-la' cöztu'-në' bönni' yúbölö?"

²¹ La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'.

²² Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'-në' Juan ca naca le bilé'eli', en le biyöñili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóacagaquië' bönni' gü'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulátië'. Ta'yönnë' bönni' yechi' didza' dxi'a. ²³ Bica' ba nu bití' gaca chopá ladxi', ate' za'len neda' sal-la' bití' runa' ca réqui nu na' ral-la' guna'.

²⁴ Cate' bönni' na' gusöl-lë'ë Juan bulu'zë'ë ni', gusí lahuë' Jesús ruluí'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí xibé yöl-la' tsahui', nacuá' lídxigaquië' bönni' ta'nná bë'ë. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtë'rë' ca nu ruí'i didza' uláz queë' Dios. ²⁷ Náquië' Juan bönni' na' nazúaj lu guichi lá'ayi ca naca queë', rna:

Buyútsöca', risöl-la'a-në' gubáz quia', inöruë' ca Li'.

Bönni' ni uchi'ë nöza ga tödu'.

²⁸ Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, bití' nácarë' lo ca Juan, bönni' na' buquilë' bönachi nisa, pero nu nácatë'rö cuídí'sö ga rinná bë'ë Dios nayëpisëtë'rö ca Juan na'.

²⁹ Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilé' nisa lu në'ë Juan, ³⁰ pero yugu' bönni' yudo' fariseo, en bönni' yudo' tu'sédinë' xibá queë' Moisés bití' bila'dilé' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

³¹ Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácaagaquië'? ³² Nácaagaquië' ca bí'ido' ta'guítjabi'. Ta'bö'öbi' lu yé'ëyi, en ta'bödxi'abi'. Ta'nnabi' tubi' ia'tubi': "Rucódxitu' queéli' gui, pero bití' ruyá'ali'. Rul-la yéchi'tu', pero bití' ribódxili'." ³³ Caní nácali' tu' bidë' Juan, bönni' buquilë' bönachi nisa, en bití' gudahuë' yöta xtila, en bití' gu'ë xisi uva, ate' rnnali' queë': "Tu' xihui' dzaga lë'." ³⁴ Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zíca'rë' bönni' dul-la'." ³⁵ Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. ³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinu ni' nuá'anu tu böga'do' néquini guiöj nazaca' le yudzu tu le rilá' zixi. ³⁸ Cate' bidxinu zaca' cúdzu'lë' Jesús, gurö'önu xini'ë ribódxinu. Ní'irö

gusí lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquië' enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxië' que chopá iz, ate' ia'túë' na' ral-lë'ë queë' lazxië' que chopá beo'. ⁴² Tu' cabí dë quégaquië' dumí ulu'guíxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rálá'rë' queë' dumí, lë na' buniti lahuë'.

Jesús gudxë' lë':

—Le nácasö rnno'.

⁴⁴ Ní'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' bití' bennu' quia' nisa quívida' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu. ⁴⁵ Bití' butsaga lo' neda', pero cate' bidxíntea' lidxu', bití' ruzóa dxinu nigula ni, rutsaga lonu ni'a. ⁴⁶ Bití' gulú'u icja' le za, pero nigula ni gulú'unu ni'a lë na' rilá' zxixi. ⁴⁷ Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le látí'do'os, látí'do'os nadxí'i Dios nu na'.

⁴⁸ Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bö'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládxu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudë' Jesús gapa nacuá' zían yödzö zxon, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüë' yugu' yödzöhuë' gü'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nödzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj bönachi zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, sǒjësië' xisedo'. Cate' ni' sǒjësië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nöza. ⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxité tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnnë':

—¡Nu zoa nagui, en riyöni ral-la' uzë nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönachi ni, ruí'ilena' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

Rigúxjö'ë Jesús le ruluí'i le bucúdzu'ë didza'

(Mt. 13:18-23; Mr. 4:13-20)

¹¹ Gunnë' ca' Jesús:

—Caní naca le ruluí'i lë na' bucúdzu'a didza'. Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'luí'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bídxín lu icja ládxi'do'gaquië', para cabí ila'yéajlë'ë, en cabí ulu'lë'. ¹³ Xisedo' na' bulu'huöxaj lu yu ga rö'ö guiöj tu'luí'i ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizi' bë' légaquië', ate' la' tu'huóatë ládxi'gaquië'. ¹⁴ Xisedo' na' bulu'huöxaj ga bulu'lén lubá yötsi' tu'luí'i ca raca quégaquië' bönni' ta'yönnë' didza' na', en cate' chibila'yönnë', yugu' le tuí'i ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'. ¹⁵ Xisedo' na' bulu'huöxaj ga naca luyú bëbu tu'luí'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ládxi' tunë' ca rna didza' na'.

Rucúdzu'ë didza' Jesús que le rigú'u bení' lídxiru'

(Mt. 4:21-25)

¹⁶ Gunnë' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en bití' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'z'í xibé guí' na'. ¹⁷ Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸ 'Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' bití' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë

(Mt. 12:46-50; Mr. 3:31-35)

19 Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero bití' guca ila'bíguë'ë gala' ga zoë' tu' nacua' bönachi zían ni'. 20 Zoa ni' nu bulidza Jesús, rna:

—Nacu'ë xinó'o, en yugu' bönni' böchu'u lö'a. Të'ënnë' ilu'ílenë' Li' didza'.

21 Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxië' bö' budunu'

(Mt. 8:23-27; Mr. 4:35-41)

22 Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö sójacatë'. 23 Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' znan nisa, en zoa bönadxi quégaquië'. 24 Ní'irö gula'bíguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en gurö'ö dxi lu nísado' na'. 25 Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulé luzá'agaquië' tuë' ia'tuë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

26 Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea. 27 Cate' birúajë' Jesús lë'e bárcodo' na' ga naca lu yu na', dutságuie' tu bönni' yödzö na' Lë'. Chigudzé yu'u bö' xihui' lë', ate' bití'rö rácuë' lari', en bití'rö rizóë' lu yu'u, pero nun xilatjë' lu znan bulóaj ga nádjagaca yeru ba. 28 Cate' bönni' na' yu'u bö' xihui' lë' bilé'enë' Jesús, gurödxíë' zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayépisëtë'rë'? Ráta'yua' lo' cabí usaca' zí'u neda'.

29 Caní gunné' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúguie' lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö. 30 Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zían lea'.

Caní gunná tu' yú'ugaca bö' xihui' zían bönni' na'. 31 Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca. 32 Nacuá'aba' ca' tu cö'öba' cuchí zían ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchí zían na'. Jesús bë'ë léguequi lataj. 33 Bulu'rúaj yugu' bö' xihui' lu bönni' na', en yöjtsú'ugaca cuchí zían na', ate' yöjácaba' cuchí zían na' ga naca tu lë'e guíöj. Yöjbíxigacaba' lu nísado', ate' ni' gula'yëpiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchí zían na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhuöjgaquië'

yöjtíxjöi'iguequinë' nupa nacuá' yödzö na', en nupa nacuá' la' guixi' ni'.
³⁵ Ní'irö bila'rúajë' bönni' yödzö na', yöjyúgaquië' lë na' guca. Cate' bila'dxinë'
 ga na' zoë' Jesús, bila'lé'enë' bönni' na' gula'yú'u bö' xihui' lë', rō'ë xini'ë Jesús.
 Nácuë' lari', en dxí'ado' chizóë', ate' guládxinë'. ³⁶ Nupa na' bila'lé'e lë na'
 guca gula'guíxjöi'i légaquië' ca guca, böáquië' bönni' na' gula'yú'u bö' xihui'
 lë'. ³⁷ Ní'irö yúgu'të bönachi zían na' quégaca yödzö nabábagaca Gadara na'
 guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e
 bárcodo' na', en söhuöjë'. ³⁸ Bönni' na' bulu'rúaj bö' xihui' na' lë' gúta'yuë'
 lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë'
 ni', rnnë':

³⁹ —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë'
 Jesús queë'.

Jesús ruúnë'-bi' bi'i nigula queë' Jairo enca' nigula na' gudannu lari' nácuë'
 (Mt. 9:18-26; Mr. 5:21-43)

⁴⁰ Cate' budxinë' Jesús ia'tsölá'a nísado' na', bulu'dzeja bönachi zían nacuá'
 ni' ni'a queë' Lë', tu' ta'böza Lë'. ⁴¹ Ní'irö bidxinë' Jairo ga zoë' Jesús. Náquië'
 bönni' lo que yu'u ga tu'dubë' bönni' judío, en tu'sedë' queë' Dios. Biyéchuë'
 xini'ë Jesús, en gúta'yuë' lahuë' tsejë' lidxë'. ⁴² Caní benë' tu' zóabi' tubi' bi'i
 nigula queë', chirequi gátibi'. Nácabi' bi'i la's dui queë', en yú'ubi' ca chinnu
 iz. Tsanni ni' sa'yéajë' Jesús, sönógaca tu'quirö bönachi zían Lë'.

⁴³ Nútsa'nu tu nigula ladaj bönachi zían na', chiguca chinnu iz riguí'i
 rizáca'nu. Biti' ruhu'i rön queënu que huë' quégaca cázanu nigula, ate'
 chibutönu dëra le dë queënu, riguíxjanu nupa tu'ún bönachi, pero biti' guca nu
 bönni' únë'-nu. ⁴⁴ Gubíga'nu zaca' cúdzu'lë' Jesús, en gudannu ruí'i lari' nácuë',
 ate' la' buí'të huë' rön queënu.

⁴⁵ Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë',
 ta'nnë':

—Bönni' Usedi, nacuá' bönachi zían ni, tu'quirö Li', en tu'dxiga' Li', ate'
 ¿rnnatso': "¿Nuzxi na' gudán neda'?"

⁴⁶ Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún
 bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu.
 Biyéchunu xini'ë Jesús, en gudíxjöi'ínu Lë' lógaca bönachi zían na' bizx que na'
 gudannu lari' nácuë', en ca na' guca, la' böácatënu. ⁴⁸ Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládxi'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na'
 que yu'u ga tu'dubë' tu'sedë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízxjanu'-në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë' bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

⁵¹ Cate' guyázië' Jesús yu'u na', biti' bë'ë lataj nu tsázalen Lë', pero légacasë'
 Pedro, en Jacobo, en Juan, enca' xuz xiná'abi' nigúlado' na'. ⁵² Ta'bödxi
 nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë'
 légaquië', rnnë':

—Bítirö cödxili'. Biti' nátibi' nigúlado' ni. Rásisibi'.

⁵³ Bulu'titjë' Lë' tu' nözguequinë' chinátibi'. ⁵⁴ Ní'irö gudélë'ë Jesús ná'abi',
 en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. ⁵⁶ Bulu'báninë' xuz xiná'abi', pero Jesús gunná bé'enë' légaquië' cuntu nu ilé' ca na' guca.

9

Risöl-lë'ë Jesús bönni' usëda queë' tsöjéngaquië' libán
(Mt. 10:5-15; Mr. 6:7-13)

¹ Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e. ² Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. ³ Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en bití' ixóa yenli' chopa lari'. ⁴ Bítí'tës yu'u ga tsú'ulí', guli'sóa ni' cate' uzá'aröli' yödzö na'. ⁵ Gátí'tës ga bití' ilún bönachi libí'ili' bal, buli'rúaj yödzö na', en guli'cuíbi bëchtö da' lé'e lábali', le ulu'í légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa
(Mt. 14:1-12; Mr. 6:14-29)

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi
(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida. ¹¹ Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöj'ö'outu' le ilágugaca bönachi zían ni?

14 Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

15 Caní gulunë', ate' gula'bö'ë yúgu'të'. 16 Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzxuzxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'. 17 Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

18 Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

19 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasól-lë'ë Dios.

Rigúxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

21 Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'. 22 Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxë' ca' yúgu'të':

—Channö ré'enë' nu bönni' tē'ë neda', ral-la' uzóë' tsölá'alö le dë queë', en gáquië' ca tu bönni' sa'yéajë' sojtë'ë lë'e yaga cruz, ate' ní'irö gaca tē'ë neda'.

24 Núti'tës bönni' ruí'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. 25 Biti' bi uzi'ë xibé tu bönni' channö utubë' queë' yúgu'të le dë yödölió ni, pero unítië' tsaz yöl-la' na'bán queë'. 26 Nu bönni' rutuí'inë' neda', en rutuí'inë' ca' xtídza'a, lë'sca' neda', Bönni' Guljë' Bönachi, utuí'ida' bönni' na' cate' huöda' idinná bë'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. 27 Le nácatë' rea' libí'ili', nacuá' bal-lë' bönni' ni bití' ilátië' cate' ila'lé'erönë' dza idinná bë'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

28 Cate' bizá'a xunu' gubidza gudödi bë'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. 29 Tsanni ni' ruí'ilenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'. 30 Ní'irö bulu'luí'i lógaquië' chopë' bönni' ga zoë' Lë' tuí'ilenë' Lë' didza'. Nácagaquië' Moisés, en Elías. 31 Chopë' ni gula'yëpë' yösa bení', ate' tuí'ilenë' Jesús didza' ca si' uzë'ë yödölió ni, gátië' lu yödö Jerusalén. 32 Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en

chopë' na' nacuá'lenë' Lë'. ³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyön chi'i Nu ru'i didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zë' nágali' didza' gu'ë.

³⁶ Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulë' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'

(Mt. 17:14-21; Mr. 9:14-29)

³⁷ Cate' za' reni' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribödxí'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéquí'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queéli'? Dijúa'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabi ruí'inë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. ⁴⁷ Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ládjali' nácarë' nöxaj ladxí', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabi dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén. ⁵² Gusöl-lë'ë yugu' bönni' gubáz queë' ila'nöruë' ca Lë', ate' yöjáquië' tu yödzödo' quégaca bönachi Samaria para tsöjpá'agaquië' ga ugá'anë' Jesús tu yëla. ⁵³ Yugu' bönni' yödzö na' bití' gulunë' Jesús bal tu' chinaca queë' sa'yéajë' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjë' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'. ⁵⁶ Bida' ni neda', Bönni' Guljë' Bönachi, calëga para usunitia' yöl-la' ná'bán quégaca bönachi, pero bida' dusölä' bönachi. Ní'irö yöjáquië' yödzö yúbölö.

Nupa të'ëni tsöjácálen Jesús

(Mt. 8:19-22)

⁵⁷ Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lëna' Li' gáti'tës ga tseju'.

⁵⁸ Jesús rë' lë':

—Yúgu' böza', nacua' zخان bulóaj quégacaba', ate' biguínido', dxíagaca xcá'agacaba', pero neda', Bönni' Guljë' Bönachi, bití' dë quia' ga gáta'a uzí' ládxa'a.

⁵⁹ Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuza'.

⁶⁰ Jesús gudxë' lë':

—Bë' lataj bönni' chizóa ilátië' ulu' cáché'ë nupa chinati quégacacaba', pero li', guyéaj, yöjén libán ca inná bë'ë Dios.

⁶¹ Ní'irö bidxinë' ia'tué' ca', en rë' Jesús:

—Xan, rë'ënda' sá'lëna' Li', pero benna neda' lataj tseja' tsöjzégacada'-në' didza' di'a dza quia'.

⁶² Jesús gudxë' lë':

—Núti'tës bönni' ruí'i ládxe'ë le raca yödzölió náquië' ca tu bönni' rugá'anë'-ba' bëdxi, en ruyúë' zaca' cüdzu'lë'. Nu run caní bití' naca lesaca' tsaza ga rinná bë'ë Dios.

10

Risöl-lë'ë Jesús tsónnalalaj yu' chië' bönni' tsöjéngaquië' libán

¹ Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopa huéajgaquië' para ila'nöruë' ca Lë', en tsöjáquië' yúgu'të yödzö, en yödzödo' gapa chizóa tödë' Lë'. ² Gudxë' légaquië':

—Le nácatë, dëda' dxin quia', le naca ca tu la' yëla zxon ga nu tsöjlapa', pero nabábasö huen dxin quia' nacua'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'.

³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' söjácaba' ladjagacaba' bö'cu' guí'a sínia'. ⁴ Biti' guá'ali' yöxaj dumí, en calëga buzudi yöta, en bití' guá'ali' ia'tú cö' xiráchuli', en bití' tseli' para gü'ilenli' bönachi didza' gapa naca la' nöza. ⁵ Gáti'tës yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni." ⁶ Channö zoa ni'

nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunnë' queéli', tu' udzöli quezinë' bönni' huen dxin le gahuë'. Biti' tódili' yu'u yu'u. ⁸ Gáti'tës yödzö ga tsú'uli', ate' ilún libí'ili' bal, guli'gagu le ulu'cu'ë loli'. ⁹ Buli'ún nupa te'e nacua' yödzö na', en guli'guí'ë léguequi: "Chibidxín le rinná bë'ë Dios ga zóali'." ¹⁰ Gáti'tës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali': ¹¹ "Bëchtö que ládzali' le da' lë'e lábatu' ruquínajtu', le ruluí' nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." ¹² Neda' rea' libí'ili', cate' idxín dza ichúguië' Dios quegaca bönachi, ila'guí'ila'zaca'rö bönachi yödzö ni' ca ila'guí'ila'zaca' bönachi yödzö Sodoma, nupa ni' busunítië' Dios.

Le gaca quegaca nupa biti' ulu'bí'i ládi'gaca
(Mt. 11:20-24)

¹³ Gunnë' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládi'gaquië'. ¹⁴ Que lë ni na', cate' idxín dza ichúguië' Dios quegaca bönachi, quí'í sáca'röli' ca ila'guí'ila'záquië' bönni' yödz Tiro, en yödz Sidón. ¹⁵ Libí'ili', bönachi Capernaum. Réquili' tsázali' yehua' yubá. Huótljalí' tsöjtsázali' lataj chul-la quegaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

Bönni' yöjéngaqië' libán tu'dxinë' ga zoë' Jesús

¹⁷ Cate' tsónnalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yöjéngaqië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. ¹⁹ Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. ²⁰ Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero bulu'iguequinu'-bí' bí'ido' ca naca. ¡Ca' gaca, Xuza', tu' caní guyaza ládi'xu'u!

²² Ní'irö gunnë':

—Yúgu'të budödë' Xuza' lu na'a. Cuntu nu bönni' nözinë' Nu náquië' Zxí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxí'inë' nözinë', ate' inözigaca ca' nupa na' Zxí'inë' rë'ënë' ulu'ínë' léguequi Xuzë'.

²³ Ní'irö Jesús buyüë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili', ²⁴ tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bē'ë, gulé'ënnē' ila'lé'enē' le rilé'eli', pero bití' bila'lé'enē' le. Gulé'ënnē' ila'yönnē' le riyönnili', pero bití' bila'yönnē' le.

Tu bönni' Samaria, bönni' tsahui'

²⁵ Ní'irö guyasē' tu bönni' yudo' usedi, en para si' bē'ë Jesús, gunábinē' Lē', rnnē':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rē' lē':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lē na' rulabu'?

²⁷ Bubi'ë didza' bönni' na', rnnē':

—Caní rna: “Idxi'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxi'inu' bönni' luzó'o ca nadxi'i cuinu'.”

²⁸ Jesús rē' lē':

—Dxi'ado' bubí'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnē' bönni' na' ubéaj dxi'a cuinē', rē' Jesús:

—¿Nuzxi na' bönni' luzá'a?

³⁰ Bubi'ë didza' Jesús, rē' lē':

—Buzē'ë tu bönni' Jerusalén, rudínniē', sa'yéajē' yödzö Jericó. La' nöza ni' gula'zönē' gubán lē'. Gula'güē' lari' nácuē', en gulunē' lē' huē'. Ní'irö bulu'zē'ë ni', en nucá'anagaquiē' lē', chirati cazē'. ³¹ Ní'irö gudödē' tu bixúz la' nöza ni'. Cate' bilé'enē' bönni' huē' na', tsölá'alö gudödē'. ³² Gudödē' ca' ni' tu bönni' nababē' zxi'ini xi'sóē' Leví, yugu' bönni' na' tunē' dxin que yudo'. Cate' bilé'enē' lē', tsölá'alö ca' gudödē'. ³³ Lē'sca' yu'ë tu bönni' Samaria nöza na', ate' bidxinē' gala' ga dē' bönni' huē' na'. Cate' bilé'enē' lē', buéchi' ládxi'ë lē'. ³⁴ Gubígui'ë ga na' dē', ate' gulu'ë le za, en xisi uva nál-la lu huē' queë', ate' buchölinē' le lari'. Ní'irö budxiē' lē' cúdzu'ba' böa' queë', en bu'ë lē' yu'u ga ta'dxinē' bönni' yú'ugaquiē' nöza, ate' ni' gudapa chi'ë lē'. ³⁵ Cate' za' rení' ia'tú dza, en chizóa uzē'ë bönni' Samaria na', guléajē' lászjaru' que chopa dza, le bucá'anē' lu nē'ë bönni' xan yu'u na', en rē' lē': “Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'.” ³⁶ Na'a, ¿nacxi runi li'? ¿Núzxilē' bönni' yonna ni gúquiē' bönni' luzē'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rē' Jesús:

—Bönni' na' buéchi' ládxi'ë lē'.

Ní'irö Jesús gudxi'ë lē':

—Guyéaj na'a, yöjén ca' li'.

Le benē' Jesús lédxiqacanu Marta, en María

³⁸ Ní'irö bu'ë nöza Jesús, ate' bidxinē' tu yödzödo' ga ni' tu nigula lēnu Marta guchē'ënu Lē' lédxiu. ³⁹ Marta ni zóanu nigula zxi'lanu lēnu María, ate' María na' gurö'ötēnu ga naca xini'ë Jesús, en ruzē' náganu xtídzē'ë. ⁴⁰ Marta na' bubí'uguí'inu, zián dxin runnu, ate' gubíga'nu ga na' zoē' Jesús, en rēnu Lē':

—Xan, ¿naru' cabí'ruí'i ládxi'tso' neda' tu' nucá'anabi' bi'i zxi'la' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rē'ë-nu:

—Marta, Marta, ruúbi' ruguí'ide'enu', en zián le ruí'i ládxi'u' runu'. ⁴² Tuz le run bayudxi nu gun, ate' María ni guröbi' lē na' nácatērö dxi'a, ate' lē na' guröbi' bití' udúa queébi'.

11

Ca ral-la' ulídzaru'-nē' Dios
(Mt. 6:9-15; 7:7-11)

¹ Tu dza ni' Jesús rulidzē' Dios. Cate' budxi bé'lenē' Dios didza', tuē' bönni' usēda queē' rē' Lē', rnnē':

—Xan, busedi netu' ulídzatu'-nē' Dios gü'íleentu'-nē' didza', ca benē' Juan, busédinē' bönni' dá'gaquiē' lē'.

² Ní'irō Jesús rē' légaquiē':

—Cate' ulídzali'-nē' Dios gü'ílenli'-nē' didza', guli'ná: Xuztu', zu' yehua' yubá, gá'ana zxön Lo'.

Gudá inná bē'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queētu'.

Biti' gu'u lataj si' bē' tu' xihui' netu',

pero busölá netu' lu na' nu ruá' dö'.

⁵ Jesús rē' ca' légaquiē':

—Channö zoē' nu bönni' ládjali', en zoē' böchi' luzé'ē, en channö huidē' ga na' zoē' guluhuēla, ate' ulidzē' lē', innē': “Böcha'a, benna quia' tsonna yöta xtila ⁶tu' si' bidxinē' quia' böchi' luzá'a, zē'ē zi'tu', pero biti' bi dē' le gu'a-nē' gahuē'.”

⁷ ¿Naru' ubi'ē didza' caní bönni' na' zoē' yu'u, guiē' lē': “Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'”? ⁸ Neda' rea' libí'ili': Sal-la' biti' chasē' bi unödzejē' queē' tu' náquiē' böchi' luzé'ē, pero chasē', en unödzejē' queē' idutē' le riquinnē' para cabirō upízxjanē' lē'. ⁹ Que lē' ni na' rea' libí'ili': Guli'naba, ate' Dios gunnē' queéli'. Guli'quilaj, ate' idzöli queéli'. Buli'lidza ra' yu'u, ate' tsalaj queéli'.

¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoē' nu bönni' ládjali', en náquiē' xuz, ate' channö zxí'inē' inábibi' lē' yöta xtila, ¿naru' unödzejatsē' queēbi' guiój? Channö inábibi' lē' tuba' böla, ¿naru' unödzejatsē' queēbi' bēla? ¹² Channö inábibi' lē' dxita que böra, ¿naru' unödzejatsē' queēbi' xöjnö'? ¹³ Caní naca, nácali' libí'ili' huiá' dö', pero nözili' unödzejali' quégacabi' zxí'inili' le naca dxi'a. Nácatērö löza Xúzili' zoē' yehua' yubá gunnē' queéli' Dios Bö' Lá'ayi, nülöli' inábili' Lē'.

Ta'nnē' runē' dxin Jesús len yöl-la' huáca que tu' xihui'
(Mt. 12:22-30; Mr. 3:19-27)

¹⁴ Tu dza bubéajē' Jesús bö' xihui' yu'u tu bönni', le run ga biti' raza innē'. Cate' burúaj bö' xihui' na', bē'ē didza' bönni' na' biti' guca innē', ate' bulu'bani bönachi nacuá' ni'. ¹⁵ Bal-la bönachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajē' yugu' bö' xihui' na'.

¹⁶ Ia'bal-la bönachi na' gulé'ēni ila'zì' bē' Jesús, ate' gula'nabi Lē' gunē' tu le gaca bē' le za' yehua' yubá. ¹⁷ Réquibe'enē' Jesús le ta'zá' ládxi'gaquiē', ate' rē' légaquiē':

—Gátitēs ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi. ¹⁸ Lē'sca' caní raza que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bē' que? ¿Rnná'sali' na'a: Len yöl-la' huáca que Beelzebú rubéaja' yugu' bö' xihui'?

¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi

runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que læ ni na', le tun nupa ni naca bæ' nachíxili'. ²⁰ Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bæ'ë Dios ga zóali'.

²¹ 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'. ²² Na'a, channö zë'ë ia'túë' bönni' nál-latërë' ca læ', en ucul-lë' læ', ní'irö cuë' yúgu'të le rudí'inë', læ na' ruzxöni ládxe'ë, ate' quísië' le dë queë' bönni' na'.

²³ 'Nu bití' rácalen neda', ridá'baga' neda'. Nu bití' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaaj ga uzí' ladxi'. Channö cabí idzöli que, inná: "Huöja' xilatja' ga ni' birúaja'." ²⁵ Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶ Ní'irö reaj, en röjxí' ia'gadxi bö' xihui', nácacatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zián na' bë'ënu zidzaj didza', rnnanu:

—Bica' ba nigula na' biá'anu Li' læ'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunnë':

—Nácacatërö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bæ' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zián ga zoë' Jesús, gusí lahuë' ru'ë didza', rnnë': —Ta'nába bönachi tuá' dö' ni guna' le gaca bæ' ga za' yöl-la' huáca quia', pero bití' bi le gaca bæ' ila'lé'enë'. Tuz le gaca bæ' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bæ' lógaca bönachi yödzö Nínive, læsca' caní gaca quia' neda', Bönni' Guljë' Bönachi, gaca' tu le gaca bæ' lógaca bönachi dza ni zóaru' na'a. ³¹ Cate' idxín dza ichúguië' Dios quégaca bönachi ila'guí'ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí' nabága'gaca bönachi ni xíguia', tu' bídanu lænu, birúajnu ga naca zi'tu' para uduzë' náganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'. ³² Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí' nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', bití' rigú'u le ga nagachi', en bití' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu

le naca chul-la. ³⁵ Ben chi'i cuinu' na'a, para cabí huóáca chul-la lë na' rigú'u bení lu icja ládxi'do'o. ³⁶ Caní naca, channö idúteo' nalísinu' le naca bení, en bití' bi zóalen li' le chul-la, yúgu'të ilé'enu' dxi'a ca raca cate' ruzeni' quiu' guí'.

Jesús ruzéqui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'.

³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, riguibi cuinli' ca riguíbili' láhuilögaca le ré'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dö'. ⁴⁰ Libí'ili', bönni' bití' réajni'ili'. ¿Naru' cabí nözili', Nu ben le zoa láchuisö ben ca' le yu'u lë'elö? ⁴¹ Na'a, guli'gún gun le dë queéli', ate' ní'irö huóáca dxi'a yúgu'të le dë queéli'.

⁴² 'Bica' bayechi' libí'ili', bönni' yudo' fariseo. Riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudödisili' le naca tsahui', en yöl-la' nadxí'i queéli' Dios. Yugu' lë ni run bayudxi gunli', en bití' ucá'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Ré'ënili' cö'öli' gapa naca lo lu yu'u ga rudúbili' rusédali' queë' Dios, en ré'ënili' ulu'lidza bönachi libí'ili' ba zxon gapa naca láhuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en bití' téquibe'e.

⁴⁵ Ní'irö bubí'ë didza' tu bönni' yudo' usedi raquië' xibá queë' Moisés. Ré' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' calëga láti'do'os bití' ruláhu'li' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. ⁴⁸ Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lë ni na', lu yöl-la' réajni'i queë', Dios gunné' caní: "Isöl-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." ⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzölió, ⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxi'ini guíë que lataj ga ta'dzöli bönachi yöl-la' réajni'i. Libí'ili' bití' riyázali', ate' ruzága'li' xinözigaca nupa tē'ëni ila'yaza.

⁵³ Cate' Jesús budxi bë'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba

yúdxide'enë' Lë' ca naca zián le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zián gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús ré' yugu' bönni' usëda queë cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. ² Biti' bi dë le naca balándo'os le cabí ilá' lahui, en bití' bi dë le nagachi' le cabí gaca bë'. ³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru' (Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéeguequi. ⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

⁶ 'Túti'gaquië'-ba' gáyu'ba' biguinnido' len chopa dumí lásido'. Biti' ral-la ládxe'ë-ba' Dios tu biguinnido' na'. ⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguinnido'.

Nupa ta'nnasö néquiquequi queë' Jesús (Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios, ⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nnë' quia' neda', Bönni' Guljë' Bönachi, gaca uniti lahuë' Dios léguequi, pero nu innë' zi' queë' Dios Bö' Lá'ayi, bití' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'. ¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

¹³ Tu bönni' núsë'ë ladaj bönachi zián na' ré' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

¹⁴ Jesús ré' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queëli'?

¹⁵ Ní'irö Jesús gudxë' bönachi nacuá' ni', rnnë':

—Buli'yútsöca'. Guli'gún chi'i cuinli' para cabí uhuí'di'li'. Le uzi'ë xibë nu bönni' bití' nácasö le zián le dë queë'.

¹⁶ Ní'irö Jesús bë'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödztada' gulapa lu xiyué'. ¹⁷ Ní'irö guzá' ládxe'ë bönni' na', rnnë': "¿Nacxi guntsa'? Biti' dë ga gapa chi'a le rulá' quia'." ¹⁸ Ní'irö rnnë': "Caní' guna'. Uquínajgaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'. ¹⁹ Ní'irö gaca guié' cuina': Chidéda' quia' zían le chinutuba', le gáhuida' zían iz. Uzí' ládxa'a. Guí'aj gahua', en udzëjada'." ²⁰ Ní'irö Dios rë'lë': "Lí', bönni' bití' bi nõzinë'. Na'a dzö' gátiu'. Na'a, ¿nuzxi caz guequi que, lë na' chinutubu'?" ²¹ Caní' raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

²² Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. ²³ Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'. ²⁴ Buli'yutëz ca raca quégacaba' boíquiaj. Biti' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuë' lézacaba'. ¿Naru' cabí nazáca'tëroli' libí'ili' ca yugu' biguínido'? ²⁵ ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi ruguí' ládxi'da'ahuë'? ²⁶ Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxöntëro?

²⁷ Buli'yutëz ca ta'zxön yöjdo'. Biti' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácacaga yöjdo' ni, sal-la' gúta'da' yöl-la' tsahui' queë'. ²⁸ Channö Dios runë' lachi yöj guíxi'do' rögaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácarö dxi'a queëli', libí'ili' na' bití' réajlë'ëli' Dios idú ládxi'li'? ²⁹ Que lë ni na', bití' gü'i ládxi'li' le ral-la' gáguli', en le ral-la' guí'jali', en bití' ubi uguí'ili' ládxi'do'oli'. ³⁰ Yúgu'të lë ni ta'guilaj bönachi yödzölió ni, pero chinöz quëzinë' Xúzili' Dios le riquínili'. ³¹ Guli'güí' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

Yöl-la' tsahui' rigú'uru' yehua' yubá

(Mt. 6:19-21)

³² Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queëli' lataj tsú'uli' ga ni' rinná bë'ë Lë'. ³³ Guli'guti' le dë queëli', en buli'nödztaj quégaca bönachi yechi'. Caní' gaca, gunli' queëli' yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinë' bönni' gubán, en bití' usunítiba' böa'do' le. ³⁴ Ga ni' dë yöl-la' tsahui' queëli', ni' gü'i ládxi'li' idxinli'.

Ral-la' sóaru' ban ladxi'

³⁵ Gunnë' ca' Jesús:

—Guli'sóa sina', en guli'quela' guí' le uzení' queëli'. ³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. ³⁹ Lë ni ral-la' inözili'. La'tu' nõzinë' xan yu'u bizxi dza huadxinë' bönni' gubán, usubán ládxe'ë, en bití' gu'ë lataj bönni' na' udxíë' yeru lidxë', para cabí cuanë' le dzö'ö lidxë'.

40 Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza biti' ribözali' neda'.

Bönni' huen dxin tsahui', en bönni' huen dxin biti' náquië' tsahui'
(Mt. 24:45-51)

41 Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdu'u didza', o reo' ca' caní yúgu'të bönachi?

42 Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queëgaquië' le ilahuë'. 43 Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. 44 Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. 45 Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zica'rë' huen dxin, bönni' en nigula, en isí lahuë' gu'aj gahuë', en súdxinë', 46 ní'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

47 'Bönni' huen dxin na' nözinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quínitërë' xanë' lë'. 48 Channö cabí nözinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxe'ë lë' le zxön, le zxöntërö ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi
(Mt. 10:34-36)

49 Gunnë' ca' Jesús:

—Bida' neda' dujéna' ga tsegui guí' yödzölió ni, en caba ládxa'a chinaguéla' guí' na'. 50 Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'. 51 ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga ila'rúaj choplö bönachi. 52 Na'a isí lo ulu'lá'alén luzé'eguequi gayu' bönachi nacua' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'. 53 Nu bönni' zóabi' bi'i bönni' queë' tá'baguë'ë zxf'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxf'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' zxf'ininu.

Le nácacaca bë' le taca na'a dza
(Mt. 16:1-4; Mr. 8:11-13)

54 Jesús gudxë' ca' bönachi zián nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca. 55 Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. 56 Libí'ili', bönni' ruluí'isö tsahui' cuinli'. Nözili' le ruluí'i le raca lúzxiba, en le raca luyú ni, pero biti' réquibe'eli' le ruluí'i le nácacaca bë' taca dza ni zóaru' na'a.

Ral-la' ugá'analenru' tsahui' nu rilé'rë'u
(Mt. 5:25-26)

57 Gunnë' ca' Jesús:

—¿Bizx que bití' ruchi'a rusöröli' la' libí'isili' ca naca le naca tsahui'?
 58 Channö zoa nu bi unabi yudxi li', ate' zéajli' idxinli' yúlahui', bē' ladxi' ugá'analenu' tsahui' nu na' tsanni ni' yú'uli' nōza, para cabí uzegui li' lahuē' bōnni' uchi'a usöröē' libí'ili', ate' bōnni' uchi'a usöröē' na' udödē' li' lu nē'ē bōnni' rusayjē' lidxi guié, ate' bōnni' na' rusayjē' lidxi guié cu'ē li' lidxi guié na'. 59 Rea' li', bití' uruju' ni' cate' údxirō quizzju' yúgu'tē dumí lásido' ral-lu'u que nu na'.

13

Run bayudxi ubí'i ládxi'ru'

¹ La' dza ní'isō bila'dxinē' bōnni' ta'guíxjöi'inē' Jesús ca benē' Pilato, bētiē' bal-lē' bōnni' Galilea, en guzxi'ē rōn quégaquiē', le bugútsi'nē' xichōngacaba' bōa' bēdxi chigulútiē' léga'caba' para ila'gu'ē xichōngacaba' na' lahuē' Dios.
² Bubi'ē didza' Jesús, rē' légaquiē':

—¿Naru' réquili' gulácarē' bōnni' dul-la' bōnni' Galilea na' ca ia'zica'rē' bōnni' Galilea, tu' gula'guí'i gula'zaquiē' caní? ³ Rea' libí'ili': ¡Calēga! Channö cabí ubí'i ládxi'li', nítili' ca' yúgu'tēli'. ⁴ Lēasca' caní guca quégaquiē' chizxunē' bōnni' ni', yōjbaga' yu'u sibi na' nazí'i le Siloé légaquiē', ate' gulátiē'. ¿Naru' réquili' gula'bága'tērē' légaquiē' xíguia' ca ia'zica'rō bōnachi nacua' Jerusalén? ⁵ Rea' libí'ili': ¡Calēga! Channö cabí ubí'i ládxi'li', nítili' ca' yúgu'tēli'.

Rucúdzu'ē didza' Jesús que yaga higo bití' bi ribía

⁶ Ní'irō bucúdzu'ē didza' Jesús, rē' légaquiē':

—Zoē' tu bōnni', zoa tu yaga higo nazē' ga naca lu xiyúē'. Rōjtijē' le ribía yaga na', pero bití' bi ridzōlinē'. ⁷ Ní'irō gudxē' bōnni' runē' dxin lu xiyúē' na', rnnē': "Chiguca tsonna iz rida' rududilja' le cuía yaga higo ni, en bití' bi ridzōlida'. Guchugu le. ¿Bizx que run nigui luyú ni?" ⁸ Ní'irō bubi'ē didza' bōnni' huen dxin na', rē' lē': "Xan, bucá'anagarō le ia'tú ízatēz, ate' uzatsa' yu zxani, en cu'a bēbu zxani. ⁹ Channö cuía yaga ni, gaca dxi'a, pero channö cabí bi cuía, ní'irō ichugu' le."

Ruúnē' Jesús tu nigula ré'enu cate' naca dza lá'ayi

¹⁰ Tu dza rusédinē' Jesús bōnachi nacua' lu yu'u ga tu'dubē' bōnni' judío, en tu'sedē' queē' Dios cate' naca dza lá'ayi quégaquiē'. ¹¹ Zóanu tu nigula ní' chiguca chizxunu' iz ré'enu, tu' yu'u lēnu bō' xihui' run ga te'e bōnachi, ate' nayécutica'sinu ridanu, en bití' ca' raca ulí cuinnu. ¹² Cate' bilé'enē'-nu Jesús, bulidzē'-nu, rnnē':

—Nigúlado', chibōácu' que yōdzōhuē' quiu'.

¹³ Ní'irō Jesús guxóa nē'ē lēnu, ate' la' bulitē cuinnu, en gulú'unu-nē' Dios yōl-la' ba. ¹⁴ Ní'irō gulénē' bōnni' lo que yu'u ga na' tu'dubē' tu'sedē' queē' Dios. Rilenē' tu' bunē' Jesús nigula na' cate' naca dza lá'ayi. Bōnni' lo na' gudxē' nupa nacua' ni', rnnē':

—Xopa dza nacua' cate' runru' dxin. Dē lataj yugu' dza ni guídali' para nu un libí'ili', en calēga dza lá'ayi.

¹⁵ Ní'irō bubi'ē didza' Xanru', rnnē':

—Libí'ili', bōnni' rulu'isō tsahui' cuinli', ¿naru' cabí rusédxigacali'-ba' bōa' bēdxi que queéli' ga na' dá'gacaba' cate' naca dza lá'ayi, ate' tsōjuá'agacali'-ba' para ilé'ajba' nisa? ¹⁶ Nácanu nigula ni zxi'ini xi'sóē' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lēnu sal-la' naca dza lá'ayi?

¹⁷ Cate' bē'ē didza' ni Jesús, bulu'tu'ínē' yúgu'tē bōnni' nacu'ē ni' ta'lenē' Lē', pero bulu'dzeja ia'zica'rō bōnachi, yúgu'tē nupa nacuá' ni', tu' ta'le'enē' yugu' le zxōn runē' Jesús.

Rucúdzu'ē didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irō rnnē' Jesús:

—¿Nacxi caz raca rizzōn le rinná bē'ē Dios, o bizxi uséqui'tseru' le? ¹⁹ Raca ca raca que xisedo' mostaza, le guzxi'ē tu bōnni', ate' guzē' le ga naca lu xiyúē'. Guzxōn yaga mostaza na', en guca ca tu yaga zxōn, ate' bila'dxinba' biguínido', gulunba' xcá'agacaba' lu ni'a nē'e yaga mostaza na'.

Rucúdzu'ē didza' Jesús que cúa zi que yōta xtila

(Mt. 13:33)

²⁰ Lē'sca' caní rnnē' Jesús:

—¿Bizxi caz uséqui'tseda' le rinná bē'ē Dios? ²¹ Naca ca cúa zi que yōta xtila, le guzxi'ínu tu nigula, en bugútsi'nu tsonna cō' cúa yōta xtila, ate' guyazxaj idútē cúa na'.

Tu ga tōdiru' le naca guído'

(Mt. 7:13-14, 21-23)

²² Tsanni ni' yu'ē nōza Jesús, sa'yéajē' Jerusalén, ridödē' yugu' yōdzō zxōn, en yugu' yōdzōdo', ate' rusédinē' bōnachi nacuá' gapa na'. ²³ Tu bōnni' zoē' ni' gunábinē' Jesús, rnnē':

—Xan, ¿naru' nabábasō nupa ulu'lágaca?

Jesús ré' nupa nacuá' ni', rnnē':

²⁴ —Guli'gú'i ládxi'li' tsú'uli' saca' ga nu ridōdi le naca guído', tu' rea' libí'ili': Zían nupa ilē'ēni ila'yaza ni', pero biti' ila'zéqui'nē'. ²⁵ Tōdi chasē' Xan yu'u, en usayjē' yu'u, isí loli' libí'ili' na' zóali' ní'ilō ulídzali'-nē' ra' yu'u na', ate' guié'li'-nē': “Xan, Xan, gusalaj queētu.” Ní'irō ubi'ē didza' Lē', en guié' libí'ili': “Biti' nōzda' nuzxi libí'ili'.” ²⁶ Ní'irō isí loli' innali': “Gú'i gudágulentu' Li', ate' busédinu' gapa naca lu yē'ēyi queētu.” ²⁷ Ní'irō guié' libí'ili': “Rea' libí'ili', biti' nōzda' gazxi bōnachi libí'ili'. Guli'cuíta ga zoa', yúgu'tēli' ruá'ali' dō.” ²⁸ Ní'irō cōdxi yéchi'li', en gagu zxea láya'li' cate' ilé'egacali'-nē' Abraham, en Isaac, en Jacob, en yúgu'tē bōnni' gulu'ē didza' uláz queē' Dios, nacu'ē ga ni' rinná bē'ē Dios, pero libí'ili' sóali' ní'ilō. ²⁹ Ila'dxín bōnachi ila'rúaj saca' ga rilén gubidza, en saca' ga ribía gubidza, en saca' ga za' bō' ziaga, en saca' ga ridōdi gubidza beo' ziaga, ate' ila'bō'ē ilahuē' ga ni' rinná bē'ē Dios. ³⁰ Ní'irō ilaca lo bal-la bōnachi nácagaca cá'asō na'a, ate' ulu'gá'ana cá'asō bal-la nupa nácagaca lo na'a.

Ribōdxi yechē'ē Jesús ni'a quégaca bōnachi Jerusalén

(Mt. 23:37-39)

³¹ La' dza ní'isō bila'dxinē' bal-la bōnni' yudo' fariseo ga zoē' Jesús en tē' Lē':

—¡Burúaj! ¡Buzxunnaj ni! ¡Rē'ēnē' Herodes gútiē' Li'!

³² Jesús ré' légaquiē':

—Guli'tséaj, guli'tsōjōdxē' bōnni' na' náquiē' ca tuba' bōza', innali': “Buyútsöca', rubéajgaca' bō' xihui', en ruúna' bōnachi na'a, en cuxō, en cate' gaca lidzaj, údxi guna' dxin quia'.” ³³ Run bayudxi tséajlensa' ca' nōza na'a, en cuxō, en huidzaj, ate' idxina' Jerusalén, tu' tútigaquiē' bōnni' tu'ē didza' uláz queē' Dios ni'.

³⁴ 'Libí'ili', zóali' Jerusalén. Rútigacali'-nē' bōnni' tu'ē didza' uláz queē' Dios, en ruládxi'gacali'-nē' guiōj bōnni' gubáz risōl-lē'ē Dios ga zóali'. Cate' xō zían luzuí'gú'unida' utuba' libí'ili' quia' ca runba' yōjede, rutúbiba' bōrado' queēba'

zxan xíliba', pero bití' gú'unili'. ³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj nru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busöl-la'të' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

⁸ —Cate' nu bönni' ulidzë' li' guídu' ga raca laní que yöl-la' rutsaga na', bití' cö'u lataj lo. Nadxi ca' nulidzë' ca' tu bönni' nácatërë' lo ca li'. ⁹ Ní'irö bönni' na' bulidzë' li' huidë' ga zu', en guië' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö. ¹⁰ Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

¹² Jesús rë' ca' bönni' na' bulidzë' Lë', rnnë':

—Cati' gunu' tu güi' huagu o tu lanído', bití' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí' quiu'. ¹³ Cate' gunu' tu güi' huagu, bulidza yugu' bönachi yechi', en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la.

¹⁴ Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí' quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

¹⁶ Jesús rë' lë':

—Zoë' tu bönni' benë' laní zxön, ate' zían nupa bulidzë'. ¹⁷ Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!" ¹⁸ Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." ¹⁹ Ia'túë' rnnë': "Si' guzxi'a gayu' nözaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj." ²⁰ Ia'túë' rnnë': "Si' butsaga na'a, en que lë ni na' bití' gaca guída'." ²¹ Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yé'ëyi, en gapa naca la' nöza que

yödzo ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la." ²² Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj." ²³ Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídígaca nupa nacuá' ni' para ilí lidxa', ²⁴ tu' rea' libí'ili': Biti' gahuë' que laní quia' nitúë' bönni' ni' bulidza' zí'alö."

Le sáca'ru' cate' zéajlenru'-në' Cristo

²⁵ Yugu' dza ni' röjácálen Jesús bönachi zían, ate' buécjë' Jesús, en rë' légaquië':

²⁶—Channö guídalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxi'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. ²⁷ Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', biti' gaca gáquië' bönni' usëda quia'. ²⁸ Channö zoë' nu bönni' ladaj libí'ili' guë'ënnë' gunë' tu yu'u zían cuía, ¿naru' cabí cö'ë zí'alö ulabë' gáca'xi dumí ral-la' utöë' para inözinë' channö dë queë' tsca le riquinnë' para údxi gunë' yu'u na'? ²⁹ Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', ³⁰ ila'nná: "Bönni' ni gusí lahuë' runë' yu'u, pero biti' guca údxi gunë' le." ³¹ Lë'sca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'túë' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë? ³² Channö cabí séqui'në', cate' ni' zoë' zi'tu' ia'túë' bönni' na' rinná bë'ë, isöl-lë'ë bönni' gubáz queë', ate' inábinë' lë' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libí'ili' biti' ucá'anë' yúgu'të le dë queë', biti' gaca gáquië' bönni' usëda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵ Bítirö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'

(Mt. 18:10-14)

¹ Bulu'dubë' yúgu'të bönni' tu' quízxjë' lázagaca bönachi, en yugu' bönni' cá'asö ga zoë' Jesús para ulu'zë náguië' Lë'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

³ Ní'irö bucúdzu'ë didza' Jesús, rë' légaquië':

⁴—Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zícá'röba' tápalalaj yu' chënnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölrönë'-ba'? ⁵ Cate' udzölinë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guíë' légaquië': "Buli'dzëjalén neda', tu' chibudzö'lida'-ba' bö'cu' zxila' quia' gunítiba'." ⁷ Rea' libí'ili': Lë'sca' caní gacatëro yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë

ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bi'i ládxi'gaquië'.

Rucúdzu'ë didza' Jesús que tu dumí guniti

⁸Rnnë' ca' Jesús:

—Channö zóanu tu nigula, dë queënu chi dumí plata, en channö initu tu dumí plata na', ¿naru' cabí uquéla'nu guí', ate' ulúanu yu'u, uguilaj yúdxinu le cate' udzölrönu le? ⁹Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: “Buli'dzëjalen neda', tu' chibudzövida' dumí plata na' guniti.” ¹⁰Rea' libí'ili': Lësca' caní, ulu'dzëjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxi'ë.

Rucúdzu'ë didza' Jesús queëbi' tu bi'i gunitibi'

¹¹Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹²Bi'i cuidi' na' rëbi'-në' xúzibi': “Dad, benna quia' le dë quiu' le ral-la' guequi quia'.” Ní'irö xúzibi' na' gudísië' quégacabi' le dë queë'. ¹³Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zi'tu', ate' ni' butöbi' dërö le dë queëbi'. Le ruá' dö' benbi'. ¹⁴Cate' chibutöbi' dërö le dë queëbi', guca gubín lu yödzo ga na' zóabi', ate' biyadzaj queëbi'. ¹⁵Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusöl-lë'ë-bi' ga dë xiyuë' tsöjgágubi'-ba' yugu' cuchi queë'. ¹⁶Guca ládxi'bi' gágubi' guixi' cá'asö na' táguba' cuchi, pero cuntunu bi'bë' le gágubi'. ¹⁷Ní'irö bubí'i ládxi'bi', rnnabi': “Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún. ¹⁸Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'. ¹⁹Bíti'rö naca' neda' lesaca' gaca' xzí'inu'. Ben neda' ca bönni' huen dxin quiu'.” ²⁰Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxi'ë-bi'. Carelö yöjxí'galë'-bi' xúzibi', en yöjnidë' yenbi', gudahuë'-bi' zxixi. ²¹Ní'irö xzí'inë' na' rëbi'-në': “Dad, bena' dul-la' lahuë' Dios, zoë' yehua' yubá, en lo' li'. Bíti'rö naca' neda' lesaca' gaca' xzí'inu'.” ²²Ní'irö xúzibi' rë' yugu' bönni' huen dxin queë', rnnë': “Guli'tsöjléajtë lari' nazáca'tërö, en guli'gacu-bi'. Guli'cú'u le nazaca' xibön ná'abi', en bulí'dá' huarache ní'abi'. ²³Guli'tsöjxí'i-ba' bëdxi renni', ate' guli'guti-ba'. Gáguru'-ba', en gunru' laní, ²⁴tu' guca bi'i bönni' quia' ni ca tu bi'i chinátibi', ate' bubanbi'. Gunitibi', ate' chibulá'abi' na'a.” Ní'irö gula'sí lógaquië' tu'dzëjanë'.

²⁵'Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'. ²⁶Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. ²⁷Bönni' huen dxin na' rë'ë-bi': “Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'.” ²⁸Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobí' tsú'ubi'. ²⁹Bubí'ibi' didza' bi'i zí'alö na', rëbi'-në' xúzibi': “Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' xzí'la'do' para güi'ilena' xibé yugu' luzá'a. ³⁰Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'.” ³¹Ní'irö xúzibi' rë'ë-bi', rnnë': “Xzí'ina', li' zóalen cazu' neda' ate' yúgu'të le dë quia', quiu' nequi. ³²Ben bayudxi gunru' laní, en udzëjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunitibi' ate' chibulá'abi'.”

16

Rucúdzu'ë didza' Jesús queë' bönni' huen dxin biti' náquië' tsahui'

¹ Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë' yöl-la' tsahui' queë', en zoë' ca' queë' tuë' bönni' huen dxin dë' lu në'e uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë' queë' xanë' na'. ² Ní'irö xan yu'u na' bulidzë' bönni' huen dxin na', en rë' lë': “¿Bizxi didza' ni riyönda' quiu'? Bulu'i neda' le naca bë' dxin nunu', tu' cabirö gata' lu no'o uláz quia'.” ³ Ní'irö guzá' ládxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnna'sö quia'. ⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zì' neda' lídxiguequi. ⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zì'alö: “¿Gáca'xi ral-lu'u queë' xana'?” ⁶ Lë' rnnë': “Tu gayuá' rö'ö chugu le za ral-la'a.” Bönni' huen dxin lo na' rë' lë', rnnë': “Ni dë' guichi ga nazúaj le ral-lu'u. Gurö'ötë' ni, en buzúaj ia'tú lu guichi le inná chi-un rö'ö chugu ral-lu'u.” ⁷ Gudödi ni' gunábinë' ia'túë', rnnë': “Nazxi lí, ¿gáca'xi ral-lu'u?” Lë' rnnë': “Tu gayuá' da'a zxoá' xtila.” Ní'irö bönni' huen dxin lo na' rë' lë', rnnë': “Ni dë' guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u.” ⁸ Réquibe'enë' xanë' na' sína'të benë' bönni' huen dxin biti' náquië' tsahui' na'. Caní naca, nácacagarë' sina' bönni' yödzölió ni lu le tunë' la' légacasë', ca nácacaca bönachi ta'dalen Dios lu bení' queë'.

⁹ 'Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë' queëli' yödzölió ni, para cate' idxín dza ucá'anali' yugu' lë' ni, ilunë' libí'ili' bal lataj ni' zóatica'sö.

¹⁰ 'Nu rugún dxi'a dxin tu le cuídí'sö dë' lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídí'sö dë' lu në'e, biti' ugún dxi'a dxin tu le zxön gata' lu në'e. ¹¹ Que lë' ni na', channö cabí rugunli' dxi'a dxin yöl-la' tsahui' dë' queëli' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë' lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quezili'?

¹³ 'Biti' gaca nitúë' bönni' huen dxin gunë' xichíngaca chopa xanë', tu' udí'inë' tuë', en idxí'inë' ia'túë', o gunë' bal tuë', en uzóë' tsölá'alö ia'túë' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë' ni na' bulu'titjë' Jesús. ¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nözinë' Dios le yu'u icja lãdxi'do'oli', tu' naca lë' na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquini. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rō'ë ra' yu'u queë' bönni' na' rilé'enë' yöl-la' tsahui'. ²¹ Raca láchxë'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguí'i rizáquë'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguië' Lázaro na' lë'. ²⁴ Ní'irö bë'ë zidzaj didza', rnnë': "Xuza', Abraham, buéchi' ladxí' neda'. Gusöl-la' Lázaro quia' para usubisë' xibón në'ë, en udusuhuóalë' lúdxá'a, tu' riguí'i rizáca'a lu guí' ni." ²⁵ Abraham rë' lë', rnnë': "Zxí'ina', busá láchxu'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxonë' Lázaro ni, pero li' riguí'i rizácu'u. ²⁶ Ia'stú, tu ra' guí'a sibi rō', le zoa gatsaj láhuilö ga ni' zóali' libí'ili', en ga ni zóatu' netu'. Que lë' ni na' nupa nacué' ni, en ilé'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacué' ni." ²⁷ Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isöl-lu'u-në' Lázaro tsejë' lidxë' xuza', ²⁸ tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquië' ca' lataj ga ni riguí'i rizáca'a." ²⁹ Ní'irö Abraham rë' lë', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zë náguië'." ³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i láchxí'gaquië'." ³¹ Abraham rë' lë', rnnë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la'

(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnnë':

—Nacué'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. ² Dxi'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i láchxë'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guië' li': "Rubí'i láchxá'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' tē' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: “Gucuíta ni, en yöjsóa lu nísado”, ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': “Gudá, gurö'ö gagu”? ⁸ ¡Calëga! Caní guië' lë': “Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'.” ⁹ ¿Naru' huëtsë' bönni' nadó'o queë' na': “Xclenu”, tu' benë' ca gunná bé'enë' lë'? Runi neda', bití' gunë' caní. ¹⁰ Lësca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': “Nácatu' huen dxin cabí nácatu' lesaca', tu' bénsötu' le run bayudxi guntu'.”

Chië' bönni' té'enë' huë' nudzu' ruzödi

¹¹ Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. ¹² Cate' guyázië' tu yödzödo', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zítu'sö, ¹³ en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjluí'i cuinli' lógaca bixúz.

Tsanni ni' söjáquië', bulu'huöáquië' dxi'a. ¹⁵ Ní'irö tuë' bönni' nútsë'ë ladjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ruí'tica'së' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': “¡Xclenu!”

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacua'tsë' ia'zica'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zítu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, bití' naca le ilé'eli'. ²¹ Cuntu nu gaca inná: “¡Ni bidxín!”, o inná: “¡Ni' bidxín!” ¡Buli'yútsöca! ¡Rinná bë'ë Dios lu icja ladxí'do' gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero bití' ilé'eli' le. ²³ Ila'cuá' nupa ilë libí'ili': “¡Ni zoë'!” o ila'nná: “¡Ni' zoë'!” Bití' tséajli' ni', en bití' tséajlenli' légaquië'. ²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. ²⁵ Zí'alö ca gaca lë ni, run bayudxi quí'i sáca'da', ate' bönachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. ²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le

arca, ate' bidxintë nisa guiøj usuniti yödzülió le busuniti yúgu'të'. ²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'. ²⁹ Cate' bidxín dza na' burúajë' Lot lu yödzü Sodoma, böxaj guí' ca tu nisa guiøj, enca' le ruzéguida' nazí'i le azufre, ate' bulu'suniti yúgu'të'. ³⁰ Lësca' caní gaca cate' idxín dza uluí'i lahua' neda', Bönni' Guljë' Bönachi.

³¹ 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', bití' ral-la' huötjë' tsöjzxi'ë le dë queë', ate' nu zoa la' guixi', lësca' caní, bití' ral-la' huøjë' lidxë'. ³² Guli'sá' ládxi'li' ca guca queënu nigula queë' Lot. ³³ Nu bönni' ré'ënë' gun chi'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélë'ë le.

³⁴ 'Rea' libí'ili': Cate' idxín rëla na', ila'cu'ë chopë' bönni' tsözxón ga tasië', ate' tuë' uduzxi'a-në', en ia'tué' ucá'ana' lë'. ³⁵ Ila'cuá'anu huëtü tsözxón chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ë chopë' bönni' la' guixi', ate' tuë' uduzxi'a-në', en ia'tué' ucá'ana' lë'.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús ré' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

¹ Ní'irö bucúdzü'ë didza' Jesús, ré' légaquië' ca run bayudxi ulídzatica'siru'-në' Dios, en bití' gaca chopa ládxi'ru'. ² Rnnë':

—Zoë' tu bönni' ruchi'a rusöröë' tu yödzü, bönni' bití' rádxi'në' Dios, en bití' runë' nu bönni' bal. ³ La' yödzü ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnnanu: “Buchi'a busörö le run quia' nu ruá' dö' quia'.” ⁴ Xidzé bití' gú'unnë' bi gunë' queënu, pero gudödi ni' guzá' ládxi'ë, rnnë': “Bití' rádxi'da'-në' Dios, en bití' runa' nu bönni' bal, ⁵ pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídzatica'sinu ni, en para cabí tödi bë' upízxjanu neda'.”

⁶ Ní'irö Xanru' ré' légaquië', rnnë':

—Guli'zé nágali' ca na' gunné' bönni' ruchi'a rusöröë' na', bönni' bití' náquië' tsahui'. ⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'”? ⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzöli'da' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzü'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi. ¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquízxjë' lázagaca bönachi. ¹¹ Guzuínë' bönni' yudo' fariseo na', en caní bulidzë' Dios, rnnë': “Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en bití' nácagaquië' tsahui'. Ta'guitsjë' xibá que yöl-la' nutsaga na'. Lësca' bití' naca' ca bönni' uquízxaj ni. ¹² Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'të le rata' quia'.” ¹³ Guzóazë' zi'tu' bönni' uquízxaj na', en bití' böázxjanë' ichisa lahuë' uyúé' lúzxiba, pero gudapë' luchu'ë, rnnë': “Dios, buéchi' ladxi' neda', bönni' dul-la'.” ¹⁴ Neda' rea' libí'ili': Böajë' lidxë' bönni' uquízxaj na', nuhuóáquië' tsahui' lahuë' Dios, calëga ia'tué' bönni' ni'. Núti'tës

bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'

(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús légaabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'güi'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nácagaca ca bi'i caní'lataj ga rinná bë'ë Dios. ¹⁷ Le nácate rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', bití' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios: Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácate.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhuí'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhuí'innë' bönni' na', rnnë':

—¿Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios!

²⁵ Gácarö tódiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxë' légaquië':

—Le bití' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légaquië':

—Le nácate rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' zxi'inë', tu' ruí'i ladxë'ë inná bë'ë Dios, ³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús riguíxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

³¹ Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljé' Bönachi. ³² Yugu' bönni' Jerusalén ulu'dödë' neda'

lu ná'agaquië' bönni' zi'tu', ate' ulu'titjè' neda', en ulu'lidza zi'è neda', en ulu'chejë' neda' zxöna'. ³³ Ila'guinë' neda', ate' tödirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'
(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'è ra' nöza rinabë' nu bi gúnna sö queë'. ³⁶ Bönni' ni' biyönnë' ta'dödi bönachi zián ni', ate' gunabë' bizxi na' raca. ³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'è zidzaj didza', rnnë':

—¡Jesús, zxí'ini xi'sóë' David, buéchi' ladxi' neda'!

³⁹ Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'è, pero lë' zídzejrö bë'è didza', rnnë':

—¡Zxí'ini xi'sóë' David, buéchi' ladxi' neda'!

⁴⁰ Ní'irö guzé' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huöálaj guiöj lahua'.

⁴² Jesús rë' lë':

—Chiböálaj guiöj lo'. Chiböácu' tu' réajlë'u neda'.

⁴³ La' ní'isö bulé'etenë', ate' sa'yéajlenë' Jesús, rigu'è Dios yöl-la' ba. Lësca' yúgu'të bönachi nacua' ni', en bila'lé'e lë' na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ní', bönni' lo ládjagaquië' bönni' uquízxaj, ate' dë yöl-la' tsahui' queë'.

³ Ru'í ládxe'ë bönni' ni ilé'enë' Jesús, pero bití' guca queë' tu' nacua' bönachi zián ni', en náquië' bönni' ga rë'ëdo'. ⁴ Ní'irö carelö yöjnöruë' lógaca bönachi zián na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'.

⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, böjtjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' böjtjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönachi nacua' ni' lë' ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analënë' bönni' dul-la'.

⁸ Ní'irö guzuinë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquixxa' bönachi, ubi'a quégaca bönachi na' tapa cö'tëlö ca'.

⁹ Jesús rë' lë':

—Na'a dza ni bidxín yöl-la' rusölá quégaca nupa nacua' yu'u ni, tu' nababë' bönni' ni dí'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdzü'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë tu bönni' lo, sa'yéajë' tu yödzö zi'tu' para si' lu në'ë yöl-la' unná bë', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bë'ë que queëgaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz quëgaquië' ga ni' tsejë', ila'nnë': "Biti' rë'ënitü' inná bé'enë' bönni' ni netu'." ¹⁵ Ní'irö guzxi' lu në'ë yöl-la' unná bë', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'. ¹⁶ Cate' bönni' zí'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." ¹⁷ Xanë' na' rë' lë': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö." ¹⁸ Ní'irö bidxinë' ia'túë' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." ¹⁹ Xanë' na' rë' ca' lë': "Inná bé'enu' gayu' yödzö." ²⁰ Ní'irö bidxinë' ia'túë' lahuë' lë', rnnë': "Xan, ni dë tu cö' dumí quiu' na'. Ben chí'a le, butúlida' le lari'. ²¹ Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xanë' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöröa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" ²³ Na'a, ¿bizx que biti' yöjlu'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rë' nupa nacuá' ni': "Guli'cúa lu në'ë dumí na', ate' guli'gü'i queë' bönni' na' dë queë' chi cö' dumí." ²⁵ Légaquië' të' lë': "Xan, chidë queë' chi cö' dumí." ²⁶ Ní'irö bubi'ë didza' xángaquië', rnnë': "Rea' libí'ili': Nu rugún dxi'a dxin le do' dë lu në'e, ulu'zxöni ládxi'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e." ²⁷ Ca naca quëgaquië' bönni' ni' biti' ta'lé'enë' neda' dxi'a, en biti' gulé'ënnë' inná bé'eda' légaquië', guli'tsöjzxi' légaquië' para ídigaquië' ni, ate' guli'guti légaquië'."

Len yöl-la' ba zxön razië' Jesús yödzö Jerusalén
(Mt. 21:1-11; Mr. 11:1-11; Jn. 12:12-19)

²⁸ Cate' budxi gunné' caní Jesús, buguelë'ë xinözë', sa'yéajë' zaca' yödzö Jerusalén. ²⁹ Cate' bila'dxinë' gala' ga nacuá' yödzö Betfagé, en yödzö Betania, ga naca ra' guí'ado' nazí'i le Guí'a Yaga Olivo, gusöl-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntü nu ribíani lëba'. Guli'sedxi-ba', en guli'duchë'-ba' quia' ni. ³¹ Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

³² Söjajúquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'chë'ë-ba' ga na' zoë' Jesús. Cate' chigula'xóë' yugu' lari' tsölá'a quëgaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'.

³⁶ Gapa ral-la' tödë' Jesús, gula'chiljë' lari' quëgaquië' la' nöza. ³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja

quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. ³⁸ Ta'nnë':

—¡Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zían ni' tē Jesús, ta'nnë':

—¡Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualuí'i caz zidzaj didza'.

⁴¹ Cate' bidxinë' Jesús gala' ra' yödzö na', en rilé'enë' le, ní'irö ribödxë' que, ⁴² rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le. ⁴³ Huala'dxín queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lë'alö, ate' yúgu'të lataj idú gásibi'ilö ilúnlenë' libí'ili' gudil-la. ⁴⁴ Ulu'quínajë' zö'ö run chí'i yödzö queéli', en ilútië' nupa nacua' lu yödzö ni. Biti' ugá'ana guiöj lahui luzë'e. Yúgu'të lë ni gaca queéli' tu' cabí gúquibe'eli' dza bidë' Dios buduyüë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázië' Jesús lö'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. ⁴⁶ Rë' légaquië':

—Nazúaj lu guichi lá'ayi, rna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. ⁴⁸ Biti' bulu'dzölinë' nacxi ilútië' Lë', tu' idú ládxi'gaca tu'zë nágagaca yúgu'të bönachi xtídzë'ë.

20

Yöl-la' unná bë' dë lu në'ë Jesús

(Mt. 21:23-27; Mr. 11:27-33)

¹ Tu dza, cate' ni' rusédinë' Jesús bönachi ga naca chila yudo', en riguixjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zëajni'inë', ga na' zoë', ² ate' tē Jesús:

—Gudixjö'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

³ Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. ⁴ ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

⁵ Gulún xtídzagaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guië' rë'u: “¿Bizx que biti' guyéajlë'ëli'-në'?” ⁶ Channö guiëru'-në': Gula'söl-lë'ë yugu' bönni' lë', bönachi lu yödzö ni ulu'ládxi' rë'u guiöj, tu' nöziguequi bë'ë didza' Juan na' uláz queë' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nacagaquië' tsahui'
(Mt. 21:33-44; Mr. 12:1-11)

⁹ Ní'irö la' gusí lotë' Jesús ru'ilenë' bönachi nacua' ni' didza'. Rucúdzu'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusól-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lë'ë lë' cá'asö. ¹¹ Leyúbölö gusól-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö. ¹² Leyúbölö gusól-lë'ë quégaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

¹³ Ní'irö guzá' ladxë'ë xani luyú na', gunné': "¿Nacxi guntsa'? Isól-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal."

¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': "Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'." ¹⁵ Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? ¹⁶ Guidé', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nnë':

—¡Inná Dios biti' gaca caní!

¹⁷ Ní'irö buyüë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiöj na' gula'ru'unë' bönni' huen zö'ö,

guiöj ni chinaca guiöjlen squin zö'ö?

¹⁸ Núti'tës nu ibixi lahui guiöj ni, quítsaj nu na', ate' nu bönni' tsöjbága' guiöj ni lë', uzxuzxaj lë'.

Ca naca dumí ta'guixxaj lázagaca bönachi
(Mt. 21:45-46; 22:15-22; Mr. 12:12-17)

¹⁹ La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero guládxinë' bi ilún bönachi zían nacua' ni'. ²⁰ Ní'irö bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'lu'i cuíngaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. ²¹ Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruchí'a rusöröu' ca naca le tu'lu'isö lahui bönachi, pero idútë li naca ca rusédinu' xibá queë' Dios. ²² Gudíxjöi'i netu'. ¿Naru' run bayudxi quixxaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bë'ëli' neda'? ²⁴ Buli'lu'itsöqui' neda' tu dumí ridá. ¿Nuzxi lahui da' lë'ë ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

²⁵ Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

²⁶ Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zián na', pero bulu'báinë' ca naca didza' bubie', ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷ Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinë' ní', ate' gula'nábinë' Jesús, ta'nnë':

²⁸ —Bönni' Usedi, Moisés buzúajë' queëru' lu guichi, le rnna: “Channö gátië' nu bönni', ate' ugá'ananu nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.” ²⁹ Gula'cuá'abi' gadxi bi'i bönni' nácagacabi' böchi'bi', ate' bi'i zí'alö na' butsaga ná'alénbi' bi'i nigula, en gútibi', bití' zóabi' bi'i queëbi'. ³⁰ Ní'irö bi'i buropi na' butsaga ná'alénbi'-nu nigula na', ate' gútibi' ca' bi'i ni, bití' zóabi' bi'i queëbi'. ³¹ Butsaga ná'alénbi'-nu bi'i bunní na', ate' la' tuz ca gulunbi' igádxitëbi', ate' gulátibi', bití' zóabi' bi'i quégacabi'. ³² Ga búdxitë, gútinu ca' nigula na'. ³³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

³⁴ Ní'irö bubie' didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bi' zxi'inigaquië' para ulu'tsaga ná'agacabi'. ³⁵ Na'a, nupa nácagaca lesaca' ulu'bán lu yöl-la' guti, en tsöjcuá' yödzülió sí' gata', bití' ilún yöl-la' rizóalen nigula, en bití' ulu'tsaga ná'agaca. ³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxi'ini cazë' Dios. ³⁷ Ca na' ral-la' ulu'bán nupa chinátigaca, rulu'ínë' rë'u Moisés caz ga na' nazúaj lu guichi ca naca que yaga yötsi' régui, ga ní' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bie' didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítí'rö bulu'rúguinë' ila'nábinë' Lë' didza'.

¿Nuzxi zxi'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' zxi'inë' David”? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna: Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu zxi'bigaca lo' nupa ta'dá'baga' Li'.”

⁴⁴ David caz na' gunnë' queë' náquië' Xanë'. ¿Nacxi caz naca, rnnali' libí'ili' náquië' zxi'inë'?

Jesús ruzéqui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ní' yúgu'të bönachi nacua' ní' tu'zë nágagaca Jesús, rë' yugu' bönni' usëda queë':

⁴⁶ —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë' nácugaquië' lari' tunna, en té'ënnë' ulu'lidza bönachi légaquië' zxon gapa naca lu yë'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sedë' queë' Dios, en gapa ta'bö'ë tahuë'. ⁴⁷ Ta'güë' lídxigacanu

nigula uzëbido', ate' para ulu'lu'i tsahui' cuíngaquië', xidzé tu'lidzë' Dios. Yugu' bönni' ni, yénni'tërö gunë' Dios ga ila'gu'i ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu guí'ina que dumí gun que yudo'.

² Bilé'enë' ca' tu nigula yechi' uzëbido', rigú'unu chopá dumí lásido', le nazáca'gaca láti'do'os. ³ Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí. ⁴ Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigú'xjö'ë Jesús ca ulu'sunítië' yudo'

(Mt. 24:1-2; Mr. 13:1-2)

⁵ Nacuá' ni' nupa tuí'i didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' náca'gaca lachi, ate' Jesús rë' légaquië', rnnë':

⁶ —Yúgu'të' lë ni rilé'eli', huadxín dza cate' bití'rö ugá'ana guiöj lahui luzé'e ni, tu' ulu'suniti bönachi yudo' ni.

Le ilaca bë' cate' si' idxín dza údxi

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸ Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' náca'gaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'. ⁹ Cate' yónili' raca gudil-la, en ta'dá'baga' bönachi yúlahui', bití' gadxi idzöbili', tu' run bayudxi ilaca le caní, pero bití' zuítëni dza údxi.

¹⁰ Ní'irö rë' ca' légaquië':

—Til-la tu yödzo len ia'tú yödzo, ate' bönachi tu ga nu rinná bë' ila'díl-lalen bönachi ia'tú ga nu rinná bë'. ¹¹ Tödígaca budó' xzu', ate' zían lataj gaca gubín, en ilatsaj yödzöhuë' zxön. Ila'lá' lahui lúzxiba le ilún gadxi bönachi, en le ilaca bë'.

¹² 'Zí'atëlö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubë' tu'sédë' queë' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. ¹³ Gaca caní queëli' para séqui'li' gunli' ba nali' quia' neda'. ¹⁴ Tsutsu guli'gún ládxi'li', para cabí cuéqui ícjali' zí'alö nacxi innali' uláz queëli', ¹⁵ tu' gunna' queëli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ni' bití' ila'lé'enë' libí'ili' dxi'a. ¹⁶ Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' dí'a dza que quézili', en yugu' böchi' luzé'e quézili', ate' ilútië' bál-lali'. ¹⁷ Yúgu'të bönachi ulu'zóa libí'ili' tsölá'alö tu' dá'ali' neda', ¹⁸ pero bití' initi nitú guitsa' ícjali'. ¹⁹ Channö ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' rójáquië' gudil-la nagú'ugaquië' lë'a Jerusalén, inözili' chibidxín dza initi yödzo ni. ²¹ Ní'irö nupa nacua' luyú Judea ral-la' ila'zxunnaj ni, en tsójaca gapa naca gu'ado', ate' nupa nacua' lu yödzo ni

ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. ²² Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. ²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'guí'i ila'záca'da' bönachi nacuá' ni', ate' Dios gúndë'ë bönachi ni' xíguia'. ²⁴ Ilátië' zianë' lu gudil-la na', ate' ila'ché'ë ia'bal-lë' nadzúngaquië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzölió, en ila'zxizi le nalá'gaca lúzxiba. ²⁷ Ni'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. ²⁸ Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huó'ua' libí'ili'.

²⁹ Jesús gudxë' ca' légaquië' tu le bucúdzü'ë didza', rnnë':

—Buli'yútsöca' ca' raca que yaga higo, en que bítí'tës yaga yúbölö. ³⁰ Cate' rilé'eli' ta'lén ni'a në'e hué'énido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

³² 'Le nácatë rea' libí'ili', biti' ilátigaca bönachi ila'cuá' dza ni' cate' ilaca yúgu'të lë ni. ³³ Ila'dödi que lúzxiba, en que luyú ni, pero xtídza'a, biti' tödi cá'asö, tu' idxín caz ca rna.

³⁴ 'Guli'gún chi'i cuinli' para cabí gü'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxí', ³⁵ en para cabí gaca queéli' ca tu le rizön bönachi, ca naca le gaca quégaca yúgu'të bönachi nacuá' idútë yödzölió. ³⁶ Que lë ni na', guli'sóa ban ladxí', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljë' Bönachi.

³⁷ Lahui' dza rizöë' Jesús chila yudo', rusédinë' bönachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo. ³⁸ Yugu' zila bila'dxín yúgu'të bönachi ga zoë' Jesús chila yudo' para ulu'zë nágagaca xtídzë'ë.

22

Tun xtídza'gaquië' ilútië' Jesús
(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero biti' gula'zéquínë' tu' tádxinë' bi ilún bönachi.

³ Ni'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo. ⁴ Guyijë' Judas na', yöj'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. ⁵ Bulu'dzëjanë' bönni' yudo' na', en gula'zí' lu ná'agaquië' ulu'nödzjë' queë' dumí. ⁶ Raza ládxi'ë' Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸ Jesús gusöl-lë'ë Pedro, en Juan, rnnë': —Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi ré'ënu' tsöjpá'atu' queëru'?

¹⁰ Jesús ré' légaquië', rnnë':

—Buli'yútsöca', cate' tsú'uli' lu yödzö ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'. ¹¹ Guli'guíë' xan yu'u na': “Bönni' Usedi ré' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?” ¹² Ní'irö ulu'ínë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

¹³ Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön. ¹⁵ Ní'irö Jesús ré' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. ¹⁶ Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

¹⁷ Gudélé'ë Jesús tu zxíga'do', en gudxë' Dios: “Xclenu'.” Ní'irö ré' légaquië':

—Guli'sí lë ni, en guli'guí'aj lati' huéaj, ¹⁸ tu' rea' libí'ili': Bítirö guí'ja' xisi uva cate' idxinrö le rinná bë'ë Dios.

¹⁹ Ní'irö gudélé'ë yöta xtila, en gudxë' Dios: “Xclenu'.” Gudödi ni' buzuzxjë' le, en bë'ë que queégaquië', rnnë':

—Lë ni naca idútë le naca' le rudöda' uláz queéli'. Guli'gún caní para usá' ládxi'li' neda'.

²⁰ Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'í' ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queéli'.

²¹ 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön. ²² Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'í xtidza'gaquië' núzxilögaquië' gáquië' lo

²⁴ Ní'irö gulu'ë didza' la' légacasë' núzxilögaquië' idéli'në' lataj lo. ²⁵ Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen. ²⁶ Libí'ili' bití' ral-la' gunli' caní, pero nu naca lo ládjali' ral-la' gaca ca nu naca cuídi'tërö, ate' nu rinná bë' ral-la' gaca ca nu run dxin quéguequi luzé'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bë' neda'. ²⁹ Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'. ³⁰ Caní guna' para gaca cö'öli', en guí'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' xzí'ini xi'sóë' Israel.

Rnnë' Jesús innë' Pedro bití' núnbë'ë Lë'
(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila, ³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóacu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calégasö tseja' lidxi guíë, pero lësca' gátivena' Li'.

³⁴ Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa ilútië' Lë'

³⁵ Jesús gunábinë' légaquië', rnnë':

—Cati' gusöl-la'a libí'ili' cabí nu'ali' yöxaj yöta, en calëga buzudi dumí, en calëga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Bití' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guíë tuchi' ral-la' guti' lari' rixóa yeni, en si' tu guíë tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rna: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopá guíë tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sójácalenë' Lë'. ⁴⁰ Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guiöj rirú'uniru', ate' ni' buzóa zxibë', en rulidzë' Dios. ⁴² Rnnë':

—Xúz, channö rë'ënu', bucuása ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxië' Jesús. ⁴⁴ Lu yöl-la' risëbi ládxi' queë', idú ládxië' Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'hu'inigaquië'. ⁴⁶ Ní'irö Jesús rë' légaquië':

—¿Rásitsali'? ¡Guli'chasa, en buli'lídzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë'

lógaquië' bönni' zián na'. Gubígui'ë ga zoë' Jesús para utsaga lahuë' Lë'. ⁴⁸ Ní'irö Jesús rë' lë':

—Judas, ¿naru' rudödito' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacua'lenë' Jesús bila'lé'enë' ca na' raca queë' Lë', të' Lë':

—Xan, ¿naru' güi'itu' légaquië' guie' tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. ⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. ⁵² Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nuá'ali' guie' tuchi', en yaga para sönli' neda' ca runli' rizönli'në' gubán? ⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queë'li', le naca dza dë lu në'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yöjnahuë' Jesús zi'tu' zítu'sö. ⁵⁵ Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro guró'lenë' légaquië' tsözxön. ⁵⁶ Cate' tubi' bi'i nigula huen dxin bilé'ebi'-në' Pedro, ni' ró'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'tué' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'lati'sö gudzé, gunné' ia'tué' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra. ⁶¹ Ní'irö buécjë' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'alö cödxiba' böra na'a, li' chigudá'bagu'u tsonna luzuí, innó' biti' núnbë'u neda'."

⁶² Burúajë' Pedro ní'ilö, ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazöngaqië' Jesús bulu'titjë' Lë', ate' gula'guinë' Lë'. ⁶⁴ Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¿Gunnëya'atsöca'! ¿Nuzxi na' gudapa' Li'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' reni' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, bití' tséajlë'ëli' neda', ⁶⁸ en channö inábida' libí'ili' tu didza', bití' ubí'ili' didza', en bití' usanli' neda'. ⁶⁹ Na'a isí lo, neda', Bönni' Guljé' Bönachi, cö'a cuita lë'ë ibëla Dios, nápatëre' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nalí queë'? La' ré'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuiné' yúgu'të bönni' zían ni', ate' gula'ché'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlalui', en ruzáguë'ë xinözigaca nupa ta'guíxaj laz ruquíxjé' César, en rnnë' lë cazë náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacua' ni', rnnë':

—Bití' bi rudzö'lida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. ⁸ Cate' Herodes na' bilé'enë' Jesús, budzéjanë', tu' chiguca xidzé ré'enë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. ⁹ Ní'irö Herodes gunábinë' Jesús le zían, pero Jesús bití' bi didza' bubí'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. ¹¹ Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjé' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguie' dxi'a Pilato, en Herodes, tu' zí'alö gula'lé luzë'ë tuë' ia'tué'.

Ta'chúguië' queë' Jesús gatië'

(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, ¹⁴ ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, bití' bi budzö'lida' le naca xíguia' nabáguë'ë, yugu' lë na' ruzéguili'-në' didza'. ¹⁵ Cate' gusöl-la'a

libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'. ¹⁶ Na'a usaca' zi'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

¹⁹ Nadzunë' Barrabás na' lidxi guíë tu' gudíl-lalenë' yúlahui' lu yödzö na', en tu' bëtië' bönachi. ²⁰ Bulidzë' Pilato légaquië' leyúbölö, tu' ré'enë' usanë' Jesús.

²¹ Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

²² Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dö' benë' bönni' ni? Biti' bi budzövida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

²³ Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. ²⁴ Ní'irö Pilato guchúguië' queë' Jesús, para gaca queë' ca na' ta'nabë'.

²⁵ Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzu'lë' Jesús.

²⁷ Bönachi zián, enca' yugu' nigula söjñógaca Jesús, ta'bödxi'nu nigula na', en ta'bödxi yéchi'nu queë' Lë'. ²⁸ Ní'irö buécjë' Jesús, en ruyüë' légacanu, ate' ré' légacanu:

—Libí'ili' nigula Jerusalén. Biti' cödxili' quia' neda', pero guli'cödxí que quézili', en quégacabi' zxi'inili' ²⁹ tu' huadxín dza ila'nná: “Bica' bágaca yugu' nigula huödx, en nigula biti' guluá'anu-bi' bí'ido', en biti' bulu'gádxí'nu-bi' bí'ido'.” ³⁰ Ní'irö ila'sí lógaca ila'nná bönachi, ilë' yugu' guí'a sibi: “Guli'dubága' netu'”, en ilë' ca' yugu' guí'ado': “Guli'cachi' netu'.” ³¹ Channö caní tunë' quia' neda', naca' ca tu yaga ya'a, ¿naru' cabí ilúntërë' ca' queëli', nácali' ca yaga bidxi?

³² Gula'chë'ë ca' chopë' bönni' tuá' dö', para ilútië' légaquië' tsözxön len Jesús.

³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'tué' bulu'dë'ë cuita lë'ë yögöla. ³⁴ Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queégaquië' le nácuë' Jesús, en bulu'quitjë' le gaca bë' lahui. ³⁵ Bönachi nacua' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, ³⁷ ta'nnë':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lè'e yaga cruz icjlè' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'ené' Bönachi Judío." ³⁹ Tuë' bönni' huiá' dö' na' dè'è lè'e yaga cruz bulidza zi'è Jesús, rnnè':

—Channö nacu' Li' Cristo, busölá cuinu', enca' netu'.

⁴⁰ Bubi'è didza' ia'tué' bönni' huiá' dö' na', en gudil-lè' luzé'è na', rnnè':

—¿Naru' cabí rádxinu'-nè' Dios? Lësca' li' narugu quiu' gátiau'. ⁴¹ Le nácatè rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, bití' bi dö' nu'è.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

⁴³ Jesús rë' lè':

—Le nácatè rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la idútè yödzölió ga bidxinrö idú ridödi xihuö. ⁴⁵ Guchul-la gubidza, ate' lari' nal-la' lu yudo' biröza' chopa dí'ilo. ⁴⁶ Ní'irö bë'è zidzaj didza' Jesús, rnnè':

—Xuz, rigu'a lu no'o bö' naca caza'.

Cate' budxi gunné' caní, birúajtè bö' naca cazë', gútië'.

⁴⁷ Cate' bönni' rinná bé'ené' bönni' röjáquië' gudil-la bilé'ené' ca na' guca, gulu'è Dios yöl-la' ba, rnnè':

—Le nácatè bönni' ni gúquië' bönni' tsahui'.

⁴⁸ Cate' yúgu'tè bönni' nacu'è ni' tu'yúë' bila'lé'ené' lè na' guca, yøjhuöjgaquië' yödzö, ta'gapa' luchú'ugaquië' tu' tu'báinë'. ⁴⁹ Zí'tu'sö bulu'gá'ana yúgu'tè nupa ni' núnbë'gaca Jesús, en yugu' nigula na' yójacalennu Lè' cate' ni' gudë' luyú Galilea, ate' tu'yúë' lè ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzö Arimatea que luyú Judea, lè' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Bití' benë' tuz nupa na' gula'chugu queë' Jesús gátie', tu' ribözë' ca' José ni le rinná bë'è Dios. ⁵² Ní'irö guyijë' José na' lahuë' Pilato, en gunabë' lataj u'è Jesús. ⁵³ Cate' chinuzötjë' Lè', buchölinë' Lè' lari', ate' gulu'è Jesús yeru ba, le nadaj lè'e guí'a guiöj, ate' lu ba na', cuntunu nagü'iguequinë'. ⁵⁴ Dza na' naca dza tu'pë'è que dza lá'ayi quégaquië' bönni' judío, tu' si' idxín dza na'.

⁵⁵ Yójacanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'è Lè' ni'. ⁵⁶ Cate' yøjhuöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lè na' chin-upá'agacanu, ate' dzágagacanu lé'gacanu ia'bál-lanu nigula. ² Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'. ³ Cate' gula'yázanu yeru ba na', bití' bulu'dzölinu zoa Xanru' Jesús ni'. ⁴ Cate' ni' ta'bö'önu böniga ni'a que lè ni, chopë' bönni' nácugaquië' lari' rëpi yösa bení'

la' bila'dxintë' ni', en gula'zuinë' ga na' nacuá'anu. ⁵ Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' tē' lé'gacanu, ta'nnë':

—¿Bizx que ruguílajli' nu zoa nabán xilataj nu nati? ⁶ Biti' zoë' ni, tu' chibubanë'. Guli'tsöjné' lë na' chigudxi cazë' libí'ili' cate' ni' zoë' luyú Galilea. ⁷ Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjné'gacanu didza' na' bë'ë Jesús, ⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca. ¹⁰ Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu lé'gacanu. ¹¹ Guléquinë' bönni' gubáz na' tu'ínu didza' chixi, en bití' gula'yéajlë'ë lé'gacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lá'risö nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxintë Emaús
(Mr. 16:12-13)

¹³ La' dza ná'asö söjajúë' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë didza' ca naca yúgu'të lë na' guca. ¹⁵ Tsanni ni' yú'ugaquië' nöza, tu'ë didza' la' lé'gacasë', gubígui'ë gala' Lë cazë' Jesús, ate' gudálenë' lé'gaquië' tsözxön. ¹⁶ Biti' bulu'únbë'ë Lë' tu' naca ca tu le nabaga' guiöj lógaquië'. ¹⁷ Ní'irö Jesús gunábinë' lé'gaquië', rnnë':

—¿Bizxi didza' na' ruí'ili' la' libí'isili' yú'uli' nöza? ¿Bizx que na' ruhuí'inili'?

¹⁸ Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzö Jerusalén, en tuzu' li' bití' nözinu' lë na' guca né'aje nasi ni'?

¹⁹ Ní'irö Jesús rë' lé'gaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi. ²⁰ Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dë'ë Lë' lë'e yaga cruz. ²¹ Netu' bentu' löza gúquië' Lë' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lë ni. ²² Ia'stú, bál-lanu nigula nútsa'gacanu netu' gulunnu ga guró'ötu' böniga. Yöjácanu ra' yeru ba queë' cate' si' gulén gubidza na'a dza, ²³ en cate' bití' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë lé'gacanu zoë' nabanë' Jesús. ²⁴ Ní'irö bal-lë' bönni' luzá'atu' yöjajúë' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

²⁵ Ní'irö Jesús gudxë' lé'gaquië':

—Libí'ili', bönni' bití' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios. ²⁶ ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtë'rë'?

²⁷ Ní'irö gusílahuë' Jesús riguíxjöi'inë' lé'gaquië' yúgu'të le ruí'idi didza' ca naca queë' le nazúajgaca lu guichi lá'ayi, ca na' gusílo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

28 Cate' bila'dxinë' yödzödo' ga na' söjáquië', benë' Jesús ca tu bönni' zéajtërë' zi'tu'. 29 Gulunë' bayudxi ugá' analenë' légaquië', ta'nnë':

—Bugá' analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá' analenë' légaquië'. 30 Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: "Xclenu'." Ní'irö buzzuxzjë' le, en bë'ë quégaquië'. 31 La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'. 32 Ní'irö gulë' luzë'ë tuë' ia'tué':

—¿Naru' cabí böála'tica' ládxi'do'oru' tsanni ni' ru'ílenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

33 La' ní'isö gula'zuinë' yöjhuöjgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'. 34 Ní'irö yugu' bönni' na' nacu'ë ni' gulë' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

35 Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzzuxzjë' yöta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

36 Tsanni ni' tu'ë didza' ca nácgaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Guli'sóa dxi ládxi'li'.

37 Ní'irö guladxi gula'dzöbinë' tu' téquinë' bixín ta'lé'enë'. 38 Jesús rë' légaquië':

—¿Bizx que rö'öli' böniga? ¿Bizx que rizá' ládxi'li' yugu' lë ni? 39 Buli'yútsöca' na'a, en ní'a. Neda' caz ni. Guli'cán neda', en buli'yú neda', tu' cabí da' bixín bëla', en bití' yu'u dxita ca ni rilé'eli' naca quia' neda'.

40 Ní' ru'ísë' ca' didza' ni, buluí'inë' légaquië' në'ë, en ni'ë. 41 Tu' tu'dzéaguequinë' bití' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

42 Ní'irö bulu'nödzejë' queë' láti'do'oba' böla chinégui'ba', en tu quízxi'ba' buz. 43 Guzxi'ë Jesús le, en gudahuë' lógaquië'. 44 Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

45 Ní'irö buzéajni'inë' légaquië' lë na' nazúajgaca lu guichi lá'ayi. 46 Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, 47 ate' idütë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' 48 ate' libí'i cázali' na' bilé'eli' yugu' lë ni ral-la' gunli' ba nalí que. 49 Buli'yútsöca', isöl-la'a queëli' le guzxi' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

50 Ní'irö Jesús guchë'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'. 51 Tsanni ni' rulidza tsáhu'i'së' ca' légaquië', buzá'atë' ga na' nacu'ë, buëpë' yehua' yubá. 52 Gudödi gula'yéaj ládxi'gaquië' Lë', lu yöl-la' rudzeja quégaquië'

yöjhuõjgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la'
ba, en tun zxönë' Lë'. ¡Ca' naca!

DIDZA' DXI'A BUZÚAJË' JUAN

Bönni' na' nazí'i lë' Didza' gúlajë' bönachi

¹ Cate' gusí lo, zí'atëlö cate' si' gata' yödzölió, ni' zoa cazë' Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. ² Bönni' na' náquië' Didza' zóalenë' Dios cate' ni' gusí lo si' rata' yödzölió. ³ Lu në'ë Bönni' ni, Dios benë' yúgu'të le dë, en biti' bi dë le nunë' Dios le cabí benë' lu në'ë Bönni' na'. ⁴ Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. ⁵ Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

⁶ Dios gusól-lë'ë ni tu bönni' lë' Juan. ⁷ Bidë' bönni' ni para gáquië' nu gun ba nalí. Bidë' para gunë' ba nalí queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nalí. ⁸ Biti' náquië' Juan bení' na', pero bidë' para gunë' ba nalí queë' Bönni' na' náquië' bení'. ⁹ Bönni' na' náquië' bení' le naca idú ni' razië' yödzölió ni, ate' ruzení'ë lu icja ládxi'do'gaca yúgu'të bönachi.

¹⁰ Bönni' na' náquië' bení' bidxinë' yödzölió ni, ate' lu në'ë Lë' Dios benë' yödzölió ni, pero bönachi yödzölió biti' bulu'únbë'ë Lë'. ¹¹ Bidxinë' ga nequi queë', pero biti' ca' gula'zí' lu ná'agaquië' Lë' bönni' nabábalenë'. ¹² Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' zxí'inë' Dios. ¹³ Bönni' ni nácagaquië' zxí'inë' Dios, calëga tu' nácagaquië' zxí'inë' nu bönni', en calëga tu' nálajgaquië' ni'a que le rizé ládxi'ë nu bönni', o ni'a que tu le ré'ënë' nu bönni', pero nácagaquië' caní tu' naca le ré'ëni quëzinë' Dios.

¹⁴ Bönni' na' náquië' Didza' guljë' bönachi, en tu chí'isö guzóalenë' rë'u, idú dzágagaca Lë' le ruzá' ládxi'ë Dios queëru', en le naca idútë li. Bilé'etu' yöl-la' zxön queë', ate' yöl-la' zxön queë' na' naca le ruí'i queëbi' bi'i la's dui que, Nu na' naca Xúzibi'. ¹⁵ Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö'a que, gunní'a': Bönni' si' zá'tëlë' ca neda' nayépisëtërë' ca neda', tu' zoa cazë' Lë' zí'alö ca neda'.

¹⁶ Le naca idú queë' buzí'iru' xibé yúgu'tëru', lë na' buzá' ládxi'ë queëru' Dios, en ziánrö ca' le ruzá' ládxi'ë queëru'. ¹⁷ Bidxín queëru' xibá queë' Dios lu në'ë Moisés, pero le ruzá' ládxi'ë queëru' Dios, en le naca idútë li bila'dxín queëru' lu në'ë Jesucristo. ¹⁸ Catu caz nu bilé'e Dios, pero Lë', la's dui Zxí'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'ëru'-në' Dios.

Le benë' ba nalí Juan, bönni' buquilë' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

¹⁹ Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'sól-lë'ë yugu' bixúz, en bönni' nabábagaquië' Leví, nupa ni nácagaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guzxí' lu në'ë Dios isól-lë'ë queëru'.

²¹ Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të'?

Gunnë' Juan:

—Biti' naca'.

Ní'irö tē' lē':

—¿Naru' nacu' li' bönni' na' ral-la' guídē' gu'ē didza' uláz queē' Dios?

Bubi'ē didza' Juan, rnnē':

—Calēga neda'.

²² Ní'irö tē' lē':

—¿Nuzxi caz nacu'? Gudíxjöi'i netu' para gaca usiyöntu' nupa gula'söl-la' netu'. ¿Bizxi rno' li' nuzxi nacu'?

²³ Bubi'ē didza' Juan, rē' légaquiē':

—Neda' naca' bönni' na', nazúaj lu guichi lá'ayi ca naca queē', rna: Riyön chi'i nu rulidza lu lataj cá'asö, rna: Buli'béaj li nöza para idxín Xanru' queéli'. Cani gunné' Isaías, bönni' na' bē'ē didza' uláz queē' Dios.

²⁴ Yugu' bönni' ni nácagaquiē' bönni' yudo' fariseo nasöl-la'gaquiē' bönni' judío unná bē'. ²⁵ Gula'nábinē' Juan, tē' lē':

—¿Bizx que ruquilu' bönachi nisa channö cabí nacu' li' Cristo, en bití' nacu' Elías, en calēga bönni' na' ral-la' guídē' gu'ē didza' uláz queē' Dios?

²⁶ Bubi'ē didza' Juan na', rē' légaquiē':

—Neda' ruquila' bönachi nisa lu nisa, pero gatsaj láhui'lö ga zóali' zoē' tu bönni' bití' núnbē'ēli'-nē'. ²⁷ Bönni' ni náquiē' Bönni' na' si' zá'telē' ca neda', en nayēpisētērē' ca neda', ate' bití' naca' neda' lesaca' ulecja' xiráchuē' nudē'ē.

²⁸ Yúgu'tē lē' ni guca lu xiyú yödzö Betábara, ga naca ia'tsölá'a yegu Jordán, zaca' ga rilén gubidza, ga ní' buquilé' Juan bönachi nisa.

Jesús náquiē' ca bö'cu' zxíla'do' tutiē'-ba' lahuē' Dios tu' nözi dul-la'

²⁹ Dza buropi ní' Juan bilé'enē' Jesús, zē'ē ga zoē', ate' rnnē':

—Buli'yútsöca'. Bönni' ni náquiē' bö'cu' zxíla'do' queē' Dios, gatiē' para ugüē' dul-la' nabága' gaca bönachi yödzölió. ³⁰ Lē' náquiē' bönni' na' gunniá' queē': "Si' zá'telē' ca neda' tu bönni', nayēpisētērē' ca neda', tu' zoa cazē' zí'alö ca neda'."

³¹ Neda' bití' bēnbē'a-nē' zí'alö, pero bida', ruquila' bönachi nisa para ilúnbē'e bönachi Israel Lē'.

³² Benē' ba nalí Juan ca naca queē' Jesús, rnnē':

—Bilé'eda'-nē' Dios Bö' Lá'ayi, bötjē' birúajē' yehua' yubá, gunē'ē ca riná'aba' gu'dödo', ate' bidxinē' ga zoē' Jesús, en bugá'analē' Lē'. ³³ Bití' bēnbē'eda' Lē' zí'alö. Gudxi neda' Nu na' gusöl-la' neda' para uquila' bönachi nisa, gunné': "Cate' ilé'enu'-nē' huötjē' Dios Bö' Lá'ayi, tsöjsóalenē' Bönni' na', en ugá'analē' Lē', Bönni' ni gunē' le rulu'isö yöl-la' ridila nisa ni, uchíziē' bönachi Dios Bö' Lá'ayi." ³⁴ Na'a, chibilé'eda' lē' na', en runa' ba nalí queē' Bönni' ni, náquiē' Zxí'inē' Dios.

Yugu' bönni' usēda zí'alö queē' Jesús

³⁵ Ia'tú dza ca', leyúbölö zoē' Juan ní', ate' nacuá'lenē' lē' chopē' bönni' dá'gaquiē' lē'. ³⁶ Cate' Juan na' bilé'enē' Jesús, ridödē' ní', ní'irö gudxē' bönni' na' dá'gaquiē' lē', rnnē':

—Buli'yútsöca'. Ní' zoē' bönni' na' náquiē' bö'cu' zxíla'do' queē' Dios, gatiē' uláz quegaca bönachi dul-la'.

³⁷ Chopē' bönni' na' dá'gaquiē' Juan bila'yönnē' didza' ni bē'ē lē', ate' yöjnégaquiē' Jesús. ³⁸ Ní'irö buécjē' Jesús, en buyúē' chopē' ni söjnégaquiē' Lē', ate' rē' légaquiē':

—¿Bizxi riguíljali'?

Tē' Lē':

—Bönni' Usedi, ¿gazxi zu'?

³⁹ Bubi'ē didza' Jesús, rē' légaquiē':

—Guli'dá, uyuli'.

Ní'irö yójacalenë' Lë', en bila'lé'enë' ga na' zoë', ate' bulu'gá'analene' Lë' dza na', tu' chizá' ral-la.

⁴⁰ Andrés, böchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. ⁴¹ Andrés na', zí'alö yöjdiljë' bönni' böchë'ë, lë' Simón, ate' rë' lë':

—Chibidzölitu'-në' Mesías.

Mesías naca tu didza' hebreo le rna lu didza' griego: Cristo, ate' lu didza' xidza': Bönni' nasól-lë'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rna: Pedro, lu didza' xtila, ate' lu didza' xidza': Guiöj.

Jesús rulidzë' Felipe, en Natanael

⁴³ Cate' za' reni' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzö Betsaida, le naca ládzagaquië' Andrés, en Pedro. ⁴⁵ Felipe budzölinë' Natanael, en rë' lë':

—Chibidzölitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzö Nazaret.

⁴⁶ Natanael rë' lë':

—¿Naru' hualá'tsö Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zcan yaga higo, bilé'eda' li'.

⁴⁹ Ní'irö bubi'ë didza' Natanael, rë' Lë':

—Bönni' Usedi, Li' nacu' Zxí'inë' Dios. Li' nacu' Nu inná be'e bönachi Israel.

⁵⁰ Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zcan yaga higo? Yugu' le zxöntërö ca lë' ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzö Caná

¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xinë'ë Jesús ni'. ² Lësca' zoa nu bulidza Jesús, en yugu' bönni' usëda queë' dijáquië' laní na'. ³ Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:

—Bití'rö dë xisi uva ilé'ajë'.

⁴ Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Bití' ca' ridxini dza ulu'a lahui yöl-la' huáca quia'.

⁵ Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:
—Guli'gún yúgu'të le guië' libí'ili'.

⁶ Nacuá' ni' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'lié' yugu' yusu' na' nisa. ⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyúë' bönni' na' zoë' ra' yusu' channö nazxí'i nisa na' nuhuóaca xisi uva, pero biti' réquibe'enë' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzejë' le cabí nazxí'i. Li', ga bidxintë na'a ben chi'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquië' xinë'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén.

¹⁴ Lu yödzö na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Rö'ögaquië' ca' ni' bönni' tu'tsë'ë dumí za' idútë yödzölió. ¹⁵ Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. ¹⁶ Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yë'ëyi.

¹⁷ Ní'irö yöjnéguequinë' bönni' usëda queë' Jesús le nazúaj lu guichi lá'ayi, rna: Tu' rui'ida ládxa'a lidxu', régui rilá ládxi'da'ahua'.

¹⁸ Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

¹⁹ Bubi'ë didza' Jesús, rë' légaquië':

—Guli'quínaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

²¹ Yudo' na' bë'ë didza' que Jesús naca la' cuin cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. ²⁴ Biti' buzzöni ládxi'ë Jesús légaquië', tu' nunbë' cazë' yúgu'të bönachi. ²⁵ Biti' naquínnë' Jesús nu quíxjöi'í Lë' ca nácgaca bönachi, tu' nöz quézinë' Lë' le yu'u icja ládxi'do' gaca bönachi.

3

Jesús, en Nicodemo

¹ Nicodemo, tu bönni' yudo' fariseo, nabábalenë' yugu' bönni' judío unná bē'.

² Bidë' bönni' ni ga zoë' Jesús chi'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácagaca bē' ca nácagaca le caní runu' Li' channö cabí zóalenë' Dios lë'.

³ Bubi'ë didza' Jesús, rë' lë':

—Le nácatë rea' li', nu cabí galaj leyúbölö, biti' ca' ilé'e lataj ga ni' rinná bē'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xinë'ë, ate' galjë' ia'tú?

⁵ Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, biti' gaca tsázië' ga rinná bē'ë Dios. ⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'. ⁷ Biti' ubáninu' tu' rea' li', run bayudxi galju' leyúbölö. ⁸ Gátitës recja bö', ate' riyönnu' rnnë' bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë' ni'?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en biti' nözinu' yugu' lë' ni'? ¹¹ Le nácatë rea' li', le nöztu' ruí'itu' didza' que, en le bilé'etu' runtu' ba nalí que, pero biti' rizí' lu ná'alí lë' na' runtu' ba nalí. ¹² Channö cabí réajlë'ëli' neda' cate' ruí'ilena' libí'ili' didza' ca naca le raca yödzölió ni, ¿nacxi caz gaca tséajlë'ëli' channö guía' libí'ili' le raca yehua' yubá?

¹³ 'Catu' caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá. ¹⁴ Ca na' benë' Moisés lu lataj cá'asö, buchisë'-ba' bëla néquiniba' guië, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'. ¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxí'ide'enë' bönachi yödzölió

¹⁶ Tu' bidxí'ide'enë' Dios bönachi yödzölió, buzá' ládxë'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi. ¹⁷ Dios gusöl-lë'ë Zxí'inë' yödzölió ni, calëga para ichúguië' quégaca bönachi yödzölió ni gátigaca, pero para ulu'lágaca bönachi yödzölió ni ni'a queë' Lë'.

¹⁸ Nu bönni' réajlë'ë Zxí'inë' Dios, biti' ca' narugu queë' inítië', pero bönni' na' biti' réajlë'ë Lë', chinarugu queë' gátie', tu' cabí réajlë'ë Zxí'inë' Dios la' buduínë'. ¹⁹ Que lë' ni na' chinarugu quégaca bönachi gátigaca, tu' bidxinë' Bönni' na' náquië' bení' yödzölió ni, pero gulunrö zxön bönachi ni le naca chulla que dul-la' ca gulunë' zxön Bönni' na' náquië' bení', tu' nácagaca xihui' le tunë'. ²⁰ Yúgu'të bönni' tu'ë dö' biti' raza ládxí'gaquië' bení', en biti' rídigaquië' lu bení', para cabí ilá' lahui le tunë'. ²¹ Nu run le naca idütë li ridxín lu bení' para gaca bē' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

²² Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilé' bönachi nisa. ²³ Lësca' ruquilé' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa. ²⁴ Raca caní zí'atëlö cate' bití idzunë' Juan na' lidxi guíë.

²⁵ Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxinë' ga zoë' Juan, en tē' lē':

—Bönni' usedi. Buyútsöca'. Bönni' na' guzóalenë' li' ia'tsölá'a yegu Jordán, bönni' na' benu' ba nalí queë', ruquilé' bönachi nisa, ate' ta'dxín yúgu'të bönachi ga zoë'.

²⁷ Ní'irö bubí'ë didza' Juan, rē' légaquië':

—Bití' bi dë lu nē'ë nu bönni', channö cabí nudödë' Dios le lu nē'ë. ²⁸ Biyön quézili' lë na' bena' ba nalí, gunnía': "Bití' naca' neda' Cristo", pero Dios nasöl-lë'ë neda' para guía' bönachi sí' zē'ë Lë'. ²⁹ Bönni' na' rizi'ë-bi' bí'i nigula rutsaga ná'abi' náquië' bönni' rutsaga nē'ë, pero böchi' luzë'ë bönni' rutsaga nē'ë, en dzáquië' lë', ruzë' náquië' didza' ru'ë, en rudzëjanë' tu' riyönnë' didza' ru'ë bönni' rutsaga nē'ë. Lësca' caní, rudzëjade'eda' neda' tu' raca lë ni caní. ³⁰ Run bayudxi gácarë' zxön Cristo, pero neda', run bayudxi gácara' cuídí'sö.

Nu za' zaca' yehua' yubálö

³¹ Gunnë' ca' Juan:

—Bönni' na' zē'ë zaca' xitsá'alö nayëpisëtërë' ca yúgu'të bönachi. Nu bönni' náquië' bönachi yödzölió ni, que yödzölió ni náquië', en ru'ë didza' que le raca yödzölió ni, pero Bönni' na' zē'ë zaca' yehua' yubálö nácatërë' lo ca yúgu'të bönachi. ³² Bönni' na' runë' ba nalí que le bilé'enë', en le biyönnë', pero cuntú nu rizi' lu nē'ë le runë' ba nalí. ³³ Núti'tës bönni' rizi' lu nē'ë lë na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios. ³⁴ Bönni' na' nasöl-lë'ë Dios, didza' queë' Dios ru'ë, tu' nuzóadërë' Dios Bö' Lá'ayi queë' lu Bönni' na'. ³⁵ Dios Xuz nadxí'inë' Zxí'inë', ate' yúgu'të le dë chinudödë' lu nē'ë Zxí'inë' na'. ³⁶ Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' bití' réajlë'ë Dios Zxí'ini, bití' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ru'ilenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilé' ca' nisa zíanrö bönachi ca ruquilé' nisa Juan. ² Calëga Jesús caz ruquilé' bönachi nisa, pero bönni' usëda queë' tu'quilé' bönachi nisa. ³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölö luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yödzödo' luyú Samaria, nazí'i le Sicar, gala' ga dë yu na' bunödzejë' Jacob queëbi' José, zxi'inë' Jacob na', dza ni'te. ⁶ Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxëqui'në' yu'ë nöza. Guca idú huagubidza. ⁷ Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸ Tuzë' zoë' Jesús tu' chisöjáquië' bönni' usëda queë' lu yödzö söjxí'gaquië' le ilahuë'. ⁹ Ní'irö nigula Samaria na' rënu Jesús, rnnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödzejë' Dios, en Nuzxi na' rë li': "Benna le gui'ja", li' inabu', ate' Lë' gunnë' quiu' nisa runna yöl-la' na'bán.

¹¹ Ní'irö nigula na' rënu Lë', rnnanu:

—Bönni', bití' nu'u le cuéaju' nisa, ate' yeru nisa ni, dxí'tërö rö'. ¿Gazxi dë nisa na' runna yöl-la' na'bán? ¹² ¿Naru' nácatërötso' Li' zxon ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulë'ajbi' ca' zxi'inë', en gulë'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa, ¹⁴ pero nu guí'aj nisa na' unödza' neda', bití'rö ubidxi icja ládxi'da'ahuë', tu' unödza' queë' nisa na' gaca lu icja ládxi'da'ahuë' ca tu ga ralaj nisa, le guí'i yöl-la' na'bán idú queë'.

¹⁵ Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rno': "Cuntu nu zoa bönni' quia'", ¹⁸ tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rno'.

¹⁹ Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' bití' idisóali' guí'ado' ni, en bití' tsöjsóali' Jerusalén. ²² Libí'ili' reaj ládxi'li' Nu bití' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusölá ni'a quégaquië' bönni' judío. ²³ Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní. ²⁴ Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ruí'ilenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'bábinë' tu' ruí'ilenë'-nu nigula didza', pero bití' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenü'-nu?" ²⁸ Ní'irö nigula na' bucá'ananu xichö'önu ni', ate' böajnu la' yödzö, söjödxi nu nupa nacuá' ni', rnnanu:

²⁹ —¿Guli'dá, ilé'eli'-në' tu bönni' gudxë' neda' yúgu'të le chinuna'! ¿Naru' cabí nácatsë' Lë' Cristo?

³⁰ Ní'irö bila'ruáj bönachi yödzö na', en bila'dxín ga zoë' Jesús.

³¹ Tsanni ni' söhuöajnu nigula na', bönni' usëda queë' Jesús gulunë' bayudxi, tē' Lē':

—Bönni' Usedi, gudagu.

³² Jesús rē' légaquië':

—Dē tu le rahua', le cabí réquibe'eli'.

³³ Ní'irö gula'nabi luzá'agaquië' bönni' usëda queë' tuë' ia'tué', ta'nnë':

—¿Zoa nu chidiguá'tsö le gudahuë'?

³⁴ Ní'irö Jesús rē' légaquië':

—Le nabánida' naca guna' ca ré'ënë' Xuza' nasöl-lë'ë neda', en údxi guna' xichinë'. ³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bönachi nácgaca ca gapa nadúzgaca, le chinabídxigaca para tsöjláparu'. ³⁶ Bönni' na' rulapë' rizi'ë lazjé', ate' lē na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxön nu raza, en nu rulapa. ³⁷ Naca idütē li lē na' rna caní: Tu nu raza, ate' ia'tú nu rulapa. ³⁸ Neda' gusöl-la'a libí'ili' tsöjlápali' ga bití' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquië'.

³⁹ Zián bönachi Samaria nacuá' yödzö Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'tē le chinuna'." ⁴⁰ Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá'analënë' légaquië'. Jesús bugá'anë' ni' ia'chopa dza. ⁴¹ Caní guca, zióntērē' ca' bönni' ni' gula'yéajlë'ë Jesús ni'a que didza' bë'ë. ⁴² Ní'irö bönni' ni' gulē'-nu nigula na', ta'nnë':

—Na'a réajlë'ëtu' Lē', calégasö ni'a que didza' bë'u li', pero lēasca' tu' biyönitu' netu' Lē', en nöztu' le nácatē bönni' ni náquië' Cristo, Nu rusölá bönachi yödzölió.

Ruúnë' Jesús xí'inë' tuë' bönni' dē lu nē'ë

⁴³ Ia'chopa dza ca', buzë'ë Jesús luyú Samaria, en sa'yéajë' luyú Galilea. ⁴⁴ Caní benë', tu' gudíxjö'ë Lē cazë' Jesús, gunné': "Bönachi uládz queë' nu bönni' ru'ë didza' uláz queë' Dios bití' tun lē' bal." ⁴⁵ Cate' bidxinë' Jesús luyú Galilea, gulunë' bönni' Galilea na' Lē' bal tu' yöjáquië' ca' Jerusalén cate' guca Laní Pascua, en bila'lé'enë' le benë' Jesús ni'.

⁴⁶ Ní'irö böajë' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dē lu nē'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dē lu nē'ë. ⁴⁷ Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yuë' lahuë' guídë' lidxë', para uduhuénë'-bi' bi'i bönni' queë' na', tu' chirequi gátibi'. ⁴⁸ Ní'irö Jesús rē' lē':

—Bití' ca' tséajlë'ëli' channö cabí ilé'eli' le nácgaca bë', en yugu' yöl-la' huáca guna'.

⁴⁹ Ní'irö bönni' na' dē lu nē'ë uláz queë' bönni' rinná bë'ë gudxë' Jesús, rnnë':
—Bönni', gudía'tē para cabí gátibi' bi'i quia'.

⁵⁰ Ní'irö Jesús rē' lē':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuöjë'. ⁵¹ Tsanni ni' yu'ë nöza söhuöjë', duzí'gala'gaquië' lē' bönni' huen dxin queë' ate' gula'guíxjöi'inë' lē', ta'nnë':

—Nabanbi' bi'i quiu'.

⁵² Gunábinë' légaquië' bátaxi gusí lo ruhuóaca ládxi'bi'. Tē' lē':

—Ba'ayi, idú huagubidza, burúaj xilá yú'ubi'.

⁵³ Ní'irö gúquibe'enë' xúzibi' bi'i na', böácabi' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë' ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

5

Ruúnë' Jesús tu bönni' nacú'unië' bin ga nazí'i le Betesda

¹ Gudödi guca lë' ni, guca laní' quégaquië' bönni' judío, ate' guyijë' Jesús Jerusalén. ² Lu yödzo na', gala' ga tu'ú'uba' bö'cu' zxila', dë' tu le zxön yudzu nisa, nazí'i le Betesda lu didza' hebreo, en nacuá' gayu' chila don que. ³ Yugu' lu chila na' dëgaquië' zían bönni' té'enë', bönni' nachul-la lógaquië', en bönni' bití' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. ⁴ Caní' raca, tu' ruhuötjë' tu gubáz lá'ayi queë' Dios tu chí'i huéaj, en röjtsu'ë lu nisa na', en rutë' nisa na'. Huóacatë' nu bönni' tsöjtsú'utië' lu nisa na' cate' rutá cuini ca naca bí'ti'tës yödzöhuë' raca queë'. ⁵ Zoë' tu bönni' ni', chiguca chizxunu' uruá' iz ré'enë'. ⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huóácu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böacatë' bönni' na', ate' bu'ë le gúti'në', en guzë'ë. Dza na' raca caní' naca dza lá'ayi quégaquië' bönni' judío. ¹⁰ Ní'irö bönni' judío unná' bë' gulë' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': "Buá' le denu', en guzë'e." Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní' li': "Buá' le denu', en guzë'e"?

¹³ Biti' nözinë' bönni' na' nuhuóáquië' nuzxi na', tu' chibuzë'ë Jesús lataj ni' tu' nacuá' bönachi zían ni'. ¹⁴ Gudödi guca lë' ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bí'ti'rö gunu' dul-la', para cabí' gaca quiu' tu le nácarö zí' ca lë' na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná' bë' Jesús na' bunë' lë'. ¹⁶ Que lë' ni na' bönni' judío unná' bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë' ni cate' naca dza lá'ayi quégaquië'.

¹⁷ Bubi'ë didza' Jesús, rë' légaquië':

—Xuzá' ná'atë runë' dxin, ate' neda' ca' runa' dxin.

¹⁸ Que lë' ni na' gulë'ë'nirönë' bönni' judío unná' bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní' naca nun cuinë' ca náquië' Dios.

Yöl-la' unná' bë' dë lu në'ë Zxí'inë' Dios

¹⁹ Ní'irö bubi'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë' na' rilé'eda' runë' Dios Xuz. Yúgu'të le runë' Dios Xuz, lësca' caní' runa' neda', Zxí'inë'. ²⁰ Dios Xuz nadxí'inë' neda', Zxí'inë', en ruluí'inë' neda'

yúgu'tè le runë', ate' yugu' le zxöntëro ca lë ni uluí'inë' neda', le ilún ga ubánili' libí'ili'. ²¹ Ca na' runë' Dios Xuz, rusubanë' nupa nátigaca, en rugú'è légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca rë'ëni quézida'. ²² Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'tè yöl-la' unná bë' para uchi'a usöröa' bönachi. ²³ Caní naca para ilún bal yúgu'tè bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasöl-lë'ë neda', Zxí'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidë yöl-la' na'bán idú queë'. ²⁵ Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtídza'a, en ilún ca rna, huóata' yöl-la' na'bán quéguequi. ²⁶ Ca na' dë lu në'ë Dios Xuz unödzejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödza' yöl-la' na'bán quégaca bönachi. ²⁷ Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. ²⁸ Bití' ubánili' ca naca lë ni, tu' huadxín dza cate' yúgu'tè nupa chinátigaca ila'yöni chí'a, ²⁹ en ulu' rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰ Gunnë' ca' Jesús:

—Bití' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca rë'ënisida' neda', pero ca rë'ëni quézinë' Xuza' nasöl-lë'ë neda', runa'. ³¹ Channö neda' runa' ba nalí que la' cuin caza', bití' naca lesaca' lë na' runa' ba nalí. ³² Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. ³³ Libí'ili' gusöl-la'li' bönni' yöjnábiguequinë' Juan, ate' lë na' benë' ba nalí quia' naca idútë li. ³⁴ Neda' bití' naquinda' nu bönni' gunë' ba nalí quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ládxi'li' uzí'ili' xibé bení' queë'. ³⁶ Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácacaca bë' gusöl-lë'ë Dios Xuz neda'. ³⁷ Lësca' Dios Xuz nasöl-lë'ë neda' runë' ba nalí quia'. Catu caz biyönili' chí'ë, en catu caz bilé'eli' lahuë', ³⁸ en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusöl-lë'ë. ³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. ⁴⁰ Bití' rë'ënili' guídali' quia' neda' para gata' yöl-la' na'bán queëli'.

⁴¹ 'Bití' riguilja' yöl-la' ba le ila'gú'u bönachi neda'. ⁴² Neda' núnbë'a libí'ili', en nözda' bití' nadxí'ili'-në' Dios. ⁴³ Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. ⁴⁴ ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíjali' yöl-la' run zxön na' za' lu në'ë la's dui Dios? ⁴⁵ Bití' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te. ⁴⁶ La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

6

*Rugahuë' Jesús zíanrö ca chi-un gayuá' bönachi**(Mt. 14:13-21; Mr. 6:30-44; Lc. 9:10-17)*

¹ Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. ² Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. ³ Ní'irö gurenë' Jesús, guyijë' ga naca tu lu guí'ado', ga ni' gurö'ölenë' yugu' bönni' usëda queë'. ⁴ Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁵ Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöjöruru' yöta xtila le ilágugaca bönachi zían ni?

⁶ Caní gunnë' Jesús para si' bë'ë Felipe na', tu' chinözinë' Lë' naca gunë'. ⁷ Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', biti' guequi láti'do' huéaj le ilágugaca bönachi zían ni.

⁸ Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

⁹ —Ni zóabi' tubi' bi'i bönni', nuá'abi' gayu' yöta xtila néquiguequini zxoá' cebada, en chópaba' böla cuídido'. ¿Naru' huéqui'tse ugagu le do' ni cate' xö bönachi?

¹⁰ Ní'irö Jesús rë' légaquië':

—Guli'gún ga ila'bö' bönachi zían ni lu yu.

Lataj na', rö'öda' daca', ate' gula'bö'ë idú ca chi-un gáyu'ë bönni' ni'. ¹¹ Ní'irö gudélé'ë Jesús yugu' yöta xtila na'. Cate' chigudxë' Dios: “Xclenu”, gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' rögaca lu daca' ni'. Lë'sca' caní gulunë' quégacaba' böla cuídido' na', ate' gulahuë' tsca gulë'ënnë' ilahuë'. ¹² Cate' chibulu'huöljanë', Jesús gudxë' yugu' bönni' usëda queë', gunnë':

—Buli'tubi le bizxaj nagá'anagaca, para cabí ilaca ditaj.

¹³ Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini zxoá' cebada na', le bulu'gá'ana quégaquië' bönni' na' gulahuë'. ¹⁴ Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guidé' yödzülió ni.

¹⁵ Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

*Rizë'e ni'ë Jesús lu nísado'**(Mt. 14:22-27; Mr. 6:45-52)*

¹⁶ Cate' chizá' ral-la, yöjáquië' bönni' usëda queë' Jesús, ate' bila'dxinë' ra' nísado'. ¹⁷ Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. ¹⁸ Gusí lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'së'ë bárcodo' na', le guzá' le naca tsca rizá'aru' tu hórásö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzöbinë'. ²⁰ Ní'irö Jesús rë' légaquië':

—Neda' caz ni. Biti' gádxili'.

²¹ Ní'irö len yöl-la' rudzeja quégaquië' bulu'guélé'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' söjáquië'.

Bönachi zían tu'guilaj Jesús

²² Dza buropi ni', guléquibe'e bönachi zián na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacasë' na' yöjáquië'. ²³ Ní'irö bila'rúaj ia'bal-la bárcodo' lu yödzo Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu" que. ²⁴ Tu' bila'lé'enë' bíti'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yöjáquië' Capernaum, tu'guiljë' Jesús.

Náquië' Jesús yöta xtila nabánigaca tsaz bönachi

²⁵ Cate' bila'dxín bönachi zián na' ia'tsölá'a nísado' na', yöjxáca'gaquië' Jesús, en tē' Lë':

—Bönni' Usedi, ¿bátaxi bidxinu' ni'?

²⁶ Bubi'ë didza' Jesús, rë' légaquië':

—Le nácatë rea' libí'ili': Ruguíajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en böljali'. ²⁷ Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queëli', tu' bulu'ë lahui Xuza' Dios naca' Zxí'inë'.

²⁸ Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

³⁰ Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? ³¹ Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rna: "Yöta xtila que yehua' yubá Moisés bë'ë quégaquië', gulahuë'."

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queëli' yöta xtila que yehua' yubá, pero Xuza' Dios runnë' queëli' yöta xtila le naca idú que yehua' yubá. ³³ Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzölió ni.

³⁴ Ní'irö tē' Lë':

—Xan, bénnatica'sö queëtu' yöta xtila na'.

³⁵ Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzë'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. ³⁶ Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'." ³⁷ Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'. ³⁸ Caní naca, tu' bötja' birúaja' yehua' yubá, calëga para guna' ca ré'ënda' neda' caz, pero para guna' ca ré'ënë' Dios Xuz, nasöl-lë'ë neda'. ³⁹ Lë ni le ré'ënë' Xuza' nasöl-lë'ë neda', ré'ënë' cabí unítia' nitú nupa na' bennë' quia', pero usubana' léguequi dza údxi. ⁴⁰ Lë ni le ré'ënë' Dios Xuz nasöl-lë'ë neda', ré'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxi na'.

⁴¹ Ní'irö gula'nnë' queë' Jesús bönni' judío unná bë' tu' gunnë': "Neda' caz naca' yöta xtila na' bötaj, birúaj yehua' yubá." ⁴² Que lë ni na' ta'nnë':

—¿Naru' cabí bönni' ni Jesús, zxi'inë' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

⁴³ Ní'irö bubí'ë didza' Jesús, rë' légaquië':

—Biti' innëli' quia' la' libí'isili'. ⁴⁴ Biti' séqui'në' nitúë' bönni' guídë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

⁴⁶ Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. ⁴⁷ Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. ⁴⁸ Neda' caz naca' yöta xtila nabánigaca tsaz bönachi. ⁴⁹ Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulátië'. ⁵⁰ Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'. ⁵¹ Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quégaca bönachi yödzölió.

⁵² Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

⁵³ Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', bití' ca' zóalen libí'ili' yöl-la' na'bán na'. ⁵⁴ Núti'tës nu gagu xipéla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi. ⁵⁵ Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. ⁵⁶ Núti'tës bönni' gahuë' xipéla'a, en guí'jë' xichöna', sóaléntica'së' bönni' na' neda', ate' neda' sóaléntica'sa' lë'. ⁵⁷ Ca na' zoë' nabanë' Dios Xuz nasöl-lë'ë neda', ate' neda' nabánida' Lë', lësca' caní íbaninë' neda' núti'tës bönni' gahuë' neda'. ⁵⁸ Lë ni yöta xtila bötaj birúaj yehua' yubá, en bití' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quégaquië', gulátië'. Núti'tës bönni' gahuë' yöta xtila ni sóatica'së' íbanë'.

⁵⁹ Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sédë' queë' Dios, ate' guca lë ni tsanni ni' rusédinë' bönachi Capernaum.

Didza' rúnagaca queëru' yöl-la' na'bán idú

⁶⁰ Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'? ⁶² ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? ⁶³ Le naca queë' Dios Bö' Lá'ayi naca le runna yöl-la' na'bán queéli'. Le naca bëla'sö cuntu nu uzí' xibé. Didza' na' bë'lëna' libí'ili' nátagaca queë' Dios Bö' Lá'ayi, en rúnagaca yöl-la' na'bán quégaca bönachi. ⁶⁴ Na'a, bál-lali' bití' réajlë'ëli'.

Gunnë' caní Jesús tu' nözinë' dza ni'te nupa na' bití' ta'yéajlë', enca' nu na' udödi Lë' lu ná'agaquië' bönni' ilútië' Lë'. ⁶⁵ Que lë ni na' gunnë':

—Que lë ni na' chigudxi caza' libí'ili': Bití' séqui'në' nitúë' bönni' të'ë neda' channö Dios Xuz cabí gu'ë lë' lataj.

⁶⁶ Dza na' gulaca chopá ládxi'gaquië' zían bönni' usëda queë', en bíti'rö gula'dálenë' Lë'. ⁶⁷ Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu? Li' napu' didza' rúnagaca queëtu' yöl-la' na'bán idú. ⁶⁹Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

⁷⁰Bubi'ë didza' Jesús, rë' légaquië':

—Gurö caza' libí'ili' chínuli' ni, pero tuë' bönni' ládajli' libí'ili' dzaga tu' xihui' lë'.

⁷¹Didza' ni bë'ë Jesús ca naca queë' Judas Iscariote, zxi'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

7

Bönni' böchi' cazë' Jesús biti' ta'yéajlë'ë Lë'

¹Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' t'ënnë' bönni' judío unná bë' nacu'ë ni' ilútië' Lë'. ²Dza ni' chizóa idxín laní quégaquië' bönni' judío cate' tu' subanë' ca gula'cu'ë xuz xtó'ogaquië' zxan libín lága'do'. ³Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. ⁴Channö rë'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí' cuinu' lógaca yúgu'të bönachi.

⁵Caní gula'nnë', tu' cabí ta'yéajlë'ë bönni' böchë'ë Jesús Lë'. ⁶Ní'irö Jesús rë' légaquië':

—Biti' ridxini dza quia' para uluí'i lahua' lógaca bönachi, pero dza queëli' tséajli' ni' chizóa caz. ⁷Bönachi yödzölió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rnní'a' naca xihui' le tunë'. ⁸Guli'tséaj libí'ili' laní na'. Biti' tseja' laní na' na'a tu' biti' ridxini dza quia'.

⁹Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quégaca bönachi judío

¹⁰Gudödi söjáquië' bönni' böchë'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. ¹¹Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹²Bönachi zían ni' gulu'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Biti' náquië' dxi'a tu' rizí' yé'enë' bönachi.

¹³Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

¹⁴Cate' chibidxín gatsaj laní na', blë'ë Jesús ra' yudo', en busédinë' bönachi nacua' ni'. ¹⁵Bulu'bábinë' bönni' judío, ta'nnë':

—¿Nacxi caz naca, rácadë'ë bönni' ni, en biti' ca' nazëdë' que yudo'?

¹⁶Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'. ¹⁷Channö rë'ënë' nu bönni' gunë' ca rë'ënë' Dios, huéquibe'enë' bönni' na' channö nequi queë' Dios le rusédida' bönachi o channö rácasö quia' ruá'a didza'. ¹⁸Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idútë li, en biti' ca' rizí' yë'ë.

¹⁹'Moisés bennë' queëli' xibá queë' Dios, pero biti' runli' ca rinná bë' xibá na'. ¿Bizx que rizóa ribö'öli' gútili' neda'?

²⁰Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribó'o guti li'?

²¹ Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'. ²² Le nácatë Moisés bennë' queéli' lë na' narugu lu xipëla'li' le naca bë', pero calëga Moisés caz bennë' queéli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipëla'gacabi' bi'i bönni'do' lë na' naca bë' néquiguequibi' queë' Dios. ²³ Channö ta'z'í'ibi' lu xipëla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate' böáquië' dxí'ado' cate' naca dza lá'ayi? ²⁴ Biti' ral-la' uchi'a usörö lízili' ca', pero buli'chi'a buli'sörö ca naca le naca idútë li.

Rigúxjö'ë Jesús ga narúajë'

²⁵ Ní'irö gulu'ë didza' bal-lë' bönni' nacu'ë Jerusalén, ta'nnë':

—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'? ²⁶ Buli'yútsöca', yálajdo' ru'ë didza', en biti' bi të' Lë'. ¿Naru' téquibe'enë' bönni' ta'nná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u? ²⁷ Bönni' ni, nöz quéziru' gazxi bönni' Lë'. Cate' guidé' Cristo, cuntu nu inözi gazxi bönni' Lë'.

²⁸ Ni' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' núnbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasöl-lë'ë neda', ate' Lë', biti' núnbë'ëli'-në' libí'ili'.

²⁹ Neda' núnbe'eda'-në', tu' za'a queë' Lë', ate' Lë' cazë' nasöl-lë'ë neda'.

³⁰ Ní'irö gulunë' bayudxi ila'zönë' Lë', pero cuntu nu guzxön Lë', tu' cabí ridxini dza queë' tsu'ë lu ná'agaquië'. ³¹ Gula'yéajlë' zían bönachi ni' Lë', ta'nná:

—Cate' guidé' Cristo, ¿naru' gunë' zíanrö yöl-la' huáca ca le runë' bönni' ni?

Bönni' yudo' ta'söl-lë'ë nupa ila'zön Jesús

³² Bila'yönnë' bönni' yudo' fariseo yugu' didza' ni tu'í' bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquië' para tsöjxongaquië' Lë'. ³³ Ní'irö Jesús gunnë':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasöl-lë'ë neda'.

³⁴ Uguíljali' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' biti' udzöliru'-në'? ¿Naru' huayéajtsë' ga nacu'ë bönni' judío násilasigaquië' idútë yödzülió, en usédinë' yugu' bönni' zi'tu' ni'? ³⁶ ¿Bizxi ré'ëni inná didza' na' bë'ë: “Uguíljali' neda', pero biti' udzölili' neda'”, enca': “Ga ni' tsöjsóa' neda' biti' gaca guídali' libí'ili'”?

Nisa yegu le runna yöl-la' na'bán queëru'

³⁷ Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guidé' bönni' na' ga zoa', en guí'jë'. ³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán quéguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunnë' Jesús tu' cabí ridxíninë' Dios Bö' Lá'ayi, tu' cabí ruhuëpinë' Jesús ga tsépisëtëre'.

Ta'rúaj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:
—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxí' lu në'ë Dios isöl-lë'ë queëru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönachi:

—¿Naru' irúajtsë' Cristo luyú Galilea? ⁴² Nazúaj lu guichi lá'ayi le rnna: "Cristo galjë' ladaj di'a dza queë' David, en gáquië' ca' bönni' Belén le guca ladzë' David na'."

⁴³ Caní guca, bila'rúaj bönachi na' choplö tu' nözinë' Jesús. ⁴⁴ Të'ënnë' bal-lë' ila'zönë' Jesús, pero cuntú nu bi ben queë'.

Biti' ta'yéajlë'ë Jesús bönni' unná bë'

⁴⁵ Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacué' bönni' yudo' na', ate' légaquië' gulë' ni'a ná'agaquië' na', ta'nnë':

—¿Bizx que bití' dichë'ëli'-në'?

⁴⁶ Bulu'bi'ë didza' ni'a ná'agaquië', ta'nnë':

—Cuntú nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nnë':

—¿Naru' bë'tsali' lataj guzxí' yé'enë' ca' libí'ili'? ⁴⁸ ¿Naru' guyéajlë'tsë' Lë' nu bönni' unná bë' o nu bönni' yudo' fariseo? ⁴⁹ Libí'ili' dxíali' dö' tu' cabí rácali' xibá queë' Dios.

⁵⁰ Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca' bönni' yudo' fariseo, ate' rë' légaquië':

⁵¹ —¿Naru' richúguru' queë' tu bönni' gátië' lu xibá queëru' channö cabí yöniru' lë' zí'alö para inöziru' bi benë'?

⁵² Ní'irö bulu'bi'ë didza' ia'zícá'rë' na', të' lë':

—¿Nácatso' ca' lí' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúë' bönni' ru'ë didza' uláz queë' Dios luyú Galilea.

⁵³ Ní'irö yöjhuöjgaquië' lidxi que queégaquië'.

8

¹ Guyijë' Jesús ga naca lu Guí'a Yaga Olivo.

Nigula naguítsjanu xibá que yöl-la' nutsaga na'

² Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'. ³ Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu' gula'dzölinë'-nu ni' riguítsjanu xibá que yöl-la' nutsaga na'. Bulu'sudxinë'-nu lógaca bönachi na' tu'zë náagagaca Jesús, ⁴ ate' të' Lë':

—Bönni' Usedi, nigula ni guzxöntu'-nu ni' runnu dul-la' riguítsjanu xibá que yöl-la' nutsaga na'. ⁵ Lu xibá queë' Moisés, gunná bé'enë' netu' uládxí'tu'-nu guiöj nu nigula runnu caní, para gátinu. ¿Názxiga Lí', nacxi rnno'?

⁶ Caní gula'nnë' para ila'zí' bë'ë Jesús para ila'zéqui'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibón në'ë. ⁷ Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabí nunlí' dul-la' isí loli' uládxí'li'-nu guiöj.

⁸ Leyúbölö biyéchuë' Jesús, ruyúë' lu yu, en buguélë'ë ruzúajë' leyúbölö lu yu na'. ⁹ Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógachië' bönni' gúlarö ga bidxintë bönni' cuidí'. Nagá'anë' Jesús ni', dzáganu nigula na' Lë' gatsaj láhui'lö nupa na' tu'zë

nágagaca Lë'. ¹⁰ Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacua' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹ Lënu rnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', bití' richuga' quiu'. Böaj lidxu', en bíti'rö gunu' dul-la'.

Náquië' Jesús bení' quégaca bönachi yödzölió

¹² Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', bití' tē' ga naca chul-la que dul-la', pero tu bení' sóalen bönni' na' le ulu'i lë' naca gata' yöl-la' na'bán idú queë'.

¹³ Ní'irö tē' Lë' bönni' yudo' fariseo, ta'nnë':

—Li' runu' ba nalí que la' cuinsu'. Bití' naca lesaca' le runu' ba nalí. Nítisö naca.

¹⁴ Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero libí'ili' bití' nözili' gazxi za'a, en calëga gazxi tseja'. ¹⁵ Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntu nu bönni' ruchi'a rusöröa' queë'. ¹⁶ La'tu' uchi'a usöröa', ca nácate uchi'a usöröa', tu' calëga néda'sö uchi'a usöröa', pero Xuza' nasöl-lë'ë neda' gunë' neda' tsözxön. ¹⁷ Lëzca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca. ¹⁸ Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Bití' núnbë'ëli' neda', en bití' núnbë'ëli'-në' Xuza'. La'tu' núnbë'ëli' neda', lëzca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' gu'ina gapa ta'gu'ë gun que yudo', pero cuntu nu guzxon Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', bití' gaca guídali"

²¹ Leyúbölö Jesús rë' légaquië', rnnë':

—Uzá'a yödzölió ni, ate' uguíljalí' nu usölá libí'ili', pero ugá'ana dul-la' nabága'li', en gátili'. Ga tseja' neda', bití' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' bití' gaca guídali'."

²³ Jesús rë' légaquië':

—Libí'ili' nácalí' que luyú dë cadxí'ilö ni, pero neda' za'a yehua' yubá xitsá'. Libí'ili' nácalí' bönachi yödzölió ni, pero neda' bití' naca' bönni' yödzölió ni.

²⁴ Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlé'ëli' naca caza' Nu usölá, ugá'ana dul-la' nabága'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. ²⁶ Zián le ral-la' guía' libí'ili', en uchi'a usöröa' le naca queëli'. Didza' idútë li ru'ë Xuza' nasöl-lë'ë neda', ate' didza' riyönda' ru'ë Lë', ru'ílëna' bönachi yödzölió ni.

27 Biti' gula'yéajni'inë' ru'ilenë' légaquië' didza' ca naca queë' Dios Xuz.
28 Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusölá, en biti' bi runa' rácasö quia', pero ca na' ruluí'inë' Xuza' neda', ca' ruá'a didza'. 29 Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

30 Cate' bë'ë Jesús didza' ni, bönni' zían gula'yéajlë'ë Lë'.

Nupa nácgaca zxí'inë' Dios, en nupa nadzúngaca lu na' dul-la'

31 Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'.

32 Gúnbë'ëli' le naca idútë li, ate' le naca idútë li na' usölá libí'ili'.

33 Bulu'bi'ë didza', të' Lë':

—Abraham naquië' xuz gudödi queëtu', en cuntu nu ben netu' bönni' nadó'ogaca. ¿Rnnatso': "Usölá libí'ili'?"

34 Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. 35 Nu naca bönni' nadó'o biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u. 36 Caní naca, channö Nu na' naca Zxí'inë' Dios usölá libí'ili', le nácatë uláli'. 37 Nözda' naquië' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'ali' xtídza'a. 38 Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

39 Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxí'ini xi'sóë' Abraham, gunli' ca na' benë' Abraham.

40 Na'a, rizóa ribö'öli' gútili' neda', sal-la' ruí'ilena' libí'ili' didza' idútë li, didza' na' biyönda' bë'ë Dios. Biti' benë' Abraham caní. 41 Libí'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

42 Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusöl-lë'ë neda'. 43 ¿Bizx que biti' gaca tséajni'ili' didza' ruá'a? Naca tu' cabí rë'ënili' uzë nágalí' xtídza'a. 44 Xuz quézili' naca tu' xihui'. Néquili' que tu' xihui', en rë'ënili' gunli' le rizë ladxi' xúzili' na'. Dza ni'te naca tu' xihui' nu guti bönachi, en cabí nazí' lu në'e le naca idútë li, tu' cabí ruí'i didza' idútë li. Cate' rizi' yë' tu' xihui', ca naca caz ruí'i didza', tu' naca nu rizi' yë', en naca ca xúzgaca caz nupa ta'zí' yë'. 45 Tu' ruá'a neda' didza' idútë li biti' réajlë'ëli' neda'. 46 ¿Núzxilöli' gaca usubága'li' neda' dul-la'? Channö ruá'a didza' idútë li, ¿bizx que biti' réajlë'ëli' neda'? 47 Nu naca queë' Dios, ruzë nagui xtídzë'ë Dios, pero libí'ili', tu' cabí nácali' queë' Dios, biti' ruzë nágalí' xtídzë'ë.

Cristo zoa cazë' zí'atëlö ca Abraham

48 Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

49 Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö. 50 Biti' runa' zxön cuina'. Zoa Nu run zxön neda', ate' Lë' ruchí'a

rusöröë' rë'u. ⁵¹ Le nácatë rea' libí'ili': Nu bönni' si' lu në'ë xtídza'a, biti' ca' gátië' bönni' na'.

⁵² Ní'irö yugu' bönni' judío na' tē' Lē', ta'nnē':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu në'ë xtídza'a, biti' ca' gátië' bönni' na'." ⁵³ ¿Naru' nácatërötso' Li' zxön ca xúziru' Abraham? Gútië' lē', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

⁵⁴ Bubi'ë didza' Jesús, rē' légaquië':

—Channö neda' guna' zxön cuina', yöl-la' zxön na' biti' bi gaca. Xuza' runë' neda' zxön, ate' libí'ili' rnnali' náquië' Dios queéli'. ⁵⁵ Libí'ili' biti' núnbë'ëli'-në' Dios Xuz, pero neda' núnbë'a-në'. La'tu' innía': Biti' núnbë'a-në', gaca' nu rizí' yē' ca na' nácali' libí'ili', rizí' yē'ëli'. Na'a, le nácatë núnbë'a-në', en nazí' lu na'a xtídze'ë. ⁵⁶ Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzéjade'enë'.

⁵⁷ Ní'irö yugu' bönni' judío na' tē' Jesús, ta'nnē':

—Biti' yu'ínu' chi-un iz. ¿Naru' bilé'etsenu' Abraham?

⁵⁸ Jesús rē' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guélé'ë guiöj para ulu'ladxë' Jesús, pero Lē' bunítitë cuinë', en burúajë' lö'a yudo' na'. Gudödë' gatsaj láhui'lö ga na' nacu'ë, ate' söhuöjë'.

9

Ruúnë' Jesús tu bönni' guljë' nachúl-latë lahuë'

¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

² Gula'nábinë' Jesús bönni' usëda queë', ta'nnē':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

³ Bubi'ë didza' Jesús, rē' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni.

⁴ Run bayudxi gunru' xichinë' Xuza' nasöl-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntú nu gaca gun dxin.

⁵ Tsanni ni zoa' yödzölió ni, naca' bení' quégaca bönachi yödzölió.

⁶ Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guiöj lahuë' bönni' na' nachul-la lahuë'.

⁷ Ní'irö rē' lē':

—Guyéaj yöjtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irö bönni' na' nachul-la lahuë' guyijë' ni', yöjtibi lahuë'. Cate' buzë'ë ni' chirilé'enë'. ⁸ Ní'irö bulu'bani bönachi dzaga yu'u queë', en nupa ni' bila'lé'e lē' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹ Bal-lë' ta'nnē':

—Lë' na'.

Ia'bal-lë' ta'nnē':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰ Ní'irö gula'nábinë' lē', ta'nnē':

—¿Nacxi caz guca, guyalaj guiöj lo'?

¹¹ Bubi'ë didza', rē' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': "Guyéaj ra' beaj nisa nazí'i le Siloé, yöjtibi lo'." Guyija' ni', yöjtibi lahua', ate' guyálajtë guiöj lahua'.

¹² Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxinë' bönni' na' guyalaj guiöj lahuë'

¹³ Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. ¹⁴ Tu' naca dza lá'ayi quégaquië' cate' benë' Jesús gúna'do' na', en gusaljë' guiöj lahuë' bönni' na' zí'alö nachul-la lahuë', ¹⁵ que lë' ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiöj lahuë'. Lë' gudxë' légaquië':

—Budxië' gúna'do' guiöj lahua', ate' yöjtiba' le, en rilé'eda'.

¹⁶ Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'rúajë' choplö. ¹⁷ Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rnno' li' queë' bönni' na', gusaljë' guiöj lo'?

Lë' rnnë':

—Náquië' bönni' ru'ë didza' uláz queë' Dios.

¹⁸ Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiöj lahuë', cate' bulu'lídzarë' xuz xinë'ë bönni' na' guyalaj guiöj lahuë', ¹⁹ ate' gula'nábinë' légaquië', ta'nnë':

—¿Naru' náquië' bönni' ni zxí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

²⁰ Bulu'bi'ë didza' xuz xinë'ë na', të' légaquië':

—Nözitu' bönni' ni náquië' zxí'initu', en guljë' nachúl-latë lahuë', ²¹ pero nacxi guca, rilé'enë' na'a, bití nöztu', en nuzxi na' gusalaj guiöj lahuë', bití nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

²² Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. ²³ Que lë' ni na' gula'nnë' xuz xinë'ë: "Guli'nabi-në' lë', tu' chináquië' bönni' chinaca."

²⁴ Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

²⁵ Ní'irö bubi'ë didza', rnnë':

—Channö náquië' bönni' dul-la' bití nözda'. Tu le nözda'. Zí'alö nachul-la lahua', ate' na'a rilé'eda'.

²⁶ Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiöj lo'?

²⁷ Bubi'ë didza', rë' légaquië':

—Chigúdxí caza' libí'ili', pero bití' gú'unili' si' lu ná'ali' xtídza'a. ¿Bizx que na' ré'enili' yönili' leyúbölö? ¿Naru' ré'enili' tá'ali' ca' Lë'?

²⁸ Ní'irö bulu'lidza' zí'ë lë', ta'nnë':

—Li' do'o Lë', pero netu' dá'atu' Moisés. ²⁹ Netu' nöztu' Dios bë'lenë' Moisés didza', pero ca naca queë' bönni' ni, bití nöztu' nuzxi caz gusöl-la' Lë'.

bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzöliba' le ráguba'.

10 'Za'zë' bönni' gubán para cuanë'-ba', en gútië'-ba', en usunítie'-ba'. Neda' bida' para gata' yöl-la' na'bán idú quégaca bönachi nácagaca ca bö'cu' zxila' quia'. Le nácatë gata' quégaquië' yöl-la' na'bán idú na'. 11 Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'. 12 Tu bönni' nazxjë' rapa chi'ë-ba' bö'cu' zxila', cate' rilé'enë' zá'aba' bö'cu' gu'a sínia', rucá'anë'-ba' bö'cu' zxila' na', en ruzxúnajë', ate' bö'cu' gu'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chí'i-ba' bö'cu' zxila', ate' bití' néquigacaba' que cazë' bö'cu' zxila' na'. 13 Ruzxúnajë' bönni' nazxjë' na' tu' rapa chi'ë-ba' bö'cu' zxila' na' para sí'së' dumí, en bití' ru'í ládxië'-ba' bö'cu' zxila' na'.

14-15 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lë'sca' caní núnbe'egacada' bönachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbë'gacaba' neda'. 16 Lë'sca' nacuá'aba' ia'zica'röba' bö'cu' zxila' quia' bití' nabábagacaba' ni. Lë'sca' légacaba' ral-la' tsöjxi'gaca'-ba'. Lé'gacaba' ulu'zë' nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

17 'Que lë ni na' nadxi'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. 18 Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

19 Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'. 20 Zíanë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágali' Lë'?

21 Ia'bal-lë' ta'nnë':

—Bití' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zöë' Jesús tsölá'alö

22 Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu në'ë Dios. 23 Ridë' Jesús ra' yudo' ga naca chila que, nazí'i le Chila Queë' Salomón. 24 Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjö'i' netu'.

25 Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. 26 Libí'ili' bití' réajlë'ëli' neda', tu' cabí nabábalenli' nupa nácagaca bö'cu' zxila' quia', ca na' chigudxi caza' libí'ili'. 27 Ta'yóniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. 28 Neda' runödza' yöl-la' na'bán idú quégacaba', ate' bití' ca' ila'nítiba', ate' cuntu nu sequi' ubéaj lé'gacaba' lu na'a neda'. 29 Xuza' Dios bennë' quia' lé'gacaba', ate' Lë' nápatë'rë' yöl-la' huáca ca yúgu'të bönachi, ate' cuntu nu sequi' ubéaj lé'gacaba' lu në'ë Xuza'. 30 Neda', en Dios Xuz, tuz nácatu'.

³¹ Leyúbölö yugu' bönni' judío unná bē' na' bulu'guél'ē guiōj ulu'ladxē' Jesús. ³² Jesús rē' légaquiē':

—Zian le naca dxi'a bena' loli' tu' dē lu na'a uláz queē' Xuza'. ¿Ni'a que bízxilō dxin dxi'a ni uládxil'li' neda' guiōj?

³³ Bulu'bi'ē didza' bönni' judío unná bē' na', tē' Lē':

—Ni'a que dxin dxi'a bití' uládxil'tu' li' guiōj, pero tu' cabí rnnió' dxi'a queē' Dios, tu' nacu' li' bönáchisö, en run cuinu' Dios.

³⁴ Bubi'ē didza' Jesús, rē' légaquiē':

—¿Naru' cabí nazúaj lu guichi lu xibá queēli' ca gunnē' Dios, rna: “Neda' rnniá': Nácali' yugu' dios”? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ru'i lágaquiē' dios, bönni' ni' Dios bē'lenē' légaquiē' didza'. ³⁶ Dios bubéajē' neda' quez queē', en gusöl-lē'ē neda' yōdzölió ni. ¿Naru' rnnátsali' quia': “Li' bití' rnnió' dxi'a queē' Dios”, tu' gunniá': Zxí'inē' Dios naca? ³⁷ Channö cabí runa' dxin budödē' Xuza' Dios lu na'a, bití' ralla' tséajlē'ēli' neda'. ³⁸ Channö runa' dxin budödē' Dios lu na'a, sal-la' bití' réajlē'ēli' neda' caz, guli'tséajlē' le nácagaca bē' dxin na' runa', para guéquite'eli' náquiē' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bō'ē ila'zönē' Jesús, pero Lē' bulē' lu ná'agaquiē'.

⁴⁰ Ní'irö guyijē' Jesús leyúbölö ia'tsölá'a yegu Jordán, ga ni' buquilē' Juan bönachi nisa zí'atēlö, ate' bugá'anē' Jesús ni'. ⁴¹ Bila'dxín bönachi zían ga zoē' Jesús, ta'nná:

—Le nácatē bití' benē' Juan nitú yöl-la' huáca zxön, pero yúgu'tē le gunnē' Juan na' ca ral-la' gaca queē' bönni' ni, idútē li zeaj naca.

⁴² Que lē ni na' gula'yéajlē'ē bönni' zían Jesús ga na' zoē'.

11

Le guca cate' gútiē' Lázaro

¹ Dza ni' ré'enē' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. ² Nácanu María na' nigula zanē' Lázaro, bönni' na' ré'enē', en nácanu ca' nigula na' gulú'unu le rilá' zxixi ni'ē Xanru', en buzxinu ni'ē len guitsa' ícjanu. ³ Gula'sól-la'nu nigula zanē' Lázaro na' nu yōjōdx Jesús, gunná:

—Xan, buyútsöca', ré'enē' Lázaro, bönni' na' nadxí'inu'-nē'.

⁴ Cate' biyönnē' Jesús didza' ni, gudxē' nupa nacuá' ni', rnnē':

—Yōdzöhuē' ni bití' naca le guti lē' tsaz, pero naca para ilá' lahui yöl-la' zxön queē' Dios, ate' ni'a que yōdzöhuē' ni ilá' lahui ca' yöl-la' zxön quia' neda', Zxí'inē' Dios.

⁵ Jesús nadxí'inē' Marta, en nigula zxílanu Marta na', en Lázaro na'. ⁶ Sal-la' nadxí'inē' Jesús légaquiē', cate' biyönnē' ré'enē' Lázaro, bugá'anē' ga na' zoē' ia'chopa dza ca'. ⁷ Cate' bizá'a chopa dza na', Jesús gudxē' yugu' bönni' usēda queē', rnnē':

—Uyéajru' leyúbölö luyú Judea.

⁸ Ní'irö yugu' bönni' usēda queē' tē' Lē', ta'nnē':

—Bönni' Usedi, si' gula'zóa gula'bō'ē bönni' judío unná bē' ni' ulu'ladxē' Li' guiōj. ¿Naru' uyéajtso' leyúbölö ni'?

⁹ Bubi'ē didza' Jesús, rē' légaquiē':

—Nacuá' caz chinu hora lahui' dza. Nu bönni' ridē' lahui' dza, bití' tsöjchégu'ē, tu' rilé'enē', tu' zóalen lē' bení' zoa yōdzölió ni. ¹⁰ Channö ridē' bönni' na' chí'i dzö'ölö, rōjchégu'ē, tu' cabí zóalen bení' lē'.

¹¹ Cate' budxi bē'ē Jesús didza' ni, ní'irö gudxē' légaquiē':

—Rásiē' Lázaro, böchi' luzá'aru', ate' tseja' neda', en usubana'-nē'.

12 Ní'irö yugu' bönni' usëda queë' tē' Lē', ta'nnē':

—Xan, channö rásië', huöáquië'.

13 Gunnē' caní Jesús tu' chigútië' Lázaro, pero légaquië' téquinë' gunnē': Rásisë' Lázaro. 14 Ní'irö Jesús gudxë' légaquië' yálajdo', gunnē':

—Chigútië' Lázaro. 15 Rudzējada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dē' Lázaro.

16 Ní'irö Tomás, bönni' na' tu'ë lē', Bönni' Bilidi' gudxë' ia'zica'rē' bönni' usëda queë' Jesús, rnnē':

—Uyéajru' ca' rē'u, en gátillenru'-nē'.

Náquië' Jesús Nu rusubán nupa chinátigaca, enca' Nu nabániru'

17-19 Dē yödzö Betania gála'sö ga dē Jerusalén na', le naca ca rizá'aru' tu hórátëz. Que lē ni na' chibila'dxinë' zían bönni' judío ga na' nacuá'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. 20 Cate' biyönninu Marta didza' zë'ë Jesús, ní'irö birúajnu yu'u, yöjtságanu Lē', pero María bugá'ananu yu'u na'. 21 Marta na' rēnu Jesús:

—Xan, la'tu' zu' ni, biti' gátië' bönni' zana'. 22 Lësca' na'a, nözda' yúgu'të le inábinu' Dios, Lē' gunnē' quiu'.

23 Jesús rē'ë-nu:

—Ubanë' bönni' zanu'.

24 Marta rēnu Lē':

—Nözda' ubanë' cate' idxín dza údxi cate' ulu'bán nupa chinátigaca.

25 Ní'irö Jesús rē'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, 26 ate' yúgu'të bönni' nabángaquië', en ta'yéajlë'ë neda', biti' ca' ilátië' tsaz. ¿Réajlë'u lē ni'?

27 Marta rēnu Lē':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu nē'ë Dios isöl-lë'ë yödzölió ni.

Ribödxë' Jesús tu' ru'i ládxë'ë nigula zanë' Lázaro

28 Cate' budxi bé'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rēnu lēnu:

—Bönni' Usedi zoë' ni, rulidzë' li'.

29 Cate' biyönninu María didza' ni, la' guyástënu, zéajnu ga na' zoë' Jesús.

30 Biti' rázinë' Jesús la' yödzödo' na', pero zóasë' ga na' yöjtságanu Marta Lē'. 31 Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnē':

—Uyéajnu ra' yeru ba tsöjchödxinu ni'.

32 Ní'irö bidxinnu María ga na' zoë' Jesús. Cate' bilé'enu Lē', biyéchunu xini'ë, en rēnu Lē':

—Xan, la'tu' zu' ni, biti' gátië' bönni' zana'.

33 Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö bu'i'innë', en gunnëda' ládxë'ë. 34 Rnnë':

—¿Gazxi bucáchi'li'-nē'?

Tē' Lē':

—Gudá uyú'.

35 Gurödxë' Jesús. 36 Ní'irö gula'nnë' bönni' judío na', ta'nnē':

—Buli'yútsöca' ca nadxí'ide'enë' lē'.

37 Bal-lë' ta'nnē':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

³⁸ Leyúbölö gunnëda' ládxe'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiöj, ate' da' tu guiöjta'a le nusayaj ga nu riyaza le.

³⁹ Jesús gudxe' nupa nacuá' ni', rnnë':

—Gulí'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

⁴⁰ Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxon queë' Dios?

⁴¹ Ní'irö gula'güë' guiöjta'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxbalö, rnnë':

—Xuza', rea' Li', xclenu' tu' riyönnu' neda'. ⁴² Neda' nözda' riyöntiqui'sinu' neda', pero ruá'a didza' ni para ulu'z'í xibé bönachi zían ni, en ila'yéajlë' Li' na' nasól-lu'u neda'.

⁴³ Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴ Burúajë' bönni' na' gúquië' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

⁴⁵ Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'. ⁴⁶ Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. ⁴⁷ Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxon. ⁴⁸ Channö gü'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnajgaquië' yudo' lá'ayi queëru', en yödzö queëru'.

⁴⁹ Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nözili', ⁵⁰ en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzö.

⁵¹ Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzö na'. ⁵² Gátië' Jesús, calëgasö ni'a que yödzö na', pero gátië' ca' para utubë' yugu' zxí'inë' Dios násilasigaquië', para ilácagaquië' tuz. ⁵³ Caní guca, la' dza ná'asö gulún xtídzagaquië' ilútië' Jesús. ⁵⁴ Que lë ni na' bíti'rö gudë' Jesús yálajdo' gapa nacuá' bönachi judío, pero buzë'ë ni', sa'yéajë' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

⁵⁵ Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzö ni', ate' gula'benë', söjáquië' Jerusalén cate' si' idxín laní na' para tsöjpá'a cuíngaquië' ca naca que yudo'. ⁵⁶ Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'tuë', ta'nnë':

—¿Bizxi rusáca'li'? ¿Huídatsë' laní, o biti' guidë'?

⁵⁷ Chigula'nná bē'ē yugu' bixúz unná bē', en yugu' bōnni' yudo' fariseo channō nu nōzi ga zoē' Jesús, ral-la' ududíxjöi'i légaquiē' para gaca tsōjxōngaquiē' Lē'.

12

María rigú'unu le rilá' zxixi ni'ē Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanē' bōnni' judío ca benē' Dios, bubéajē' bōnachi queē' luyú Egipto, ní'irō bidxinē' Jesús lu yōdzō Betania, ga na' zoē' Lázaro, bōnni' na' gútiē', en bubanē' lu yōl-la' guti. ² Gula'gu'ē tu gū'i huagu ni' le gahuē' Jesús. Gulú'unu María le ilahuē', ate' nūtsē'ē Lázaro ladaj bōnni' rō'ōlengaquiē' Jesús ga na' tahuē'. ³ Ní'irō gudéla'nu María ca tu guié le rilá' zxixi que yōj susén lasi idú, le nazáca'da', en gulú'unu le ni'ē Jesús. Buzxinu ni'ē len guitsa' ícjanu. Idútē lu yu'u na' guzé bö' zxixi. ⁴ Ní'irō bē'ē didza' tu bōnni' usēda queē' Jesús, lē' Judas Iscariote, xzí'inē' tu bōnni' lē' Simón, en náquiē' bōnni' na' udōdē' Jesús lu ná'agaquiē' yugu' bōnni' yudo', rnnē':

⁵ —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bōnachi yechi'?

⁶ Gunnē' caní, calēga tu' ruí'i ládxe'ē bōnachi yechi', pero tu' náquiē' gubán, en lē cazē' nu'ē buzudi dumí quégaquiē', en rubéajlanē' dumí na' tu'chejē' lu buzudi na'. ⁷ Ní'irō Jesús rē' lē':

—Bē'ē-nu lataj, tu' naca lē ni bennu tu le nabá'a para dza igácha'a. ⁸ Yugu' bōnachi yechi' ila'cuá'lentica'sō libí'ili', pero neda' biti' ugá'anatica'sa' ga zóali'.

Tun xtídza'gaquiē' bōnni' judío unná bē' ilútiē' Lázaro

⁹ Cate' bila'yōnnē' bōnni' judío zoē' Jesús yōdz Betania, bila'dxinē' zíanē' ni', calēgasō tu' zoē' Jesús ni', pero lēasca' tu' té'ennē' ila'lé'enē' Lázaro, bōnni' na' busubanē' Jesús lu yōl-la' guti. ¹⁰ Ní'irō gulún xtídza'gaquiē' yugu' bixúz unná bē', ilútiē' ca' Lázaro, ¹¹ tu' ta'yéajlē'ē zían bōnni' judío Jesús ni'a queē' Lázaro na', en chinulá'alengaquiē' yugu' bixúz unná bē' na'.

Len yōl-la' ba zxön raziē' Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Bōnachi zían bila'dxín Jerusalén dza Laní Pascua, ate' dza buropi na' ta'yōni zē'ē Jesús ni'. ¹³ Ní'irō gula'guítsjē' zin, en bila'rúajē' sōjxí'gala'gaquiē' Jesús, ate' gulu'ē zidzaj didza', ta'nnē':

—¡Yōl-la' ba Dios! ¡Yōl-la' ba Bōnni' ni zē'ē uláz queē' Xanru', para inná bé'enē' bōnachi Israel!

¹⁴ Budzōlinē' Jesús tuba' búrrodo', ate' gudxiē'-ba' ca na' nazúaj lu guichi lá'ayi, rnnā:

¹⁵ ¡Biti' gádxili', libí'ili', zóali' yōdzō Sión!

¡Buli'yútsōca', zē'ē Bōnni' inná bé'enē' libí'ili'!

¡Dxiē'-ba' tuba' búrrodo'!

¹⁶ Cate' ni' si' guca lē ni, biti' gula'yéajni'inē' bōnni' usēda queē' Jesús, pero gudōdi ni', cate' bubanē' Jesús lu yōl-la' guti, en buēpē' yehua' yubá queē', ní'irō yōjnéguequinē' lē ni nazúaj lu guichi lá'ayi ca ral-la' gaca queē', ate' guca queē' caní.

¹⁷ Lēasca' yugu' bōnni' na' gula'cuá'lenē' Jesús cate' ni' bulidzē' Lázaro, bōnni' na' yu'ē yeru ba, en busubanē' lē' lu yōl-la' guti, gulunē' ba nalí queē'. ¹⁸ Que lē ni na' ca' bila'rúajē' bōnni' yōjxí'gala'gaquiē' Jesús, tu' bila'yōnnē' ca naca

yöl-la' huáca ni benë' Lë'. ¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yüë' lahuë', ta'nnë':

—Bönni', rë'ënitü' ilé'etu'-në' Jesús.

²² Guyijë' Felipe na', en yöjödxe' ca' Andrés. Ní'irö Andrés, en Felipe na' gulë' ca' Jesús. ²³ Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. ²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej.

²⁵ Nu bönni' ruí'i ládxi'dë'ë yöl-la' na'bán queë', unítië' le, tu' gátie' tsaz bönni' na'. Nu bönni' biti' ruí'i ládxi'dë'ë yöl-la' na'bán dë queë' yödzölió ni gun chí'ë le ga idxinrö dza gata' yöl-la' na'bán idú queë'. ²⁶ Channö rë'ënë' nu bönni' gunë' xichina', ral-la' tē'ë neda' bönni' na', ate' ga ni' tsöjsó'a neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Rigúxjö'ë Jesús ca si' ilútië' Lë'

²⁷ Gunnë' ca' Jesús:

—Na'a rö'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irö biyön chí'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

²⁹ Bila'yöni bönachi zián nacuá' ni' chí'i ni, ate' ta'nná:

—Guziú' na' gunnë.

Ia'bal-la bönachi na' ta'nná:

—Tu gubáz lá'ayi queë' Dios bë'lenë' Lë' didza'.

³⁰ Ní'irö bubi'ë didza' Jesús, rë' légaquië':

—Biyön chí'i ni, calëga para uzi'a xibé neda', pero para uzi'ili' xibé libí'ili'.

³¹ Chibidxín dza uchi'a usöröë' Dios bönachi yödzölió ni. Na'a chú'unë' Dios tu' xihui' ní'ilö, nu na' rinná be'e bönachi yödzölió ni. ³² Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

³³ Didza' ni bë'ë Jesús naca bë' ca gátie'. ³⁴ Bönachi zián na' tē Jesús, ta'nná:

—Netu' biyönitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Li': "Run bayudxi Bönni' Guljë' Bönachi, ulu'chisë' Lë' xitsá'"? ¿Nuzxi na' Bönni' Guljë' Bönachi?

³⁵ Ní'irö Jesús rë' légaquië':

—Ia'tú chí'ido'osö sóalena' neda' libí'ili', en naca' bení' queëli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítli'. Nu bönni' ridë' ga chul-la niti biti' nözinë' gazxi sa'yéajë'. ³⁶ Tsanni ni zóalena' libí'ili', naca' bení' queëli'. Guli'tséajlë' neda' naca' bení' queëli' para ilé'eli' bení' na' naca idú.

Cate' Jesús budxi bë'ë didza' ni, yöjhuöjë' yöjcachi' lahuë' lógaquië'.

Le run nigui bönachi judío, para cabí ila'yéajlë' Jesús

³⁷ Sal-la' benë' Jesús zían yöl-la' huáca lógaquië', bití' gula'yéajlë'ë Lë'. ³⁸ Caní guca lë na' buzúajë' Isaías lu guichi, bönni' na' bë'ë didza' uláz queë' Dios, gunnë':

Xan, ¿nuzxi caz guyéajlë' didza' bë'ëtu'?

¿Nuzxi caz buluí'inë' Xanru' yöl-la' huáca queë'?

³⁹ Caní guca, bití' guca ila'yéajlë'ë Jesús. Guca ca na' gunnë' ca' Isaías:

⁴⁰ Dios benë' ga gula'chul-la gula'nítië',

ate' guca zidi ládxi'do'gaquië'

para cabí ila'lé'enë' len guiöj lógaquië',

en cabí ila'yéajni'inë' lu icja ládxi'do'gaquië'.

Bití' ulu'huóáquië' quia' para úngaca'-në'.

⁴¹ Bë'ë Isaías didza' ni tu' bilé'enë' yöl-la' zxön queë' Cristo, en bë'ë didza' ca naca queë' Lë'. ⁴² Sal-la' raca caní, gula'yéajlë' bönachi zían Jesús, ga bidxintë gula'yéajlë'ë bal-lë' bönni' unná bë' Lë', pero tu' tádxinë' yugu' bönni' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu'dubë' tu'sedë' queë' Dios. ⁴³ Caní gulunë' tu' tunrë' zxön le tun bönachi légaquië' bal ca le runë' Dios légaquië' bal.

Ilún didza' bë'ë Jesús ga irugu quégaca bönachi ilátigaca

⁴⁴ Bë'ë zidzaj didza' Jesús, rnnë':

—Nu bönni' réajlë'ë neda', calëga néda'sö réajlë'ë, pero réajlë'ë ca' Xuza' nasöl-lë'ë neda'. ⁴⁵ Lëasca' caní, nu bönni' rilé'enë' neda', rilé'enë' ca' Xuza' nasöl-lë'ë neda'. ⁴⁶ Neda' naca' bení', en bida' yödzölió ni, para cabí ulu'gá'anë' ga chul-la yúgu'të bönni' ila'yéajlë'ë neda'. ⁴⁷ Channö riyönnë' nu bönni' xtídza'a, en bití' runë' le bal, calëga neda' ichuga' queë' bönni' na' gátië', tu' bida' ni, calëga para ichuga' quégaca bönachi yödzölió ni, pero para usölá' bönachi yödzölió ni. ⁴⁸ Nu bönni' ruzóë' neda' tsölá'alö, en bití' rizí' lu në'ë xtídza'a, chizóa le ichugu queë' bönni' na'. Didza' na' chibë'lëna' libí'ili' naca tu le ichugu queë' bönni' na' dza údxi. ⁴⁹ Caní naca, ruá'a didza', calëga rácasö quia', pero Xuza' nasöl-lë'ë neda' gudxë' neda' le ral-la' innía', enca' ca ral-la' gu'a didza'. ⁵⁰ Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesús riguibë' ní'agaquië' bönni' usëda queë'

¹ Ni' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nözinë' Jesús chibidxín dza queë' gátië', cate' ral-la' uzë'ë yödzölió ni, en huöjë' ga zoë' Xuzë'. Ca na' nadxí'inë' bönachi queë' nacuá' yödzölió ni, na'a nadxí'inë' légaquië' ga idxintë gátië' uláz quégaquië'.

² Satanás tu' xihui' chinagú'u yöl-la' Judas Iscariote, zxí'inë' tu bönni' lë' Simón, para udödë' Jesús lu ná'agaca nupa iluti Lë'. ³ Nözinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idútë yöl-la' unná bë' queë'. ⁴ Que lë ni na', cate' ni' tahuë', guzuínë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë. ⁵ Ní'irö gudë'ë nisa tu lu zxiga' guië, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

⁶ Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lë':

—Lë ni runa', bití' réajni'ininu' na'a, pero huadzé tséajni'inu'.

⁸ Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

⁹ Ní'irö Simón Pedro rë' Lë':

—Xan, calégasö ni'a quibu', pero quibu' ca' na'a, en icja'.

¹⁰ Jesús rë' lë':

—Nu nayari, ní'asö run bayudxi tsari, tu' naca cazë' dxi'a idutë', ate' libí'ili' nácali' dxi'a, pero caléga yúgu'tëli'.

¹¹ Gunnë' caní Jesús: “Caléga yúgu'tëli' nácali' dxi'a”, tu' nöziné' núlögaquië' na' udödi Lë'.

¹² Gudödi gudibë' Jesús ní'agaquië', buguelë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'? ¹³ Libí'ili' ru'ili' La': Bönni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channö neda' naca' Xanli', en Bönni' Usedi queëli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le bulu'ida' libí'ili' para gunli' libí'ili' ca na' bena' neda'. ¹⁶ Le nácatë rea' libí'ili': Biti' nayépisëtëre' tu bönni' huen dxin ca xanë', ate' bönni' gubáz biti' nayépisëtëre' ca nu nasöl-la' lë'. ¹⁷ Channö réajni'ili' yúgu'të lë ni, bica' ba libí'ili' channö gunli' caní. ¹⁸ Didza' ni ruá'a biti' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi, le rnna: “Nu rágulen neda' tsözxön, nu ni tá'baga' neda'.” ¹⁹ Na'a rigu'ixjöi'ida' libí'ili' zí'alö ca gaca, para cate' gaca caní, tséajlë'ëli' zoa caza' neda'. ²⁰ Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

Rigu'ixjö'ë Jesús ca gunë' Judas, udödë' Lë'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bë'ë didza' ni, buí'innë', ate' yálajdo' gunnë':

—Le nácatë rea' libí'ili': Tu bönni' nútsë'ë ladjali' udödë' neda'.

²² Ní'irö bulu'yú lo luzá'agaquië' tuë' ia'tué' bönni' usëda queë', en gula'cu'ë böniga, ate' ta'naba ladxigaquië' nuzxi que na' gunnë' Jesús caní. ²³ Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë. ²⁴ Simón Pedro bulá'a bulu'isë' bönni' ni para inábinë' Jesús nuzxi que na' gunnë' caní.

²⁵ Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

²⁶ Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubísië' yöta xtila na', en bë'ë queë' Judas Iscariote, zxí'inë' tu bönni' lë' Simón. ²⁷ Gudödi gudahuë' Judas yöta xtila na', guyaza Satanás tu xihui' icja ladxida'ahuë'. Ní'irö Jesús rë' lë':

—Lë na' gunu', yöjentë na'a.

²⁸ Biti' ta'yéajni'inë' ia'zica'rë' bönni' usëda queë' rö'ögaquië' tahuë' bizx que na' Jesús gudxë' lë' caní. ²⁹ Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yöxí' le gáguru' laní, o gunnë': Bë' lati' quégaca bönachi yechi'. ³⁰ Cate' budxi gudahuë' Judas yöta xtila na', en ni' naca chí'i dzö'ölö, la' birúajtë'.

Tu xibá cubi

³¹ Cate' chibirúajë' Judas na', ní'irö gunnë' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios. ³² Channö ilá' lahui yöl-la' zxön queë'

Dios ni'a quia' neda', Zxi'inë', lësca' Lë cazë' Dios gunë' ga ilá' lahui yöl-la' zxön quia' neda', Zxi'inë', en la' guntë' caní. ³³ Libí'ili', zxi'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-në' bönni' judío, lësca' rea' libí'ili' na'a: Ga na' tseja' neda', biti' gaca guídali' rácasö queéli'. ³⁴ Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'ali' tuli' ia'tuli'. ³⁵ Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Lc. 22:31-34)

³⁶ Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

³⁷ Pedro rë' Lë':

—Xan, ¿bizx que biti' gaca sá'lena' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

³⁸ Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'aló ca cödxiba' böra, li' tá'bágu'u tsonna luzuí, innó' biti' núnbë'u neda'.

14

Náquië' Jesús nöza tséajlenru' para idxinru' ga zoë' Dios Xuz

¹ Rnnë' Jesús:

—Biti' cö'li' baniga lu icja láchxi'do'oli'. Guli'tséajlë' Dios, en guli'tséajlë' ca' neda'. ² Lu yu'u lidxë' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queéli' ga tsöjsóali'. ³ Channö huayéaja', en tsöjpá'a lataj queéli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsóa' neda', tsöjsóali' ca' libí'ili'. ⁴ Nöz quézili' ga ni' tseja', en núnbë'ëli' ca' nöza.

⁵ Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbë'ëtu' nöza?

⁶ Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ní'a quia' néda'sö gaca nu idxín ga zoë' Dios Xuz. ⁷ La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

⁸ Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

⁹ Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu"?

¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'ilena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. ¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. ¹² Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntëro ca' gunë' bönni' na' tu' huöja' ga zoë' Dios Xuz. ¹³ Yúgu'të le inábili' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxi'inë', yöl-la' zxön queë' Dios Xuz. ¹⁴ Bítitës bi inábali', en ugunli' dxin La' neda', neda' guna' le.

Jesús isöl-lë'ë Dios Bö' Lá'ayi, para idisóalenë' bönachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isöl-lë'ë queéli' Nu yúbölö Nu gácalen libí'ili', Nu utipa ládxi'li', en sóalenta'sö libí'ili'. Nu ni naca Dios Bö' Lá'ayi, Nu ruí' didza' idútë li. ¹⁷ Biti' gaca ulu'zí' bönachi yödzölió ni xibé' Lë', tu' cabí gaca ila'lé'e Lë', en biti' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'. ¹⁸ Biti' ucá'ana' libí'ili' ca yugu' bi'i uzëbido'. Huöda' udusóalena' libí'ili'. ¹⁹ Ia'tú chí'ido'osö bítirö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irö cate' Dios Bö' Lá'ayi na' idisóalenë' libí'ili', inöz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. ²¹ Nu bönni' rizí' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en uluí' lahua' lahuë'.

²² Judas rë' lë', pero calëga Judas Iscariote, rnnë':

—Xan, ¿naxi caz gaca uluí' lo' lotu' netu', en biti' uluí' lo' lógaca bönachi yödzölió?

²³ Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'. ²⁴ Bönni' na' biti' nadxí'inë' neda' biti' runë' ca rnna xtídza'a. Didza' na' biyönili' bë'a neda', calëgasö quia' na', pero naca queë' Dios Xuz nasöl-lë'ë neda'.

²⁵ 'Rë caza' libí'ili' yugu' lë ni tsanni ni zóalena' libí'ili', ²⁶ pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isöl-lë'ë Lë' queéli' tu' ugunli' dxin La' neda'. Usédinë' libí'ili' yúgu'të, en usë'ë ládxi'li' ca naca yúgu'të didza' na' chigudxa' libí'ili'.

²⁷ 'Rucá'ana' queéli' le cuéqui dxi ládxi'li'. Runna' queéli' yöl-la' rö'ö dxi ládxi' quia'. Yöl-la' rö'ö dxi ládxi' na' runna' queéli' biti' naca ca le tunna queéli' bönachi yödzölió ni. Biti' ichixi icja ládxi'do'oli', en biti' gadxi idzöbili'. ²⁸ Chibiyönili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayëpisëtërë' Dios Xuz ca neda'. ²⁹ Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

³⁰⁻³¹ 'Bítirö gü'ílena' libí'ili' didza' zían, tu' za' tu' xihui', nu rinná be'e bönachi yödzölió ni. Sal-la' biti' bi dë lu në'e bi gun quia' neda', ral-la' gaca caní para iléquibe'e bönachi yödzölió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chi'ë lubá na'. ² Ugüë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. ³ Libí'ili' chinácali' dxi'a ni'a que didza' na' chibë'lena' libí'ili'. ⁴ Guli'dá'tica'sö neda', ca na' neda' dá'tica'sa' ca' libí'ili'. Ca naca que ni'a në'e lubá na', biti' gaca bi cuía rácasö que, channö cabí dá'tica'sö lubá na', lësca' caní naca queéli', biti' bi gaca gunlí' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alenli' neda', biti' bi gaca gunli'. ⁶ Nu bönni' biti'

dá'tica'së neda', gaca queë' ca raca quégaca ni'a në'e lubá na' biti' nácagaca dxí'a, ta'ru'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí', ate' tséguigaca.

7 'Channö tá'tica'sili' neda', en gunli' ca rna xtídza'a, huáca inábali' bi guë'ënili', ate' neda' guna' lë na' inábali'. 8 Gunli' bal Xuza' Dios cate' gunli' xichinë', ate' gácali' ca ni'a në'e lubá na' ta'bía, en caní gaca bë' nácali' idú bönni' ta'dë'ë neda'. 9 Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'. 10 Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza ládxe'ë Lë', Bönni' na' nadxí'inë' neda'.

11 'Yugu' didza' ni rea' libí'ili' para udzëjalenli' tsözxön neda', en gaca idú ca na' udzëjali'. 12 Lë ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'. 13 Biti' gaca idxí'irönë' nu bönni' luzë'ë ca nu bönni' udödë' yöl-la' na'bán queë', gátie' para gácalenë' yugu'böchi' luzë'ë tu' nadxí'inë' légaquië'. 14 Libí'ili' nácali' böchi' luzá'a channö gunli' ca na' chigudxa' libí'ili' gunli'. 15 Bítirö innía' queëli' nácali' huen dxin quia', tu' cabi nözinë' bönni' huen dxin naca gunë' xanë'. Neda' chigunnía' queëli' nácali' böchi' luzá'a, tu' chibena' ga nözili' yúgu'të le chigudxë' Xuza' neda' guna'. 16 Calëga libí'ili' guröli' neda', pero neda' gurö caza' libí'ili', en buzóa' libí'ili' para tsëajli' bi tsöjenli', ca na' tun ni'a në'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunnë' queëli' yúgu'të le inábali' Lë', en ugunli' dxin La' neda'. 17 Lë ni naca le rea' libí'ili' gunli': Guli'dxí'i luzá'ali' tuli' ia'tuli'.

Bönachi yödzülió tu'zóa tsölá'alö Jesús, en nupa dá'gaca Lë'

18 Gunnë' ca' Jesús:

—Channö bönachi yödzülió ni tu'zóa libí'ili' tsölá'alö, nözili' chibulu'zöë' neda' tsölá'alö zí'alö ca tu'zöë' libí'ili' tsölá'alö na'a. 19 La'tu' nácali' tuz len bönachi yödzülió ni, hualá'dxí'i bönachi yödzülió ni libí'ili' ca na' ta'dxí'i luzë'eguequi, pero tu'zóa bönachi yödzülió ni libí'ili' tsölá'alö tu' cabi nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödzülió ni. 20 Guli'tsöjné didza' na' chigudxa' libí'ili', gunnía': Biti' nayëpisëtëre' nu bönni' huen dxin ca xanë'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacuá' nupa tun ca rna xtídza'a, ilún ca' ca rna xtídza'li' libí'ili'. 21 Yúgu'të lë ni ilún bönachi queëli' tu' dá'ali' neda', tu' cabi núnbë'gaca Dios Xuz nasöl-lë'ë neda'.

22 'La'tu' cabi bida', en la'tu' cabi bë'lëna' légaquië' didza', biti' ila'báguë'ë dul-la', pero na'a tu' bida' ni, biti' bi gaca ila'nnë' que dul-la' nabága'gaquië' le ubéaj légaquië' dxí'a. 23 Nu bönni' ruzóë' neda' tsölá'alö, ruzóë' ca' Xuza' Dios tsölá'alö. 24 La'tu' cabi bena' yugu' yöl-la' huáca ga nacu'ë, yugu' le cuntu nu ben ca gulaca, biti' ila'báguë'ë dul-la'. Na'a, bila'lë'enë' yugu' lë na' bena', ate' tu'zöë' neda' tsölá'alö, en tu'zöë' ca' Xuza' tsölá'alö. 25 Caní raca, para gaca ca rna xtídzë'ë Dios, le nazí' lu ná'agaquië', le rna: Tu'zöë' neda' tsölá'alö, en biti' zóa bizx que.

26 'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' ládxi'li'. Isöl-la'a Bönni' na' queëli' uláz queë' Dios Xuz, ate' gunë' ba nalí quia' neda'. 27 Libí'ili' ca' gunli' ba nalí quia', tu' zóalen cázali' neda' tsözxön dza ni'te.

16

1 Gunnë' ca' Jesús:

—Yugu' didza' ni chigudxa' libí'ili', para cabí gaca chopa ládxi'li'. ² Yugu' bönni' judío ulu'béajë' libí'ili' tsaz ga tu'dubë' tu'sedë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'. ³ Caní ilunë', tu' cabí núnbë'gaquië' Dios Xuz, en cabí núnbë'gaquië' neda'. ⁴ Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

Le gunë' Dios Bö' Lá'ayi

Gunnë' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'. ⁵ Na'a huöja', tsöjsóalena'-në' Dios Xuz, nasöl-lë'ë neda'. Biti' inábili' neda' nituli' libí'ili', biti' innali': ¿Gazxi tseju'? ⁶ Na'a, tu' rea' libí'ili' yugu' didza' ni, risëbi ládxi'li'. ⁷ Neda' rea' libí'ili' le naca idútë li. Gácarö dxi'a queëli' huöja', tu' channö cabí huöja', biti' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isöl-la'a-në', na' idisóalenë' libí'ili'. ⁸ Cate' guidë' Lë', gunë' ga iléquibe'e bönachi yödzölió ni nabága'gaca dul-la', en biti' núnbë'gaca le naca tsahui', ate' ichúguië' Dios quéguequi ilátigaca. ⁹ Nabága'gaquië' dul-la' tu' cabí ta'yéajlë'ë neda'. ¹⁰ Biti' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bíti'rö ila'lé'enë' neda'. ¹¹ Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

¹² Ia'zica' zían didza' rë'ënda' güf'ilena' libí'ili', pero biti' gaca tséajni'ili' na'a.

¹³ Cate' guidë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca. ¹⁴ Lë' gunë' neda' bal, tu' si'ë le nequi quia', en gunë' ga inözili' le. ¹⁵ Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

Yöl-la' risëbi ladxí' queëli' huöáca yöl-la' rudzeja

¹⁶ Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

¹⁷ Ní'irö bönni' usëda queë' gulé luzá'agaquië' tuë' ia'tué', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz."

¹⁸ Ní'irö gula'nnë':

—¿Bizxi caz rë'ëni inná didza' ni, gunné': "Ia'tú chí'ido'osö"? Biti' réajni'itu' didza' ni ru'ë.

¹⁹ Réquibe'enë' Jesús té'ënnë' ila'nábinë' Lë', ate' rë' légaquië':

—¿Naru' rinábítsö luzá'ali' ca naca que didza' na' bë'a, gunnía': Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda'?

²⁰ Le nácatë rea' libí'ili': Cödxili', en isëbi ládxi'li', yöl-la' risëbi ladxí' queëli' huöáca yöl-la' rudzeja cate' ulé'eli' neda'. ²¹ Tu nigula cate' chizóa gáljabi' bí'ido' queënu, riguí' rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bíti'rö röjnenu lë na' butságanu, tu' rudzéjanu tu' chigúlajbi' tubi' bi'i bönni'do' yödzölió ni. ²² Lësca' caní raza queëli', risëbi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' biti' séqui'në' nu bönni' ugúë' yöl-la' rudzeja queëli' na'.

²³ 'Dza ní'irö biti' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunné' queëli'. ²⁴ Ga ridxintë na'a dza

biti' rugunli' dxin La' neda' cate' bi rinábili'-nē' Dios Xuz. Guli'naba caní, ate' idéli'li' lē na' inábali', para gaca idú yöl-la' rudzeja queéli'.

Ridéli'nē' Jesucristo lu le raca yödzölió ni

²⁵ Gunnē' ca' Jesús:

—Yugu' lē na' chibé'lena' libí'ili' didza' bucúdzu'a didza'. Huadxín dza cate' bíti'rö güí'ilena' libí'ili' didza' le rucúdzu'a didza', pero yálajdo' güí'ilena' libí'ili' didza' ca naca queē' Dios Xuz. ²⁶⁻²⁷ Dza na' inábili'-nē' Dios, en ugunli' dxin La' neda', ate' rea' libí'ili', biti' gun bayudxi gáta'yua' lahuē' Dios Xuz uláz queéli', tu' nadxí'inē' Lē cazē' Dios Xuz libí'ili'. Nadxí'inē' libí'ili' tu' nadxí'ili' neda', en réajlē'ēli' birúaja' ga zoē' Dios. ²⁸ Birúaja' ga zoē' Dios Xuz, en bidxina' yödzölió ni. Ía'tú ca', ucá'ana' yödzölió ni, ate' huöja' ga zoē' Dios Xuz.

²⁹ Ní'irö yugu' bönni' usēda queē' gulé' Lē, ta'nnē':

—Na'a ru'u didza' yálajdo', en bíti'rö rucúdzu'u didza'. ³⁰ Na'a réquibe'etu' nöz quézinu' Li' yúgu'tē, en biti' run bayudxi nu bi inabi yudxi Li', tu' riguixjöi'ínu' netu' le si' inábatu'. Que lē ni na' réajlē'ētu' birúaju' ga zoē' Dios.

³¹ Bubi'ē didza' Jesús, rē' légaquiē':

—¿Naru' réajlē'tsali' neda' na'a? ³² Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero biti' soa' tuza', tu' zóalen cazē' Dios Xuz neda'. ³³ Yugu' didza' ni chigudxa' libí'ili' para cuéqui dxi lādxi'li', tu' nácali' quia' neda'. Lu yödzölió ni gaca queéli' le usaca' zi' libí'ili', pero buli'tipa lādxi'li'. Neda' chibidéli'da' lu le raca yödzölió ni.

17

Jesús rinábinē' Dios gácalenē' nupa dá'gaca Lē'

¹ Cate' budxi bē'ē Jesús yugu' didza' ni, guchisa lahuē', ruyüē' yehua' yubälö, ate' rnnē':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'. ² Ben caní tu' chinudödu' lu na'a yöl-la' unná bē' para inná bé'eda' yúgu'tē bönachi, en gu'a yöl-la' na'bán idú quégaca yúgu'tē nupa na' chibennu' quia'. ³ Lē ni naca yöl-la' na'bán idú na', tu' núnbē'gaquiē' Li', nacu' la's dui Dios idú, en tu' núnbē'gaquiē' ca' neda', Jesucristo, ate' Li' nasöl-lu'u neda'.

⁴ Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

⁶ Chibulu'a lahui le nacu' Li' lógaquiē' bönni' ni bennu' quia', nupa na' gurö cazu' Li' lada'j bönachi yödzölió. Gulé'quinē' bönni' ni quiu', ate' bēnnagacu'-nē' quia', ate' tunē' ca rnna xtídzu'u. ⁷ Na'a nözguequinē' yúgu'tē lē na' bennu' quia' zá'gaca lu no'o Li', ⁸ tu' chibudöda' lu ná'agaquiē' didza' na' budödu' Li' lu na'a neda', ate' légaquiē' nazí' lu ná'agaquiē' le, en téquibe'enē' birúaja' ga zu' Li', ate' ta'yéajlē'ē Li' nasöl-lu'u neda'.

⁹ Neda' ráta'yua' Lo' gácalenu' légaquiē'. Ráta'yua' Lo', calēga gácalenu' yúgu'tē bönachi yödzölió, pero gácalengacu'-nē' bönni' ni chibēnnagacu'-nē' quia', tu' néquiguequinē' quiu'. ¹⁰ Yúgu'tē nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca ná'cagaca nupa na' rulu'í lahui yöl-la' zxön quia'.

¹¹ Na'a, bíti'rö ugá'ana' yödzölió ni, pero yugu' bönni' ni ulu'gá'anē' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rē'u tuz. ¹² Cate' ni

guzóalena' légaquië' yödzülió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzë' bönni' na' náquië' ca zxi'ini tu' xihui', en narugu queë' gátië' tsaz. Caní raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzülió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquië' xtídz'u, ate' bönachi yödzülió ni tu'zóa légaquië' tsölá'aló tu' cabí nácagaquië' tuz len léguequi, ca na' naca quia' neda', bití' naca' tuz len bönachi yödzülió ni. ¹⁵ Ráta'yua' Lo', calëga cúagacu'-në' yödzülió ni, pero gun chí'igacu'-në', para cabí ila'dzunë' lu na' tu' xihui'. ¹⁶ Bití' nácagaquië' tuz len bönachi yödzülió ni ca na' naca quia' neda', bití' naca' tuz len bönachi yödzülió. ¹⁷ Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. ¹⁸ Ca na' benu' Li', gusöl-lu'u neda' ladaj bönachi yödzülió ni, lësca' caní runa' neda', risöl-la'gaca'-në' ladaj bönachi yödzülió. ¹⁹ Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

²⁰ 'Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. ²¹ Ráta'yua' Lo' gunu' ga ilácagaquië' tuz yúgu'të', en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zíca'rö bönachi yödzülió ni, Li' caz gusöl-lu'u neda'. ²² Yöl-la' zxon na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. ²³ Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquite'e ia'zíca'rö bönachi yödzülió ni, Li' caz gusöl-lu'u neda', ate' nadxí'igacanu'-në' ca na' nadxí'inu' neda'.

²⁴ 'Xúza'do', rë'ënda' ila'cuá'lenë' neda' bönni' ni bénnagacu'-në' quia' ga na' tsöjsóa', para ila'lé'enë' yöl-la' zxon na' bennu' quia' dza ni'te cate' si' gunu' yödzülió tu' nadxí'inu' neda'. ²⁵ Xuza' tsahui', bönachi yödzülió ni bití' núnbë'gaca Li', pero neda' núnbë' caza' Li', ate' yugu' bönni' ni chinóziguequinë' Li' caz gusöl-lu'u neda'. ²⁶ Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadxí'inu' Li' neda', lësca' caní ila'dxí'i luzá'agaquië', ate' gaca caza' tuz len légaquië'.

18

Ta'zönë' Jesús

(Mt. 26:47-56; Mr. 14:43-50; Lc. 22:47-53)

¹ Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. ² Lësca' Judas, bönni' na' udödë' Jesús, núnbë'ë la'yëla na', tu' butubë' Jesús yugu' bönni' usëda queë' ni' zían luzuí. ³ Ní'irö guchë'ë Judas tu' cö' bönni' röjáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yöjáquië' ga ni' zoë' Jesús, nuá'agaquië' yugu' guí' yöri, en yugu' le tu'dí'inë'. ⁴ Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljali'?

⁵ Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. ⁶ Cate' Jesús gudxë' légaquië': "Neda' caz", ní'irö bulu'biguë'ë cusi zxanlö, en gula'dzö'ë lu yu. ⁷ Jesús gunábinë' légaquië' leyúbölö, rnnë':

—¿Nuzxi riguíljalí'?

Të' Lë':

—Jesús, bönni' Nazaret, riguíljatu'-në'.

⁸ Ní'irö bubi'ë didza' Jesús, rnnë':

—Chigúdxá' libí'ili': Neda' caz. Channö riguíljalí' neda', guli'güi'-gáquië' lataj tsöjhuöjgaquië' bönni' ni.

⁹ Caní gunné' Jesús para idxín didza' na' bë'ë, gunné': "Nupa ni bennu' quia', nitúë' bití' bunítia'-në'." ¹⁰ Ní'irö, tu' nu'ë Simón Pedro tu guié' tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguie' guídi náguie' ibëla bönni' na'. ¹¹ Ní'irö Jesús rë' Pedro na':

—Bugú'u guie' tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' röjáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúguie' Lë'. ¹³ Ní'irö gula'ché'ë Lë' zí'alö lahuë' Anás, tu' náquië' xto' zxi'inë' Caifás, bönni' náquië' bixúz lo iz na'. ¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátie' tuzë' bönni', en calëga initi idútë yödzo quégaquië'.

Rnnë' Pedro: "Bití' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'túë' bönni' usëda queë' Jesús yöjáquië' cúdzu'lë' Lë', söjnógaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'. ¹⁶ Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bë'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a. ¹⁷ Ní'irö nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquiagaquië' guí', ate' zuíguequinë' ra' guí' na', en tu'tsë'e cuíngaquië'. Lë'sca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irö gunabi yúdxinë' bixúz lo Jesús para inözinë' nupxi dá'gaca Lë', en nacxi naca le rusedinë' Jesús bönachi. ²⁰ Bubi'ë didza' Jesús, rë' lë':

—Lahui' lo bë'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en bití' bi didza' bë'a bagáchi'sö. ²¹ ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lëna' léguequi. Nözguequi quézinë' bönni' na' didza' na' bë'lëna' légaquië'.

²² Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

²³ Bubi'ë didza' Jesús, rë' lë':

—Channö bití' gunnía' dxi'a, gudixjö' bízxilö didza' bë'a bití' naca dxi'a, en channö guca dxi'a didza' bë'a, ¿bizx que na' gudápu'u neda'?

²⁴ Ní'irö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Bití' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuinë' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

²⁷ Leyúbölö gudá'baguië' Pedro, ate' la' gurödxitëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ní'irö gula'ché'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' bití' gula'yázië' yugu' bönni' judío yúlahui' na', tu téquinë' ila'báguë'ë xíguia' channö ila'yázië' ni', le gun ga bití' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. ²⁹ Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

³⁰ Bulu'bi'ë didza', të' lë':

—La'tu' cabí nu'ë bönni' ni dö', bití' udöditu'-në' lo'.

³¹ Ní'irö Pilato rë' légaquië', rnnë':

—Libí'i cázali' guli'ché'ë, en buli'chi'a buli'sörö Lë' ca rinná bë' xibá queëli'. Yugu' bönni' judío të' lë', ta'nnë':

—Bití' dë lu na'tu' nu gútitu'.

³² Caní guca para idxín xtídzë'ë Jesús, le bë'ë naca ral-la' gátië'. ³³ Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

³⁴ Bubi'ë didza' Jesús, rë' lë':

—¿Naru' rácasö quiu' rnno' caní, o gulë' bönachi li' caní ca naca quia'?

³⁵ Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

³⁶ Ní'irö bubí'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' bití' naca ca ta'nná bë' bönachi yödzölió ni.

³⁷ Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zë náagaca didza' ruá'a.

³⁸ Pilato rë' Lë':

—¿Bizxi na' le naca idútë li?

Ta'chúquië' queë' Jesús gátië'
(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzólida' nu'ë bönni' ni. ³⁹ Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queéli' tuë' bönni' nadzunë'. ¿Rë'enili' usana'-në' queéli' Bönni' Rinná Bé'enë' Bönachi Judío?

⁴⁰ Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

¹ Ní'irö Pilato guchë'ë Jesús, en benë' ga gula'guínë' yugu' bönni' röjáquië' gudil-la Lë'. ² Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë. ³ Ní'irö gula'biguë'ë lahuë' Jesús, en të' Lë':

—¿Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

⁴ Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' bití' bi rudzólida' le naca dö' nu'ë bönni' ni.

⁵ Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¿Budë'ë lë'e yaga cruz! ¿Budë'ë lë'e yaga cruz!

Pilato rë' légaquië':

—Libí'i cázali' guli'chë'ë, en guli'tsöjdë'ë lë'e yaga cruz. Neda' bití' bi dö' budzólida' nu'ë bönni' ni.

⁷ Ní'irö bönni' judío na' të' lë':

—Dë queëtu' tu xibá, ate' rinná bë' xibá queëtu' na' ral-la' gátië' bönni' ni tu' gunné' náquië' Zxí'inë' Dios.

⁸ Cate' biyönnë' Pilato didza' ni, gúdxirönë'. ⁹ Leyúbölö buázië' yúlalui' na', en rë' Jesús:

—¿Gázxitë bönni' Li'?

Bití' bi didza' bubí'ë Jesús.

¹⁰ Ní'irö Pilato rë' Lë':

—¿Naru' cabí ubí'itso' didza', quíxjöi'inu' neda'? ¿Naru' cabí nözinu' dë lu na'a udá'a Li' lë'e yaga cruz, en dë lu na'a usana' Li'?

¹¹ Bubí'ë didza' Jesús, rë' lë':

—Bití' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca lí'.

¹² La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, bití' ridzagu'-në' dxi'a César, bönni' rinná bé'enë' iduté yödzólió. Nu bönni' run cuinë' bönni' rinná bë'ë, ridá'báguë'ë César na'.

¹³ Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lö'a Ga Zxóagaca Guiöjta'a, en ca naca didza' hebreo nazí'i le Gabata. ¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

¹⁵ Gulu'ë zidzaj didza', ta'nnë':

—¡Bétië'! ¡Bétië'! ¡Budë'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

¹⁶ Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélé'ë Jesús, en gula'ché'ë Lë' ní'lö.

Tu'dë'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajë' Jesús ni', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. ¹⁸ Bulu'dë'ë Jesús lë'e yaga cruz ni', ate' bulu'dá'lenë' Lë' tsözxön lë'egaca yaga cruz ia'chopë' bönni'. Tsölá'a huéaj ta'dë'ë, ate' Jesús dë'ë gatsaj láhui'lö chopë' bönni' na'. ¹⁹ Gusöl-lë'ë Pilato tu bönni' nu'ë le buzúajë' lu guichi le buzöë' lë'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." ²⁰ Bulu'labë' zían bönni' judío didza' ni, tu' zoa ga na' bulu'dë'ë Jesús lë'e yaga cruz gála'sö ra' yödzö, ate' didza' na' nuzúajë' len didza' hebreo, en len didza' griego, en len didza' latín. ²¹ Yugu' bixúz unná bë' quégaquië' bönni' judío të' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné': Inná bé'eda' bönni' judío."

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' röjáquië' gudil-la budxi bulu'dë'ë Jesús lë'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélé'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba. ²⁴ Ní'irö yugu' bönni' na' röjáquië' gudil-la gulé luzá'agaquië' tuë' ia'tué', ta'nnë':

—Biti' ichúguru' le, pero dxí'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísië' que queégaquië' lari' nacuá', en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

²⁵ Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz.

²⁶ Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxí'inu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dē ni' tu zxiga' yudzu nupi zi. Ní'irō yugu' bōnni' na' rōjáquiē' gudil-la bulu'gui'jē' nupi zi na' tu le bululu rixxupi nisa, ate' bulu'zōē' le tu lahui gui, en bulu'dē'ē le ru'ē Jesús para xupē'. ³⁰ Budxi gu'ē Jesús nupi zi na', gunné':

—Chinácatē.

Ní'irō buzōtaj icjē'. Burúajtē bö' naca cazē', gútiē'.

Tu bōnni' reajē' gudil-la runē'ē yaga tuchi' cuita lē'ē Jesús

³¹ Ní'irō, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lē'egaca yaga cruz cate' naca dza lá'ayi quégaquiē', le naca tu dza lá'ayi zxōntē, que lē ni na' yugu' bōnni' judío guláta'yuē' lahuē' Pilato guiē' bōnni' rōjáquiē' gudil-la tsōjtítsjagaquiē' xiguíchjagaquiē' bōnni' dá'gaquiē' lē'egaca yaga cruz, en ulu'zōtjē' légaquiē' lē'egaca yaga cruz na'. ³² Que lē ni na' gula'biguē'ē bōnni' rōjáquiē' gudil-la, ate' gula'guítsjē' xiguichjē' bōnni' zí'alō, en lē'sca' caní gulunē' queē' ia'túē' bōnni' na' dá'lenē' Jesús lē'e yaga cruz. ³³ Cate' bila'dxinē' ga na' dē'ē Jesús, en bila'lē'enē' chinátiē', bití' gula'guítsjē' xiguichjē'.

³⁴ Ní'irō tuē' bōnni' na' reajē' gudil-la bunē'ē yaga tuchi' cuita lē'ē Jesús, ate' la' birúajtē rōn, en nisa. ³⁵ Neda', Juan, bilé'eda' lē ni, en runa' ba nalí que, ate' le runa' ba nalí naca idútē li. Nōz quézida' ruá'a didza' idútē li, para tséajlē'ēli' ca' libí'ili' ca naca queē' Jesús. ³⁶ Gulaca yugu' lē ni para budxín le nazúaj lu guichi lá'ayi, le rnna: “Bití' gatsaj nitú dxita yu'ē.” ³⁷ Ia'tú le nazúaj ca' lu guichi rnna caní: “Ulu'yúē' bōnni' na' bulu'nē'ē lē' yaga tuchi'.”

Tu'cáché'ē Jesús

(Mt. 27:57-61; Mr. 15:42-47; Lc. 23:50-56)

³⁸ Gudōdi guca yúgu'tē lē ni, guyijē' José, bōnni' yōdzō Arimatea, bōnni' dē'ē Jesús, pero bagáchi'sō tu' rádxinē' yugu' bōnni' judío unná bē', ate' gunábinē' Pilato gu'ē lē' lataj u'ē Jesús. Pilato bē'ē lē' lataj. Ní'irō bidxinē' José ga na' dē'ē Jesús lē'e yaga cruz, ate' bu'ē Lē'. ³⁹ Lē'sca' bidxinē' Nicodemo ni', bōnni' na' guyijē' zí'alō yōjyúē' Jesús chi'i dzō'ölō, nu'ē tu le nutsí'i nōri silá' que mirra, en tu le rilá' zxixi, le naca ca tu gayuá' guiē'. ⁴⁰ Ní'irō José, en Nicodemo na' gula'guélē'ē Jesús, en bulu'chōlinē' Lē' yugu' lári'do', ate' gula'gu'ē láhuilō lē na' nutsí'i nōri silá' que mirra, en le rilá' zxixi. Gulunē' ca nalébiguequinē' tunē' bōnni' judío cate' tu'cáché'ē tu bōnni' nati. ⁴¹ Gala' ga na' bulu'dē'ē Jesús lē'e yaga cruz dē tu luyú ga zeaj da' yaga olivo, ate' gatsaj láhui'lō lataj na' zoa tu yeru ba cubi le nadaj lē'e guí'a guiōj, yeru ba na' cuntu nu ta'güí'inē'. ⁴² Lu yeru ba na' gula'gu'ē Jesús tu' dē gála'sō yeru ba na', en tu' naca dza tu'pē'ē bōnni' judío que Laní Pascua.

20

Rubanē' Jesús lu yōl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiōjta'a na' busayaj ga nu riyaza yeru ba na'. ² Ní'irō bōajnu carelō ga zoē' Simón Pedro, dzáguiē' lē' ia'túē' bōnni' usēda, bōnni' na' Jesús nadxí'inē' lē', ate' rēnu légaquiē':

—Bulu'béajē' Xanru' yeru ba ni', en bití' nōztu' gazxi gula'gu'ē Lē'.

³ Ní'irō bila'rúajē' Pedro, en ia'túē' bōnni' usēda na', sōjáquiē' ra' yeru ba na'. ⁴ Tsōzxōn ta'xítí'ē iropē', pero ia'túē' bōnni' usēda na' guxítí'rē' carelō ca Pedro, ate' zí'alō lē' bidxinē' ra' yeru ba na'. ⁵ Biyéchuē', en buyúē' lu yeru ba na', ate' bilé'enē' yugu' lári'do' na' bila'rōli-nē' Jesús, nacuá' ni', pero bití' guyáziē' yeru ba na'. ⁶ Ní'irō bidxinē' Simón Pedro cúdzu'lē' ia'túē' bōnni' usēda

na', ate' guyázië' lë' yeru ba na', en bilé'enë' lári'do' na' nacua' ni'. ⁷ Lësca' bilé'enë' lári'do' na' gula'xóë' icjë' Jesús, bití' dëlen ia'zica'rö lári'do' na', pero tsölá'alö nudubi quez. ⁸ Ní'irö guyázië' ca' ia'túë' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. ⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. ¹⁰ Ní'irö iropë' bönni' usëda na' yöjhuöjgaquië' lídxigaquië'.

Rulu'i lahuë' Jesús lonu María Magdalena
(Mr. 16:9-11)

¹¹ Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'. ¹² Bilé'enu chopë' gubáz lá'ayi queë' Dios ni', nácugaquië' lari' chiguichi. Rö'ögaquië' ni', tuë' ícjälö ba na', en ia'túë' xiní'alö ba na' ga ni' gula'gu'ë Jesús. ¹³ Yugu' gubáz lá'ayi na' të' lënu, ta'nnë':
—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en bití' nözda' gazxi gula'gu'ë Lë'.

¹⁴ Cate' budxi gunnãnu caní, buécjanu, en bilé'enu-në' Jesús, zoë' ni', pero bití' réquibe'enu Jesús na'. ¹⁵ Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chi'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

¹⁶ Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

¹⁷ Jesús rë'ë-nu:

—Bití' canu' neda', tu' cabí ruhuëpinida' ga zoë' Xuza'. Na'a, guyéaj ga nacué böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

¹⁸ Ní'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

Rulu'i lahuë' Jesús lógaquië' bönni' usëda queë'
(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacué tu' tádxinë' bönni' judío unná bë'. Ní'irö bulu'i lahuë' Jesús gatsaj láhui'lö ga na' nacué, en rë' légaquië':

—Guli'zóa dxi lãdxi'li'.

²⁰ Cate' budxi gudxë' légaquië' didza' ni, bulu'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'. ²¹ Ní'irö Jesús rë' légaquië' leyúbölö, rnnë':

—Guli'zóa dxi lãdxi'li'. Ca benë' Xuza', gusöl-lë'ë neda', lësca' caní risöl-la'a libí'ili' tsöjenlí' xichina'.

²² Cate' budxi gunnë' caní, bulubë' lógaquië', en rë' légaquië':

—Guli'sí' Dios Bö' Lá'ayi. ²³ Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu bití' uniti loli' le, ugá'ana dul-la' que nu na' nun dul-la'.

Bití' réajlë'ë Tomás

²⁴ Tomás biti' zóalenë' légaquië' cate' Jesús buduyúë' légaquië'. Náquië' Tomás tuë' bönni' chínnuë' ni', en tu'ë ca' lë' Bönni' Bilidi'. ²⁵ Gudödi ni' ia'zica'rë' bönni' usëda na' gulë' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunné' bididaj, en unë'a xibõn na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', biti' ca' tséajlë'a.

²⁶ Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, buluí'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁷ Ní'irö Jesús rë' Tomás na':

—Bunë' xibõn no'o ni, en buyú na'a ni. Bunë' no'o cuita lë'a ni, en bíti'rö gaca chopá ládxi'u, pero guyéajlë' neda'.

²⁸ Ní'irö bubí'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' biti' ila'lé'eni neda'.

Le rë'ëni gun didza' nazúaj lu guichi ni

³⁰ Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë' ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

21

Rulu'i lahuë' Jesús lógaquië' gadxë' bönni' usëda queë'

¹ Gudödi guca lë' ni, leyúbölö buluí'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluí'i lahuë' lógaquië'.

² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia' chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia'zica'rë', ta'nnë':

—Guntu' li' tsözxön.

Ní'irö yöjáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'. ⁴ Cate' chizá' rení', yöjsóë' Jesús luyú ra' nisa na', pero biti' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

⁶ Ní'irö Jesús rë' légaquië':

—Guli'chílaj yöxaj böla queëli' tsölá'a ibëla barco, ate' söngacali'-ba'.

Ní'irö gula'chiljë' le, ate' bíti'rö guca ulu'béajë' le, tu' naguíraba' böla lë'e yöxaj böla na'. ⁷ Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagúë' le zí'alö, ate' guyázië' lu nisa. ⁸ Bila'dxinë' ia'zica'rë' bönni' usëda na', tu'së'ë barco na', suná'ayöjgaquië' yöxaj ga na' dzö'öba' böla, tu' cabí naca zí'tu' ga dë luyú bidxi. Nácatë ca tu gayuá' löga' ní'aru'. ⁹ Cate' bila'dxinë' luyú bidxi na',

bila'lé'enē' rō'ō tu guí' bo' yalaj ni', en zxóaba' tuba' böla láhuilö, en dē ca' yōta ni'. ¹⁰ Jesús rē' légaquiē':

—Guli'diguá'a-ba' ni böla na' si' guzxōngacali'-ba'.

¹¹ Gurenē' Pedro lē'e barco na', ate' gú'uyōjē' yōxaj na' zaca' luyú bidxi, nalíró-ba' böla zxōn, idú tu gayuá' yu' chí'inu-unba'. Sal-la' nácagacaba' böla zían, bití' birōza' yōxaj na'. ¹² Ní'irō Jesús rē' légaquiē':

—Guli'dá gáguli'.

Bití' burúguinē' nitüē' bönni' usēda queē' na' inábinē' Lē', innē': “¿Nuzxi Li'?” Nözguequi quézinē' náquiē' Xanru'. ¹³ Ní'irō gubígui'ē Jesús, en gudélé'ē yōta na', enca' böla na', ate' bē'ē quégaquiē'.

¹⁴ Lē ni naca le bunni luzuí bulu'i lahuē' Jesús lógaquiē' bönni' usēda queē' gudödi bubanē' lu yöl-la' guti.

Jesús ru'ilenē' Simón Pedro didza'

¹⁵ Cate' budxi gulahuē', Jesús rē' Simón Pedro:

—Simón, zxi'inē' Jonás, ¿naru' nadxí'irönu' neda' ca nadxí'iguequinē' bönni' ni neda'?

Bubi'ē didza' Pedro, rē' Lē':

—Ön, Xan. Li' nöz quézinu' raza ládxa'a Li'.

Jesús rē' lē':

—Bugagu yugu' bö'cu' zxíla'do' quia'.

¹⁶ Jesús rē' lē' le buropi luzuí, rnnē':

—Simón, zxi'inē' Jonás, ¿naru' nadxí'inu' neda'?

Bubi'ē didza' Pedro, rē' Lē':

—Ön, Xan. Li' nöz quézinu' raza ládxa'a Li'.

Jesús rē' lē':

—Bugagu yugu' bö'cu' zxíla' quia'.

¹⁷ Jesús rē' lē' le bunni luzuí:

—Simón, zxi'inē' Jonás, ¿raza ládxa'u neda'?

Buí'innē' Pedro tu' le chibunni luzuí rinabi yúdxinē' lē', gunné': “¿Raza ládxa'u neda'?” Bubi'ē didza' Pedro, rē' Lē':

—Xan, yúgu'tē nöz quézinu' Li'. Nözínu' raza ládxa'a Li'.

Jesús rē' lē':

—Bugagu yugu' bö'cu' zxíla' quia'. ¹⁸ Le nácate' rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'ö, ate' nu yúbölö ugacu li' lari', en iché' li' ga ni' bití' gué'ennu' tseaju'.

¹⁹ Yugu' didza' ni bē'ē Jesús naca bē' naca gátiē' Pedro, tsöjtē'ē lē'e yaga cruz, para gaca yöl-la' ba queē' Dios. Cate' budxi gunné' caní Jesús, gunné' ca' ia'tú:

—Gudá' neda'.

Ru'ē didza' Jesús ca gaca queē' bönni' usēda na' nadxí'inē'

²⁰ Buécjē' Pedro, en bilé'enē' söjnáhuē' légaquiē' bönni' usēda na' Jesús nadxí'inē' lē'. Náquiē' bönni' usēda na' gurö'ē cuita lē'ē Jesús cate' ni' gulahuē', en gudxē' Jesús: “Xan, ¿nuzxi na' udödi Li'?” ²¹ Cate' Pedro bilé'enē' lē', rē' Jesús:

—Xan, ¿bizxi gunē' bönni' ni?

²² Jesús rē' lē':

—Channö rē'ēnda' ugá'anē' bönni' ni ga idxinrö dza huöda', bití' ral-la' cö'u böniga. Gudá'a neda' li'.

²³ Guzé didza' ni ga nacu'ē böchi'ru' ta'yéajlē'ē Cristo. Téquinē' bití' gátiē' bönni' usēda na'. Jesús bití' gudxē' lē' bití' gátiē', pero caní gunné': “Channö rē'ēnda' ugá'anē' bönni' ni ga idxinrö dza huöda', bití' ral-la' cö'u böniga.”

²⁴Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nõzili' naca idútë li le runa' ba nalí.

²⁵Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxí' lu nĕ'ĕ Dios, isöl-lĕ'ĕ Dios Bö' Lá'ayi

¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ' ² ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' gurö cazĕ'. ³ Gudödi gudí'i guzáquĕ'ĕ Jesús, gútiĕ'. Ní'irö bubanĕ', en buluí'i lahuĕ' lógaquiĕ' gubáz queĕ' na'. Buluí'inĕ' légaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluí'i lahuĕ' lógaquiĕ' idú ca choá' dza, en bĕ'lenĕ' légaquiĕ' didza' ca rinná bĕ'ĕ Dios.

⁴ Cate' ni' nacu'ĕ tsözxön, gunná bé'enĕ' légaquiĕ' cabí ulu'zĕ'ĕ Jerusalén. Jesús gudxĕ' légaquiĕ', rnnĕ':

—Guli'cöz ni' le guzxí' lu nĕ'ĕ Xuza' isöl-lĕ'ĕ queĕli' ca na' chibusiyön quézida' libí'ili'.

⁵ Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕli' le ruluí'i yöl-la' ridila nisa ni, idisóalenĕ' Dios Bö' Lá'ayi libí'ili'.

Ruhuĕpĕ' Jesús yehua' yubá

⁶ Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölö dza ni zóaru' na'a?

⁷ Jesús gudxĕ' légaquiĕ':

—Bití' nequi queĕli' inözili' bizxi dza o bizxi dzö' gunĕ' Dios Xuz le nuzóĕ' lu na' cazĕ'. ⁸ Sí'ili' yöl-la' huáca cate' guídĕ' Dios Bö' Lá'ayi idisóalenĕ' libí'ili'. Ní'irö gunli' ba nalí quia' neda' lu yödzö Jerusalén, en idú luyú Judea, en luyú Samaria, en ga idxíntĕli' idütĕ yödzölió.

⁹ Cate' budxi bĕ'lenĕ' légaquiĕ' didza' ni, tsanni ni' tu'yusĕ' ca' Lĕ', la' buĕpitĕ' xitsá' ga rö'ö tu böaj le bucache' Lĕ', ate' bítí'rö bila'lĕ'enĕ' Lĕ'. ¹⁰ Tsanni ni' tu'yúĕ' lúxibalö cate' ni' buĕpĕ' Jesús, buluí'luí'i lógaquiĕ' chopĕ' gubáz lá'ayi ga na' nacu'ĕ, nácugaquiĕ' lari' chiguíchido'os. ¹¹ Chopĕ' ni' gulĕ' légaquiĕ', ta'nnĕ':

—Bönni' Galilea, ¿bizx que ruyuli' lúxibalö? Lĕ' cazĕ' Jesús ni' si' guzĕ'ĕ ga zóali', buĕpĕ' yehua' yubá, lĕsca' caní huödĕ' leyúbölö ca na' chibilĕ'eli'-nĕ' söhuöjĕ' yehua' yubá.

Ta'böĕ' Matías para tsáziĕ' xilatjĕ' Judas

¹² Ní'irö gula'zĕ'ĕ ga na' rö'ö guí'ado' na' nazí'i le Guí'a Yaga Olivo, ate' yöjhuöjgaquiĕ' Jerusalén. Guí'ado' ni' dĕ' gála'sö ga dĕ' Jerusalén, tsa nazí'gaquiĕ' lataj ta'zĕ'ĕ dza lá'ayi quégaquiĕ'. ¹³ Cate' bulu'dxinĕ' yödzö ni', gula'benĕ' ga naca buropi cuía lu yu'u, ga ni' ta'cu'ĕ Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxi'inĕ' Alfeo, en Simón, bönni' na' ruí'i ládxe'ĕ ladzĕ', en Judas, böchĕ'ĕ Jacobo. ¹⁴ Yúgu'tĕ bönni' ni' tu'lidzĕ' Dios tsözxön, ate' yugu' böchĕ'ĕ Jesús, en María, xinĕ'ĕ Jesús, en ia'zíca'rönu nigula ca' núnagaquiĕ' légaquiĕ' tsözxön.

¹⁵ La' dza ná'asö guzuínĕ' Pedro gatsaj láchui'lö ga nacu'ĕ böchi' luzá'aru' na' ta'yéajlĕ'ĕ Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxĕ' légaquiĕ', rnnĕ':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnë' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús. ¹⁷ Judas na' gubábalenë' rë'u, en bénlenë' rë'u tsözxön dxin ni. ¹⁸ Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë. ¹⁹ Cate' bila'yöni bönachi nacua' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi nazí'i le Salmos, le rnna: Ugá'ana cá'asö lidxë', en biti' idzöli nu soa yu'u na'.

Rnna ca':
Nu yúbölö tsaza xilatjë'.

²¹⁻²² 'Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacua'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. ²⁴ Ní'irö bulu'lidzë' Dios, ta'nnë':

—Xantu' Dios, nunbë' cazu' icja ládxi'do' gaca yúgu'të bönachi. Buluí'i netu' nulë' chopë' ni chigurö cazu' Li' ²⁵ para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítië' xilatjë' tu' benë' dul-la', ate' guyijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

2

Dios Bö' Lá'ayi ridisóalenë' légaquië'

¹ Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo. ² Tsárido'os biyön bö le birúaj lúzxiba, le biyön ca riyön cate' recja bö' budunu', ate' biyön idútë lu yu'u ga na' rö'ögaquië'. ³ Bulu'luí'i lahui yugu' bululu guí'do' lu bö'ös lógaquië', ate' gula'guísi que queëgaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idútë yödzölió ni. ⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të', en bulu'bálinë', ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? ⁸ ¿Nacxi caz naca riyöniru' tu'ë xtídza'ru' ca naca didza' ru'iru' tu turu'? ⁹ Rë'u ni nácaru' bönni' zían yödzö, bönni' narúajgaquië' luyú Partia, en luyú Media, en luyú Elam, en luyú Mesopotamia, en luyú Judea, en luyú Capadocia, en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto, en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. ¹¹ Lësca' nacu'ë ni

yugu' bönni' narúajgaquië' Creta, en luyú Arabia. Riyöniru' tu'ë didza' ruí'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

¹² Caní guca, bulu'báninë yúgu'të', en gula'bö'ë böniga. Gulë luzá'agaquië' tuë' ia'tué', ta'nnë':

—¿Bizxi caz lë ni?

¹³ Bulu'titjë' bal-lë', ta'nnë':

—¡Ta'zúdxinë'!

Libán benë' Pedro lógaca bönachi zían

¹⁴ Ní'irö Pedro guzuílenë' ia'chinéajë' gubáz na' nasöl-lë'ë Cristo, ate' gusi lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacua'ali' yödzö Jerusalén! ¡Lë ni ral-la' inözili'! ¡Bulizé nágali' le guía' libí'ili'! ¹⁵ Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. ¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsétëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

¹⁸ Cate' idxín dza ni' quisia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

¹⁹ Ulu'a lahui lúzxiba xitsá' le ilún ga ulu'bani bönachi,

ate' yödzölió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

²¹ Ulu'lágaca yúgu'të nupa ni' ulu'lidza Lë' Xanru',

lu yöl-la' réajlé' quéguequi Lë'.

²² 'Bulizé nágali' lë ni guía' libí'ili', bönachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu' yöl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinöz quézili'. ²³ Lësca' caní, Dios bë'ë lataj nu budödi Jesús lu ná'ali'. Caní guca, ca na' chigunná ládxë'ë Dios gunë', en ca naca le chibucözë' dza ni'te. Libí'i cázali' guzxönli'-në' Jesús, en bëtili'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. ²⁴ Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'. ²⁵ Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda',

para cabí gaca nu bi gun quia'.

²⁶ Que lë ni na' budzeja ládxa'a,

ate' lu yöl-la' rudzeja quia' bil-la'.

Que lë ni na' guna' löza Lë'

cate' idxín dza gátia'.

²⁷ Xantu' Dios, nözda' biti' ucá'anu' neda'

lataj chul-la ga nacua' nupa nátigaca.

Biti' gu'u lataj initi idütë le naca'.

Naca' bönni' nadxí'i quézinu' Li'.

²⁸ Buzéajni'inu' neda' ca ral-la' guna'
para idéli'da' yöl-la' na'bán idú.

Gunu' ga udzėjada' tu' zóalen cazu' neda'.

²⁹ 'Na'a, libí'ili', böcha'a. Naca bē' gútiē' xuz xtó'oru' David, en bigáchē'ē yeru ba, ate' ba queē' na' dē ga zóaru' ga ridxintē na'a dza. ³⁰ David na' bē'ē didza' uláz queē' Dios, en gunőzinē' benē' tsutsu Dios didza' le guzxí' lu nē'ē queē', gunē' ga galjē' Cristo ladaj di'a dza queē' si' zá'gaca, ate' Cristo na' inná bē'ē xilatjē' David na'. ³¹ Tu' bil'é'enē' David lē ni zí'alō, bē'ē didza' ca guca, bubanē' Cristo, en ca guca, biti' bugá'anē' lataj chul-la ga nacuá' nupa nátigaca, en biti' guniti le naca cazē'. ³² Dios busubanē' Jesús lu yöl-la' guti, ate' ca guca lē ni yúgu'tētu' runtu' ba nalí que. ³³ Caní guca, len yöl-la' huáca queē', Dios buchisē' Lē' xitsá' ga ni' nácatērē' zxon. Na'a, Cristo chigusöl-lē'ē Dios Bö' Lá'ayi ni, ate' raca ca na' guzxí' lu nē'ē Dios gunē' lu nē'ē Cristo, ate' Dios Bö' Lá'ayi na' runē' yugu' lē ni rilé'eli', en riyönili'. ³⁴ Biti' buēpē' David na' yehua' yubá, pero lē cazē' David na' gunnē':

Xanru' Dios gudxē' Xana':

Gurō'i cuita lē'a ibēla ga naca lo

³⁵ cate' gunra' ga ulu'zechu zxíbigaca nupa ta'dá'baga' Li' lo' Li'.

³⁶ 'Na'a, bönachi Israel, ral-la' inőzili' le nácatē. Dios benē' ga náquiē' Lē cazē' Jesús ni Xanru', en Bönni' Rusólá, bönni' na' budá'ali'-nē' lē'e yaga cruz.

³⁷ Cate' yugu' bönni' ni' bila'yönnē' lē ni, gula'bō'ē böniga, ate' gulē' Pedro, en ia'zíca'rē' bönni' gubáz queē' Cristo, ta'nnē':

—Böchi'ru', ¿nacxi gúntsatu'?

³⁸ Ní'irō Pedro gudxē' légaquiē':

—Buli'bí'i ládxi'li', en guli'dila nisa tu tuli' lu Lē' Jesucristo para uniti lahuē' Dios dul-la' nabága'li', ate' Dios Bö' Lá'ayi idisóalenē' libí'ili', Nu na' isöl-lē'ē Dios. ³⁹ Queēli' nequi le guzxí' lu nē'ē Dios, en quégaca zxi'inili', enca' quégaca yúgu'tē bönachi izá'a, yúgu'tē bönni' ni' ulidzē' Xanru' Dios légaquiē'.

⁴⁰ Yugu' didza' ni, en ia'bal-la zían didza' benē' ba nalí Pedro, le guchíziē' icja nágagaquiē', gunnē':

—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'z' lu nē'eguequi didza' na' bē'ē Pedro. Dza na' ca chi uruá' gayuá' bönachi gulún légaquiē' tuz. ⁴² Gulunē' yúgu'tē idútē le bulu'sédinē' gubáz nasöl-lē'ē Cristo légaquiē'. Guláquiē' tuz tuē' len ia'túē', en gulahuē' tsözxön le rusá' ládxi'ru' ca gútiē' Jesús, ate' gulunē' tsözxön, bulu'lidzē' Dios.

Ca tun bönachi queē' Cristo

⁴³ Gulunē' gubáz queē' Cristo zían le run ga rubániru', en zían le taca bē', pero guladxi gula'dzöbi ia'zíca'rō bönachi. ⁴⁴ Yúgu'tē nupa na' ta'yéajlē' Cristo gulaca tuz, ate' bulu'ún tuz yúgu'tē le dē quéguequi. ⁴⁵ Cate' bila'lé'enē' ta'yadzaj nupa nútsa'gaca ladjagaquiē', ní'irō yugu' bönni' bi dē quégaquiē' gulúti'ē le, ate' gula'guísiē' dumí na' que queégaca nupa ni' bi ta'yadzaj. ⁴⁶ Bulu'dubē' tsözxön chila yudo' yugu' dza, ate' gulahuē' le rusá' ládxi'ru' ca gútiē' Xanru'. Caní gulunē' gapa naca lu yu'u lídxigaquiē'. Gulahuē' tsözxön, ate' bulu'dzéjanē', en gulaca idú ládxi'gaquiē'. ⁴⁷ Gula'gu'ē Dios yöl-la' ba, ate' yúgu'tē bönachi gulún légaquiē' bal. Buzanē' Xanru' nupa tu'dubi queē', nupa na' tu'lá tu tu dza.

3

Ruhuóáquiē' tu bönni' biti' raca sē'ē

¹ Tu dza ni' gula'benë' Pedro, en Juan, sôjáquië' tsözxôn lu chila yudo', cate' tu'dubi bönachi tu'lidza Dios ni', le naca idú ridödi xihuö. ² Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza rôjuá'gaquië' lë' ni', en ta'bëquië' lë' ra' yudo' ga nazí'i le Ra' Yu'u Lachi, para inábinë' nu bi unödztasö queë' ladaj nupa ni' ta'yaza lö'a yudo'. ³ Bönni' ni, cate' bilé'enë' Pedro, en Juan, sôjáquië' ta'yázië' lö'a yudo', gúta'yuë' lógaquië' bi ulu'nödztasë' queë'. ⁴ Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵ Ní'irö bönni' na' buzëda' náquië' légaquië' tu' runë' löza bi ulu'nödztasë' queë'. ⁶ Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudëlë'ë Pedro në'ë ibëla bönni' huë' na', en buchisë' lë', ate' la' böacatë ni'ë, en buguitaj bëchaj ni'ë bönni' na'. ⁸ Ní'irö guzuinë' bönni' na', ate' guxíti'ë, en guzë'ë. Guyázalenë' tsözxôn Pedro, en Juan, lö'a yudo', rizë'e ni'ë, en rixíti'ë, en rigü'ë Dios yöl-la' ba. ⁹ Yúgu'të bönachi nacué' ni' ta'lé'e lë' rizë'e ni'ë, en rigü'ë Dios yöl-la' ba. ¹⁰ Caní guca, guládxinë', en bulu'bábinë' ca naca lë' na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unödztasö queë'.

Didza' bë'ë Pedro chila yudo'

¹¹ Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönachi ga na' nacué' chila yudo' nazí'i le: Chila Queë' Salomón, ate' gula'ná' badxë'. ¹² Cate' bilé'enë' Pedro lë' ni, gudxë' bönachi na':

—Libí'ili', bönni' Israel, ¿bizx que rubánili' ca naca lë' ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queëztu', o ni'a que le reaj ládxi'tu'-në' Dios? ¹³ Naca lë' ni le benë' Dios. Náquië' Dios quégaquië' xuz gudödi queëru' Abraham, en Isaac, en Jacob. Lë' cazë' béntë're' bal Jesús, Zxi'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-në'. ¹⁴ Buzóali' tsölá'alö Bönni' Tsahui', en Lá'ayi, ate' gunábili'-në' Pilato usanë' queéli' tu bönni' rútië' bönachi. ¹⁵ Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë' ni runtu' ba nalí que. ¹⁶ Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

¹⁷ 'Na'a, böcha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'. ¹⁸ Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo. ¹⁹ Que lë' ni na', buli'bí'i ládxi'li', en buli'huóáca queë' Dios, para ugüë' dul-la' nabága'li', en gunë' ga huóáca ládxi'li'. ²⁰ Ní'irö isöl-lë'ë leyúbölö Jesús, Bönni' na' buzöë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. ²¹ Na'a, run bayudxi ugá'anë' yehua' yubá ni' cate' idxinrö dza uduhuënë' tsahui' yúgu'të le raca, en gaca ca na' chigunná cazë' Dios, lë' na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. ²² Lësca' caní Moisés gudxë' xuz xtó'oru', gunné': "Xanru' Dios isöl-lë'ë queéli' tu bönni' galjë' ládtagaca di'a dza queéli'. Gáquië' bönni' gu'ë didza' uláz queë' Dios. Isöl-lë'ë Lë' queéli' ca na' gusöl-lë'ë neda'. Run bayudxi uzë' nágali'-në' ca naca yúgu'të le guíë' libí'ili'. ²³ Yúgu'të nupa biti' ulu'zë' nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

²⁴ 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. ²⁵ Libí'ili' nácali' zxi'ini xi'sóagaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui', le bénlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú' ilaca bica' ba yúgu'të bönachi yödzölió." ²⁶ Cate' Dios busubanë' Zxi'inë' lu yöl-la' guti, gusól-lë'ë Lë' zí'alö queëli' para gunë' ga gácali' bica' ba, en ucá'anali' le cabí naca dxi'a runli'.

4

Ta'dxinë' Pedro, en Juan lógaquië' bönni' yudo' tu'chi'a tu'söröë'

¹ Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë. ² Gula'lenë' bönni' ni tu' tu'sédinë' Pedro, en Juan, bönachi, en të' léguequi ulu'bán nupa chinátigaca tu' bubanë' Jesús. ³ Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzö' dza na'. ⁴ Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo ná'agaquië' idú chi-un gáyu'ë.

⁵ Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén. ⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'. ⁷ Ní'irö duché'gaquië' Pedro, en Juan, ate' bulu'sudxinë' légaquië' gatsaj láchui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

⁸ Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libí'ili', núlöli' rinná bé'eli' netu', bönachi Israel, en libí'ili', bönni' gula.

⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni? ¹⁰ Riguíxjö'itu' libí'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti. ¹¹ Dios bë'ë didza' ca naca queë' Jesús ni, cate' ni' gunnë': "Libí'ili', bönni' rucú'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö." ¹² Cúnturö nu zoa nu gaca usölá bönachi, tu' cabí zoa yödzölió ni ia'túë' bönni' nuzöë' Dios, nu gaca usölá rë'u.

¹³ Cate' bila'lé'enë' ná'agaquië' rugu ladxi' Pedro, en Juan, en guléquibe'enë' biti' nazédagaquië' que yudo', en ná'agaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús. ¹⁴ Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégaquië'. ¹⁵ Ní'irö gula'nná bé'enë' nupa ulu'béaj légaquië' lö'alö yu'u ga na' nudúbigaquië', ate' gulún xtidzë'ë la' légacasë'. ¹⁶ Gula'nnë':

—¿Nacxi gúntsaru' quégaquië' bönni' ni? Le nácatë gulunë' tu le run ga tu'bani bönachi, ate' nözigaca yúgu'të bönachi nacú' Jerusalén lë ni. Biti' gaca tá'baga'ru' le. ¹⁷ Na'a, para cabí sërö didza', en ila'yöni zíanrö ca' bönachi, uzeru' bach légaquië' para cabí ilu'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenrë' bönachi didza', en para cabí ulu'sédinë' légaquië' ca naca queë' Jesús. ¹⁹ Ní'irö bulu'bi'ë didza' Pedro, en Juan. Gulë' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtídza'li' libí'ili' ca xtídzë'ë Dios. ²⁰ ¡Biti' gaca soa dxitu'! ¡Run bayudxi güí'itu' didza' que le bilé'etu', en le biyönitu'!

²¹ Ní'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lë na' guca. ²² Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bönni' gula tu'zëajni'inë' bönachi judío. ²⁴ Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúzxiba! ¡Benu' luyú! ¡Benu' nísado'! ¡Benu' yúgu'të le nacuá' tu tu lataj na'! ²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi lë', gunnë':

¡Bizx que tun dzatsa bönachi,
en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún dzatsë',
ate' guláquië' tuz bönni' unná bë'.

Gula'dá'báguë'ë Xanru' Dios,
enca' Cristo, bönni' gurö cazë' Lë'.

²⁷ Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxí'inu' lá'ayi, Bönni' na' buzú' queëtu'. ²⁸ Gulunë' yúgu'të le bucözu' zí'atëlö, en guzxí' lu no'o, ate' guca ca na' benu' tsutsu xtídz'u ca ral-la' gaca. ²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para güí'itu' xtídz'u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

Tu'únë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunnë' nu bönni' nútsë'ë ládjagaquië' nequi queëzë' le dë queë', pero bulu'únë' tuz le dë quégaquië'. ³³ Len yöl-la' huáca zxön gula'guíxjö'ë gubáz na' nasöl-lë'ë Xanru' Jesús ca bubanë' Lë', ate' le buzá' ládxi'ë Dios quégaquië' gúcalen yúgu'të'. ³⁴ Cuntu nu bi biyadzaj nu nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', ³⁵ en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guísië' le que queégaca nupa bi biyadzaj quéguequi. ³⁶ Zoë' José ni', bönni' bulu'zóë' gubáz na' nasöl-lë'ë Cristo ia'tú lë' Bernabé, le rna lu didza' xidza', Bönni' Ruhué Tsáhuë'ë. Nabábalenë' zxi'ini xi'sóë' Leví, en guljé' luyú Chipre. ³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'. ² Ananías na' bucachi' lanë' late' dumí que yu na', ate' nözinu ca'

nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsca nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bõ' Lá'ayi, ate' bucachi' lanu' late' dumí que xiyú' na'?

⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bönachi.

⁵⁻⁶ Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chölibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinu nigula queë' Ananías na' ni', en biti' nözinu lë na' guca queë' bönni' queënu. ⁸ Ní'irö Pedro gudxë'-nu:

—Gudíxjöi' neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídza'li' guzxi' bë' xihui'li' Dios Bõ' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö la' gudzö'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queënu. ¹¹ Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

¹² Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxon lógaca bönachi lu yödzö. Yúgu'të' bulu'dübë' tsözxön ga naca chila yudo' nazí'i le Chila Queë' Salomón. ¹³ Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal.

¹⁴ Ní'irö ia'bal-la bönachi zían ca' gula'yéajlë' Cristo, bönni', en nigula. ¹⁵ Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca. ¹⁶ Lësca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'tëgüequi.

Bönni' yudo' ta'bía ládxi'gaquië' bönni' gubáz nasöl-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. ¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guié.

¹⁹ Ní'irö bidxinë' gubáz lá'ayi queë' Xanru' chi'i dzö'ölö, ate' gusaljë' lidxi guié na', en bubéajë' légaquië'. ²⁰ Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöj'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dübë' bixúz lo, en nupa nacuá'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'söl-lë'ë nupa tsöjaca lidxi guié para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guié na'. ²² Cate' ni'a ná'agaquië' bönni' yudo' na'

bila'dxinë' ni', biti' yöjxáca'gaquië' légaquië' lu yu'u lidxi guié na', ate' ní'irö bulu'huöajë' tsöjtíxjö'gaquië' ca'. ²³ Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guié, ate' nacuá' nupa tun chi'i ra' lidxi guié na', pero cate' gusalajtu', cuntu nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca. ²⁵ Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guié nacu'ë chila yudo' tu'sëdinë' bönachi.

²⁶ Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ládxí' bönachi nacuá' ni' légaquië' guiöj. ²⁷ Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

²⁸ —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idütë yödzö Jerusalén, en ré'ënili' usubága'li' netu' xíguia' tu' nözi yöl-la' guti queë' bönni' na'.

²⁹ Ní'irö bulu'bi'ë didza' Pedro, en ia'zícá'rë' gubáz na' nasöl-lë'ë Cristo, ta'nnë':

—Run bayudxi uzërö ná'gatu' xtídzë'ë Dios ca xtídzá'gaca bönachi. ³⁰ Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. ³¹ Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. ³² Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risöl-lë'ë Dios quégaca nupa tun ca rna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'. ³⁴ Ní'irö guzuinë' tu bönni' yudo' ruchí'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo ló'alö tu chí'ido'. ³⁵ Ní'irö gudxë' bönni' yudo' tu'chi'a tu'söröë' na', gunné':

—Libí'ili', bönni' Israel, buli'yutëz queëli' ca naca le ré'ënili' gunli' quégaquië' bönni' ni. ³⁶ Ral-la' tsöjnéli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtërë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni yöjtá'gaca lë', ate' gunítisö ca' yúgu'të le benë' bönni' na'. ³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni yöjtá'gaca lë'. ³⁸ Que lë ni na' rea' libí'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz, ³⁹ pero channö naca queë' Dios, biti' gaca usunítli' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'.

⁴¹ Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'guí'i gula'záquë'ë tu'

dá'gaquië' Jesús. ⁴² Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

6

Ta'böë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guisië' le ilágunu nigula uzëbi, tu' cuntú nu ru'i le ilágunu nigula uzëbi quégaquië' bönni' ni' tu'ë didza' griego. ² Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönachi ni' ta'yéajlë' Cristo, ate' të légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. ³ Que lë ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. ⁴ Netu' ni ulídzatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ladxí'gaquië' didza' ni, ate' gula'böë' Esteban, tu bönni' réajlë'ë Cristo idú ladxë'ë, en zóalenë' Dios Bö' Lá'ayi lë'. Lësca' gula'böë' Felipe, en Prócoro, en Nicanor, en Timón, en Parmenas, en Nicolás, bönni' yödzo Antioquía, bönni' zí'alö butsé'ë ca runë' para tseaj ladxë'ë Dios ca tunë' yugu' bönni' judío. ⁶ Ní'irö bulu'sudxinë' bönni' na' gula'böë' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

⁷ Guzërö xtídzë'ë Xanru', ate' gula'yanda' bönachi ta'yéajlë' Cristo nacúa' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzo, zóalen yöl-la' huáca queë' Dios lë' le buzá' ladxë'ë queë'. ⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sëdë' queë' Dios, nazí'i le Yu'u Quégaquië' Bönni' Nadzángaqië'. Bönni' narúajgaquië' yödzo Cirene, en yödzo Alejandría, en luyú Cilicia, en luyú Asia, gulunë' légaquië' tsözxön. Bönni' ni gula'díl-lalenë' Esteban didza'. ¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. ¹¹ Ní'irö gula'guíxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zí'ë queë' Moisés, en queë' Dios." ¹² Caní guca, bönni' ni gula'gu'ë xilá ladxí'gaca bönachi, tsözxön len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söröë'. ¹³ Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zí'ë que yudo' lá'ayi ni, en que xibá queë' Dios. ¹⁴ Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalébiru' runru', yugu' lë na' gunná bë'enë' Moisés rë'u.

¹⁵ Ní'irö bönni' yudo' tu'chi'a tu'söröë', en yúgu'të nupa rögaca ni' bulu'yúë' Esteban, ate' bila'lë'enë' lahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunnë' uláz queë'

¹ Ní'irö bixúz lo gunábinë' Esteban na', rnnë':

—¿Naru' nácatë caní?

² Bubi'ë didza' Esteban, rnnë':

—Libi'ili', bönni' gula, en libi'ili', böcha'a. Buli'zë nágali' le guía' libi'ili'. Dios, Bönni' nayëpisëtërë', buluí'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzö Harán. ³ Dios gudxë' lë': "Birúaj ladzu', en bulá'alén di'a dza quiu', ate' guyéaj luyú ni' uluí'ida' li'." ⁴ Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzö Harán. Lu yödzö ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni' zóaru' na'a. ⁵ Dios biti' bë'ë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxí' lu në'ë Dios unödzejë' queë' luyú ni, ate' tödi gátië' Abraham guequi luyú ni quégaca xzí'ini xi'sóë', sal-la' biti' nacu'inibi' bi'i queë'. ⁶ Lësca' caní Dios gudxë' Abraham: "Tsöjáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zítu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz." ⁷ Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tödi ni' ulu'rúajë' ni', ate' ilunë' xichina' luyú ni." ⁸ Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë' na' naca bë'. Isaac na', lësca' caní benë' queëbi' bi'i Jacob, xzí'inë', en caní benë' ca' Jacob quégaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

⁹ Yugu' xuz xtó'oru' na', lu yöl-la' ruzxé'e quégagaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' ¹⁰ en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ladxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ëbi' bönachi luyú Egipto, en yúgu'të bönachi nacuá' lidxë' Faraón na'.

¹¹ Ní'irö gúcada' gubín idú luyú Egipto, en luyú Canaán ni, ate' gula'guí' gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹² Cate' biyönnë' Jacob dë zxoá' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'. ¹³ Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José. ¹⁴ Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. ¹⁵ Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que queëgaquië'. ¹⁶ Cate' gulátië' tu tu xuz xtó'oru', xzí'ini xi'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zzan bulóaj na' gú'uë' Abraham lu ná'agaca xzí'inë' Hemor, bönni' Siquem na'.

¹⁷ Gudödi zían iz, cate' bidxín dza ral-la' gaca le guzxí' lu në'ë Dios, lë' na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. ¹⁸ Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. ¹⁹ Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sané'-bi' bi'i bönni' huë'ënido' que queëgaquië', para ilátibi'. ²⁰ La' dza ní'isö gúljabí' ca' bí'ido' Moisés, ate' Dios guyaza ladxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. ²¹ Cate' bidxín dza ulu'sané'-bi'

xuz xiná'abi' para gátibi' bí'ido' Moisés na', bidxinnu nigula zxi'iné' Faraón ga ni' bulu'cá'ané'-bi', ate' yójzxi'inu-bi', en buscúlunu-bi' ca bi'i que cázanu. ²² Caní guca, bizédabi' bi'i Moisés yúgu'tè le táquiè' bönni' Egipto, en gúcatèröbi' zxon ca naca didza' bë'ëbi', en ca nácgaca le benbi'.

²³ 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel. ²⁴ Cate' bidxinbi' ga na' nacu'ë, bilé'ebi'-nè' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-nè' bönni' uládz queëbi' na', en bétibi'-nè' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'. ²⁵ Gúquibi' Moisés huala'yéajni'iné' bönni' böchi'bi' guné' Dios ga usölábi' lè cázabi' légaquiè', pero légaquiè' biti' gula'yéajni'iné'. ²⁶ Ia'tú dza ca' yójxáca'bi' ia' chopè' bönni' Israel, ta'dil-lè', ate' gú'unibi' cuéqui dxibi' légaquiè', en gúdxibi' légaquiè': "Libí'ili', böchi'li' naca. ¿Bizx que ruá'ali' luzá'ali' dö'?" ²⁷ Ní'irö bönni' na' ru'ë dö' que luzé'ë budxíguè'ë-bi' bi'i Moisés, gunné': "¿Núzxitè buzóa li' para inná bé'enu' netu', en uchi'a usöröu' le runtu?" ²⁸ ¿Naru' rë'ënitsenu' gútiu' ca' neda' ca benu' néaje, bëtiu'-nè' bönni' Egipto na'?" ²⁹ Cate' Moisés biyönibi' didza' ni, buzxunnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'alenbi'-nu nigula lu yödzo ni', ate' gúl'jagacabi' chópabi' bi'i bönni' queë'.

³⁰ 'Cate' chigudödi choá' iz zoë' ni', buluí'i lahuè' tu gubáz lá'ayi queë' Dios ga zoë' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí. ³¹ Cate' Moisés bilé'ené' guí' na', bubániné', ate' gubígui'ë gala' para ilé'ené' dxi'a, ate' biyönnè' chi'ë Xanru'. ³² Caní gudxè' Xanru' lè': "Neda' naca' Dios quégaquiè' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxízidè'ë Moisés, en bití'rö burúguiné' uyúè'. ³³ Xanru' gudxè' lè': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni. ³⁴ Le nácatè chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxi yeché'. Bötja', zoa' ni para usölá' légaquiè'. Gudá na'a, isöl-la'a li' luyú Egipto."

³⁵ 'Sal-la' bönni' uládz queë' Moisés, bulu'cá'ané' lè' cá'asö, gula'nnè': "¿Núzxitè buzóa li' para inná bé'enu' netu', en uchi'a usöröu' le runtu?" Dios gusöl-lè'ë lè' para gáquiè' bönni' unná bë', en bönni' rusölá, ca na' gubáz lá'ayi na' queë' Dios gudxè' Moisés, cate' buluí'i lahuè' lu yaga yötsi'do' régui ga na' zoë'. ³⁶ Moisés ni bubéajè' bönni' uládz queëru' luyú Egipto. Guca caní gudödi benè' le gulún ga bulu'bani bönachi ni', en le taca bë' benè' luyú ni'. Lësca' caní benè' lu nísado' nazí'i le Nísado' Xiná. Caní benè' lógaquiè' idú ca choá' iz lu lataj cá'asö. ³⁷ Lè cazè' Moisés na' gudxè' bönachi Israel ni', gunné': "Xanru' Dios isöl-lè'ë queëli' tu bönni' galjè' ladaj di'a dza queëli', ate' gáquiè' bönni' gu'ë didza' uláz queë' Dios. Isöl-lè'ë lè' queëli' ca na' gusöl-lè'ë neda'. Lè cazè' run bayudxi uzé' nágali'-nè'." ³⁸ Lësca' lè' cazè' Moisés na' guzóalenè' bönachi nudúbigaca queë' Dios lu lataj cá'asö, ate' gudzáguiè' gubáz lá'ayi queë' Dios lè', Nu na' bé'len lè' didza' lu guí'a Sinaí na'. Moisés na' guzóalenè' xuz xtó'oru', ate' Dios budödè' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödè' Moisés xibá ni lu ná'agaca zxi'ini xi'sógaquiè' ga ridxintè queëru' rë'u.

³⁹ 'Biti' gulé'ënnè' xuz xtó'oru' ilunè' ca rnna xtídzè'ë Moisés, pero bulu'zóè' lè' tsölá'alö, en gulé'ënnè' tsöjhuöjgaquiè' luyú Egipto. ⁴⁰ Cate' ni' zoë' Moisés na' lu guí'a Sinaí na', légaquiè' gulé' Aarón, böchë'ë Moisés na', gula'nnè': "Rë'ënitú' gunu' yugu' dios queëtu', tu budó' guíè, para tsöjnörugaca lotu'. Biti' nöztu' bi guca queë' Moisés, bönni' na' nubéajè' netu' luyú Egipto." ⁴¹ Ní'irö gulunè' tu budó' oro le naca ca tu bëdxido', ate' gulútiè'-ba' bö'cu' zxi'la'do', en

gulú'ugaquië'-ba' lo budó' oro na', ate' gulunë' laní lo budó' na' núngaquië'.
⁴² Que lë ni na' Dios bucá'anë' légaquië', en guléaj ládxi'ë légaquië'. Ní'irö
 gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi
 le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni'
 bëtigacali'-ba', en buzégui'gacali'-ba',
 lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda',
 pero biá'ali' le nequi que Moloc, budó' guiöj queëli'.
 Biá'ali' ca' tu le naca ca böläj lúzxiba nazí'i le Refán,
 lë na' buzóali' ca dios queëli'.

Yugu' budó' guiöj budó' yaga ni,
 la' libí'isili' benli' para guyéaj ládxi'li' léguequi.
 Que lë ni na', ubéaja' libí'ili' lu xiyuli',
 en ichë'a libí'ili' zí'tu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari'
 na' ga gulún chi'ë xibá queë' Dios, lë na' naca bë' Dios caz zóalenë' légaquië'.
 Gulunë' tu yu'u lari' na' ca na' Dios gunná bé'enë' Moisés, cate' ni' gudxë'
 lë' gunë' le ca naca lë na' bilé'enë', le bulu'inë' Dios lë' lu guí'a ni'. ⁴⁵ Lësca'
 bulu'dödë' yu'u lari' na' lu ná'agaquië' zxi'inigaquië' ga bidxintë dza ni' gulu'ë
 xuz xtó'oru' le luyú ni, cate' ni' dzáguië' Josué légaquië', ate' gula'güë' xiyúgaca
 bönachi izá'a, nupa ni' bulágui'ë Dios lógaquië' xuz xtó'oru'. Caní gulunë'
 zían iz ga bidxintë dza zoë' David. ⁴⁶ Dios guyaza ládxi'ë David na', ate' lë'
 gunábinë' Dios gu'ë lë' lataj gunë' tu yu'u ga soë' Dios queë' Jacob. ⁴⁷ Biti' bë'ë
 Dios lë' lataj, ate' Salomón, zxi'inë' David na' benë' yu'u queë' Dios. ⁴⁸ Caní
 benë' sal-la' bití' zoë' Dios, Nu nácatërö lo, tu lu yudo' núngaca bönachi. Ca naca
 lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a,
 ate' yödzölió naca xilibi ni'a.

Rnnë' Xanru': "¿Naru' gúntsali' tu yu'u ga soa'?

¿Naru' zóatsö tu lataj ga ral-la' uzí ládxa'a?

⁵⁰ ¿Naru' cabí len na'a caza' bena' yúgu'të lë ni'?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunné':
 —Libí'ili', bönni' zidi, bití' bi raza icja nágali'. Nazidi icja ládxi'do'oli' ca
 raca quégaca bönachi bití' núnbë'gaquië' Dios. Ridá'baga'tica'sili'-në' Dios Bö'
 Lá'ayi. Ca na' gulunë' xuz xtó'oli', runli' ca' libí'ili'. ⁵² Gula'bía ládxi'gaquië'
 xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië'
 bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a,
 cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni'
 gulútië' Lë'. ⁵³ Libí'i cázali' dë lu ná'ali' xibá queë' Dios, lë na' gubáz lá'ayi queë'
 Dios bulu'dödë' lu ná'agaquië' xuz xtó'oli', pero bití' runli' ca rnna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë'
 Esteban, ate' lu yöl-la' rilé quégaquië' lë' gulagu zxéatica' láyë'ë. ⁵⁵ Ní'irö buyúë'
 Esteban na' lúxibalö, ate' zóalenë' Dios Bö' Lá'ayi lë', bilé'enë' lataj bení' ga
 zoë' Dios, enca' Jesús, zuínë' cuita lë'ë ibëla Dios ga nayëpisëtërë'. ⁵⁶ Ní'irö
 gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi
 cuita lë'ë ibëla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bódxí'ë zidzaj, en tsözxön gula'bía di'ë Esteban na'. ⁵⁸ Bulu'béajë' lë' ní'lö ra' yödzö na', ga ni' bulu'ladxë' lë' guiöj. Yugu' bönni' ni' tunë' ba nalí le tu'zéguíë' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj. ⁵⁹ Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

8

Saulo ribía ládxë'ë bönachi queë' Cristo

¹⁻³ Saulo benë' tsözxön yugu' bönni' ni' gulútië' Esteban.

La' ní'sö yugu' bönni' ta'yéaj ládxí'gaquië' Dios guluá'agaquië' Esteban, ate' yöjcháchi'gaquië' lë'. Gula'bódxidë'ë ní'a queë'.

Dza na' yugu' bönni' judío cabí ta'yéajlë'ë Cristo gula'bía ládxí'da'gaquië' bönachi queë' Cristo nacué' Jerusalén. Lësca' Saulo gudxía ládxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'látí'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu bönni' dzáguíë' nupa na' gulásilasi, guyijë' luyú Samaria, ate' benë' libán ni' ca naca queë' Cristo. ⁶ Bulu'dubë' yugu' bönni' ni', ate' idú ládxí'gaquië' bulu'zë nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bódxí'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca. ⁸ Caní guca, bulu'dzeja bönachi yödzö ni'.

⁹ Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guxzí' yé'enë' bönachi Samaria na', gunné' lë' cazë' náquië' bönni' nayépisëtë're'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxön queë' Dios." ¹¹ Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' unë ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë cá' Simón na', en bidilë' nisa, ate' gudá'lentica'së' tsözxön Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. ¹⁶ Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

18 Cate' bilé'enë' Simón, bönni' udzá' na', le guca cate' gubáz na' nasól-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quixjé' légaquië' dumí, 19 ate' rë' légaquië':

—Benna ca' yöl-la' huáca ni' quia', para cate' ixóa na'a núti'tës bönachi, idisóalenë' Dios Bö' Lá'ayi nu na'.

20 Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios. 21 Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. 22 Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u. 23 Réquibe'eda' nabágu'u xíguia', en nadzunu' lu yalaj que tu' xihui'.

24 Ní'irö bubí'ë didza' Simón na', rë' légaquië':

—Buli'lídzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

25 Cate' Pedro, en Juan na' budxi gulunë' ba nalí queë' Cristo lu yödzo ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuójgaquië' Jerusalén.

Felipe, en tu bönni' Etiopía

26 Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajë'. La' nöza ni' yöjtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxi'ë Dios. 28 Na'a, söhuójë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. 29 Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

30 Cate' chigubiguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

31 Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yuë' lahuë' Felipe cuenë', en cö'lenë' lë' tsözxön lu carreta na'.

32 Lë na' nazúaj lu guichi rulabë', rna caní:

Ca bö'cu' zxíla'do',
gula'ché'ë Lë' para ilútië' Lë',
en ca bö'cu' zxíla'do',
biti' rnnëba' cate' nu richugu lítsa'ba',
ca' benë' Lë', biti' gusalaj ru'ë bi innë'.

33 Bulu'cá'anë' Lë' cá'asö,
en biti' gulu'ë lataj nu uchi'a usöró Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

34 Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúbölö?

35 Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús. 36 Cate' ni' yú'ugaquië' nöza söjáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

³⁷ Felipe gudxë' lë':

—Channö réajlë'u idú ladxu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

³⁸ Ní'irö benë' ga guzóa dxisö carreta queë' na', ate' bulu'huötjë' irópatë', yöjtsázagaquië' lu nisa. Ní'irö Felipe buquilé' bönni' huödx na' nisa. ³⁹ Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bití'rö bilé'enë' lë'. Ní'irö buguelë'ë xinözë', söhuöjë' rudzéjanë'. ⁴⁰ Cate' chiréquite'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

9

Saulo ruhuöáquië' queë' Cristo

¹ Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, ² en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén. ³ Tsanni ni' yú'ugaquië' nöza Saulo, en nupa nacua' len lë', söjáquië', en cate' chizóa ila'dxinë' Damasco, tsálido'os buzeni'da' tu bení' za' lúzxiba, le buzeni' ga ni' söjáquië'. ⁴ Ní'irö gudzö'ë Saulo lu yu, en biyönnë' chí'i Nu rë lë':

—Saulo, Saulo, ¿bizx que ribía ladxu'u neda'?

⁵ Saulo gunábinë' Lë', gunné':

—¿Nuzxi lí, Xan?

Lë' gunné':

—Neda' Jesús, Nu ribía ladxu'u. Run zi' cuinu', ridá'bagu'u neda'. Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

⁶ Ní'irö Saulo guxzízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isöl-la'a quiu' nu guié' lí' le ral-la' gunu'.

⁷ Guládxinë' yugu' bönni' na' söjácalenë' Saulo, tu' bila'yönnë' chí'i na', sal-la' cuntu nu bila'lé'enë'. ⁸ Ní'irö böasë' Saulo luyú, en cate' guxá' guiöj lahuë', bití' ca' rilé'enë'. Que lë' ni na' gula'guélé'ë në'ë, en gula'ché'ë lë' Damasco.

⁹ Guzóë' ni' tsonna dza nachul-la lahuë', en bití' bi gú'i gudahuë'.

¹⁰ Zoë' ca' Ananías, bönni' réajlë'ë Cristo, yödzö Damasco, ate' Xanru' buluí' lahuë' ga zoë' ca tu lu yëla béchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

¹¹ Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

¹² Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóalaj guiöj lahuë'.

¹³ Ní'irö bubí'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Lí', nacua' Jerusalén. ¹⁴ Zë'ë ca' ni, dë' lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

¹⁵ Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel. ¹⁶ Ulu'ida' lë' le zían le qui'i sáquë'ë uláz quia' neda', gunë' xichina'.

¹⁷ Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusöl-lë'ë neda' para huóalaj guiój lo', en idisóalenë' Dios Bö' Lá'ayi li'.

¹⁸ La' ní'isö gula'guínnaj le naca ca xilácuba' böla lu guiój lahuë', ate' la' böáljatë guiój lahuë'. Ní'irö guyasë' Saulo, en bidilë' nisa. ¹⁹ Gudödi ni' gudahuë', en böáca ládxë'ë. Ca chopá tsonna dza guzóalenë' yugu' bönni' ta'yéajlë'ë Cristo nacu'ë Damasco.

Runë' libán Saulo lu yödzö Damasco

²⁰ La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sëdë' queë' Dios, rnnë':

—Jesús náquië' Zxí'ini cazë' Dios.

²¹ Bulu'bánninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

²² Bidíparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

Rulë' Saulo lu ná'agaquië' bönni' judío

²³ Cate' chigudödi zían dza, gulún xtídza' gaquië' bönni' judío nacu'ë ni' ilútië' Saulo. ²⁴ Rëla, en të dza gula'bö' nísie' yugu' bönni' judío ga nu ridödi lu zö'ö run chi'i yödzö na' para ilútië' lë', pero gúquibe'enë' Saulo le të'ennë' ilunë' queë'. ²⁵ Ní'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxon naga' du, en bulu'zötjë' lë' ní'ilö lu zö'ö run chi'i yödzö na'.

Rudxinë' Saulo Jerusalén

²⁶ Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabí téquinë' réajlë'ë Saulo na' Cristo. ²⁷ Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús. ²⁸ Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön. ²⁹ Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. ³⁰ Cate' guléquibe'enë' böchi'ru' ta'yéajlë'ë Cristo lë' ni, gula'chë'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

³¹ Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

Pedro ruiné' tu bönni' lë' Eneas

³² Ia'tú le guca, cate' Pedro yöjyúë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida. ³³ Yöjxáquië' tu bönni' ni' lë' Eneas, chiguca xunu' iz dë' ré'enë', nacu'unië' bin. ³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. ³⁵ Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huöáca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le náca gaca dxi'a le tácalen bönachi yechi'. ³⁷ Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía. ³⁸ Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yuë' lahuë', të' lë':

—Biti' tsenu' guídu' queëtu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu. ⁴⁰ Ní'irö Pedro bubéajë' ní'ilö yúgu'të nupa nacuá' ni', ate' buzóa zxi'bë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guíöj lonu Dorcas. Cate' bilé'enu-në' Pedro, la' guyástënu, gurö'önu. ⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. ⁴² Ca guca lë ni guzé didza' idú lu yödzö Jope, ate' gula'yéajlë' bönachi zían Xanru' Jesús. ⁴³ Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' rójáquië' gudil-la, nazí'i lógaquië' Bönni' Italia Rójáquië' Gudil-la. ² Cornelio na' reaj ládxë'ë Dios, en rádxinë' Lë', ate' yúgu'të bönachi nacuá' lidxë' núngaca lë' tsözxön. Runödzjë' Cornelio dumí zían le rácalen bönachi yechi', en rulídzatica'së' Dios. ³ Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyüë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'.

⁵ Na'a, gusöl-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' lí' le ral-la' gunu'.

⁷ Cate' chibuzë'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguíë' bönachi nacuá' lidxë' Cornelio. ⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödzö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza.

¹⁰ La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal. ¹¹ Bilé'enë' nayalaj lúzxiba, en ruhuötaj

tu le naca ca tu lari' guitsa' zxön ga zoë', le naga' idapa la'a. ¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xíligacaba'. ¹³ Ní'irö biyönnë' chi'i nu rë lë':

—Pedro, guyasa. Bëti-gacaba', en gudagu.

¹⁴ Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chi'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, ate' ní'irö la' buëpitë lari' zxön na' lúzxiba.

¹⁷ Tsanni ni' rö'ë böniga Pedro, rizá' ládxe'ë bizxi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxe' Simón na'. ¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. ¹⁹ Tsanni ni' rizá' ládxe'ë Pedro ca naca lë na' bilé'enë', Dios Bö' Lá'ayi gudxe' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' li'. ²⁰ Guyaschi na'a, en bötaj znan yu'u. Biti' gaca chopa ládxe'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bötjë' Pedro znan yu'u ga na' nacu'ë bönni' na' nasöl-lë'ë Cornelio, en gudxe' légaquië':

—Neda' bönni' rugu'ljali'. ¿Bizxi huen zá'ali' ni?

²² Bulu'bi'ë didza', të' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxe' lë' isöl-lë'ë nu udulídza li' guídu' lidxe' para yönnë' didza' gu'u.

²³ Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunny ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxe'.

²⁵ Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxe'ë lë' ca runru' queë' Dios caz. ²⁶ Pedro buchisë' lë', en gudxe' lë':

—Guyasa. Lësca' bönachi yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. ²⁸ Ní'irö Pedro gudxe' légaquië', rnnë':

—Libi'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios bulu'ínë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a. ²⁹ Que lë ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

³⁰ Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení, dluuí' lobi' neda'. ³¹ Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'.

³² Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxe' tu bönni' runë' tsahui' guídi zxa bëdxi, en

lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a." ³³ Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzë' nágatu' le inná bé'enë' Dios li' innó'.

Didza' bë'ë Pedro lidxë' Cornelio

³⁴ Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u. ³⁵ Dios raza ládxë'ë bönachi idútë yödzölió, nupa na' tadxi Lë', en tun le naca dxi'a. ³⁶ Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raca dxi'a quégaca bönachi, lë' na' bidxín queëru' lu në'ë Jesucristo. Lë' cazë' náquië' Xanru' yúgu'tëru'. ³⁷ Libí'ili' nöz quézili' lë' na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. ³⁸ Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'gu'i gula'zaca' lu na' tu' xihui'. Caní benë', tu' guzóalenë' Dios Lë'. ³⁹ Na'a, netu' runtu' ba nalí que yúgu'të lë' na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. ⁴⁰ Ní'irö Dios busubanë' Lë' cate' guca tsonna dza nátië', en benë' ga bulu'i lahuë' ga zóatu' netu'. ⁴¹ Biti' bulu'i lahuë' lógaca yúgu'të bönachi, pero lotu' netu' bulu'i lahuë'. Dios guröë' netu' dza ni'te para guntu' ba nalí queë' Jesús, ate' güi' gudágulentu' Lë' tsözxön gudödi bubanë' lu yöl-la' guti. ⁴² Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. ⁴³ Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

⁴⁴ Ní' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. ⁴⁵ Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' biti' nácagaca judío. ⁴⁶ Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios zxön. ⁴⁷ Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

⁴⁸ Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analenë' légaquië' ca chopa tsonna dza.

11

Didza' bë'ë Pedro lógaca bönachi queë' Cristo nacuá' Jerusalén

¹ Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' biti' nácagaquië' judío gula'zí' lu ná'agaquië' xtídzë'ë Dios. ² Cate' budxinë' Pedro Jerusalén, böchi'ru' judío gula'díl-lalenë' lë' didza'. ³ Gulë' Pedro:

—¿Bizx que yöjtsú'ulenu' bönni' biti' nácagaquië' judío, en gudágulenu' légaquië' tsözxön?

⁴ Ní'irö gusí lahuë' Pedro rusiyönnë' légaquië' idútë lë' na' guca, rnnë':

⁵ —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla bëchigal tu le bulu'inë' Dios neda'. Bilé'eda' bötaj birúaj lúzxiba tu le

naca ca tu lari' guitsa' zxön, naga' idapa la'a, ate' bidxín ga na' zoa'. ⁶ Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacuá' tapa ní'agacaba', yugu' böa' guixi' sñia', en böa' tá'ayöj lé'egacaba' lu yu, en böa' zoa xíligacaba'. ⁷ Biyönda' chi'i nu gudxi neda': "Pedro, guyasa. Bëti-ba', en gudagu." ⁸ Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." ⁹ Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a." ¹⁰ Tsonna luzuí guca caní, ate' ní'irö idútë læ na' bilé'eda' la' buëpitë lúzxiba. ¹¹ La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzo Cesarea, nasöl-lë'ë légaquië' tu bönni' læ' Cornelio. Sududíljagaquië' neda'. ¹² Dios Bö' Lá'ayi gudxë' neda': "Guyéajlen légaquië', en cabí gaca chopa ládxu'u." Lësca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'. ¹³ Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' læ': "Na'a isöl-la'gacu'-në' bönni' tsöjajúquië' yödzo Jope, tsöjlídzagaquië' Simón, zoa ia'tú læ' Pedro. ¹⁴ Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacuá' lidxu'." ¹⁵ Cate' ni' gusí lahua' ru'ílëna' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. ¹⁶ Ní'irö yöjneda' didza' na' bë'ë Xanru', gunnë': "Le nácatë Juan buquilë' bönachi nisa lu nisa, pero libí'ili', gaca queë'li' le rulu'isö yöl-la' ridila nisa na', idisóalenë' Dios Bö' Lá'ayi libí'ili'." ¹⁷ Que læ ni na', channö Dios gusöl-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, ¿núzxitë neda' inná bë'eda'-në' Dios?

¹⁸ Ní'irö, cate' bila'yönnë' læ ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'i ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

¹⁹ Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzo luyú Fenicia, en luyú Chipre, en lu yödzo Antioquía. Gulunë' libán ni' que xtídzë'ë Dios, pero lógacasö bönachi judío. ²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. ²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²² Cate' bidxín didza' ca guca læ ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquía na'. ²³ Cate' Bernabé na' bidxinë' Antioquía, bilé'enë' le ruzá' ládxe'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'. ²⁴ Náquië' Bernabé na' tsahui', en idú zóalenë' Dios Bö' Lá'ayi læ', en idú ládxe'ë réajlë'ë Cristo. Ní'a que libán benë' Bernabé na', bönachi zían lu yödzo na' gula'yéajlë' Xanru'.

²⁵ Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' læ', buchë'ë læ' Antioquía. ²⁶ Idú ca tu iz gula'cu'ë ni', tunë' tsözxön bönachi queë' Cristo, en tu'sédinë' bönachi zían. Lu yödzo Antioquía na', gusí lo gula'zí' lógaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yójáquië' Antioquía bal-lë' bönni' tu'ë didza' uláz queë' Dios. ²⁸ Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín idútë yödzülió.

Guca gubín na' cate' ni' rinná bë'ë Claudio, lu yödzü Roma. ²⁹ Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que queégaquië', le gácalen böchi'ru' nacu'ë luyú Judea. ³⁰ Caní gulunë', ate' lë na' bulu'nödzejë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guíë

¹ Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zi'ë légaquië'. ² Gunná bé'enë' bönni' gulútië' Jacobo, böchë'ë Juan. Gulu'ë lë' guíë tuchi'. ³ Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'í cúa zi que. ⁴ Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquië' tapa cö' bönni' rójáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxi'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵ Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guíë

⁶ Cate' si' idxín dza yu'u ládxi'ë Herodes ubéajë' Pedro lidxi guíë na', la' dzö' ní'sö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guíë na'. ⁷ Tsálido'os bulu'í lahuë' tu gubáz lá'ayi queë' Xanru' ni', ate' buzení' da' bení' lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guíë na' naga' ni'a në'ë Pedro. ⁸ Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzü'u, en gudá' len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'. ¹⁰ Cate' chigula'dödë' ga nacu'ë bönni' zí'alö, en bönni' buropi cö', bönni' na' rójáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nōza que yödzü. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nōza, ate' ni' gubáz lá'ayi na' la' bulá'alentë' Pedro. ¹¹ Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusöl-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

¹² Tsanni ni' yu'ë nōza Pedro, rizá' ládxi'ë ca naca lë na' guca, ate' bidxinë' lídxinu María, xiná'abi' Juan, bi'í na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. ¹³ Cate' bulidzë' Pedro ra' yu'u lö'a, birúajbi' bi'í nigula lëbi' Rode para inözibi' nuzxi na'. ¹⁴ Cate'

búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelò böajbi' lu yu'u, yöjtíxjöi'ibi' nupa nacuá' ni', rnnabi':

—Zoë' Pedro ra' yu'u.

¹⁵ Ní'irö gulé' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nné':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'. ¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guié. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' röjáquië' gudil-la gula'bö'ë böniga nacxi guca, bíti'rö yu'ë Pedro lidxi guié. ¹⁹ Ní'irö gusöl-lë'ë Herodes nupa tsöjxígaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bétigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

²⁰ Dza ní'sö rilenë' Herodes bönachi yödzo Tiro, en yödzo Sidón. Zí'alö bönachi lu xiyüë' Herodes na' gula'söl-la' le biyadzaj quégaca bönachi lu xiyügaca yödzo Tiro, en Sidón na', pero tu' rilenë' Herodes légaquië', bíti'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gul'énnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'. ²¹ Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'. ²² Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

²³ La' ná'asö la'bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

²⁴ Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquië' Bernabé, en Saulo libán

²⁵ Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ni', yöjhuöjgaquië' yödzo Antioquía. Gula'chë'ë-bi' ca' bi'i Juan, zoa ia'tú labi' Marcos.

13

¹ Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzo Antioquía, tunë' tu' zxon bönachi queë' Cristo lu yödzo na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlënë' tsözxön Herodes, bönni' rinná bë'ë luyú Galilea).

² Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

³ Budxi gulunë' gubasa, en gulu'ilenë' Dios didza', ní'irö gula'xóa na'agaquië' chopë' ni, en gula'söl-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

⁴ Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazi'i le Chipre. ⁵ Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sedë' queë' Dios. Nachë'gaquië'-bi' bi'i Juan para gunbi' légaquië' tu zxön. ⁶ Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë yë'ë, en rnnë' ru'ë didza' uláz queë' Dios. ⁷ Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'enë' yönnë' xtídzë'ë Dios. ⁸ Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi izá'a ga na'. ⁹ Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyüë' Elimas na' ¹⁰ en rë' lë':

—Li', bönni' rizi' yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu ré'ëni tséajlë' Lë'? ¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'. ¹² Cate' bilé'enë' bönni' unná bë' na' lë' na' guca, bubáinë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³ Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' légaquië', en böajbi' Jerusalén. ¹⁴ Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. ¹⁵ Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjödix Saulo, en Bernabé, gunnë':

—Libi'ili', böchi'tu'. Channö nuá'ali' bi innali' le uzéajni'i netu', guli'nnë.

¹⁶ Ní'irö guzuínë' Pablo, en guchisa në'ë para ila'cu'ë dxisö, gunnë':

—Buli'zé nágali' le guía' libí'ili', bönni' Israel, en libí'ili', nülöli' rádxili'-në' Dios. ¹⁷ Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'. ¹⁸ Idú choá' iz Dios biá' gulënë' quégaquië' cate' ni' gula'dë' idú luyú bidxi lu lataj cá'asö. ¹⁹ Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'. ²⁰ Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. ²¹ Ní'irö gula'nábinë' Dios uzóë' tu

bönni' unná bē' quégaquiē'. Dios gurōē' Saúl, xzí'inē' Cis, bönni' nababē' di'a dza queē' Benjamín. Idú ca choá' iz gunná bé'enē' Saúl na' légaquiē'. ²² Gudödi ni' Dios gudúē' Saúl na', ate' buzōē' David quégaquiē' para inná bē'ē. Dios benē' ba nalí queē' David ni, gunné': "Nözda' runē' David, xzí'inē' Isaí, le raza ládxa'a, en gunē' yúgu'tē le ré'ēnda' neda'." ²³ Ladaj xzí'ini xi'sōē' David na' benē' Dios ga guljē' Jesús para gáquiē' bönni' usölē' bönachi Israel, ca na' guxzí' lu nē'ē Dios zí'atëlō gunē'. ²⁴ Zí'alō cate' si' ilá' lahuē' Jesús, benē' Juan libán lógaca yúgu'tē bönachi Israel para ulu'bí'i ládxi'gaca, en ila'dila nisa. ²⁵ Cate' ni' chizóa údxi gunē' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guidē'. ¡Na'a, buli'yútsōca! Chizōē' idxinē' bönni' na' ga zoa' ni, ate' neda' bití' naca' lesaca' ilecja' xiráchuē' nudē'ē."

²⁶ 'Libí'ili', bōcha'a, yugu' xzí'ini xi'sōē' Abraham, en núlōli' zóali' ni, en rádxili'-nē' Dios. Dios caz gusöl-lē'ē queēli' didza' ni para uláli'. ²⁷ Nupa nacuá' Jerusalén, en bönni' ta'nná bé'enē' légaquiē' bití' bulu'únbē'ē Jesús, en bití' gula'yéajni'inē' le nazúaj lu guichi le gula'nnē' yugu' bönni' gulu'ē didza' uláz queē' Dios, sal-la' tu'laba cazē' yugu' didza' ni yugu' dza lá'ayi. Lu yöl-la' cabí réajni'i quégaquiē' gulunē' ga budxín ca rnna didza' ni cate' ni' gula'chúguiē' queē' Jesús gátie'. ²⁸ Sal-la' bití' budzōli le nabáguē'ē Jesús gátie', gula'nábinē' Pilato inná bé'enē' bönni' ilútiē' Lē'. ²⁹ Cate' budxi gulunē' queē' yúgu'tē le nazúaj lu guichi ca ral-la' gaca queē', bulu'zōtjē' Lē' lē'e yaga cruz, en bulu'cáché'ē Lē' yeru ba. ³⁰ ¡Ní'irō Dios busubanē' Lē' lu yöl-la' guti! ³¹ Zían dza buluí' lahuē' Jesús lógaca nupa yójácalen Lē' tsözxōn cate' ni' buzē'ē luyú Galilea, en bidxinē' Jerusalén. Na'a, yugu' bönni' na' tunē' ba nalí queē' lógaca bönachi.

³² 'Caní naca, lēasca' netu' ni rusiyōntu' libí'ili' didza' dxi'a ca naca lē na' guxzí' lu nē'ē Dios gunē' quégaquiē' xuz xtó'oru'. ³³ Lē na' guxzí' lu nē'ē Dios quégaquiē', Lē cazē' benē' ga budxín queēru', nácaru' xzí'ini xi'sóagaquiē'. Caní benē' cate' busubanē' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." ³⁴ Ca naca na', Dios busubanē' Lē' lu yöl-la' guti para cabí iníti le naca cazē', Lē cazē' Dios gunné' caní: "Gunna' quiu' le nácgaca bica' ba guxzí' lu na'a lahuē' David." ³⁵ Que lē ni na' nazúaj ca' lu guichi, ga zoa ia'tú salmo, le rnna caní: "Bití' gu'u lataj ugá'anē' bönni' lá'ayi quiu' ga iníti le naca cazē'." ³⁶ Le guca queē' David naca bē'. Gudödi benē' dxin lógaca bönachi uládz queē', ca na' gunná bé'enē' Dios lē', ní'irō gútiē', ate' gula'gu'ē lē' yeru ba ga nacu'ē xuz xtá'ahuē', ate' guniti le naca cazē'. ³⁷ Na'a, ca naca queē' Jesús na', Dios busubanē' Lē', ate' bití' guniti le naca cazē' lu yeru ba. ³⁸ Libí'ili', bōcha'a, ral-la' inözili' lē ni rusiyōntu' libí'ili'. Dios runíti lahuē' libí'ili' ca naca dul-la' nabága'li' ni'a que le benē' Jesús ni. ³⁹ Na'a, Dios ruúnē' tsahui' yúgu'tē nupa ta'yéajlē' Jesús, rugúē' yugu' dul-la' na' le cabí guca ugúa xibá queē' Dios, le bē'ē Moisés. ⁴⁰ Guli'gún chí'i cuinli' na'a para cabí gaca queēli' le nazúaj lu guichi le gula'nnē' bönni' gulu'ē didza' uláz queē' Dios, le rnna caní:

⁴¹ Buli'yútsōca, libí'ili', bönni' cabí tunē' neda' bal.

Ubánili', pero lu yöl-la' cabí réajlē' queēli' gátili'.

Neda' guna' tu dxin dza ni zóali',

en sal-la' nu uluí'i libí'ili' le rulu'í'i dxin na', bití' ca' tséajlē'ēli'.

⁴² Cate' bulu'rúajē' Pablo, en yugu' bönni' na' dzágagaquiē' lē' lu yu'u ga na' tu'dubē' bönni' judío, en tu'sedē' queē' Dios, ní'irō bönachi ni' guláta'yu lógaquiē' ulu'sédinē' légaquiē' ca naca lē ni cate' idxín ia'tú dza lá'ayi quégaquiē'. ⁴³ Cate' ni' bulu'rúajē' lu yu'u na' bönni' nudúbigaquiē' ni', zían bönni' judío, en bönni' nuhuōácagaquiē' judío, yugu' bönni' ta'yéaj ládxi'gaquiē'

Dios, gulunë' tsözxön Pablo, en Bernabé. Chopë' ni gulu'ilenë' légaquië' didza', en bulu'së'ë lãdxi'gaquië' para ilãcatica'së' tsutsu, ilunë' löza le ruzá' lãdxë'ë Dios quégaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgutë bönachi lu yödzo na' para ila'yönnë' xtídzë'ë Dios. ⁴⁵ Ní'irö bulu'zxé'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'irö lu yöl-la' rugu lãdxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönachi izá'a. ⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rna didza' na' bë'ë Dios ca naca queë' Cristo, gunné':
Nuzóa' Li' para gacu' bení' quégaca bönachi izá'a,
en gacu' Nu usölá bönachi idútë yödzölió.

⁴⁸ Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzé xtídzë'ë Xanru', ate' bila'yöni bönachi yúgu'të yödzo nacuá' luyú ni'. ⁵⁰ Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzo ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj lãdxi'nu Dios. Caní guca, gulunë' ga gula'bia lãdxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'. ⁵¹ Ní'irö Pablo, en Bernabé bulu'quínajë' yu bëchtö da' la' lãbagaquië' le rulu'í nagá'ana xíguia' nabága'gaca bönachi lu yödzo na', ate' yöjãquië' lu yödzo Iconio. ⁵² Bulu'dzéjanë' bönni' yödzo Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzo Iconio

¹ Cate' bila'dxinë' Pablo, en Bernabé yödzo Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. ² Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo. ³ Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu lãdxi' gulu'ë xtídzë'ë Dios, tu' tu'zxöni lãdxi'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' lãdxë'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. ⁴ Ní'irö bönachi lu yödzo na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo. ⁵ Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasöl-lë'ë Cristo, en ulu'lãdxë' légaquië' guiöj. ⁶ Cate' téquibe'enë' Pablo, en Bernabé lë ni, bulu'zxúnnajë' ni', yöjãquië' yödzo Listra, en Derbe luyú Licaonia, ate' gula'dödë' yúgu'të yödzödo' idú gásibi'ilö ni', ⁷ gapa ni' gulunë' libán que didza' dxi'a ca naca queë' Cristo.

Tu'lãdxë' Pablo guiöj lu yödzo Listra

⁸ Zoë' tu bönni' lu yödzo Listra biti' raca së'ë. Rö'ösë' ni' tu' cabí rizë'ë cate' ni' guljë', en catu caz guzë'e ni'ë. ⁹ Bönni' ni ruzë' nãguië' didza' ru'ë Pablo. Pablo

buyúe' lè', en gúquibe'enè' réajlè'è Cristo para huóáquië'. ¹⁰ Ní'irö Pablo bē'è zidzaj didza', en rē' lē':

—Guzuí.

La' guxítí'tē' bönni' na', en guzē'e ni'ē. ¹¹ Cate' yugu' bönni' Lистра bila'lé'enē' lē' na' benē' Pablo, gula'sí lógaquië' tu'ē zidzaj didza' lu didza' tu'ē bönni' Licaonia na', ta'nné':

—¡Yugu' dios bönni' ni! ¡Nuhuótjagaquië' ga zóaru', en tu'luí'i cuíngaquië' ca nácagaquië' bönni'!

¹² Gula'nnē' Bernabé na' náquië' Júpiter, ca lē' dios lo quégaquië', ate' gula'nnē' náquië' Pablo Mercurio, ia'tú dios quégaquië'. Caní gula'nnē' tu' ru'ē didza' Pablo ca na' ta'nnē' runē' Mercurio na'. ¹³ Zoa yudo' que Júpiter ga ni' nacué, cuíta nōza ga ni' ta'yaza bōnachi lu yōdzō na'. La' bidxintē' bixúz que Júpiter na', nachē'ē-ba' yugu' bēdxi, en nu'ē ca' yugu' bregui' yōj, ate' dzágagaca bōnachi zían lē'. Gul'ēnnē' ilútiē'-ba' bēdxi na' lógaquië' Pablo, en Bernabé para ila'yéaj lādxi'gaquië' légaquië' ca tunē' quégaca dios quégaquië'. ¹⁴ Cate' Bernabé, en Pablo, gubáz na' nasól-lē'è Cristo, guléquibe'enē' lē' ni, gula'chözē' lari' nácagaquië'. Tu'huí'ininé' tu' tunē' bönni' ni le cabí ral-la' ilunē', ate' gula'xítí'ē, en yōjcu'ē gatsaj lāhui'lō bōnachi zían na', en gulu'ē zidzaj didza', tē' légaquië':

¹⁵ —¡Libí'ili' bōnachi! ¿Bizx que runli' caní? Lē'sca' bönni' ca libí'ili' nácatu', en riguíxjōi'itu' libí'ili' lē' ni caz ral-la' ucá'anali', le cabí nácate', para guéquili' queē' Dios ban. Dios ni benē' lúzhiba, en yōdzōlió, en nísado', en yúgu'tē' le nacué' tu tu lataj na'. ¹⁶ Yugu' iz chigula'dōdi, gulún yúgu'tē' bōnachi ca rnasō que queēguequi, ate' Dios bití' buzáguē'ē xinōzguequi, ¹⁷ pero benē' ga gulaca le tun ba nalí queē', yugu' le nácagaca dxi'a benē' quégaquië'. Risól-lē'è queēru' nisa guiōj, en runē' ga ta'yán le rázaru'. Ruzōlaj rudzé'enē' rē'u, en runē' ga rudzeja lādxi'ru'.

¹⁸ Sal-la' Bernabé, en Pablo gulē' légaquië' caní, cánnisō bila'déli'nē' bulu'záguē'ē xinōzguequi bōnachi zían na', para cabí ilútiē'-ba' bēdxi na' lógaquië'.

¹⁹ Ní'irö bal-lē' bönni' judío bití' ta'yéajlè'è, narúajgaquië' Antioquía, en Iconio, bila'dxinē' ni', ate' gula'gú'u yól-lē'è bōnachi zían na'. Ní'irö yúgu'tē' bulu'ladxē' Pablo guiōj, en gulá'ayōjē' lē' ní'ilō ra' yōdzō na', tu' téquinē' chinátíē'. ²⁰ Ní'irö bulu'dubē' yugu' bönni' ta'yéajlè'è Cristo idú gásibi'ilō ga dē' Pablo. Guyasē' lē', en buáziē' lu yōdzō na'. Cate' za' rení' ia'tú dza, burúajlenē' Bernabé, yōjáquië' yōdzō Derbe.

²¹ Lu yōdzō ni' gulunē' libán que didza' dxi'a ca naca queē' Jesucristo, ate' bōnachi zían ni' gula'yéajlè' Cristo. Gudōdi ni' yōjhuōjgaquië' Lистра, en Iconio, en Antioquía. ²² Cate' gula'dōdē' Bernabé, en Pablo yugu' yōdzō na', bulu'tipē' lādxi'gaquië' bönni' ni' ta'yéajlè'è Cristo, en bulu'sē'è lādxi'gaquië' ulu'gá'anē' tsutsu ca na' ta'yéajlè'è Lē'. Gulē' légaquië':

—Rē'u tsaza cázaru' ga rinná bē'è Dios, run bayudxi quí'i sáca'ru' zían le gaca queēru'.

²³ Bulu'cu'ē yugu' bönni' gula ilún chi'ē bōnachi queē' Cristo tu cō' huéaj bōnachi ni' queē' Cristo. Cate' chigulú'ilenē' Dios didza', en gulunē' gubasa, ní'irö gula'gu'ē légaquië' lu nē'è Xanru', Nu na' ta'yéajlè'è.

Pablo, en Bernabé tu'dxinē' Antioquía luyú Siria

²⁴ Ní'irö Pablo, en Bernabé gula'dōdē' luyú Pisidia, ate' bila'dxinē' luyú Panfilia. ²⁵ Budxi gulunē' libán que xtídzē'è Cristo lu yōdzō Perge, yōjáquië' yōdzō Atalia. ²⁶ Bulu'zé'è ni', ate' gula'benē' tu lē'e barco, en bulu'dxinē' yōdzō Antioquía, ga na' nacué bönni' queē' Cristo, bönni' na' gula'sól-lē'è légaquië'

tsöjéngaqüë' libán, cate' ni' gula'gu'ë légaqüë' lu në'ë Dios, Nu na' ruzá' ladxi' quégaqüë' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquía, bulu'dubi bönachi queë' Cristo nacua' ni'. Ní'irö Pablo, en Bernabé bulu'siyönnë' légaqüë' ca náagaca le zxön benë' Dios lu ná'agaqüë', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. ²⁸ Pablo, en Bernabé bulu'gá' analenë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzo Jerusalén

¹ Ní'irö bal-lë' bönni' narúajgaqüë' luyú Judea bila'dxinë' yödzo Antioquía, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipëla'li' ca nalëbitu' runtu' ca na' gunná bë'ë Moisés, bití' gaca uláli'.

² Ní'irö Pablo, en Bernabé gula'díl-lalenë' légaqüë' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjáqüë' Jerusalén, en ila'dxinë' lógaqüë' gubáz ni' queë' Cristo, enca' lógaqüë' bönni' gula tapa chi'ë bönachi queë' Cristo ni', para iluí'ilenë' légaqüë' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacua'ë Antioquía bulu'gu'ë légaqüë' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóaqüë' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacua'ë ni', enca' yugu' gubáz nasöl-lë'ë Lë', en yugu' bönni' gula tapa chi'ë gulunë' légaqüë' bal. Pablo, en Bernabé bulu'siyönnë' légaqüë' yúgu'të le benë' Dios lu ná'agaqüë'. ⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipëla'gaqüë' bönni' izá'a na' ta'yéajlë'ë Cristo, en inná bé'eru' légaqüë' ilunë' ca rnna bë' xibá queë' Moisés.

⁶ Ní'irö bulu'dubë' gubáz nasöl-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca. ⁷ Gudödi gulu'ë zían didza', guzuínë' Pedro, en gudxë' légaqüë':

—Libí'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo. ⁸ Dios, Nu nunbë' caz le yu'u icja ládxi'do'gaca bönachi, buzöë' le naca bë' runë' légaqüë' bal, gusöl-lë'ë Dios Bö' Lá'ayi quégaqüë', ca na' gusöl-lë'ë Lë' queëru'. ⁹ Bití' butsé'ë ca benë' quégaqüë', en queëru', en lësca' bunë' dxi'a icja ládxi'do'gaqüë' tu' ta'yéajlë'ë Cristo. ¹⁰ Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le. ¹¹ Rë'u ni, réajlë'ëru' nuláru' ni'a que le buzá' ládxi'ë Xanru' Jesús queëru', en ca na' nuláru' rë'u, ulu'lë' ca' légaqüë'.

¹² Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zë nágagaqüë' didza' gulu'ë Bernabé, en Pablo. Bulu'siyönnë' légaqüë' yugu' le taca bë', en le tun ga tu'bani bönachi, yugu' le benë' Dios lu ná'agaqüë' ga nacua' bönachi izá'a. ¹³ Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libí'ili', böcha'a. Buli'zë nágali' le guía' libí'ili'. ¹⁴ Simón Pedro chigudíxjöi' quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi

nútsa'gaca ladjagaquië'. ¹⁵ Ca naca lë ni röjlözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

¹⁶ Dza tödi lë ni huöda', en uchisa' Nu inná bë', bönni' na' tsázië' xilatjé' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

¹⁷ para ulu'guilaj ia'zíca'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

¹⁸ Caní rnnë' Xanru',

Nu na' dza ni'te ben ga naca bë' yúgu'të lë ni.

¹⁹ 'Que lë ni na' runi neda' biti' ral-la' gun níguiru' bönachi izá'a, nupa tu'huöaca queë' Dios. ²⁰ Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guiöj budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' bíti'tës böa' guixi'. ²¹ Dza ni'te nacué' yúgu'të yödzö nupa tun libán lu yu'u gapa tu'dubë' bönni' judío, en tu'sedë' queë' Dios. Tunë' libán ni' que le buzúajé' lu guichi Moisés. Tu'laba cazë' le yugu' dza lá'ayi.

²² Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ladjagaquië', en ila'söl-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ladjagaquië' böchi'ru' ni'. ²³ Bulu'zúajé' lu guichi le bulu'dödë' lu ná'agaquië' ilu'ë, le rnna caní:

"Netu', gubáz nasöl-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia. ²⁴ Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. ²⁵ Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'. ²⁶ Chiyöjácië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. ²⁷ Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni. ²⁸ Dios Bö' Lá'ayi bulu'ínë' netu' le raza ládxi'ë, en lësca' caní raza ládxi'tu' netu', biti' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

²⁹ Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lë ni, gunli' dxi'a."

³⁰ Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachi queë' Cristo nacué' ni', ate' gula'gu'ë guichi na' lu ná'agaquië'. ³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhuë' tsahui' légaquië'. ³² Tu' nácagaquië' Judas, en Silas bönni' tu'ë didza' uláz queë' Dios bulu'huë' tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'.

³³ Gudödi bulu'dzënë' Judas, en Silas ni' nababa dza, ní'irö böchi'ru' ni'

bulu'zenë légaquië' dxi'a didza' para tsöjhuöajgaquië' Jerusalén ga nacu'ë bönni' gula'söl-lë'ë légaquië'. ³⁴ Guyaza ládxë'ë Silas bugá'anë' Antioquía. ³⁵ Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacu'ë yúgu'të yödzö gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unnë' Bernabé ila'ché'ë-bi' bi'i Juan Marcos, tséajlenbi' légaquië', ³⁸ pero biti' guyaza ládxë'ë Pablo ila'ché'ë-bi' tséajlenbi' légaquië' tu' bulá'alenbi' légaquië' luyú Panfilia, en bítirö yöjénlenbi' légaquië' dxin queë' Xanru'. ³⁹ Biti' guca tuz xtídzä'gaquië' Bernabé, en Pablo ga bidxintë bulu'lá'alenë' tuë' ia'tuë'. Bernabé guchë'ë-bi' bi'i Marcos, ate' gula'benë' tu lë'e barco, yójáquië' luyú Chipre. ⁴⁰ Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'. ⁴¹ Gula'dödë' yugu' yödzö luyú Siria, en Cilicia, ate' bulu'tipë' ládxí'gaca bönachi queë' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxinë' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' zxi'ininu tu nigula judío réajlë'ënu Cristo, pero xúzibi' biti' náquië' judío. ² Yugu' böchi'ru' nacu'ë Listra, en Iconio tunë' ba nalí queëbi', ta'nnë' runbi' le naca dxi'a. ³ Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzö ni', tu' nöziguequinë' yúgu'të' xúzibi' biti' náquië' judío. ⁴ Cate' Pablo, en nupa dzágagaca lë' gula'dödë' gapa nacua' yödzö ni', tu tu yödzö na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasöl-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'. ⁵ Caní guca, bönachi yúgu'të cö' bönachi queë' Cristo bila'dipa ládxí'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla bëchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia. ⁷ Cate' bila'dxinë' luyú Misia, gulë'ënnë' tsójáquië' luyú Bitinia, pero Dios Bö' Lá'ayi, Nu risöl-lë'ë Jesús queëru', biti' bë'ë légaquië' lataj. ⁸ Ní'irö gula'dödë' gala' ga dë Misia, ate' yójáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. ⁹ Lu yödzö ni' Dios buluí'inë' Pablo tu le bilé'enë' lu yëla bëchigal. Tu bönni' Macedonia buluí'i lahuë' lë', zuiné', en ráta'yue' lahuë' Pablo, rnnë': “Gudödi ladztu', lu xiyú Macedonia, en gúcalen netu'.” ¹⁰ Cate' bilé'enë' Pablo lë ni, lë na' buluí'i lahui lë', la' bë' ládxí'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudödítu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië'

bönachi uládz quégaquië'. Lu yödzo nisö guzóatu' nababa dza. ¹³ Cate' bidxín tu dza lá'ayi, birúajtu' lu yödzo, en guyéajtu' ra' yegu ga na' tu'dubi caz bönachi yödzo na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. ¹⁴ Nútsa'nu ladjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzë náganu didza' ru'ë Pablo, ate' Xanru' gúcalenë'-nu para guzxi' lu ná'anu didza' na' bë'ë. ¹⁵ Ní'irö bidílanu lënu nisa, ate' gula'dila ca' nisa bönachi nacua' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zídë'ë dumí yugu' bönni' xanbi'. ¹⁷ Bi'i nigula ni sudunóbi'-në' Pablo, en netu', ru'ibi' zidzaj didza', rnnabi':

—¡Yugu' bönni' ni tunë' xichinë' Dios nayépisëtëre'! ¡Tu'siyönnë' libí'ili' naca gaca uláli'!

¹⁸ Caní benbi' zían dza. Cate' bíti'rö guyaza ládxe'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'sö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi.

²⁰ Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzo ni.

²¹ Tu'sëdinë' le cabí ral-la' si' lu ná'aru', en bití' ral-la' gunru', tu' nabábaru' Roma.

²² Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácagaquië' Pablo, en Silas, ate' gula'guínë' légaquië' gubá'ayi. ²³ Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. ²⁴ Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zön ní'agaquië'.

²⁵ Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'. ²⁶ Ní'irö tsálido'os gudödi budó'z xu' bach. Caní guca ga bidxintë guzxizi xilibi zö'ö lidxi guíë na', ate' la' gula'yáljatë yúgu'të gapa nu riyaza, ate' bulu'huédxi ca' yugu' du guíë nága'gaca bönni' nadzúngaquië' ni'. ²⁷ Bubanë' bönni' na' rusayjë' lidxi guíë. Cate' bilé'enë' nayáljagaca gapa nu riyaza lidxi guíë na', gulecjë' guíë tuchi' queë' para guti cuiné', tu' réquinë' chibulu'zxúnnajë' bönni' nadzúngaquië' lidxi guíë na'. ²⁸ Ní'irö Pablo zidzaj bulidzë' lë', gunné':

—¡Bití' bi gúni cuinu', tu' zóatu' ni yúgu'tëtu'!

²⁹ Ní'irö bönni' na' gunabë' guí', ate' gudá'atë' lu yu'u lidxi guíë na'. Guzxízidë'ë lu yöl-la' radxi, ate' biyéchuë' xiní'agaquië' Pablo, en Silas. ³⁰ Cate' chinubéajë' légaquië' lidxi guíë na', gudxë' légaquië':

—Libí'ili', bönni', ¿bizxi ral-la' guna' para ulá'?

³¹ Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

³² Gulu'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacua' lidxë'. ³³ La' ná'asö, ni' naca chi'i dzö'ölö la' guchë'të' légaquië', ate' yöjtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacua' lidxë'. ³⁴ Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

³⁵ Cate' za' rení' dza na', yugu' bönni' yúlalui' gula'söl-lë'ë ni'a ná'agaquië', ate' gulë' bönni' na' rusayjë' lidxi guié':

—Busán-gáquië' bönni' na'.

³⁶ Ní'irö bönni' na' rusayjë' lidxi guié' gudíxjöi'inë' Pablo didza' ni, gunné':
—Gula'söl-lë'ë bönni' yúlalui' didza' usana' libí'ili. Na'a, guli'ruaj, en buli'huöaj dxí'ado' ga rizóali'.

³⁷ Ní'irö birúajë' Pablo, en gudxë' yugu' ni'a ná'agaquië' bönni' yúlalui' na', gunné':

—Chigula'guinë' netu' lógaca bönachi sal-la' biti' narúguini queëtu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsë' netu' bagáchi'sö? ¡Biti' ca' gaca! ¡Ilídigarë' légaquië' udusángaqüie' netu'!

³⁸ Yöjhuöjgaquië' ni'a ná'agaquië' bönni' yúlalui' na', en bulu'siyönnë' yugu' bönni' yúlalui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma. ³⁹ Cate' bila'dxinë' lidxi guié' ni', guláta'yuë' lógaquië' Pablo, en Silas cabí ulu'subáguë'ë légaquië' xíguia'. Ní'irö gula'béajë' légaquië' lidxi guié' na', en guláta'yuë' lógaquië' ulu'ruajë' yödzö na'. ⁴⁰ Ní'irö bila'ruajë' Pablo, en Silas lidxi guié' na', ate' gula'yázië' lídxinu Lidia. Cate' chibila'lé'enë' böchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sédë' queë' Dios. ² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bë'lenë' légaquië' didza'. ³ Buchila lá'anë', en bulu'inë' légaquië' rusëdi le nazúaj lu guíchi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxön Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. ⁵ Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'tubë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶ Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'ché'ë légaquië' lógaquië' bönni' yúlalui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzölió chibila'dxinë' ca' ni.
⁷ Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë'

César, bönni' rinná bé'enë' rë'u, ta'nnë': "Zoë' ia'tué' bönni' rinná bë'ë, lë' Jesús."

⁸ Cate' bila'yönnë' yugu' bönni' lu yödzö, en yugu' bönni' yúlahui' na' lë' ni, gula'bö'ë bö'niga. ⁹ Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquië'.

Le gulunë' Pablo, en Silas lu yödzö Berea

¹⁰ Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. ¹¹ Gulácarë' tsahui' bönni' ni ca bönni' nacu'ë Tesalónica, tu' gula'zí' lu ná'agaquië' xtídzë'ë Xanru' idú láchxi'gaquië'. Yugu' dza bulu'labë' dxi'a le nazúaj lu guichi lá'ayi, para iléqui'be'enë' channö nácatë lë' na' rnnë' Pablo. ¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. ¹³ Ní'irö cate' guléqui'be'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bö'nachi zían. ¹⁴ Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea. ¹⁵ Yugu' bönni' Berea na' gula'ché'ë Pablo lu yödzö Atenas. Ní'irö la' yöjhuöjgacaté' lu yödzö Berea, tu'ú'ë xtídzë'ë Pablo, para ilë' Silas, en bi'i Timoteo, tsöjácaté' ga ni' zoë' Pablo.

Le benë' Pablo lu yödzö Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhuí'ini láchxë'ë tu' rilé'enë' ta'yéaj láchxi'gaca yúgu'të bö'nachi yödzö na' yugu' budó' guiöj budó' yaga. ¹⁷ Que lë' ni na' bë'lenë' bönni' judío, en bönni' ta'yéaj láchxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bë'lenë' nupa ta'dá lu yë'ëyi didza' ca naca xtídzë'ë Cristo. ¹⁸ Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'ílenë' Pablo didza'. Bal-lë' gula'nnë':

—¿Bizxi ré'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. ¹⁹ Ní'irö gula'guélé'ë në'ë Pablo, en gula'ché'ë lë' lu guí'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yö'nitu' didza' cubi ni rusiyönnu' netu'? ²⁰ Rusiyönnu' netu' le tun ga rubánitu'. Ré'ënitü' inözitu' bizxi rna didza' ni ru'u.

²¹ Biti'rö ta'yaza láchxi'gaquië' ilunë' bönni' Atenas na', en bönni' izá'a nacu'ë ni', pero ila'yö'nisinë', en ilu'isë' didza' tu le cubi.

²² Ní'irö guzuínë' Pablo gatsaj láchxi'lö lö'a Areópago na', gunné':

—Bönni' Atenas, yúgu'të le rilé'eda' naca bë' reaj láchxi'da'ali' yugu' dios queëli'. ²³ Cate' gudöda' lu yödzö, en buyúgaca' yugu' le reaj láchxi'li', yöjxáca'a ca' tu nichu ga ni' nazúaj le rna caní: "Tu Dios, Cuntu Nu Nunbë' Lë'." Dios na' reaj láchxi'li'-në' sal-la' biti' núnbë'ëli'-në', Dios ni runa' libán queë' lolí'.

²⁴ 'iDios ni benë' yödzölió, en yúgu'të le nacuá' yödzölió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bö'nachi! ²⁵ Biti' bi riyadzaj queë' le gaca ulu'nödzej bö'nachi, tu' runödzejë' Lë' cazë' quégaca yúgu'të bö'nachi yöl-la' na'bán, en yúgu'të le riquíniru'.

²⁶ 'Lë' benë' tuzë' bönni' ga zá'gaca yúgu'të bö'nachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guiljë' Lë', channö nácati'tës ila'dzölinë' Lë' sal-la' ila'gán ila'zönsë'.

Caní raca sal-la' biti' zoë' zi'tu' ga zóaru' tu turu'. ²⁸ Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa bulu'zúaj le do' rúl-lali', le ta'nná: "Di'a dza queë' Dios nácaru'." ²⁹ Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícjaguequi. ³⁰ Dios budödë' cá'asö yugu' le gulunë' lu yöl-la' biti' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idútë yödzülió ulu'bí'i ládxi'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yóniguetu' ia'tú lë ni ru'u didza' que.

³³ Ní'irö burúajë' Pablo gatsaj láhui'lö ga na' nacu'ë, söhuöjë'. ³⁴ Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzo Corinto

¹ Gudödi guca lë ni, buzë'ë Pablo yödzo Atenas na', ate' guyijë' yödzo Corinto. ² Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzo Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzo Roma. Guyijë' Pablo ga nacu'ë Aquilo, en Priscila na' ³ tu' naca tuz dxin tunë' Aquilo, en Pablo. Bugá'analënë' légaquië', ate' tsözxön gulunë' dxin, tunë' yugu' yu'u guídido'. ⁴ Cate' nacagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sedë' queë' Dios, ga ni' bë'lenë' légaquië' didza'. Gú'unnë' ulu'inë' yugu' bönni' judío, en yugu' bönni' izá'a nacu'ë ni', naca idútë li le riguíxjö'ë ca naca queë' Jesucristo.

⁵ Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para ulu'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queë'li', calëga neda' nabága'a le. Na'a, uyija' ga nacua' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxi'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sedë' queë' Dios. ⁸ Crispo, bönni' lo que yu'u ga na' tu'dubë' tu'sedë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacua' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. ⁹ Ní'irö Lë cazë' Xanru' gudxë' Pablo lu yëla bëchigal, gunné':

—Biti' gádxinu', en biti' su' dxisö, quíxjö'u xtídzá'a, ¹⁰ tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiguequi quia' bönachi zían lu yödzo ni.

¹¹ Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

¹² Cate' bidxin dza rinná bē'ē Galión luyú Acaya, guláquiē' tuz bōnni' judío bití' ta'yéajlè', ate' gula'dá'báguē'ē Pablo, en gula'chē'ē lē' ga rō'ē ruchi'a rusōrōē' Galión na'. ¹³ Gulē' Galión na':

—Bōnni' ni rigú'u yōl-lē'ē bōnachi para ilunē' bal Dios, ca ridá'baga' xibá queētu'.

¹⁴ Cate' chizóa gu'ē didza' Pablo, Galión na' gudxē' yugu' bōnni' judío, rnnē': —Libí'ili', bōnni' judío, la'tu' guca tu le riguitsaj xibá queē' César, o tu le ruá' dō', guá' ilena' uzé naga' xtídza'li' ca ral-la' guna', ¹⁵ pero channō naca didza' bizxaj que dídza'sō, o que lágaca bōnachi, en ca naca xibá queézili', guli'cá'ana tsahui' libí'isili', tu' cabí' rē'ēnda' neda' gaca' nu uchi'a usōrō yugu' le caní.

¹⁶ Ní'irō Galión bulágui'ē légaquiē' lu yu'u yúlahui'. ¹⁷ Ní'irō yúgu'tē bōnni' uládz na' gula'guélē'ē Sóstenes, bōnni' lo que yu'u ga tu'dubē' bōnni' judío, en tu'sédē' queē' Dios, ate' gula'guínē' lē' lō'a yúlahui', pero bití' bē' ládxe'ē Galión lē na' raca.

¹⁸ Pablo bugá'anē' lu yōdzō na' zían dza, ate' gudōdi busiyōnnē' bōchi'ru' nacué' ni' didza', guyijē' yōdzō Cencrea, ga ni' benē' yútusō icjē', tu' dē tu le nazí' lu nē'ē lahuē' Dios gunē'. Ní'irō gurenē' tu lē'e barco, para tsejē' luyú Siria, dzágagaquiē' lē' Priscila, en Aquilo. ¹⁹ Cate' bila'dxinē' yōdzō Éfeso, Pablo bulá'alenē' légaquiē' ni'. Guyáziē' lu yu'u ga tu'dubē' bōnni' judío, en tu'sédē' queē' Dios, ate' bē'lenē' nupa nacué' ni' didza'. ²⁰ Yugu' bōnni' ni' guláta'yuē' lahuē' Pablo ugá'analenē' légaquiē' ia'lati' xidzé, pero lē' bití' gú'unnē'. ²¹ Bē'lenē' légaquiē' didza', gunné':

—Run bayudxi soa' gapa' laní' si' gaca Jerusalén, ate' leyúbölō huōda' ga ni zóali', channō guē'ēnnē' Dios.

Ní'irō gurenē' Pablo tu lē'e barco, en buzē'ē Éfeso na'.

Ridxinē' Pablo Antioquía, ate' risí lahuē' rōjenē' libán le bunni luzuí

²² Gudōdi bidxinē' Pablo yōdzō Cesarea, gurenē' guyijē' Jerusalén, ga ni' yōjyúē' bōnachi queē' Cristo, ate' ní'irō buzē'ē ni', en guyijē' Antioquía. ²³ Gudōdi zoē' ni' nababa dza, buzē'ē ni', sa'yéajē' tu tu yōdzō luyú Galacia, en Frigia. Benē' tsutsu bōchi'ru' nacué' ni' ca naca le ta'yéajlē'ē Cristo.

Runē' libán Apolos lu yōdzō Éfeso

²⁴ Tu dza ni' bidxinē' Apolos, tu bōnni' judío lu yōdzō Éfeso. Guljē' bōnni' ni lu yōdzō Alejandría, en nabé'ede'enē' ru'ē didza', en nazédadē'ē le nazúaj lu guichi lá'ayi. ²⁵ Chinazēdē' bōnni' ni ca naca le réajlē'ēru' Xanru'. Idú ládxe'ē bē'ē didza', en ca nácatē busédinē' bōnachi ca naca queē' Jesús, sal-la' núnbē'ē tuz le ruquíla bōnachi nisa ca benē' Juan. ²⁶ Gusí lahuē' Apolos ru'ē didza' idú ládxe'ē ga naca lu yu'u ga tu'dubē' bōnni' judío, en tu'sédē' queē' Dios. Cate' Priscila, en Aquilo bila'yōnnē' didza' ru'ē Apolos na', gula'chē'ē lē' quez, en bulu'zéajni'irōnē' lē' xibá queē' Dios. ²⁷ Cate' gú'unnē' Apolos tōdē' luyú Acaya, bulu'tipē' ládxe'ē, ate' bulu'zúajē' tu lu guichi le tsōjuá'gaquiē' quégaquiē' bōnni' teaj ládxe'ē Cristo luyú Acaya na', para ilunē' Apolos na' bal. Cate' bidxinē' Apolos luyú na', yugu' bōnni' ni' teaj ládxe'ē Cristo bulu'zídē'ē xibé didza' ru'ē Apolos na', tu' ruzá' ládxe'ē Dios quégaquiē'. ²⁸ Caní guca, tu' bucul-lē' Apolos na' yugu' bōnni' judío ni' lógaca yúgu'tē bōnachi, tu' bugunē' dxin le nazúaj lu guichi lá'ayi, en bulu'e bōnni' na' Jesús naca cazē' Cristo.

19

Le benē' Pablo lu yōdzō Éfeso

¹ Tsanni ni' zoë' Apolos lu yödzo Corinto, gudödë' Pablo gapa nacuá' yödzo ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitu' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidí'ali' nisa?

Ta'nnë':

—Ca buquílë' Juan bönachi nisa.

⁴ Pablo gunnë':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'tëlë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. ⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. ⁷ Guláquië' bönni' ni idú chínnuë'.

⁸ Guzöë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ladxi' benë' libán lógaquië'. Bë'lenë' légaquië' didza', en gú'unnë' ulu'ínë' légaquië' nácatë le riguíxjö'ë ca rinná bë'ë Dios. ⁹ Ní'irö bizídi icja ládxi'do'gaquië' bal-lë', en biti' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bë'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. ¹⁰ Caní béntica'së' Pablo idú ca chopa iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a. ¹¹ Dios benë' yugu' yöl-la' huáca zxön lu në'ë Pablo. ¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzo hué' que queëgaquië', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ní'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

¹⁴ Caní gulunë' gadxi bönni' zxfí'në' Esceva, tu bönni' judío náquië' bönni' lo ládjagaquië' bixúz unná bë'. ¹⁵ Bubi'i didza' bö' xihui' na', gunná:

—Núnbë'a-në' Jesús, en núnbe'eda' bönni' lë' Pablo, pero libí'ili', ¿núzxitë libí'ili'?

¹⁶ Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en hué'gacatézë' bulu'zxúnnajë' gadxë' bönni' na' lu yu'u ni'. ¹⁷ Guzë' didza' ca guca lë' ni, ate' bila'yöni yúgu'të nupa nacuá' lu yödzo Éfeso, bönachi judío, en bönachi izá'a, ate' yúgu'të' guládxinë' Dios. Que lë' ni na' gulunë' zxön Lë' Xanru' Jesús.

¹⁸ Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'. ¹⁹ Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tsa

nazáca'gaca guichi na', le guca idú chi un mil dumí plata. ²⁰ Caní guca, guzēda' xtídzē'ē Xanru', en bidéli'da' bönachi zían. Idú ládxi'gaquiē' gula'yéajlē'ē Cristo.

²¹ Gudödi gulaca lē ni, benē' queē' Pablo tsejē' Jerusalén, pero zí'alō ral-la' tödē' yugu' yödzö luyú Macedonia, en luyú Acaya, ate' gunnē':

—Tödi tseja' Jerusalén, run bayudxi tseja' ca' Roma.

²² Ní'irō gusöl-lē'ē-bi' chópabi' bi'i bönni' tácalenbi' lē', légacabi' Timoteo, en Erasto, luyú Macedonia, pero bugá'anē' lē' nababa dza luyú Asia na'.

Tu'tsatsa bönachi lu yödzö Éfeso

²³ Bulu'tsatsa bönachi Éfeso dza ni', ate' gula'dá'baguē'ē xtídzē'ē Xanru'.

²⁴ Benē' Demetrio, bönni' gubēdxi guié plata ga bulu'tsatsē'. Run cazē' yugu' lidxi budó' guiōj budó' yaga néquiguequini plata que dios quégaquiē', lēnu Diana. Gula'zi'ē bönni' tunē' dxin ni dumí bach. ²⁵ Butubē' Demetrio na' ia'zica'rē' bönni' tunē' la' dxin nisö, ate' gudxē' légaquiē':

—Böcha'a, nöz quézili' ca naca dxin runru', runna dumí queēru'. ²⁶ Rilé'eli', en riyōnili' ca runē' Pablo na'. Calégasö Éfeso ni, pero idú luyú Asia chibidéli'nē' bönachi zían, ate' chibutsē'ē ca tunē', tu' rē' légaquiē': "Yúgu le núngaca bönachi biti' nácagaca dios." ²⁷ Calégasö zoa bönadxi ugá'ana cá'asö dxin ni runru', pero lēasca' zoa bönadxi ugá'ana cá'asö yudo' que dios zxön lēnu Diana. Caní gaca, ugá'ana cá'asö yöl-la' zxön queēnu, dios ni ta'yéaj ládxi'gacanu bönachi idútē luyú Asia, enca' idútē yödzölió.

²⁸ Cate' yugu' bönni' na' bila'yönnē' didza' ni, gula'léde'enē', ate' gulu'ē zidzaj didza', ta'nnē':

—Nácatērönu zxön Diana, dios queēru' rē'u, bönachi Éfeso.

²⁹ Caní guca, bulu'tsatsa bönachi idútē lu yödzö na', ate' guláquiē' tuz, en carelö yójáquiē' lö'a yúlahui'. Gulá'ayöjē' Gayo, en Aristarco, bönni' Macedonia túngaquiē' Pablo tsözxön, ga ni'. ³⁰ Cate' gú'unnē' Pablo tsáziē' ga nacuá' bönachi zían na', biti' ca' gulu'ē lē' lataj bönni' ta'yéajlē'ē Cristo. ³¹ Lēasca' caní gulunē' bal-lē' bönni' yúlahui' que luyú Asia, bönni' ta'lé'enē' Pablo dxi'a. Gula'söl-lē'ē queē' nupa guláta'yu lahuē' biti' tsaziē' lö'a yúlahui' na'. ³² Ga ni' tu'tsatsē', en ta'bödxí'ē, tu le ta'nnē' bal-lē', en ia'tú le ta'nnē' ia'zica'rē', tu' rō'ogacasē' baröli bönni' zían na' tu'tsatsē', en lá'tu'biqui' yúgu'tégaquiē' biti' nözguequinē' bizx que na' nudúbigaquiē' ni'. ³³ Ní'irō yugu' bönni' judío gula'béajē' Alejandro ladaj bönachi zían na', ate' bulu'dxíguē'ē lē' lógaca bönachi zían na'. Bulu'e Alejandro na' len nē'ē para ila'bō' dxisö, tu' gú'unnē' gu'ē didza' le gácalen yugu' bönni' judío na' lógaca yúgu'téguequi. ³⁴ Cate' guléquibe'enē' náquiē' judío, yúgu'tē' gulu'ē tsözxön zidzaj didza' idú ca chopa hora, ta'nnē':

—¡Nácatērönu zxön Diana, dios queēru' rē'u bönachi Éfeso!

³⁵ Ní'irō bönni' uzúaj que yúlahui' benē' ga gula'bō' dxisö bönachi zían na', gunnē':

—Bönni' Éfeso, nözigaca yúgu'tē bönachi zoa yudo' queēnu Diana, dios zxön, ni. Rē'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba. ³⁶ Cuntu nu gaca tá'baga' lē ni. Que lē ni na' run bayudxi sóali' dxisö, en biti' bi gúntézili'. ³⁷ Nachē'gacali'-nē' bönni' ni, en biti' ta'banē' le dzö'ö yudo', en biti' ta'nnē' xihuē'ē queēnu dios queéli'. ³⁸ Que lē ni na', channö zoa didza' bizxaj quégaquiē' Demetrio, en yugu' bönni' gubēdxi guié plata nacuá'lenē' lē', len nútí'tēs bönni', dē lataj ga nu uzē nagui légaquiē', en zoa nu uchi'a usörö légaquiē'. Ni' huáca ulu'zegui luzá'agaquiē' didza' tuē' ia'tuē'. ³⁹ Na'a, channö dē ia'tú le inábali', huáca ucá'anaru' tsahui' le cate'

ulu'dubi bönni' yúlahui' ca na' rinná bē' yúlahui'. ⁴⁰ Zoa bönadxi nu uzegui rē'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

⁴¹ Cate' budxi bē'ē didza' ni, busöl-lē'ē bönachi zián na' nudúbigaca ni' tsöhuöjgaca lídxiguequi.

20

Sa'yéajē' Pablo luyú Macedonia, en luyú Grecia

¹ Cate' gurö'ö dxi dzatsa na' guca lu yödzo Éfeso, bulidzē' Pablo yugu' bönni' ta'yéajlē'ē Cristo, ate' guchíziē' icja nágagaquiē' didza'. Gudödi ni' bunidē' légaquiē', en la' bulá'alentē' légaquiē'. Birúajē' ni', ate' sa'yéajē' luyú Macedonia. ² Gudödē' yugu' yödzo luyú ni', ruzéajni'ide'enē' böchi'ru' nacu'ē ni', ate' gudödi ni' bidxinē' luyú Acaya. ³ Guzöē' Pablo ni' idú ca tsonna beo'. Cate' chizóa cuenē' tu lē'e barco para tsejē' luyú Siria, gúquibe'enē' ta'bö' nísie' bönni' judío lē' para ila'zönē' lē'. Que lē ni na' buguelē'ē nöza söhuöjē' luyú Macedonia, ate' bidxinē' yödzo Filipos. ⁴ Sópater, xzí'inē' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenē' tsözxön lē'. ⁵ Ní'irö yugu' bönni' ni' yöjnörugaquiē' lahuē' Pablo, yöjáquiē' yödzo Troas, ga ni' gula'bözē' lē'. ⁶ Lu yödzo Filipos na', neda', Lucas, yöjtsaga'-nē' Pablo. Cate' chigudödi laní cate' tahuē' bönni' judío yöta xtila bití' nazí'i cúa zi que, gurentu' tu lē'e barco, en buzá'atu' Filipos na'. Gudödi gayu' dza budzágatu' bönni' ni' yöjnörugaquiē' lahuē' Pablo, yöjáquiē' Troas, ate' ni' bugá'anatu' gadxi dza.

Le benē' Pablo lu yödzo Troas

⁷ Dza risí lo le gadxi dza bulu'dubē' bönni' ta'yéajlē'ē Cristo para ilahuē' yöta xtila le rusá' ládxi'ru' ca gútiē' Jesucristo. Ni' rusēdinē' Pablo légaquiē', en tu' ral-la' uzē'ē ni' cate' za' rení' dza na', xidzé bē'ē didza', ga bidxintē gudödi guluhuēla. ⁸ Ga ni' nudúbigaquiē' naca lu yu'u xitsá', ate' nacuá' zián le ta'gú'u bení' ga na'. ⁹ Zóabi' bi'i Eutico ni', rō'öbi' ga ra'a lení' que yu'u na', ate' nadödirö yēla lobi' tu' ritunna libán runē' Pablo. Ga ni' rō'öbi' rásibi' bi'i na' naca ga bunni' cuía lu yu'u, ate' rásisibi' ca' gubíxitebi', böxjabi' ga bidxintēbi' znan yu'u. Nátitebi' bulu'lisē'-bi'. ¹⁰ Bötjē' Pablo znan yu'u na', ate' yöjxöē' lēbi', en bunidē'-bi'. Ní'irö gudxē' nupa nacuá' ni':

—Biti' gadxi idzöbili'. Nabanbi'.

¹¹ Cate' chibubenē' Pablo xitsá', gudélē'ē yöta xtila, gudahuē'. Ní'irö Pablo bē'lenē' légaquiē' didza' ga bidxintē zila balö. Gudödi ni' burúajē' ni'. ¹² Bi'i bönni' ra'bán na' gubíxibi', bulu'ché'ē-bi' nabanbi', en bulu'zí' zxöndē'ē.

Ca guca bidxintu' Mileto

¹³ Gunörutu' lahuē' Pablo, en yöjchentu' tu lē'e barco, ate' gudöditu' ga bidxintu' yödzo Asón para tsöjtságatu'-nē' Pablo ni', para gaca ca na' chibén xtídzatu', tu' gú'unnē' Pablo tsejē' ni' sé'esi ni'ē. ¹⁴ Cate' chibudzágatu'-nē' lu yödzo Asón na', gurénlenē' netu' lē'e barco, ate' guyéajtu' yödzo Mitilene. ¹⁵ Buzá' barco ni', ate' dza buropi bidxintu' tödi li ga zoa luyú bidxi nazí'i le Quío, ate' ia'tú dza ca' gudöditu' tödi li ga dē yödzo Samos, en bidxintu' yödzo Trogilio ga ni' guzóatu' tu chi'i. Ia'tú dza ca' bidxintu' yödzo Mileto. ¹⁶ Caní bentu' tu' chibenē' queē' Pablo tödisē' yödzo Éfeso, para cabí tsenē' luyú Asia, tu' run bayudxi soē' Jerusalén cate' naca dza Pentecostés channö séqui'nē'.

Didza' bē'ē Pablo lu yödzo Mileto

¹⁷ Cate' ni' zoë' Pablo lu yödzo Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso. ¹⁸ Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queëli', ate' zían le guca quia' le guxzí' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo. ²⁰ Béntica'sa' libán ga zóali' que yúgu'të le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. ²¹ Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo. ²² Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. ²³ Yúgu'të yödzo ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guié bönni' judío biti' ta'yéajlë', en ulu'saca' zi'ë neda'. ²⁴ Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxi'ë Dios queëru'. Caní guna' len yöl-la' rudzeja.

²⁵ 'Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'. ²⁶ Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'. ²⁷ Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. ²⁸ Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le bö'áuinë' légaquië'. ²⁹ Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu'sunítiba' yugu' bö'cu' zxila'. ³⁰ Ila'rúajë' bönni' nútsa'gaquië' ládjali', ate' ilu'ë didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ládjali'. ³¹ Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queëli'.

³² 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ládxi'ë queëli', en gunë' ca rna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'. ³³ Catu caz guzé ládxa'a le nequi quégaquië' böchi' luzá'a. Biti' guzé ládxa'a dumí, o lari' quégaquië'. ³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. ³⁵ Ca naca yúgu'të le bena', bulu'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Úzírö xibé nu bi runödzej ca nu bi rizí'."

³⁶ Cate' budxi bë'ë Pablo didza' ni, buzóa zxibë', ate' benë' tsözxön yúgu'të', bulu'lidzë' Dios. ³⁷ Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'. ³⁸ Caní gulunë' tu' bulu'huí'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxön lë' ga na' gurenë' lu barco.

21

Sa'yéajë' Pablo Jerusalén

¹ Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzo Pátara. ² Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. ³ Gudöditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza

barco na' lu yödzo Tiro, tu' ral-la' tsöjca'ana yua' ni' le dzö'ö lë'e barco na'.
⁴ Lu yödzo Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsözxön yúgu'të' len nigula que queëgaquië', en yugu' bi'i queëgaquië', ga bidxíntëtu' ní'ilo ra' yödzo na'. Ra' nísado' ni' buzóa zxíbitu', en bulidztu'-në' Dios. ⁶ Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

⁷ Buzá'atë barco na' lu yödzo Tiro, ate' ga yöjsé bidxín lu yödzo Tolemaida. Burúajtu' lë'e barco na' ni'. Bugápatu' Dios böchi'ru' nacué' ni', ate' bugá'analentu' légaquië' tu dza. ⁸ Cate' za' rení' ia'tú dza, burúajë' Pablo ni', ate' dzágate'-në' netu' guyéajtu' yödzo Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. ⁹ Nacuá'abi' tapa bi'i nigula ra'bán queë' Felipe na', tu'í'ibi' didza' uláz queë' Dios. ¹⁰ Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. ¹¹ Bönni' ni buduyúë' netu', ate' gudélë'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacué' Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a.”

¹² Cate' biyönitú' didza' ni, gúta'yutu' lahuë' Pablo, netu', en nupa nacué' ni', para cabí tsejë' Jerusalén. ¹³ Bubi'ë didza' Pablo, gunné':

—¿Bizxi ni runli', ribödxili', en rusuhu'ínili' neda'? Neda' chizóa caza' sina', calégasö ilúguië' neda', pero gátia' ca' lu yödzo Jerusalén ni'a queë' Xanru' Jesús.

¹⁴ Tu' cabí guzxéqui'tu'-në' didza', bítirö bi gúdxitu'-në', ate' gunnatu':

—Gaca ca raza ládxë'ë Xanru'.

¹⁵ Cate' chigula'dödi dza na', bupa'atu' queëtu', ate' guyéajtu' Jerusalén.

¹⁶ Gula'zá'lenë' netu' bal-lë' bönni' ta'yéajlë'ë Cristo, nacué' Cesarea, ate' dzáguië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

Pablo röjyúë' Jacobo

¹⁷ Cate' bidxintu' Jerusalén, len yöl-la' rudzeja queëgaquië' böchi'ru' ni' ta'yéajlë'ë Cristo gulunë' netu' bal. ¹⁸ Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chí'ë bönachi queë' Cristo nacué' Jerusalén. ¹⁹ Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacué' bönachi izá'a.

²⁰ Cate' bila'yönnë' lë' ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' túndë'ë bal xibá queë' Moisés. ²¹ Chibila'yönnë' yugu' le tu'í' didza' bönachi le ta'nnë' quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpéla'gacabi' bi'i bönni'do' queëgaquië', en biti' ilunë' bal yugu' le nalëbiru' runru' rë'u, bönachi judío. ²² ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. ²³ Na'a, ben lë' ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'. ²⁴ Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusö ícjagaquië'. Ní'irö ila'nözinë' yúgu'të bönni' judío biti' nácatë lë' na' ta'nnë' quiu', pero

lësca' li' runu' le naca dxi'a, en runu' ca rinná bē' xibá queē' Moisés. ²⁵ Ca naca quegaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz:

Biti' ilahuë' le ta'gú'u bönachi lógaca budó' guiöj budó' yaga.

Biti' ilahuë' rön.

Biti' ilahuë' xipëla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

Ta'zönë' Pablo lö'a yudo'

²⁶ Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyázië' lö'a yudo', para gaca bē' bizxi dza údxi ilunë' le tu'un dxi'a cuíngaquië', dza ni' ral-la' tsöjuá'agaquië' le ila'gu'ë lahuë' Dios que queégaquië'. ²⁷ Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo. ²⁸ Gulu'ë zidzaj didza', ta'nnë':

—¿Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dítjanë' lataj lá'ayi ni.

²⁹ Caní gula'nnë' tu' bila'lé'enë' Pablo zí'alö lu yödzö dzáguië' Trófimo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'të bönachi yödzö, ate' bila'guírë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. ³¹ Cate' chitequi quézinë' ilútië' Pablo, bidxín didza' lahuë' bönni' lo rinná bé'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén. ³² Bönni' lo ni la' butúbitë' bönni' röjáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' röjáquië' gudil-la, en bönni' na' röjáquië' gudil-la, bulu'sané' ta'guinë' Pablo. ³³ Ní'irö gubígui'ë bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lë' len chopa du guié. Gudödi ni' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

³⁴ Ta'bödxí'a bönachi zían na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'chë'ë Pablo lu yu'u zxön ga nagá'anagaquië' bönni' na' röjáquië' gudil-la. ³⁵ Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'inë' Pablo, tu' dxíadi'igaca bönachi zían légaquië', ³⁶ en zá'gaca cúdzu'lögaquië', ta'bödxí'a, ta'nná:

—Guli'gútië'.

Didza' bē'ë Pablo uláz queë' lógaca bönachi

³⁷ Cate' ni' gula'sí lógachië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatsö' didza' griego? ³⁸ ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

22

¹ Caní gunnë' Pablo:

—Libí'ili', bönni' gula, en libí'ili' böcha'a. Buli'zé nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzo Tarso luyú Cilicia, pero guzxöna' lu yödzo ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a.

⁴ Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guchë'gaca'-në' ga ilátië'. Guzxöngaca'-në', en gulú'ugaca'-në' lidxi guié', yugu' bönni', en nigula. ⁵ Lësca' huáca ilunë' ba nalí yugu' bixúz unná bë', en yugu' bönni' gula tu zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzo Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' ná'agaquië' Jerusalén ni, para ilácagaquië' xíguia'.

Rigúxjö'ë Pablo ca böáquië' queë' Cristo

⁶ Ní'irö gunnë' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagu-bidza, tsáldo'os guyëpi yösa bení' le za' lúzxiba, le buzení' ga na' sa'yéaja'. ⁷ La' yöjta'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?" ⁸ Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." ⁹ Nupa ni' gula'cuá'len neda' bila'lë'e caz bení' na', en guladxi, pero biti' bila'yöni chi'i Nu na' bulidza neda'. ¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." ¹¹ Tu' cabirö rilé'eda' tu' budí'i yösa bení' na' guyëpida' lahua', que lë' ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

¹² Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': "Saulo, böcha'a, huóalaj guiöj lo'." La' ní'isö böalaj guiöj lahua', ate' bilé'eda' lë'. ¹⁴ Lë' gudxë' neda': "Dios quégaquië' xuz xtó'oru', dza ni'te guró cazë' li' para inözinu' le ré'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guié' Lë' cazë' li'. ¹⁵ Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyönninu'. ¹⁶ Na'a, ¿bizx que ridzenu'? ¡Guyasa, en bidila nisa! Bulidzë' Xanru' para ünë' li' dxi'a, en ugüë' dul-la' nabágu'u."

Cristo gusöl-lë'ë Pablo para gunë' libán lógaca bönachi izá'a

¹⁷ Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. ¹⁸ Bilé'eda'-në' Xanru', ate' gudxë' neda': "¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!" ¹⁹ Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío

queë Dios. Gudina' nupa ni' ta'yéajlë' Li', en gulú'ugaca'-në lidxi guié. ²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guió'j." ²¹ Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

Pablo ruí'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¿Guli'gútië' bönni' ni! ¡Bíti'rö ral-la' soë' ibanë'!

²³ Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös, ²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácate, para ila'nózinë' bizx que na' ta'bödxi'ë bönni' judío caní queë' Pablo. ²⁵ Cate' gulúgui'ë lë' du guídi para ila'guinë' lë', Pablo gudxë' tu' bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabága'a xíguia'.

²⁶ Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

²⁷ Ní'irö bidë' bönni' lo na' ga zoë' Pablo, en gudxë' lë':

—¿Gudixjö! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söröë'

³⁰ Dza buropi ni', gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guié na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

23

¹ Ní'irö buyúdë'ë Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë na'a riböza' dxí'ado'. Caní naca, biti' zoa le ruxösa ládxi'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacuá' cuita lë'ë Pablo ila'gápë'ë ru'ë. ³ Pablo gudxë' lë':

—Lëzca' caní Dios ubi'ë quiu', li', rulu'ísö tsahui' cuinu'. ¿Naru' rö'ö cazu' ruchí'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacuá' ni' të Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', böcha'a. Nazúaj lu guichi, rna: “Biti' ulidza zi'u nu rinná be'e bönachi uládz quiu”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxi'inë' tu bönni' fariseo! ¡Na'a ruchí'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzë'ë la' légacasë'. ⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacuá' bö' náca'ca caz bönachi, pero ta'yéajlë'ë bönni' yudo' fariseo náca'ca yúgu'të lë ni. ⁹ Que lë ni na' gula'bödxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bë'len lë' didza', o channö tu gubáz lá'ayi queë' Dios bë'lenë' lë' didza', biti' ral-la' tá'baga'ru'-në' Dios.

¹⁰ Cate' chita'díl-lada' dídzë'ë bönni' judío na', gúdxinë' bönni' lo na' rinná bë'enë' bönni' röjáquië' gudil-la, tu' réquinë' ulu'zxuzxaj ulu'quínnajë' Pablo. Ní'irö gunná bë'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'chë'ë lë' lu yu'u zxön ga na' nagá'anagaquië' bönni' na' röjáquië' gudil-la.

¹¹ Cate' chinaca chi'i dzö'ölö la' dza ná'asö, buluí'i lahuë' Xanru' ga zoë' Pablo, en gudxë' lë':

—Butipa ládXu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. ¹³ Nayanrö ca choá'gaquië' bönni' na' gulún tsutsu xtídza'gaquië' caní. ¹⁴ Yöjáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. ¹⁵ Na'a, libí'ili', en bönni' yudo' tu'chi'a tu'söröë', guli'guíë' bönni' lo rinná bë'enë' bönni' röjáquië' gudil-la idichë'ë Pablo cuxó para idxinë' ga nudúbili', innalí' ré'ënilí' inábili'-në' Pablo tu didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

¹⁶ Biyönibi' bi'i bönni' queënu nigula zanë' Pablo ca na' ila'bö' nísíë' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo. ¹⁷ Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulidzë' Pablo, bönni' na' yu'ë lidxi guíë, neda', en gúta'yuë' lahua' idigu'a-bi' bi'i ni lo', tu' ré'ënilí' gü'ílenbi' lí' didza'.

¹⁹ Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxó, para idxinë' légaquië' bönni' yudo' tu'chi'a tu'söröë'. Ilë' li' tē'ënnë' ila'nábinë' lë' tu didza' gate ga rë', ²¹ pero bitì' tséajlë'u le ila'nnë' tu' nadödi choá'gaquië' ila'bó' nísie' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Bitì' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

²² Ní'irö bönni' lo na' rinná bé'enë' bönni' röjáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

²³ Ní'irö bönni' lo na' bulidzë' chopë' bönni' nacu'ë tu gáyu'ë bönni' röjáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' röjáquië' gudil-la ta'zë'e ní'agaquië', en tsónnalalaj yu'chië' bönni' röjáquië' gudil-la dxíagaquië' böa', en chopa gáyu'ë bönni' röjáquië' gudil-la ilu'ë yaga tuchi' para tsöjáquië' yödzö Cesarea idú ridödi xtsö'. ²⁴ Lësca' gunná bé'enë' légaquië' ulu'cözë'-ba' tu böa' cuie'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

²⁵ Gusól-lë'ë ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

²⁷ 'Bönni' ni risól-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' röjáquië' gudil-la, en busólá'-në' lu ná'agaquië' judío na'. ²⁸ Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' légaquië' bönni' yudo' tu'chi'a tu'söröë' légaquië'. ²⁹ Cate' buédxì didza', gunözda' tu'zéguië' lë' didza' ca naca le rinná bë' xibá quégaquië', en bitì' bi nabáguë'ë bönni' ni para nu guti lë', o nu cu'u lë' lidxi guie'. ³⁰ Ní'irö cate' bidxín nu gudíxjöi' i neda' ta'bó' nísie' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo' li', para ila'guíxjöi'inë' li' bi didza' nápaagaquië' lë'. ¡Dios gun tsáhuë'ë li'!”

³¹ Ní'irö bönni' na' röjáquië' gudil-la gula'guélé'ë Pablo, en gulunë' ca na' chigunná bé'enë' légaquië', ate' gula'chë'ë lë' yödzö Antípatris, ni' naca chi'i dzö'ölö. ³² Cate' za' rení ia'tú dza bönni' röjáquië' gudil-la ta'zë'e ní'agaquië' yöjhuöjgaquië' Jerusalén, ate' bönni' röjáquië' gudil-la dxíagaquië' böa' bulu'ú'ë nöza, dzágagaquië' Pablo. ³³ Cate' bönni' na' röjáquië' gudil-la nachë'gaquië' Pablo bila'dxinë' Cesarea, bulu'nödzjë' guichi na' lu në'ë bönni' rinná bë'ë uláz que Roma, en bulu'sudxinë' Pablo lahuë'. ³⁴ Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, ³⁵ gudxë' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

24

Pablo ru'ë didza' uláz queë' lahuë' Félix

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bë', ate' gula'nnë' queë' Pablo. ² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bē', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queétu'. ³ Yúgu'tē lē ni ruzí'tica'stu' xibé gáti'tēs, ate' idú ládxi'tu' rētu' li': "Xclenu'." ⁴ Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guíetu' li'. ⁵ Gúquibe'etu' bönni' ni rigú'u yöl-lē'ē bönachi, en runē' ga ta'dá'baguē'ē yúlahui' yugu' bönni' judío nacu'ē idútē yödzölió, en náquiē' bönni' lo quégaquiē' bönni' dá'gaquiē' bönni' Nazaret na'. ⁶ Lēscá' gú'unnē' gun dí'tjanē' yudo' queétu'. Que lē ni na' guzxöntu'-nē', en gú'unitu' uchi'a usörötu' lē' ca naca xibá queétu'. ⁷ Ní'irö Lisias, bönni' lo rinná bé'enē' bönni' röjáquiē' gudil-la bidxinē' ga zóatu', en lu yöl-la' sínia' zxön bugúē' bönni' ni lu na'tu'. ⁸ Ní'irö gunná bé'enē' Lisias na' ídigaca nupa tu'zegui lē' didza' lo' li'. Na'a, li' caz, cate' rinabi yúdxinu'-nē' Pablo ni, huáca inözinu' gate ga rē' yúgu'tē lē' ni ruzéguitu' lē' didza'.

⁹ Lēscá' caní'gula'nnē' yugu' bönni' judío ni', gula'nnē' naca caz caní. ¹⁰ Ní'irö butásö nē'ē bönni' rinná bē'ē uláz que Roma na' para gu'ē didza' Pablo, ate' lē' bubí'ē didza', gunnē':

—Idú ládxa'a quíxjö'a ca naca le runa', tu' chinaca zían iz ruchi'a rusöröu' le raca quégaca bönachi ladztu'. ¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-nē' Dios. ¹² Biti' yöjxáca'gaquiē' neda' nu ridíl-lalena' didza', en biti' bena' ga ulu'tsatsa bönachi ga naca chila yudo', en cabí lu yu'u ga tu'dubē' tu'sedē' queē' Dios, en cabí lu yödzö. ¹³ Biti' ca' gaca ulu'béaj liē' yugu' lē' ni tu'zéguiē' neda' didza'. ¹⁴ Lē' ni rixóalēpa' lo'. Ca runa' xichinē' Dios quégaquiē' xuz xtó'otu' nalēbi ca le tu'sēdinē' légaquiē', pero bönni' judío ni tu'ē le: Le ridá'baga' Dios, tu' réajlē'a yúgu'tē le rinná bē' xibá queē' Dios, enca' yúgu'tē le bulu'zúajē' bönni' gulu'ē didza' uláz queē' Dios. ¹⁵ Ca na' légaquiē' tunē' löza Dios, lēscá' neda' runa' löza Dios, usubanē' nupa chinátigaca, bönachi tsahui', en bönachi biti' nácagaca tsahui'. ¹⁶ Que lē' ni na' ruí'i ládxi'tica'sa' cabí íbága'a le gun ga uxós ládxi'da'ahua' neda' lahuē' Dios o lógaca bönachi.

¹⁷ 'Gudödi zoa' ga yúbölö idú chopa tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigú'a lahuē' Dios. ¹⁸ Tsanni ni' runa' caní, bal-lē' bönni' judío narúajgaquiē' luyú Asia bidixáca'gaquiē' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. ¹⁹ Yugu' bönni' judío ni' ral-la' ila'dxinē' lo' li', en ulu'zéguiē' neda' didza' channö nápagaquiē' neda' didza'. ²⁰ Ila'nnátsöquiē' bönni' judío ni channö bulu'dzölinē' bi le cabí naca dxi'a bena' cate' ni' bidxina' lógaquiē' bönni' yudo' tu'chi'a tu'söröē' légaquiē'. ²¹ Tuz cate' ni' zoa' lógaquiē', bē'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnē' Félix didza' ni, en dxí'ado' chinözinē' ca naca que lē' na' rusēdinē' Pablo, buzē lāhui'sē' ca' didza' bizxaj ni, gunnē':

—Cati' idxinē' Lisias, bönni' lo rinná bé'enē' bönni' röjáquiē' gudil-la, údxi yönida' ca naca didza' bizxaj queēli'.

²³ Ní'irö Félix gunná bé'enē' tu bönni' nacu'ē lu nē'ē bönni' röjáquiē' gudil-la zoē' ni', gun chí'ē Pablo, pero gu'ē lē' lataj tē' lö'a, en biti' uzáguē'ē xinözgaquiē' böchi' luzē'ē duyúgaquiē' lē' bi dxin ilunē' queē'.

²⁴ Chopa tsonna dza gudzé, bidē' leyúbölö Félix na'. Drusila, nigula queē' dzáganu lē'. Nácanu nigula judío. Félix bulidzē' Pablo, ate' buzē náguiē' xtídzē'ē ca naca le réajlē'ēru' Jesucristo. ²⁵ Cate' bē'ē didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröē' Dios rē'u dza sí' za', ní'irö gudxi bidzöbinē' Félix, en gudxē' Pablo:

—Guyéaj na'a. Cate' gapa' lataj ulidza' li'.

²⁶ Lësca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zían luzuí bulidzë' Pablo, en bë'lenë' lë' didza'. ²⁷ Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guié.

25

Ridxinë' Pablo lahuë' Festo, bönni' unná bë'

¹ Bidxinë' Festo yödzö Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzë'ë yödzö na', sa'yéajë' Jerusalén.

² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' gulá'tayuë' lahuë' Festo ³ bi uzá' ládxië'ë quégaquië', isöl-lë'ë nupa tsöjxí'gaca Pablo, para udxinë' Jerusalén. Gulë'ënnë' ila'bó' nísie' lë' la' nöza para ilútië' lë'. ⁴ Bubi'ë didza' Festo, gudxë' légaquië':

—Lu yödzö Cesarea nadzunë' Pablo, ate' ral-la' tseja' ni' cuxö huidzaj nisö.

⁵ Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchí'a rusöröë', en gunná bé'enë' nupa tsöjxí'gaca Pablo. ⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'.

⁸ Ní'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo gunë' le ila'yaza ládxi'gaquië' bönni' judío, ate' bubi'ë didza', gudxë' Pablo:

—¿Rë'ënu' so'o Jerusalén, ga na' soa nu uchi'a usörö li' ca nácagaca lë ni ta'nnë' quiu'?

¹⁰ Bubi'ë didza' Pablo, gudxë' lë':

—Zoa caza' ga rö'ö nu ruchí'a rusörö uláz queë' César, ga na' ral-la' uchi'a usörö'u neda'. Biti' bi huiá' dö' nuna' quégaquië' bönni' judío, ate' chinöz quézinu' lë ni. ¹¹ La'tu' nuna' tu le ruá' dö', o bítí'tës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntú caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a urö quia'.

¹² Cate' Festo chibë'lenë' yugu' bönni' yúlahui' didza', bubi'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

¹³ Gudödi chopa tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo. ¹⁴ Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi guié. ¹⁵ Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'. ¹⁶ Neda' bubi'a didza', gudxa' légaquië' biti' nalébiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa tu'zeguilë' didza', para gaca ubi'ë didza' ca naca lë na' ta'nnë' queë'. ¹⁷ Que lë ni na', cate' bila'dxinë' légaquië' ni, biti' ca' gudzedá', pero cate' guzá' guyeaní' ia'tú dza gurö'a ga

ruchi'a rusöröa', ate' gunná bé'eda' nupa yöjxi'gaca bönni' ni. ¹⁸ Cate' gula'cu'ë ni bönni' na' tu'zéguië' lë' didza', biti' bi gula'nnë' queë' ca busaca' quia' ila'nnë'. ¹⁹ Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. ²⁰ Tu' buchíxida' ca nácagaca lë' ni, gunábida'-në' Pablo channö ré'ënë' tsejë' Jerusalén, ga ni' soa nu uchi'a usörö lë' ca nácagaca lë' ni. ²¹ Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' röjáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

²² Ní'irö Agripa gudxë' Festo na':

—Lëzca' neda' ré'ënda' yönida' le innë' bönni' na'.

Festo gudxë' lë':

—Cuxó yönnu' le innë'.

²³ Cate' za' reni' ia'tú dza, len ba zxon bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'söl-lë'ë nupa tsöjxi'gaca Pablo. ²⁴ Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, të' neda' ral-la' gátië'. ²⁵ Runi neda' biti' bi benë' le nabáguë'ë xíguia' gátië', pero tu' gunabë' lë' cazë' tsejë' ga uchi'a usöröë' Augusto César lë', que lë' ni na' chinuna' quia' isöl-la'a-në' lahuë' Augusto. ²⁶ Tu' cabi' nözda' bi ral-la' uzúaja' lu guichi le uzegui bönni' ni didza' para isöl-la'a lu në'ë César, xana', que lë' ni na' nachë'a-në' loli', en le nácarö lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. ²⁷ Réquida' biti' naca dxi'a isöl-la'a-në' nu bönni' náguë'ë ni' channö cabi' gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusi lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'. ³ Raza ládxi'ra' tu' núnbë'u yúgu'të le nalëbiguequinë' tunë' bönni' judío, enca' yugu' lë' ni ridílatu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacuá' bönachi uládz quia', enca' lu yödzö Jerusalén. ⁵ Nözguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'i ládxi'gacarë' ila'yéaj ládxi'gaquië' Dios ca tunë' ia'zíca'rë' bönni' judío. ⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu në'ë lógaquië' xuz xtó'otu'. ⁷ Tunë' löza yugu' bönni' idxinnu cö' di'a dza queëtu' ila'déli'në' lë' na' guzxi' lu në'ë Dios. Que lë' ni na' ta'yéaj ládxi'gaquië' Dios, en tunë' xichinë' rëla, en të dza. Tu' runa' löza lë' ni, nuzéguigaquië' bönni' judío neda'. Cani' naca, bönni' unná bë', Agripa. ⁸ Na'a, çnaru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxië'ë bönachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzö Jerusalén. Gulu'a zían bönachi ta'yéajlë' Jesús lidxi guié, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' bönachi ni', bënlena' légaquië' tuz didza'. ¹¹ Zían luzuí busaca' zi'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sëdë' queë' Dios. Guléde'eda' légaquië', ate' gudxía ládxa'a légaquië' ga bidxintë guyija' gapa nacuá' yödzö zi'tu' para tsöjxöngaca'-në'.

Riguíxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'. ¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení lúzxiba le buzení'rö ca gubidza. Buzení' ga na' zoa', en ga nacuá' nupa söjácálen neda'. ¹⁴ Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bizx que ribía ládxi'u neda'? Run zi' cuinu', ridá'bagu'u neda'. Raca quiu' ca raca queëba' bëdxi, run zi' cuinba', richégu'ba' yaga tuchi' le túndë'ë-ba' zi'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxi'u." ¹⁶ Na'a, guyasa, en guzú, tu' buluí'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'. ¹⁷ Usólá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a. ¹⁸ Risöl-la'a li' ga na' nacu'ë para gunu' ga ulu'huóalaj guiöj lógaquië', en ulu'huóáquië' queë' Dios, en ulu'cá'anë' le naca chul-la que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugüë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le buluí'inë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluí'inë' Dios, zoë' yehua' yubá, neda'. ²⁰ Buzéajni'ida' nupa nacuá' yödzö Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzö zi'tu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulé'ennë' ilútië' neda'. ²² Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxë' lë':

—Bití' nachixi icja', rea' li', Festo, ate' didza' ni ruá'a naca idútë li, en naca lesaca'. ²⁶ Lë cazë' Agripa, bönni' ni rinná bë'ë, nözinë' yugu' lë ni, en que

lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios ré'ënda', sal-la' ia'láti'sö o yenni', calëgasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guié ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rölengaca légaquië'.

³¹ Cate' bila'rúajë' quez, gulu'i xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en calëga tsázië' lidxi guié.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzo Roma

¹ Cate' chigulunë' quégaquië' ila'söl-lë'ë netu' lë'e barco para tséajtu' yödzo Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la. ² Gurentu' tu lë'e barco que luyú Adramitio, le ral-la' tödi yugu' yödzo gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzo Cesarea. Aristarco, tu bönni' yödzo Tesalónica, le nababa luyú Macedonia dzáguië' netu'. ³ Cate' za' rení ia'tú dza, bidxintu' yödzo Sidón, ate' ni' Julio, bönni' na' rinná bé'enë' bönni' rójáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'. ⁴ Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. ⁵ Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzo nababa luyú Licia.

⁶ Bönni' na' rinná bé'enë' bönni' rójáquië' gudil-la, en nachë'ë netu', yöjxáquië' tu barco ni' narúaj yödzo Alejandría que luyú Egipto, barco na' zeaj luyú Italia ga rö' yödzo Roma. Gulu'ë netu' lë'e barco na'. ⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzo Salmón luyú Creta na'. ⁸ Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzo Lasea.

⁹ Tu' chigudzéda'atu', chigula' zoa bönadxi gaca ditaj bítitës barco rizá' lu nísado' na', tu' chigüdüdi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', ¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

¹¹ Bönni' na', rinná bé'enë' bönni' rójáquië' gudil-la, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné' Pablo. ¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco

na' gulún tuz xtídza'gaquië' ulu'zë'ë ni', channö huáca ila'dxinë' ga ta'dxín barco lu yödzo Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ënnë', ate' bulu'lisë' guié zi'i naga' du guié le ruzóa dxisö barco, ate' gudödi barco na' gala' ra' luyú bidxi na' nazí'i le Creta. ¹⁴ Ia'tú chí'isö ca', guyecja tu bö' budunu' za' lotu', nazí'i le Euroclidón. ¹⁵ Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga rë'ëni. ¹⁶ Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'. ¹⁷ Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxu' lu yuzxi lu nísado' na', buzötjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. ¹⁸ Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. ¹⁹ Dza bunny, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zían dza biti' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

²¹ Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzë nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni. ²² Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. ²³ Caní gaca tu' budulu'fi lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. ²⁴ Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'të bönachi nacua'len li' lë'e barco ni." ²⁵ Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'. ²⁶ Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

²⁷ Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. ²⁸ Gula'ru'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'láti'do', gula'ru'unë' du na' leyúbölö, en gula'nözinë' chinaca chinu ösa. ²⁹ Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula'ru'unë' lu nísado' tapa guié zi'i nága'gaca du guié le tu'zóa dxisö barco lu nisa. Lu yöl-la' ruubi ruguí'isö ládxi'do'gaquië' gula'bözë' tsení'. ³⁰ Ní'irö gulé'ënnë' bönni' tunë' dxin lu barco ulu'zxúnnajë' lë'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca té'ënnë' ilu'ë ia'lati'zi'tu' guié zi'i na' naga' du guié le ruzóa dxisö barco na', le zoa saca' tsölá'a láhuilö. ³¹ Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

³² Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.
³⁴ Que lë ni na', ráta'yua' loli' gáguli' para huöáca ládxi'li', tu' cabí gátili' nituli' libí'ili'.

³⁵ Cate' Pablo budxi bë'ë didza' ni, gudélé'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzxuzxjë' yöta xtila na', en gusí lahuë' rahuë'. ³⁶ Ní'irö bila'dipa ládxi'gaquië' yúgu'të', en gulahuë'. ³⁷ Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizzópatu'. ³⁸ Gudödi gulahuë', en bulu'huöljanë', ní'irö gula'ru'unë' zxoá' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lé'enë' ga röjrö' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'. ⁴⁰ Ní'irö bulu'sedxë' yugu' du guíë nága'gaca yugu' guíë zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjrö' nísado' gatsaj láhui'lö luyú bidxi na'. ⁴¹ Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúdzi'lö barco na', gusí lo riguitsaj nísado' na' le, len yöl-la' rizá' que. ⁴² Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. ⁴³ Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' tē'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. ⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazí'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. ² Bönni' xidza' nacu'ë luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga. ³ Ní'irö Pablo gúchë'ë tu tsölén huága zxisi bídxido', en cate' gulu'ë le lu guí, birúajba' tuba' bëla sínia' lë'e huágado', rizxúnnajba' böchila que guí na', ate' yöjtí'iniba' yen në'ë Pablo. ⁴ Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'túë':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tsahui' biti' ru'ë lë' lataj soë' ibanë'.

⁵ Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí, ate' lë' biti' bi guca queë'. ⁶ Bönni' xidza' nacu'ë ni' tu'yúë' Pablo, bátacalö cö'ë guí, o tsö'ötë' gátie'. Ní'irö cate' chigudzé ta'bözë', en bila'lé'enë' biti' bi raca queë', ia'tú le gulëquinë', ate' gula'nnë' naca cazë' tu dios.

⁷ Lataj ní'isö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. ⁸ Dza na' dë ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóá në'ë bönni' huë' na', en bunë' lë'. ⁹ Tu' benë' Pablo lë ni, lësca' bila'dxín nupa te'e ga zoë', nacuá' luyú bidxi ni', en bulu'huöáquië'. ¹⁰ Yugu' bönni' ni gulunë' netu' bal, en zían le

gulunë' queëtu'. Cate' chizóa uzá'atu' luyú ni', bulu'nödzjë' yugu' le naquínitu' queëtu'.

Ridxinë' Pablo lu yödzö Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca bönachi Alejandría na'. ¹² Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza. ¹³ Buzá'atu' ni', ate' gudöditu' tsölá'alö luyú ni', en bidxintu' yödzö Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzö Puteoli luyú Italia. ¹⁴ Lu yödzö na' yöjxáca'tu' yugu' böchi'ru' ta'yéajlë'ë Cristo, ate' guláta'yüë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizë'e ní'atu'. ¹⁵ Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzödo' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' röjáquië' gudilla, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjáquië' gudilla, ate' bë'ë Pablo lataj soë' queëzë', zóalenë' lë' tu bönni' rejë' gudilla ruyüë' lë'.

Runë' Pablo libán lu yödzö Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë. ¹⁸ Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulé'quibe'enë' biti' nabá'ga'a xíguia' gátia'. ¹⁹ Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'. ²⁰ Que lë' ni na' bulidza' libí'ili' para ilé'eda' libí'ili', en güi'ilena' libí'ili' didza', tu' ná'ga'a du guíë ni tu' runa' löza le runru' löza rë'u, bönachi Israel, gácatë lë' na' guzxí' lu në'ë Dios gata' queëru'.

²¹ Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë' na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rinnë quiu' le ruá' dö'. ²² Na'a, rë'ënitü' yönitu' xtídzü'u, lë' na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'ë guequi xibá cubi ni.

²³ Caní guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'ünë' légaquië' naca idütë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uládz queë' Dios. ²⁴ Bal-lë' gula'zí' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë. ²⁵ Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rinnë':

—Didza' nácatë bë'ë Dios Bö' Lá'ayi, lë' na' gunné' Isaías, bönni' bë'ë didza' uládz queë' Dios, ca na' buzéajni'inë' xuz xtó'oru', gunné':

²⁶ Guyéaj lógaca bönachi ni', yöjödxi légaquië':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

²⁷ Yugu' bönni' ni chinazidi icja ládxi'do'gaquië',
en biti' bi riyaza icja nágagaquië'.

Gulunë' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilé'ëni ulu'huóaca queë' Dios

para gaca una' léguequi.

²⁸ Na'a, ral-la' inözili' lë ni. Dios risöl-lë'ë netu' lógaca bönachi izá'a para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídze'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'. ³¹ Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntu nu buzaga' xinözë'. ¡Ca' naca!

DIDZA' GUSÖL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, ⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' láchë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë. ⁶ Bít'sa'li' libí'ili' ladjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' láchë'ë queëru', en le ribequi dxi láchxi'ru'.

Rë'enë' Pablo tsöjyúë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu" ca naca queëli' yúgu'tëli', ate' ta'guixjō' bönachi idútë yödzölió ca réajlë'ëli' Jesucristo. ⁹ Idú láchxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'-në', en rinábida'-në' gaca tsahui' queëli'. ¹⁰ Rinábitica'sida' Dios, channō naca le ré'enë' Lë', gunnë' neda' lataj uduyúa' libí'ili'. ¹¹ Caní rinábida'-në' tu' raca láchxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu. ¹² Lë na' ré'enda' naca utipa láchxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', ré'enda' inözili' lë ni. Zián luzuí bë' láchxa'a guída' ga zóali', pero ga ridxintë na'a bití' runni quia'. Ré'enda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni. ¹⁴ Dë le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. ¹⁵ Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'enë' Dios ila'yönnë' bönni' judío le, ate' tödi na' ila'yöni ca' bönachi izá'a. ¹⁷ Didza' dxi'a ni rulu'i' rë'u gunë' Dios ga huóácaru' tsahui', channō uyéajlë'ëru' Lë', en bití' gaca chopa láchxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága' gaca bönachi

¹⁸ Dios, Nu zoa yehua' yubá, bulu'e lahui bití' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idútë li. ¹⁹ Caní gaca

quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' bulu'i quézinë' Dios lë ni ga na' nacu'ë. ²⁰ Dza ni'te cate' si' guta' yödzülió, ga ridxintë na'a dza, yugu' le nunë' Dios náacagaca bë' le cabí gaca ilé'eru' queë' Dios, ca naca yöl-la' huáca idú queë', en le naca cazë' Dios. Que lë ni na', bití' gaca ila'nnë' bití' nabága'gaquië' xíguia'. ²¹ Cate' ni' gulúnbë'ë Dios, bití' gula'yéaj ládxi'gaquië' Lë' ca ral-la' tseaj ládxi'ru'-në' Dios, en bití' gulé' Lë': "Xclenu'." Que lë ni na', cá'asö böáca le gula'zá' ládxi'gaquië', ate' gula'chulla gula'nítie' tu' nazidi icja ládxi'do'gaquië'. ²² Sal-la' guléquinë' ta'yéajni'inë' yenni', bulu'huöáquië' bönni' bití' bi nõzguequinë' ²³ tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guiöj budó' yaga, budó' na' náacagaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

²⁴ Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túë'. ²⁵ Guca caní tu' bulu'cá'anë' xtídzë'ë Dios, le naca idútë li, ate' gula'z'í lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'túë', en gulunë' le tun ga nu rutuí', tu' gula'cuá'lenë' la' luzá'a bönni'gacasë'. Que lë ni na' gula'guí' gula'záquië' lu xipëla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulé'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le bití' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Bití' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'z'í yé'enë' bönachi, en z'í'të náacagaquië' xihui'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Bití' ta'lé'enë' Dios dxi'a, en náacagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljé' le ruá' dö' ilunë', en ta'dá'baguë'ë xuz xiná'agaquië'.

³¹ Náacagaquië' bönni' bití' ta'yéajni'inë', en tun dítjagaquië' xtídzá'gaquië'.

Bití' náacagaquië' dxi'i ládxi' ca ral-la' ilácagaquië'.

Bití' tu'niti lahuë' luzá'agaquië'.

Bití' tu'huechi' ládxi'gaquië' luzá'agaquië'.

³² Nõzguequi quézinë' le nuzöë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nõziguequinë' lë ni, calëgasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúquië' Dios quégaca bönachi gátigaca

¹ Que lë ni na', bití' gaca ubéaj tsahui' cuinu', nütí'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' li'. ² Nöz quéziru' ca ruchi'a rusöröë' Dios. Naca

idútë li ca ruchi'a rusöröë' nupa tun le ruá' dö'. ³ Li' richugu bë'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröë' Dios? ⁴ ¿Naru' rucá' anatso' cá' asö yöl-la' dxi'i ladxi' idú queë' Dios, en yöl-la' riböza zxön ladxi' queë', en ca runë', ridzenë' para lenë' li'? ¿Naru' cabí nöz quézinu' ruzá' ládxi'ë Dios quiu' yöl-la' dxi'i ladxi' queë' para gunë' ga ubí'i ládxi'u? ⁵ Lu yöl-la' ládxi'do' zidi quiu' bití' rubí'i ládxi'u. Que lë ni na' rusubaga' cuinu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca. ⁶ La' dza ní'sö ubí'i cazë' Dios que queë' bönni' tscá naca le gulunë' tu tuë'. ⁷ Unödzjë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. ⁸ Lu yöl-la' rilé queë', Dios gunë' xíguia' nupa ta'dá'baga', en bití' t'ëni ilún ca rnna le naca idútë li, pero tun ca rnna le cabí naca tsahui'. ⁹ Ila'guí'i ila'záquië', en huí'inida' ládxi'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. ¹⁰ Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lë' bití' runë' bal le ta'nнасö bönachi. ¹² Yúgu'të bönni' na' bití' bila'yönnë' le rinná bë' xibá queë' Dios, en gulunë' dul-la', lëscá' ilátie', sal-la' bití' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. ¹³ Caní gaca, tu' cabí nácagaquië' tsahui' lahuë' Dios yugu' bönni' ta'yönisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁴ Bönni' na' bití' nácagaquië' judío, en bití' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' bití' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. ¹⁵ Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'. ¹⁶ Caní ubí'ë Dios quégagaquië' dza ní' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷ Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, ¹⁸ nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatëro dxi'a. ¹⁹ Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. ²⁰ Réquili' gaca usédili' nupa bití' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Bití' cuanu'." ¿Naru' ribántsali' libí'ili'? ²² Rnnali' ca': "Bití' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' bití' rilé'eli' dxi'a yugu' budó' guiöj budó' yaga. ¿Naru' ribántsali' le dzö'ö lu yudo' quéguequi? ²³ Run ba zxön cuinli' tu' dë lu ná'ali' xibá queë' Dios. ¿Naru' rucá' anatsali' Dios cá' asö, en riguitsjali' xibá le gunná bë'ë Lë'? ²⁴ Nazúaj lu guichi lá'ayi ca runli', rnna: Ní'a que le runli' libí'ili' nupa bití' nácagaca judío ta'nnë' zi' queë' Dios.

²⁵ Le nácatë ruzi'u xibé lë na' narugu lu xipëlu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö

riguitsju' xibá le gunná bē'ē Lē', nuhuōácu' ca tu bōnni' biti' néquinē' queē' Dios. ²⁶ Que lē ni na', channō zoē' tu bōnni' biti' narugu lu xipēlē'ē lē na' naca bē' nu nazí'i xibá queē' Dios, pero runē' idútē ca rinná bē' xibá queē' Lē', bōnni' ni náquiē' lahuē' Dios ca tu bōnni' narugu caz lu xipēlē'ē lē na' naca bē' sal-la' biti' narugu lu xipēla' cazē'. ²⁷ Bōnni' na' biti' narugu lu xipēlē'ē lē na' naca bē' nu nazí'i xibá queē' Dios, pero runē' idú ca rinná bē' xibá na' queē' Dios, ca runē' bōnni' ni rulu'i nabága'li' libí'ili' xíguia', sal-la' dē lu ná'ali' xibá na' queē' Dios, en narugu lu xipēla'li' lē na' naca bē' nazí' lu ná'ali' xibá na' queē' Dios, pero biti' runli' ca rinná bē' xibá queē' na'. ²⁸ Biti' náquiē' idú bōnni' judío tu bōnni' nácasē' caní lu yōl-la' bōnáchisō queē', ate' biti' naca idú lē na' naca bē' le narúgusō lu xipēlē'ē nu bōnni'. ²⁹ Náquiē' idú bōnni' judío bōnni' na' náquiē' caní lu icja ládxi'da'ahuē', en le naca idú le narugu lu xipēlē'ē nu bōnni' le naca bē' nu nazí'i xibá queē' Dios, naca tu le yu'u icja ládxi'do'gaca bōnachi. Naca que bō' naca cázaru', en calēga que yōl-la' bōnáchisō queēru'. Nu bōnni' náquiē' caní, biti' tun bōnachi lē' bal, pero Dios caz gunē' lē' bal.

3

¹ Channō caní naca, ¿bizxi ruzi'tsē' xibé tu bōnni' tu' náquiē' judío? ¿Bizxi ruzi'ē xibé tu bōnni' judío tu' narugu lu xipēlē'ē? ² Yenni' ruzi'ē xibé, en zían ca ruzi'ē xibé. Le nácaterō lo, Dios gulu'ē lu ná'agaquiē' yugu' bōnni' judío didza' lá'ayi queē'. ³ Bal-lē' biti' ta'yéajlē'ē Dios. ¿Naru' réquitsenu' biti' gunē' Dios ca rnna xtídzē'ē tu' cabí ta'yéajlē'ē Lē'? ⁴ ¡Biti' ca' gaca! Ral-la' guéquibe'eru' rúntica'sē' Dios ca rnna didza' bē'ē, sal-la' ta'z'í' yē' yúgu'tē bōnachi. Ca naca queē' nazúaj lu guichi lá'ayi le rnna: Gaca bē' nacu' tsahui' ni'a que didza' ru'u, en uruju' tsahui' channō nu uchi'a usörö Li'.

⁵ Cate' runru' le ruá' dö', Dios rnnē' biti' naca tsahui' le runru'. Lē ni naca bē' tsahui' náquiē' Dios. Nacuá' nupa ta'nná: "Le cabí naca tsahui' le runru' naca bē' náquiē' Dios tsahui', ate' que lē ni na' biti' ral-la' gunē' rē'u xíguia'." ⁶ ¡Biti' ca' naca caní! La'tu' ruzi'ē xibé Dios le ruá' dö' runru', ¿nacxi caz gaca uchi'a usöröē' bōnachi yōdzölió ni?

⁷ Cate' nu rizi' yē', Dios rnnē' biti' ru'i didza' nu na' ca runē' Lē'. Lē ni naca bē' naca idútē li didza' ru'ē Dios. Ta'nnē' bōnni' le ta'z'í' yē'ē légaquiē' run ga gaca queē' Dios yōl-la' ba, ate' biti' ral-la' ichúguiē' quégaquiē', cabí innē' nácagaquiē' bōnni' dul-la'. ⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnē' zi' queēru' ta'nná rusédiru' caní, ate' tsahui' naca ichúguiē' Dios quéguequi.

Yúgu'tēru' nabága'ru' dul-la'

⁹ ¿Bizxi caz innaru' na'a? Ca naca queētu' netu', bōnni' judío, ¿nácárotu' tsahui' ca ia'z'íca'rō bōnachi? ¡Biti' ca' nácatu'! Chibulu'a ni, nabága'gaca dul-la' bōnachi judío, ate' nabága'gaca ca' dul-la' bōnachi izá'a. ¡Yúgu'tē' nabága'gaquiē' dul-la'! ¹⁰ Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'tē' ta'dē' ga yúbölö.

Yúgu'tē' nanítigaquiē'.

Cuntu nu run le naca dxi'a, cuntu nu caz.

¹³ Lubá'agaquiē' nácagaca ca yeru ba nayáljagaca.

Len yōl-la' rinnēsō quégaquiē' ta'z'í' yé'enē' luzá'agaquiē'.

Didza' rirúaj ruá'agaquiē' naca ca le yudzu láya'ba' bēla sínia'.

14 Len yugu' didza' tu'ë, tu'didza' yúdxinë' bönachi, en ta'nnë zi'ë quégaca bönachi na'.

15 Nacu'ë sina' tútigaquië' bönachi.

16 Gátit'ës ga ta'dödë' tu'sunítië', en tu'saca' zi'ë luzá'agaquië'.

17 Biti' ta'zéqui'në' ila'bözë' dxi'ado'.

18 Biti' ca' tádxinë' Dios.

19 Nöziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntú nu gaca inná bití nabaga' dul-la', ate' yúgu'të bönachi idútë yödzölió, uchi'a usöröë' Dios quéguequi. 20 Tuí'i ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntú nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

Uláru' tu' réajlë'ëru' Jesucristo

21 Na'a, chibuluí'i lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nnë' bönni' gulu'ë didza' uláz queë' Dios, ruí'i didza' ca gaca huóácaru' tsahui'. 22 Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca nácagaca yúgu'të bönachi 23 tu' núngaquië' yúgu'të dul-la', en bití ca' nácagaquië' tsahui' ca na' náquië' Dios idú tsahui'. 24 Dios ruzá' ládxi'ë queëru', en nunsë' rë'u tsahui' tu' böá'uë' Jesucristo rë'u. 25 Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budódisë' cá'asö yugu' dul-la' benru' dza ni'te. 26 Caní benë' Dios, buluí'i cuinë' tsahui' dza ni zóaru' na'a, ate' rugá'anë' tsahui' sal-la' rugúë' dul-la' nabága'gaca bönachi, runë' ga tu'huóáca tsahui' nupa ta'yéajlë' Cristo.

27 ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. 28 Na'a, rusáca'ru' queëru' nuhuóáquië' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

29 Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na' 30 tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipéla'gaquië' lë na' naca bë' nu nequi queë' Dios, en lësca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en bití narugu lu xipéla'gaquië' lë na' naca bë'. 31 Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

1 ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? 2 La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. 3 Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." 4 Channö zoa nu bönni' runë' xichinru', le riguízjaru'-në' bití naca tu le ruzá' ládxi'ru' queë', pero naca tu le ral-la'ru' queë' bönni' na'. 5 Lësca' caní channö tu bönni' réajlë'ë Dios, sal-la' bití bi dxin benë' bönni' na', Dios, Nu run ga ulu'huóáca tsahui' bönachi bití nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. 6 Lësca' caní

bë'ë didza' David ca náquië' bica' ba bönni', Dios rnnë' náquië' tsahui' sal-la' bití' bi dxin nunë' bönni' na'. ⁷ Caní gunnë' David:

¡Bica' ba bönni' na' Dios runiti lahuë' le bití' naca tsahui' nunë',
en rugúë' yugu' dul-la' nabáguë'ë!

⁸ ¡Bica' ba bönni' na', Dios bití' rusubáguë'ë lë' xíguia' tu' nözi dul-la' benë' bönni' na'!

⁹ ¿Naru' nácacacsë' bica' ba bönni' narugu lu xipéla'gaquië' lë na' naca bë', o nácacaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. ¹⁰ ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'alö? Bití' guca cate' chinarugu lu xipélë'ë, pero zí'alö guca. ¹¹ Abraham guyéajlë'ë Dios cate' ni' bití' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' bití' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácacagaquië' tsahui' lahuë' Lë'. ¹² Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' bití' narúguni lu xipélë'ë lë na'.

Le guzxi' lu në'ë Dios gata' queëru' tu' réajlë'ëru' Lë'

¹³ Guzxi' lu në'ë Dios bi unödzjë' queë' Abraham, en quégaca zxí'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'. ¹⁴ La'tu' gata' yödzölió ni quégacasö nupa tun ca rinná bë' xibá queë' Dios, bití' gun bayudxi nu tséajlë' Lë', ate' nítisö gaca le guzxi' lu në'ë Dios. ¹⁵ Rulu'i xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' bití' ridxini xibá queë' na', bití' gaca ila'dá'baga' bönachi le rinná bë' xibá na'.

¹⁶ Que lë ni na' uzí'iru' xibé le guzxi' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'sóë' Abraham lë na' guzxi' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. ¹⁷ Caní náquië' ca na' nazúaj lu guichi lá'ayi, le rnna: "Nuzóa' lí' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu bití' zuíni tsca chizóa caz nu na' bití' zuíni.

¹⁸ Caní naca tu' gudxë' Dios Abraham na': "Ziántëro ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxi' lu në'ë Dios, sal-la' bití' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. ¹⁹ Bití' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlädë'ë, enca' ca naca queënu Sara queë', nácanu nigula huödx. ²⁰ Bití' guca chopá ládxë'ë, en bití' gúquië' tu' caréajlë' ca naca le guzxi' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba. ²¹ Idú ládxë'ë benë' löza Dios, napë' yöl-la' huáca gunë' idútë lë na' guzxi' lu në'ë. ²² Que lë ni na', tu' guyéajlë'ë Abraham Dios, Dios buzöë' queë' náquië' tsahui'.

²³ Nazúaj lu guichi lá'ayi le rnna: “Dios buzóë' queë' náquië' tsahui'.” Nazúaj lu guichi caní, calégasö para uzi'ë xibé Abraham, ²⁴ pero para uzi'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. ²⁵ Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'. ² Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxí'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios. ³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinóziru' le riguí'i rizáca'ru' rusedi rë'u cözaru' zxön ladxi'. ⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. ⁵ Cate' runru' löza Lë', biti' ca' raca chopá ládxí'ru'. Caní naca, tu' nuhuólaj nudzë'e icja ládxí'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'. ⁷ Cuntu nu guë'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dxi'a. ⁸ Dios ruluí'inë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'. ⁹ Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. ¹⁰ Cate' ni' biti' rilé'ëru'-në' Dios dxi'a, gútië' Zxí'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'. ¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. ¹³ Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' biti' ridxini xibá queë' quégaquië'. ¹⁴ Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' biti' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxi'ini xi'sóë'. Lë ni ruluí'i rë'u ca ilaca tuz len Cristo yúgu'të nupa ila'yéajlë' Lë'.

¹⁵ Le rúnasë' queëru' Dios biti' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxi'atërö naca le ruzá' ládxë'ë queëru' Dios, en le rúnasë' queëru'. Ruzá' ládxë'ë queëru' lë ni ni'a que le benë' yetuzë' Bönni', Jesucristo. ¹⁶ Le rúnasë' Dios queëru' biti' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnasë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían. ¹⁷ Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóaca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'.

19 Bulu'huóaca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóaca tsahui' bönachi tu' benë' yetuzë' Bönni' na' ca rnna xtídzë'ë Dios.

20 Guyú'u xibá queë' Dios yödölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntë'rö naca le buzá' láchxë'ë Dios quégaca bönachi. 21 Guta' yöl-la' huáca unná bë' que dul-la' guti rë'u. Lësca' caní le ruzá' láchxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-në' Jesucristo

1 ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' láchxë'ë Dios queëru'? 2 ¿Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? 3 ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'i rë'u chigudödiru' lu yöl-la' guti tsözxön len Lë'. 4 Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u nubánlenru'-në' Jesús tsözxön para gácaru' bönachi idútë cubi queë'.

5 Channö nunru' Cristo tsözxön, gútiru' ca na' gútië' Lë', lësca' caní gunru'-në' tsözxön, ubanru' lu yöl-la' guti ca na' bubanë' Lë'. 6 Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxön lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u. 7 Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. 8 Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön, 9 tu' chinöziru' bubanë' Cristo lu yöl-la' guti, en bíti'rö gátië'. Que lë ni na' bíti'rö bi gaca gun yöl-la' guti na' queë' Lë'. 10 Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. 11 Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

12 Que lë ni na', bití' güi'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizë láchxi'li' le ruá' dö', lu le naca cázali'. 13 Biti' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a. 14 Biti' güi'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' láchxë'ë queëru'.

Le rucudzu' didza' ca naca que nu bönni' nadó'o

15 ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' láchxë'ë Dios rë'u? ¿Biti' ca' gunru' caní! 16 Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna

xtídzë'ë Dios, Nu gun ga huöácali' tsahui'. ¹⁷ Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bē' xibá na' budödi cuinli' lu nē'e. ¹⁸ Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a. ¹⁹ (Ruí'ílena' libí'ili' didza' ca tuí'í didza' bönachi, tu' cabí réajni'ili' idútë lu yöl-la' bönachi queéli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu nē'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu nē'e, en gunli' xichini lē na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. ²¹ Na'a, ¿naru' buzí'itsali' xibé lē na' benli' zí'alö? Na'a lē na' benli' run ga rutuí'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dē queéli' yöl-la' na'bán idú. ²³ Lazxaj nu run dul-la' naca yöl-la' guti, pero le rúnнасë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Böcha'ado', núlöli' núnbē'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ² Naca queéli' ca naca que tu nigula nutsaga ná'lennu-nē' bönni', yú'unu lu nē'ë bönni' queënu tsanni ni zoë' nabanë' ca rinná bē' xibá que yöl-la' nutsaga na', pero channö chinátië', nurúajnu lu na' xibá na'. ³ Caní naca, tsanni ni zoë' nabanë' bönni' queënu, channö utsaga ná'lennu-nē' ia'túé' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-nē' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lēsca' caní raca queéli', böcha'a. Tu' dzágali'-nē' Cristo chinati cázali' libí'ili' para cabirö inná be'e libí'ili' le rinná bē' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxe'ë Dios. ⁵ Tsanni ni' guyú'uru' lu na' yöl-la' bönáchisö queëru', le rinná bē' xibá na' ben ga gulaca bē' le guzë ládxi'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná bē' xibá na' gunná be'e rē'u zí'alö. Caní naca para gaca gunru' xichinë' Dios lu yöl-la' na'bán cubi le runnē' queëru' Dios Bö' Lá'ayi, en calëga gunru' xichinë' lu lē na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni'i le rinná bē' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' sē ládxi'u le dē que luzó'o", biti' gunözda' naca dul-la' yöl-la' rizé ladxi' le dē que luzá'a. ⁸ Cate' bidxín quia' xibá na', guca bē' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga biti' ridxini xibá na', biti' naca bē' le naca dul-la'. ⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bē'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. ¹¹ Guca bē' nazi'

yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que læ ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö læ na' naca dxi'a ga bidxin quia' yöl-la' guti? ¿Biti' ca' naca ca'! Le naca dul-la' bugún dxin læ na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' læ na' ré'ënda' guna'. Le naca dul-la' le cabí rilé'eda' dxi'a, læ na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que læ ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca innía', læ na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' læ na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que læ ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' ré'ëni'ru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxi'da'ahua' raza ládxa'a xibá queë' Dios ²³ pero réquibe'eda' dzaga idútë le naca' le rinná bë'e neda', ate' læ ni ridá'baga' xibá queë' Dios yu'u icja ládxi'da'ahua'. Læ na' dzaga idútë le naca' run ga runa' dul-la'.

²⁴ ¿Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? ²⁵ ¿Xclenë' Dios, chinularu' na'a ni'a que le benë' Xanru' Jesucristo! Que læ ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que læ ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca ré'ëni yöl-la' bönáchisö quégaquië', pero ca ré'ëne' Dios Bö' Lá'ayi tunë'. ² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que læ ni na', nulá' lu læ na' ben ga bena' dul-la', enca' lu yöl-la' guti. ³ Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusöl-lë'ë Zxi'ini cazë', ate' guljë' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. ⁴ Caní benë' para gaca gunru' idútë le naca tsahui' le rinná bë' xibá queë', nülöru' na' bíti'rö runru' ca ré'ëni yöl-la' bönáchisö queëru', pero ca ré'ëne' Dios Bö' Lá'ayi runru'.

⁵ Bönni' tunë' ca ré'ëni yöl-la' bönáchisö quégaquië', tu'i ládxi'gaquië' le naca que yöl-la' bönáchisö quégaquië', pero bönni' tunë' ca ré'ëne' Dios Bö' Lá'ayi, tu'i ládxi'gaquië' le naca queë' Dios Bö' Lá'ayi. ⁶ Channö ru'i ládxi'siru' le naca que yöl-la' bönáchisö queëru', tsaz gátiru', pero channö ru'i ládxi'ru' le naca queë' Dios Bö' Lá'ayi, chidë yöl-la' na'bán idú queëru', en ribözaru' dxi ladxi'. ⁷ Núti'tës nu ru'i ládxi'sö le naca que yöl-la' bönáchisö que, biti' rilé'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca

gun caní. ⁸ Que lë ni na', bönni' na' tunë' ca rë'ëni yöl-la' bönáchisö quegaquië' biti' gaca ilunë' le raza lãdxë'ë Dios.

⁹ Na'a, bítirö runli' ca rë'ëni yöl-la' bönáchisö queëli', pero runli' ca rë'ënë' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risöl-lë'ë Cristo queëru', biti' néquinë' queë' Cristo. ¹⁰ Tu' zóalenë' Cristo libí'ili', chinati caz idútë' le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. ¹¹ Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë' cazë' Dios, Nu busubán Jesucristo lu yöl-la' guti, runë' ga nubanli' lu idútë' le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹² Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'. ¹³ Channö runli' ca rë'ëni yöl-la' bönáchisö queëli', gátali' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

¹⁴ Yúgu'të nupa tun ca rë'ënë' Dios Bö' Lá'ayi nácgaca zxi'inë' Dios. ¹⁵ Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzöbili', pero chinunë' ga nácali' zxi'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. ¹⁶ Lë' cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxi'inë' Dios. ¹⁷ Channö chinácaru' zxi'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí'i rizáca'lenru'-në' tsözxön Cristo para uzí'iru' xibé tsözxön len Cristo yöl-la' zxön queë' Dios.

¹⁸ Runi neda', yugu' lë ni riguí'i rizáca'ru' na'a naca tu le cuídido'os tsa naca yöl-la' zxön na' gata' queëru' dza si' za'. ¹⁹ Ta'böza yúgu'të le nunë' Dios, en ta'zë lãdxi'gaca idxintë dza na' ulu'ë lahui Dios yugu' bönni' nácgacaquië' zxi'ini cazë'. ²⁰ Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', ²¹ ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zì' ca' xibé yöl-la' rusölá le nazáca'da' na' ulu'zì'ë xibé yugu' zxi'inë' Dios. ²² Nöziru' ta'guí'i ta'zaca' yúgu'të le nunë' Dios ga ridxintë na'a dza, ca na' riguí'i rizáca'nu tu nigula chizóa sóabi' bí'ido' queënu. ²³ Riguí'i rizáca'a, calëgasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le ruluí'i rë'u ca ral-la' gaca cázaru'. Riguí'i rizáca'ru' tsanni ni ribözaru' dza ni' ulu'ë lahui Dios nácaru' idú zxi'inë', dza ni' únë' ca' idútë le naca cázaru'. ²⁴ Tu' runru' löza lë ni, nuláru' rë'u, pero channö gaca ilé'ëru' lë na' runru' löza, biti' naca tu le ribözaru'. Biti' ribözaru' le chirilé'ëru'. ²⁵ Na'a, channö runru' löza tu le cabí gaca ilé'ëru', lu yöl-la' riböza zxön lãdxi' ribözaru' le.

²⁶ Lë'sca' caní rácalenë' Dios Bö' Lá'ayi rë'u cate' rudú lãdxi'ru', tu' cabí nöziru' bi ral-la' inábiru'-në' Dios, pero Lë' cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' lãdxë'ë, tsa cabí gaca nu inná. ²⁷ Dios ruyúë' le yu'u icja lãdxi'do'gaca bönachi, en nözinë' le rë'ënë' innë' Dios Bö' Lá'ayi na', ate' Lë', ca rë'ëni quëzinë' Dios, rudödë' xtídza'gaca nupa néquiquequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

²⁸ Nöziru' tu'zì'ë xibé bönni' yúgu'të le raca quegaquië', bönni' na' nadxí'iguequinë' Dios, ate' bulidzë' Dios légaquië' ca nuzóa cazë' gunë'. ²⁹ Yugu' bönni' na' gurö cazë' queë' Dios zí'atëlö, buzóë' ca' quegaquië' zí'atëlö ilácagaquië' ca naca cazë' Zxi'inë', para gáquië' Zxi'inë' lo lada'j zían böchë'ë. ³⁰ Nupa na' buzóë' Dios quegaquië' zí'atëlö ca ral-la' ilácagaquië', bulidzë' ca'

légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxön queë'.

³¹ ¿Bizxi caz innaru' na'a ca nácagaca lë ni? Channö rácalenë' Dios rë'u, biti' ral-la' gádxiru' sal-la' bi ilún bönachi queëru'. ³² Dios, idú ládxe'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë? ³³ ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuöácaru' tsahui'! ³⁴ ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queëru' lahuë' Dios! ³⁵ Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u:

sal-la' riguí'i rizáca'ru', o sal-la' risëbi ládxi'ru',
o sal-la' ta'bía ládxi'gaca bönachi rë'u,
o sal-la' ridunru', o sal-la' riyadzaj le gácuru',
o sal-la' zoa bönadxi queëru', o sal-la' ilútië' bönni' rë'u.

³⁶ Ca nácagaca lë ni nazúaj lu guichi lá'ayi, rnna:
Tu' néquitu' quiu' Li', túntica'sö bönachi ga gátitu'.
Nácatu' ca yugu' bö'cu' zxila',
nadödigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u, nácatërö löza idéli'ru' lu le raca queëru'. ³⁸⁻³⁹ Que lë ni na' runi neda':
Biti' bi sequi' gun ga bítirö idxí'inë' Dios rë'u.
Nadxí'inë' rë'u tu' néquiru' queë' Xanru' Jesucristo.
Biti' sequi' gun caní yöl-la' guti o yöl-la' na'bán,
o yugu' gubáz lá'ayi o nupa ta'nná bë',
o yugu' yöl-la' huáca que tu' xihui',
o bítitës bi zoa o bítitës bi si' za',
o tu le dë xitsá'alö o tu le dë cadxí'ilö,
o bítitës bi nunë' Dios.

9

Dios gurö cazë' queë' bönachi Israel

¹ Ruá'a didza' idútë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¿Biti' rizí' yë'a!
² Ruhuí'inide'eda', en risëbitica'sö ládxa'a ³ tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'eni quézida' ubéaj ládxe'ë Dios neda', en ulá'alena' Cristo. ⁴ Yugu' bönni' uládz quia' na' nácagaquië' zxí'ini xi'sóë' Israel, ate' Dios bë'ë légaquië' lataj ilácagaquië' zxí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxí' lu në'ë gunë' le ilún tsahui' bönachi. ⁵ Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljé' Cristo, Nu naca caz Dios, en rinná bé'enë' yúgu'të. ¿Rácatica'sö queë' yöl-la' ba! ¿Ca' gaca!

⁶ Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të zxí'ini xi'sóë' Israel nácagaquië' idú bönachi Israel, nupa néquiquequi queë' Dios. ⁷ Sal-la' gúljagaquië' zían zxí'ini xi'sóë' Abraham, biti' guláquië' yúgu'të idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." ⁸ Caní naca, nupa nácagaca zxí'inë'

tu bönni' néquinë' queë' Dios, calëga yúgu'të' nácagaquië' zxi'inë' Dios. Lësca' caní, nácagaca idú zxi'ini xi'sóë' Abraham núpasö na' náljagaca ni'a que lë na' guzxi' lu në'ë Dios. ⁹ Lë na' guzxi' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

¹⁰ Calëgasö lë ni guca caní, pero lësca' cate' Rebeca ni' nuáanu-bi' yugu' bi'i bönni'do' queë' Isaac, xuz xtó'otu', ¹¹⁻¹³ cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjölz lë na' nazúaj lu guichi ca gunné' Dios, le rnna: "Bidxi'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní! ¹⁵ Dios gudxë' Moisés, gunné': "Huéchi' ládxa'a nu ré'ënda' huéchi' ládxa'a, en güi'i ládxa'a nu ré'ënda' güi'i ládxa'a." ¹⁶ Que lë ni na', biti' raca caní ni'a que le té'ëni caz bönachi, o tu' runë' bayudxi nu bönni', pero naca tu' ré'ëni quëzinë' Dios, ruhuéchi' ládxe'ë bönachi. ¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödölió le naca' neda'." ¹⁸ Caní naca, Dios ruhuéchi' ládxe'ë nu ré'ëni quëzinë', en lësca' caní runë' zidzaj icja ládxi'da'ahuë' nu bönni' ré'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le ré'ëni quëzinë' Dios gunë'?" ²⁰ ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bizx que benu' neda' caní?" ²¹ ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

²² Ré'ëni quëzinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ladxi' queë' biá' gulënë' yugu' bönni' ni' ral-la' ichúguië' quëgaquië', yugu' bönni' na' nabága'gaquië' xíguia', en run bayudxi usunítie' légaquië'. ²³ Caní runë' Dios para gaca bë' nácaterö lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzóë' quëgaquië' zí'atëlö ulu'zi'ë xibé yöl-la' zxön queë'.

²⁴ Yugu' bönni' caní bulidzë' Dios. Calëgasö bulidzë' netu', bönachi judío, pero lësca' bulidzë' bönachi izá'a. ²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa biti' nácagaca bönachi quia',

gu'a láguequi: Bönachi quia',

ate' nupa na' biti' bidxi'ida',

gu'a láguequi: Nupa nadxi'ida'.

²⁶ La' ná'asö ga gunnía' quëguequi:

"Biti' nácali' bönachi quia'",

si' láguequi: "Yugu' zxi'inë' Dios ban."

²⁷ Na'a, ca naca quégaca zxi'ini xi'sóë' Israel, Isaías gunné':

Sal-la' ila'yanë' zxi'ini xi'sóë' Israel,

en iláquië' tsca naca yuzxi tu ra' yegu zxön,

ulu'lë' nabábasë'.

²⁸ Xanru' Dios la' guntë' ga gaca idútë

lë na' ichúguië' quégaca bönachi yödölió ni.

²⁹ Lësca' caní Isaías bë'ë didza' zí'atëlö, gunné':

Dios, Xanru' unná bē' idú,
la'tu' cabí bucá'anē' queēru' yugu' zxi'ini xi'sóaru',
ugá'anaru' ca yōdzō Sodoma, en yōdzō Gomorra,
yugu' yōdzō na' busunítiē' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' biti' nabábagaquiē' Israel chibila'déli'nē' nuhuóácagaquiē' tsahui' lahuē' Dios, en biti' gulunē' bayudxi ulu'huóáquiē' tsahui' lahuē' Dios, pero nuhuóácagaquiē' tsahui' tu' ta'yéajlē'ē Dios. ³¹ Na'a, sal-la' gulunē' bayudxi yugu' bönni' Israel ilunē' ca rinná bē' xibá queē' Dios, le ral-la' gun ga ilácagaquiē' tsahui', biti' bila'déli'nē' le ral-la' gata' quégaquiē' tu' tunē' ca rinná bē' xibá na'. ³² ¿Bizx que na' guca caní? Caní guca, tu' cabí gulunē' caní lu yöl-la' réajlē' quégaquiē' Dios, pero rácasō quégaquiē' gulē'ennē' ilunē' ca rinná bē' xibá na', ate' que lē ni na' gula'chíxinē', o huáca innaru': Yōjchégu'gaquiē' lu lē na' nazí'i le: Guiōj Ga Nu Rōjchegu'. ³³ Ca naca lē ni nazúaj lu guichi lá'ayi, rnna: ¡Buli'yú! Uzóa'-nē' yōdzō Sión bönni' na' gáquiē' ca tu guiōj ga nu tsōjchegu', guiōj na' gun ga nu ichixi inigui. Nu tséajlē' Lē', biti' ca' utuí'i nu na'.

10

¹ Libí'ili', böcha'ado', le rizé ládxa'a, en le rinábida'-nē' Dios gunē' quégaca bönachi Israel naca gunē' ga ulu'lē'. ² Runa' ba nalí quégaquiē', idú ládxi'gaquiē' tuí'i ládxi'gaquiē' Dios, pero calēga len yöl-la' réajni'i idú. ³ Biti' nōzguequinē' ca runē' Dios, runsē' ga nácaru' tsahui', pero té'ennē' ilún cuíngaquiē' tsahui' rácasō quégaquiē', en biti' ta'cu'ē nōxaj ladxi' lahuē' Dios para gaca gunē' légaquiē' tsahui'. ⁴ Budxi benē' Cristo le ré'eni gun xibá queē' Moisés, benē' ga gaca ulu'huóáca tsahui' yúgu'tē nupa ila'yéajlē' Lē'.

⁵ Ca naca que nu huóáca tsahui' tu' run ca rinná bē' xibá queē' Dios, buzúajē' Moisés lu guichi le rnna caní: "Bönni' na' gunē' idútē ca rinná bē' xibá na', soē' ibanē' tu' gunē' caní." ⁶ Na'a, ca naca que nu huóáca tsahui' tu' réajlē' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lē ni naca, para gun nu na' ga huōtjē' Cristo, ⁷ en biti' innó': "¿Nuzxi caz huōtaj ga dē lataj que nupa chinátigaca?" Lē ni naca, para gun nu na' ga cuenē' Cristo, urúajē' lu yöl-la' guti. ⁸ Na'a, ¿bizxi caz rnna? Caní rnna: "Gala' ga zu' zoa caz xtídzē'ē Dios. Lu ru'u, en lu icja ládxi'do'o zoa xtídzē'ē na'." Lē ni naca didza' que le réajlē'ēru' Dios runtu' libán que, rnnatu': ⁹ "Channō didza' gu'u gaca bē' Jesús náquiē' Xanu', en uyéaj lē'u idú ládxi'u Dios busubanē' Lē' lu yöl-la' guti, uló' li'." ¹⁰ Lu icja ládxi'do'oru' réajlē'ēru' Jesús para gácaru' tsahui', ate' len didza' ruí'iru', ruluí'iru' lahui le náquiē' Jesucristo para uláru'.

¹¹ Nazúaj lu guichi lá'ayi le rnna: "Biti' ca' ulu'tuí'i yúgu'tē nupa ta'yéajlē' Lē'." ¹² Dios, la' tuz ca ruí'i ládxi'ē yugu' bönni' judío, enca' yugu' bönni' idútē yōdzólió, tu' Lē cazē' Xanru' náquiē' Xángaqiē' yúgu'tē', en nápadē'ē bi unōdzjē' quégaca yúgu'tē nupa tu'lidza Lē'. ¹³ Ca naca lē ni nazúaj lu guichi lá'ayi, rnna: "Ulu'lá yúgu'tē nupa ulu'lidza Lē' Xanru'." ¹⁴ ¿Nacxi gaca ulu'lidzē' Lē' channō cabí ta'yéajlē'ē Lē'? ¿Nacxi gaca ila'yéajlē'ē Lē' channō catu caz bila'yönnē' ca naca queē'? ¿Nacxi gaca ila'yönnē' channō cuntu nu zoa nu gun libán lógaquiē'? ¹⁵ ¿Nacxi caz gaca ilunē' libán channō cuntu nu isöl-la' légaquiē'? Ca naca lē ni nazúaj lu guichi, rnna: "Bica' bágaca nupa na' ila'dxinē' ga nacuá' bönni' rōjéngaquiē' libán que le ribequi dxi ládxi'ru', en tunē' libán que didza' dxi'a."

¹⁶ Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunnë': "Xan, ¿nuzxi caz guyéajlë' le bentu' libán que?" ¹⁷ Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

¹⁸ Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídza'guequi.

¹⁹ Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunnë':

Gun caza' ga uzxé'eli',

tu' idxí'ida' bönachi biti' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

²⁰ Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunnë':

Bila'dzöli neda' nupa biti' gula'guílaj neda'.

Bulu'i lahua' lógaquië' bönni' biti' bí gula'nábinë' neda'.

²¹ Na'a, ca naca quégaquië' bönni' Israel, Isaías na' bë'ë didza' uláz queë' Dios, gunnë': "Idú dza bulí na'a, bulidza' bönachi biti' túngaca ca rnna xtídza'a, en ta'dá'baga' neda'."

11

Nupa nulágaca ladaj bönachi Israel

¹ Na'a rnnía': ¿Naru' nusán në'ë Dios bönachi Israel? ¿Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' di'a dza queë' Benjamín, xzí'ini cazë' Israel na'. ² Dios biti' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunnë': ³ "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." ⁴ Na'a, ¿bizxi didza' bubí'ë Dios? Caní gunnë': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu xzíbigaquië' lo budó' guiöj na' nazí'i le Baal." ⁵ Lësca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxe'ë caní quégaquië'. ⁶ Channö naca le ruzá' ládxe'ë caní quégaquië', biti' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxe'ë queëru' Dios bíti'rö gaca tu le ruzá' ládxe'ë queëru'.

⁷ ¿Bizxi caz innaru' na'a? Lë na' gula'guíljë' bönni' Israel, biti' bila'déli'në', pero chibila'déli' le nupa ni' gurö cazë' queë' Dios, ate' ia'zica'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rnna: "Dios benë' ga nácagaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunnë':

Yugu' laní quégaquië' ulu'huöáca le ila'zön légaquië',

en ca tu yalaj ga ila'rölinë'.

Ilaca ca' le ilún ga ila'chíxinë',

en ca tu le uzí' lëbi légaquië'.

¹⁰ Ila'chul-la guiöj lógaquië', para cabí ila'lé'enë'.

Ila'yechu tsaz cúdzu'gaquië' tu' ilu'ë yua'.

Ca gaca ulu'lágaca bönachi biti' nácgaca judío

11 Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¡Biti' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa biti' náacagaca judío para gunë' ga ulu'zxé'enë' yugu' bönni' judío léguequi. 12 Le gulunë' bönni' judío, gula'chíxinë', ben ga bidxín quégaca bönachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa biti' náacagaca judío tu' gula'nítië' yugu' bönni' judío, zxöntëro gaca le gata' quéguequi cate' yugu' bönni' judío na' ulu'huöáquië' queë' Dios.

13 Na'a rea' libí'ili' biti' nácali' judío, rnnía': Tu' naca' gubáz nasöl-lë'ë Dios lógaca nupa biti' náacagaca judío, runa' zxön lë na' dë lu na'a 14 para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. 15 Channö bulu'huöáca bönachi nacuá' idú yödzölió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huöázië' xilátjagaca cazë' na'. Gaca ca raca cate' tu'bángaca nupa chinátigaca. 16 Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

17 Náacagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. 18 Que lë ni na', biti' gun ba zxön cuinli', biti' uzóali' tsölá'alö nupa náacagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

19 Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca." 20 Nácatë didza' ru'u, pero gula'rúguië' tu' cabí gula'yéajlë'ë, ate' yöjtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios. 21 Channö benë' Dios léguequi xíguia', nupa na' náacagaca caz ni'a në'e yaga dxi'a na', ¿naru' cabí gunë' xíguia' ca' li'? 22 Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. 23 Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö. 24 Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntu nu udá' tu ni'a në'e yaga guí'a. Yënni'tëro huáca quégaquië', náacagaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

25 Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queëli'. Bulu'huöáca bal-la' bönachi Israel zidi ladxi', ate' caní iláquië' ga idxinrö dza chinayázcaca yúgu'të bönachi biti' náacagaca judío ga rinná bë'ë Dios, nupa na' ral-la' ulu'lágaca. 26 Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Sión Nu rusölá,

en ugúa le ruá' dö' nabága'gaca xzí'ini xi'söë' Jacob.

27 Lë ni naca didza' dzaga gúnlena' légaquië' cate' ugúa' dul-la' nabága'gaquië'.

28 Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' gurö cazë' queë' xuz xtó'ogaquië'. 29 Tsaz runödzjë' Dios le runödzjë', en tsaz rulidzë' bönachi. 30 Ca na' naca queëli', zí'atëlö biti' benli' ca rnna xtídzë'ë Dios, ate' na'a ruhuéchi'

ládxë'ë Dios libí'ili' tu' cabí gulunë' yugu' bönni' judío ca rnnë'. ³¹ Lësca' caní naca quégaquië' na'a, bití' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. ³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios. ³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz bi bunödzej queë' Dios para gun bayudxi bi ubi'ë Dios que? ³⁶ Yúgu'të le dë narúajgaca lu në'ë Dios, en taca lu në'ë, en nácgaca para uzi'ë xibéguequi. ¡Gácatíca'sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios. ² Bítí'rö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a rë'enë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Bití' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queéli' Dios le bennë' que queéli'. ⁴ Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxí'ado' ral-la' usédinë' bönachi.

⁸ Bönni' na' Dios bunödzejë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzejë' que nu yúbölö, idú ládxë'ë ral-la' unödzejë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzë'ë,

len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú ládxi'li'.

Bulí'cá'ana le ruá' dö'.

Guli'güi' ládxi'li' gunli' le naca dxi'a.

¹⁰ Guli'dxi'i-guéquinë' luzá'ali'

ca nadxi'iguecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

11 Buli'típatica'sö ládxi'li', en biti' gácali' xöhuëdi.
Guli'gún xichinë' Xanru' idú ládxi'li'.

12 Buli'dzeja tu' zoa le runli' löza.
Guli'cöz zxön ladxi' cate' bi riguí'i rizáca'li'.
Buli'lídzatica'së' Dios.

13 Buli'nödzej quégaca bönachi queë' Cristo
tsca nayádzjaguequinë'.
Guli'güí' lataj ga ila'cuá' nupa ta'dxín queëli'.

14 Guli'nábinë' Dios gunë' dxi'a
quégaca nupa ta'bía ládxi'gaca libí'ili'.
Guli'naba gaca dxi'a quégaquië',
en biti' udxíali' légaquië' dö'.

15 Buli'dzëjalen nupa tu'dzeja.
Guli'cödxilen nupa ta'bödxí.

16 Guli'gaca tuz len luzá'ali'.
Biti' gun ba zxön cuinli',
pero guli'gún tsözxön yugu' bönni' nöxaj ladxi'.
Biti' guéquili' chinadéli'li' idútë yöl-la' réajni'i.

17 Cuntu nu ubí'ili' que,
biti' guá'ali' dö' que nu ruá' dö' queëli'.
Guli'gún dxi'a quégaca yúgu'të bönachi.

18 Channö huáca, tsca séqui'li', guli'cöz dxi'a
len yúgu'të bönachi.

19 Böchi' luzá'ado', biti' uzí' lëbili' bönachi la' libí'isili', pero guli'güí' lataj
ubi'ë Dios quégaca bönachi na', tu' nazúaj lu guichi lá'ayi le rnna:

Neda' caza' uzí' lëba'.
Neda' ubi'a quégaca bönachi.

Caní gunné' Xanru' Dios. 20 Lësca' caní rnna:
Channö zoë' nu bönni' biti' ridzáguië' li' dxi'a,
en ridunë', bë'ë le gahuë'.

Channö ribidxë' nisa, bë'ë le guí'jë'.
Cate' gunu' caní, gunu' ga utuí'inë' bönni' na'.

21 Biti' gu'u lataj inná be'e le ruá' dö' li',
pero gunná be'e le ruá' dö' na',
ugunu' dxin le naca dxi'a.

13

1 Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu
ná'agaquië' yöl-la' unná bë' nápagaquië', en nucu'ë xilátjagaquië' bönni' ni dë lu
ná'agaquië' yöl-la' unná bë'. 2 Que lë ni na', nu ridá'baga' yúlahui' ridá'baga'
le nuzóa cazë' Dios, ate' nupa ta'dá'baga' caní, nabága'gaca xiguaia'. 3 Nacu'ë
bönni' yúlahui', calëga para ulu'zenë' bach nu run le naca dxi'a, pero para
ulu'zenë' bach nu ruá' dö'. Channö ré'ënu' gunu' ga biti' ulu'zenë' li' bach, ben
le naca dxi'a, ate' uruju' dxi'a lógaquië'. 4 Náquië' bönni' yúlahui' ni'a në'ë Dios
para gácalenë' li', pero channö runu' le ruá' dö', ral-la' gádxinu', tu' cabí nu'ë
nítisö xiyaga yúlahui'. Náquië' ni'a në'ë Dios para uzí' lëbë', gunë' xiguaia' nu ruá'
dö'. 5 Que lë ni na' run bayudxi gunli' ca rnnë' bönni' na' dë lu në'ë, calëgasö tu'
budödë' Dios lu në'ë gunë' libí'ili' xiguaia', pero lësca' para soa dxi ládxi'do'oli'
lahuë' Dios. 6 Que lë ni na' ca' riguízaj lázali' que yúlahui', tu' nácagaquië'
bönni' yúlahui' ni'a në'ë Dios, en tunë' le nudödi cazë' lu ná'agaquië'.

7 Guli'guízaj yúgu'të bönachi le rál-la'li' quégaquië'. Guli'guízaj lázali' lu na'
nu ral-la' quízaj lázali'. Guli'guízaj dumí nu ral-la' quízajali'. Guli'gadxi nu

ral-la' gádxili', en guli'gún bal nu ral-la' gunli' bal. ⁸ Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bē' xibá queē' Dios nu nadxí'i luzé'e. ⁹ Caní ta'nná bē' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácate.

Biti' sē ládxi'u le dē que luzó'o.

Yugu' xibá ni, en yúgu'tē xibá ia'zica'rö, údxi gun nu run ca rna didza' rna caní:

Bidxí'i luzó'o ca nadxí'i cuinu'.

¹⁰ Nu na' nadxí'i luzé'e bití' bi run que luzé'e le ruá' dö'. Caní naca, nu na' nadxí'i luzé'e run idú ca rinná bē' xibá queē' Dios.

¹¹ Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo. ¹² Ga zóaru' na'a naca ca chi'i dzö'ölö, ate' chizóa tódi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queē' Dios, le gun chi'i rë'u lu na' tu' xihui'.

¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxé'ëru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en bití' gü'i ládxi'li' gunli' le rizë ládxi'li' lu yöl-la' bönáchisö queëli'.

14

Biti' ral-la' si' quídza'ru' böchi' luzá'aru'

¹ Guli'güí' lataj nu réajlë' Cristo gun libí'ili' tsözxön sal-la' bití' naca idú ca réajlë' nu na' Lë'. Biti' tíl-lalenli' nu na' ca nácagaca le runi nu na' huáca nu gun. ² Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. ³ Na'a, bönni' na' rahuë' yúgu'të bití' ral-la' uzöë' tsölá'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' si' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. ⁴ ¿Nuzxi caz li', rizí' quídzu'u bönni' huen dxin que nu yúbölö? Bönni' na' náquië' huen dxin queē' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. ⁶ Bönni' na' runë' bal tu dza, runë' le bal para tseaj ládxi'ë Xanru', ate' bönni' na' bití' runë' bal dza na', para tseaj ládxi'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxi'ë Xanru', en rë'ë Dios: "Xclenu", ate' bönni' na' bití' rahuë' yúgu'të, bití' rahuë' le para tseaj ládxi'ë Xanru', en rë'ë ca' Dios: "Xclenu'."

⁷ Bití' zoë' nabanë' queëzë' nitúë' bönni' nabábalenë' rë'u, en bití' ratië' queëzë' nitúë' bönni'. ⁸ Channö zóaru' nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë'

Xanru'. ⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a li', ¿bizx que richugu bē'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. ¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu' zechu zxíbigaca yúgu'të bönachi lahua' neda'.

Ila' guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníguinë' böchi' luzá'aru'

¹³ Que lë ni na', bítirö ral-la' ichugu bé'ëru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴ Nöz quézida' bití' bi dë le ráguru' le gaca gun ga bítirö nácaru' tsahui' lahuë' Dios, ate' röjlöz lë ni didza' bē'ë Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca. ¹⁵ Channö rusuhú'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopá ládxe'ë bönni' na', gútië' Cristo uláz queë'. ¹⁶ Que lë ni na', bití' bi gunli' le gun ga ila'nnë xihui' bönachi que le rusáca'li' queëli' naca tsahui'. ¹⁷ Cate' rinná bé'enë' Dios rë'u, bití' ruí' ládxi'ru' le guí'aj gáguru', pero ruí' ládxi'ru' gácaru' tsahui', en sóaru' dxi ladxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Núti'tës nu run xichinë' Cristo ca nácagaca lë ni, run le raza ládxe'ë Dios, ate' urúaj dxi'a lógaca bönachi.

¹⁹ Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰ Bití' bi ral-la' gagu' le gun ga gaca chopá ládxi' nu na' nuzóë' Dios. Nácatë lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. ²¹ Gácarö dxi'a cabí gagu' bëla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopá ládxe'ë, o le gun ga huőaj ládxe'ë ca réajlë'ë Cristo. ²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxi'da'ahuë' lë' tu' nözi lë na' runi lë' dë lataj gunë', ²³ pero bönni' na' raza chopá ládxe'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxe'ë böchi' luzá'aru'

¹ Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Bití' ral-la' gunru' le raza ládxi'ru' la' cuínsiru'. ² Yúgu'tëru' ral-la' gunru' le raza ládxe'ë böchi' luzá'aru' para gaca dxi'a queë', en idipa ládxe'ë ca réajlë'ë Cristo. ³ Caní ral-la' gunru', tu' cabí benë' Cristo le guyaza ládxe'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'i nupa gula'nnë xihui' quiu' Li', Dios." ⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxön ladxi', en ruhuë' tsahui' rë'u. Que lë ni na' zoa le runru' löza. ⁵ Rinábida'-në' Dios, Nu run ga ribözaru' zxön ladxi', en Nu ruhuë' tsahui' rë'u, gunë' ga gunli' tuz ca rusáca'li' queëli', para gácali' ca na' ré'enë' Jesucristo. ⁶ Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo. ⁷ Que lë ni na', para gaca yöl-la' ba queë' Dios, guli'sí' lu

ná'ali' tuli' ia'tuli' ca na' Cristo guzxi' lu në'ë ca' rë'u. ⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxin le guzxi' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa biti' nácagaca judío tu' ruhuéchi' ládxe'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'
lógaca bönachi idútë yödzölió,
en gul-la' quiu' yöl-la' ba.

¹⁰ Ga yúbölö nazúaj lu guichi lá'ayi le rnna:
Libí'ili', bönachi idútë yödzölió,
buli'dzëjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:
Guli'cu'ë Xanru' yöl-la' ba,
yúgu'tëli' biti' nácali' judío.
Guli'tséaj ladxi' Lë',
yúgu'tëli' zóali' idútë yödzölió.

¹² Lësca' caní buzúajë' Isaías lu guichi le rnna:
Ilá' lahui Nu nababa di'a dza queë' Isaí.
Gaca lo Nu na' para inná be'e nupa biti' nácagaca judío.
Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzëjade'eli', en ga soa dxi ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinöz quézida' rúntica'sili' le naca dxi'a, en dëda' yöl-la' réajni'i queëli' para gaca uzéajni'ili' luzá'ali'. ¹⁵ Na'a naca' rugu ladxi', ruzúaja' queëli' lu guichi ni, böcha'a, en rusá'a ládxi'li' tu' zoa le buzá' ládxe'ë Dios quia' neda'. ¹⁶ Que lë ni na' runa' xichinë' Jesucristo lógaca bönachi biti' nácagaca judío, en runa' libán que didza' dxi'a queë' Dios, para gaca ugu'a bönachi biti' nácagaca judío lu në'ë Dios, nupa na' gurö cazë' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxe'ë Lë'.

¹⁷ Na'a, tu' rúnlena' tsözxön Jesucristo dxin, dë lu na'a tsaza ládxa'a ca naca le nuna' lu xichinë' Dios. ¹⁸ Lësca' rurúguida' innía' ca naca lë na' benë' Cristo lu na'a neda', benë' ga tun bönachi biti' nácagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na'a neda' bugunë' dxin ca' le nácagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo. ²⁰ Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélé'ë lahui dxin zxön chinunë' bönni' yúbölö. ²¹ Ca bena' neda' naca ca na' nazúaj lu guichi lá'ayi le rnna:
Ila'lé'e nupa nacua' ga cuntu nu ben libán queë' Lë',
en ila'yéajni'i nupa catu caz bila'yöni ca naca queë'.

Rë'ënë' Pablo tsejë' yödzö Roma

²² Que lë ni na', sal-la' zían luzuí gú'unida' guída' ga zóali', biti' guca guída'.
²³ Na'a, chibudxi bena' dxin quia' yugu' lataj ni, en chirë'ënda' zían iz guída' ga

zóali'. ²⁴ Que læ ni na', cate' tseja' luyú España, tōda' ga zóali' libí'ili', tu' runa' löza uduyúa' libí'ili', en udzéalenda' libí'ili'. Tōdi ni' huáca ugú'uli' neda' nōza. ²⁵ Na'a ral-la' tseja' Jerusalén, tsōju'a tu le gácalen nupa ni' néquiquequi queë' Cristo. ²⁶ Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzejë' quéguequi bönachi yechi' dzágagaca bönachi queë' Cristo, nacu'ë Jerusalén. ²⁷ Gula'yaza ládxi'gaquië' bönni' biti' nácagaquië' judío gulunë' læ ni. Le nácatë naca tu le rál-la'gaquië' quégaca bönachi judío ni'. Channö bönni' biti' nácagaquië' judío tu'zi'ë xibé le nácagaca queë' Dios ni'a que le núngaca bönachi judío, læsca' ral-la' ilácalenë' bönachi judío na', ulu'gunë' dxin le dë quégaquië'. ²⁸ Que læ ni na', cate' údxi udōda' lu ná'agaca bönachi judío læ na' bulu'nödzejë' bönni' ni, ní'irō tōda' ga zóali' libí'ili' cate' tseja' luyú España. ²⁹ Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bō Lá'ayi icja ládxi'do'oru', ráta'yua' loli', böcha'ado', ulídzali'-në' Dios tsözxön len neda', inábili'-në' gácalenë' neda'. ³¹ Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë læ na' tsōju'a lu ná'agaquië' bönni' nácagaquië' queë' Cristo, nacu'ë Jerusalén. ³² Guli'nabi-në' ca', channö naca ca ré'ënë' Dios, gunnë' neda' lataj idxina' queë'li' len yöl-la' rudzeja quia', para uzí' ládxi'lena' libí'ili'. ³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

16

Tu'gapa Dios luzë'eguequi bönachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencrea. ² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lænu, unödzejali' queënu bíti'tës bi riquínnu. Læ cázanu gúcalennu bönachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. ⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero læsca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, tē'ë légaquië': "Xclenli'." ⁵ Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlō ca yúgu'të bönachi luyú Acaya. ⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. ⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guíë, en nadéli'gaquië' lataj lo ladaj bönni' gubáz nasöl-lë'ë Cristo. Læsca' gula'yéajlë'ë Cristo zí'alō ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. ¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. ¹³ Guli'gapa Dios Rufo, bönni' rō queë' Xanru'. Guli'gapa Dios xinë'ë Rufo na', nácanu ca' ca xiná'

caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'.

¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní ¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. ¹⁹ Rizë didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en calëga gunli' le ruá' dö'. ²⁰ Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' lãdxë'ë queéli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' lãdxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácatëro caz! ¡Ca' gaca!

DIDZA' ZÍ'ALÖ GUSÖL-LĚ'Ě PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni quëzinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. ² Rugapa' Dios libí'ili', böchi' luzá'ado', rudúbili' queë' Dios lu yödzö Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacuá' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uzá' lãdxë'ë queëli', en gunë' ga soa dxi icja lãdxi'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'në' Dios: "Xclenu" ca naca queëli', tu' zoa le buzá' lãdxë'ë Dios queëli' tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të. ⁶ Caní naca, tu' guzxi' lu ná'ali' idú lãdxi'li' le runtu' liná' lo ca naca queë' Cristo. ⁷ Que lë ni na', bití' bi riyadzaj queëli' que le runnë' Dios Bö' Lá'ayi queëru', tsanni ni ribözali' dza na' ilá' lahuë' Xanru' Jesucristo. ⁸ Lë cazë' utipë' lãdxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni' huödë' Xanru' Jesucristo. ⁹ Dios runë' ca rnnë', en Lë cazë' bulidzë' libí'ili' para gácali' tuz len Zxi'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Bití' irúajli' choplö, pero guli'gaca tuz ca rizá' lãdxi'li', en ca runi libí'ili'. ¹¹ Caní rea' libí'ili', böchi' luzá'ado', tu' gula'guíxjö'inë' neda' bönni' nacu'ë lídxinu Cloé ca runli', ta'nnë' ridil-la dídza'li'. ¹² Lë ni rnniá': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'alsali' nisa para gácali' tuz len neda'? ¹⁴ Rea'në' Dios: "Xclenu", tu' cabí buquila' nisa niturö libí'ili', pero chópasë' Crispo, en Gayo. ¹⁵ Que lë ni na' bití' gaca innali' bidí'alsali' nisa para gácali' tuz len neda'. ¹⁶ Lësca' buquila' nisa Estéfanos, en nupa nacuá' lãdxë'. Bití' röjneda' channö buquila' nisa nu yúbölö. ¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸ Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusölá rë'u. ¹⁹ Caní naca, tu' nazúaj lu guichi lá'ayi le rnna:

Guna' ga huóaca nítisö yöl-la' rácada'
 quégaca nupa taca yenni'.
 Tsölá'alö ucá'ana' yöl-la' réajni'i
 quégaca nupa ta'yéajni'i yenni'.

20 ¿Bizxi caz uzi'tsë' xibé bönni' réajni'iné' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'ené' ru'ë didza'? Dios chibené' ga böáca cá'asö yöl-la' réajni'i quégaca bönachi yödzölió ni. 21 Dios, lu yöl-la' réajni'i queë', biti' bë'ë lataj ilúnbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

22 Të'ennë' yugu' bönni' judío ila'lé'ené' yöl-la' huáca nácagaca bë', ate' bönni' zi'tu' ta'guiljë' yöl-la' réajni'i. 23 Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. 24 Bönni' na' bulidzë' Dios légaquië', sal-la' nácagaquië' bönni' judío o bönni' zi'tu', téquibe'ené' napa cazë' Cristo yöl-la' huáca queë' Dios, en yöl-la' réajni'i queë' Dios. 25 Téquiguequi bönachi yödzölió ni le benë' Dios naca bë' biti' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. 26 Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ladjali' zían bönni' ta'yéajni'iné' lu yöl-la' bönáchisö quégaquië', en biti' gula'cu'ë ladjali' zían bönni' unná bë', en calëga zían bönni' nácagaquië' lo. 27 Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi'gaca yödzölió ni para gunë' ga ulu'tuí'i nupa nál-lagaca. 28 Lësca' caní, téquiguequi bönachi yödzölió ni nupa na' guröë' Dios nácagaca cá'asö, en biti' bi nácagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. 29 Que lë ni na', cuntu nu gaca gun ba zxön cuini lahuë' Dios. 30 Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tshai', en néquiru' quez queë' Dios, en nuláru'. 31 Naca ca na' nazúaj lu guichi lá'ayi, le rnna: "Channö zoa nu bi rë'ëni gun zxön, ral-la' gun zxön Xanru'."

2

Libán runru' queë' Cristo, ca gudë'ë lë'e yaga cruz

1 Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. 2 Cate' ni' guzóalena' libí'ili', bë' ládxa'a cabí gu'a didza' que le yúbölo, pero ca nácatë queë' Jesucristo bë'a didza', ca na' gudë'ë lë'e yaga cruz. 3 Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízida'a. 4 Bë'léna' libí'ili' didza', en bena' libán que xtídzë'ë Dios, calëga ca tu'i didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. 5 Caní bena' para gaca tséajlë'ëli' Dios, calëga tu' biyönili' yöl-la' rácada' quégaca bönachi, però tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

6 Ru'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. 7 Ru'itu' didza' que yöl-la' rácada' nagachi', lë na' runödzejë' Dios, tu' bigachi' yöl-la' rácada' na' buzöë' Dios dza ni'te para uzí'iru' xibé. 8 Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti'

ulu'dé'ë Xanru' nayépisëtèrè' lè'e yaga cruz. ⁹ Naca ca na' nazúaj lu guichi lá'ayi le rnna:

Chinupé'ë Dios le ulu'zi' xibé nupa nadxi'iguequi Lè',
yugu' le cuntú nu ble'e, en bití' biyõni,
en bití' gula'zá' ládxi'gaca bönachi ca naca que.

¹⁰ Na'a, Dios nuzéajni'inè' rè'u yugu' lè ni lu nè'ë Dios Bö' Lá'ayi, tu' ruyú cazè' Dios Bö' Lá'ayi yúgu'tè, enca' le yu'u icja ládxi'da'ahuè' Dios caz.

¹¹ ¿Naru' gaca inõzinè' nu bönni' le yu'u icja ládxi'da'ahuè' ia'tué' bönni'? Tuz bö' naca cazè' bönni' na' nõzi lè na'. Lësca' caní, cuntú nu nõzi le yu'u icja ládxi'da'ahuè' Dios. Tuzè' Dios Bö' Lá'ayi nõzinè' lè ni. ¹² Rè'u ni, bití' nazí' lu ná'aru' tu bö' ridasö yödzülió ni, pero nazí' lu ná'aru' Dios Bö' Lá'ayi, Nu na' ruchíziè' Dios rè'u para gaca gúnbè'ëru' yugu' le buzá' ládxi'ë Dios queëru'. ¹³ Yugu' lè na' buzá' ládxi'ë Dios queëru' ru'iru' didza' que, calèga len didza' tu'sédinè' bönachi rè'u len yöl-la' rácada' quèguequi, pero len yugu' didza' rusédinè' Dios Bö' Lá'ayi rè'u. Caní naca, ruzéajni'iru' bönachi zóalenè' Dios Bö' Lá'ayi légaquiè' ca naca le rusédinè' Dios Bö' Lá'ayi rè'u.

¹⁴ Tu bönni' bití' zóalenè' Dios Bö' Lá'ayi lè' bití' rizí' lu nè'ë le rusédinè' Dios Bö' Lá'ayi rè'u, tu' réquinè' cá'asö naca. Bití' gaca tséajni'inè' bönni' na' lè ni, tu' gaca guéquibe'enè' tuzè' bönni' zóalenè' Dios Bö' Lá'ayi lè' le nazaca' lè ni.

¹⁵ Tu bönni' zóalenè' Dios Bö' Lá'ayi lè' gaca guéquibe'enè' le nazaca' yúgu'tè, pero cuntú nu gaca guéquibe'e le nazaca' cazè' bönni' na'. ¹⁶ Nazúaj lu guichi lá'ayi le rnna:

¿Nuzxi caz nõzi le rizá' ládxi'ë Xanru'?

¿Nuzxi caz gaca uzéajni'i Lè'?

Le rizá' ládxi'ë Cristo yu'u icja ládxi'do'oru' rè'u.

3

Nácaru' huen dxin tsözxön len Dios

¹ Que lè ni na', böchi' luzá'ado', bití' guca gü'ílèna' libí'ili' didza' ca ru'ílèna'-nè' didza' tu bönni' nudödi cuiné' lu nè'ë Dios Bö' Lá'ayi, pero bé'lèna' libí'ili' didza' ca ru'ílèna' nu naca bönáchisö didza', bití' zóalenè' Dios Bö' Lá'ayi nu na'. Nácali' ca yugu' bí'i hué'ëni. Bití' nácali' tsutsu ca réajlè'éli'-nè' Cristo. ² Busédida' libí'ili' le cabí naca böniga, lè na' guca ca nidxi' gü'ili'. Bití' busédida' libí'ili' le naca böniga ca bëla' gáguli'. Bití' guca tséajni'ili' le naca ca bëla' gáguli', en bití' rácali' na'a. ³ Caní naca, tu' nácali' ca nu naca bönáchisö ga ridxintè na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzülió ni. ⁴ Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queè' Dios, ate' ni'a que le bentu' guyéajlè'éli' Cristo. Tu tutu' runtu' dxin na' bennè' Xanru' que queétu'. ⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benè' ga gulén, en guzxön xisedo' na' nadúz icja ládxi'do'oli'. ⁷ Caní naca, láti'do'os nazáquiè' bönni' guz, en láti'do'os ca' bönni' rigu'ë nisa, pero nazáca'dé'ë Dios Nu run ga rilén, en rizxön xisedo' na'. ⁸ Tuz ca nácaquiè' bönni' razè', en bönni' rigu'ë nisa. Dios ubi'ë que queégaquiè' tsca naca dxin runè' tu tuè'. ⁹ Nácatu' huen dxin tsözxön len Dios, ate' libí'ili' nácali' ca la' yèla queè' Dios ga runtu' dxin.

Lësca' caní nácali' ca tu yu'u runè' Dios. ¹⁰ Ca naca le buzá' ládxi'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa

zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazë' Jesucristo, ate' cuntu nu gaca cu'u ia'tú xilibi zö'ö caní. ¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizzxi, o guixi' cá'asö. ¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi. ¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'. ¹⁵ Channö tsegui dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? ¹⁷ Channö nu usuniti yudo' queë' Dios, Dios usunitië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödzölió ni, ral-la' huóaca nu na' ca tu bönni' biti' bi nözinë', para gata' que yöl-la' rácada' le naca idú. ¹⁹ Nu bönni' napzë' yöl-la' rácada' que yödzölió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." ²⁰ Lësca' caní rnna: "Xanru' nözinë' nítisö naca le ta'bequi ícjagaca bönachi tácada'." ²¹ Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të. ²² Néquiquequi queëli':

Pablo, en Apolos, en Cefas,
 en yödzölió ni,
 en yöl-la' na'bán, en yöl-la' guti,
 en dza ni zóaru' na'a, en dza si' za'.
 Yúgu'të nequi queëli',
²³ ate' libí'ili' néquili' queë' Cristo,
 ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

¹ Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. ² Yugu' bönni', Dios nudödë' lu náagaquië' ulu'gunë' dxin le nequi queë', run bayudxi ilunë' idú dxi'a le tunë'. ³ Biti' bi ruí'i ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchí'a rusörö cuina'. ⁴ Biti' ruxös ládxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchí'a rusöröë' neda'. ⁵ Que lë ni na', biti' ral-la' uchi'a usöröli' nu bönni' zí'alö ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'alö ia'tué'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bë'ëli', sal-la' biti' rinná bë'ëtu' netu'? Ni'a queë' Xanru' Dios ré'ënda' inná bë'ëli' para gaca inná bë'lentu' libí'ili' tsözxón. ⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégaquië' bönni' chinarugu quégaquië' ilátië' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yüdë'ë gubáz lá'ayi queë' Dios. ¹⁰ Tu' ré'ënitü' guntu' xichinë' Cristo, ru'itu' bönachi lataj téquiguequi nácatu' bönni' biti' bi nõzquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',

pero téquiguequi bönachi nacuídi'tu' netu'.

Tu'zóa bönachi netu' tsölá'alö,

pero tun libí'ili' bal.

¹¹ Ga ridxintë na'a dza, riduntu', en ribídxitu' nisa.

Biti' dë lari' gácutu'.

Tun bönachi netu' zi', en biti' zoa lídxitu'.

¹² Rusaca' zi' cuintu', la' nētu'sö runtu' dxin.

Tu'lidza bönachi netu' zi',

pero netu' rinábatu' le gácalen léguequi.

Ta'bía ládxi'gaca bönachi netu',

pero ruá' rilentu' le.

¹³ Ta'nnë' queëtu',

pero lu yöl-la' nõxaj ladxi' ru'ilentu' légaquië' didza'.

Ga ridxintë na'a dza nácatu' ca bëbu que yödzölió ni,

en ca tu le ta'ru'una yúgu'të bönachi.

¹⁴ Ruzúaja' queéli' caní lu guichi, calëga tu' ré'ënda' guna' ga utu'ili', pero ré'ënda' uzéajni'ida' libí'ili', runa' ca runë' tu bönni' ruzéajni'inë' yugu' zxi'ini cazë' tu' nadxi'inë' légacabi'. ¹⁵ Sal-la' gaca zián gáyu'ë bönni' ila'cuá'alén libí'ili', en ulu'sédinë' libí'ili' ca naca queë' Cristo, tuz nu zoa naca ca xúzili', nu na' ben ga néquili' queë' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a. ¹⁶ Que lë ni na', ráta'yua' loli' gü'i ládxi'li' gunli' ca runa' neda'.

¹⁷ Que lë ni na' ca' risól-la'a-bi' bi'i Timoteo ga zóali'. Tu' rúnlenbi' neda' dxin queë' Xanru' nácabí' ca zxi'ini caza', en nácabí' idú ladxi', ate' nadxi'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queë' Cristo, yugu' le rusédida' yúgu'të lataj lógaca yúgu'të cö' bönachi queë' Cristo. ¹⁸ Bál-lali' run ba zxön cuinli' tu' réquili' bítirö udxina' ga zóali'. ¹⁹ Na'a, la' udxíntea' ga zóali' channö Xanru' gunnë' neda' lataj. Ní'irö guéqui'be'eda', calëgasö didza' tu'ë bönni' tun ba zxön cuíngaquië', pero guéqui'be'eda' channö zóalen yöl-la' huáca queë' Dios légaquië'. ²⁰ Channö nazí' lu ná'ali' rinná bë'enë' Dios libí'ili', biti' naca bë' naca caní tu' rnnásili' ca'. Naca bë' naca caní channö zóalen libí'ili' yöl-la' huáca queë' Dios. ²¹ ¿Bízxilö ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxi'i, en lu yöl-la' nõxaj ladxi'?

5

Pablo ruchi'a rusöröë' tuë' bönni' runë' le ruá' dö'

¹ Rizë didza' zóalenë' libí'ili' tuë' bönni' runë' le ruá' dö', tu' zóalenë' nigula queë' xuzë'. Le ruá' dö' caní biti' ca' tun bönachi biti' núnbë'gaca Dios. ² Libí'ili' run ba zxön cuinli', pero ral-la' hu'inili', en ubéajli' nu na' run dul-la' na' ga zóali'. ³ Sal-la' biti' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalen caza' libí'ili' chibuchí'a busöröa' nu na' run dul-la' na'. ⁴ Cate' udúbili' queë' Xanru' Jesucristo guna' libí'ili' tsözxón lu bö' naca

caza'. Ní'irö, len yöl-la' huáca queë' Xanru' Jesús ⁵ buli'dödë' bönni' na' lu na' Satanás tu' xihui' para initi idútë le naca cazë', pero ulá bö' naca cazë' dza ni' huödë' Xanru'.

⁶ Biti' naca dxi'a gun ba zxön cuinli' ca naca le runli'. ¿Naru' cabí nözili' didza' na' rna: "Cua zído'os que yöta xtila gun ga chazxaj idútë cúa nazí'i le"? ⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila biti' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo. ⁸ Que lë ni na' ral-la' gunru' laní na', calëga zóalen rë'u cúa zi gulás na' le ruluí'i le ruá' dö', en le cabí nazaca', pero ral-la' ugunru' dxin yöta xtila na' biti' nazí'i cúa zi que, yöta xtila na' ruluí'i le naca idú dxi'a, en le naca idútë li.

⁹ Cate' buzúaja' queëli' lu guichi zí'alö, gudxi caza' libí'ili' biti' gunli' tsözxön bönni' tunë' le ruá' dö'. ¹⁰ Gudxa' libí'ili' caní, calëga para ucuítali' tsaz ga nacua' bönachi yödzölió ni, nupa tun le ruá' dö', en ga nacua' bönachi ta'zë ládxi'gaca le dë que luzë'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guiöj budó' yaga. Para gunli' caní gun bayudxi irúajli' yödzölió ni. ¹¹ Le rë'ëni inná didza' na' buzúaja' queëli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizë ládxi'ë le dë que luzë'ë, o reaj ládxi'ë tu budó' néquini, o rinnë xihuë'ë, o rizúdxinë', o ribanë'. Biti' ca' gágulenli' tsözxön tuë' bönni' caní. ¹²⁻¹³ Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

6

Biti' ral-la' ichë'ëru' böchi' luzá'aru' lógaca bönachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libí'ili'? Dxi'arö tséajli' lógaca bönachi queë' Cristo para ulu'chi'a ulu'sörö libí'ili'. ² ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí nápalí' yöl-la' réajni'i uchi'a usöröli' didza' bizxaj caní? ³ ¿Naru' cabí nözili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzölió ga ni zóaru' na'a. ⁴ Na'a, channö raca tu le run bayudxi nu uchi'a usörö, lë na' raca yödzölió ni, ¿bizx que rucua'ali' nupa ulu'chi'a ulu'sörö le, nupa na' biti' bi dë lu në'eguequi ladjagaca bönachi queë' Cristo? ⁵ Rnnía' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquië' böchi' luzá'ali'? ⁶ ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

⁷ Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queëli'? ¿Bizx que biti' guá' ilenli' nu rucáchi'lan le dë queëli'? ⁸ Libí'ili' ruá'ali' dö', en rucáchi' lanli', ate' runli' caní quégaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nözili' biti' ila'yaza bönachi biti' nácagaca tsahui' ga rinná bë'ë Dios? ¿Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':
Cuntu nu reaj ladxí' budó' guiöj budó' yaga,
en cuntu nu riguitsaj xibá que yöl-la' nutsaga na',

en cuntu nu bönni' run cuinë' ca nigula,
 en cuntu nu bönni' zóalenë' la' luzë'e bönni'së',
 en cuntu nu bönni' gubán, en cuntu nu ruhuidi',
 en cuntu nu rizudxi, en cuntu nu rinnë xihui',
 en cuntu nu rucáchi'lan.

Biti' ca' tsaz nu run caní ga rinná bē'ē Dios.

¹¹ Caní gúcali' bál-lalí' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idütë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácatë didza' ni, bití' ral-la' gunru' yúgu'të. Sal-la' dë lataj guna' yúgu'të, bití' gu'a lataj bi inná be'e neda'. ¹³ Ta'nná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lé'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi' xibë' idütë le naca cázaru'. ¹⁴ Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

¹⁵ ¿Naru' cabí nözili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! ¹⁶ ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'." ¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', bití' ca' gunli' le ruá' dö'. Bítitës dul-la' yúbölö runë' tu bönni', ní'lö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. ¹⁹ ¿Naru' cabí nözili' idütë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' bití' nequi queë'zili' idütë le naca cázali'. Na'a, nequi queë' Dios. ²⁰ Dios gú'uë' libí'ili' len tu le zxön le gudixjë'. Guli'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idütë le naca cázali', enca' bö' naca cázali'.

7

Rusëdinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queë'gaquië', ate' yúgu'të nigula ral-la' ila'cuá'lennu-në' bönni' que queë'gacanu. ³ Bönni' na' zóanu nigula queë' ral-la' gunë' queë'nu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queë'nu. ⁴ Biti' dë lu ná'asönu nigula le naca cázanu, pero bönni' queë'nu dë lu në'ë ca' le. Lësca' caní, bití' dë lu ná'asë' bönni' le naca cazë', pero nigula queë' dë lu ná'anu ca' le. ⁵ Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' bití' ila'dzáguië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bē'ē. ⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza'

neda'. Tu tuë' bönni' rizi'ë tsca le runödzejë' Dios queë' gunë'. Tuë' rizi'ë tu le runödzejë', ate' ia'tué' rizi'ë ia'tú le runödzejë'.

⁸Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

¹⁰Rinná bé'eda' nupa chinutsaga n'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." ¹¹Channö nu nigula ulá'alennu-në' bönni' queënu, ral-la' ugá'ananu túzinu, o huóácanu tuz len bönni' queënu na'. Lësca' caní tu bönni' bití' ral-la' ucá'anë'-nu nigula queë'.

¹²Na'a, néda'sö rea' ia'zica'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' bití' réajlë'ënu Xanru', en channö ré'ëninu ugá'analennu lë', bití' ral-la' ulá'alennë'-nu. ¹³Lësca' caní rnnía': Channö zóanu nu nigula zanru' réajlë'ënu Cristo, ate' bönni' queënu bití' réajlë'ë Xanru', en channö ré'ënnë' ugá'analennë'-nu, bití' ral-la' ulá'alennu lë'. ¹⁴¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'inigaquië' ca yugu' bi'i lan lahuë' Dios. Na'a, nácacacabi' quez queë' Dios. ¹⁵Nu bönni' o nigula nu cabí réajlë' Cristo, channö ré'ëni ulá'alennu nu na' nutsaga ná'alennu, huáca ca'. Bití' run bayudxi ugá'analennu nu na' böchi' luzá'aru' o zanru' nu réajlë' Cristo, tu' bulidzë' Dios ré'u para cózaru' tsáhu'ido'. ¹⁶¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

¹⁷Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios ré'u para guéquiru' queë'. Rusédida' yúgu'të cö' bönachi queë' Cristo xibá ni. ¹⁸Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë' na' naca bë'. Lësca' caní, channö Dios bulidzë' nu bönni' bití' narugu lu xipélë'ë lë' na' naca bë', bití' ral-la' ichúguië' lë' na' lu xipélë'ë. ¹⁹Bití' bi nazaca' lë' na' narugu lu xipélë'ë tu bönni', en channö bití' narugu lu xipélë'ë bönni' lë' na' naca bë', bití' bi nazaca'. Le nácada' lesaca' naca gunru' ca rinná bë' xibá queë' Dios. ²⁰Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. ²¹Channö bulidzë' li' cate' ni' nacu' bönni' nadó'o, bití' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé' lataj na' gata' quiu' iruju'. ²²Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. ²³Zxöntërö le gudizxjë' Dios, gú'uë' libí'ili'. Que lë' ni na' bití' ral-la' gutí' cuinli' lu ná'agaca bönachi. ²⁴Que lë' ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

²⁵Ca naca quégaca nupa bití' nutsaga ná'agaca, bití' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' lédxë'ë Xanru' neda'. ²⁶Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca ná'agacacacabi' na'a. ²⁷Channö nutsaga ná'lenu'-nu nigula, bití' ulá'alenu'-nu. Lësca' caní, channö zu' tuzu',

biti' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'gu'i ila'zaca' nupa nutsaga ná'agaca yödölió ni, ate' ré'ënda' guna' ga uláli' lu yöl-la' riguí'i rizaca' na'.

²⁹ Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' iluí' ládxi'gaquië' Dios, ca runë' nu bönni' biti' nutsaga ná'aleni' nigula. ³⁰ Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que. ³¹ Nupa tu'gún dxin le dë yödölió ni ral-la' ilaca ca nu biti' ruí'i ládxi' le dë yödölió ni, tu' udödi quegaca le rilé'eru' yödölió ni.

³² Ré'ënda' biti' ubi uguí'ili'. Tu bönni' biti' zóanu nigula queë' ruí'i ládxi'ë le nequi queë' Xanru', naca gunë' le raza ládxi'ë Xanru'. ³³ Tu bönni' nutsaga ná'lenni'-nu tu nigula ruí'i ládxi'ë le raza yödölió, naca gunë' le raza ládxi'nu nigula queë'. ³⁴ Lësca' caní raza queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'i ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'i ládxi'nu le raza yödölió ni, naca gunnu le raza ládxi'ë bönni' queënu.

³⁵ Yugu' lë ni rea' libí'ili' para uzí'ili' xibé lë ni, en calëga para uzága'a xinözili'. Ré'ënda' gunli' le ral-la' gunli', para gunli' xichinë' Xanru' idú ládxi'li'.

³⁶ Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queëbi', en ré'ënde'ebi' utsaga ná'aleni'-në' bönni', huáca utsaga ná'aleni'-në'. ¡Biti' gunbi' dul-la'! ³⁷ Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. ³⁸ Caní naca, nu ruí'i lataj bi'i que utsaga ná'aleni'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabanë' bönni' queënu. Channö gátië' bönni' queënu, gata' lu ná'anu utsaga ná'lennu-në' nu bönni' ré'ëninu, channö réajlë'ë Xanru' bönni' na'. ⁴⁰ Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzazxön.

8

Le ta'gú'u bönachi lógaca budó' guiöj budó' yaga

¹ Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxön cuinru', pero yöl-la' nadxí'i queëru' luzá'aru' run ga rácalenru' luzá'aru'. ² Channö zoë' nu bönni' réquinë' chiréajni'inë', biti' bi réajni'ininë' ca ral-la' tséajni'inë', ³ pero nu bönni' nadxí'inë' Dios, Dios caz zóaleni' bönni' na'.

⁴ Na'a, ca naca que le ré'aj ráguru', lë na' gula'gú'u bönachi lógaca budó' guiöj budó' yaga, nöziru' biti' bi nazáca'gaca budó' guiöj budó' yaga na' yödölió ni, en cúnturö nu zoa naca Dios. ⁵ Sal-la' nacué' le téquiguequi bönachi náca'gaca dios, le nacué' lúzxiba, en le nacué' luyú, ate' zían le tu'lídza bönachi, en tuí'i lágaca: dios, enca': xan, ⁶ pero queëru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,
ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'aló gula'yéaj ládxi'gaca budó' guiöj budó' yaga, ga ridxintë na'a dza tē'aj tahuë' le gula'gú'u bönachi lógaca budó' guiöj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. ⁸ Biti' gun le guí'aj gáguru' ga gunë' Dios rë'u bal. Channö gáguru' le, bití' gácaröru' dxi'a, en channö cabí gáguru' le, bití' gácaröru' cá'asö. ⁹ Dë lu ná'ali' guí'aj gáguli' bítí'tës. Guli'gún chí'i cuinlí' para cabí gunlí' ga ila'chixi ila'nigui nupa bití' naca idú ca ta'yéajlë' Cristo. ¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bítí'tës. Channö cö'u xilataj budó' guiöj budó' yaga, en guí'aj gagu' le gula'gú'u bönachi lo budó' guiöj budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiöj budó' yaga na'. ¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo? ¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölá'aló. ¹³ Que lë ni na', channö le guí'aj gahua' gun ga ichixi iníguinë' böchi' luzá'a, bítí'rö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasöl-lë'ë Cristo

¹ ¿Naru' cabí naca' gubáz nasöl-lë'ë Cristo? ¿Naru' cabí nadéli'da' yöl-la' rusólá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? ² Nadxi ca' téquiguequi ia'zíca'rö bönachi bití' naca' gubáz nasöl-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasöl-lë'ë Xanru'.

³⁻⁴ Nacuá' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. ⁵ Lësca' caní dë lu na'a utsaga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxön ga ridá', ca na' tunë' ia'zíca'rë' gubáz nasöl-lë'ë Cristo, en yugu' bönni' böchë'ë Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzölitu' le gágutu'? ⁷ ¿Nuzxi caz bönni' rejë' gudil-la, ate' riguixjë' la' cuinsë'? ¿Nuzxi caz bönni' rudë'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chí'ë-ba' bö'cu' zxila', en bití' re'jë' nidxi' quégacaba'? ⁸ Bití' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rnna: Bití' cu'u du rúa'aba' bëdxi cate' rulíbiba' zxoa' xtila. Bë'ë Dios didza' ni, calëgasö tu' ruí'i ládxi'ë-ba' bëdxi, ¹⁰ pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'líbiba' bëdxi zxoa' xtila, iropë' na' ral-la' ilunë' löza ila'zi'ë que le rulá' luyú na'. ¹¹ Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' bití' ral-la' uzí'itu' xibé tu le do' dë queëli' ca na' ruzi'ë xibé bönni' guz gú'una le rulapë'? ¹² Ia'zíca'rö bönachi tu'zéajni'inë' libí'ili' tu'zi'ë xibé le dë queëli'. ¿Naru' cabí rála'tërö uzí'itu' xibé netu' le dë queëli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. ¹³ Nöz quézili' ca

raca quégaca nupa tun dxin que yudo', tu'zì' xibé gun que yudo'. Lësca' caní nupa ta'gú'u rön quégacaba' böa' bédxi lu bucugu lá'ayi queë' Dios, tahuë' bëla' quégacaba' böa' bédxi na'. ¹⁴ Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zì' xibé libán na' tunë' ral-la' ulu'gagu légaquië'. ¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni bitì' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Guë'ënitëra' gátia' ca gu'a lataj nu innë runa' libán na' tu' nazxja'.

¹⁶ Bitì' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. ¹⁷ La'tu' runa' libán tu' rë'ëni quézida', huáca inaba' lazxa', pero run bayudxi guna' libán, tu' naca tu le busubáguë'ë Dios neda' guna'. ¹⁸ ¿Bizxi lazxa' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Bitì' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca ziánrö ca' bönachi. ²⁰ Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' bitì' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. ²¹ Cate' runa' libán lógaca bönachi izá'a, nupa bitì' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Bitì' rucá'ana' cá'asö xibá queë' Dios. Neda' runa' ca rinná bë' xibá queë' Cristo. ²² Run cuina' ca tu bönni' bitì' naca idú ca réajlë'ë Cristo para gaca guna' ga ulu'lágaca nupa na' bitì' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'. ²³ Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinöz quézili' ca tunë' bönni' nútsa'gaquië' lu huitaj. Ta'xítì'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzí'ili' xibé le ubi'ë Dios queëli'. ²⁵ Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uzí'tica'siru' xibé. ²⁶ Que lë ni na', naca' neda' ca tu bönni' idú ládxe'ë rixítì'ë. Naca' ca' ca tu bönni', idú ládxe'ë ridil-lë'. Bitì' rucudxa' lu bö'ös. ²⁷ Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idútë le naca cazë', en rinná bë'enë' le. Lësca' caní runa' neda', para cabí unítia' xilatja' lu dxin queë' Dios.

10

Bitì' ral-la' tseaj ládxi'ru' budó' guiöj budó' yaga

¹ Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zxul-la tu böaj yúgu'të'. Lësca' caní, gula'dödë' yúgu'të' gatsaj láhui'lö nísado'. ² Lu böaj ni', en lu nísado' ni', guca quégaquië' ca raza que nu ridila nisa. Lë na' guca quégaquië' guca bë' guláquië' tuz len Moisés. ³ Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégaquië'. ⁴ Gulé'ajë' yúgu'të' nisa na' bunödzjë' Dios Bö' Lá'ayi quégaquië', tu' gulé'ajë' nisa birúaj lë'e guiöj na' bulu'e lahui Dios Bö' Lá'ayi, guiöj na'

gula'báininë' légaquië'. Ca guca guiöj na' naca cazë' Cristo, nabánu' Lë'. ⁵ Sal-la' guca caní, bití' guyaza ládxi'ë Dios yúgu'të'. Que lë ni na' gulátië' lu lataj cá'asö.

⁶ Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zë ládxi'gaquië' légaquië'. ⁷ Bití' ral-la' tseaj ládxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'." ⁸ Bití' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. ⁹ Bití' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. ¹⁰ Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

¹¹ Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni. ¹² Que lë ni na', nu réqui chinal-la, ral-la' gun chi'i cuini, para cabí ichixi inigui. ¹³ Ca naca le ta'zí' bë' libí'ili' raca ca' quéguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', ulu'inë' libí'ili' naca gaca irúajli' lu na' tu' xihui', para gaca guá' ilenli'.

¹⁴ Que lë ni na', böchi' luzá'ado', bití' tseaj ládxi'li' budó' guiöj budó' yaga. ¹⁵ Ruí'ilena' libí'ili' didza' ca ruí'ilena' didza' nupa ta'yéajni'i. Bulí'chi'a buli'sörö didza' ni gu'a. ¹⁶ Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' ruluí'i nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúxjaru', en ráguru', ruluí'i dzágaru'-në' Cristo, en ruzí'iru' xibé le benë' Cristo cate' budödë' idútë le naca cazë' uláz queëru'. ¹⁷ Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

¹⁸ Bulí'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' ruluí'i dzágagaquië' Dios. ¹⁹ ¿Bizxi rnna didza' ni ruá'a? Bití' rnnía' napa budó' guiöj budó' yaga yöl-la' huáca, en le ta'gú'u bönachi lógaca budó' guiöj budó' yaga na' bití' napa yöl-la' huáca. ²⁰ Caní rnnía': Lë na' ta'gú'u bönachi bití' núnbë'gaquië' Dios lógaca budó' guiöj budó' yaga, ta'gú'u lógaca bö' xihui', en calëga lahuë' Dios. Ré'ënda' bití' idzágalí' yugu' bö' xihui'. ²¹ Bití' gaca guí'jali' le ruluí'i nácaru' tuz len Xanru', enca' lë na' uluí'i nácalí' tuz len yugu' bö' xihui'. Bití' gaca gáguli' le ruluí'i dzágaru'-në' Xanru', enca' le uluí'i dzágalí' yugu' bö' xihui'. ²² ¿Naru' gúntsaru' ga uzxé'enë' Xanru'? ¿Naru' réquitseli' nápatëróli' yöl-la' huáca ca napé' Lë'?

Le dë lu ná'aru' gunru', en ca ral-la' idxí'igacru'-në' böchi' luzá'aru'

²³ Naca idútë li didza' na' rnna: "Yúgu'të dë lu ná'aru' gunru'." Na'a, neda' rnnía': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. ²⁴ Ral-la' güí'i ládxi'ru' gunru' le gun ga gaca dxi'a quégaquië' böchi' luzá'aru', en calëgasö le gun ga gaca dxi'a que la' cuínsiru'.

²⁵ Bití'tës bi tutí' bönachi lu yë'ëyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'. ²⁶ Nazúaj lu guichi le rnna: "Queë' Xanru' nequi yödzölió ni, enca' yúgu'të le dë yödzölió ni."

²⁷ Channö ulidzë' tu bönni' bití' réajlë'ë Dios libí'ili' para guídali' lidxë', ate' guë'ënili' tséajli', guli'gagu yúgu'të le cu'ë loli', en bití' bi inábali' que, para cabí cuéqui böniga ládxi'do'oli'. ²⁸ Channö núti'tës nu guíë libí'ili': "Lë ni gula'gu'ë lo budó' guiöj budó' yaga", bití' gáguli' lë na' para gaca dxi'a que nu na' gudíxjöi'i

caní libí'ili', en para cabí cuéqui böniga ládxi'da'ahuë'. ²⁹ Rnnía': Para cabí cuéqui böniga ládxi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzóa' tsöla'alö le dë lu na'a guna' tu' ribequi böniga ládxi'da'ahuë' bönni' yúbölö?" ³⁰ Huáca inná ca' nu na': "Channö guía'-në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua'?" ³¹ Channö bi gáguli' o bi guí'jali', o bítitës bi gunli', guli'gún yúgu'të para gaca queë' Dios yöl-la' ba. ³² Biti' bi gunli' le gun ga ila'chixi ila'nigui bönachi judío, en bitit' gunli' le gun ga ila'chixi ila'nigui bönachi bitit' nácagaca judío, en bitit' gunli' le gun ga ila'chixi ila'nigui bönachi queë' Dios. ³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en bitit' ruí'i ládxa'a guna' le uzi'a xibé la' neda'sö, pero le ulu'z'í xibé ia'z'íca'rö bönachi para ulu'lágaca.

11

¹ Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

² Runa' libí'ili' zxon, böchi' luzá'ado', tu' röjnética'sili' neda', en nazí lu ná'ali' xibá budöda' lu ná'ali'. ³ Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxi'inë', Bönni' na' náquië' Cristo. ⁴ Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö. ⁵ Na'a, channö tu nigula rulídzanu Dios, o ruí'ínu didza' uláz queë' Dios, en bitit' bi zxoá ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu. ⁶ Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'ínu nigula na' channö nu chugu guitsa' ícjanu, ral-la' bi ixóa ícjanu. ⁷ Tu bönni' bitit' bi ral-la' udxía icjë' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' ruluí'i lahui yöl-la' zxon queë' Dios, pero le nácanu nigula na' ruluí'i lahui yöl-la' zxon queë' bönni' queënu. ⁸ Cate' benë' Dios bönachi, bitit' bubéajë' bönni' na' lu nigula. Nigula na', lu bönni' na' bubéajë'-nu. ⁹ Lësca' caní, bitit' benë' Dios bönni' para uzí'ínu xibë' nigula, pero benë' nigula para uzi'ë xibánu bönni'. ¹⁰ Que lë ni na', nigula na' ral-la' ixóa ícjanu le ruluí'i zoa nu rinná be'e lënu tu' tu'yúë' gubáz lá'ayi queë' Dios rë'u. ¹¹ Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. ¹² Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúaj lu në'ë Dios.

¹³ Buli'chi'a buli'sörö la' libí'isili'. ¿Naru' ral-la' ulídzanu-në' Dios tu nigula bitit' bi zxoá ícjanu? ¹⁴ ¿Naru' cabí rusëdi libí'ili' yöl-la' nácate quégaca bönachi, ral-la' utuí'inë' bönni' na' ru'ë lataj itunna guitsa' icjë'? ¹⁵ Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. ¹⁶ Channö zoa nu guë'ëni tá'baga' didza' ni, canísö nazí lu na'tu' runtu', en lëbisö tun yugu' cö' bönachi queë' Dios.

Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'

¹⁷ Bitit' runa' libí'ili' bal ca naca le uzéajni'ida' libí'ili' na'a. Le runli' bitit' run ga raca dxi'a queéli' cate' rudúbili' queë' Cristo, pero run ga raca queéli' le cabí naca dxi'a. ¹⁸ Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní. ¹⁹ Run bayudxi ila'cuá'alén libí'ili' nupa tu'sedi le cabí nácate para ilaca bë' nupa nácagaca idú bönachi queë' Cristo. ²⁰ Que lë ni na', cate' rudúbili',

lë na' ráguli' tsözxön biti' naca le rë'aj ráguru' para usubanru' ca gútië' Xanru'.
²¹ Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxön, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'.
²² ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí'i nupa biti' bi dë quéguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

Le rë'aj ráguru' para usubanru' ca gútië' Xanru'

²³ Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélé'ë yöta xtila, ²⁴ en cate' budxi gudxë' Dios: "Xclenu'", buzuzxjë' le, en gunné': "Guli'gagu. Lë ni naca xipëla'a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahuë', gudélé'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." ²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

²⁷ Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipëlë'ë Xanru', enca' xichönë' cá'asö. ²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. ²⁹ Núti'tës nu rë'aj ragu lë ni, en biti' run le bal tu' cabí réquibe'e ruluí'i le guca queë' Xanru', rusubaga' cuini dul-la' ni'a que lë na' rë'aj ragu. ³⁰ Que lë ni na' te'e zían nupa dzágagaca libí'ili', en ta'cuídi', ate' ziánguequi chinátigaca. ³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u. ³² Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' quéguequi bönachi yödzölió ilátigaca.

³³ Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bë'ëli' lataj gula'chë' bönachi libí'ili' ga yúbölö. Guyéaj ládxi'li' budó' guiöj budó' yaga, le cabí ta'nnë'.
³ Que lë ni na', ruzéajni'ida' libí'ili' caní, rnnía': Ladaj yúgu'të nupa tuí'i didza' uláz queë' Bö' Lá'ayi queë' Dios, cuntu nu gaca innë xihui' queë' Jesús, en nitúë' gaca innë': "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. ⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. ⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na'

queëru' para gunru' xichinë'. ⁷ Dios runnë' que queëru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'. ⁸ Dios Bö' Lá'ayi runödzjë' queë' tu bönni' yöl-la' huáca ru'ë didza' len yöl-la' rácada', ate' ia'tué' bönni', Lë cazë' Bö' Lá'ayi runödzjë' queë' yöl-la' huáca ru'ë didza' lu yöl-la' réajni'i. ⁹ Lësca' caní, Lë cazë' Dios Bö' Lá'ayi na' runödzjë' queë' ia'tué' bönni' yöl-la' réajlë' Cristo bi gunë', ate' ia'tué' bönni' runödzjë' queë' yöl-la' huáca ruúnë' nupa te'e. ¹⁰ Ia'tué' bönni' runödzjë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lë' lataj ru'ë didza' uláz queë' Dios, ate' ia'tué' bönni' runödzjë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzjë' queë' ia'tué' bönni' yöl-la' huáca ru'ë didza' yúbölö le cabí nazëdë', ate' queë' ia'tué' bönni' yöl-la' huáca rudödë' didza' yúbölö na' biti' nazëdë'. ¹¹ Yúgu'të lë ni runë' Lë cazë' Dios Bö' Lá'ayi, tu' runödzjë' que tu tu bönachi tsca rë'ëni quézinë'.

Yúgu'tëru' nácaru' ca tuz bönachi

¹² Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaca tuz idütë le naca cázaru', lësca' caní naca queë' Cristo. ¹³ Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzja cazë' Bö' Lá'ayi.

¹⁴ Na'a, lu idütë le naca cázaru', zían le nagudi' dzágalenru', en calëga tuz. ¹⁵ La'tu' huáca gü'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. ¹⁶ La'tu' huáca gü'i didza' nágaru', huanná: "Tu' cabí naca' guiöj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. ¹⁷ La'tu' naca guiöj loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e zxi'na'ru'? ¹⁸ Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. ¹⁹ La'tu' naca tuz le nagudi' dzágalenru', bíti'rö soa idú ca naca cázaru'. ²⁰ Na'a, ca nácaru', zían le nagudi' dzágalenru', pero tuz le nácaru'.

²¹ Que lë ni na', guiöj loru' biti' gaca guíë ná'aru', inná: "Biti' riquinda' li'." Lësca' caní, ícjaru' biti' gaca guíë ní'aru', inná: "Biti' riquinda' libí'ili'."

²² Na'a, yugu' le nagudi' dzágalenru', lë na' réquiru' nácacacarö cuídi'sö, lë ni naquíniröru'. ²³ Lësca' caní, yugu' le nagudi' dzágalenru', le réquiru' nácacacarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. ²⁴ Biti' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. ²⁵ Caní benë', ate' biti' narúajgaca choplö le nagudi' dzágalenru', tu' tun chi'i luzé'eguequi tu ia'tú. ²⁶ Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxön le.

²⁷ Na'a, libí'i cázali' dzágali' idütë le naca cazë' Cristo, ate' tu tuli' nácali' ca yugu' le nagudi' dzágalenë'. ²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunny nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'un nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.
Ní'irö nucu'ë yugu' bönni' tu'ë didza' yúbölö biti' nazédagaquië'.

²⁹ Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

³¹ Guli'güí' ládxi'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, ulu'ida' libí'ili' tu le nácáro lesaca' ca yúgu'të' lë ni.

13

Yöl-la' nadxí'i

¹ Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucödxiru' o guíë rutíl-laru' luzë'e. ² Sal-la' nazí' lu na'a gu'a didza' uláz queë' Dios en tséajni'ida' yúgu'të' le nagachi', en yúgu'të' didza' réajni'i, en sal-la' naca idú ca réajlë'a Dios ga ridxintë huáca cúa' yugu' guí'a, pero channö cabí nadxí'ida' luzá'a, biti' bi nazáca'a. ³ Sal-la' quíisia' idútë le dë quia' para ugahua' yugu' bönachi yechi', en sal-la' udöda' idútë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

⁴ Nu bönni' nadxí'inë' luzë'ë, ribözë' zxön ladxi'.

Náquië' dxi'i ladxi', en biti' ruzxé'enë' luzë'ë.

Nadxí'inë' luzë'ë idú ládxi'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' röjnenë' dö' guluí'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribózatica'së' zxön ladxi'.

⁸ Biti'rö tódi que yöl-la' nadxí'i. Huadödi que le dë lu ná'agaca bönachi iluí'i didza' uláz queë' Dios. Huadxín dza cate' bíti'rö gata' lu ná'agaca bönachi iluí'i didza' yúbölö le cabí nazédagaca, ate' huadödi que yöl-la' réajni'i quéguequi bönachi. ⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios. ¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá ládxa'a ca bí'ido'. Cate' bigula' bucá'ana' le nequi que bí'ida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu guíë dxí'lido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. ¹³ Na'a, nacua'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacua' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxi'ili' luzá'ali', en guli'güí' ládxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios. ² Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca nácagaca le nagachi' queë' Dios. ³ Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi. ⁴ Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a güí'ili' didza' yúbölö le cabí nazëdali' yúgu'tëli', pero le naca lo, ré'ënda' güí'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate' guída' ga zóali', channö güí'ilena' libí'ili' didza' yúbölö le cabí nazëda', bití' bi uzí'ili' xibé. Uzí'isili' xibé didza' na' güí'ilena' libí'ili' le nulu'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'? ⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? ⁹ Lësca' caní raca queëli'. Channö len lúdxí'li' güí'ili' didza' le cabí taca bönachi, bití' ca' ila'yéajni'i didza' güí'ili'. Caní gaca, nítisö güí'ili' didza'. ¹⁰ Le nácate' nacua' zían didza' yúbölö tuí'i zían cö' bönachi izá'a lu yödzülió ni, ate' nacua' bönachi ta'yéajni'i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'. ¹² Lësca' caní naca queëli'. Ruí'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' ládxi'li' sí'ili' le ilún ga ilácarö tsutsu bönachi queë' Cristo.

¹³ Que lë ni na' ca', nu ruí'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ruí'i nu na'. ¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a. ¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. ¹⁶ Channö lu bö' naca cazu' rulidza lá'ayu'-në' Dios, ate' zoa ní' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ní'a que didza' ru'u, rë'u-në' Dios: "Xclenu"?" ¹⁷ Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé nu na' riyöni. ¹⁸ Rea'-në' Dios: "Xclenu'", tu' ruí'ira' didza' yúbölö le cabí nazëda' ca yúgu'tëli'. ¹⁹ Lógaca bönachi queë' Dios guë'ënitëröda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntú nu gaca tséajni'i. Gaca usérida' ia'zícá'rö bönachi tuzi channö ila'yéajni'i didza' gu'a.

²⁰ Böchi' luzá'ado', bití' gácali' ca bí'ido' ca naca le rizá' ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'. ²¹ Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a güí'ilena' bönachi ni didza'. Sal-la' guna' caní, bití' ulu'zé nágagaca xtídza'a." ¡Caní rnnë' Xanru'! ²² Caní naca, Dios ru'ë rë'u lataj

ru'iru' didza' yúbölö le cabí nazédaru' para gaca tu le naca bē' lógaca bönachi bití' ta'yéajlè', en calèga lógaca nupa ta'yéajlè' Cristo. Ru'è rē'u lataj ru'iru' didza' uláz queè' Lè' le ulu'zì' xibé nupa ta'yéajlè' Cristo, en calèga bönachi na' bití' ta'yéajlè'. ²³ Que lè ni na', cate' udúbili' tsözxõn, yúgu'tèli' na' néquili' queè' Cristo, channö gü'ili' didza' yúbölö le cabí nazédali' yúgu'tèli', ate' tsázagaca nupa nazédagaca láti'do'os, o nupa bití' ta'yéajlè' Cristo, ¿naru' cabí ila'nná: "Nachixi ícjali"? ²⁴ Na'a, channö yúgu'tèli' gü'ili' didza' uláz queè' Dios, ate' tsaz nu cabí réajlè' Cristo o nu nazèda láti'do'os, guéquibe'e nu na' nabaga' xíguia', ate' Dios uchi'a usöröè' lè'. Caní guéquibe'e nu na', tu' tseajni'i didza' gü'ili' yúgu'tèli'. ²⁵ Guéquibe'e ca naca le rizá' ladxi' nu na', lè na' bigachi', ate' uzóa zxibi nu na', en tseaj ladxi' Dios, ate' inná: "Le nácatè Dios zóalenè' libí'ili'."

Ca ral-la' gunru' ga rudúbiru' queè' Cristo

²⁶ Que lè ni na', böchi' luzá'ado', cate' rudúbili' queè' Cristo, rul-lè' tuè' bönni' dzáguie' libí'ili' tu salmo, ate' rusédinè' ia'tué' tu xibá, ate' ia'tué' rigu'xjöi'inè' libí'ili' tu le bulu'ínè' Dios lè', ate' ia'tué' ru'è didza' yúbölö le cabí nazèdè', ate' ia'tué' rudödè' didza' yúbölö na' le cabí nazèdè'. Yúgu'tè le gunli' ral-la' gaca le ulu'zì' xibé nupa tu'dubi queè' Cristo. ²⁷ Cate' nacua' ni' nupa tu'i didza' yúbölö le cabí nazédagaca, bití' ral-la' gü'ili' didza' caní zíanrö ca chopa tsónnasili'. Huáca gu'è didza' tuzè' bönni' na', ate' tödi na' huáca gu'è didza' ia'tué', pero run bayudxi soa nu udödi didza' yúbölö na' le bití' nazédali'. ²⁸ Channö cuntú nu zoa nu gaca udödi didza' yúbölö na' le cabí nazédali', nu na' ru'i didza' yúbölö le cabí nazèda ral-la' soa dxisö ga na' nudúbili', ate' huáca gü'ilen Dios didza' na' lu icja ládxi'da'ahui. ²⁹ Lèscá caní, yugu' bönni' tu'è didza' uláz queè' Dios ral-la' ilu'è didza' chopa tsónnasè', ate' ia'zica'rè' bönni' na' tu'è didza' uláz queè' Dios ral-la' ulu'chi'a ulu'söröè' didza' ru'è bönni' na'. ³⁰ Channö Dios ulu'ínè' tu bönni' rö'è ni' le ré'èni inná xtídzè'è, ral-la' soa dxisö nu na' ru'i didza'. ³¹ Yúgu'tèli' huáca gü'ili' didza' uláz queè' Dios tu tuli' para izédali' yúgu'tèli', en idipa ládxi'li' ca' yúgu'tèli'. ³² Yugu' bönni' tu'è didza' uláz queè' Dios huáca ila'nná be'e cuíngaquie', en ila'cu'è dxisö. ³³ Calèga Dios nu run ga rutsátsaru', tu' ré'èné' Lè' gácaru' ba'a ladxi', ca na' runè' ga nacua' yúgu'tè cö' bönachi queè' Cristo.

³⁴ Ral-la' ila'cuá'anú dxisö nigula queéli' ga na' rudúbili'. Bití' dè lu ná'agacanu ilu'ínu didza' ni'. Ral-la' ila'cuá'anú nöxaj ca na' rinná bē' xibá queè' Dios. ³⁵ Channö tē'èninu ila'yéajni'ínu ia'lati', ral-la' ila'nábinu bönni' que queégacanu cate' ni' nacu'è lídxigaquie'. Bití' ral-la' ilu'ínu didza' yugu' nigula ga na' rudúbiru' queè' Dios.

³⁶ ¿Naru' réquitseli' bunödzjè' Dios xtídzè'è lu ruá'ali' libí'isili'? ¿Naru' réquitseli' bidxín xtídzè'è Dios queézili' libí'ili'? ³⁷ Channö nu bönni' nútsè'è ládjali' réquinè' ru'è didza' uláz queè' Dios, o réquinè' zóalenè' Dios Bö' Lá'ayi lè', bönni' ni ral-la' si' lu nē'è naca xibá queè' Xanru' le ruzúaja' queéli' lu guichi ni. ³⁸ Na'a, channö cabí ru'i ládxi'è didza' ni, bití' gü'i ládxi'li'-nè' bönni' na'.

³⁹ Que lè ni na', böchi' luzá'ado', guli'güí' ládxi'li' gü'ili' didza' uláz queè' Dios, en bití' inná bé'eli' nu ru'i didza' yúbölö le cabí nazèda. ⁴⁰ Ral-la' gunru' yúgu'tè ca sa'yéaj, en lu yöl-la' ba'a ladxi'.

15

Bubanè' Cristo lu yöl-la' guti

¹ Na'a, böchi' luzá'ado', rigu'xjöi'ida' libí'ili' ca naca didza' dxi'a na' bena' libán que ga zóali', lè na' guzxí' lu ná'ali', ate' run ga nácarö idú ca réajlè'èli'

Cristo. ² Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'. ⁴ Rnna ca': "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' buluí'i lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. ⁶ Ní'irö buluí'i lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxön. La'tu'biqui' yúgu'të' böchi'ru' ni nacu'ë nabánagaquië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' buluí'i lahuë' lógaquië' yúgu'të' bönni' gubáz queë'.

⁸ Ga yöjsetë buluí'i lahuë' ca' lahua' neda'. Ca guca lë ni, naca' ca tu bí'ido' gúljabí' cate' chigudödi dza ral-la' gáljabí'. ⁹ Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' si' la' gubáz queë', tu' gudxía ládxa'a bönachi queë' Dios. ¹⁰ Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. ¹¹ Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, çnacxi caz naca, rnnali' bál-lali': "Biti' ulu'bán nupa chinátigaca"? ¹³ La'tu' cabí ulu'bán nupa chinátigaca, bití' bubanë' Cristo, ¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. ¹⁵ Ia'stú, la'tu' cabí bubanë' Cristo, rizi' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo. ¹⁶ La'tu' cabí ulu'bán nupa chinátigaca, bití' bubanë' Cristo, ¹⁷ en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'. ¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. ¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. ²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiguequi queë' Cristo cate' huödë'. ²⁴ Ní'irö idxín dza údxi cate' ugúë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. ²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítie' ga údxi naca yöl-la' guti. ²⁷ Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rnna: "Budödë' yúgu'të lu në'ë para inná bé'enë' le." Na'a, naca bë' bití' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'. ²⁸ Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

29 Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

30 Zoa bönadxi queétu' gátitu' yúgu'tè dza. ¿Bizx que ruí'tu' lataj gaca caní channö cabí ubanru' lu yöl-la' guti? 31 Yúgu'tè dza zoa bönadxi gátia'. Rigúxjöi'ida' libí'ili' lè ni, böchi' luzá'ado', tu' raza ládxa'a le bena'. Caní naca tu' bena' ga réajlè'èli' Xanru' Jesucristo. 32 Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: “Gui'aj gáguru' tu' huátiru' cuxö huidzaj.”

33 Biti' gü'ili' lataj nu si' ye'e libí'ili'. Channö si' lu ná'ali' láti'do'os le cabí nácatè, idútèli' huóacali' chul-la niti. 34 Buli'bí'i ládxi'li', en biti' gunli' dul-la' tu' cabí núnbè'èli'-nè' Dios bál-lali' libí'ili'. Rnnía' caní para guna' ga utu'ili'.

Ca ilaca nupa ulu'bán lu yöl-la' guti

35 Nadxi ca' zoa nu inná: “¿Nacxi ulu'bán nupa chinátigaca? ¿Nacxi gaca idú ca nacagaca cazè' cate' ulu'dxinè'?” 36 Li', bönni' biti' bi nõzinè'. Lè na' rázu' luyú biti' ilén channö cabí initi. 37 Lè na' rázu' luyú naca tu xisédo'os, nadxi ca' que zxa' xtila o que ia'tú guixi' cuando'. Lè na' rázu' biti' naca guixi' cuando' na' ral-la' ilén. 38 Dios runè' ga gaca guixi' cuando' ca nun cazè' que. Ca naca tu tu xisédo' na' runè' ga gaca guixi' cuando' que. 39 Lësca' caní, biti' naca lëbisö bëla' que queégacaba' yúgu'tèba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguinni, en ia'tú ca naca bëla' quégacaba' böla. 40 Lësca' caní nadzá' idú ca nacagaca caz nupa nacuá' yehua' yubá ca naca idú ca nacagaca caz nupa nacuá' luyú ni. Zoa tu yöl-la' lachi quégaca nupa nacuá' yehua' yubá, en ia'tú ca naca yöl-la' lachi quégaca nupa nacuá' luyú ni. 41 Zoa tu yöl-la' lachi que gubidza, en ia'tú que beo', en ia'tú queguequi böljaj lúzxiba. Yöl-la' lachi que tu böljaj lúzxiba nadzá' ca naca yöl-la' lachi que ia'tú böljaj lúzxiba. 42 Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. 43 Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. 44 Cate' rigachi' lu yeru ba naca tu bëla' que yödzo'lió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzo'lió ni, en ia'tú ca gaca le idzaga bö' naca cázaru'.

45 Nazúaj lu guichi lá'ayi le rnna: “Bönni' na' gusí lahuè' zoè' luyú ni, lè' Adán, Dios benè' lè' bönni' ban”, pero Bönni' na' guyáziè' xilatjè' Adán, Lè' Cristo, Dios benè' ga náquiè' Bö' nabániru'. 46 Biti' blè'è zí'alö Bönni' na' náquiè' Bö'. Bla' zí'alö nu na' naca bönáchisö, ate' ní'irö blè'è Bönni' na' náquiè' Bö'. 47 Bönni' ni' blè'è zí'alö, gúquinè' yu. Bönni' na' blè'è burópilö, Nu na' naca Xanru', birúajè' yehua' yubá. 48 Nupa nacuá' luyú ni nacagaca ca gúquiè' bönni' na' gúquinè' yu, ate' nupa ral-la' tsójcuá' yehua' yubá ilaca ca naca Nu na' birúaj yehua' yubá. 49 Ca na' na'a dè queéru' tu bëla' le naca ca guca bëla' queè' bönni' na' gúquinè' yu, lësca' ral-la' huóequiru' ca néquinè' Nu na' birúaj yehua' yubá.

50 Caní ré'èni inná lè ni rea' libí'ili', böchi' luzá'ado', rnnía': Le néquini bëla', en rön biti' gaca tsaz ga ni' rinná bë'è Dios, en lësca' caní, lè na' initi biti' gaca ideli' lè na' soa tsaz. 51 Buli'yútsöca', rea' libí'ili' tu le bigachi': Biti' gátiru' yúgu'tèru', pero Dios utsé'è ca nácaru' yúgu'tèru'. 52 Tsárido'os gaca, tsca naca tu le rutásö guiöj loru', cate' cödxí lúzuba' böa' le röjsetè. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé'è le néquiniru' yúgu'tèru'. 53 Lè na' nácaru' le riniti ral-la' huóaca le soa tsaz, ate' le néquiniru',

lë na' ral-la' gati, huóáca tu le catu caz gati. ⁵⁴ Cate' lë na' riniti chinuhuóáca le soa tsaz, enca' lë na' ral-la' gati chinuhuóáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

⁵⁵ Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. ⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' bití' runli' nítisö xichinë' Xanru'.

16

Yugu' bönachi Corinto tu'nödzaj quegaquië' böchi'gaca ta'yádzjanë'

¹ Na'a, ca naca que dumí na' unödzjali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia. ² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queëli'. Guli'gún chí'i le, para cabí gun bayudxi bi utúbili' cate' idxina' ga zóali'. ³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unödzjali'. ⁴ Channö ral-la' tseja' ca' neda', tsöjácalenë' neda'.

Le rë'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'. ⁶ Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. ⁷ Cate' guída' uduyúa' libí'ili' bití' ré'ënda' tódisa' ni'. Runa' löza sóalena' libí'ili' xidzé, channö gunnë' Xanru' neda' lataj. ⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi ugu'í'ibi' tsanni ni' sóaleni' libí'ili', tu' runbi' xichinë' Xanru' ca na' runa' neda' xichinë'. ¹¹ Que lë ni na', cuntu nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxön dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyúë' libí'ili' tsözxön len yugu' böchi'ru', pero bití' ré'ënë' tsejë' na'a. Guidé' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ládxi', en buli'tipa ládxi'li'. ¹⁴ Len yöl-la' nadxi'i guli'gún bítitës bi gunli'.

¹⁵ Na'a, böchi' luzá'ado', chinöz quézili' ca naca queë' Estéfanos, enca' quegaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacuá' luyú Acaya. Bulu'dödi cuíngaquië' para ilunë' xichíngaca bönachi queë' Dios. ¹⁶ Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'. ¹⁷ Rudzëjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queëli'. ¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu' gapa Dios libí'ili'. Aquilo, en Priscila, enca' nupa tu' dubi queë' Dios ga naca lu yu'u lúdxigaquië' tu' gapë' Dios

libí'ili'. ²⁰Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²²Nu biti' nadxí'i Xanru' Jesucristo, chinabía dö' nu na'.

Gudá Xanru'.

²³Rinábida'-në' Xanru' Jesucristo uzá' ladxë'ë queéli'. ²⁴Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LĚ'Ě PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rě'ëně' caní Dios. Bi'i böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzö Corinto, enca' yúgu'těli' néquili' quez queë' Dios luyú Acaya ga na' nababa Corinto. ² Rinábida'-ně' Xúziru' Dios, en Xanru' Jesucristo uzá' lădxě'ë queěli', en guně' ga soa dxi icja lădxi'do'oli'.

Yugu' le gudí'i guzxáquě'ë Pablo

³ ;Yöl-la' ba Dios, Xuzě' Xanru' Jesucristo, tu' náquiě' Xúziru', en ruhuéchi' lădxě'ë rě'u, en náquiě' ca' Dios, Nu ruhuě tsáhui'tica'sö rě'u! ⁴ Dios ruhuě tsáhuě'ë rě'u cate' raca bítitěs bi raca queěru', para gaca huě tsáhui'ru' ca' nupa bi raca quéguequi. Ruhue tsáhui'ru' légaquiě' ca na' Dios ruhuě tsáhuě'ë rě'u.

⁵ Tsca ta'yán le riguí'i rizáca'ru', ca na' gudí'i guzxáquě'ë Cristo, lěsca' caní ta'yán le tu'huě tsáhui' rě'u, tu' nácaru' tuz len Cristo. ⁶ Que lě ni na', channö bi riguí'i rizáca'tu', raca caní queětu' para gaca huě tsáhui'tu' libí'ili', en guntu' ga uláli'. Channö Dios ruhuě tsáhuě'ë netu', raca caní para gaca huě tsáhui'tu' libí'ili', ate' lu yöl-la' riböza zxon lădxi' queěli', gaca guá' ilenli' yugu' le quí'i sáca'li', ca na' raca ca' queětu'. ⁷ Ruzxöni lădxi'tu'-ně' Dios gúntica'sě' ga gaca dxi'a queěli', tu' chinözitu' ca na' riguí'i rizáca'li' tsözxön len netu', lěsca' caní ruzí'ili' xibé tsözxön len netu' le ruhuě tsáhuě'ë Dios rě'u.

⁸ Rě'ěnitú' inözili', böchi' luzá'ado', ca naca le zían le gulaca queětu' luyú Asia. Gudödité bē' lē na' guca queětu', ate' guca zítěrö ca le guca guá' ilentu'. Ca' guca, bítirö bentu' löza sóatu' ibantu'. ⁹ Gúquitu' guca queětu' ca raca quégaquiě' bönni' chinarugu quégaquiě' ilātiě'. Guca caní queětu' para cabí uzxöni lădxi'tu' la' cuínsitu', pero uzxöni lădxi'tu'-ně' Dios, Nu rusubán nupa chinátigaca. ¹⁰ Dios busölě' netu' lu lē na' ben ga guzóa bönadxi gátitu', ate' rusölě' netu' yúgu'tě dza. Runtu' löza usölě' Lě' netu' caní leyúbölö ¹¹ channö gácalenli' netu', ulídzali'-ně' Dios, en inábili'-ně' gácaleně' netu'. Dios guně' ca na' inábili'-ně' tsözxön len bönachi zían, uzá' lădxě'ë queětu', ate' ila'nná: "Xcleně' Dios" ni'a queětu'.

Rigúxjö'ë Pablo bizx que ridzeně' idxině' Corinto

¹² Lě ni le run ga rudzėjatu'. Bō' naca caztu' ruluí'i netu', len yöl-la' ba'a lădxi' queětu', en idú lădxi'tu' runtu' bi runtu' yödzölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' lădxě'ë Dios queětu', en calěga len yöl-la' réajni'i queěztu' bentu' caní. ¹³ Ruzúajsötu' queěli' lu guichi le gaca ulábali', en le gaca tséajni'ili'. Raca lădxa'a tséajni'ili' idú ¹⁴ lē na' réajni'ili' lati'. Ní'irö cate' idxín dza huödě' Xanru' Jesucristo, gaca gunli' netu' zxon ca na' netu' guntu' libí'ili' zxon.

¹⁵⁻¹⁶ Tu' bena' löza lē ni, guzá' lădxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopalu' luzuí. Tödi ni' huáca gácalenli' neda' ugú'uli' neda' nōza tseja' luyú Judea. Caní gú'unida' guna'. ¹⁷ ;Naru' réquitseli' guzxí' yě'a tu' butsá'a ca guna'? ;Naru' réquitseli' lu yöl-la' bönáchisö quia' runa' le rizá'asö icja', en bē'ěsa' ca' didza' cate' gunnía': "Caní guna'?" ¹⁸ Ni'a queë' Xanru' Dios, Nu run idútě ca rna xtídzě'ë, bití' bē'ěsa' ca' didza' cate' bē'lēna' libí'ili' xtídzě'ë

Dios. ¹⁹ Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, biti' ru'isë' ca' didza'. Lë' ru'ë didza' idútë li. ²⁰ Cristo caz runë' ga naca idútë löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nözinë' Lë' biti' bida' ga zóali' lu yödzö Corinto, para cabí gun bayudxi guna' ga huí'inili'. ²⁴ Biti' ré'ënitü' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitü' guntu' le gun ga udzeja ládxi'li'.

2

¹ Que lë ni na' bë' ládxa'a cabí guídatea' queëli' zí'alö, para cabí guna' ga huí'inili'. ² Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'? ³ Que lë ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. ⁴ Cate' ni' buzúaja' queëli' lu guichi lë na', gusévide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxi'

⁵ Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnnía': "Huaca innaru'", para cabí tödi bë' ichugu bë'a queë' bönni' na'. ⁶ Tscati' gaz xíguia' chibenli' látu'biqui' yúgu'tëli' queë' bönni' na'. ⁷ Na'a, ral-la' uniti loli' bönni' na', en utípali' ládxe'ë, para cabí tödi bë' huí'ininë', en para cabí gaca tsaz chopa ládxe'ë. ⁸ Que lë ni na' ráta'yua' loli' gunli' le gaca bë' nadxí'ili'-në' idú ládxi'li'. ⁹ Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica'sili' ca rnna xtídza'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le ré'ëni gun queëru'.

Gurö'ë böniqa Pablo lu yödzö Troas

¹² Cate' bidxina' lu yödzö Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'. ¹³ Sal-la' guca caní, gurö'a böniqa tu' cabí yöjxáca'a-bi' bi'i böchi'ru' Tito ni'. Que lë ni na' buzá'alena' bönachi ni', ate' guyija' luyú Macedonia.

Idéli'ru' tu' zóalenë' Cristo rë'u

¹⁴ ¡Xclenë' Dios! Richë'tica'së' rë'u ca tu le naca bë' bidéli'në' Cristo yöl-la' rusölá queëru'. Dios rugunë' dxin rë'u para rulu'ë lahui ca gaca ilúnbë'e bönachi Cristo. Le nácaru' naca ca tu le rilá' zxixi, le riguisi gáti'tës. ¹⁵ Nácaru' ca tu nöri rilá' zxixi, le ruzégui'ë Cristo lahuë' Dios, en le riguísië' lógaca nupa nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bë' ilátië'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'ö. Tu'

nasól-lë'ë Dios netu', idú ládxi'tu' ruí'itu' didza' lahuë' Lë' tu' nácatu' tuz len Cristo.

3

Ca naca didza' le ruún rë'u tuz len Dios

¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'itu' libí'ili' tu guichi le ruluí'i le nácatu'? ¿Naru' ral-la' inábitu' libí'ili' gúnnali' queétu' tu guichi caní, ca na' tun bal-la bönachi? ² Libí'i cázali' nácali' ca tu guichi le ruluí'i le nácatu', le nazúaj lu icja ládxi'do'otu', ate' yúgu'të bönachi gaca ulu'laba le, en tséajni'igüequi le. ³ Le nácali' nalá' lahui ca tu guichi nuzúajë' Cristo, le gusól-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiöjta'a, pero lu icja ládxi'do'oli' nuzúajë'.

⁴ Ruí'itu' caní didza' tu' ruzxöni ládxi'tu'-në' Dios tu' zóalenë' Cristo rë'u. ⁵ Biti' réquitu' bi gaca guntu' rácasö queétu', pero Dios runnë' queétu' yöl-la' huáca bi guntu'. ⁶ Dios caz bennë' queétu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guichisö richugu queëru' gátiru', pero Dios Bö' Lá'ayi nabániru'.

⁷ Yugu' xibá queë' nazúajgaca lu guichi, Dios buzúajë' yugu' lu guiöjta'a, ate' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyëpitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca, ⁸ zxöntëro naca yöl-la' bení' na' dzaga yugu' le runë' Dios Bö' Lá'ayi. ⁹ Yöjtsaga yöl-la' bení' lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácatëro lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi. ¹¹ Channö guzóa yöl-la' bení' que lë na' guzóa tu chí'ido'osö, zxöntëro naca yöl-la' bení' que lë ni sóatica'sö.

¹² Tu' zoa lë ni runru' löza, ruí'itu' didza' lu yöl-la' rugu ladxi'. ¹³ Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. ¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugüë' tuzë' Cristo. ¹⁵ Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiöj lógaquië' le run ga nachul-la nanítigaquië'. ¹⁶ Cate' nu ruhuóáca queë' Xanru', rigúa lë na' run ga nachul-la naniti nu na'. ¹⁷ Cate' ni rnnatu': "Xanru", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. ¹⁸ Yúgu'tëru' rë'u bití' bi nusayaj loru'. Nácaru' ca tu guië dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta' rë' queëru' yöl-la' bení' queë'.

4

¹ Dios buéchi' ládxi'ë netu', en budödë' lu na'tu' dxin ni runtu'. Que lë ni na' bití' raca chopa ládxi'tu'. ² Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí' yé'etu', en bití' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxi'tu' guntu' le iléquibe'e yúgu'të bönachi naca dxi'a lahuë' Dios. ³ Channö zoa nu bití' réajni'ini didza' dxi'a runtu' ba nalí que, nácatëro nupa nachul-la nanítigaca bití' ta'yéajni'i le. ⁴ Bití' ta'yéajlë' bönachi na'. Ben tu' xihui' ga naca caní, nu na' nun cuini ca

dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. ⁵ Biti' runtu' libán que la' cuínsitu', pero runtu' libán queë' Jesucristo, en riguíxjö'ötu' náquië' Xanru', ate' netu' ni nácatu' huen dxin queéli' tu' nadxí'itu'-në' Jesús. ⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

⁷ Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zi' bönachi netu', pero biti' rudú ládxi'tu'.

Rö'ötu' böniga, pero biti' raca chopá ládxi'tu'.

⁹ Ta'bía ládxi' bönachi netu', pero biti' rubéaj ládxi'ë' Dios netu'.

Ta'zé'ede'e netu' yu, pero biti' tu'suniti netu'.

¹⁰ Lu idú le naca caztu' rátitica'stu' tsözxön len Jesús, na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. ¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queéli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lë'sca' caní raca queëtu', réajlë'ëtu' Dios, en que lë ni na' ruí'itu' didza'.

¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. ¹⁵ Raca caní yúgu'të lë ni para gaca bi uzí'ili' xibé. Channö ila'deli' zíanrö ca' bönachi le ruzá' ládxi'ë' Dios queëru', ila'nnë': "Xclenë' Dios", ate' gaca yöl-la' ba queë' Dios.

¹⁶ Que lë ni na', biti' raca chopá ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. ¹⁷ Le cuídi'sö riguí'i rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'. ¹⁸ Biti' ruí'i ládxi'ru' le rilé'ëru' luyú ni, pero le biti' gaca ilé'ëru' ruí'i ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5

¹ Nöziru' cate' initi idütë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ní' yehua' yubá, lë na' nun cazë' Lë'. ² Que lë ni na' rinnë ládxi'ru' tu' rë'ë'niru' tsú'uru' le cubi ni', lë na' naca ca tu lídxiru' ni' yehua' yubá. ³ Tsú'uru' le cubi ni' ca na' rácuru' tu lari', para cabí sóaru' ga biti' zoa idütë le naca cázaru'. ⁴ Tsanni ni zóaru' lu idütë le naca cázaru', le naca ca tu yu'u lári'do', rinnë ládxi'ru' lu yöl-la' risëbi ládxi' queëru'. Biti' runru' caní tu' rë'ë'niru' ucá'anaru' idütë le naca cázaru', pero rë'ë'niru' tsú'uru' tsaz le cubi ni'. Caní gaca, ucá'anaru' idütë le naca cázaru' le riniti, ate' tsú'uru' lu yöl-la' na'bán idú. ⁵ Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupë'ë queëru'.

⁶ Que lë ni na' nadipa ládxi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'. ⁷ Runru' ca runru' tu' réajlë'ëru'-në' Dios, en calëga tu' zoa bi rilé'ëru'. ⁸ Tu' runru' löza lë ni, rë'ë'niru' ucá'anaru' le naca cázaru' ni para tsöjsóalenru'-në' Xanru'. ⁹ Que lë ni na' ruí'i ládxi'ru' gunru' le raza ládxi'ë' Xanru', channö ugá'anaru' lu idütë le naca cázaru' ni, o channö tsöjsóalenru'-në' Xanru' ni'. ¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröë'. Ní'irö ubi'ë que queëru' tsca naca

le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruún rë'u tuz len Dios

¹¹ Que lë ni na', tu' rádxi'tu'-në' Dios, ruí'i ládxi'tu' uzéajni'itu' bönachi. Nözinë' Dios ca naca le yu'u icja ládxi'do'otu', ate' ruzxöni ládxa'a nözili' dxi'a ca' libí'ili' lë na' yu'u icja ládxi'do'otu'. ¹² Biti' rubéaj cuintu' dxi'a loli'. Rë'ënitú' gata' lataj queéli' gunli' netu' bal, para gaca ubí'ili' didza', bi guiéli' yugu' bönni' tun ba zxon cuíngaquië' ca na' tu'luí'isö lahui cuíngaquië', en calëga ca nácagaquië' lu icja ládxi'do'gaquië'. ¹³ Channö nachixi ícjatu', naca para gaca yöl-la' ba queë' Dios, en channö cabí nachixi ícjatu', naca para gaca bi uzí'ili' xibé. ¹⁴ Run bayudxi bi guntu' tu' nadxi'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxön. ¹⁵ Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. ¹⁶ Que lë ni na', bíti'rö gúnbë'ëtu' bönachi tsca naca le nalá'gaca láhui'lö, en sal-la' canísö bénbë'ëtu'-në' Cristo, bití' núnbë'ëtu'-në' caní na'a. ¹⁷ Channö nuhuöáca nütí'tës bönachi tuz len Cristo, chinaca bönachi cubi nu na'. Chigudödi que le gulaca zí'aló, ate' chinucúbigaca yúgu'të.

¹⁸ Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huöáca yúgu'të bönachi tuz len Lë'. ¹⁹ Libán runtu' rna caní: "Dios guzóalenë' Cristo, en benë' ga gaca ulu'huöáca bönachi yödzülió ni tuz len Lë', en bití' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huöáca bönachi tuz len Dios. ²⁰ Na'a, nácatu' gubáz queë' Cristo, en raca na'a ca Dios caz ráta'yuë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huöáca tuz len Dios. ²¹ Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxön len Dios, ráta'yutu' loli', rnnatu': Biti' udödili' cá'asö le ruzá' ládxe'ë Dios queéli'. ² Nazúaj lu guichi lá'ayi ca gunné' Dios le rna:

Tu dza buzá' ládxa'a quiu', biyönda' li',
ate' dza bena' ga gaca uló', gúcalena' li'.

¡Bulí'yútsöca! ¡Na'a naca dza ruzá' ládxe'ë queëru'! ¡Na'a naca dza gaca uláru'!

³ Biti' rë'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que bíti'tës bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxon ladxí' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga röö'ötu' böniga. ⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi guië, en gula'bía di'i netu'. Gudödi bë' bentu' dxin, en bití' guta' lataj queëtu' gásitu' o bi gágutu'. ⁶ Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxí', en tu' nápatu' yöl-la' réajni'i,
en tu' riböztu' zxon ladxí', en tu' nácatu' dxi'i ladxí',
en tu' zóalenë' Dios Bö' Lá'ayi netu',
en tu' naca idú ca nadxi'itu' luzá'atu'.

⁷ Ruí'itu' didza' idütë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chí'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö.
Nacuá' nupa tu'lidza ditaj netu', enca' nupa tu'lidza tsahui' netu'.
Sal-la' ta'nná bönachi rizi' yé'ëtu', ru'itu' didza' idútë li.

⁹ Sal-la' nacuá' bönachi biti' núnbë'gaquië' netu',
nacuá' ca' nupa núnbë'gaca netu'.
Ridatu' ga zoa bönadxi gátitu', pero ni zóatu' nabantu'.
Tunë' netu' xíguia', pero biti' tutië' netu'.

¹⁰ Tu'suhuí'ini netu', pero rudzéjatica'stu'.
Nácatu' bönni' yechi', pero runtu' ga rata' yöl-la' tsahui' idú quégaca bönachi
zián.

Sal-la' biti' bi dë queëtu', nequi queëtu' yúgu'të le dë.

¹¹ Idú ládxi'tu' ru'ilentu' libí'ili' didza', böchi' luzá'ado', zóali' Corinto.
Bulu'itu' libí'ili' ca ru'í ládxi'da'tu' libí'ili'. ¹² Channö cabí nácaru' tuz biti'
naca tu' cabí ru'í ládxi'tu' libí'ili', pero libí'í cázali' biti' ru'í ládxi'li' netu'.
¹³ Na'a, ru'ilena' libí'ili' didza' ca runë' tu bönni' ru'ilenë'-bi' zxí'inë' didza',
rnniá': Buli'bí'í queëtu' ca rúnlentu' libí'ili'. Guli'güí ládxi' netu'.

Nácaru' ca tu yudo' ga yu'ë Dios ban

¹⁴ Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí'í cázali' nácali' ca tu yudo' ga yu'ë Dios ban. Ca naca lë ni, Dios caz
gunné':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

¹⁷ Que lë ni na', gunné' ca' caní:

Guli'rúaj ládjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxí'ina', bönni', en nigula."

Caní rnnë' Xanru', Nu napa caz idútë yöl-la' huáca.

7

¹ Böchi' luzá'ado', néquiguequi queëru' yugu' lë ni guzxí' lu në'ë Dios. Que
lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le
naca cázaru', en bö' naca cázaru'. Lu yöl-la' radxi queëru' Dios ral-la' guéquiru'
quez queë' Lë'.

Ca bulu'bí'í ládxi'gaca nupa ta'yéajlë' Cristo

² Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'etu'.

³ Ruá'a caní didza', calëga para usubága'a libí'ili' xíguia', pero naca ca na'
chigunní'a zí'alö, rnniá': Zoa' sina' ibánlena' libí'ili' o gátilena' libí'ili' tu' ru'í
ládxa'a libí'ili'. ⁴ Ruzxönida' ládxa'a libí'ili', en rúnda'a libí'ili' zxön. Sal-la' zián
le riguí' rizáca'tu', nadípada' ládxa'a, en rudzéjade'e ládxa'a.

⁵ Cate' bidxintu' luyú Macedonia, ga ridxintë na'a dza, biti' rata' queëtu'
lataj uzí' ládxi'tu', pero zián le taca queëtu'. Ta'díl-lalen bönachi netu', ate' lu
icja ládxi'do'otu' yú'ugaca le tun ga rádxitu'. ⁶ Ní'irö Dios, Nu rutipa ládxi' nu
chizóa gaca chopá ládxi', butipë' ládxi'tu' cate' budxinbi' bi'í Tito ga guzóatu'.

⁷ Biti' gúcasö tu' budxinbi' queëtu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' ré'ënide'eli' ulé'eli' neda', en ca na' ruhuí'inili' ni'a que læ na' guca ni', enca' ca ruí'i ládxi'li' neda'. Yúgu'të læ ni ben ga rudzeja ládxa'a.

⁸ Sal-la' le buzúaja' queéli' lu guichi zí'alö ben ga buí'inili', bití' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu chí'ido', ⁹ pero na'a rudzédada', calëga tu' buí'inili', pero tu' ben yöl-la' ruhuí'ini queéli' na' ga bubí'i ládxi'li'. Dios bugunë' dxin yöl-la' ruhuí'ini queéli', para cabí ichixi iníguili' ni'a que le bentu' netu'. ¹⁰ Yöl-la' ruhuí'ini na' rugunë' dxin Dios run ga nu ubí'i ladxi' para ulá nu na', ate' que læ ni na' bití' ral-la' huí'iniru' que. Yöl-la' ruhuí'ini le naca que yödzölió ni run ga ilátigaca bönachi. ¹¹ Buli'yútsöca' ca bugunë' Dios dxin yöl-la' ruhuí'ini queéli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' bití' bi dul-la' nabága'li' ni'a que læ na' guca.

¹² Que læ ni na', sal-la' buzúaja' caní lu guichi na', bití' guca ni'a que nu na' ben dul-la', en calëga ni'a que nu na' gudí'i guzxaca', pero para gaca bë' lahuë' Dios le nácatë ruí'i ládxi'li' netu'. ¹³ ¡Læ ni butipa ládxi'tu'! Calëgasö bidipa ládxi'tu', pero rudzédade'e ládxi'tu' tu' rudzédabi' bi'i Tito ni'a que le benlí' libí'ili', tu' butípali' ládxi'bi'.

¹⁴ Bena' libí'ili' zxön lobi' Tito, ate' bití' benli' ga utu'ida'. Bë'lentica'stu' libí'ili' didza' idútë li, ate' læsca' caní naca idútë li didza' bë'lentu'-bi' Tito cate' bentu' libí'ili' bal. ¹⁵ Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídzatu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxi' queéli'. ¹⁶ Rudzédade'eda' tu' gaca uzxöni ládxa'a libí'ili' idú ládxa'a.

8

Ca ral-la' unödzaj nu réajlë' Cristo le dë que

¹ Na'a, böchi' luzá'ado', ré'ënitú' quíxjöi'itu' libí'ili' ca naca le buzá' ládxe'ë Dios quégaca yugu' cö' bönachi queë' Cristo luyú Macedonia. ² Sal-la' yenni' gula'guí'i gula'záquië' lu yugu' le guzxí' bë' légaquië', bulu'dzédade'enë', en idú ládxi'gaquië' bulu'nödzjadë'ë sal-la' nácaquië' bönachi yechi'. ³ Neda' runa' ba nalí quégaquië', idú ládxi'gaquië' bulu'nödzjadë'ë tsca gula'zéqui'në', en bulu'nödzjarë' tsca gula'zéqui'në'. ⁴ Gula'nábide'enë' netu', en guláta'yudë'ë lotu' güí'itu' légaquië' lataj tsözxön len netu' ilácalenë' böchi'ru' ta'yéajlë'ë Cristo. ⁵ Gulunrë' ca guqui ícjavu' ilunë'. Bulu'dödi cúngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios. ⁶ Que læ ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzjali' lu yöl-la' dxi'i ladxi' queéli', ca na' gusí lobi' benbi' zí'alö. ⁷ Nácalí lo ca naca yúgu'të le runli', ca réajlë'ëli' Cristo, en ca réajni'ili', en ca ruzéajni'ili' bönachi, en ca ruí'i ládxi'li' luzá'ali', enca' ca nadxí'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unödzejali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bé' naca idú ca nadxí'ili' luzá'ali'. ⁹ Nöz quézili' le buzá' ládxi'ë Xanru' Jesucristo queëru'.

Bilé'enë' yöl-la' tsahui'

pero para gácalenë' libí'ili'

böáquië' yechi'

para gata' queéli' yöl-la' tsahui',

tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunödzejali', pero lësca' ca gú'unili' unödzejali'. ¹¹ Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunödzejali'. Buli'nödzej na'a tsca séqui'li'. ¹² Channö ré'ënili' bi unödzejali', Dios runë' bal le runödzejali' tsca naca le dësö queéli'. Biti' rinabë' unödzejari' tsca le dësö queéli'.

¹³ Biti' ré'ënda' guna' ga unödzejali' le gácalen ia'zica'rö bönachi ga idxintë yadzaj queéli'. ¹⁴ Ré'ënda' gaca tuz ca dë queéli', en quégaquië'. Na'a dëda' queéli' le gaca unödzejali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nödzejë' queéli' para caní gaca tuz ca dë queéli', en quégaquië' yúgu'tëli'. ¹⁵ Lësca' caní nazúaj lu guichi lá'ayi le rnna: "Nu na' butúbida', bití' bugá'ana que, ate' nu na' butubi láti'do'os, bití' biyadzaj que."

Ca runbi' bi'i Tito, enca' nupa dzágagaca lëbi'

¹⁶ ¡Xclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'! ¹⁷ Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rácasö queëbi' gú'unibi' tsöyubi' libí'ili'.

¹⁸ Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runödzejali', para gaca yöl-la' ba queë' Xanru', en gaca bé' ca' ruí'i ládxi'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxön para cuntú nu bi gaca innë queëtu', ca rúnlentu' dumí na' runödzejada'ali', le gácalen bönachi yechi'. ²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

²² Risöl-la'tu'-në' ca' ia'tué' böchi'ru' tsözxön len légaquië', ate' zían luzuí guzxí' bé'ëtu' lë', ate' naca bé' ré'ënë' gácalenë' ré'u idú ládxi'ë. Ia'stú, tu' ruzxöni ládxi'ë libí'ili', ré'ënitëronë' ca' gácalenë' ré'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë' böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. ²⁴ Guli'gún ga gaca bé' nadxí'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchi'ru'

¹ Ca naca le runödzejali' quégaquië' böchi'ru' ta'yéajlë'ë Cristo, bití' run bayudxi uzúaja' queéli' lu guichi ni. ² Chinözda' ca ré'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le

dxi'a runli'. Riguíxjöi'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ru'i ládxi'li' gunli' lë ni, bidipa ládxi'gaca lá'tu'biqúi' yúgu'të bönachi ni ta'yéajlë' Cristo. ³ Na'a, risól-la'a yugu' böchi'ru' ni queéli' para gaca bë' naca idütë li didza' ru'itu' ca naca queéli', ate' naca ca na' chigunnía' queéli', chizóa gunli' lë na' gácalen yugu' luzá'aru'. ⁴ Channö ila'zá'alén bal-la bönachi Macedonia ta'yéajlë' Cristo neda' tsözxön, ate' gaca bë' bití' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. ⁵ Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unödzjali'. Caní gaca, údxí utúbili' dumí na' zí'alö ca idxina', ate' gaca bë' runödzjali' tu' ré'ëni cázali', en calëga tu' rinná bé'etu' libí'ili' bi unödzjali'.

⁶ Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

⁷ Tu tuli' ral-la' unödzjali' tsca na' chinuzóali' icja ládxi'do'oli', en calëga lu yöl-la' ruhuí'ini queéli' o tu' run bayudxi, tu' nadxí'inë' Dios nu runödzaj idú ladxi'. ⁸ Dios gaca gúnnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que. ⁹ Lësca' caní nazúaj lu guichi lá'ayi le rnna:

Idú ládxi'ë' bunödzjë' quégaca bönachi yechi'.

Naca bë'tica'sö yöl-la' dxi'i ladxi' queë'.

¹⁰ Dios, Nu runna queëru' bi gaz uzóaru', enca' bi guí'aj gáguru', gunnë' ca' queéli' bi unödzjali', le naca ca lë na' nu raza ruzóa, en gunë' ca' ga ila'yán le ilápali' le nátagaca yugu' le dxi'a runli'. ¹¹ Dios gunë' ga gáta'da' queéli' yöl-la' tsahui' para gaca unödzjada'ali'. Caní gaca, yugu' le unödzjali', lë na' quísitu' uláz queéli', gun ga ila'nná bönachi zían: "Xclenë' Dios." ¹² Lë na' runödzjali' le gácalen yugu' böchi'ru', calëgasö gü'i quégaquië' le ta'yádzjanë', pero gun ga ila'nnë': "Xclenë' Dios." ¹³ Cate' gunli' caní, ila'gu'ë Dios yöl-la' ba tu' gaca bë' runli' ca rnna didza' dxi'a queë' Cristo ca na' rnnali' runli'. Ila'gu'ë Lë' yöl-la' ba ca', tu' nácali' dxi'i ladxi', runödzjali' quégaquië', enca' quégaca ia'zíca'rö bönachi. ¹⁴ Ulu'lidzë' Dios, en ila'nábinë' Lë' gácalenë' libí'ili' tu' nadxí'iguequinë' libí'ili' ni'a que le buzá' ládxi'dë'ë Dios queéli'. ¹⁵ ¡Xclenë' Dios, bennë' tu le nácada' lesaca' queéli'!

10

Yöl-la' unná bë' dë lu në'ë Pablo

¹ Ta'nná bönachi naca' nöxaj ladxi' cate' zóalena' libí'ili', pero cate' zoa' zi'tu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' loli' ² cabí gunli' ga gun bayudxi gaca' rugu ladxi' len libí'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' bönáchisö queëtu'. ³ Le nácatë nácatu' bönachi, pero calëga rácasö queëtu' runtu' xichinë' Dios. ⁴ Yugu' le rudí'initu' lu gudil-la, bití' nátagaca ca le tu'dí'ini bönachi yödzölió ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

⁵ Rusunítitu' yugu' didza' bití' nácatë le tu'zxöni ládxi'gaca bönachi, en yúgu'të le tun ga tun ba zxön cuínguequi, en le tun ga cabí ilunbë' Dios. Runtu' ga gaca ila'nná bë'enë' yúgu'të le ta'zá' ládxi'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnnë' Cristo. ⁶ Tödi gunli' le gaca bë' naca

idú ca runli' ca rnna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baga' xtídzë'ë.

⁷ Ruyuli' le nalá' láhuisö. Channö réquinë' nu bönni' dzáguië' libí'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo. ⁸ Biti' ca' rutuí'ida' sal-la' gudödi bë' ben ba zxön cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'. ⁹ Biti' ré'ënda' guéquili' ré'ënda' gun gádxida' libí'ili' ní'a que le ruzúaja' queëli' lu guichi ni. ¹⁰ Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zi'ë rë'u, en ralë' didza', pero cate' zóalenë' rë'u runë' nöxaj ladxi', en didza' gúlado' ru'ë." ¹¹ Nu na' ruí'i caní didza' ral-la' guéquibe'e lë ni: Ca na' nácatu' cate' bi ruzúajtu' queëli' lu guichi tsanni ni zóatu' zí'tu' ga zóali', gácatu' ca' lu le guntu' cate' ni' sóalentu' libí'ili'.

¹² Le nácatë biti' nácatu' rugu ladxi' para innatu' nácatu' lëbi ca nácagaca nupa ni' tun ba zxön cuínguequi. Nácagaca nupa ni' yugu' bönni' bití' bi nözguequinë'. Lu le ta'za'sö ládxi'gaquië' tu'zöë' ca ral-la' ilaca bönachi, en tu'chi'a tu'söröë' la' légacasë' tsca naca lë na' ta'za'sö ládxi'gaquië'. ¹³ Netu' bití' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'. ¹⁴ Channö budödë' Dios lu na'tu' dxin guntu' ga zóali', bití' ca' gudödi bë'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'. ¹⁵ Bití' run ba zxön cuintu' ca naca dxin núngaca ia'zíca'rö bönachi, pero ca nacasö dxin na' budödë' Dios lu na'tu'. Runtu' löza gácarö idú ca réajlë'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'. ¹⁶ Ní'irö gaca guntu' libán que didza' dxi'a ga nacua' yödzo dzö'ö zí'tu'rö ga zóali'. Caní gaca, bití' gun bayudxi gun ba zxön cuintu' ní'a que dxin núngaca ia'zíca'rö bönachi, lë na' budödë' Dios lu në'eguequi.

¹⁷ Nazúaj lu guichi lá'ayi le rnna:

Nu ré'ëni bi gun zxön,
le ben cazë' Xanru' ral-la' gun zxön.

¹⁸ Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

11

Ca nácagaquië' Pablo, en bönni' tun cuíngaqië' gubáz queë' Cristo

¹ Ré'ënda' guá' ilenli' neda' tsanni ni gu'a didza' lu yöl-la' bití' bi nözi quia'. Buli'sá' ládxi'li' quia'. ² Ruí'i ládxa'a libí'ili' ca na' Dios caz ruí'i ládxe'ë libí'ili', tu' nácali' ca nácabi' tubi' bi'i nigula ra'bando', naca idú ládxi'bi', rusudxina'bi' lahuë' Cristo para utsaga ná'alenbi' Lë cazë'. ³ Rádxida' idxín queëli' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queënu Eva, nigula queë' Adán, cate' guxzí' ye'e Satanás tu' xihui' lënu lu yöl-la' sina' que. ⁴ Caní rnní'a' tu' idú ládxi'li' ruí'ili' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá' gaca ca nácagaca Bö' Lá'ayi na', en didza' dxi'a na' guxzí' lu ná'ali' lu na'tu' netu'. ⁵ Réquida' bití' nácara' cuídí'sö ca nácagaquië' bönni' ni' nácatërögaquië' lo, ate' réquili' nácagaquië' gubáz queë' Cristo. ⁶ Nadxi' ca' naca' cuídí'sö ca ruá'a didza', pero bití' naca' cuídí'sö ca naca yöl-la' réajni'i napa'. Zián luzuí, en zián ca buluí'itu' libí'ili' ca naca yöl-la' réajni'i nápatu'.

⁷ Nadxi' ca' bití' naca dxi'a tu le bena', bití' bi buquixja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili'

zxön. ⁸ Buguna' dxin le nequi quéguequi ia'zica'rö cö' bönachi queë' Cristo, tu' guzxi'a dumí bulu'nödzejë' légaquië' quia' para guca bena' dxin ga zóali' libí'ili'. ⁹ Cate' guzóalena' libí'ili', en biyadzaj quia', bití' busaca' zi'a nitulí' libí'ili', pero lë na' biyadzaj quia', gulunnë' quia' böchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'. ¹⁰ Ní'a que le naca idútë li queë' Cristo le zóalen neda', bití' soa' dxisö, gun ba zxön cuina' ca naca lë ni idú luyú Acaya. ¹¹ ¿Naru' réquitseli' rnnía' caní tu' cabí nadxí'ida' libí'ili'? Nözinë' Dios nadxí'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba zxön cúngaquië' bönni' ni' ta'nнасë' nácaquië' gubáz queë' Cristo, en ta'nnë' tunë' xichinë' Lë' ca runtu' netu'. ¹³ Bití' ca' nácaquië' gubáz nasöl-lë'ë Cristo. Ta'zí yë'ë ca naca dxin tunë', en tun cúngacasë' gubáz queë' Cristo. ¹⁴ Bití' ral-la' ubániru' ca tunë' bönni' na'. Lësca' Satanás caz, tu' xihui', rulu'í cuini ca tu gubáz lá'ayi queë' Dios, ridë' lu bení'. ¹⁵ Que lë ni na' bití' ral-la' ubániru' channö yugu' huen dxin que tu' xihui' na' tu'lu'í' cúngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gudí'i guzxaquë'ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güí' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'. ¹⁷ Didza' ni ruá'a bití' naca le rinná bë'ë Xanru', pero ruá'a didza' ca tu bönni' nachixi icjë', run ba zxön cuina'. ¹⁸ Nacu'ë zían bönni' tun ba zxön cúngaquië' ca náca gaca le tunë' lu yöl-la' bönáchisö quégaquië'. Que lë ni na', neda' ca' gun ba zxön cuina'. ¹⁹ Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi ícjagaquië'. ²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. ²¹ Rutuí'ida' rnnía' lë ni: Bití' bentu' caní queéli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

²² ¿Naru' nácaquië' bönni' hebreo?

Lësca' naca' neda'.

¿Naru' nácaquië' bönni' Israel?

Lësca' naca' neda'.

¿Naru' nácaquië' xzí'ini xi'sóë' Abraham?

Lësca' naca' neda'.

²³ ¿Naru' nácaquië' huen dxin queë' Cristo?

Lësca' nácatëra' neda'.

(Na'a ruá'a didza' ca tu bönni' nachixi icjë' cate' rnnía' caní.)

Béntëra' dxin ca gulunë' légaquië'.

Guyu'a lidxi guíë zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quégaquië'.

Guzóa bönadxi gátia' zíanrö luzuí ca guzóa quégaquië'.

²⁴ Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

²⁵ Tsonna luzuí gula'guínë' neda' gubá'ayi.

Tu luzuí bulu'ladxë' neda' guiöj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶ Zían luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zi'tu',
 en gapa guzóa bönadxi quia' lu yödzo,
 en gapa guzóa bönadxi quia' lu lataj cá'asö,
 en gapa guzóa bönadxi quia' lu nísado',
 en gapa guzóa bönadxi quia' lu ná'agaquië' bönni' ta'zí yë'ë, ta'nnë' nácagaquië'
 böchi'ru' ta'yéajlë'ë Cristo.

²⁷ Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsë'e cuina', o lari' gácuá'.

²⁸ Ia'stú, yúgu'të dza ruúbi ruguí'ida' tu' ruí'ida' ládxa'a yúgu'të cö' bönachi queë' Cristo. ²⁹ Cate' nu ricuidi', neda' ca' ricuí'da'. Cate' nu run ga ichixi iníguinë' tu böchi'ru', rileda' nu run caní. ³⁰ Channö run bayudxi gun ba zxön cuina', gun ba zxön cuina' ca naca le nácagaca bë' ricuí'da'. ³¹ ¡Dios, Xuzë' Xanru' Jesucristo, gácatíca'sö queë' yöl-la' ba! ¡Lë' nözinë' ruá'a didza' idütë li! ³² Cate' ni' guzóa' lu yödzo Damasco, bönni' ni' guta' lu në'ë uláz queë' bönni' rinná bë'ë, lë' Aretas, bucu'ë yugu' bönni' gula'bö' nísie' para ila'zönë' neda', ³³ pero yugu' böchi'ru' ni' bulu'dödë' neda' tu ga ra'a bení que yu'u, yu'a tu ga'böra zxön, en bulu'zötjë' neda' ní'ilö lu zö'ö run chi'i yödzo na'. Caní guca, bulá' lu ná'agaquië' bönni' ni' gula'bö' nísie' neda'.

12

Yugu' le bulu'inë' Dios Pablo

¹ Le nácatë biti' ral-la' gun ba zxön cuina'. Sal-la' caní naca, na'a gu'a didza' ca nácagaca le bulu'inë' Xanru' neda', en le buzéajni'inë' neda'. ² Núnbë'a-në' tu bönni' réajlë'ë Cristo, chiguca chidá' iz zoa nu guchë' lë' yehua' yubá. Biti' nözda' channö guyijë' ni' lu idütë le naca cazë', o lu bö' naca cazë'. Tuzë' Dios nözinë'. ³ Nözda' guyázië' lataj lachi queë' Dios, nazí'i le paraíso. Biti' nözda' channö guyijë' ni' lu idütë le naca cazë', o cabí. Tuzë' Dios nözinë'. ⁴ Tsanni ni' zoë' ga na', biyönnë' le tun ga nu rubani, yugu' le biti' dë' lataj nu gü'i didza' que. ⁵ Bönni' ni huáca guna' lë' zxön, pero biti' gun ba zxön cuina'. Tuz gun ba zxön cuina' tu' ricuí'da'. ⁶ La'tu' guë'ënida' gun ba zxön cuina', biti' gaca' bönni' biti' bi nözinë', channö innía' le naca idütë li. Na'a, biti' gun ba zxön cuina' tu' cabí ré'ënda' nu gunrö neda' bal tsca le bilé'e bena' neda', o tsca naca didza' biyöni bë'a neda'.

⁷ Ní'irö, para cabí tödi bë' gun ba zxön cuina' tu' bilé'eda' lë' na' tun ga nu rubani, Dios buzöë' tu huë' lu xipëla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'. ⁸ Tsonna luzuí gúta'yua' lahuë' Xanru', en gunábida' Lë' ugüë' xihuë'a na'. ⁹ Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuí'da' nu'." Que lë' ni na', rudzëjade'eda' tu' ricuí'da'. Tu' raca caní quia', rácalentëro yöl-la' huáca queë' Cristo neda'. ¹⁰ Que lë' ni na', tu' nadxí'ida'-në' Cristo, rudzëjada' cate' ricuí'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuí'da', nápatëro caza' yöl-la' huáca queë' Lë'.

Pablo ruí'i ládxe'ë bönachi queë' Cristo nacúa' Corinto

¹¹ Naca' tu bönni' biti' bi nözinë' tu' bë'a didza' ca naca le dxi'a bena' neda'. Libí'i cázali' benlí' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácagaquië' bönni' ni' nácada'gaquië' lo, ta'nnë' nácagaquië' gubáz queë' Cristo. ¹² Yugu' le bena' lu

yöl-la' riböza zxon ladxi' quia' ga ni' zóali' nácagaca bë' naca' gubáz queë' Cristo. Bilé'eli' yugu' le bena', le nácagaca bë', en le tun ga nu rubani, en yugu' yöl-la' huáca zxon que yehua' yubá. ¹³ Tuz le cabí bena' ga zóali' le bena' ga nacuá' ia'zica'rö cö' bönachi queë' Cristo. Biti' busaca' zi'a libí'ili' bi gúnnali' le gu'aj gahua'. Buli'niti lo neda' tu' cabí bena' caní queéli'.

¹⁴ Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queéli'. Yugu' bi'i huë'ënido', bití' run bayudxi ulu' gágubi' xuz xiná' agacabi'. Xuz xiná' agacabi' na' ral-la' ulu' gahuë' zxi'inigaquië'. ¹⁵ Idú ládxa'a utöa' yúgu'të le dë quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queéli' neda'.

¹⁶ Nöz quézili' bití' busaca' zi'a libí'ili'. Na'a, bál-lali' innali' guca' sina', ate' len didza' bití' nácatë buzi'a xibali'. ¹⁷ ¿Naru' réquitseli' guzxi' yé'eda' libí'ili' cate' gusól-la'a yugu' gubáz quia' ga zóali'? ¹⁸ Gúta'yua' lobi' bi'i Tito tséajbi' ga zóali', ate' gusól-la'a-në' böchi'ru' na' tsözxön len lëbi'. ¿Naru' réquitseli' buzi'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácagaca para gácarö idú yöl-la' réajlë' queéli' Cristo. ²⁰ Rádxida' bití' gácali' ca ré'ënda' gácali' cate' guída' ga zóali', ate' neda' bití' gaca' ca ré'ënili' libí'ili' gaca'. Rádxida' ridil-la dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxon cuinli', en rutsátsali'. ²¹ Cate' guída' ga zóali', channö caní raca queéli', rádxida' gunë' Dios ga utuí'ida' ca naca queéli', ate' gun bayudxi cödxá' ni'a quégaca zían nupa ni' gulún dul-la', en bití' bulu'bí'i ládxi'gaca ca nácagaca le cabí naca tsahui' gulúngaca, en yugu' le gula'zé ládxi'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

¹ Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzë'e didza'." ² Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö bití' gaca' nöxaj ladxi' para til-la' légaquië'. ³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Bití' ca' ricuídi'në' Cristo cate' bi runë' queéli', pero lu yöl-la' huáca zxon queë' runë' bi runë' queéli'. ⁴ Le nácatë gudë'ë lë'e yaga cruz ca nu ricuidi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxön len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'? ⁶ Runtu' löza chinöz quézili' le nácatë netu' réajlë'ëtu' Cristo. ⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. ⁸ Bití' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. ⁹ Que lë ni na' rudzéjatu' cate' ricuídi'tu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. ¹⁰ Que lë ni na' ruzúaja' queéli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' bití' gun bayudxi usaca' zi'a libí'ili', pero

uguna' dxin yöl-la' unná bē' nudödē' Xanru' lu na'a, le naca para utipa' lādxi'li', en calēga para usunítia' libí'ili'.

¹¹ Na'a, böchi' luzá'ado', dipa lādxi'li'.

Guli'güi' lādxi'li' gaca idú ca réajlě'ēli' Cristo.

Guli'güi' lādxi'li' ca' lē ni rea' libí'ili'.

Guli'gaca tuz len luzá'ali', en guli'cōza dxí'ado'.

Rinábida'-nē' Dios sóalenē' libí'ili'.

Lē' nadxí'inē' rē'u, en runē' ga ribōzaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'. ¹³ Yúgu'tē böchi' luzá'aru' ni tu'gapē' Dios libí'ili'.

¹⁴ Rinábida'-nē' Dios gunē' ga gata' queēli' yúgu'tēli' le ruzá' lādxi'ē' Xanru' Jesucristo queēru', en idxí'inē' ca' libí'ili', en gunē' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LĚ'Ě PABLO LUYÚ GALACIA

Ruzúajĕ' Pablo quégaca bönachi luyú Galacia

¹ Neda', Pablo, naca' gubáz queĕ' Cristo. Biti' gula'söl-la' bönachi neda'. Jesucristo caz gusöl-lĕ'ĕ neda', en nunĕ' Xúziru' Dios tu zxön Lĕ'. Lĕ' busubanĕ' Jesús lu yöl-la' guti. ² Ruzúaja' queĕli' lu guichi ni, libí'ili', yugu' cö' bönachi tu'dubi queĕ' Cristo luyú Galacia. Núngaquiĕ' yugu' böchi'ru' ni tu zxön neda'. ³ Rinábida' Xúziru' Dios, enca' Xanru' Jesucristo uzá' lădxĕ'ĕ queĕli', en gunĕ' ga soa dxi icja lădxi'do'oli'. ⁴ Jesucristo caz budödi cuinĕ' lu yöl-la' guti tu' nözi dul-la' nabága'ru' para busölĕ' rĕ'u lu le naxihui' raca dza ni zóaru' na'a. Benĕ' caní tu' naca ca rĕ'ĕni quĕzinĕ' Xúziru' Dios. ⁵ ¡Gácatica'sö queĕ' Dios yöl-la' ba! ¡Ca' caz!

Tuz naca le rinnĕ dxi'a queĕ' Jesucristo

⁶ Rubánide'eda' ca runli', rucá' anatĕli' Dios. Lĕ' bulidzĕ' libí'ili' para guéquili' queĕ' tu' nözi le ruzá' lădxĕ'ĕ Jesucristo queĕru', ate' na'a rĕ'ĕnili' sí' ladxi' ná'ali' tu le rinnĕ dxi'a izá'a. ⁷ Le nácatĕ bití' ca' zoa ia'tú le rinnĕ dxi'a pero ruá'a caní didza' tu' nacu'ĕ bönni' tu'tsĕ'ĕ libí'ili', en tĕ'ĕnĕ' ulu'tsĕ'ĕ le rinnĕ dxi'a queĕ' Cristo. ⁸ Channö zoa nu gun ba nalí que tu le rinnĕ dxi'a le cabí naca tuz ca naca lĕ na' bentu' ba nalí que loli' libí'ili', rinábida'-nĕ' Dios udxĕiĕ' dö' nu na' run caní. Ral-la' udxĕiĕ' neda' dö' channö guna' caní, en channö gunĕ' caní tu gubáz queĕ' Dios zĕ'ĕ yehua' yubá, Dios caz udxĕiĕ' ca' lĕ' dö'. ⁹ Chigunná caza' caní zí'alö, ate' na'a rnnía' caní leyúbölö: Channö zoa nu gun ba nalí que tu le rinnĕ dxi'a le cabí naca tuz ca naca lĕ na' chiguzxí' ladxi' ná'ali', rinábida'-nĕ' Dios udxĕiĕ' dö' nu na'.

¹⁰ ¿Réquitseli' rĕ'ĕnda' cú'uli' neda' yöl-la' zxön cate' ru'a caní didza'? ¡Biti' ca'! Rĕ'ĕnda' urúaja' tsahui' lahuĕ' Dios. ¿Réquili' rĕ'ĕnda' uzaca' balădxi'lengaca bönachi neda'? La'tu' rĕ'ĕnda' uzaca' balădxi'lengaca bönachi neda', bití' gaca' huen dxin queĕ' Cristo.

Naca böáquiĕ' Pablo bönni' gubáz queĕ' Cristo

¹¹ Ral-la' inözili' lĕ ni, böchi' zána'do'. Le rinnĕ dxi'a na' runa' ba nalí que bití' gulĕn icja lo lădxi'da'ahuiguequi bönachi. ¹² Cuntu nu bönni' budödĕ' lu na'a le rinnĕ dxi'a na', en calĕga nu bönni' busédinĕ' neda' le. Jesucristo caz buzéajni'inĕ' neda' ca naca le rinnĕ dxi'a queĕ'. ¹³ Chibiyón quĕzili' ca na' ben caza' neda' zí'atĕlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bönachi queĕ' Dios ta'yija ladxi' Cristo, en gú'unda' usulu usunítia' léguequi. ¹⁴ Lu le tequi le bach Dios bönni' judío, guyĕpisĕtĕra' neda' ca lá'tu'biqúi' yúgu'tĕ luzá'a bönni' judío yú'ugaquiĕ' iz ca yu'a neda', tu' guzxi'rö ladxi' na'a ca léguequi le bulu'dödĕ' xuz xtó'oru' loru' ca tun cazĕ'. ¹⁵ Caní bena' neda', pero tu' náquiĕ' dxi'i ladxi' Dios, guró cazĕ' neda' zí'atĕlö ca gulja', ate' bulidzĕ' neda' para guna' xichinĕ'. ¹⁶ Ní'irö, cate' gú'uni quĕzinĕ' Dios, benĕ' ga núnbĕ'a-nĕ' zxi'inĕ', en gusöl-lĕ'ĕ neda' tsöjena' libán que le rinnĕ dxi'a ca naca queĕ' Lĕ' lógaca bönachi izá'a. Cate' benĕ' caní, bití' yödilja' nu naca bönachi nu usedi neda'. ¹⁷ Cabí guyija' yödzö Jerusalén para tsöyúa' nupa ni' nátagaca bönni' gubáz queĕ' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yöyúa'-nĕ' Pedro, ate' bugá'analena' lĕ' idú ca chidá' gubidza. ¹⁹ Tsanni ni' zoa' ni' bití' ca' bilĕ'eda' ia'turĕ' bönni' gubáz queĕ' Cristo, pero tuzĕ' Jacobo, bönni'

böchë'ë Xanru' bilé'eda'. ²⁰ Didza' ni ruzúaja' queéli' lu guichi nácatë. Ni'a queë' Dios biti' ca' rizi' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia. ²² Yugu' dza ni' biti' núnbë'gaquië' neda' böchi'ru' tu'dubë' queë' Cristo gapa naca luyú Judea. ²³ Gula'nözisinë' lë na' gúla'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'." ²⁴ Caní guca, gula'gu'ë yöl-la' ba Dios tu' nözda' neda'.

2

Bönni' gubáz queë' Cristo guzxi' lu ná'agaquië' Pablo

¹ Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. ² Guyija' ni', en bë'lëna' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a. ³ Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. ⁴ Le nácatë gula'cuá' bal-la bönachi ni', nupa ni' ta'zi' yë', ta'ná nácagaca böchi'ru', ate' gulë'ëni ilún ga irugu lu xpéla'bi' Tito lë na' naca bë'. Yugu' bönni' ni núngaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'. ⁵ Biti' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'i ládxa'a ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. ⁷ Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío. ⁸ Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

⁹ Jacobo, en Pedro, en Juan, bönni' ni' réquiru' yu'u lu na'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxi' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. ¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'tica'sö ládxa'a runa'.

Ca guca cate' Pablo gudíl-lalenë' Pedro lu yödzö Antiquía

¹¹ Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchíxinë' ca benë'. ¹² Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bítirö gudágulenë' tsözxön bönachi izá'a na' tu' gúdxinë' bi ilunë' bönni' na' nazí lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. ¹³ Ní'irö ia'zica'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'. ¹⁴ Cate' bilé'eda' biti' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Lí' nacu' bönni' judío, pero runu' li' ca túngaca bönachi izá'a, en calëga ca tunë'

bönni' judío. ¿Bizx queë ré'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Ré'u ni nácaru' bönni' judío tu' nácagaquië' xuz xiná' aru' judío, en calëga bönachi izá'a, nupa cabí núnbë' gaca Dios. ¹⁶ Nöz quéziru' cuntu nu huóaca tsahui' lahuë' Dios tu' run nu na' tsca rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' ré'u reja ládxi' ru' Jesucristo para huóácaru' tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huóaca tsahui' lahuë' Dios tu' run tsca rinná bë' xibá queë' Moisés.

¹⁷ 'Na'a, réquiru' nuhuóácaru' tsahui' tu' reja ládxi' ru' Cristo, pero channö naca bë' nácaru' bönni' dul-la' ca nácagaca bönachi izá'a, ¿innátsaru' runë' Cristo ga runru' dul-la'? ¿Biti' caz! ¹⁸ Channö ruí' ládxa'a uchisa' le chibuquinja', lë ni naca bë' riguitsja' xibá le gunná bë'ë Dios. ¹⁹ Tu' cabí guca uzóa' didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca ré'ënë' Dios. ²⁰ Naca quia' ca chigútilena' tsözxön Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi' da' ahua'. Tsca naca zoa' nabana' na'a, naca tu' reja ládxa'a Lë' xzí'inë' Dios, Bönni' na' bidxí'inë' neda', en budödi cuinë' lu yöl-la' guti uláz quia' neda'. ²¹ Biti' ré'ënda' uzóa' tsólá'alö le ruzá' ládxe'ë queëru' Dios. Channö huáca huóáquië' tsahui' tu bönni' lahuë' Dios tu' runë' tsca rinná bë' xibá queë' Moisés, ní'irö nítisö gútië' Cristo."

3

Le rinná bë' xibá queë' Moisés, en le reja ládxi' ru' Cristo

¹ Libí'ili', tu' canöz, libí'ili', bönni' Galacia. ¿Nuzxi gulú' utsö libí'ili' nëbi para cabirö uzóali' didza' le nácatë? Gate ga ré' buluí'itu' libí'ili' le sa'yéaj ca gútië' Jesucristo lë'e yaga cruz. ² Gudíxjöi' i neda' lë ni. ¿Bidisóalenë' libí'ili' Dios Bö' lá'ayi tu' benli' ca rinná bë' xibá queë' Moisés o tu' guyija ládxi' li' le rinnë dxi'a biyönili'? ³ ¿Nacxi guca nácali' tu' canöz caní? Gusí loli' nácali' bönachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxí' gunli' ga guéquili' queë' Dios rácasö queëli'? ⁴ ¿Guca nítisö guca queëli' yúgu'të lë na' guxzaca' gudí'ili'? ¿Biti' ca' guca caní! ⁵ Cate' Dios risöl-lë'ë queëli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bë' xibá queë' Moisés o tu' reja ládxi' li' le rinnë dxi'a na' biyönili'?"

⁶ Lu guichi lá'ayi rnna: Abraham guyija ládxe'ë Dios, ate' Dios gunné' náquië' bönni' tsahui' tu' guyija ládxe'ë Lë'. ⁷ Que lë ni na' ral-la' inözili', nupa na' ta'yija ladxi' Dios nácagaca idú xzí'ini xi'sóë' Abraham. ⁸ Lu guichi lá'ayi ruí' didza' zí'atëlö ca gunë' Dios, innë' nácagaquië' tsahui' bönni' izá'a ila'yija ládxe'ë Lë'. Que lë ni na' Dios gudíxjöi'inë' Abraham zí'atëlö ca naca le rinnë dxi'a, gunné': "Lu në'ë Zxí'ini xi'sú' guna' ga gaca dxi'a quégaca bönachi idutë yödzölió." ⁹ Caní naca, Abraham guyija ládxe'ë Dios, ate' Dios benë' ga guca dxi'a queë'. Lës caní ca' na'a, Dios runë' ga raca dxi'a quégaca yúgu'të nupa ta'yija ladxi' Lë'.

¹⁰ Nupa na' tu'zxöni ladxi' ulu' huóaca tsahui' tu' túngaca ca rinná bë' xibá queë' Moisés, nabága' gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága' gaca xíguia'."

¹¹ Na'a, naca bë' cuntu nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuóaca tsahui' lahuë' Dios soa ibán tu' reja ladxi' Lë'." ¹² Ca na' nuhuóaca tsahui' lahuë' Dios nu na' reja ladxi' Cristo nadzá' ca naca que nu na' ruzxöni ladxi' nuhuóaca tsahui'

tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní."

¹³ Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga." ¹⁴ Caní guca queē' Cristo para gaca gunē' Dios ca na' guzxí' lu nē'ē queē' Abraham, gunē' ga gaca dxi'a quégaca bönachi izá'a lu nē'ē Jesucristo, en para gaca gunē' ga idisóalenē' Dios Bö' lá'ayi rē'u channö uyija ládxi'ru' Lē', ca na' guzxí' lu nē'ē Dios gunē'.

Le rinná bē' xibá queē' Moisés, en le guzxí' lu nē'ē Dios gunē' queēru'

¹⁵ Na'a, böchi' zána'do', uzúaja' queēli' tu le rucudzu' didza', tu le raca queēru'. Cate' chopá bönni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'. ¹⁶ Dios guzxí' lu nē'ē bi gunē' queē' Abraham, en que zxi'ini xi'sóē'. Ga zoa lu guichi lē ni, bití' rnna: "Quégaca zxi'ini xi'sú'", le ruí'i didza' que zían bönachi, pero rnna: "Que zxi'ini xi'sú'." Lē ni ruí'i didza' que tuz bönni', Lē' Cristo. ¹⁷ Lē ni na' le rē'ēnda' inná': Dios benē' tuz didza' len Abraham, en guzxí' lu nē'ē gunē' ca na' gunnē'. Le nazúaj lu xibá queē' Dios, le benē' Dios tapa gayuá' yu' chi-uruá' iz gudödi ni' cate' gudxē' caní Abraham, bití' gaca ugúa lē na' guzxí' lu nē'ē Dios gunē', en cabí gaca usulu le. ¹⁸ Na'a, channö ral-la' gunru' ca rinná bē' xibá na' para sí'iru' le guzxí' lu nē'ē Dios gunsē', bití'rö naca tu le guzxí' lu ná'asē' gunē'. Dios runsē' caní tu' caní guzxí' lu nē'ē bi gunē' queē' Abraham.

¹⁹ Channö caní naca, ¿bizx queē' gunná bē'ē Dios xibá na' nazúajgaca lu didza' queē'? Dios gunná bē'ē caní para gaca bē' xíguia' nabága'ru', pero gúcasö caní ga bidxintē dza na' bilá' lahuē' zxi'ini xi'sóē' Abraham na', Bönni' na' guzxí' lu nē'ē Dios gunē' queē' lē na'. Yugu' le gunná bē'ē Dios lu xibá queē', gusöl-lē'ē yödžolió ni lu ná'agaquiē' gubáz lá'ayi queē', ate' Moisés budödē' didza' ca ná'agaca xibá na'. ²⁰ Bití' naquín nu udödi didza' cate' naca tuz nu run tuz didza', ate' Dios, tuz ná'quiē'.

Bizx queē' gunná bē'ē Dios le zóagaca lu xibá queē'

²¹ Le nazúajgaca lu xibá queē' Dios, ¿ta'dá'gaca lē na' guzxí' lu nē'ē Dios gunē'? ¿Bití' ca! La'tu' gunná bē'ē Dios tu xibá le gaca gun ga sóaru' ibanru' tsaz, ní'rö huáca huóácaru' tsahui' lahuē' Dios channö gunru' ca na' rinná bē' xibá na'. ²² Tsca naca lē na' nazúaj lu guichi lá'ayi, yúgu'tēru' nabága'ru' dul-la'. Caní naca para gaca sí'iru' lē na' guzxí' lu nē'ē Dios gata' queēru' cate' tseja ládxi'ru' Jesucristo.

²³ Zí'atēlö ga bidxín dza gaca tseja ládxi'ru' Cristo, le rnna xibá na' gunná be'e rē'u, ca na' zoa le rinná be'e tu bönni' yu'ē lidxi guíē. Caní guca ga bidxintē dza bilá' lahui gaca huóácaru' tsahui' channö uyija ládxi'ru' Lē'. ²⁴ Caní naca, le nazúaj lu xibá queē' Dios gunná be'e rē'u, lē na' busedi rē'u ca tu bönni' usedi ga bidxintē dza bilá' lahuē' Jesucristo, para gaca huóácaru' tsahui' lahuē' Dios channö uyija ládxi'ru' Lē'. ²⁵ Na'a, tu' bidxín dza gaca huóácaru' tsahui' channö uyija ládxi'ru' Cristo, bití'rö inná be'e rē'u lē na' busedi rē'u.

²⁶ Yúgu'tēli' nácali' bi'i queē' cazē' Dios tu reja ládxi'li'-nē' Jesucristo, en chinácali' tuz len Lē'. ²⁷ Yúgu'tē nupa nadílagaca nisa para huóácagaca tuz len Jesucristo, nuhuóácagaca ca ná'quiē' Lē' cazē'. ²⁸ Bití'rö narúaj choplö bönni' judío, en bönni' izá'a, en cabí narúaj choplö bönni' ná'quiē' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tēli' böácali' ca' tuz len luzá'ali' tuli' ia'tuli'. ²⁹ Na'a, channö

néquili' queë' Cristo, nácali' ca' xzí'ini xi'sóë' Abraham, ate' nazí'ili' lë na' guzxi' lu në'ë Dios gunnë' queë' Abraham.

4

¹ Lë ni le rë'ënda' innía': Tsanni ni ribözabi' tu bi'i' bönni'do' sí'ibi' bi ral-la' gunnë' xúzibi' queëbi', ni' nácabi' bí'ido', en biti' nayépisëtërobí' ca raza que tu nu naca tsaz huen dxin, sal-la' le nácate nequi queëbi' yúgu'të. ² Tsanni ni' nácabi' bí'ido', nacuá' nupa tun chi'i' lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. ³ Lës caní' raza ca' queëru'. Tsanni ni' gúcaru' ca bí'ido', gunná' be'e xibá' na' rë'u ca raza quégaca bönnachi yödzo'li' ni. ⁴ Cate' bizá'a dza, Dios gusöl-lë'ë xzí'ini cazë' ni. Gúquië' xzí'ininu tu nigula ca nácaru' rë'u, en gunná' be'e le zoa lu xibá' quégaca bönni' judío Lë'. ⁵ Caní' guca queë' para guca busölë' nupa na' rinná' be'e le zoa lu xibá' léguequi, para gaca huóácaru' bi'i' queë' Dios.

⁶ Para gaca bë' chinácali' bi'i' queë' cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queëli', rnnë': "Xuza'." ⁷ Caní' naca, chinácali' bi'i' queë' Dios, en bíti'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i' queë' cazë' Dios, Lë cazë' nazí' ladxí' në'ë guequi queëli' le nequi queë' tu' nácali' tuz len Cristo.

Pablo ru'i ládxe'ë bönni' Galacia ta'yija ládxe'ë Cristo

⁸ Cate' ni' biti' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Biti' ca' nácagaca budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë' ré'ënili' ubí'ili' yugu' lu xibá' cané' na' cabí' nu uzí' xibé'? ¿Ré'ënili' huóácali' huen dxin tsaz, en gunli' ca rinná' bë' xibá' na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi' gaca queëli'. ¿Naru' nuhuóáca nítisö dxin bena' para gúnbë'ëli' le nácate? ¹² Ráta'yua' loli', böchi' zána'do', gácali' ca naca' neda', nulá' na'a lu na' xibá' benë' Moisés. Caní' ral-la' gácali' tu' böáca' neda' ca gúcali' libí'ili'. Biti' bi le cabí' naca dxi'a benli' quia' neda'.

¹³ Chinöz quézili' bizx queë' na' gusí' lahua' runa' libán' loli' que le rinnë' dxi'a. Bena' libán' ni' tu' gü'ida'. ¹⁴ Biti' bucá'anali' neda' cané', en cabí' buzóali' neda' tsölá'alö sal-la' bigútili' ca guca yödzo'huë' quia' na'. Benli' neda' bal, tuz ca gunli' bal tu gubáz' lá'ayi queë' Dios, o ca runli' bal Jesucristo caz. ¹⁵ Budzéalë'ëli' dza ni'. ¿Bizxi guca queëli' tu' cabirö raza caní'? Lë ni gaca innía' ca guca queëli': La'tu' huáca gunli', bubéajli' guiöj lo quézili', le gúnnali' quia'. ¹⁶ Na'a, ¿réquili' nuhuóáca' tu nu riléde'e libí'ili' tu' gudxa' libí'ili' le nácate?

¹⁷ Bönni' ni' tu'tsë'ë libí'ili' tu'i ládxe'ë libí'ili', pero calëga para gaca dxi'a queëli'. Të'ënë' ilunë' ga ucá'anali' netu' para gü'i ládxi'li' légaquië'. ¹⁸ Na'a, naca dxi'a zoa nu ruí' ladxí' libí'ili', pero tuz channö naca para gaca dxi'a queëli'. Caní' ruí'tica'sö ládxa'a libí'ili', en calëgasö cate' ni' zóalena' libí'ili'. ¹⁹ Libí'ili', xzí'ina'do'. Ca na' raza queënu nigula chizó'a sóabi' bí'ido' queënu, riguí' rizáca'nu, lës caní' riguí' rizáca'a neda' ni'a queëli' leyúbölö ga idxinrö dza gácali' idú' ca náquië' Cristo. ²⁰ Nácaru' la' zóalena' libí'ili' na'a para gaca gü'ílëna' libí'ili' didza' nadzá'alö, tu' ruúbi' ruguí'ilé'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' ré'ënili' uzó'a cuinli' lu xibá' queë' Moisés, guli'ná'tsöca' didza' ni gu'a. ¿Catu caz buzë' nágali' le rnna xibá' na'? ²² Rnna xibá' na' caní': gula'cuá'abi' chópabi' bi'i' bönni'do' queë' Abraham. Tubi' gúcabi' xzí'ininu tu nigula tsaz nácacu huen dxin, ate' ia'tubi' gúcabi' xzí'ininu nigula nazannu.

²³ Zxí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bí'ido', pero zxí'ininu nigula nazannu na' gúlajbi' tu' guzxi' lu në'ë Dios gunë' ga gálajbi'. ²⁴ Lë ni naca ca tu le rucudzu' didza'. Ca guca quegacanu chópanu nigula ni sa'yéaj ca naca chopa didza' Dios bénlenë' bönachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácgaca ca zxí'ininu Agar, en nácgaca ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzo Jerusalén na' a dza, tu' naca yödzo na' ca tu bönni' tsaz náquië' huen dxin tsözxón len nupa nacuá' lu yödzo na'. ²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzo ni'. ²⁷ Nazúaj lu guichi lá'ayi le rnna:

Budzeja, nigula huödx, cabí nacuá' zxí'inu'.

Lu yöl-la' rudzeja quiu' gurödxí'a,

sal-la' catu caz guca quiu' le riguí'i rizáca'nu nigula

chizóa sóabi' bí'ido' queënu.

Budzeja tu' sal-la' nusán në'eguequi bönachi li',

gunë' Dios ga ila'yántëro zxí'inu'

ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabi' Isaac, zxí'inë' Abraham. Nácaru' ca yugu' zxí'ini xi'sóë' Abraham, guzxi' lu në'ë Dios gata' queë'. ²⁹ Dza ni', bi'i na' gúlajbi' ca tálajbi' yúgu'të bí'ido', gudxía ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bia no bönachi yödzo'lió ni rë'u. ³⁰ ¿Bizxi' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxón len zxí'ininu, tu' bití' gaca zxí'ininu nigula na' sí'ibi' tsözxón zxí'ininu nigula nazannu le guzxi' lu në'ë Dios guequi queëbi' zxí'ininu nigula nazannu na'." ³¹ Caní naca, böchi' zána'do'. Bití' nácaru' ca nácabí' zxí'ininu nigula na', tsaz gúcanu huen dxin, pero nácaru' ca zxí'ininu nigula nazannu na'.

5

Gulí'gún chí'i cuinli', ugá'anali' lu yöl-la' nazán

¹ Chinazanru' tu' busanë' Cristo rë'u. Gulí'sóa tsutsu channö, ugá'anali' lu yöl-la' nazán na'. Bití' uzóa cuinli' leyúbölö lu xibá queë' Moisés para cabí gácalí' ca tu bönni', tsaz náquië' huen dxin.

² Buli'zë nágali' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', bití' ca' uzí'ili' xibé le benë' Cristo.

³ Leyúbölö rë'ënda' guía' núti'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. ⁴ Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxe'ë Dios queëru'. ⁵ Rë'u ni ruzxöni ládxi'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. ⁶ Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

⁷ Dxi'ado' guca ca gusí loli' runli' dza ni'. ¿Nuzxi' ben ga bucá'anali' le nácatë?

⁸ Bití' benë' Dios, Bönni' rulidzë' libí'ili', ga benli' caní. ⁹ Bití' gal-la ládxi'li' lë na' rnna: "Látí'sö cúa zi que yöta xtila ruhuóázx idutë cúa ga nayú'u cúa zi na'." ¹⁰ Tu' nácaru' tuz len Xanru', runa' löza ca naca queëli', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsë'ë libí'ili', núti'tës nu naca bönni' na'.

¹¹ Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bē' xibá queē' Moisés. Channö runa' caní, ¿bizx queē ta'bía nahuē' bönni' judío neda'? La'tu' rusédida' caní, cuntu nu ilé neda' tu' runa' libán ca gútiē' Cristo lē'e yaga cruz. ¹² Ca naca que nupa ni' tu'tsá' libí'ili', té'eni irugu lu xpéla'li' lē na', nácōru la' ila'chugu tsaz cuínguequi.

¹³ Ca naca queēli', böchi' zána'do', Dios bulidzē' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizēsö ládxi'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. ¹⁴ Yúgu'tē le rinná bē' xibá queē' Dios rusudxín nu na' run ca rinná bē' xibá na' rnna: "Ral-la' idxí'inu' luzó'o ca nadxí'i cuinu'." ¹⁵ Channö rizi' quídza'li' luzá'ali' tuli' ia'tuli', runli' ca tunba' böa' guí'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yöl-la' bönáchisö queēru', en le runru' len yöl-la' huáca queē' Dios Bö' lá'ayi

¹⁶ Lē ni na' rea' libí'ili': Guli'güí' latja inná bé'enē' libí'ili' Dios Bö' lá'ayi, ate' ní'irö bítirö gunli' ca rizēsö ládxi'ili' lu yöl-la' bönáchisö queēli'. ¹⁷ Yugu' le rizé ládxi'ru gunru' lu yöl-la' bönáchisö queēru' bití' röjlöz le ré'ēnē' Dios Bö' lá'ayi gunru', ate' lē na' ré'ēnē' Dios Bö' lá'ayi bití' röjlöz le ré'ēniru' gunru' lu yöl-la' bönáchisö queēru'. Chopa ni, bití' röjlözgaca, en que lē ni na' bití' gaca gunli' ca ré'eni quézili'. ¹⁸ Channö ruí'ili' lataj inná bé'enē' Dios Bö' lá'ayi libí'ili', bítirö inná be'e xibá queē' Moisés libí'ili'.

¹⁹ Naca bē' le tun bönachi lu yöl-la' bönáchisö quéguequi.

Tun dul-la' le riguitsaj xibá que yöl-la' nutsaga na', enca' dul-la' le lē'ē.

Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yöl-la' gudzá'.

Tu'dí'i luzé'eguequi, en ta'díl-lalen léguequi.

Tu'zxé'e luzé'eguequi, en ta'lé nupa na', en tu'huídi'.

Ta'rúaj choplö, en tu'béaj tsölá'alö nupa dá'gaca léguequi.

²¹ Ta'zé ladxi' le dē que luzé'eguequi, en ta'guilaj xíguia'.

Ta'zudxi, en tagu lē'e.

Tu'dödi bē' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnnía': Nupa túngaca caní bití' ca' ila'deli' ila'yú'u ga na' rinná bē'ē Dios.

²² Channö zóalen Dios Bö' lá'ayi rē'u runru' caní:

Nadxí'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribózaru' zxön ladxi'.

Ruí'i ládxi'ru' luzá'aru'.

Nácaru' dxi'i ladxi'.

Rusudxinru' xtídza'ru'.

²³ Nácaru' nöxaj ladxi'.

Rinná be'e cuinru'.

Bití' ca' gunná bē'ē Moisés rē'u para cabí gunru' yugu' le caní. ²⁴ Nupa néquiguequi queē' Cristo bítirö tun ca té'eni quez, en cabí tun le ta'zēsö ladxi' lu yöl-la' bönáchisö quéguequi. ²⁵ Dios Bö' lá'ayi runnē' yöl-la' na'bán queēru'. Lē cazē' ral-la' inná bé'enē' rē'u ca naca yúgu'tē le runru'.

²⁶ Bití' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹ Na'a, böchi' zána'do', channö ilé'eli' runé' dul-la' tu bönni' böchi'li', nuli' zóalené' Dios Bö' lá'ayi libí'ili', ral-la' gunli' ga ubí'i ládxe'ë bönni' na', pero run bayudxi gunli' caní lu yöl-la' nöxaj ladxi' queéli', en uyú cuinli' tsate' cu'u tu' xihui' libí'ili' nöza dul-la'. ² Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'ené' Cristo rë'u.

³ Channö zoa nu réqui chinadeli' yöl-la' nayépisë, en biti' bi nadeli' nu na', nu ni na' rizi' ye'e la' cuinsi. ⁴ Tuhuéaj tuhuéajë' bönni' ral-la' uchi'a usöröë' que le runé'. Ní'irö channö urúajë' dxi'a, huáca gun ba zxön cuiné' ni'a que le chinuné', en biti' gun bayudxi uyúé' ca núngaca ia'zica'rö bönachi channö ba benrë' dxi'a o cabí. ⁵ Tuhuéaj tuhuéajë' bönni' ral-la' gu'ë le nusubáguë'ë Dios lë'.

⁶ Channö zoa nu rusedi libí'ili' ca naca le rinné dxi'a, ral-la' unödzejali' nu na' rusedi libí'ili' lati' que yúgu'të le do' dë queéli'.

⁷ Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'. ⁸ Channö le rázali' naca yugu' le runli' ca rizësö ládxi'li' lu yöl-la' bönáchisö queéli', le ulápali' gaca yöl-la' guti. Channö le rázali' naca yugu' le runli' ca raza ládxe'ë Dios Bö' Lá'ayi, ulápali' le gunné' Dios Bö' lá'ayi queéli', le naca yöl-la' na'bán idú. ⁹ Caní naca, biti' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'. ¹⁰ Que lë ni na', bátati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

Le buzúajë' Pablo lu guichi ga ruúdx

¹¹ Buli'yú cate' bach didza' ni ruzúaja' lu guichi len na' cuina'. ¹² Nupa na' tē'eni ilún ga irugu lu xpéla'li' ca rinná bē' xibá queë' Moisés, túngaca caní para ulu'rúaj dxi'a lógaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz. ¹³ Yugu' bönni' na' ta'zì' lu ná'agaquië' le narugu lu xpéla'gaquië' ca rinná bē' xibá queë' Moisés, biti' tu'zöë' didza' idutë ca rnna xibá na'. Tē'ënë' ilunë' ga irugu lu xpéla'li' para gaca ilún ba zxön cuíngaquië' tu' ta'nná bé'ené' libí'ili' para irugu lu xpéla'li' caní. ¹⁴ Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzoilió ni naca quia' ca tu le chinati, biti' ru'í' ládxa'a le, ate' neda' naca' quégaca bönachi yödzoilió ni ca tu bönni' nati, biti' tu'í' ladxi' neda'. ¹⁵ Channö nácaru' tuz len Jesucristo, biti' bi run channö narugu lu xpéla'ru' ca rinná bē' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. ¹⁶ Yúgu'të bönni' na' tunë' ca rinná bē' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxe'ë légaquië'.

¹⁷ Na'a zë lo, cuntu nu bönni' ral-la' utsë'ë neda', tu' nácgaca bē' butsóa zóagaca lu xpéla'a naca' huen dxin queë' Xanru' Jesús.

¹⁸ Na'a, böchi' zána'do', rinábida'-në' Xanru' Jesucristo uzá' ládxe'ë queéli' yúgu'tëli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quezinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. ² Rinábida'-në' Xúziru' Dios, enca' Xanru' Jesucristo uzá' ládxe'ë queéli', en gunë' ga soa dxi icja ládxi'do'oli'.

Le naca queë' Dios Bö' Lá'ayi rata' queëru'

³ ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxe'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'. ⁴ Zí'atëlö ca benë' Dios yödzölió ni, gurö cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'. ⁵ Dios bucözë' zí'atëlö si' lu në'ë rë'u ca zxi'ini cazë' tsözxön len Jesucristo, tu' guyaza ládxe'ë gaca caní, en tu' naca le gú'uni quezinë' gunë'. ⁶ ¡Ral-la' cú'utica'siru'-në' Dios yöl-la' ba ni'a que le buzá' ládxe'ë queëru', yugu' le bénnasë' queëru' tu' nácaru' tuz len Zxi'inë', Nu na' nadxí'inë'! ⁷ ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntëro naca le buzá' ládxe'ë Dios queëru', ⁸ lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë' ⁹ benë' Dios le bucözë' queëru', ate' buluí'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! ¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzölió ni.

¹¹ Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quezinë' Dios, Nu run yúgu'të ca rë'ëni quezinë' Lë'. ¹² Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxöni ládxi'ru'-në' Cristo zí'atëlö ca ia'zica'rö bönachi. ¹³ Lësca' caní guca queéli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queéli' le naca bë' nácali' queë', tu' guchízië' icja ládxi'do'oli' Dios Bö' Lá'ayi, Nu na' guzxí' lu në'ë Dios isöl-lë'ë queëru'. ¹⁴ Tu' zóalenë' Dios Bö' Lá'ayi rë'u, naca löza guequi queëru' le nequi queë' Xúziru' Dios cate' údxi huöá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxön queë'.

Pablo rinábinë' Dios gunnë' queëru' yöl-la' réajni'i

¹⁵ Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza ¹⁶ bití' ca' rusana' rea'-në' Dios: "Xclenu", ca naca queéli'. Röjneda' libí'ili' cate' rulidza'-në' Dios. ¹⁷ Rinábida'-në' Dios queë' Xanru' Jesucristo, Dios na' náquië' Xúziru' nayëpisëtëre', rinábida'-në' isöl-lë'ë Dios Bö' Lá'ayi queéli', Bö' na' runna yöl-la' réajni'i queëru', en rulu'i rë'u ca naca cazë' Dios, para gaca idú ca núnbë'ëru'-në'. ¹⁸ Rinábida'-në' Dios uzéajni'inë' libí'ili' lu icja ládxi'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibé, en para inözili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, ¹⁹ enca' para inözili' cate' zxön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxön ni naca la' lëbisö na' bulu'e lahui Dios ²⁰ cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayëpisëtëre' ni' yehua' yubá. ²¹ Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli' gaca yöl-la' huáca, en nupa ni' nácagaca

xan. Cristo nayépisëtërë' ca yúgu'të nupa nadéli'gaca yöl-la' unná bē' yōdzōlió ni, en lu yōdzōlió si' za'. ²² Dios budödë' lu nē'ë Cristo yúgu'të le dë para inná bē'enē' le, en buzóë' Lë' quégaca bönachi queë' para gáquië' Xanru' lu yúgu'të le nequi queëru'. ²³ Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxí'inë' Dios rë'u

¹ Dios chibennë' yöl-la' na'bán idú queëli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. ² Dza ni' benli' lébisö ca tun bönachi biti' nácagaca tsahui' nacuá' yōdzōlió ni, en benli' ca gú'uni tu' xihui', nu rinná bē' lu bö'ös, en rugún dxin nupa biti' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zica'rö bönachi. ⁴⁻⁵ Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön len Cristo tu' buéchi' ládxi'ë rë'u, en bidxí'ide'enë' rë'u. Nuláli' tu' zoa le buzá' ládxi'ë Dios queëli'. ⁶ Dios busubanë' rë'u tsözxön len Cristo para gunë' ga cõ'öru' tsözxön len Lë' ga ni rinná bē'ë yehua' yubá. ⁷ Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxi'ë queëru', tu' budödë' Jesucristo ni'a queëru', le naca bē' ca nadxí'ide'enë' rë'u. ⁸ Nuláli' tu' zoa le buzá' ládxi'ë Dios queëli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios. ⁹ Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxi'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

¹¹ Guli'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bē' dá'gaquië' Dios, en nazi' lágaquië' bönni' narugu lu xipéla'gaquië', ta'nnë' nácali' libí'ili' bönni' biti' narugu lu xipéla'gaquië'. ¹² Dza ni' nubíga'li' ga zoë' Cristo. Gúcali' bönni' zi'tu' lógaca bönachi Israel, en biti' buzí'ili' xibé didza' benë' tsutsu Dios, en guzxi' lu nē'ë bi gata' quégaca bönachi queë'. Guzóali' yōdzōlió ni, biti' zoa le runli' löza, en biti' nünbë'ënili'-në' Dios. ¹³ ¡Na'a, nácali' tuz len Jesucristo! ¡Zí'atëlö nubíga'li' libí'ili' zi'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'! ¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zi'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. ¹⁵ Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bē' nazúajgaca lu xibá quégaca bönachi judío, ate' chopa cõ' bönachi na', bunë' tuz bönachi cubi, nupa nácagaca tuz len Lë cazë'. Caní benë', en gulequi dxíë' yöl-la' rilé na'. ¹⁶ Cate' gútië' Cristo lë'e yaga cruz, busúluë' yöl-la' rilé na', ate' chopa cõ' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

¹⁷ Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacuá' gála'sö. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, bítirö nácali' ca bönachi zi'tu' zóali' tu luyú biti' nequi queëli', pero nabábalenli'

bönachi queë' Dios. ¡Chinácali' ca bi'i queë cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guió'j zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guió'j lo que xilibi zö'ö na'. ²¹ Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacué' tu'lapa yugu' guió'j que, para gaca tu yudo' lá'ayi le naca tuz len Xanru'. ²² Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi guié' tu' runa' libán queë' Jesucristo para uzí'ili' xibé', libí'ili', bönachi izá'a. ² Réquida' chinó'z quézili' ca benë' Dios, budödë' lu na'a dxin runa' para uzí'ili' xibé' le ruzá' ládxë'ë queëru'. ³ Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queëli' lu guichi. ⁴ Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo. ⁵ Dza ni'te cuntú nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní rna lë na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibé' tsözxön len légaquië' le guzxí' lu në'ë Dios unödzejë' quégaquië' tu' dá'gaquië' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'. ⁸ Nacra' cá'asó ca yúgu'të bönachi queë' Dios, pero Lë buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'ëru'. ¹⁰ Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácgaca bönachi queë' Cristo. ¹¹ Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. ¹³ Que lë ni na' ráta'yua' loli' bití' gaca chopá ládxí'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibé'.

Ca naca yöl-la' nadxí'i queë' Cristo

¹⁴ ¡Que lë ni na', ruzechu zxiba' lahuë' Xuzë' Xanru' Jesucristo! ¹⁵ Ca lë', nazí'i ca' lágaca yúgu'të bönachi queë', nupa nacué' yehua' yubá, en nupa nacué' yödzólió ni. ¹⁶ Rinábida'-në' Xúziru' Dios, lu yöl-la' zxön queë', le nazáca'da', gunnë' queëli' yöl-la' huáca queë' Dios Bö' Lá'ayi, en gunë' ga gálali' lu icja ládxí'do'olí'. ¹⁷ Rinábida'-në' Cristo soë' icja ládxí'do'olí' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en bití' tséaj bö' icja ládxí'do'olí' ca nadxí'ili'-në', ¹⁸ para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö. ¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntërö ca gaca inábaru' o ca gaca sa' ládxí'ru', ugunë' dxin yöl-la' huáca queë' lu icja ládxí'do'oru'! ²¹ ¡Gácatíca'só queë' Dios yöl-la' ba lógaca bönachi queë' Cristo, en lahuë' Lë cazë' Jesucristo, na'a dza, en yúgu'të dza zá'gaca! ¡Ca' gaca!

4

Dios Bö' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guié ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nõxaj ladxi', en dxi'i ladxi'. Guli'cöz zxõn ladxi'. Guli'güi' ladxi' luzá'ali' tuli' ia'tuli' lu yöl-la' nadxi'i queëli'. ³ Guli'güi' ladxi' gácatica'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' ribõza tsáhu'i'do' queëli' le rutsaga libí'ili'.

⁴ Tuz naca idútë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Ribõza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que eëru'. ⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runödztasë' quégaquië'.

⁹ ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödzülió cadxi'ilö ni. ¹⁰ Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'. ¹¹ Cristo caz bennë' que eëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sëdinë' bönachi queë'.

¹² Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácacaca ca idútë le naca cazë' Lë'. ¹³ Caní gaca ga idxintë dza huöácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huöácaru' idú ca náquië' Lë' cazë' Cristo. ¹⁴ Bítirö gácaru' ca yugu' bí'ido', ca nácacaca nupa na' tu'tsa'të ca túngaca, en nácacaca ca tu le nachë' lu yegu, o ca tu le röjchë' bítitës bö' recja, tu' ta'zí' lu në'eguequi bítitës didza' nu rusëdi léguequi, nu na' rizi' ye'e léguequi len yöl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxi'iru' luzá'aru', ral-la' güi'iru' didza' le naca idútë li para gaca huöácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. ¹⁶ Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxõn ni'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxõn, en raca idú, ca na' zeaj rácarö idú ca nadxi'iru' luzá'aru'.

Yöl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnní'a': Bítirö gunli' ca tun nupa bití' núnbë'gaquië' Dios, nupa na' tun ca ta'za'sö ládxi'guequi, ¹⁸ en nachul-la nanítigaca icja ládxi'do'guequi. Tu' cabí nõzguequinë' le nácatë, en nazídigaquië', bití' nazí'gaquië' yöl-la' na'bán na'

runnë' Dios queëru'. ¹⁹ Biti' ca' tu'tu'inë'. Nudödi cuíngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'. ²⁰ Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bönachi caní. ²¹ Le naca idútë li biyónili' ca naca queë' Cristo, en le nácali' queë' tu'sédinë' libí'ili' le naca idútë li na' zóalen Jesús. ²² Guli'nná be'e yöl-la' bönáchisö queéli' le gúcali' zí'alö, lë na' riniti ni'a que yöl-la' rizé ladxi' queéli' le ruá' dö' le guzxi' ye'e libí'ili'. ²³ Ral-la' huóacali' cubi lu icja ládxi'do'oli', en lu bö' naca cázali'. ²⁴ Ral-la' sí'ili' yöl-la' bönachi cubi le nunë' Dios ca naca cazë' Lë', le rulu'i cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lë ni na', bítí'rö si' yé'ëli'. Yúgu'tëru' ral-la' güi'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

²⁶ Channö hualéli', bití' ral-la' gunli' dul-la'. Bití' ileli' xidzé. ²⁷ Bití' bi gunli' le güi' lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzejë' quégaca nupa ta'yadzaj.

²⁹ Bití' güi'ili' didza' xihui', pero guli'güi' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Bití' usuhuí'inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölë' libí'ili' lu dul-la'.

³¹ Guli'cúa ladaj libí'ili' yöl-la' ruzxë'e, en yöl-la' ridzá'a, en yöl-la' rilé, en yöl-la' ridil-la didza', en yöl-la' rutsaga yudxi, en yúgu'të yöl-la' bití' rilé'e luzá'ali' dxi'a.

³² Ral-la' gácali' dxi'i ladxi', en huéchi' ládxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benë' Dios, buniti lahuë' libí'ili' tu' nácali' tuz len Cristo.

5

Ca ral-la' ilaca nupa nácgaca ca bi'i queë cazë' Dios

¹ Tu' nácali' ca bi'i queë cazë' Dios, ate' nadxí'inë' libí'ili', guli'güi' ladxi' gácali' ca náquië' Lë'. ² Ca naca yúgu'të le runli':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bédxido' rúrtiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxixi le raza ládxi'ë' Dios le rigú'uru' lu bucugu lá'ayi queë'.

³ Tu' nácali' queë' Dios, bití' ca' gunli' le ruá' dö', en bití' gunli' le cabí ral-la' gunli', en bití' uhuídi'li'. Ní'irö cuntú nu gaca bi innë queéli'.

⁴ Bití' güi'ili' didza' xihui', o didza' canöz, o didza' cá'asö, yugu' le cabí ral-la' gunli', pero nácarö dxi'a guiéli'-në' Dios: "Xclenu'."

⁵ Chinöz quézili' nitúë' bönni' runë' le ruá' dö' bití' ca' tsázië' ga rinná bë'ë Cristo tsözxön len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuídi' naca ca nu reaj ladxi' budó' guiöj budó' yaga.

⁶ Bití' güi'ili' lataj nu si' ye'e libí'ili' len didza' bití' nácatë. Tu' nözi dul-la'

caní Dios gunë' xíguia' nupa biti' túngaca ca rna xtídzë'ë. ⁷ Biti' ca' gunli' tuz bönachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení', ⁹ tu' run bení' na' ga gácaru' dxi'i ladxi', en ga güi'iru' didza' le naca idútë li, en ga gácaru' tsahui'. ¹⁰ Guli'güi' ladxi' inözili' le raza ládxe'ë Xanru'. ¹¹ Biti' gútsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. ¹² Utui'iru' güi'iru' didza' ca naca le tun bönachi na' bagáchi'sö. ¹³ Cate' bi ubéajru' ga liná', gaca bë' yúgu'të tsca nácagaca, tu' gun le naca bení' ga gaca bë' yúgu'të. ¹⁴ Que lë ni na' nazúaj lu guichi lë na' rna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i. ¹⁶ Guli'sí' xibé lataj dë queéli' tu' chizóaru' dza biti' raca dxi'a queëru'. ¹⁷ Biti' gácali' bönni' biti' bi nõzguequinë'. Guli'güi' ladxi' tséajni'ili' le ré'ënë' Xanru' gunli'.

¹⁸ Biti' súdxili', tu' gun yöl-la' rizudxi ga nítli' tsaz.

Guli'güi'ida' lataj inná bé'enë' Dios Bö' Lá'ayi libí'ili'.

¹⁹ Guli'güi'ilen luzá'ali' didza' tuli' ia'tuli',
ugunli' dxin yugu' le rul-la lëgaca salmo,
en yugu' le rul-la yöl-la' ba Dios,
en yugu' le rul-la nagu'ë Dios Bö' Lá'ayi icja ládxi'do'oru'.
Idú ládxi'ru' ral-la' gúl-laru' queë',
le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
en guli'guíëtica'së Xúziru' Dios: "Xclenu" ca naca yúgu'të.

Ca ral-la' gunru' quégaca di'a dza queëru'

²¹ Guli'gún ca rna xtídza' luzá'ali' tuli' ia'tuli' para caní gunli'-në' Dios zxön.

²² Libí'ili', yugu' nigula, guli'gún ca rna xtídzë'ë Xanru'. ²³ Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusölá bönachi queë', nupa na' dzágagaca le naca cazë' Lë'. ²⁴ Ca na' tun bönachi queë' Cristo ca rna xtídzë'ë, lësca' caní ral-la' ilunnu nigula ca rna xtídzë'ë gaquië' bönni' que queégacanu ca naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queéli' ca na' Cristo nadxí'inë' bönachi queë', en budödi cuinë', gútië' uláz quégaquië'. ²⁶ Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë. ²⁷ Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntú nu gaca bi innë' quégaquië'. ²⁸ Ral-la' idxí'ili'-nu nigula que queéli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. ²⁹ Cuntu nu bönni' runi zí' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë', ³⁰ nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipélë'ë, en dxita queë'!

³¹ Lësca' caní nazúaj lu guichi lá'ayi le rna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz." ³² Lë na' nazúaj lu guichi ni rulu'i lahui tu le naca idútë

li, ate' neda' réquida' ruí'i didza' ca' ca naca queë' Cristo, en quégaca bönachi queë' na'. ³³ Lësca' ruí'i didza' ca naca queëli'. Yúgu'tëli' libí'ili', bönni', ral-la' idxi'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queégacanu.

6

¹ Libí'ili', yugu' bí'ido', ral-la' gunli' ca rna xtídza'gaquië' xuz xiná'ali' para caní gunli' ca rna xtídzë'ë Xanru'. Ral-la' gunli' le naca tsahui'. ² Xibá zí'alö na' benë' Dios le nachë' tu le guzxí' lu në'ë gunë', naca lë na' rna: "Ben bal xuz xinó'o, ³ ate' gaca dxi'a quiu', ate' xidzé su' ibanu' yödzölió ni."

⁴ Libí'ili', yugu' xuz, bití' gun leli' xzí'inili', pero buli'xön légacabi', en guli'sína' légacabi', en buli'sëdi légacabi' ca raza ládxi'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo. ⁶ Guli'gún xichíngaquië', calégasö cate' ni' tu'yúë libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxi'ë Dios, ca na' ral-la' gunli' xichinë' Cristo. ⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. ⁸ Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

⁹ Libí'ili', nacuá' queëli' bönni' nadó'ogaca, guli'gún dxi'a caní quégaca huen dxin queëli' na', en bití' uzéli' ba nadx légaquië'. Guli'tsöjné ca naca queëli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' bití' rutsë'ë ca runë' que que bönachi.

Dios runnë' queëru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni sí' bë' tu' xihui' libí'ili'. ¹² Bití' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'. ¹³ Que lë ni na':

Guli'sí' yúgu'të le runnë' queëru' Dios le tun chi'i rë'u,
para cate' idxín queëru' dza ni' ilaca le nácgaca xihui',
gaca guá' ilenli',

en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li,

le gaca queëli' ca tu guídi guga' lë'ëli'.

Guli'gaca tsahui' tu' gun chi'i libí'ili' le naca tsahui'

ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a

le ribequi dxi icja ládxi'do'oru' lahuë' Dios,

ca na' ruzóa cuinë' sina',

en ridë'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queëli' Cristo

gaca queëli' ca tu le naca tsutsu uzéli' loli',

para cabí gál-la' yugu' le usán tu' xihui' libí'ili',

le nácgaca ca yaga túchi'do' zoa guí' láhuilöguequi.

¹⁷ Yöl-la' rusölá gaca queëli' ca tu lu'u guíë le gun chi'i ícjali'.

Xtídzë'ë Dios gaca queëli' ca tu guié tuchi'
le runnë' Dios Bö' Lá'ayi queëru',
para utíl-lalenru' le naca xihui'.

¹⁸ Guli'gún yúgu'të lë ni,
en buli'lidzë' Dios inábili'-në' gácalenë' libí'ili'.
Buli'lídzatica'së' Dios zóalenë' Dios Bö' Lá'ayi libí'ili'.
Para gunli' caní ral-la' usubán ládxi'li' en cabí huőaj ládxi'li',
inábili'-në' Dios gácalenë' nupa néquigüequi queë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxi' cate' guna' libán para uzéajni'ida' bönachi ca naca le bigachi' que didza' dxi'a. ²⁰ Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guié ni. Buli'lidzë' Dios channö, inábili'-në' gunë' ga gaca' rugu ladxi' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, böchi'ru' na' nadxí'iru'-në', en runë' xichinë' Xanru' idú ládxe'ë, quíxjöi'inë' libí'ili' idú ca raca quia', en ca runa' neda' ni. ²² Que lë ni na', isöl-la'a-në' queëli', ate' uluí'inë' libí'ili' ca raca queëtu', ate' caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queëli' yöl-la' nadxí'i le dzaga yöl-la' réajlë' queëli' Cristo, yúgu'tëli' na' néquili' queë'. ²⁴ Le ruzá' ládxe'ë Dios queëru' gaca queëli', yúgu'tëli' na' nadxí'ili'-në' Xanru' Jesucristo, naca idú yöl-la' nadxí'i queëli' Lë'. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. ² Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxe'ë queëru', en gunë' ga soa dxi icja ládxi'do'oli'.

Pablo rinábinë' Dios bi gunë' quégaca bönachi ta'yéajlë' Cristo

³ Rea'-në' Dios: "Xclenu", cate' rizá' ládxa'a queëli'. ⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a ⁵ tu' røjneda' ca bënlenli' neda' tsözxön dxin que didza' dxi'a. Gusí loli' runli' dxin na' dza ni' si' biyönili', en runli' le ga ridxintë na'a dza. ⁶ Dios gusí lahuë' runë' tu le naca dxi'a lu icja ládxi'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. ⁷ Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxön len neda' le ruzá' ládxe'ë Dios queëru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz. ⁸ Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u. ⁹ Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú ¹⁰ para gaca cöli' le nácatëro dxi'a. Channö gaca caní queëli', gácali' idú dxi'a, ate' cuntu nu gaca bi innë queëli' dza ni' huödë' Cristo. ¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', ré'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. ¹³ Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nözguequinë' yu'a lidxi guié ni tu' runa' xichinë' Cristo. ¹⁴ Tu' yu'a neda' lidxi guié ni ben ga látu'biqui' yúgu'të böchi'ru' nácacagarë' rugu ladxi', ate' tu'zxöni ládxi'gaquië' Xanru', en bití'rö tádxinë' tunë' libán que xtídzë'ë Dios.

¹⁵ Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'. ¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxi'gaquië'. Té'ënnë' ulu'saca' zi'ë neda' tsanni ni yu'a lidxi guié. ¹⁷ Yugu' bönni' idú ládxi'gaquië' na', lu yöl-la' nadxí'i quégaquië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. ¹⁸ Biti' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzëjaröda' ¹⁹ tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöl-lë'ë Jesucristo queëru'. ²⁰ Caní ré'ënda', en ruzxöni ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatica'só yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. ²² Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxilö ral-la' cöa'. ²³ Naca böniga cöa'. Ré'ënda' gátitea' para

tsöjsóalentea'-në' Cristo, tu' gácatërö dxi'a quia', ²⁴ pero runrö bayudxi sóasa' ibana' para séqui'da' gácalena' libí'ili'. ²⁵ Tu' chinözida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'. ²⁶ Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

²⁷ Guli'güi'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxön dxin que le réajlë'ëru' le za' queëru' ni'a que didza' dxi'a. ²⁸ Biti' güi'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni uluí'i légaquië' ila'nítië', pero uláli' libí'ili', le gaca bë' rácalenë' Dios caz libí'ili'. ²⁹ Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí'i rizáca'li' cate' runli' xichinë'. ³⁰ Na'a, gaca gunli' neda' tsözxön güi'i ládxi'ru' gunru' libán que didza' dxi'a. Bilé'e quézili' ca gudí'i guzxáca'a cate' bena' caní zí'alö, ate' riyónili' ca riguí'i rizáca'a ca' na'a.

2

Gúquië' Cristo nöxaj ladxi', ate' bidéli'në' yöl-la' zxön

¹ Cristo runë' ga rutipa ládxi'li',
en lu yöl-la' nadxi'i queë' ruhuéchi' ládxe'ë libí'ili',
en runë' ga nácali' tuz len Dios Bö' Lá'ayi,
en ga nadxi'ili' luzá'ali',
en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzëjarö ládxa'a. Para gunli' caní, ral-la' gácali' tuz len luzá'ali', en gaca lébisö ca nadxi'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. ³ Ca naca le runli', bití' bi ral-la' gunli' lu yöl-la' rudul-li' queëli', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. ⁴ Guli'güi' ladxi' gaca dxi'a ca' que luzá'ali', en calëga queézili'.

⁵ Ral-la' gácali' nöxaj ladxi' ca na' gúquië' Jesucristo nöxaj ladxi'. ⁶ Lë' naca cazë' lébisö ca náquië' Dios caz, pero bití' gúquinë' ral-la' gunë' bayudxi ugá'anë' lébisö ca na' náquië' Dios. ⁷ Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachi, en gúquië' idú bönachi. ⁸ Cate' ni' náquië' bönni', gúquië' nöxaj ladxi', en benë' ca rnna xtídze'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'. ⁹ Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatërö lo ca yúgu'të lágaca bönachi. ¹⁰ Caní benë' Dios para cate' ila'yöni ca na' lë' Jesús, ulu'zechu zxíbigaca yúgu'të nupa nacué' yehua' yubá, en lu yödzülió, en lu lataj chul-la. ¹¹ Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u bení' yödzülió ni

¹² Que lë ni na', böchi' luzá'ado', ca na' benli' ca rnna xtídza'a cate' ni' zóalena' libí'ili', runrö bayudxi gunli' ca rnna xtídza'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queëli' Lë', en lu yöl-la' rizxizi. ¹³ Lë cazë' Dios runë' dxin lu icja ládxi'do'oli'. Runë' ga ré'ënili' gunli' le raza ládxe'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en bití' bi innëli' que, en bití' til-la dídza'li'. ¹⁵ Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yödzülió ga ni zóali' ladaj bönachi bití' nácgaca tsahui', en nucá'anagaca Dios. Libí'ili' rigú'uli' bení' ládjagaquië'

ca na' ta'gú'u beni' bölaĵ lúzxiba cate' ni naca chul-la, ¹⁶ cate' ru'ili' lógaquië' didza' ibániguequinë'. Channö caní gunli', huáca udzėjade'eda' ni'a que le naca cázali' dza huödë' Cristo, tu' inözda' bití' guca nítisö guzóa bönadxi gátia', en calëga nítisö bena' dxin. ¹⁷ Yöl-la' réajlë' queëli' Cristo naca tu le raza ládxe'ë Dios. Sal-la' gun bayudxi gátia' para gaca idú yöl-la' réajlë' queëli' Lë', udzėjada', en uzí'lena' xibé tsözxön yúgu'tëli'. ¹⁸ Lësca' caní ral-la' udzėjali' libí'ili', en uzí'lenli' tsözxön neda' xibé.

Ca tunbi' bi'i Timoteo, en bi'i Epafrodito

¹⁹ Channö caní ré'ënë' Xanru' Jesús, runa' löza isöl-la'tea'-bi' bi'i Timoteo ga zóali', ate' ní'rö udzėjada' cate' huödabi' ududíxjöi'ibi' neda' cätëze raca queëli'. ²⁰ Túzibi' lëbi' rizá' ládxi'bi' ca na' rizá' ládxa'a neda', en ru'ida' ládxi'bi' libí'ili'. ²¹ Yúgu'të bönni' ia'zica'rö, le naca quégacasë' tu'í ládxi'gaquië'. Bití' tu'í ládxi'gaquië' xichinë' Cristo. ²² Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsözxön xúzibi' dxin. ²³ Isöl-la'a-bi' bi'i Timoteo ga zóali' cate' inözda' nacxi gaca quia' ni ²⁴ sal-la' ruzxöni ládxa'a-në' Xanru' gunë' ga uduyútea' libí'ili'.

²⁵ Lësca' réquida' run bayudxi isöl-la'a-bi' bi'i böchi'ru' Epafrodito ga zóali'. Bi'i ni bénlenbi' neda' tsözxön dxin queë' Cristo, ate' gudí'lalentu' tu' xihui'. Libí'í cázali' gusöl-la'li'-bi' ga zoa' para gácalenbi' neda'. ²⁶ Lë cázabi' ré'ëni'bi' uduyúbi' libí'ili', en ru'ida' ládxi'bi' libí'ili' tu' biyónili' ben bayá' queëbi'. ²⁷ Le nácate' gü'ibi', en guqui gátibi', pero buéchi' ládxe'ë-bi' Dios, en calëgasö lëbi', pero buéchi' ládxe'ë ca' neda', para cabí isëbirö ládxa'a ca na' risëbi ládxa'a na'a. ²⁸ Que lë ni na', gú'uniröda' isöl-la'a-bi' queëli' para gaca udzėjali' leyúbölö cate' ulë'eli'-bi', en bítirö isëbi ládxa'a neda'. ²⁹ Guli'sí' lu ná'ali' lëbi' lu yöl-la' rudzeja queëli', tu' nácabi' bi'i böchi'ru' réajlë'ëbi' Cristo. Guli'gún bal yúgu'të bönachi nácagaca ca nácabi' lëbi', ³⁰ tu' guzóa bönadxi queëbi' gátibi' tu' benbi' xichinë' Cristo, en tu' gúcalenbi' neda' uláz queëli'.

3

Le naca idú tsahui'

¹ Na'a, böchi' luzá'ado', buli'dzeja tu' nácali' tuz len Xanru'! Bití' rupizxaj neda' uzúaja' queëli' leyúbölö lë na' buzúaja' queëli' zí'alö, tu' gácalen lë ni libí'ili'. ² Guli'gún chi'í cuinli' lógaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipëla'gaquië' bönni' le naca bë' nazí' lu ná'gaquië' xtídzë'ë Dios. ³ Rë'u nadéli'ru' lë na' naca idútë li, le naca bë' nazí' lu ná'aru' le runnë' queëru' Dios. Tu' réajlë'ëru' Dios, zóalenë' Dios Bö' Lá'ayi rë'u, ate' rudzëjaru' tu' nácaru' tuz len Jesucristo. Bití' ca' ruzxöni ládxi'ru' tu le runru' rácasö queëru'. ⁴ La'tu' ruzxöni ládxi'ru' lë ni, lësca' neda' chinadéli'da' bi uzxöni ládxa'a. Channö zoë' nu bönni' réquinë' ulë' tu' nacuá' le nunë', neda' nadéli'röda' ca bönni' na':

⁵ Gurugu lu xipëla'a lë na' naca bë' cate' ni' gúquida' xunu' dza.

Gulja' ladaj dí'a dza quégaca bönachi Israel.

Nababa' zxi'ini xi'söë' Benjamín.

Xuz xiná'a nácagaquië' idú bönachi hebreo.

Guca' bönni' yudo' fariseo ca na' bena' ca rinná' bë' xibá' queë' Dios.

⁶ Bë'da' ládxa'a xibá' na' ga bidxintë' gudxía' ládxa'a bönachi queë' Cristo.

Tsca gaca gáquië' tsahui' tu bönni' tu' runë' ca rinná' bë' xibá' na', cuntu nu bi guca innë' quia'.

⁷ Na'a, yúgu'të lë na' bena' zxön zí'alö, nuzóa' tsölá'alö tu' néquida' queë' Cristo. ⁸ Calëgasö yugu' lë na', pero nuzóa' ca' tsölá'alö yúgu'të le dë, para gaca

gúnbe'eda'-në' Xanru' Jesucristo, le nácatërö lesaca' ca yúgu'të læ na'. Para gúnbe'eda' Lë' gurú'una' ní'ilö yúgu'të, en réquida' naca ca bëbu, para uzi'a xibë' Cristo, ⁹ en para gaca' tuz len Lë'. Nuhuöáca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'. ¹⁰ Ré'ënisida' gúnbë'a-në' Cristo, en sóalen yöl-la' huáca queë' Dios neda', læ na' busubán Cristo lu yöl-la' guti, ate' guna' Lë' tsözxön, qui'i saca'a ca na' gudí'i guzxáquë'ë Lë', en soa' sina' gátia' ca gútië' Lë', ¹¹ tu' runa' löza Dios, usubanë' ca' neda' lu yöl-la' guti.

Le runru' para idxinru' xilatjaru'

¹² Biti' rnnía' chinadéli'da' yúgu'të læ ni gunnë' quia', en bití' réquida' chinnaca' idú tsahui'. Na'a, runa' bayudxi idéli'da' yúgu'të læ na', tu' chibidéli'në' Jesucristo neda'. ¹³ Böchi' luzá'ado', bití' ca' nadéli'da' yugu' læ ni, pero tuz le runa' bayudxi. Ruzál-la' ládxa'a le chibidéli'da', ate' runa' bayudxi idéli'da' le za'. ¹⁴ Runa' ca runë' tu bönni' rixítí'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' læ na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'.

¹⁶ Na'a, ca naca læ na' bidéli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Bulí'yú ca tun nupa na' tun ca na' bentu' netu'. ¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxi quia', rnnía': Le tunë' zían bönni' run ga nácaquie' ca nupa bití' ta'lé'e Cristo dxi'a, tu' tu'zöë' tsölá'alö le ben cazë' Lë' læ'e yaga cruz. ¹⁹ Yugu' bönni' tunë' caní, tsöjáquie' lu guí' gabila, tu' naca le ta'zësö ládxi'gaquie' dios quégaquie', ate' tun ba zxön cuíngaquie' ni'a que læ na' ral-la' gun ga ulu'tuí'inë'. Tuí'i ládxi'së le dë yödzölió ni, ²⁰ pero rë'u ni ruí'i ládxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹ Lë' utsë'ë idútë le naca cázaru', le riniti caz, en gunë' ga huöáca ca naca idútë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

4

Ral-la' udzéalentica'siru'-në' Xanru'

¹ Que læ ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en ré'ënda' uduyúa' libí'ili'. Runli' ga rudzëjada', en nácali' ca tu le ruzi'a xibé.

² Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queë' Xanru'. ³ Na'a, böcha'a idú, ré'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lë'sca' bulu'dzáguië' Clemente, en ia'zica'rë' luzá'a na' netu'. Chinazúajgaca lágauie' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴ ¡Bulí'dzéalentica'sö-në' Xanru'!

Leyúbölö, rnnía': ¡Bulí'dzeja!

⁵ ¡Guli'gaca dxi'i ládxi' len yúgu'të bönachi!

¡Chizóa huödë' Xanru'!

⁶ Bití' ubi uguí'ili', pero guli'nabi-në' Dios le riquínili', en guli'guíë': "Xclenu'" ca naca yúgu'të læ na' rinábali'. ⁷ Dios gunë' ga gaca queëli' le cuéqui dxi icja ládxi'do'oli', læ na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá ládxi'li' tu' nácali' tuz len Jesucristo.

Ral-la' sa' ládxi'ru' le náca'gaca dxi'a

⁸ Ga ruúdxitë, böchi' luzá'ado', guli'sá' ládxi'li':
 Yúgu'të le naca dxi'a, en le naca bica' ba,
 en le naca idútë li, en le naca idú,
 en le naca tsahui', en le naca ba'a,
 en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxi' lu ná'ali' tsca na' bé'lena' libí'ili' didza', en tsca na' bena' ga ni' zóali'. Dios, Nu runna queëru' le ribequi dxi icja ládxi'do'oru' sóalenë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzéjalenda'-në' Xanru' tu' ruí'i ládxi'li' neda' leyúbölö. Biti' rnnía' gul-la ládxi'li' neda', pero biti' guta' queéli' lataj gácalenli' neda' zí'alö. ¹¹ Lësca' caní, biti' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. ¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nöljada' o nabila riduna', en sal-la' dëda' quia' o zoa bi riyadzaj quia'. ¹³ Yúgu'të huazéqui'da' tu' rutipë' Cristo ládxa'a. ¹⁴ Benli' dxi'a cate' ni' gúcalenli' neda', en butípali' ládxa'a cate' gudí'i guzxa'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzejali', tu' guzxi' lu ná'ali' libán bena' neda'. ¹⁶ Tsanni ni' guzóa' yödzo Tesalónica, tu' chopa luzuí gusöl-la'li' quia' le bunödzejali' cate' ni' biyadzaj quia'. ¹⁷ Biti' ruí'i ládxa'a bi si'a, pero rë'ënda' gáta'rö queéli' le uzí'ili' xibé yehua' yubá. ¹⁸ Rea' libí'ili': Chiguzxi'a yúgu'të lë na' gusöl-la'li' quia', ate' gudóditë bë' tsca le biyádzjada'. Ben ga naca caní lë na' gusöl-la'li' lu ná'abi' bi'i Epafrodito. Lë na' bunödzejali' naca ca tu le rilá' zixixi le ridxintë lahuë' Dios, en ca tu le rigú'uru' lahuë' Dios le raza ládxe'ë. ¹⁹ Dios gunnë' queéli' yúgu'të le riyadzaj queéli', tsca naca yöl-la' tsahui' rö'ö yehua' yubá, tu' nácali' tuz len Jesucristo. ²⁰ ¡Gácatuca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu' gapa Dios luzë' eguequi

²¹ Uláz quia' neda', guli'gapa Dios nupa ni' néquiguequi queë' Dios tu' náca'gaca tuz len Jesucristo. Tu'gapë' Dios libí'ili' böchi' luzá'aru' núngaquië' neda' tsözxön ni. ²² Lësca' yúgu'të nupa ni' néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

²³ Rinábida'-në' Xanru' Jesucristo uzá' ládxe'ë queéli' yúgu'tëli'. ¡Ca' gaca!

DIDZA' GUSÖL-LĚ'Ě PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' ré'ënë' Dios caní, ate' dzágabi' bi'i böchi'ru' Timoteo neda'. ² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxi'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' ⁴ tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios. ⁵ Caní runli' tu' runli'löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. ⁶ Didza' dxi'a na' bidxín queëli' ca ridxín ca' idútë yödzülió. Run dxin, en raca libán que, idútë yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' idútë le ruzá' ládxë'ë queëru' Dios. ⁷ Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. ⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, bití' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le ré'ëni quézine' Lë', en gunnë' queëli' yúgu'të yöl-la' rácada', en yöl-la' réajni'i le rigü'ë Dios Bö' Lá'ayi rë'u. ¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácaró idú ca núnbë'ëli'-në' Dios. ¹¹ Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxi', en udzeja ládxi'li'. ¹² Lu yöl-la' rudzeja queëli' guli'guíë' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. ¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. ¹⁴ Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubága'ru'.

Nuhuöácaru' tuz len Dios tu' gútië' Cristo uláz queëru'

¹⁵ Cristo náquië' tuz ca náquië' Dios caz, Nu bití' gaca ilé'eru'. Zoa cazë' Lë' zí'atëlö ca yúgu'të le benë' Dios. ¹⁶ Lu në'ë Cristo benë' Dios yúgu'të le dë, le nacuá' lúzxiba, en le nacuá' luyú, yugu' le rilé'eru', en yugu' le cabí gaca ilé'eru', lë na' nápagaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'. ¹⁷ Cristo zoa cazë' zí'alö ca yúgu'të le dë, ate' yúgu'të nacuá'tica'sö ni'a queë' Lë'. ¹⁸ Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. ¹⁹ Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. ²⁰ Ni'a que le benë' Cristo, Dios benë' ga gaca ulu'huöáca tuz len Lë' yúgu'të le dë, le nacuá' luyú, en le nacuá' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëlö nulá'alenli'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'. ²² Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca innë queëli'. ²³ Caní gaca channö ugá'anali' tsutsu ca réajlë'ëli' Cristo. Gácali' ca tu yu'u xzoa ga rë' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyönili', lë na' raca libán que idútë yödölió le benë' Dios zzan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu nëë Pablo

²⁴ Rudzëjada' na'a ca naca le riguí'i rizáca'a para gácalena' libí'ili', en ruúdxí rizá'a lu idútë le naca' le riguí'i rizáca'lena' tsözxón Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cuntú nu benbë' le, pero na'a Dios chibuluí'inë' bönachi néquiquequi quez queë' ca naca que. ²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' rusëditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácgaca tuz len Jesucristo. ²⁹ Para gaca caní runa' dxin, en ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

2

¹ Ré'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödö Laodicea, en le gácalen ca' yúgu'të nupa biti' ila'lé'eni neda'. ² Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. ³ Lu nëë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. ⁴ Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë. ⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

⁶ Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. ⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazëdali'. Guli'guíëtica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí gü'i'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácgaca idútë li, ca naca le ta'lëbi tun bönachi, en ca naca le tu'sedi bönachi le naca que yödölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápali' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. ¹¹ Narugu lu xipëla'gaquië' bönni' judío le ruluí'i dá'gaquië' Dios, pero libí'ili', tu' dzágali' Cristo, zóalen libí'ili' le ruluí'i néquili' queë' Dios, le cabí néquini lu ni'a lu ná'agaca bönachi.

Yugu' bönni' judío tu'güé' tu guídido', pero libí'ili', nadúa idútë yöl-la' bönachi queéli' le bënlenli' dul-la'. Caní naca queéli' tu' benli' tsözxön Cristo cate' gútié' lë'e yaga cruz. ¹² Cate' bidí'ali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'éli' Dios, len yöl-la' huáca queé' busubanë' Cristo lu yöl-la' guti. ¹³ Zí'atëlö gúcali' ca nupa chinátigaca tu' nözi dul-la' gubága'li', en bití' guzóalen libí'ili' le ruluí'i néquili' queé' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'. ¹⁴ Dios busúluë' yugu' le nabága'ru' le nazúajgaca lu xibá queé', lë na' tu'zegui rë'u didza'. Bugüé' lë na' nabága'ru', en budé'ë le lë'e yaga cruz ca tu le nabáguë'ë Cristo. ¹⁵ Cate' gútié' Cristo lë'e yaga cruz, bugüé' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le nácgaca bö' xihui' na', en bugüé' idutë le guta' lu në'eguequi.

Ral-la' güi'í ládxi'ru' le naca que yehua' yubá

¹⁶ Que lë ni na', bití' güi'ili' lataj nu uzegui libí'ili' didza' ca naca le rë'aj ráguli', o tu' cabí runli' zxon yugu' dza laní, o tu' cabí runli' zxon beo' si' ruzë, o tu' cabí runli' zxon yugu' dza lá'ayi quégaca bönachi. ¹⁷ Yúgu'të lë ni naca ca tu bixín que le ral-la' gaca, ate' le ruluí'i yúgu'të lë ni náquié' Cristo caz. ¹⁸ Bití' güi'ili' lataj nu gun ga unítli' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxon yugu' gubáz lá'ayi. Tu'gutsa' cuíngaquié' le cabí bila'lé'enë', en tun ba zxon cuíngaquié' ca naca le dzó'ösö ícjagaquié' lu yöl-la' bönáchisö quégaquié'. ¹⁹ Nu run caní bití' da' Cristo. Náquié' Xanru', en ruzóé' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxon idutë le naca cazë' ca rë'enë' Dios uxönë' le.

²⁰ Libí'ili' chinátilenli'-në' Cristo para cabirö ila'nná be'e xibá que yödzülió libí'ili'. ¿Bizx que runli' tsca ni nácali' que yödzülió, en runli' ca ta'nná bë' xibá que? ²¹ Caní ta'nná yugu' xibá que yödzülió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácgaca le ta'nná bë' bönachi, en yugu' xibá nazí' lu në'eguequi. ²³ Le nácatë, yugu' xibá ni, téqui bönachi nápagaca yöl-la' réajni'i. Tun ga tu'luí'i cuínguequi ca bönachi yudo', en ga tu'luí'i cuínguequi nöxaj ladxi', en ga tu'saca' zígaca idutë le zeaj naca caz, pero xibá ni bití' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisö queëru'.

3

¹ Na'a, channö nubánlenli'-në' Cristo, guli'güi' ladxi' le nácgaca que yehua' yubá ga ni' rö'ë Cristo cuita lë'ë ibëla Dios, ga náquié' lo. ² Guli'sá' ladxi' le taca xítsá'alö, en calëga le taca luyú ni. ³ Naca queéli' tsca chinátli', ate' yöl-la' na'bán queéli' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' uluí'i lahuë' Lë', ní'irö uluí'i loli' ca' libí'ili' tsözxön len Lë' lu bení' queé'.

Yöl-la' na'bán gula, en yöl-la' na'bán cubi

⁵ Que lë ni na', guli'gún ga ila'niti le nacúa'len libí'ili' que yödzülió ni: Yugu' le ruá' dö', en le nácgaca xihui', en yugu' le rizé ládxi'li' le ruá' dö', en yugu' le rizé ládxi'li' le naca xihui', en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guiöj budó' yaga, tu' cabí reaj ladxi' Dios nu ruhuidi'. ⁶ Tun bönachi yugu' le caní, ate' gunë' Dios xíguia' yúgu'të nupa biti' túngaca ca rnna xtídzë'. ⁷ Yugu' dul-la' caní benli' ca' libí'ili' cate' ni' nadödili' lu në'eguequi. ⁸ Na'a, bíti'rö gunli' yugu' lë ni:

Bíti'rö idzá'ali', en bíti'rö leli'.

Bíti'rö nu gunli' zi', en bíti'rö innë xíhui'li'.

Bíti'rö innali' le ruá' dö'.

⁹ Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'alö, en yugu' le benli' zí'alö. ¹⁰ Chinácali' bönachi cubi, ate' tu tu dza ricúbili', ruhuóacaröli' ca naca Nu na' bun libí'ili', para gúnbë'ëli' Lë' idú ca náquië' Lë'. ¹¹ Tu' chidzágaru'-në' Cristo:

Bíti'rö nácaru' bönni' zi'tu', en bönni' judío.

Bíti'rö nácaru' bönni' narugu lu xipéla'gaquië' le naca bë' nu da' Dios, en bönni' biti' narugu lu xipéla'gaquië' lë na' naca bë'.

Bíti'rö nácaru' bönni' ta'yéajni'inë', en bönni' biti' ta'yéajni'inë'.

Bíti'rö nácaru' bönni' nadó'ogaquië', en bönni' biti' nadó'ogaquië'.

Na'a, Cristo náquië' yúgu'të le nácagaca lesaca', en dzáquië' yúgu'tëru'.

¹² Dios nadxí'inë' libí'ili', en guröë' libí'ili' para guéquili' quez queë'. Que lë ni na', ral-la':

Gü'i ládxi'li' luzá'ali', en gácali' dxi'i ladxi',

en nöxaj ladxi', en cuidi' ladxi',

en cözali' zxön ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'. ¹⁴ Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxí'i le run ga nácaru' tuz, en ga nácaru' idú. ¹⁵ Guli'gü' lataj le ribequi dxi icja ládxi'do'oru' inná bë' lu icja ládxi'do'oli', lë na' runnë' Dios queëru'. Que lë ni na' bulidzë' libí'ili', para gácali' tuz lu idútë le naca cazë' Cristo. Guli'guië' Dios: "Xclenu'."

¹⁶ Guli'sí' lu ná'ali' xtídzë'ë Cristo le gaca queëli' tu yöl-la' tsahui' zxön. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gul-la' yugu' salmo queë' Dios, en yugu' le rul-la' yöl-la' ba, en yugu' le rul-la' lá'ayi, ate' guiëli'-në' Dios: "Xclenu'." ¹⁷ Yúgu'të le runli', le naca didza' ru'ili' o le naca dxin runli', guli'gún yúgu'të lu Lë' Xanru' Jesús, en guiëli'-në' Dios Xuz: "Xclenu'", dzáquië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'aleni' bönni' queëli', guli'gún ca rnna xtídzá'gaquië' bönni' que queëli' ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'aleni' nigula queëli', guli'dxi'i nigula que queëli', en biti' uzéli' bach légacanu.

²⁰ Libí'ili', bi'i ra'bán, guli'gún ca rnna yúgu'të xtídzá'gaquië' xuz xiná'ali'. Lë ni raza ládxe'ë Xanru'.

²¹ Libí'ili', núlöli' nácali' xúzgaca bí'ido', biti' tödi bë' usína'li' zxí'inili', para cabí huöaj ládxi'gacabi'.

²² Libí'ili', núlöli' nácali' bönni' nadó'ogaquië', guli'gún ca rnna yúgu'të xtídzá'gaquië' xanli' luyú ni.

Calégasö gunli' caní cate' tu'yúë' libí'ili' ca na' tun nupa té'ëni ilún ga ila'yaza ládxi'gaca bönachi,

pero idú ládxi'li' guli'gún xichíngaquié'
ca ral-la' ilún nupa tadxi Dios.

²³ Ca naca yúgu'tè le runli', guli'gún idú ládxi'li',
gaca ca runli' xichiné' Xanru',
en calégasö ca runli' xichíngaca bönachi.

²⁴ Chinöz quézili' ubi'ë Xanru' queéli',
gunné' queéli' le chinupé'ë Dios quégaca nupa nácagaca zxí'ini cazé'.
Caní gaca, tu' runli' xichiné' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabí utsé'ë
Dios ca ral-la' ubi'ë que queégaca bönachi.

4

¹ Libí'ili', núlöli' nácali' xángaca bönachi,
guli'gún le naca tsahui', en le naca dxi'a
ca rugunli' dxin yugu' bönni' huen dxin queéli'.
Guli'tsöjné zoa ca' Xanli' yehua' yubá.

² Libí'ili', yúgu'téli',
buli'lídzatica'sé' Dios.
Buli'subán ládxi'li' ulídzali'-në' Dios,
en guli'guié': "Xclenu'."

³ La' ná'asö cate' rulídzali'-në' Dios, guli'nabi-në' ca' gácalenë' netu', en
gunné' netu' lataj quíxjö'ötu' xtídzë'ë Xanru', para gaca uzéajni'itu' bönachi
le bigachi' ca naca queë' Cristo. Tu' runa' caní nadzuna' lidxi guié' ni.
⁴ Guli'nabi-në' ca' Dios, gunné' neda' lataj usalaj lá'ana' le bigachi' na' ca ral-
la' guna'.

⁵ Lu yöl-la' réajni'i queéli', guli'gún le runli' lógaca nupa biti' ta'yéajlë' Cristo.
Guli'gunda' dxin yugu' dza uzá' ládxi'ë Dios queéli', gunli' xichiné'. ⁶ Ral-la'
gü'ili' didza' ca raza ládxi'ë Dios, en ca ral-la' gun nupa néquiguequi queë'.
Ral-la' inözili' ca' naca ral-la' ubi'ili' didza', bi guié'li' tu tu bönachi.

Yugu' bönachi queë' Cristo tu'gapa Dios luzë'eguequi

⁷ Tíquico quíxjö'i'në' libí'ili' le raca quia' ni. Náquië' böchi'ru' nadxí'iru'-në'.
Náquië' ca' huen dxin idú queë' Xanru', en rúnlenë' neda' tsözxön dxin queë'
Xanru'. ⁸ Que lë ni na' risöl-la'a-në' ga zóali', para uzéajni'inë' libí'ili' le raca
quia', en utipë' ládxi'li'. ⁹ Onésimo, böchi'ru' na' nabábalenë' libí'ili' sa'yéajlenë'
lë' tsözxön. Náquië' ca' böchi'ru' nadxí'iru'-në', en réajlë'ë Xanru'. Chopë' ni
ulu'siyönnë' libí'ili' yúgu'tè le raca ni.

¹⁰ Aristarco, bönni' na' yú'ulenë' neda' tsözxön lidxi guié' rugapë' Dios
libí'ili'. Bi'i Marcos, bi'i bönni' queënu nigula zanë' Bernabé rugápabi' Dios
ca' libí'ili'. Chigudxa' libí'ili' bi gunli' queëbi' bi'i Marcos na'. Channö huídabi'
ga zóali', guli'gún-bi' bal. ¹¹ Bönni' ni lë' Jesús, en zoa ia'tú lë' Justo lësca' rugapë'
Dios libí'ili'. Nacuá' zían bönachi judío ta'yéajlë' Cristo, pero tsónnasë' ni ladaj
bönachi judío tunë' dxin que le rinná bë'ë Dios tsözxön len neda', en tu'hui'
zxöndë'ë neda'. ¹² Epafra, bönni' ni nababë' ca' libí'ili' rugapë' Dios libí'ili'.
Náquië' huen dxin queë' Cristo, en idú ládxi'ë rulidzë' Dios, en ráta'yutica'së'
lahuë' gácalenë' libí'ili' para gácali' idú ládxi', en sóali' ca' sina' gunli' yúgu'tè
le ré'ëni quézinë' Dios. ¹³ Runa' ba nalí queë' Epafra na', ruí'ida' ládxi'ë
libí'ili' enca' nupa nacué' yödzö Laodicea, en nupa nacué' yödzö Hierápolis.
¹⁴ Demas, enca' Lucas tu'gapë' Dios libí'ili'. Náquië' Lucas bönni' na' ruúnë'
bönachi, ate' nadxí'iru'-në'.

¹⁵ Guli'gapa Dios böchi'ru' nacué' Laodicea, enca' Ninfas, en bönachi queë'
Cristo nacué' lídxinu Ninfas na'. ¹⁶ Cate' údxi ulábalí' guichi ni ga ni' zóali',

guli'gún ga ulu'laba le bönachi queë' Cristo nacua' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'. ¹⁷Guli'guíë' Arquipo: "Bë' lãdxu'u gunu' dxin na' budödë' Xanru' lu no'o."

¹⁸Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca raca quia' nãdzuna' lidxi guíë ni. Rinábida'-në' Dios uzá' lãdxë'ë queéli' le naca dxi'a. ¡Ca' gaca!

DIDZA' ZÍALÖ GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'. ³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo. ⁴ Böchi' luzá'atu', Dios nadxí'inë' libí'ili', ate' nöztu' guró cazë' Lë' libí'ili'. ⁵ Caní naca, tu' bidxín queëli' didza' dxi'a runtu' libán que, calëga len dídzasö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsá' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzëjali' tu' zóalenë' Dios Bö' Lá'ayi libí'ili'. ⁷ Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. ⁸ Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, bití' bi run bayudxi innatu', ⁹ tu' ta'guixjö' la' léguequisö bönachi ni' queëtu' ca benli' netu' bal, en ca na' butsá' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios. ¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' bití' guca nítisö dxin queë' Dios bentu' cate' ni' bidxintu' ga zóali'. ² Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán lolí' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queëli', en bití' guzxí' yé'etu' libí'ili'. ⁴ Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö ru'itu' didza'. ⁵ Nöz quézili' catu caz bë'lentu' libí'ili' didza' le gun zxön libí'ili', en bití' guléaj tsahuí' cuintu' ca run nu bi rizë ladxi' le dë queëli'. Nöz quézinë' Dios naca caní. ⁶ Bití' gudíljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasöl-lë'ë Cristo ⁷ guzóalentu' libí'ili' dxi'i ládxi'do', en bentu' ca runnu xiná'agacabi' bi'i huë'ënido', run chí'inu légacabi' dxi'i ládxi'do'. ⁸ Caní guca, bidxí'ide'etu'

libí'ili', ga bidxintë gú'unitu' udöditu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxi'ide'etu' libí'ili'. ⁹ Røjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ëli' Cristo, huáca gunli' ba nali', ate' nõzinë' Dios ca na' gudárentu' libí'ili' idú ca raza lãdxë'ë Dios, en idú dxí'ado', en ca na' cuntu nu gaca bi innë que. ¹¹ Lësca' caní nõzili' ca bentu' ca runë' tu bõnni' quégacabi' zxfí'në', guchízatu' icja nágali', en butípatu' lãdxi'li' tu tuli'. ¹² Busá'atu' lãdxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení queë'.

¹³ Que lë ni na' ca', rëtica'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyõnili' bë'ëtu' didza', calëga ca xtídza' bõnachisö, pero ca le nácatë naca, xtídzë'ë Dios naca. Xtídzë'ë na' run dxin lu icja lãdxi'do'oli' libí'ili', réajlë'ëli' Cristo. ¹⁴ Böchi' luzá'atu', raca queëli' ca raca quégaca bõnachi queë' Dios, nupa néquiquequi queë' Jesucristo luyú Judea. Caní naca tu' chigudí'i guzxacá'da'ali' lu ná'agaca bõnachi ulãdz queëli', lëbisö ca na' gula'gu'i gula'záquië' légaquië' lu ná'agaca bõnachi ulãdz quégaquië', nupa ni' nãcagaca bõnni' judío. ¹⁵ Yugu' bõnni' judío na' gulútië' Xanru' Jesús, en gulútië' ca' yugu' bõnni' gulu'ë didza' ulãdz queë' Dios. Gula'bía lãdxi'gaquië', en bulu'láguë' ca' netu'. Biti' tunë' le raza lãdxë'ë Dios, tu' cabí ta'lé'enë' dxi'a yúgu'të bõnachi izá'a. ¹⁶ Tu'záguë'ë ca' xinõztu', para cabí guntu' libán lógaca bõnachi izá'a na' biti' nabábagaca légaquië', tu' ru'ilentu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégaquië'.

Pablo rë'enë' tsöjyüë' böchi'ru' nacu'ë Tesalónica

¹⁷ Na'a, böchi' luzá'atu', ruhuí'initu' ca runë' tu bõnni' uzëbi tu' nulá'alentu' libí'ili' tu chí'ido', pero sal-la' biti' rilé'etu' libí'ili', biti' nál-la lãdxi'tu' libí'ili'. Que lë ni na', ru'ílãdxi'rötu' ulé'etu' loli', tu' rizëda' lãdxi'tu' guntu' caní. ¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' lãdxa'a guída' chopa tsonna luzuí, pero Satanás, tu' xihui', buzaga' xinõztu'. ¹⁹ ¿Bizxi caz naca le run ga runtu' löza, o le run ga rudzëjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? ²⁰ Libí'i cázali' nácali' le run ga nácatu' bica' ba, en le run ga rudzëjatu'.

3

¹ Que lë ni na', cate' bíti'rö guca guá' ilentu', ben xtídza'tu' ugá'anatu' chópatu' lu yödzo Atenas, ² ate' gusöl-la'tu'-bi' bi'i böchi'ru', Timoteo ga zóali'. Nãcabi' bi'i huen dxin queë' Dios, en rúnlenbi' neda' tsözxõn libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo, ³ para cabí soa nu gaca chopá ladxi' ni'a que le tu'saca' zi' bõnachi ni netu'. Nöz quézili' zóaru' yödzo'lió ni para guá' ilenru' le caní. ⁴ Lësca' cate' ni' guzóalentu' libí'ili', busiyõntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nõz quézili' lë na'. ⁵ Que lë ni na', cate' bíti'rö guca guá' ilena', gusöl-la'a-bi' bi'i Timoteo ga zóali', para ududíxjöi'ibi' neda' ca naca queëli' ca réajlë'ëli'-në' Cristo, en channö cabí gulú'u tu' xihui' libí'ili' nõza dul-la', nu na' rigú'u bõnachi nõza dul-la', en channö cabí böáca nítisö dxin na' bentu' ga zóali'.

⁶ Cate' buzá'abi' bi'i Timoteo ga zóali', en budxinbi' ga zóatu', busiyõnbi' netu' le naca dxi'a. Bë'ëbi' didza' ca na' réajlë'ëli' Cristo, en ca na' nadxi'igacali'-në' yugu' böchi' luzá'aru', en ca na', lu yöl-la' dxi'i ladxi' queëli'

röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. ⁷ Que lë ni na', böchi' luzá'atu', cate' ni' gudí'i guzáca'tu' yúgu'të lë ni, en zían le guca queëtu', bidxín didza' queëtu' le buí'i zxön netu' cate' biyönitu' ca réajlë'ëli'-në' Cristo. ⁸ Na'a, nuhuóaca ládxi'tu' tu' riyönitu' rö'öli' tsutsu ca réajlë'ëli'-në' Xanru'. ⁹ ¿Nacxi caz gaca guíëtu'-në' Dios: "Xclenu" ca ral-la' guntu' ni'a que yúgu'të le run ga rudzeja ládxi'tu' lahuë' Dios queëru' ni'a que le nácali' libí'ili'? ¹⁰ Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queëli' ca naca le réajlë'ëli'-në' Cristo.

¹¹ Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'. ¹² Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'. ¹³ Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxe'ë Dios

¹ Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágalí' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

² Chinöz quézili' yugu' le gunná bé'etu' libí'ili' uláz queë' Xanru' Jesús. ³ Le rë'ënë' Dios naca gácali' idú dxi'a, en bíti'rö gunli' le cabí naca tsahui', ⁴ en inözili' tu tuli' nacxi ral-la' sóalenli'-nu nigula que queëli' idú ca sa'yéaj le naca lá'ayi, en gunli' légacanu bal. ⁵ Biti' ral-la' sóalenli'-nu nigula queëli' lu yöl-la' rizé ladxí' le ruá' dö', ca na' tun bönachi bití nabábagaca Dios, en bití núnbë'gaca Dios. ⁶ Ca nátagaca lë ni, cuntu nu ral-la' tödi bë', en cabí si' ye'e böchi' luzé'e bagáchi'sö, tu' ichúguíë' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. ⁷ Dios bulidzë' rë'u, calëga para gunru' le ruá' dö', pero para gácaru' idú dxi'a. ⁸ Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí' caní didza'.

⁹ Biti' run bayudxi uzúaja' queëli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. ¹⁰ Le nácatë nadxí'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. ¹¹ Ráta'yutu' loli' ca', güí'i ládxi'li' cözali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'. ¹² Gunná bé'etu' libí'ili' caní para gaca gunli' le naca dxí'ado' lógaca nupa bití nabábagaca libí'ili', en caní gaca, bití' bi yadzaj queëli'.

Ca gaca cate' huödë' Xanru' Jesucristo

¹³ Lësca', böchi' luzá'atu', rë'ënitü inözili' ca raca quégaca nupa chinátigaca, para cabí huí'inili' ca tun ia'zíca'rö bönachi bití' zoa le tun löza. ¹⁴ Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' riguíxjöi'itu' libí'ili' xtídzë'ë Xanru' le rna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán

nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóaléntica siru'-në' Xanru'. ¹⁸ Que lë ni na', guli'huí' zxön luzá'ali' tuli' ia'tuli' ca nácgaca didza' ni.

5

¹ Na'a, ca naca dza na', o rëla na' cate' ilaca lë ni, biti' run bayudxi uzúaja' queëli' lu guichi, böchi' luzá'atu'. ² Libí'ili' chinöz quezili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzö'ölö. ³ Cate' ila'nná bönachi: "Raca dxi'a queëru', en biti' bi gaca queëru'", ní'irö la' idxintë le usuniti léguequi, lë na' idxín queguequi ca na' ridxín le riguí' rizáca'nu nigula na' chizóa sóabi' bí'ido' queënu, ate' cuntú nu nutsa' ladaj bönachi yödzölió ni nu ulá cate' gaca lë na' gaca dza na'. ⁴ Na'a, böchi' luzá'atu', biti' zóali' chul-la niti, en que lë ni na' biti' idxín dza ni' queëli' bagáchi'sö ca ridxinë' bönni' gubán. ⁵ Yúgu'tëli' nácali' bönachi que bení', en que lahui' dza. Biti' nácaru' bönachi que chi'i dzö'ölö, en calëga que le naca chul-la. ⁶ Que lë ni na', biti' ral-la' tödi yëla loru' ca raca quegaca nupa biti' nabábagaca rë'u, pero ral-la' usubán ládxi'ru', en cózaru' ba'a ládxi'do'. ⁷ Nupa tasi, chi'i dzö'ölö tasi, en nupa ta'zudxi, chi'i dzö'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cózaru' ba'a ládxi'do', tu' chinácuru' zxaru' le run chi'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guíë le run chi'i ícjaru'. ⁹ Caní naca, tu' nuzóë' Dios rë'u ni, calëga para idxinru' ga ichúguíë' queëru', pero para uláru' tu' ruzxöni ládxi'ru'-në' Xanru' Jesucristo, ¹⁰ tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'. ¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá ládxi'li'. ¹³ Ráta'yutu' loli' ca', gunli' légaquië' bal lu yöl-la' nadxí'i queëli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lëasca' caní richízatu' icja nágali', böchi' luzá'atu', para usá'ali' ládxi'gaca nupa biti' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa biti' naca tsutsu ca ta'yéajlë' Cristo, en gácali' nöxaj ládxi' lógaca yúgu'të bönachi.

¹⁵ Guli'gún chi'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'gúí' ládxi'li' gúntica'sili' le naca dxi'a que luzá'ali' tuli' ia'tuli', en quegaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guíë' Lë': "Xclenu'."

Caní ral-la' gunli' ni'a que yúgu'të le raca queëli', tu' nácgaca lë ni le rë'ënë' Dios gunli' tu' nácali' queë' Jesucristo.

¹⁹ Biti' uzóa dxili' le rulídzatica'së' Dios Bö' Lá'ayi libí'ili'.

²⁰ Biti' uzóali' tsölá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Biti' bi gútsa'li' le ruá' dö'.

²³ Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntú nu gaca bi innë queëli' dza ni' huödë' Xanru' Jesucristo. ²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu në'ë Dios

²⁵ Böchi' luzá'atu', buli'lidzë' Dios, en inábili'-në' gácalenë' netu'.

²⁶ Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

²⁷ Ni'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

²⁸ Rinábida'-në' Xanru' Jesucristo uzá' ládxë'ë queéli' le nácagaca dxi'a queë'.
¡Ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guíetica'stu'-në' Dios: "Xclenu" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tuli' ia'tuli' zeaj rácarö idú. ⁴ Que lë ni na', len yöl-la' rudzeja rigúxjö'ötu' ca naca queëli' lógaca bönachi queë' Dios ni, tu' ribözali' zxön ladxi', en réajlë'ëli' Dios sal-la' ta'bíada' ládxi'gaca bönachi libí'ili', en riguí' rizáca'da'ali', pero ruá' rilenli' yúgu'të. ⁵ Yugu' lë ni taca bë' naca tsahui' ca ruchí'a rusöröë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí' ila'zaca' nupa na'. ⁷ Ia'stú, libí'ili' riguí' rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'. ⁸ Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbë'gaca Dios, en biti' túngaca ca rnna didza' dxi'a queë' Xanru' Jesucristo. ⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. ¹⁰ Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí' ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni. ¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', ² para cabí güi'ili' lataj nu gun chixi libí'ili' ca nácagaca le guzxí' lu ná'ali'. Biti' cuéqui böniga icja ládxi'do'oli' ni'a que bi ta'nnë' bönni' ta'zí' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tuí' bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." ³ Biti' ca' güi'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. ⁴ Bönni' ni uzáguë'ë, ate' lu yöl-la' run ba zxön cuinë'

tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. ⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsëpi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. ¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu në'eguequi idú ládxi'guequi le naca idútë li, para ulu'láguequi. ¹¹ Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. ¹² Caní gaca para ila'baga' xíguia' yúgu'të nupa biti' gula'yéajlë' le naca idútë li, pero gula'yaza ládxi'gaca le cabí naca tsahui'.

Nupa gurö cazë' Dios para ulu'lágaca

¹³ Böchi' luzá'atu', libí'ili' na' nadxí'inë' Xanru' libí'ili', ral-la' guíëtica'stu'-në' Dios: "Xclenu" ni'a que le naca queëli', tu' chigurö cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. ¹⁴ Para gaca caní queëli', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'. Caní gaca ni'a que didza' dxi'a runtu' libán que.

¹⁵ Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bë'lentu' libí'ili', en buzúajtu' queëli' lu guichi. ¹⁶⁻¹⁷ Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhuí' zxöntica'sö rë'u, en le naca dxi'a runru' löza, yugu' lë na' buzá' ládxi'ë' Dios queëru'.

3

Le ral-la' inábiru'-në' Dios

¹ Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. ² Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios. ³ Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'. ⁴ Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'. ⁵ Rinábitu'-në' Xanru' usë'ë ládxi'li' para idxí'ili'-në' Dios, en cözali' zxön ladxi' ca na' benë' Cristo.

Ca run bayudxi gunru' dxin

⁶ Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'. ⁷ Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. ⁸ Biti' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le ruluí'i libí'ili' ca ral-la' gunli', sal-la' dë lu na'tu' inábatu' bi gunli' queëtu'. ¹⁰ Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rë'ënë' nu bönni' gunë' dxin, biti'

güí'ili' le gahuë'." ¹¹ Canísö rnnatu' tu' riyõnitu' nútsa'gaquië' ladjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nnë'. ¹² Ní'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quegacasë'.

¹³ Na'a, böchi' luzá'atu', biti' soa dxili', gúntica'sili' le naca dxi'a. ¹⁴ Channö núti'tës bönni' biti' gunë' ca rnna xtídza'tu', le ruzúajtu' lu guichi ni, guli'gún ga gaca bë'ë bönni' na', en biti' gunli' tsözxõn lë' para utuí'inë'. ¹⁵ Biti' ral-la' ilé'eli'-në' ca tu bönni' biti' rilé'enë' libí'ili' dxi'a, pero guli'sá' ladxë'ë ca böchi' cázali'.

Pablo rigu'ë lu në'ë Dios yugu' böchi'ru' nacu'ë Tesalónica

¹⁶ Rinábitu'-në' Xanru' gúntica'së' ga cuía dxi icja ladxí'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ladxí'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risöl-la'a. Canísö ruzúaja' lu guichi. ¹⁸ ¡Le ruzá' ladxë'ë Xanru' Jesucristo queëru' gaca queëli' yúgu'tëli'! ¡Ca' gaca!

DIDZA' ZÍ'ALÖ GUSÖL-LË'Ë PABLO QUEËBI' BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusölá rë'u, enca' tu' gunná bë'ë caní Xanru' Jesucristo, Nu na' runru' löza. ² Rugapa' Dios li', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá láchxë'ë quiu', en huéchi' láchxë'ë li', en gunë' ga soa dxi icja láchxi'do'o.

Pablo rusë'ë láchxi'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö, ⁴ en cabí ilunë' zxön yugu' didza' ridasö, en lágaca ziantërö cö' xuz xtó'ogaca bönachi, yugu' le tun ga tu'i láchxi'gaca bönachi le nácagaca nítisö. Yugu' le caní biti' tun tsutsu bönachi queë' Dios ca naca le ta'yéajlë' Lë'.

⁵ Le rë'ëni gun lë ni rea' li', naca para ila'dxi'i bönachi luzë'eguequi, naca idú láchxi'gaca, en gaca dxi'a le ta'zá' láchxi'gaca, en gaca idú le ta'yéajlë' Dios. ⁶ Ca nácagaca lë ni, biti' bulu'rúajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le biti' nácate. ⁷ Té'ënnë' ulu'sédinë' bönachi ca naca le rinná bë' xibá queë' Dios, sal-la' biti' ta'yéajni'inë' lë na' tu'sédinë', en biti' ta'yéajni'inë' le ta'nnë' nácate.

⁸ Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun. ⁹ Lë ni nöziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bë' xibá na'.

Nupa biti' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa biti' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

¹⁰ Nupa tun le ruá' dö'.

Yugu' bönni' naca'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácate.

Nupa ta'dá'baga yugu' xibá tsahui'.

¹¹ Nöziru' naca caní tu' bidxín queëru' didza' dxi'a buzá' láchxë'ë Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu'" tu' buéchi' láchxë'ë lë'

¹² Rea'-në' Xanru' Jesucristo, Nu rutipa láchxa'a, "Xclenu'" tu' buzxöni láchxë'ë neda', en buzóë' neda' guna' xichinë'. ¹³ Caní benë' sal-la' zí'alö neda' gunné' zi'a queë', en gudxía láchxa'a bönachi queë', en zían le bi'a dö' quëguequi, pero Cristo buéchi' láchxë'ë neda', tu' bena' caní lu yöl-la' biti' réajni'i quia' cate' ni' biti' réajlë'ënida' Lë'. ¹⁴ Na'a, zxöntërö naca le buzá' láchxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' idütë li lë ni, en le naca lesaca' ila'zì' lu ná'agaca yúgu'të bönachi, le rnna: Lë cazë' Jesucristo bidë' yödzölió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi. ¹⁶ Que lë ni na' buéchi' lãdxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön lãdxi' idú queë', para gaca' tu le rulu'í' lógaca nupa ila'yéajlë' Lë', en gata' quéguequi yöl-la' na'bán idú. ¹⁷ Na'a rnnía': ¡Yöl-la' ba Dios, Nu rinná' bë'tica'sö, Nu catu caz údxi' que, en Nu biti' gaca ilé'eru', la's dui Dios Nu nözi caz yúgu'të! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú lãdxë'ë rejë' gudil-la, en para uzi'u xibé yugu' le gula'guíxjö' zì'alö nupa ni' gulu'í' didza' uláz queë' Dios ca gaca quiu'. ¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja lãdxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zì'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja ná'agaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiëru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná' bë', en quégaca yúgu'të nupa ná'cagaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a lãdxi' queëru'. ³ Lë ni naca dxi'a, en le raza lãdxë'ë Dios, Nu rusólá' rë'u. ⁴ Dios caz rë'ënë' ulu'lágaca yúgu'të bönachi, en rë'ënë' ilúnbë'e le naca idütë li. ⁵ Tuzë' ná'quië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. ⁶ Lë cazë' budödi cuinë' lu yöl-la' guti, le benë' tu' nözi dul-la' nabá'aga'gaca yúgu'të bönachi. Dios benë' ba nalí queë' cate' bidxín dza queë' gútië'. ⁷ Ca naca lë ni, Dios buzóë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idütë li. Rilítëda', en biti' ca' rizí' yë'a.

⁸ Na'a, rë'ënda' ulu'lidzë' bönni' Dios, en iláta'yuë' lahuë' gáti'tës, ná'cagaquië' idú dxi'a, en cabí ila'lenë' luzá'agaquië', en cabí ila'dil-la' dídza'gaquië'. ⁹ Lësca' caní, rë'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj lãdxi', en le naca idú lãdxi', en calëga le tu'pá'asinu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lu'í' lahui le ná'cagacanu ca na' run le tá'cunu le naca ba'a. Caní ral-la' ilunnu nigula núnbë'gacanu Dios. ¹¹ Ral-la' ila'cuá'anu yugu' nigula dxisö cate' nu rusedi lé'gacanu, en ila'cuá'anu nöxaj. ¹² Biti' runna' yugu' nigula lataj ulu'sédinu, en calëga ila'nná' bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. ¹³ Caní ral-la' gaca, tu' buzóë' Dios zì'alö Adán, ate' gudödi na' buzóë'-nu Eva. ¹⁴ Adán na', biti' guzxí' ye'e tu' xihui' lë', pero nigula queë', guzxí' ye'e lënu. Caní guca, gudítsjanu xibá queë' Dios, ¹⁵ pero ulanu nu nigula ruzóanu-bi' bí'ido' channö gúntica'sinu ca röjölöz le réajlë'ëru' Dios, en yöl-la' nadxí'í, en channö gácanu idú dxi'a, en idú lãdxi'.

3

Ca ral-la' ilácagaquië' bönni' tapa chi'ë bönachi queë' Cristo

¹ Didza' idútë li lë ni rnna: Channö ruí'i láchxë'ë nu bönni' gáquië' nu gapa chi'i bönachi queë' Cristo, dxin dxi'a rizé láchxë'ë. ² Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi innë queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë böchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jë', en calëga bönni' sínia'.

Biti' gaquië' bönni' rizé láchxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídí'në'.

⁴ Ral-la' gáquië' bönni' rinná bé'enë' dxi'a bönachi nacua' lidxë'.

Ral-la' ilunbi' xzí'inë' ca rnna xtídzë'ë lu yöl-la' run bal xúzgcabi'.

⁵ ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacua' lidxë'? ⁶ Biti' ral-la' gáquië' tu bönni' si' gusí lahuë' të'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú láchxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé láchxi'së' dumí.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja láchxi'do'gaquië'.

¹⁰ Yugu' bönni' ni ral-la' si' bé'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë queëgaquië'. ¹¹ Lësca' caní, nigula que queëgaquië' ral-la' ila'cuá'anu idú láchxi'gacanu, en cabí ilácanu unnë que luzë'e. Ral-la' ilácanu zxön ladxi', en ilácanu li ladxi' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a xzí'inigaquië', enca' bönachi ulidxi que queëgaquië'. ¹³ Run bayudxi gaca caní, tu' ta'déli'në' lataj ga ilún bal bönachi xtídzá'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

Le bigachi' que le reaj láchxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'.

¹⁵ Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacua' lidxë' Dios, nupa nácgaca bönachi queë' Dios ban, en nácgaca tsutsu, en ta'guíxjö' dxi'a le naca idútë li. Nácgaca ca yugu' ya'zxön, en le nunída'gaca zö'ö, le nácgaca tsutsu, en ta'zön yu'u. ¹⁶ Le nácatë, zxöntërö naca le bigachi' que le reaj láchxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.
Dios buchisë' Lë' xitsá' ga nayëpisëtë'rë'.

4

Nupa ulu'huöaj lãdxi'gaca ca naca le réajlë'ëru'-në' Cristo

¹ Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huöaj lãdxi'gaquië' ca naca le réajlë'ëru' Cristo. Ulu'zë nãgagaquië' xtídza'gaca bönachi nacuá'len bö' ta'zì' yë' léguequi, ate' ulu'zë nãgagaquië' yugu' xibá quëguequi bö' xihui'. ² Ulu'zë nãgagaquië' xtídza'gaca bönachi tu'luí'sö tsahui' cuínguequi. Yugu' bönachi na' tuí' didza' le cabí nácatë, en chinazidi lãdxi'do'guequi, para cabí uxösa léguequi. ³ Caní naca, tu'záguë'ë xinözguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en té' Dios: "Xclenu" cate' tahuë' le. ⁴ Dxi'a naca yúgu'të le benë' Dios, en biti' bi ral-la' uzóaru' tsölá'alö channö ráguru' le, en rëru'-në' Dios: "Xclenu'." ⁵ Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. ⁷ Gurú'una yugu' didza' ridasö que yödzölió ca naca didza' tuí'inu' yugu' nigula gula. Béntica'sö le gun ga gacu' tsutsu para gunu' ca rë'ënë' Dios. ⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. ⁹ Didza' idútë li lë ni, en le naca lesaca' ila'zì' lu ná'agaca yúgu'të bönachi. ¹⁰ Que lë ni na', rusáca'da' zì' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zì' xibé le benë' nupa na' ta'yéajlë' Lë'.

¹¹ Gunná be'e, en busedi bönachi ilún yugu' lë ni. ¹² Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le ulu'í' nupa ta'yéajlë' Dios ral-la' ilún ca runu' li'. Caní ulu'í'inu' légaquië':

Len didza' ru'u, en len le runu'.

Ca nadxí'inu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bë'tica'sö lãdxi' ulabu' guichi lá'ayi lógaca bönachi nacuá' ga ni' zu'. Guchiza icja nãgagaquië' lë ni, en busedi légaquië'.

¹⁴ Biti' udödu' cá'asö le buzá' lãdxë'ë Dios quiu', lë na' bennë' quiu' ca na' gula'nná nupa ni' gulu'í' didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

¹⁵ Béntica'sö yugu' lë ni. Bë'tica'sö lãdxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

5

Ca ral-la' gunbi' Timoteo ni'a quëgaca bönachi queë' Cristo

¹ Biti' uzenu' bach yugu' bönni' gula, pero guchiza icja nãgagaquië' didza', tsca nãcagaquië' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' casu'.

² Guchiza icja nágagacanu nigula gula didza', tsca nácagacanu xiná' casu'.

Guchiza icja nágagacabi' bi'i nigula ra'bán didza', tsca nácagacabi' bi'i zan casu', ca na' röjlöz le naca idú dxi'a.

³ Ben bal yugu' nigula ba guti bönni' que queégacanu, nácagacanu túzinu.

⁴ Channö zóanu tu nigula caní nacuá'abi' bi'i queénu o zxi'ini xi'sóanu, ralla' ila'zédabi' ilunbi' ca ré'ëné' Dios, para ilácalenbi' zí'alö bönachi nacuá' lídxigacabi', en ulu'bí'ibi' quégaquié' xuz xiná'agacabi'. Lë ni naca dxi'a, en le raza ládxë'e Dios. ⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatica'sinu lahué' Dios, en rulídzanu Lë' ni'a quégaca bönachi queé', ⁶ pero nigula túzinu na' runnu ca naca le rizé' ládxi'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e bönachi nacuá' ga ni' zu', para ilún ca sa'yéaj yugu' lë ni, para ilaca bönachi cuntunu gaca bi inné' quéguequi. ⁸ Channö zoa nu bönni' cabí rugahué' yugu' di'a dza queé', en le nácarö lo, channö cabí rugahué' bönachi nacuá' lidxë', chigudá'baguë'e le réajlë'ëru' Cristo, en nácaré' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queénu para sóalennu-në' ia'tué' bönni'. ¹⁰ Run bayudxi soa nu gun ba nalí queénu ca nácagaca le dxi'a runnu.

Gácalenli'-nu channö buscúlunu-bi' yugu' bí'ido', en channö ru'ínu ga ila'cuá' böchi'ru' zá'gaquié' yödzö zi'tu', en channö ru'ínu le ilë'aj ilágugaca bönachi queé' Dios, en channö rácalennu nupa ta'gu'i ta'zaca', en channö rúntica'sinu yúgu'të le naca dxi'a.

¹¹ Yugu' nigula túzinu biti' yu'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. ¹² Caní gaca, ila'bága'nu dul-la' tu' tu'zóanu tsólá'alö le gula'yéajlë'ënu Cristo zí'alö. ¹³ Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. ¹⁴ Que lë ni na', ré'ënda' ulu'tsaga ná'agacanu leyúbölö nigula túzinu caní yú'ugacanu iz cuidi', en ulu'scúlanu-bi' yugu' bí'ido', en ila'nná bé'enu bi'i nacuá'abi' yu'u que queégacanu, para cabí iluí'ínu nu ridá'baga' rë'u lataj bi inné' queëru', rë'u na' réajlë'ëru' Cristo. ¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶ Channö núti'tës bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen légacanu, para cabí ulu'saca' zi' bönachi queé' Cristo. Caní gaca, bönachi queé' Cristo na' gaca ilácalen yugu' nigula nagá'anagacanu túzinu.

¹⁷ Benrö bal yugu' bönni' gula tapa chi'ë bönachi queé' Cristo, yugu' bönni' na' ta'nná bë'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi. ¹⁸ Nazúaj lu guichi lá'ayi le rnna: "Biti' cu'u du ruá'aba' bëdxi na' rulíbiba' zxoá' xtila." Rnna ca': "Náquié' lesaca' nu bönni' huen dxin si'ë lazxië'."

¹⁹ Biti' si' lu no'o didza' ru'i nu ruzegui didza' tu bönni' gula rapa chi'ë bönachi queé' Cristo, channö cabí nacuá' chopá tsonna nupa tun ba nalí que le benë'. ²⁰ Nupa túntica'sö dul-la', busidxi léguequi lógaca yúgu'të bönachi queé' Cristo para iladxi ia'zíca'rö bönachi ni' Dios. ²¹ Ni'a queé' Xanru' Dios, en Xanru' Jesucristo, en ni'a quégaquié' gubáz lá'ayi rö queé', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en biti'

gunu' bal tuzë' bönni'. ²² Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

²³ Bítirö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

²⁴ Yugu' dul-la' quéguequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios léguequi, ate' tōdi ni' ila'lá' lahui dul-la' nabága'gaca ia'zica'rö bönachi. ²⁵ Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

¹ Yúgu'të bönni' nadó'ogaca ral-la' ilúndë'ë bal xángaqüë', para cabí gaca nu innë' zí' que La lá'ayi queë' Dios, en que xibá queë'. ² Nupa ni' nacu'ë xángaca ta'yéajlë'ë Cristo, bití' ral-la' ulu'cá'ana cá'asö légaquië' tu' nácagaquië' böchi'guequi. Ral-la' ilunrö dxi'a xichíngaqüë' tu' ta'yéajlë'ë Cristo, bönni' ni' tu'zì'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacuá' ni', en guchiza le icja nágagaquië'.

Le reaj ládxi'ru'-në' Dios le ruzí'iru' xibé

³ Channö zoa nu bönni' rusëdinë' xibá yúbölö, en bití' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios, ⁴ bönni' ni run ba zxön cuinë', en bití' bi nözinë'. Didza' bití' naca dxi'a rizé ládxi'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nnë' zì' bönachi que luzë'eguequi, en ta'zá' ládxi'gaca que luzë'eguequi le cabí nácate. ⁵ Lësca' caní tun ga ta'díl-latica'së' didza' bönni' bití' ta'yéajni'inë', nupa bití' nazí' lu në'eguequi le naca idútë' li. Téquini huáca ila'zì' dumí' zían channö ilúngaca tsözxön nupa ta'yéaj ládxi'gaca Dios. Gucuíta ga nacuá' bönachi caní. ⁶ Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-në' Dios. ⁷ Bití' bi nuá'aru' cate' ridxinru' yödzölió, en lësca' caní, bití' bi uá'aru' cate' uzá'aru' yödzölió ni. ⁸ Que lë ni na', channö dësö queëru' le gáguru', en le gácuru', ral-la' udzéjaru'. ⁹ Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' bití' bi nözi quégaquië' zían le ila'zë ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítie' tsaz. ¹⁰ Tu' ta'zë ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zì' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní. Bë'tica'sö ládxi'u'u gunu' le naca tsahui', en le rë'ënë' Dios. Guyéajlë'tica'së' Cristo, en bidxí'i yugu' luzó'o.

Bë' ladxi' gacu' zxön ladxi', en nöxaj ladxi'.

¹² Ca runë' tu bönni' idú ládxi'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. ¹³⁻¹⁴ Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunnë' yálajdo' lahuë' Poncio Pilato, rinná bé'eda' li' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en bití' bi gunu' le güi' lataj nu bi innë' quiu', ga idxintë dza ni'

ulu'i lahuë' Xanru' Jesucristo. ¹⁵ Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácacaca xan!

¹⁶ ¡Tuzë' Lë' zóatica'së'!

¡Zoë' lu bení' ga bití' gaca nu idxín rácasö que!

¡Catu caz nu bilé'e Lë', en bití' gaca nu ilé'e Lë'!

¡Queë' Lë' gácatíca'sö le run Lë' bal, en yöl-la' unná bë'!

¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaquië', en para cabí ulu'zxöni ládxi'gaquië' yöl-la' tsahui' na' bití' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! ¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'i ládxi'gaquië' léguequi. ¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Böcha'ado' Timoteo, ben chi'i le nadödi lu no'o. Gucuíta ga nacué' nupa tuí'i didza' cá'asö, en yugu' didza' bití' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun. ²¹ Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxi'ë quiu' le nácacaca dxi'a queë'.

¡Ca' gaca!

DIDZA' BUROPI GUSÖL-LË'Ë PABLO QUEËBI BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Cristo. Caní naca' tu' rë'ënë' Dios gaca' caní, para caní gaca le guxzí' lu në'ë, gunnë' queëru' yöl-la' na'bán idú, le ruzá' ládxe'ë Jesucristo queëru'. ² Rugapa' Dios li', böcha'ado' Timoteo. Nacu' ca zxi'ini caza' tu' benru' tu' zxon xichinë' Cristo, ate' nadxi'ida' li'. Rinábida'-në' Xúziru' Dios, enca' Xanru' Jesucristo, uzá' ládxe'ë quiu', en huéchi' ládxe'ë li', en gunë' ga cö' dxi' icja ládxi'do'o.

Timoteo ral-la' gunbi' ba nalí queë' Jesucristo

³ Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú ládxa'a ca na' gulunë' xuz xtá'ahua'. ⁴ Cate' röjneda' ca na' gurödxu', rizé ládxa'a ulé'eda' li', para gaca udzëjada' idú ládxa'a. ⁵ Rea'-në' Dios: "Xclenu'" tu' zoa le run ga röjneda' ca réajlë'u Cristo idú ládxi'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alö ca li', ate' runa' löza, lësca' caní réajlë'u Lë' na'a.

⁶ Tu' naca caní, rusá'a ládxi'u para usubanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios. ⁷ Bö' na' bennë' Dios queëru' bití' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. ⁸ Que lë ni na', bití' utuí'inu' gunu' ba nalí queë' Xanru', en bití' utuí'inu' ca raca quia' neda' ni, nadzuna' lidxi guíë tu' runa' xichinë', pero ben tsözxön nupa ta'guí' ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní. ⁹ Dios caz busölë' rë'u, en bulidzë' rë'u para gácaru' idú dxi'a. Bití' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' ládxe'ë caní queëru'. Dza ni'te buzóë' caní queëru' zí'atëlö ca guta' yödzölió ni, tu' néquiru' queë' Jesucristo. ¹⁰ Na'a, chibulú'i lahui le ruzá' ládxe'ë Dios queëru', tu' bulú'i lahuë' Jesucristo Nu rusólá rë'u. Bugúë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rna didza' dxi'a.

¹¹ Cristo buzóë' neda' para guna' libán que didza' dxi'a na', en para gaca' gubáz queë' para usédigacada' bönachi izá'a. ¹² Que lë ni na' riguí' rizáca'a ca' yugu' le raca quia' ni, pero bití' rutuí'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chi'ë le budöda' lu në'ë ga idxintë dza ni huödë'.

¹³ Didza' dxi'a na' biyönnu' bena' libán que ral-la' gaca quiu' tu le ruluí' ca ral-la' usédinu' bönachi ca réajlë'ëru' Jesucristo, en ca nadxi'iru' Lë'. ¹⁴ Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

¹⁵ Chinöz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni. ¹⁶⁻¹⁷ Rinábida'-në' Xanru' Dios huéchi' ládxe'ë bönachi nacuá' lidxë' Onesíforo, tu' butipë' ládxa'a bönni' ni zían luzuí. Cate' bidxinë' Roma, idú ládxe'ë buguiljë' neda', ate' budzölinë' neda'. Bití' butuí'inë' ni'a quia' neda' tu' nadzuna' lidxi guíë ni, nága'a du guíë. ¹⁸ Rinábida'-në' Xanru' huéchi'

ládxë'ë lë' dza ni' idxinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' guzóaru' yödzö Éfeso.

2

Ral-la' gácabi' Timoteo ca tu bönni' idú ládxë'ë rejë' gudil-la

¹ Na'a, zxi'ina'do', butipa ládxu'u ca naca le ruzá' ládxë'ë Jesucristo quiu'.
² Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxë'ë rejë' gudil-la. ⁴ Nu bönni' rejë' gudil-la, biti' ca' gútsë'ë yugu' le tun bönachi yödzölió ni, para tsaza ládxë'ë bönni' na' nuzóë' lë' gáquië' bönni' queë' rejë' gudil-la. ⁵ Lësca' caní, nu nutsa' lu huitaj, biti' bi ideli' channö cabí run ca ral-la' gun. ⁶ Nu bönni' gúz gú'una runë' dxin, zí'aló lë' uzi'ë xibé lë na' razë'. ⁷ Busá' ládxu'u lë ni rea' li', ate' Xanru' caz gunë' ga tséajni'inu' yúgu'të.

⁸ Yöjné ca guca queë' Jesucristo. Guljë', en gúquië' zxi'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que.

⁹ Tu' runa' libán que didza' dxi'a, riguí'i rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero biti' ca' nága'të xtídzë'ë Dios. ¹⁰ Que lë ni na' ruá' riléna' yúgu'të lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. ¹¹ Catëz naca lë ni rna:

Channö nátilenru' Lë', sóalenru'-në' ca' ibanru'.

¹² Channö guá' ilenru' le quí'i sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' biti' runru' ca rnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴ Busá' ládxigaca nupa nacua' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácagaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi.

¹⁵ Bë'tica'sö ládxu'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxi'ado' ral-la' ugunu' dxin didza' idútë li.

¹⁶ Na'a, gucuíta ga nacua' nupa tuí'i didza' biti' nazaca', en didza' cá'asö, tu' tun didza' caní ga ilunrë' le cabí rë'enë' Dios. ¹⁷ Ila'zë didza' tu'ë ca rizxön huë' nudzu' le ridúdu' rilá. Himeneo, en Fileto nabábagaquië' nupa tuí'i didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baröli bal-la bönachi ga ridxintë bítirö ta'yéajlë' Cristo. ¹⁹ Le benë' tsutsu Dios zóatica'sö, en dë tu le naca bë', le rna: "Núnbë'ë Dios nupa néquiquequi queë'." Rna ca': "Gulí'cuíta ga raca le ruá' dö', yúgu'tëli' libí'ili' néquili' queë' Cristo."

²⁰ Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. ²¹ Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

²² Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxí'ado'. Ca nácagaca lë ni,

ben tsözxön nupa tu'lidza Xanru', naca idú dxi'a icja ládxi'do'guequi. ²³ Na'a, gurú'una yugu' didza' cá'asö, en didza' biti' nazaca', tu' chinöz quézinu' tun didza' caní ga ta'dil-la didza' bönachi. ²⁴ Bönni' huen dxin queë' Xanru' biti' ral-la' tíl-lalenë' bönachi didza', pero ral-la' gáquië' nöxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'. ²⁵ Lu yöl-la' nöxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbë'ë le naca idútë li. ²⁶ Caní ulu'lë' lu yalaj que tu' xihui' ga nadzúngaquië', ate' ulu'huóaquië' tsahui' para ilunë' ca rë'ënë' Dios.

3

Ca ilaca bönachi dza tsöjsëtëgaca

¹ Lësca' ral-la' inözinu' lë ni: Dza tsöjsëtëgaca ilaca dza ila'guí'i ila'zaca' bönachi. ² Yugu' dza ni' ila'cu'ë bönni' ilácagaquië' caní: Ila'dxí'i la' cuíngacasë', en ulu'huídi'në'.

Ilún ba zxön cuíngaquië', en ulu'luí'i cuíngaquië' zxön.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca rë'ënë' Dios.

³ Biti' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Biti' ila'nná be'e cuíngaquië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

⁴ Ilácagaquië' hueti luzé'e, en biti' ila'dzáguië' dxi'a.

Ulu'luí'i cuíngaquië' ca bönni' nayëpisëgaquië'.

Ila'dxí'inë' le ila'yázaso ládxi'gaquië', en calëga Dios.

⁵ Ulu'luí'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacuá' bönachi caní. ⁶ Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula biti' bi nözguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en ilu'í'i ládxi'gacanu yugu' le ila'zësö ládxi'gacanu le cabí nazaca'.

⁷ Ila'yönitica'sinu nigula ni didza' ilún libán que bönachi, pero biti' ca' ila'déli'nu ila'yéajni'ininu le naca idútë li. ⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. ⁹ Biti' ila'déli'rönë', pero gaca bë' nácagaquië' bönni' biti' bi nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bí'i Timoteo

¹⁰ Nöz quézinu' ca naca le rusévida' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'. ¹¹ Nözinu' ca' yugu' le gula'bía ládxi'gaca bönachi neda', en yugu' le gudí'i guzácaca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. ¹² Yúgu'të nupa tē'ëni ilaca idú dxi'a tu' néquiquequi queë' Jesucristo, lësca' ila'guí'i ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zì' yè'è ilácarè' xihui'. Ila'zì' yé'enè' bönachi, ate' ila'zì' ye'e bönachi ca' légaquiè'.

¹⁴ Na'a, ben chi'i yugu' le buzèdu', en le guzxi' lu no'o, tu' nunbè' casu' nupa bulu'sedi li'. ¹⁵ Ga gudela' nacu' bí'ido' núnbè'u le nazúajgaca lu guichi lá'ayi, le huáca ulu'zèajni'ide'e li' para uló' tu' réajlè'u Jesucristo. ¹⁶ Yúgu'tè le nazúajgaca lu guichi lá'ayi guchíziè' Dios icja ládxi'do'gaca bönachi queè', nupa na' bulu'zúaj lu guichi didza' na' bè'è Dios. Lè na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu' nōza, en usedi rë'u para gácaru' tsahui'. ¹⁷ Caní run, para gaca sina' nu naca queè' Dios, en gácada' gun yúgu'tè le naca dxi'a.

4

¹⁻² Ni'a queè' Xanru' Dios, enca' Xanru' Jesucristo, rinná bé'eda' li' gunu' libán que xtídzè'è Xanru'. Lè cazè' uchi'a usöröè' nupa ni nabángaca, en nupa chinátigaca, dza ni' huödè' idinná bè'è. Bè' ladxi' gunu' lè ni channö raca dxi'a quiu' o bitì' raca dxi'a. Lu yöl-la' zxon ladxi', guléaj ga liná' le tun bönachi. Busá' ládxi'gaquiè', en guchiza icja nágagaquiè' ca naca lè na' rusédiru'. ³ Caní ral-la' gunu' tu' idxín dza cate' bitì' ulu'zè nágagaquiè' xibá tsahui', pero ilé'ëninè' ila'yönnè' le ta'dánisinè'. Ca ta'zèsö ládxi'gaquiè' ulu'tubè' quégaquiè' nupa ulu'sedi légaquiè'. ⁴ Ulu'cá'anè' le naca idútè li, en ila'zì' lu ná'agaquiè' yugu' didza' ridasö. ⁵ Na'a, ral-la' gacu' zxon ladxi' lu yúgu'tè le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödè' Cristo lu no'o gunu'.

⁶ Ca naca quia' neda', nudödi cuina' lu nè'è Dios, ate' chizóa ilútiè' neda' tu' runa' xichinè', ate' dza uzá'a yödzölió ni chizóa idxín. ⁷ Ca runè' tu bönni' idú ládxi'è rejè' gudil-la, lësca' caní bena' neda' dxin, en chibudxi bena' le budödè' Cristo lu na'a guna', tu' bena' idú ca sa'yéaj le réajlè'èru' Cristo. ⁸ Ia'stú, naca löza quia' idéli'da' le ral-la' ila'zì' nupa nácagaca tsahui', le gunnè' Xanru' quia' dza ni', ate' tsahui' naca ca ruchi'a rusöröè' rë'u. Calégasö quia' neda' gunnè' le, pero lësca' gunnè' le quégaca yúgu'tè nupa ta'dxí'i Lè', en idú ládxi'guequi ta'böza dza huödè'.

Le buzúajè' lu guichi Pablo gunbi' Timoteo

⁹ Bè' ladxi' guídateo' ga ni zoa' ¹⁰ tu' guléaj ládxi'è Demas neda', tu' nadxí'inè' le ruzi'è xibé yödzölió ni, ate' guyijè' yödzö Tesalónica. Crescente guyijè' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunè'. ¹¹ Tuzè' Lucas zóalenè' neda'. Guchè'è-bi' bi'i Marcos para guídalenbi' li' tsözxön, tu' nácabi' gúnlenbi' neda' tsözxön xichinè' Cristo. ¹² Gusöl-la'a-bi' bi'i Tíquico lu yödzö Éfeso. ¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxè' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubèdxi guíè, zían le bi'è dö' quia'. Lè cazè' Xanru' ubi'è queè' ca nácagaca le benè' bönni' ni quia'. ¹⁵ Ben chi'i cuinu' queè' bönni' ni, tu' ridá'baga'dè'è didza' runru' libán que.

¹⁶ Cate' le zí'alö luzuí bidxina' lógaquiè' bönni' yúlalui', cuntu nu gúcalen neda', pero bulu'béaj ládxi'gaca yúgu'tè bönachi neda'. Bitì' rë'ènda' uzì' lèbè' Dios légaquiè'. ¹⁷ Guzóalenè' Xanru' neda', en butipè' ládxi'a para údxi guna' libán que xtídzè'è para ila'yöni yúgu'tè bönachi izá'a le. Caní guca, busölè' Xanru' neda', ate' guca quia' tsca burúaja' lu ruá'aba' bèdxi guixi'. ¹⁸ Lè cazè' Xanru' usölè' neda' lu yúgu'tè le cabí raca dxi'a, en gun chi'è neda' ga idxíntea' ga rinná bè'è Lè' ni' yehua' yubá. ¡Gácatíca'sö queè' yöl-la' ba yúgu'tè dza zá'gaca! ¡Ca' gaca!

Pablo rugapë' Dios bönachi queë' Cristo

- ¹⁹ Bugapa Dios Priscila, en Aquilo, enca' bönachi nacua' lidxë' Onesíforo.
²⁰ Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. ²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.
²² Rinábida'-në' Xanru' Jesucristo sóalenë' li'. ¡Gácalen li' le ruzá' ladxë'ë Dios quiu'! ¡Ca' gaca!

DIDZA' GUSÖL-LĚ'Ě PABLO QUEĚBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lë'ë Jesucristo. Gusöl-lë'ë neda' para guna' ga ila'yéajlë' bönachi chigurö cazë' Dios, para ulu'únbë' le naca idútë li ca ral-la' gun nu nunbë' Dios. ² Caní naca' tu' runa' löza uzi'a xibé yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusi' lo rata' yúgu'të le dë, ate' run cazë' Lë' le nazí' lu në'ë gunë'. ³ Cate' bidxin dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busölá rë'u, neda'. ⁴ Rugapa' Dios li', böcha'ado' Tito. Nacu' idú zxi'ini caza' tu' naca lëbisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

Dxin queë' Cristo runbi' bi'i Tito luyú Creta

⁵ Que lë ni na' buca'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacua' tu tu yödzö ni', ca na' chigunná bé'eda' li' gunu'. ⁶ Nu bönni' gula rapa chi'ë bönachi queë' Cristo ral-la' gáquië':

Bönni' cuntu nu bi gaca innë queë'.

Zoa túzinu nigula queë'.

Yugu' zxi'inë' ral-la' ila'yéajlë'ëbi' Cristo.

Biti' soa nu gaca innë quégacabi' ta'dá dzágasibi' ca',

o ta'dá'baga'bi' xuz xiná'agacabi'.

⁷ Nu bönni' rapa chi'ë bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribízxjanë',

o bönni' rizé ládxi'së' dumí.

⁸ Ral-la' gu'ë ga ila'cu'ë böchi'ru' ta'dxinë' lidxë'.

Ral-la' së ládxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

⁹ Ral-la' gun chi'ë didza' idútë li ca chinazëdë',

para gaca ichízië' icja nágagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

¹⁰ Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío. ¹¹ Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

¹² Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégacachië', gunnë': "Ta'zí' yé'tica'së' bönni' Creta, en nácagaquië' ca böa' gu'a sínia'. Nácagaquië' bönni' huágulë'ë xöhuëdi." ¹³ Didza' ni benë' ba nalí quégacachië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, ¹⁴ en para cabí ulu'zë nágagaquië' yugu' didza' ridasö quégacachië' bönni' judío, en biti' ilunë' ca ta'nná bë' bönachi núcá'anagaca le naca idútë li.

¹⁵ Yúgu'tè naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca. ¹⁶ Ta'nnë' núnbë'gaquië' Dios, pero le túngaquië' biti' röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

2

Xibá dxi'a le ral-la' usëdiru'

¹ Na'a, ral-la' gu'u didza' le röjlöz xibá dxi'a.

² Busedi yugu' bönni' gula:

Biti' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxön ladxi'.

³ Busedi yugu' nigula gula:

Ilunnu le raza ládxië'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi' para ila'dxi'inu bönni' que queégacanu, enca' zxí'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxi'gacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu innë' zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

⁷ Ral-la' gúntica'su' le naca dxi'a,

uluí'inu' bönachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi innë' que.

Caní gunu' ga utuí'inë' bönni' ridá'baguë'ë, en biti' gaca bi innë' queëli' runli' le ruá' dö'.

⁹ Busedi böchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nöxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Biti' ral-la' tá'baga'gaquië' le ta'nná bë'ë.

¹⁰ Biti' bi ulu'cáchi'lanë'.

Ral-la' ulu'lu'i cuíngaquië' tsahui' ca naca yúgu'të le tunë'.

Caní ulu'i lo naca dxi'a xibá queë' Dios, Nu busölá rë'u.

¹¹ Cristo, bönni' na' buzá' ládxië'ë Dios queëru' chibulu'i lahuë' lógaca yúgu'të bönachi para ulu'lágaca. ¹² Lë' rusédinë' rë'u ucá'anaru' le cabí raza ládxië'ë Dios, en cabí së ládxi'ru' le naca que yödzölió ni, pero cözaru' zxön ladxi', en gácaru' tsahui' dza ni zóaru' na'a, en gunru' ca rë'ëni quézinë' Dios.

¹³ Ral-la' cözaru' le runru' löza le gun ga gácaru' bica' ba, lë na' gaca dza ni' cate' ulu'i lahuë' Jesucristo lu bení' idú queë'. Náquië' Dios zxön, Nu rusölá rë'u. ¹⁴ Lë cazë' budödi cuinë' uláz queëru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en gü'i ládxi'ru' gunru' le naca dxi'a.

¹⁵ Yugu' lë ni bë' didza', en guchiza icja nágagaca bönachi ni', ate' len yöl-la' unná bë' gudil-la léguequi. Béntica'sö caní, para cabí si' lataj nu ucá'ana cá'asö xtídzu'u.

3

Le ral-la' ilún bönachi ta'yéajlë' Cristo

¹ Busá' ládxi'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlahui', para ilunë' ca rnna xtídza'gaquië'. Ral-la' ila'cu'ë sina' ilunë' le naca dxi'a. ² Biti' bi le ruá' dö' ral-la' ila'nnë' que luzá'agaquië', en bití' ila'díl-lalenë' légaquië' didza', pero ral-la' ilácagaquië' nōxaj ladxi', en idú ladxi' lógaca yúgu'të bönachi.

³ Lësca' rë'u, zí'alö gúcaru' yugu' bönni' bití' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'eru' luzá'aru'. Bití' bila'lé'e bönachi rë'u dxi'a, ate' rë'u bití' bilé'eru' dxi'a luzá'aru' turu' ia'turu'. ⁴ Ní'irö bulu'e lahui Dios, Nu rusólá rë'u. Naca bë' náquië' idú dxi'a, en nadxí'inë' yúgu'të bönachi, ⁵ tu' busölé' rë'u, calëga tu' zoa bi le naca dxi'a benru' rë'u, pero tu' buéchi' ládxi'ë rë'u. Bunë' rë'u dxi'a, en benë' ga nácaru' bönachi cubi. Dios Bö' Lá'ayi rucubë' rë'u. ⁶ Dios gusól-lë'ë Dios Bö' Lá'ayi queëru' tu' néquiru' queë' Jesucristo, Nu rusólá rë'u. ⁷ Buzá' ládxi'ë queëru', en bunë' rë'u tsahui' para gata' yöl-la' na'bán idú queëru', le runru' löza gunnë' queëru'.

⁸ Didza' idútë li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para iluí' ládxi'gaquië' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zí' lu ná'agaca yúgu'të bönachi. ⁹ Na'a, bití' gu'u lataj nu gü'i didza' le cabí nazaca', o nu gü'i ladxi' ca nácagaca lágaca ziántërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

¹⁰ Channö zoa nu bönni' ni', rubéajë' choplö bönachi queë' Cristo, tödi usó'o ládxi'ë tu ia'tú luzuí, bubéajë' bönni' na'. ¹¹ Nöz quézinu' chiböáquië' caní nu bönni' bití' náquië' tsahui', en runë' dul-la'. Chinabáguë'ë xíguia' ni'a que lë na' runë'.

Le buzúajë' Pablo lu guichi le gunbi' bi' i Tito

¹² Cate' isól-la'a-në' Artemas o Tíquico ga zu', bë' ladxi' guídu' ga ni zoa' lu yödzö Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bönni' na' rudödë' didza' ca rinná bë' bönachi yúlahui', enca' Apolos, ila'dxinë' ga ni' zóali'. Bugú'u légaquië' nōza lu yöl-la' rácalen, para cabí bi yadzaj quégaquië'. ¹⁴ Busedi yugu' böchi' luzá'aru' ilúntica'së' le naca dxi'a, en bi ulu'nödzjé' quégaca nupa bi riyadzaj quéguequi, para gaca bë' caní le nácagaquië' queë' Cristo.

Pablo rugapë' Dios bönachi queë' Cristo

¹⁵ Yúgu'të nupa nacué'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ládxi'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. ² Rugapa' Dios Apia, nigula quiu'. Nácana zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu'dubë' lu yu'u lidxu'. ³ Rinábida'-në' Xúziru' Dios, enca' Xanru' Jesucristo, uzá' lãdxë'ë queëli', en gunë' ga soa dxi icja lãdxi'do'oli'.

Ca runë' Filemón tu' réajlë'ë Cristo

⁴ Rëtica'sa'-në' Dios queëru' "Xclenu'", en röjnética'sida' li' cate' rulidza'-në'. ⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'. ⁶ Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zì' xibé nupa nacuá' ni' yúgu'të le naca dxi'a, le ruzá' lãdxë'ë Jesucristo queëru'. ⁷ Rudzëjada', en ruzí' zxoná' tu' nadxí'inu' yugu' böchi'ru', en benu' li', böcha'a, ga bulu'huóaca lãdxi'gaca bönachi ta'yéajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu', ⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. ¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

¹¹ Bi'i ni, zí'aló biti' gúcabi' lesaca' quiu', pero na'a nácabi' lesaca' quiu' li', enca' quia' neda'. ¹² Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. ¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, ¹⁴ pero biti' bi' ré'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ëni quézinu' ca'. ¹⁵ Nadxi ca' que lë ni na' buzá'abi' Onésimo ga zu' tu' chí'ido' para udxinbi' tsaz ga zu'. ¹⁶ Na'a, bíti'rö gácabi' quiu' ca tu' bi'i nadó'o, pero gácabi' quiu' ca bi'i böchi'cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calëgasö ca böchi' luzó'o, pero lësca' ca bi'i böchu'u réajlë'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal. ¹⁸ Channö bi' xíguia' benbi' quiu' o channö bi' rál-la'bi' quiu', gunnátëz neda' ral-la'a. ¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quizzja' bi' rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. ²⁰ Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlë'a Cristo, ate' caní gunu' ga huóaca lãdxa'a.

²¹ Ruzúaja' quiu' lu guichi ni, tu' ruzxöni lãdxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'. ²² Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

Pablo ruzúajë' lu guichi le rugapa Dios Filemón

²³ Epafra, bönni' yú'ulenë' neda' tsözxön lidxi guë ni tu' runë' xichinë' Jesucristo, rugapë' Dios li'. ²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni tünlenë' neda' tsözxön dxin queë' Cristo.

²⁵ Rinábida'-në' Xanru' Jesucristo uzá' ládxë'ë queéli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bë'lenë' rë'u didza' lu ru'ë Zxí'ini cazë'

¹ Zián luzuí, en zián ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. ² Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. ³ Zxí'inë' na' náquië' ca tu le rulu'i lahui yöl-la' zxon queë' Dios, en ca náquië' Zxí'inë' rulu'i lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

Zxí'inë' Dios nayëpisëtërë' ca yugu' gubáz lá'ayi

⁴ Zxí'inë' Dios nayëpisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. ⁵ Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë':

Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

⁶ Lësca' caní, cate' Dios buzóë' Bi'i que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácaagaquië' gubáz lá'ayi queë', rnna:

Lë' runë' ga nácaagaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaagaquië' ca guí'.

⁸ Na'a, ca naca cazë' Zxí'inë', rnnë':

Ga rö'u rinná bë'u, inná bë'tica'su', Dios.

Tsahuí' naca ca rinná bë'u.

⁹ Nadxí'inu' le naca tsahuí', en calëga le ruá' dö'.

Que lë ni na' Dios budödë' lu no'o yöl-la' unná bë', en benë' ga ruzí'itëru' Li' xibé yöl-la' unná bë' ca le tu'z'í'i xibé luzó'o.

¹⁰ Lësca' caní rnnë':

Li', Xan, cate' gusí lo, benu' yödzölió,

ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itëbigaca ca ritëbi lari',

¹² en ca lari' utubu' léguequi, en utsó'o léguequi,

pero Li', catu caz utsá' cuinu'

en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxí'inë', gunnë':

Gurö'ö cuita lë'a ibëla

cate' gunra' ga ulu'zëchu zxíbigaca lo'

nupa biti' ta'lé'e Li' dxi'a.

¹⁴ Yúgu'të gubáz lá'ayi queë' Dios nácaagaquië' bö' huen dxin queë' Dios, ate' nasöl-lë'ë légaquië' para ilácalenë' nupa ni nulágaca.

2

Biti' ral-la' ucá'anaru' cá'asö yöl-la' rusölä

¹ Que lë ni na', ral-la' güi'í ládxi'röru' le chibiyöniru', para cabí gaca chopá ládxi'ru'. ² Guca bē' naca idútē li didza' na', le bidxín dza ni'te lu ná'agaquiē' gubáz lá'ayi queē' Dios, ate' yúgu'tē nupa gula'dödi bē' ca rna didza' na', en bití' gulún ca rna, Dios benē' léguequi xíguia' ca na' röjlöz le gulúngaca. ³ Lësca' caní bití' ca' uláru' rē'u lu xíguia' na' channö ucá'anaru' cá'asö yöl-la' rusölá ni, le benē' Lë cazē' Xanru' libán que zí'alö, ate' nupa bila'yöni Lë' bulu'lu'i rē'u naca idútē li. ⁴ Lësca' caní Dios caz benē' tsözxön légaquiē' ba nalí, tu' benē' le nácgaca bē', en le tun ga rubániru', en yugu' yöl-la' huáca zxön. Gudísiē' ca' yugu' le runödzejē' Dios Bō' Lá'ayi quegaquiē' tsca gú'uni quézinē' Dios.

Dios benē' ga böáquiē' Jesús idú ca nácaru' rē'u

⁵ Dios bití' budödē' yödzülió si' za' lu ná'agaquiē' gubáz lá'ayi que yehua' yubá queē', lë na' ruí'iru' didza' que. ⁶ Na'a, ca naca lë ni, nazúaj lu guichi lá'ayi didza' bē' nu run ba nalí le rna:

Dios, rubánide'eda' tu' ruí'í ládxi'u bönachi.

Rubánide'eda' tu' rácalenu' léguequi.

⁷ Ia'láti'sö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxön, en yöl-la' run bal,

en budödu' yúgu'tē le benu' Li' lu nē'eguequi.

⁸ Yúgu'tē budödu' lu nē'eguequi para ilá'nná be'e le.

Nazúaj lu guichi lá'ayi lë na' rna: "Budödu' lu nē'eguequi yúgu'tē." Bití' bi bucá'anē' le cabí budödē' lu nē'eguequi, pero ga ridxintē na'a dza, bití' rilé'eru' yu'u lu nē'eguequi yúgu'tē. ⁹ Réquibe'eru' le guca queē' Jesús. Tu chí'isö, Dios benē' ga böáquiē' ia'láti'sö cuidí' ca yugu' gubáz lá'ayi que yehua' yubá queē'. Guljē' bönachi para gútiē', ate' gudí'í guzáquē'ē Jesús lu yöl-la' guti uláz quégaca yúgu'tē bönachi, tu' buzá' ládxi'ē Dios queēru' caní. Tu' benē' Jesús caní, Dios benē' ga rata' queēru' yöl-la' zxön, en yöl-la' run bal.

¹⁰ Dios benē' yúgu'tē le rilé'eru', en runē' ga nacuá'tica'sö. Dios benē' ca ral-la' gunē' cate' benē' ga naca bē' náquiē' Cristo idú tsahui' ni'a que le gudí'í guzáquē'ē. Caní benē' Dios queē' Cristo, Nu bideli' yöl-la' rusölá para gaca ichē'ē bönachi zían yehua' yubá queē'. ¹¹ Cristo ruúnē' tsahui' bönachi para ilequi quez queē' Dios. Tuzē' náquiē' Xúzguequi nupa na' ruúnē' Cristo tsahui', en Xuz cazē'. Que lë ni na', bití' ca' rutu'ínē' Zxí'ínē' Dios cate' rnnē' nácgacaquiē' böchi' luzē'ē. ¹² Ca naca lë ni nazúaj lu guichi lá'ayi le rna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',

gul-la' yöl-la' ba quiu'.

¹³ Lësca' caní rnnē':

Uzxöni ládxa'a-nē' Dios.

Ga yúbölö nazúaj le rnnē':

¡Buli'yútsöca' neda', en yugu' zxi'ínē',

nupa na' Dios bennē' quia'!

¹⁴ Que lë ni na', tu' néquiguequinē' bëla' en rön yugu' zxi'ínē' na', lësca' caní Cristo ben cuiné' ca nácgacaquiē'. Guljē' bëla' en rön. Caní guljē' para guca gútiē', en caní guca busunítiē' yöl-la' huáca unná bē' que tu' xihuí', nu na' dë lu nē'e guti bönachi. ¹⁵ Caní benē' Cristo para guca busanē' yúgu'tē nupa gulaca ca bönni' nadó'ogaquiē' tsanni ni nacuá' nabángaca, tu' guladxi yöl-la' guti. ¹⁶ Naca bē' bití' benē' caní para gácalenē' yugu' gubáz lá'ayi que yehua' yubá queē' Dios, pero para gúcalenē' yugu' zxi'ini xi'sóē' Abraham. ¹⁷ Que lë ni na', ben bayudxi böáquiē' Cristo idú ca nácgacaquiē' böchi' luzē'ē na', para gáquiē' lahuē' Dios tu bixúz lo, tu bixúzi runē' ca rnnē', en ruhuéchi' ládxi'ē bönachi, enca' para gunē' le gun ga gata' lu nē'ē ugüē' dul-la' nabága'gaca bönachi.

¹⁸ Na'a, tu' gudí'i guzxaqué'e Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

3

Jesús nayëpisëtërë' ca Moisés

¹ Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasöl-lë'ë Dios, enca' bixúz lo que le nazi' lu ná'aru'. ² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. ³ Nayëpisëtërë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. ⁴ Yúgu'të yu'u, zoa nu ben le, pero Dios náquië' Nu ben yúgu'të le rilé'eru'. ⁵ Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nali' que didza' ral-la' gu'ë Dios, ⁶ pero Cristo runë' ca rnna xtídzë'ë Dios, en náquië' Zxí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzéjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷ Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyönili' didza' ru'ë Dios,

⁸ bití' gácali' zidi lu icja ládxi'do'oli' ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asö.

⁹ Gula'zí' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

¹⁰ Que lë ni na' guléda' bönachi dza ni', en gunniá':

“Ta'chíxítica'sinë' ca ta'zá' ládxi'gaquië'.

Biti' tē'ennë' ila'nözinë' le rē'enda' ilunë'.”

¹¹ Que lë ni na' guléda' légaquië', en bena' tsutsu xtídzä'a, gunniá':

“Biti' ila'yázië' ga ulu'zí' ládxi'gaquië' tsözxön len neda'.”

¹² Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë'ë, en para cabí usanli'-në' Dios ban. ¹³ Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴ Yúgu'tëru' gunru' tsözxön Cristo channö gácaru' tsutsu ga idxinrö dza údxi, ca na' gusi' lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channö riyönili' chi'ë Dios,
biti' gácali' zidi lu icja ládxi'do'oli',
ca na' gulaca nupa ni' gula'dá'baga' Dios.

¹⁶ ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. ¹⁷ ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. ¹⁸ ¿Nupxi ni' benë' tsutsu xtídzë'ë Dios, gunné' bití' ila'yaza ga ulu'zí' ládxi'guequi tsözxön len Lë'? Gulaca nupa ni' bití' gulún ca rnna xtídzë'ë Dios. ¹⁹ Na'a, réquibe'eru' bití' guca ila'yázië' tu' cabí gula'yéajlë'ë Dios.

4

¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru'

ni'. ² Biyönrü' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlé'ë Dios cate' bila'yönnë' le. ³ Rë'u ni réajlé'ëru' Dios, en tsú'uru' lataj queë' ga uzí' ládxi'ru'. Raca ca na' gunné' Dios:

Que lë ni na' guléda' légaquië'

en bena' tsutsu xtídza'a, gunnía':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzülió ni, en chiruzí' ládxi'ë. ⁴ Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." ⁵ Ga yúbölö rnna: "Biti' tsú'ugaquië' ga ulu'zí' ládxi'lenë' neda'." ⁶ Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'. ⁷ Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónili' didza' ru'ë Dios,

biti' gácali' zidi lu icja ládxi'do'oli'.

⁸ La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'.

⁹ Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. ¹⁰ Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'.

¹¹ Que lë ni na', ral-la' gü'í ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlé' Dios, en biti' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guië tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'. ¹³ Biti' bi gaca ucáchi'ru' ga biti' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

Jesús náquië' bixúz lo, Nu nácatërö zxön

¹⁴ Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. ¹⁵ Zoa queëru' tu bixúz lo, Nu gaca huéchi' ladxí' rë'u ca nácgaca le raca queëru', tu' guzxí' bë' tu' xihui' Lë cazë' idútë ca na' rizí' bë' tu' xihui' na' rë'u, pero biti' bi dul-la' benë' Lë'. ¹⁶ Que lë ni na', idú ládxi'ru' ral-la' ibíga'ru' gala' ga rö'ë rinná bë'ë Dios, Bönni' ruzá' ladxë'ë queëru', en inábaru' lahuë' huéchi' ládxi'ë rë'u, en uzá' ládxi'ë queëru', para gácalenë' rë'u cate' bi raca queëru'.

5

¹ Dios ribö cazë' nútítës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bëdxi tútigaquië'-ba' lu bucugu lá'ayi tu' nözi dul-la' nabága'gaquië'. ² Bixúz lo na', tu' raca queë' lëbisö ca raca quégaca bönachi, gaca gáquië' zxön ladxí' len nupa nácgaca yugu' bönni' canöz, en nupa ta'chixi ta'nigui. ³ Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

⁴ Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. ⁵ Lësca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzó'a' Li' na'a.

⁶ Lësca' caní gudxë' Lë' le nazúaj ga yúbölö, gunnë':

Li' nácatuca'su' bixúz,

ca na' gúquië' Melquisedec bixúz.

⁷ Cristo, cate' ni' zoa cazë' yödzölió ni, bulidzë' Dios, en gúta'yuë' lahuë'. Gurödxí'ë, en gurödxë' lahuë' Dios, Bönni' guca usölë' Lë' lu yöl-la' guti, ate' Dios biyönnë' Lë' tu' gúdxinë' Lë' idú láchxë'ë. ⁸ Sal-la' gúquië' Zxí'inë' Dios, bizédë' gunë' ca rnna xtídzë'ë Dios tu' gulaca queë' yugu' le gud'i guzxaqué'ë. ⁹ Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rnna xtídzë'ë. ¹⁰ Ní'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

Zoa bönadxi queëru' huöaj láchxi'ru', en tá'baga'ru'-në' Cristo

¹¹ Ca naca lë ni, zían le ral-la' gü'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'. ¹² Chigudödi dza ral-la' gaca usédili' bönachi xtídzë'ë Dios, tu' chibiyönili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en calëga la' huagu tsutsu. ¹³ Yúgu'të bönni' naquíniguequinë' nu usedi légaquië' lë na' bití' naca böniga, nacagaquië' ca yugu' bí'ido' té'ajbi' nidxi'. Biti' nazédagaquië' ca sa'yéaj le naca tsahui'. ¹⁴ La' huagu tsutsu tu'z'í' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quégaquië'.

6

¹ Que lë ni na', bití' ral-la' usédaticas'iru' yugu' xibá buzédaru' cate' si' gusí lo riyöniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá bití' naca böniga:

ca ral-la' ubí'i láchxi'ru',

en ca bití'rö gunru' le ruá' dö',

en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixó'a ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quégaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i láchxi'gaca leyúbölö nupa tu'huöaj láchxi', en ta'dá'baga' Dios? Channö bidxín quéguequi bení' queë' Dios, en bulu'z'í' xibé le runödzjë' Dios zoë' yehua' yubá, en gulaca tuz len Dios Bö' Lá'ayi, en channö bulu'z'í' xibé didza' dxi'a queë' Dios en yöl-la' huáca que dza si' za', en channö ní'irö tu'huöaj láchxi', en ta'dá'baga' Dios, bití' ca' gaca nu gun ga ulu'bí'i láchxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahui' lógaca bönachi. ⁷ Nupa tun caní nacagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzaj le tu'z'í' xibé nupa tá'ana yu na', raza láchxë'ë Dios le, ⁸ pero channö ruzóasö yu na' lubá yötsi', en bësiga', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le nacagacarö dxi'a, le tu'z'í' xibé nupa nulágaca. ¹⁰ Dios náquië' tsahui', en bití'

gal-la ládxe'ë dxin tsahui' benli', en yugu' le benli' tu' nadxí'ili' Lë'. Gúcalenli' nupa néquiguequi quez queë' Dios, en runli' xichínguequi. ¹¹ Na'a, ré'ënitú' güi' ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queëli' lë na' runli' löza. ¹² Ré'ënitú' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön ladxi', para idéli'li' yugu' le guzxi' lu në'ë Dios gunnë' queëru'.

¹³ Caní gaca, tu' benë' tsutsu Dios xtídzë'ë cate' guzxi' lu në'ë bi gunnë' queë' Abraham. Tu' cabí zoa nu nácarö lo ca Dios, que lë ni na' buzetaj cuinë', cate' ni' benë' tsutsu xtídzë'ë. ¹⁴ Caní gunnë' Dios: "Le nácatë guna' ga gaca dxí'a quiu', en guna' ga ila'yánda'abi' zxi'ini xi'sú'." ¹⁵ Gulözë' Abraham zxön ladxi', ate' bidéli'në' le guzxi' lu në'ë Dios gunnë' queë'. ¹⁶ Cate' tu bönni' runë' tsutsu xtídzë'ë, ruzötjë' nu nácatërö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë. ¹⁷ Que lë ni na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' uluí'inë' nupa ulu'zí' xibé le guzxi' lu në'ë unödzejë' quéguequi, nácada' löza, en tsaz naca le nuzóa lahuë' gunë'. ¹⁸ Le guzxi' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, bití' gaca si' yë'ë Dios. Caní benë' Dios para gácada' löza queëru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' sí'iru'. ¹⁹ Lë na' runru' löza ruzóaticá'sö tsutsu icja ládxi'do'oru', en naca ca tu du guié ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúde'lö lari' nala' lu yudo' rö'ö yehua' yubá. ²⁰ Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisëtërë'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. ² Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxíë'." ³ Bití' zoa lu guichi le rnna gula'cu'ë xuz xinë'ë, o xuz xtá'ahuë', en bití' nazúaj dza guljë' o dza gútië', pero náquië' ca náquië' Zxi'inë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la. ⁵ Lu xibá queë' Moisés, Dios rinná bé'enë' yugu' zxi'ini xi'sóë' Leví, nupa nácacaca bixúz, ila'zi'ë tu cö' tu' chi cö' que le ta'zí' bönachi Israel, sal-la' nácacaca di'a dza quégaquië', tu' nácacacaquië' yúgu'të' zxi'ini xi'sóë' Abraham. ⁶ Melquisedec na' bití' náquië' di'a dza quégaquië', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, ⁷ ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídi'rö. ⁸ Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi nácacaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. ⁹ Na'a, huáca innaru' queë' Leví, en quégaca zxi'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guíxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquië'. ¹⁰ Caní

naca, tu' huáca innaru' Abraham ni' nu'ë lë'ë Leví, en yugu' xzí'ini xi'sóe' cate' ni' yöjtságuie' Melquisedec lë', tu' cabí náljaniguequinë'.

¹¹ Ta'zí' bönachi Israel xibá gunná bë'ë Moisés lu ná'agaca bixúz, nupa nácagaca xzí'ini xi'sóe' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'túe' bixúz ca gúquië' Melquisedec, en calëga ca gúquië' Aarón. ¹² Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'. ¹³ Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzí'ini xi'sóe' Israel ca le nababë' Leví na', ate' que cö' xzí'ini xi'sóe' ga nababë' Xanru', cuntu nu guca bixúz lahuë' Dios. ¹⁴ Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

¹⁵ Nácatëro bë' lë ni ni'a que le raca na'a. Ca na' gúquië' Melquisedec bixúz, chibuluf'i lahuë' ia'turë' bixúz, Jesús. ¹⁶ Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi. ¹⁷ Nazúaj lu guichi lá'ayi le run ba nalí queë' le rnna:

Tsaz nacu' bixúz
ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun. ¹⁹ Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë. ²¹ Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídzä'a neda', Xanu', gunnía':

“Biti' utsá'a ca guna'.

Tsaz nacu' bixúz
ca na' gúquië' Melquisedec bixúz.”

²² Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. ²³ Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulátië', ²⁴ pero tu' zóatica'së' Jesús, tsaz náquië' bixúz, en biti' gaca nu huóaza xilatjë' para gaca bixúz. ²⁵ Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxön bönachi dul-la', pero nayëpisëtëre' ca yúgu'të le nacúa' ni' yehua' yubá. ²⁷ Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichön cazë' tu' nözi dul-la' nabága'gaca yúgu'të bönachi. ²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Xzí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. ² Lë' runë' dxin ca Bixúz Lo lu lataj nácatëro lá'ayi, le naca yudo' le naca idütë, lë na'

buchisë Xanru', en calëga bönachi. ³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichõngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. ⁴ La'tu' zoë' luyú ni, biti' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. ⁵ Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lë na' buluí'ida' li' lu guí'a ni'." ⁶ Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lë' zoa tu didza' rucá'ana tsahui' queëru' le nácatëro lesaca', en le ruí'í didza' que le nácatëro lesaca' guzxí' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. ⁸ Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na', lë na' bënlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto. Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

¹⁰ Que lë ni na', caní gaca didza' ucá'ana tsahui' gúnlena' bönachi Israel tódi yugu' dza ni', rnnë' Xanru'.

Uchízia' icja ládxi'do'gaquië' xibá quia' en uzúaja' le lu icja ládxi'do'gaquië'.

Ní'irö gaca' Dios quégaquië' ate' légaquië' iláquië' bönachi quia'.

¹¹ Biti' gun bayudxi nu usedi luzë'e, inná: Bénbë'ë Xanru', tu' ilúnbë'ë yúgu'të' neda', ga isí lo nu naca cá'asö, ga idxintë nu naca lo.

¹² Huéchi' ládxa'a légaquië', en uniti lahua' le cabí naca tsahui' gulunë', en bítirö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na' guzóa zí'alö, ate' chizóa idúa lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni.

² Caní naca lataj lá'ayi na' néquini guídi. Lu lataj na' dë láchuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios. ³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, ⁴ ate' lu lataj ni' gula'cuá' tu bucugu néquini oro ga na' bulu'zéguië' nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, lë na' bubö' ni'a

në'e, enca' yugu' guiöj blaga na', nazúaj láhuilöguequi didza' rucá'ana tsahui'.
 5-6 Lahui guí'ina na' gula'cuá' chopa gubáz lá'ayi néquiguequini oro, légaca querubín que lataj ga buluí'i lahuë' Dios, ate' bulu'zxóa xiliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dé lataj uzúaja' na'a idútë ca nácagaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. 7 Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. 8 Caní ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö. 9 Yugu' lë ni naca tu le rulu'ísö que le raca na'a dza. Yugu' le gula'gu'ë lahuë' Dios, en rön quégacaba' böa' bëdxi na' gulútië'-ba' lahuë' Dios bití' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní. 10 Yugu' lë ni bulu'í'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsë'ë yúgu'të.

11 Na'a, chibudulu'í'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácáro lo, en nácáro idú, en bití' néquini lu ni'a lu ná'agaca bönachi, en bití' naca que luyú ni.

12 Na'a, chiguyázië' Cristo lu lataj lá'ayi na', calëga len xichöngacaba' bëdxido', en xichöngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz. 13 Le nácatë xichöngacaba' bëdxi, en chivo, en dö queëba' bëdxido' bulu'zégui'ë-ba', yugu' le gula'gu'ë lu íc jagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. 14 Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

15 Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zí'ë lë na' guzxi' lu në'ë Dios unödzejë' quégaquië' bönni' bulidzë', le zóatica'sö. 16 Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. 17 Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', bití' ca' gaca ilunë' ca rnna didza' na'. 18 Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti. 19 Cate' ni' gudíxjöi'inë' Moisés bönachi ni' ca nácagaca yúgu'të xibá queë' Dios, gudélé'ë rön quégacaba' bëdxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi. 20 Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." 21 Lë'sca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. 22 Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, bití' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichóngacaba' böa' bédxido' caní. ²⁴ Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca ulu'i lahuë' na'a lahuë' Dios uláz queëru'. ²⁵ Bixúz lo zoë' luyú ni razië' lataj nácatëro' lá'ayi tu tu iz len rön quégacaba' böa' bédxi, pero bití' run bayudxi tsázië' Cristo zían luzuí para udödi cuinë' lahuë' Dios. ²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzölió ga ridxintë na'a dza, pero na'a cate' naca dza údxi, tsaz bulu'i lahuë' tu luzuísö, en budödi cuinë' lahuë' Dios, cate' gútië' para bugüë' dul-la' nabága'ru'. ²⁷ Ca na' run bayudxi ilátigaca bönachi tu luzuísö ate' tödi ni' uchi'a usöröë' Dios léguequi, ²⁸ lësca' caní, gútië' Cristo tu luzuísö, cate' budödi cuinë' lahuë' Dios para bugüë' dul-la' nabága'gaca bönachi zían. Na'a, ulu'i lahuë' le buropi luzuí, calëga para ugüë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en bití' guca idú ca ná'agaca. Que lë ni na', xibá na' queë' Moisés bití' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bédxido', lë na' gula'gú'utica'së' lahuë' Dios yugu' iz. ² La'tu' guca un légaquië' idú tsahui', bití' gula'gú'utica'së' rön ni' lahuë' Dios, tu' cabirö iléqui'be'enë' bönni' guca caní quégaquië' nabága'gaquië' dul-la' channö chibulu'huó'áquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichóngacaba' bédxi, en chivo ugúa dul-la'.

⁵ Que lë ni na', cate' bidxinë' Cristo yödzölió ni, gudxë' Dios ca na' nazúaj lu guichi lá'ayi le rnna:

Bití' rë'ënu' nu cu'u rön quégacaba' böa' bédxi lo' pero benu' ga naca' bönáchisö.

⁶ Bití' raza ládxi'u nu uzegui'-ba' böa' bédxi lo', o nu cu'u xichóngacaba' lo' tu' nözi dul-la'.

⁷ Ní'irö gunná': Ni zoa' para guna' ca rë'ënu' Li', Dios. Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Bití' rë'ënë' Dios nu cu'u rön quégacaba' böa' bédxi lahuë'." Didza' ni rulu'i rë'u bítí'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. ⁹ Gudödi ni' rnna: "Ni zoa' para guna' ca rë'ënu' Li', Dios." Didza' ni rulu'i rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxí'ini cazë' lahuë'. ¹⁰ Na'a, Dios ruúnë' rë'u idú tsahui' tu' benë' Cristo ca rë'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichíngaqië', en la' tuz ca tunë', ta'gu'ë lahuë' Dios zían luzuí xichóngacaba' böa' bédxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zechu zxíbigaca lahuë' nupa bití' ta'lé'e Lë' dxi'a. ¹⁴ Ni'a que tuz le gulu'ë lahuë' Dios, tsaz benë' ga ná'agaca idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna: ¹⁶ Caní gaca didza' ucá'ana tsahui' gúnlena' légaquië'

tödi yugu' dza ni', rnnë' Xanru'.
Uchízia' icja ládxi'do'gaquië' xibá quia',
en uzúaja' le lu icja ládxi'do'gaquië'.

¹⁷ Gudödi na' gunné':

Bíti'rö tsöjneda' dul-la' nabága'gaquië'
en dö' biá'gaquië'.

¹⁸ Que lë ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. ²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queëru' tu' budödë' idútë le naca cazë. ²¹ Jesús náquië' queëru' tu bixúz nayëpisëtëre', en rinná bé'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idútë le naca cazaru' len le naca tu nisa nácatëro idú. ²³ Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí' lu ná'aru', le guxzí' lu në'ë Dios gunné' queëru', ate' Lë' runë' ca rnnë'. ²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. ²⁵ Bal-la' bönachi bíti'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilë'ëru' chizóa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idútë li, bití' ca' nagá'ana bi gaca cú'uru' lahuë' Dios le ugúa dul-la'. ²⁷ Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguíë' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. ²⁸ Cate' nu bönni' buzóë' xibá queë' Moisés tsölá'alö, gulútië' lë' channö chopá tsonna bönachi gulún ba nalí que le benë', ate' cuntú nu buéchi' ladxi' bönni' na'. ²⁹ Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxi' queëru' le riquíniru'. ³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lëscá' caní gunné': "Xanru' uchi'a usöröë' bönachi queë'." ³¹ Ral-la' gadxi idzöbi nu ral-la' si' xíguia' lu në'ë Dios ban.

³² Guli'tsöjné yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxön ca' nupa gula'guí' gula'zaca' caní. ³⁴ Caní guca, tu' buéchi' ládxi'li' nupa nadzúngaca lidxi' guíë', en lu yöl-la' rudzeja queëli' biá' gulenli' nupa gula'béaj lídxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatica'sö ni' yehua' yubá. ³⁵ Na'a, bití' ucá'anali' lë na' runli' löza, le nachë' tu le zxön ubi'ë Dios queëli'. ³⁶ Run bayudxi cözali' zxön ladxi', para cate' chibenli' ca ré'ënë' Dios, sí'ili' le guxzí' lu në'ë gunné' queëli', ca na' nazúaj lu guichi lá'ayi, ca gunné' Dios le rnna:

³⁷ Ia'tú chí'ido'osö idxinë' Bönni' na' ral-la' guidé'.

Biti' ca' tsenë'.

³⁸ Ní'irö nu naca tsahui' lahua' neda',
ulá nu na' tu' réajlë' neda'.

Channö huõaj ladxi', en tá'baga' neda',
bíti'rö tsaz ládxa'a nu na'.

³⁹ Na'a, rë'u ni, biti' nácaru' ca nupa tu'huõaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

11

Ca naca yöl-la' réajlë' queëru' Dios

¹ Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'. ² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

³ Tu' réajlë'ëru' Dios, réquibe'ëru' benë' Lë' yödzölió ni len didza' bë'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴ Tu' guyéajlë'ë Abel Dios, gulu'ë rön queëba' böa' bédxido' lahuë' Dios, tu le nácatëro lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bítirö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxe'ë Dios."

⁶ Na'a, channö cabí réajlë'ëru' Dios, biti' gaca gunru' le raza ládxe'ë Lë', ate' para íbígá'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruí'i ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'. ⁹ Tu' guyéajlë'ë Abraham Dios, gúquië' ca tu bönni' zítu', en guzóë' luyú na' Dios guzxí' lu në'ë unödzjë' queë'. Guzóë' lu yu'u guídido', en lëbisö ca gulunë' Isaac, en Jacob, zxí'ini xí'sóë' Abraham, nupa ni' guzxí' lu në'ë Dios unödzjë' quéguequi lë na' guzxí' lu në'ë unödzjë' queë' Abraham. ¹⁰ Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxí' lu në'ë queënu. ¹² Que lë ni na', sal-la' chibigúladë'ë Abraham, gula'cuá'abi' zióntëro'bi' zxí'ini xí'sóë'. Gula'cuá'abi' tsca rö'öba' bölay lúzxiba, en tsca rö'ö yuzxi tu ra' nisa zxön, cuntu nu gaca ulaba légacabi'.

¹³ Yúgu'të bönni' ni gulátië', en biti' gula'zi'ë lë na' guzxí' lu në'ë Dios unödzjë' quégaquië', pero gula'yéajlë'ë Dios, ate' zítu' zítu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácaquië' ca bönni' zítu', en bönni' ta'dazë' yödzölió ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵ La'tu' gula'zá' ládxi'gaquië' caní que luyú ga ni' bila'rúajë', le nácatë ulu'dzölinë' nacxi huõajgaquië' ni', ¹⁶ pero gula'zá' ládxi'gaquië' que luyú na' nácarö dxí'a, le

rö' yehua' yubá. Que læ ni na' biti' rutu'ínë' Dios cate' ta'nnë' náquië' Dios quegaquië', tu' chinupë'ë tu yödzö quegaquië'.

¹⁷ Tu' guyéajlë'ë Abraham Dios, cate' guzxi' bë'ë Dios læ', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxi' lu në'ë Dios unödzjë' queë'. ¹⁸ Caní benë' sal-la' gudxë' Dios læ', gunnë': "Lu ná'abi' bi'i Isaac quiu' ichísagaca'-bi' zxi'ini xi'sú'." ¹⁹ Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

²⁰ Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'zí'ibi' xibé dza si' za'. ²¹ Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' zxi'inë' José, ate' guyéaj ládxe'ë Dios, ni' nayéchuë' lu xiyaga queë'. ²² Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' zxi'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

²³ Tu' gula'yéajlë'ë Dios, cate' gúljabí' bí'ido' Moisés, xuz xiná'abi' bulu'cáché'ë-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'. ²⁴ Tu' guyéajlë'ëbi' Moisés Dios, cate' guzxönbi', bitirö bë'ëbi' lataj nu uzóa læbi' bi'i bönni' queënu nigula zxi'inë' Faraón, bönni' na' rinná bé'enë' bönachi Egipto. ²⁵ Caní benbi' tu' gúquibi' nácarö dxi'a nu usaca' zi' læbi' tsözxön len bönachi queë' Dios ca uzí'ibi' xibé tu chí'isö yugu' le tu'zí' xibé nupa tun dul-la'. ²⁶ Gúquibi' nácarö lesaca' nu ulidza ditaj læbi', ca na' gaca ca' queë' Cristo, ca idéli'bi' yugu' yöl-la' tsahui' quegaca bönachi Egipto, tu' guzá' ládxi'bi' ca naca le ubi'ë Dios queëbi'. ²⁷ Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulënë' ca run nu rilé'ë Dios, Nu na' biti' gaca ilé'eru'.

²⁸ Tu' guyéajlë'ë Moisés Dios, benë' Laní Pascua ca gunná bé'enë' Dios læ', en buchéajë' rön ra' yu'u lídxigaquië', para cabí guti zxi'inigaquië' nu na' ral-la' usuniti yugu' bi'i bönni' zí'alö quegaca bönachi Egipto. ²⁹ Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

³⁰ Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guinnaj yugu' zö'ö gulún chí'i yödzö na'. ³¹ Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti' gulún ca rna xtídzë'ë Dios, tu' bennu bal bönni' Israel na' buduyúlanguaquië' le rácalen bönachi Jericó.

³² ¿Bízxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

³³ Tu' gula'yéajlë'ë Dios, bulu'zötjë' zían yödzö zxön.

Gulunë' le naca tsahui', ate' gula'déli'në' le guzxi' lu në'ë Dios unödzjë' quegaquië'. Bulu'sayjë' ruá'agacaba' bëdxi guixi'.

³⁴ Bulu'lé' yugu' lu guí' zxön.

Bila'rúajë' lu ná'agaca nupa gulé'ëni iluti légaquië' len guíë tuchi'. Dios bunë' légaquië' tsutsu cate' ni' gula'cuídi'në'. Bulu'huóáquië' ca' tsutsu lu gudil-la.

Bulu'láguië' bönni' guizxi yu rōjáquië' gudil-la quégaquië' bönni' zi'tu'.

³⁵ Yugu' nigula dza ni' bulu'z'ínu bi'i que queëgacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulë'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. ³⁶ Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guié, nága'gaquië' du guié. ³⁷ Bulu'ladxi' bönachi bal-lë' guiöj, en gula'chözë' ia'bal-lë'. Gula'z'í' bë'ë légaquië', en gulútigaca zióngaquië' len guié tuchi'. Gula'dödë' ná'alö ní'ilö, nácugaquië' guídi zióngacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö'. ³⁸ Caní guláquië' bönni' na', ate' biti' gulaca bönachi yödölió ni lesaca' ulu'z'í' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú. ³⁹ Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxi' lu në'ë Dios unödzejë' quégaquië'. ⁴⁰ Caní guca, tu' nupë'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxön.

12

Ral-la' uyuru'-në' Cristo

¹ Que lë ni na', lësca' rë'u, tu' nacua' idú gásibi'ilö ga ni zóaru' zióntë'rö nupa tun ba nalí ca ta'yéajlë' Dios, ral-la' uca'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazöngaca rë'u, ate' lu yöl-la' riböza zxön ladxi' queëru', ral-la' gunru' xichinë' Dios, le naca tsca xíti'ru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí'i guzxiáquë'ë lë'e yaga cruz, en biá' gulënë' yöl-la' rutuí'i que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

³ Buli'yúë' Jesús, ca na' gudí'i guzxiáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopa ládxi'li'. ⁴ Ga ridxintë na'a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. ⁵ Nadxi' ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' zxi'ini cazë', ca na' nazúaj lu guichi le rnnë':

Zxi'ina', biti' uzú' tsölá'alö le gunë' Xanru',

cate' usëdi uzéajni'inë' li',

en biti' huöaj ládxi'u cate' uní'inë' li'.

⁶ Xanru' runí'inë' nu nadxi'inë',

en rusëdi ruzéajni'inë' yúgu'të nupa ta'z'í' lu në'e ilaca zxi'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' zxi'ini cazë'. Biti' ca' zóabi' tubi' bí'ido' biti' uní'inë'-bi' xúzibi'. ⁸ Na'a, channö cabí runí'inë' Dios libí'ili' ca na' runë' quégaca yúgu'të zxi'ini cazë', ní'irö nácali' ca yugu' bi'i lan, en biti' nácali' idú zxi'inë' Dios. ⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnroru' ca rna xtídzë'ë Xúziru' zoë' yehua' yubá para sóaru' ibanru' tsaz. ¹⁰ Yugu' xuz xiná'aru', tu' chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'. ¹¹ Le nácatë biti' nalá' lahui na'a le uzí'iru' xibé que le runí'inë' rë'u, pero run ga ruhu'iniru'. Channö güí'iru' lataj usëdi rë'u le runí'inë' rë'u, gun ga cözaru' dxí'ado', en ga gácaru' tsahui'.

Soa bönadxi queëru' channö cabí uzë nágaru' chi'ë Dios

¹² Que lë ni na' buli'ún tsutsu ná'ali' le röjxéqui'guequi, enca' zxíbili' le ta'zxizi, en idipa ládxi'li' para gunli' le naca dxi'a. ¹³ Guli'sóa nöza tsahui', para cabí gunli' ga ucá'ana nu ricuidi' ladxi' nöza na', pero guli'gún ga huóaca ladxi' nu na'.

¹⁴ Guli'güi' ládxi'li' cözalenli' dxi'a yúgu'të bönachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'. ¹⁵ Guli'gún chi'i cuinli' para cabí soa nu ucá'ana le ruzá' ládxi'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. ¹⁶ Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, xzí'inë' Isáac. Esaú na' bëti'ë le ral-la' gata' lu në'ë tu' náquië' bi'i bönni' huaca queë' xuzë' para guzxi'ë tu le do' gudahuë'. ¹⁷ Chinöz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxi'ë xuzë' lë', pero biti' guta' lataj ubí'i ládxi'ë Esaú na' sal-la' gudilaj ládxi'ë le len yöl-la' ribödxí queë'.

¹⁸ Ca raza queëli' biti' naca ca guca quégaquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böaca chul-la lahui' dza tu' gurö'ö böaj gasaj, en guyécjada' bö'. ¹⁹ Bila'yönnë' ta'bödxí lúzuba' böa', enca' chi'ë Dios Nu bë' didza'. Cate' bila'yönnë' lë ni, gulá'tayuë' lahuë' Moisés para cabirö güf'ilenë' Dios légaquië' didza'. ²⁰ Caní gulunë' tu' cabí guca guá' iléngaquië' lë na' gunná bé'enë' Dios légaquië', gunné': "Channö tsöjlíbibá tuba' böa' guíxi'do'os guí'a ni, ral-la' ulu'ládxi'ë-ba' guiöj, o ulu'dödë'-ba' yaga tuchi'." ²¹ Lë na' bila'lé'enë' ben gádxida' légaquië', ate' Moisés gunné': "Radxi'ridzöbida', en rixízida'a."

²² Na'a, libí'ili' ral-la' gádxitëroli' tu' ribíga'li' gala' tu lu guí'a nazí'i le Sión, en ga zoa yödzö queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. ²³ Ribíga'li' gala' ga ni' nudúbigaca xzí'ini cazë' Dios lahuë' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchí'a rusöröë' yúgu'të bönachi, en ga na' nacuá' yugu' bö' gulaca cazë' yugu' bönni' tsahui', tu' bunë' Dios légaquië' tsahui'. ²⁴ Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguië' Dios queëbi' bi'i böchë'ë.

²⁵ Que lë ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu na' bulidza légaquië' luyú ni. Nácatëro löza biti' ca' uláru' rë'u channö tá'baga'ru' Nu na' rulidza rë'u, zoë' yehua' yubá. ²⁶ Dza ni' guzxi' luyú ni tu' biyön chi'ë Dios, pero na'a chiguzxí' lu në'ë, gunné': "Ia'tú luzuísö, en calégasö luyú uxízia', però lúzhiba ca' uxízia'." ²⁷ Cate' ni' rnnë': "Ia'tú luzuísö", lë ni ruluí'i rë'u ral-la' udúa yugu' le gaca ila'zxizi, lë na' rö'ö yödzölió ni, ate' ulu'gá'ana le cabí gaca ila'zxizi, lë na' rö' yehua' yubá. ²⁸ Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guiëru'-në' Dios: "Xclenu'", ate' lu yöl-la' ba'a ladxi', en lu yöl-la' radxi' Lë' tseaj ládxi'ru' Lë' ca na' raza ládxi'ë Lë', ²⁹ tu' náquië' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ládxi'ë Dios

¹ Ral-la' idxí'ítica'sili' luzá'ali' tuli' ia'tuli'. ² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz

lá'ayi que yehua' yubá queë' Dios, sal-la' biti' guléquiibe'e nácagaquië' gubáz lá'ayi.

³ Guli'tsöjné nupa nadzúngaca lidxi guié tsca nunli' légaquië' tsözxön, nadzunli' ca' lidxi guié. Guli'güí' ládxi'li' yugu' bönni' ta'bía ládxi'gaca bönachi légaquië', tsca libí'ili' riguí'i rizáca'lenli' légaquië' tsözxön.

⁴ Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵ Biti' bi uhuídí'li', pero guli'tsaza ládxi'li' tsca le dë queéli' na'a, tu' chigunnë' Dios: "Catu caz ucá'ana' li', en biti' ca' ubéaj ládxa'a li'." ⁶ Caní naca, huáca innaru' idú ládxi'ru' lë na' rnna: Xanru' náquië' Nu rácalen neda'.

Biti' ca' gádxida' bi gun bönachi quia'.

⁷ Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸ Lëbisö ca náquië' Jesucristo, néaje, en na'a, en cá'tica'sö. ⁹ Biti' güí'ili' lataj yugu' xibá izá'a, en xibá nadzá' iché'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxi'ë Dios queéli', en calëga ca nácagaca xibá que le rë'aj ráguru', lë na' biti' ulu'zí' xibé nupa tu'i ládxi'gaca léguequi.

¹⁰ Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. ¹¹ Bixúz lo que yu'u lá'ayi na' gulu'ë xichöngacaba' böa' bëdxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'ilö ra' yödzo. ¹² Lëasca' caní gudí'i guzxaqué'ë Jesús ní'ilö ra' yödzo para bunë' bönachi dxi'a len rön queë cazë'. ¹³ Tsöjtá'aru'-në' Jesús, sal-la' ila'béaj bönachi rë'u lu yödzo, en sí'iru' tsözxön len Lë' lë na' bulu'lidza ditaj bönachi Lë'. ¹⁴ Biti' zoa tu yödzo queëru' yödzölió ni le soa tsaz, pero riguí'jaru' lë na' si' za'. ¹⁵ Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu" ni'a que le náquië' Lë'. ¹⁶ Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxi'ë Lë'.

¹⁷ Guli'gún ca rnna xtídzagaquië' böchi'ru' tu'yúë' libí'ili', en guli'güí' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uzí'ili' xibé dxin na' ilunë' lu yöl-la' risëbi ladxi' quégaquië'.

¹⁸ Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ruí'i ládxi'tu' gúntica'situ' le naca dxi'a.

¹⁹ Le nácáro lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' ládxi'ë queëru' le gácalen rë'u

²⁰ Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, ²¹ rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca ré'ënë' Lë', ate' gunë' queéli' le raza ládxi'ë Lë', tu' néquili' queë' Jesucristo. ¡Queë' Cristo gácatica'sö yöl-la' ba! ¡Ca' gaca!

²² Ráta'yua' loli', böchi' luzá'ado', güí'i ládxi'li' didza' ni ruzéajni'i libí'ili', tu' naca láti'do'os lë ni ruzúaja' queéli'. ²³ Ral-la' inözili' chiburúajbi' bi'i Timoteo,

bi'i böchi'ru'do', lidxi guié, ate' channö idxíntëbi' ga zoa' ni, gunbi' neda' tsözxõn uduyútu' libí'ili'.

²⁴ Buli'gapa Dios böchi'ru' tu'yúë' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlé' Cristo nacua' luyú Italia.

²⁵ ¡Dios uzá' ládxë'ë queéli' yúgu'téli'! ¡Ca' gaca!

LE BUZÚAJĚ' LU GUICH SANTIAGO

Santiago rugapë' Dios bönni' judío ta'dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

Yöl-la' réajni'i le runnë' Dios queëru'

² Böchi' luzá'ado', cate' gaca bi gaca queëli' le si' bë' libí'ili', ral-la' udzėjali' idú lądxi'li' ³ tu' nöz quézili', cate' bi raca queëli' le rizí' bë' libí'ili' ca réajlë'ëli' Cristo, lë ni rusedi libí'ili' cözali' zxön lądxi'. ⁴ Guli'güi' lądxi'li' gaca idú yöl-la' zxön lądxi' queëli', para údxi gácali' bönni' ta'yéajni'inë', en biti' bi yadzaj queëli' ca nácgaca lë ni.

⁵ Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzejë' yödxu yana' quégaca yúgu'të bönachi, en biti' ca' réqui quézinë' gunnë' queëru'. ⁶ Na'a, nu bi rinabi-në' Dios, run bayudxi tséajlë' Lë', en cabí gaca chopa lądxi'. Nu raca chopa lądxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. ⁷ Nu naca caní biti' ral-la' gun löza si' bi unödzejë' Xanru'. ⁸ Bönni' na' reaj bö' lądxi'da'ahuë' biti' ridzölinë' nácalö gunë'.

⁹ Channö zoë' tu bönni' böchi'ru' réajlë'ë Cristo, en náquië' cá'asö yödzölió ni, ral-la' udzéjanë' tu' chinadéli'në' tu lataj lo lahuë' Dios. ¹⁰ Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bítirö ruzxöni lądxi'ë lë na' dë queë'. Nu ruzxöni lądxi' yöl-la' tsahui' que, gaca que nu na' ca raca que xiyija guíxi'do', la' ridödité que. ¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxité guixi' na', en riguinnaj xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítie' tsanni ni runë' dxin riguuljë' yöl-la' tsahui' na'.

Le ta'zí' bë' rë'u

¹² Bica' ba bönni' böchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzejë' quégaca nupa nadxí'iguequi Lë'. ¹³ Cate' bi raca queëru' le run ga guë'ëni'ru' gunru' le ruá' dö', biti' ral-la' innaru': "Dios rizí' bë'ë rë'u len le naca xihui'." Dios biti' rizí' bë'ë nu bönni' len le cabí naca dxi'a. ¹⁴ Na'a, channö nu bi raca que le rizí' bë' le len le cabí naca dxi'a, naca tu' rizé lądxi' le ruá' dö', ate' lë ni ben ga gú'uni gun le ruá' dö'. ¹⁵ Lë na' rizé lądxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

¹⁶ Böchi' luzá'ado', biti' si' ye'e la' cuínsili'. ¹⁷ Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnnatica'së' queëru' le naca tsahui'. ¹⁸ Ca rë'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' guró cazë' Dios.

Le reaj lądxi'ru'-në' Dios le naca li lądxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yönili', pero biti' ral-la' innëtëzili', en biti' ilëtëzili'. ²⁰ Nu na' riletëz biti' run le naca tsahui' lahuë' Dios. ²¹ Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nõxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

²² Na'a, guli'gún ca rna didza' ni, en cabí yónisili', tu' channö yónisili' didza' ni, si' yé'eli' la' cuínsili'. ²³ Nu riyónisö didza' ni, en biti' run ca rna, nu ni naca ca tu bönni' ruyüé' lahuë' tu lu guié dxili, ²⁴ tu' ruyú cuinë', en söhuöjë', ate' la' ral-latë ládxe'ë ca rinë'ë. ²⁵ Na'a, nu bönni' biti' ral-la ládxe'ë le riyönnë', pero ruí'i ládxe'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bë' xibá na', gaquië' bica' ba ca naca yúgu'të le runë'.

²⁶ Channö nu bönni' ladaj libí'ili' réquinë' naca dxi'a ca reaj ládxe'ë Dios, pero biti' rapa chi'ë lúdxë'ë para cabí innësë' ca', bönni' ni rizí' yé'enë' la' cuinsë', ate' biti' raza ládxe'ë Dios ca reaj ládxe'ë bönni' na' Lë'. ²⁷ Le reaj ládxi'ru'-në' Dios, le naca idú, en le naca dxi'a, naca gácalenru' yugu' bi'i uzévido', enca' yugu' nigula nagá'ananu túzinu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

2

Tuz ca ral-la' gunru' bönachi bal

¹ Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. ² Channö tsázië' tu bönni' ga na' nudúbili', en nagu'ë xibón në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, ³ channö gunli' bal bönni' na' nácuë' lari' nazáca'da', en guiéli'-në': "Gurö'ölen rë'u ga ni naca dxi'a", pero guiéli' bönni' yéchi'do' na': "Ná'asö guzuí", o guiéli'-në': "Gurö'i lu yu ni." ⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusörö luzë'e, biti' naca dxi'a ca rizá' ládxi'li'.

⁵ Böchi' luzá'ado', buli'zë nágali' lë ni. Dios gurö cazë' yugu' bönni', sal-la' téquiguequi bönachi yödzölió ni nácaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni rinná bë'ë Lë'. Gata' quégaquië' lë na' guxzí' lu në'ë Dios unödzejë' quégaca nupa ta'dxi'i Lë'. ⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. ⁷ Yugu' bönni' na' dë yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

⁸ Runli' dxi'a channö runli' idú ca rinná bë' xibá lo, le nazúaj lu guichi, en rna caní: "Ral-la' idxí'ínu' luzó'o ca nadxí'i cuinu'." ⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítjali' xibá na'. ¹⁰ Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idütë le rinná bë' xibá na'. ¹¹ Lë' cazë' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idütë xibá queë' Dios. ¹² Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'. ¹³ Nupa cabí tu'huechi' ládxi'gaca luzë'eguequi, uchi'a usöröë' Dios léguequi, ate' cuntu nu huéchi' ladxi' léguequi, pero nupa

na' tu'huechi' ládxi'gaca luzé'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', bití' bi uzi'ë xibé tu bönni' channö innasë': "Réajlë'a Cristo", pero bití' runë' le naca tsahui'. Bití' gaca ulé' bönni' na' channö innasë' réajlë'ë Cristo. ¹⁵ Channö nacu'ë böchi' luzá'aru' ta'yéajlë'ë Cristo, en bití' dë le ilácuë', en calëga le ilahuë', ¹⁶ ate' channö tu nu dzaga libí'ili' guiësö légaquië': "Böaj lídxili' tsáhui'do'. Chibölaj budzé'eli'", pero channö cabí unödzej quégaquië' lë na' ta'yádzjanë', bití' ca' gúcalen légaquië'. ¹⁷ Lësca' caní raca que nu bönni' rnnasë' réajlë'ë Cristo. Channö cabí runë' le naca bë' naca idú ca réajlë'ë Lë', bití' naca lesaca' yöl-la' réajlë' queë'.

¹⁸ Nadxi ca' guië' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Bití' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ida' li' réajlë'a Cristo ni'a que le naca tsahui' runa'."

¹⁹ Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. ²⁰ Li', bönni' bití' bi nözinë'. Ral-la' inözi quézinu' channö zoa nu rnnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. ²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. ²² Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë: "Luzé'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calëgasö tu' réajlë'ë Dios. ²⁵ Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélé'ë yöjhuójgaquië' nöza yúbölö. ²⁶ Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

3

Yugu' le rnna lúdxiru'

¹ Böchi' luzá'ado', bití' guntëz zían cuinli' bönni' tu'sédinë' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. ³ Cate' rigú'uru' guië ruá'agacaba' böa' para gunru' ga ilunba' ca rë'ënu, gaca inná bé'ëru' légacaba' lu idútë le tunba'. ⁴ Buli'yú ca' ca raca quéguequi barco. Sal-la' zxöntërö naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxi'i barco para tseaj gáti'tës ga guë'ënnë' bönni' rusé'ë le. ⁵ Lësca' caní naca lúdxiru'. Sal-la' cuídi'do'os naca, zióntërö le rnna lúdxiru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. ⁶ Lësca' lúdxiru' na' naca ca tu guí'. Yúgu'të le ruá' dö' raca yödzülió ni rnna lúdxiru', en tu' dzaga lúdxiru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxiru' ribequi guí', le ruzegui' rë'u ca naca yúgu'të le runru', ate' tu' rnna caní lúdxiru' na', naca que tsca chinaguéla'të guí' le nabequi' tu'

xihui'. ⁷ Yúgu'tëba' böa' guixi' ta'daba' luyú, en yugu' böa' zoa xíligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönachi luyú ni léga'caba', ⁸ pero cuntú nu bönni' gaca inná bé'enë' lúdxë'ë, tu' rna lúdxí'ru' le ruá' dö', en bití' gaca nu uzaga' xinözi. Ziántëro le rna lúdxí'ru' le naca ca tu le naché' yöl-la' guti. ⁹ Len la' lúdxí'ru' ná'asö ruidza tsáhui'ru'-në' Dios Xuz, en ruidza dítjaru' ca' yugu' bönni', ate' benë' Dios légaquië' ca naca cazë' Lë'. ¹⁰ Caní naca, len la' ruá'asiru' na' ruidza tsáhui'ru' bönachi, en ruidza dítjaru' bönachi. Böchi' luzá'ado', bití' ral-la' gaca caní. ¹¹ Bití' ca' ta'lén nisa siziá', en nisa zöna' la' tuzi ga ta'lén. ¹² Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lësca' caní, nitú ga rilén nisa bití' gaca ila'lén nisa zöna', en nisa siziá'.

Yöl-la' réajni'i le naca idú

¹³ Channö zoë' tu bönni' ladjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'. ¹⁴ Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, bití' ral-la' gun ba zxön cuinli' ca naca yöl-la' réajni'i queëli'. Nu run caní rizí' yë', en ridá'baga' le naca idütë li. ¹⁵ Yöl-la' réajni'i caní bití' naca le runödzjë' Dios, pero que yödölió ni naca, enca' quégaca bönachi yödölió ni, en que tu' xihui'. ¹⁶ Yugu' bönni' tu'zxé'enë' luzá'agaquië', en t'ënnë' ila'gú'u bönachi légaquië' yöl-la' ba, lësca' ta'dil-la dídze'ë, en tunë' yúgu'të le ruá' dö'. ¹⁷ Yugu' bönni' nápaquië' yöl-la' réajni'i na' runödzjë' Dios:

Tunë' le naca idú tsahui', en ta'bözë' dxí'ado'.

Nácagaquië' zxön ladxi', en nöxaj ladxi'.

Tu'huechi' ladjagaquië' bönachi,

en tunë' le naca dxí'a.

Tuz ca tu'chi'a tu'söröë' luzá'agaquië',

en bití' ta'béaj bë'ë luzá'agaquië'.

¹⁸ Nupa tuí' ladjaga' gaca ila'bequi dxi le raca, ta'böza dxí'ado', para gaca ca' dxí'a idütë le zeaj naca caz.

4

Nupa tun zxön le nacua' yödölió

¹ ¿Bíx que na' ridí'l-lali', en raca didza' bíxaj queëli'? Raca caní queëli' tu' rizé ladjá'li' zían le rizé ladjá'li' tu tuli', en que lë ni na' ridí'l-laleni' luzá'ali'. ² Zían le ruhuí'di'li', en tu' cabí rizí'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridé'li' le, que lë ni na' rizó'a ribö'öli', en ridí'l-lali'. Bití' rata' queëli' le ré'ënilí', tu' cabí rinábali'-në' Dios lë na'. ³ Sal-la' zoa bi rinábali', bití' bí rizí'ili', tu' cabí naca dxí'a ca rinábali', tu' ré'ënilí' lë na' rinábali' para ugunli' le dxin ca raza ladjá'sili'. ⁴ Libí'ili', bönachi nusanli'-në' Dios, ¿naru' cabí nözili' channö runli' zxön le nacua' yödölió ni, chinuhuóacali' ca nu bití' rilé'e Dios dxí'a? Núti'tës nu ré'ëni gun zxön le nacua' yödölió ni, nuhuóaca ca nu bití' rilé'e Dios dxí'a. ⁵ Bití' rnasö ca' le nazúaj lu guichi lá'ayi le rna: "Dios risöl-lë'ë Dios Bö' Lá'ayi queëru', Nu zóalen ré'u, ate' Lë' nadjí'inë' ré'u, en rudúli'në' ré'u channö rusanru'-në'." ⁶ Na'a, zxöntëro le ruzá' ladjxë'ë Dios queëru', tu' nazúaj lu guichi lá'ayi le rna: "Dios ruzáguë'ë xinözguequi nupa tun ba zxön cuínguequi, pero ruzá' ladjxë'ë quégaca nupa nácagaca nöxaj ladxi'." ⁷ Que lë ni na', guli'sóa nöxaj ladxi' lahuë Dios. Guli'nná be'e tu' xihui', ate' uzxunnaj ga zóali'. ⁸ Guli'gü' ladjá'li' sóaleni'-në' Dios, ate' Lë' idisóaleni' libí'ili'. Libí'ili', bönachi dul-la', guli'gaca tsahui', en bití' rö gunli' dul-la'. Libí'ili', nülöli' reaj bö' ladjá'do'oli', en chopa le nadjí'ili', guli'gún

dxi'a icja ládxi'do'oli'. ⁹ Guli'sëbi ládxi'li', en buli'huí'ini, en guli'cödxí. Na'a ruzxídxili, pero ral-la' cödxili'. Rudzëjali', pero ral-la' huí'inili'. ¹⁰ Guli'gaca nõxaj ladxi' lahuë' Xanru', ate' Lë' gunë' ga tsëpisëli'.

Biti' ral-la' ichugu bë'ëru' le run luzá'aru'

¹¹ Böchi' luzá'ado', biti' innëli' que luzá'ali' tuli' ia'tuli'. Nu bönni' rinnë' que böchi' luzë'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröë' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröë' le, en biti' runu' ca rinná bë' xibá na'. ¹² Na'a, tuzë' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë cazë' gaca usölë' bönachi o usunítië' bönachi na'. Na'a, ¿núxitië run cuinu', rilaga yudxu' luzó'o?

Biti' gaca gunru' löza le gaca cuxö huidzaj

¹³ Na'a, buli'zë nágali', nülöli' rnnali': "Cuxö huidzaj tséajtu' yödzö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queëtu'." ¹⁴ Biti' nõzili' bizxi gaca cuxö huidzaj. ¿Nacxi caz naca queëru', tsca zóaru' yödzölió ni? Nácaru' ca böchila le nalá' tu chí'ido'osö, en la' rinítitë. ¹⁵ Que lë ni na', caní ral-la' innali': "Channö guë'ënnë' Xanru', sóaru' ibanru', en tu ia'tú le gunru'." ¹⁶ Na'a, libí'ili', lu yöl-la' run ba zxön queëli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'. ¹⁷ Channö nõziru' le naca dxi'a le ral-la' gunru', en biti' gunru' lë na', runru' dul-la'.

5

Santiago rusë'ë ládxi'gaquië' bönni' dë yöl-la' tsahui' quëgaquië'

¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'. ² Chinaca ditaj yöl-la' tsahui' queëli', ate' chinutógacaba' le ráculi' böljado' que. ³ Chinaca que dumí oro, en dumí plata queëli' ca naca que guë nazön yöni que, ate' yöni que na' naca ca tu le ruzegui libí'ili' didza', ate' gaca queëli' ca tu guí' le usuniti libí'ili'. Caní gaca queëli', tu' busó' butúbili' queëzili' yöl-la' tsahui' dza ni zóaru' chiröjsëtëgaca. ⁴ ¡Buli'yútsöca! Yugu' bönni' huen dxin gula'lapë' yöla queëli' chita'naba yúdxinë' lászjagaquië', tu' cabí riguíxjanili' légaquië', ate' lë na' ta'nabë' bönni' huen dxin na' chibídxín didza' na' lahuë' Xanru', ate' Lë' rinná bé'enë' ni'a në'ë guizxi yu. ⁵ Benli' ga buné'eli', en gü'i gudáguticá'sili' le rnnasö queëli' lu yödzölió ni. Buxön cuinli', pero chizóa idxín dza údxi queëli'. Gaca queëli' ca raca queëba' bëdxi renni', chibú'u dza gútiru'-ba'. ⁶ Richúguli' quëgaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

Cözaru' zxön ladxi', en ulídzaru'-në' Dios

⁷ Na'a, böchi' luzá'ado', guli'cöza zxön ladxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ladxi' ribözë' guiöjsiu', en guiöj cusu lin, ate' tödi ni' ulapë', en utubë' yöz zían. ⁸ Lë'sca' caní, libí'ili' na' réajlë'ëli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. ⁹ Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'! ¹⁰ Böchi' luzá'ado', buli'yú ca guca quëgaquië' bönni' gulu'ë didza' uláz queë' Xanru'. Nácaquië' ca tu le ruluí'i rë'u ca ral-la' quí'i sáca'ru', en cözaru' zxön ladxi'. ¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'guí'i gula'zaca'. Chibiyönili' ca benë' Job. Gulözë' zxön ladxi' sal-la' gudí'i guzxacá'dë'ë, ate' nõzili' ca' ca benë' Xanru' queë' ga búdxitë. Ruhuéchi'da' ládxi'ë Xanru' rë'u, en ruí'i ládxi'ë rë'u.

¹² Böchi' luzá'ado', le nácatërö lo naca lë ni rea' libí'ili': ¡Biti' uzõtjali' Nu zoa yehua' yubá, en biti' uzõtjali' le nacua' luyú ni, en biti' uzõtjali' bíti'tës bi run tsutsu xtídza'li'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí íbága'li' xíguia' lahuë' Dios.

¹³ Channö riguí'i rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'. ¹⁴ Channö re'e nu dzaga libí'ili', ral-la' ulidza bönni' gula tapa chí'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'. ¹⁵ Cate' ulu'lidzë' Dios, en ta'yéajlë'ë gunë' Cristo ga huöáquië' bönni' huë' na', ní'irö gunë' Xanru' ga huöása uzóë', en channö benë' dul-la' bönni' huë' na', Xanru' uniti lahuë' lë'. ¹⁶ Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili', para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxë'ë, nácada' lesaca'. ¹⁷ Elías, bönni' ní' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiöj, idú tsonna iz yu' xopa beo' biti' gulaj guiöj luyú ni. ¹⁸ Gudödi ni' bulidzë' Dios leyúbölö, ate' böálaj guiöj, ate' bunödzej le gulazë' yugu' bönni' dza ni'.

¹⁹ Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxë'ë bönni' na' richixi riníguinë', ²⁰ nu na' gun ga ubí'i ládxë'ë bönni' dul-la' na' gudë' ga yúbölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJË' PEDRO

Pedro rugapë' Dios nupa ta'dá' Cristo

¹ Neda', Pedro, naca' gubáz nasól-lë'ë Jesucristo. Ruzúaja' queéli' lu guichi ni, libí'ili' násilasili' zi'tu' gapa dë ládžali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Gurö cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bö' Lá'ayi, en gunli' ca rnaa xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládžë'ë queéli', en gunë' ga soa dxi icja ládžido'oli'.

Le rúntica'siru' löza

³ ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxon queë' bucubë' yöl-la' na'bán queëru' tu' busubanë' Jesucristo lu yöl-la' guti! ¡Lë ni run ga rúntica'siru' löza, ⁴ en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödžjë' quégaca bönachi queë', bití' initi, en bití' itëbi, en bití' igula. ⁵ Tu' réajlë'ëli' Lë', lu yöl-la' huáca zxon queë', Dios gun chi'ë libí'ili' cate' idxinrö dza ni' uzí'ili' xibé yöl-la' rusölá idú na' chinupë'ë queëru', en ulu'ë lahui dza údxi.

⁶ Que lë ni na' rudžéjade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bë' libí'ili'. ⁷ Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizi' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queéli' Cristo, le nácarö lesaca' ca oro, gaca queéli' yöl-la' zxon, en yöl-la' run bal dza ni' uluí'i lahuë' Jesucristo.

⁸ Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' bití' rilé'eli'-në' na'a, ate' rudžéjali'. Yöl-la' rudzeja zxon queéli' le cabí gaca quíxjö'öru' tsca naca, naca idútë li. ⁹ Caní naca, tu' ridéli'li' yöl-la' rusölá que bö' naca cážali', le rata' queéli' tu' réajlë'ëli'-në' Cristo.

¹⁰ Dza ni'te yugu' bönni' gulu'ë didza' uláz queë' Dios bulu'sëdë' dxí'ado' ca naca yöl-la' rusölá na' dë queëru' na'a, ate' gulu'ë didza' ca naca le ruzá' ládžë'ë Dios queëru'. ¹¹ Bö' Lá'ayi dzáguie' Cristo buzéajni'inë' zí'atëlö bönni' na' gulu'ë didza' uláz queë' Dios, en buluí'inë' légaquie' ca ral-la' quí'i sáquë'ë Cristo, enca' ca gaca queë' yöl-la' zxon tödi na'. Que lë ni na' gulu'í' ládžigaquie' ila'nöžinë' bätaxi gaca lë ni, en nuzxi na' gaca que lë na' buluí'inë' Bö' dzáguie' Cristo légaquie'. ¹² Dios buluí'inë' bönni' na' gulu'ë didza' uláz queë' bití' naca tu le ila'lé'enë' légaquie', pero rë'u ni rilé'ëru' lë na' gulu'ë didza' que, ate' libí'ili' riyönili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquie', Nu na' risól-lë'ë Dios zoë' yehua' yubá queëru', ate' té'ënnë' gubáz lá'ayi queë' Dios ila'nöžinë' ca naca lë na' gulu'ë didza' que dza ni'te.

Dios rulidžë' rë'u para gácaru' lá'ayi

¹³ Que lë ni na', guli'sóca ban ladxi', en guli'cözatica'sö bá'ado'. Idú ládžili' buli'zxon ládžili' lë na' uzá' ládžë'ë queéli' Dios dza ni' uluí'i lahuë' Jesucristo. ¹⁴ Guli'gún ca rnaa xtídzë'ë Dios, en bití' gü'ili' lataj yugu' le rizë ládžili' ila'chë' libí'ili' ga yúbölö, ca na' benli' dza ni' bití' núnbë'ënili'-në' Dios. ¹⁵ Ral-la' gácali' lá'ayi ca naca yúgu'të le runli', ca na' náquie' lá'ayi Dios, en bulidžë' libí'ili' para guéquili' queë'. ¹⁶ Lësca' caní nazúaj lu guichi lá'ayi, ca na' gunnë' Dios le rnaa: "Guli'gaca lá'ayi, tu' naca' neda' lá'ayi."

17 Rëli'-në': "Xuztu" cate' rulídzali'-në' Dios, ate' Lë', lëbisö ca ruchí'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládzali'. 18 Dios busölë' libí'ili' lu lë na' gúcali' dza ni' cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata, 19 pero len xichönë' Jesucristo le nácatërö lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. 20 Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga buluí'i lahuë' para uzí'ili' xibë'. 21 Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'li' Lë'.

22 Na'a, chinún cuinli' dxi'a tu' runli' ca rnna le naca idútë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxi'ili' luzá'ali' tuli' ia'tuli'. 23 Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö. 24 Caní naca, tu' nazúaj lu guichi lá'ayi le rnna:

Yúgu'të bönachi nácagaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

25 pero xtídzë'ë Dios zóatica'sö.

Didza' ni bidxín queëli' lu didza' dxi'a.

2

1 Que lë ni na', guli'cá'ana yúgu'të le ruá' dö'. Bítirö si' yë'ëli', en bití' ubéaj dxi'a cuinli' lógaca bönachi. Bítirö uzxé'eli', en bití' innëli' que luzá'ali'. 2 Ral-la' së ládxi'li' le naca queë' Dios Bö' Lá'ayi para gálali' ca na' tunbí' bí'i huë'ënido', ta'zé ládxi'bi' nidxi'. Caní ral-la' gunli' ga idxinrö dza uláli', 3 channö réquibe'eli' náquië' Xanru' dxi'i ladxi'.

Cristo náquië' ca tu guiöj naca ban

4 Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö.

5 Lësca' caní, libí'ili' nácali' ca yugu' guiöj nabángaca. Guli'güí' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queëli' lahuë' Dios, lë na' raza ládxe'ë Dios. 6 Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiöj lo squin zö'ö,

le gurö caza' neda', en naca lesaca'.

Nu réajlë' Lë', bití' ichixi inigui.

7 Naca guiöj ni queëli' libí'ili' na' réajlë'ëli' Cristo tu le nazáca'da', pero quégaca nupa bití' ta'yéajlë' Cristo, naca ca na' nazúaj lu guichi lá'ayi le rnna: Guiöj na' bulu'zöë' bönni' tu'cu'ë zö'ö tsölá'alö,

tu' guléquinë' naca cá'asö,

guiöj ni chinaca guiöj lo squin zö'ö.

8 Lësca' caní nazúaj lu guichi lá'ayi le rnna:

Guiöj ni gun ga tsöjchégu'gaca bönachi,

en gun ga tsöjtsö'ögaca.

Le nácatë yöjchégu'gaquië' bönni' bití' ta'yéajlë'ë Cristo, tu' gula'chíxinë' cate' bulu'zöë' xtídzë'ë Dios tsölá'alö. Dios bucu'ë légaquië' para ilunë' caní.

Nupa néquiquequi quez queë' Dios

⁹ Libí'ili' nácali' bönachi gurö cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzo nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atëlö bití' gúcali' bönachi queë' Dios, pero na'a chinácali' bönachi queë'.

Zí'atëlö cuntú nu buéchi' ladxi' libí'ili', pero na'a Dios caz ruhuéchi' ládxë'ë libí'ili'.

Zóaru' nabanru' para gunru' ca rë'ënë' Dios

¹¹ Böchi' luzá'ado', nácali' ca bönachi zítu', en ridásili' yödzölió ni. Que lë ni na', ráta'yua' loli', bití' güi'ili' lataj ila'nná be'e le rizësö ládxi'li' libí'ili', yugu' le ta'díl-lalen bö' naca cázali'. ¹² Guli'gún le naca dxi'a lógaca bönachi bití' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idútë yödzölió, tu' náquië' bönni' lo unná bë', ¹⁴ o channö náquië' bönni' rinná bé'enë' tu yödzo, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. ¹⁵ Caní rë'ënë' Dios gunli' para ila'bö' dxíë' yugu' bönni' bití' bi nözguequinë', en bití' núnbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazángaqüë', pero bití' ugunli' dxin yöl-la' nazán queéli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

¹⁷ Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzölió.

Le gudí'i guzxáquë'ë Cristo ruzéajni'i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tuí'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zí'ë libí'ili' lu dxin runli' quégaquië'. ¹⁹ Channö quí'i sáca'li', en bití' bi nabága'li', ate' guá' ilenli' lë na' tu' réquili' naca ca rë'ënë' Dios, urúajli' tsahui' lahuë' Dios. ²⁰ Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' riböza zxön ladxi' queéli' guá' ilenli' lë na' gaca queéli'? Channö ribözali' zxön ladxi', en ruá' rilenli' le riguí'i rizáca'li', ate' benli' le naca dxi'a, ní'irö urúajli' dxi'a lahuë' Dios. ²¹ Dios bulidzë' libí'ili' para quí'i sáca'li' caní, tu' gudí'i guzxáquë'ë Lë cazë' Cristo uláz queéli', en buzóë' queéli' tu le ruluí'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'.

²² Cristo bití' bi dul-la' benë', en catu caz guzxí' yë'ë.

²³ Cate' bulu'dídza' yúdxinë' Lë', bití' butsaqui yúdxinë' légaquië'.

Cate' bulu'saca' zí'ë Lë',

bití' buzenë' légaquië' le bach,

pero budödi cuinë' lu në'ë Dios,

Nu na' ruchí'a rusöröë' le runru' ca sa'yéaj.

²⁴ Lë cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huóácaru' rë'u dxi'a. ²⁵ Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

3

Ca ral-la' ilún nupa nutsaga ná'gaca

¹⁻² Lësca' caní, libí'ili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ru'ilenli' légaquië' ca naca queë' Cristo. ³ Yöl-la' lachi queëli' biti' naca le zoa láchuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'. ⁴ Yöl-la' lachi queëli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. ⁵ Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. ⁶ Caní bennu Sara, tu' bennu ca rnna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

⁷ Lësca' caní, libí'ili', bönni', ral-la' gü'i ládxi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la' queëli', pero lësca' tu' nadéli'gacanu yöl-la' na'bán na' runnë' Dios queëru', lëbisö ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-në' Dios.

Huagu'i huazáca'ru' sal-la' gunru' le naca dxi'a

⁸ Ga ruúdxitë, guli'gaca tuz tuli' len ia'tuli' yúgu'tëli', en guli'güi' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. ⁹ Biti' ubí'ili', cabí guá'ali' dö' que nu ruá' dö' queëli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba. ¹⁰ Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxí'ado', ral-la' ucá'anë' didza' xihui', en cabirö si' yë'ë.

¹¹ Ral-la' ucá'anë' le ruá' dö', en gunë' le naca dxi'a.

Ral-la' gü'i ládxi'ë cözë' zxön ladxi', en gúntica'së' caní,

¹² Xanru' rapa chi'ë yugu' bönni' tsahui'

en ruzë náguië' le tu'lidzë' Lë',

pero ruzáguë'ë xinözguequi nupa tua' dö'.

¹³ ¿Nuzxi' caz guá' dö' queëli' channö ru'i ládxi'li' gúntica'sili' le naca tsahui'?

¹⁴ Sal-la' quí'í sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' ¹⁵ pero buli'zxöni ládxi'li'-në' Cristo, en gü'ili' Lë' lataj inná bé'enë' lu icja ládxi'do'oli'. Guli'sóa sina' quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxi' queëli', en lu yöl-la' run bal nupa na'. ¹⁶ Guli'gúntica'sö le naca dxi'a lahuë' Dios, en channö nacua' nupa ta'nnë xihui' que le naca tsahui' runli' tu' réajlë'ëli' Cristo, ní'irö ulu'tuí' tu' nözi le ta'nnë queëli'. ¹⁷ Channö quí'í sáca'li', dxí'arö gaca channö naca tu' runli' le naca dxi'a, en calëga tu' ruá'ali' dö', channö Dios ré'ënë' quí'í sáca'li' caní.

¹⁸ Lë cazë' Cristo gudí'i guzráquë'ë, en gútië' uláz queëru' para bugúë' dul-la' nabága'ru'. Lë' náquië' dxi'a, pero gútië' ni'a queëru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. ¹⁹ Lu bö' naca cazë' guyijë' yöjenë' libán lógaca bö' nadzúngaca. ²⁰ Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxön ladxi' queë', en biti' busiúdxë' légaquië', tsanni ni' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. ²¹ Nisa ni' naca tu le rulu'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero rulu'i ru'i ládi'ru' gaca dxi'a icja ládi'do'oru' lahuë' Dios. ²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

4

Ral-la' ugunru' dxin yöl-la' huáca queë' Dios para gunru' xichinë' Cristo

¹ Que lë ni na', ca na' gudí'i guzráquë'ë Cristo lu le naca cazë', lë'sca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca rë'enë' Dios, en calëga ca rizësö ládi'li' lu yöl-la' bönachi queëli'. ³ Tscá'ti' gaz le chibenli' chibenli'. Biti'rö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzë ládi'li' le ruá' dö'. Guzúdxili'. Gudödi bë' güi' gudáguli', en guyéaj ládi'li' budó' guiöj budó' yaga, le rigútinë' Dios. ⁴ Na'a, tu'bánninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. ⁵ Légaquië' run bayudxi ulu'lu'i cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. ⁶ Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzölió ni, ca na' ruchí'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nátagaca caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládi'li' para gaca ulídzali'-në' Dios. ⁸ Tu' runtë bayudxi, guli'dxi'i luzá'ali' tuli' ia'tuli', ate' channö dzágali' lu yöl-la' nadxi'i, gácali' sina' uniti loli' yugu' luzá'ali' tua' dö' queëli'. ⁹ Guli'güi' lataj ila'cuá' böchi' luzá'ali' lídxili', en biti' innëli' quégaquië'. ¹⁰ Ral-la' ugunli' dxí'ado' dxin yugu' le buzá ládi'ë' Dios queëli', en gácalenli' luzá'ali' tuli' ia'tuli'. ¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatíca'sö queë' Dios yöl-la' ba, en yöl-la' unná bë'! ¡Ca' gaca!

Le ila'guí'i ila'zaca' bönachi ta'yéajlë' Cristo

¹² Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbë'gaca bönachi. ¹³ Guli'dzëjade'e tu' dë lataj queëli' gunli'-në' tsözxön Cristo lu le riguí'i rizáquë'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxön queë'. ¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzölió ni tu'dzaga yudxi Lë', pero libí'ili' runli'-në' bal. ¹⁵ Channö riguí'i rizáquë'ë nu bönni' dzágüië' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö. ¹⁶ Na'a, channö nülöli' riguí'i rizáca'li' tu' dá'ali'

Cristo, biti' ral-la' utuí'ili', pero guli'cu'ë Dios yöl-la' ba tu' nazi' lali' bönachi queë' Cristo.

¹⁷ Chibidxín dza isí lahuë' Dios uchi'a usöröë' bönachi rö queë'. Channö zí'alö uchi'a usöröë' rë'u, ¿nácxitëro gaca quégaca nupa biti' túngaca ca rnna didza' dxi'a queë' Dios? ¹⁸ Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? ¹⁹ Caní naca, yugu' bönni' ni ta'guí' ta'zaquë' tu' rë'enë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

5

Pedro ruzéajni'inë' nupa ta'yéajlë' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzáquë'ë Cristo, ate' guna' ca' tsözxön libí'ili', uzí'iru' xibé yöl-la' zxön na' ilá' lahui. ² Guli'gaca ca bönni' tu'yüë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca rë'enë' Dios, en calëga tu' run bayudxi queëli', o tu' rizë ládxi'li' dumí. Guli'gún xichinli' tu rë'ënisili', ³ en calëga tu' rë'ënilí' inná bé'esili' nupa na' nagu'ë lu ná'ali'. Guli'güí' ládxi'li' gácali' tu le ruluí'i ca ral-la' ilaca nupa na' run chí'ili'. ⁴ Caní naca, cate' uluí'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

⁵ Lësca' caní, bi'i cuidi', guli'gún ca ta'nnë' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nöxaj ladxi' queëli', tu' nazúaj lu guichi lá'ayi le rnna:

Dios ruzáguë'ë xinözguequi nupa tun ba zxön cuínguequi pero rácalenë' nupa nácagaca nöxaj ladxi'.

⁶ Guli'sóa nöxaj ladxi' lu në'ë Dios, ate' Lë' uchisë' libí'ili' cate' izá'a dza. ⁷ Guli'cú'u yúgu'të le run ga ruúbi ruguí'ili' lu në'ë Dios, tu' ruí'i ládxi'ë libí'ili'.

⁸ Guli'gaca ba'a ladxi', en buli'subán ládxi'li', tu' zoa tu' xihui', nu biti' rilé'ë libí'ili' dxi'a, ridá idú gásibi'ilö, en naca ca tuba' bëdxi guixi' ribödxi'aba', riguiljba' nu gáguba'. ⁹ Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nözili' ta'guí'i ta'zaquë'ë böchi' luzá'ali' idútë yödzülió ni ca na' riguí'i rizáca'li' libí'ili'. ¹⁰ Ní'irö cate' chigudí'i guzáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxi'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo.

¹¹ ¡Gácatíca'sö yöl-la' ba, en yöl-la' unná bë' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxi'. Rë'ënda' utipa' ládxi'li', en runa' ba nalí loli', le nácatë lë ni naca le ruzá' ládxi'ë queëru' Dios. ¡Guli'gaca tsutsu tu' ruzí'ili' xibé lë ni!

¹³ Yugu' bönachi queë' Cristo nacua' Babilonia tu'gapa Dios libí'ili'. Dios gurö cazë' léguequi ca na' guröë' libí'ili'. Lësca' bi'i Marcos rugápabi' Dios libí'ili'. Nácabi' ca zxi'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxi'i queëli' luzá'ali' unída'li' luzá'ali' tuli' ia'tuli'.

Rinábida'në' Dios gunë' ga soa dxi' icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJË' PEDRO

Pedro rugapë' Dios nupa ta'dá' Cristo

¹ Neda', Simón Pedro, naca' huen dxin queë' Jesucristo, en gubáz nasöl-lë'ë Lë'. Rugapa' Dios libí'ili', réajlë'ëli'-në' Jesús. Lëbisö ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusölá rë'u, tsahui'. ² Rinábida'-në' Dios gunë' ga gata' queëli' idútë le ruzá' lãdxë'ë queëru', en gunë' ga soa dxi icja lãdxi'do'oli' tu' núnbë'ëli'-në' Dios, enca' Xanru' Jesús.

Le nácagaca nupa ta'yéajlë' Cristo

³ Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a lãdxi', tu' núnbë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. ⁴ Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dõ' raca yödžolió ni tu' ta'zë lãdxi'gaca bõnachi le cabí naca tsahui'. Nuláru' para gácaru' ca náquië' Lë cazë' Dios. ⁵ Que lë ni na':

Channö réajlë'ëli' Cristo,

guli'güi' lãdxi'li' gácali' dxi'i lãdxi'.

Channö chinácali' dxi'i lãdxi',

guli'güi' lãdxi'li' gata' ca' queëli' yöl-la' rácada'.

⁶ Channö nápali' yöl-la' rácada',

guli'güi' lãdxi'li' inná be'e cuinli'.

Channö rinná be'e cuinli',

guli'cõza zxön lãdxi'.

Channö ribõzali' zxön lãdxi',

guli'sóa ba'a lãdxi'.

⁷ Channö zóali' ba'a lãdxi',

guli'dxi'i luzá'ali'.

Channö nãdxi'ili' luzá'ali',

guli'dxi'i ca' yúgu'të bõnachi.

⁸ Channö caní runli', en zeaj rácarõ idú ca runli' caní, lë ni gun ga bití' gaca nítisö yöl-la' réajlë' queëli' Lë', ate' tseaj gácarõ idú ca núnbë'ëli'-në' Xanru' Jesucristo. ⁹ Nu bõnni' bití' ruí' lãdxë'ë gunë' caní, náquië' ca tu bõnni' nachul-la nanítië', tu' chizá' ral-la lãdxë'ë bunë' Cristo lë' tsahui', en bugúë' yugu' dul-la' gubáguë'ë zí'atëlö. ¹⁰ Que lë ni na', böchi' luzá'ado', ral-la' güi'itëro lãdxi'li' guéquibe'eli' bulidzë' Dios libí'ili', en gurõ cazë' libí'ili'. Channö gunli' caní, bití' ca' ichixi iníguili'. ¹¹ Caní gaca, idú lãdxë'ë Dios gúnasë' queëli' lataj tsázali' ga inná bë'tica'së' Xanru' Jesucristo, Nu rusölá rë'u.

¹² Que lë ni na' gúntica'sa' ga tsõjnëli' yugu' lë ni sal-la' chinõz quézili' le, en rugunli' dxin le naca idútë li na' chiguzxi' lu ná'ali'. ¹³ Runi neda' ral-la' usubana' lãdxi'li' ca nácagaca lë ni tsanni ni zoa' nabana'. ¹⁴ Ral-la' guna' caní tu' nõzda' si' gátia'. Xanru' Jesucristo chigudxi' cazë' neda' gaca caní quia'.

¹⁵ Que lë ni na' ruí'ida' lãdxa'a guna' ga tsõjnética'sili' yugu' lë ni tõi gátia'.

Nupa bila'lé'e yöl-la' zxön queë' Cristo

¹⁶ Bití' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. ¹⁷ Bilé'etu' Lë' cate'

Xúziru' Dios benë' Lë' bal, en bë'ë Lë' yöl-la' zxon, ate' biyön chi'ë Dios, le birúaj lataj bení' queë', cate' gunné': "Bönni' ni náquië' Zxi'ina'. Nadxi'ida' Lë', en raza ládxa'a Lë'." ¹⁸ Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

¹⁹ Lë' na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' gü'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bölaj hui sila queëru'. ²⁰ Lë' ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. ²¹ Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

2

Ca nácgaca nupa tu'sédinë' le cabí nácatë

¹ Yugu' bönni' ta'zí' yë'ë gula'cuá'lenë' bönachi Israel, en gula'nnë' nácgacquië' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queëli' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. ² Zianli' libí'ili' gunli' légaquië' tsözxön lu le ruá' dö' ilunë', ate' tu' gunli' bál-lali' caní ila'nnë xihui' bönachi que didza' dxi'a le naca idútë li. ³ Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queëli'. Chinarugu quégaquië' bönni' ni, ate' naca löza ila'nítië' tsaz.

⁴ Dios bití' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. ⁵ Lësca' caní, bití' buniti lahuë' bönachi gula'cuá' dza ni'te cate' gusöl-lë'ë nisa guiöj le busuniti yödzölió le beti bönachi nácgaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. ⁶ Lësca' caní, Dios guchúguië' quégaca bönachi gula'cuá' yödzö Sodoma, en yödzö Gomorra. Busunítië' léguequi lu guí', ate' bulu'huóaca dö. Le guca quéguequi naca tu le ruluí'i le run gadxi nupa tua' dö'. ⁷ Cate' busunítië' yugu' yödzö na', Dios busölë' Lot, tu bönni' tsahui', lu guí' na'. Buí'inida' ládxi'ë Lot cate' bilé'enë' le xihui' gulún bönachi tuá' dö' na'. ⁸ Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxi'ë yúgu'të dza ni'a que yugu' le cabí naca tsahui' gulúngaca. ⁹ Caní naca, Xanru' nözinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa bití' nácgaca tsahui' ga idxinrö dza ichúguië' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë ládxi'ë le ruá' dö', en ta'dá'baguie' yöl-la' unná bë' queë' Xanru'. Nácgacquië' rugu ladxi', en zidi ladxi'. Bití' tádxinë' tu'lidza ditjë' gubáz lá'ayi ta'dë' lu bení'. ¹¹ Gubáz lá'ayi na' nápagacatëre' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni nácgacquië' ca böa' guixi', bití' bi ta'yéajni'iba', pero náljagacaba' para nu sön légacaba', en guti légacaba'. Ta'nnë xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. ¹³ Dios ubi'ë quégaquië' le ila'guí'i ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Nácgacquië' ca tu huë' nudzu', en tu le

run ditaj cate' ni' tahuë' tsözxön len libí'ili', ate' tu'dzéjanë' tu' ta'zí' yé'enë' libí'ili'.

¹⁴ Lu yöl-la' rizë' ladxi' quégaquië' le ruá' dö' tu'yüë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa bití' nacagaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chinuchúguië' quégaquië' ilátigaquië'. ¹⁵ Bulu'cá'anë' le naca idútë li, ate' nachul-la nanítigaquië'. Tunë' ca benë' Balaam, zxí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'. ¹⁶ Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tuí' didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Nácagaquië' bönni' ni ca tu buduá' chibuí'i nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la. ¹⁸ Caní nácagaquië' tu' tu'ë didza' yugu' le zxön lu yöl-la' bití' bi nözi quégaquië', en tu'gunë' dxin yugu' le ta'zë' ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nacagaca chul-la niti. ¹⁹ Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxi'do'gaquië'. ²⁰ Channö bulu'lë' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatëre' xíguia' ga röjsetë ca le gula'báguë'ë zí'alö. ²¹ Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. ²² Chibudxín quégaquië' didza' na' rnna:

Ruhuécjaba' bö'cu', ruhuöáguba' le si' gúbaba'.

Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca nacagaca lë ni. ² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

³ Ral-la' tsöjnéli' lë ni naca lo. Dza tsöjsëtëgaca ulu'luí'i lahuë' bönni' ilunë' le ta'zë' ládxe'ë le ruá' dö'. ⁴ Ulu'titjë', ila'nnë': "¿Gazxi caz lë na' guzxí' lu në'ë Cristo? Gunnë': Huöda' leyúbölö. Dza ni'te cate' gulatië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza." ⁵ Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. ⁶ Len nisa ca' busunítië' Dios yödzölió dza ni'te cate' ni' gusól-lë'ë nisa guiöj le beti yugu' bönachi dul-la'. ⁷ Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi bití' nacagaca tsahui' gátigaca.

⁸ Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nacagaca queë' ca tu dza. ⁹ Biti' ridzenë' Xanru' gunë' le guzxí' lu në'ë gunë'. Téquiguequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i ládxi'gaca yúgu'të bönachi.

¹⁰ Tsárido'os idxín dza huödë' Xanru' ca ridxinë' tu bönni' gubán chi'i dzö'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí' zxön. Ila'yegui yödzölió ni, en le nacuá' yödzölió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. ¹² Ral-la' cözali' dza huödë' Xanru', en güi'í ládxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacuá' ni lu guí'. ¹³ Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribözali' yugu' lë ni, guli'güi' ládxi'li' gácali' idú tsahui' lahuë' Dios, ate' gunli' ga cuntú nu bi gaca innë queéli', en cözali' dxí'ado' cate' idxinrö dza ni'. ¹⁵ Ral-la' inözili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queéli' lu guichi, zóalen lë' yöl-la' réajni'í na' bë'ë Xanru' queë'. ¹⁶ Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zí ye'e bönachi biti' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. ¹⁸ Guli'güi' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

DÍDZA'DO' ZÍ'ALÖ BUZÚAJĚ' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bëë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. ² Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í lahuë' ga zóaru'. ³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. ⁴ Ruzúajtu' queëli' lu guichi lë ni para gaca udzëjaru' idú ládxi'ru'.

Dios náquië' bení'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la que dul-la' bití' zóalen Lë'. ⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yë'ëru', en bití' runru' le naca idútë li. ⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

⁸ Channö rnnaru': "Bití' bi dul-la' runru'", rizí' yé'ëru' la' cuínsiru', en bití' nazí' lu ná'aru' le naca idútë li. ⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugüë' yúgu'të le ruá' dö' dzaga rë'u. ¹⁰ Channö innaru': "Bití' bi dul-la' nabága'ru'", naca ca innaru': "Dios rizí' yë'ë", ate' bití' runru' ca rna xtídzë'ë.

2

Cristo náquië' Nu rudödi xtídzaru' lahuë' Dios

¹ Libí'ili', zxí'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'. ² Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calëgasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödzölió.

³ Channö runru' ca naca le gunná bé'enë' rë'u, nöziru' chinúnbë'ëru' Lë'. ⁴ Nu rna: "Neda' núnbë'a-në' Dios" pero bití' run ca rinná bë' xibá queë', nu ni rizí' yë', en bití' run le naca idútë li. ⁵ Nu run ca rna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nöziru' néquiru' queë' Dios. ⁶ Lësca' caní, nu rna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödzölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Bití' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyöñili' dza ni'te. ⁸ Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rna, ate' runli' ca' libí'ili' ca rna, tu' chiridödi que le naca chul-la que dul-la', ate' bení' idú chiruzení'.

⁹ Nu rnna: “Zoa’ lu bení’”, pero biti’ rilé’e dxi’a böchi’ luzé’e, nu ni ni run le naca chul-la que dul-la’. ¹⁰ Nu nadxí’i böchi’ luzé’e zoa lu bení’, ate’ le run ga nu ichixi inigui biti’ zóalen nu na’. ¹¹ Le naca chul-la que dul-la’ run ga nu biti’ rilé’e dxi’a böchi’ luzé’e, en ga ridá nu na’ ga chul-la. Biti’ nözi ga zeaj, tu’ run le naca chul-la na’ ga nachul-la naniti nu na’.

¹² Ruzúaja’ queéli’ lu guichi, zxi’ina’do’, tu’ chibunít lahuë’ Dios dul-la’ nabága’li’, tu’ runë’ le guzxí’ lu në’e gunë’. ¹³ Ruzúaja’ queéli’ lu guichi, libí’ili’ nácali’ xuz, tu’ núnbë’ëli’ Nu na’ zoa caz dza ni’te. Ruzúaja’ queéli’ lu guichi, bi’i ra’bán, tu’ chibucúl-lali’ tu’ xihui’.

¹⁴ Chibuzúaja’ queéli’ lu guichi, zxi’ina’do’, tu’ núnbë’ëli’-në’ Dios Xuz. Chibuzúaja’ queéli’ lu guichi, libí’ili’ nácali’ xuz, tu’ núnbë’ëli’ Nu na’ zoa caz dza ni’te. Chibuzúaja’ queéli’ lu guichi, bi’i ra’bán, tu’ nácali’ bi’i nál-la, en nazí’ lu ná’ali’ xtídzë’ë Dios, en chibucúl-lali’ tu’ xihui’.

¹⁵ Biti’ idxí’isili’ yödzölió ni, en calëga le dë yödzölió ni. Channö zoa nu nadxí’i yödzölió, biti’ nadxí’i Dios Xuz. ¹⁶ Caní naca, tu’ naca le tun bönachi yödzölió ni le cabí ré’ënë’ Dios Xuz, pero naca le té’ëni bönachi yödzölió ni.

Tunë’ le riyaza ladxi’ yöl-la’ bönáchisö quëgaquië’.

Tunë’ le ruá’ dö’ le ridani guiöj lógaquië’.

Tun ba zxon cuíngaquië’ ni’a que le dë quëgaquië’.

Caní nacagaca le ruá’ dö’ tunë’. ¹⁷ Huadödi que yödzölió ni, enca’ que le ta’zë ládxi’gaca bönachi, pero nu run ca ré’ënë’ Dios sóatica’sö.

Nu ruí’i didza’ idútë li, en nu rizí’ yë’

¹⁸ Zxi’ina’do’, chizóaru’ dza údxi, en ca na’ chibiyónili’ huidë’ bönni’ ridá’baguë’ë Cristo, lësca’ na’a chigusí lo nacué zían bönni’ ta’dá’baguë’ë Cristo. Que lë ni na’ nöziru’ chizóaru’ dza údxi. ¹⁹ Bila’rúajë’ bönni’ caní ládjaru’, pero biti’ guláquië’ tuz len ré’u. La’ tu’ guláquië’ tuz len ré’u, ila’cuá’lenticasë’ ré’u. Na’a, bila’rúajë’ para gaca bë’ biti’ nacagaquië’ yúgu’të’ tuz len ré’u.

²⁰ Na’a, Bö’ Lá’ayi nagú’u Nu naca lá’ayi ré’u, chizóalen libí’ili’, ate’ nöz quézili’ yúgu’të. ²¹ Buzúaja’ queéli’ lu guichi, tu’ chinözili’ le naca idútë li, en calëga tu’ cabí nözili’ le. Nözili’ ca’ biti’ ca’ rizí’ yë’ nu nözi le naca idútë li.

²² ¿Nuzxi caz na’ nu rizí’ yë’? ¿Naru’ cabí naca nu na’ ridá’baga’ náquië’ Jesús Nu gusöl-lë’ë Dios? Naca nu ni bönni’ ridá’baguë’ë Cristo, tu’ ridá’baguë’ë náquië’ Dios Xuzë’ Jesús, en ridá’baguë’ë ca’ náquië’ Jesús Zxi’inë’ Dios. ²³ Núti’tës nu ridá’baga’ Dios Zxi’ini, biti’ ca’ zóalenë’ Dios Xuz nu na’. Núti’tës nu rnna yálajdo’ Jesús náquië’ Zxi’inë’ Dios, lësca’ zóalenë’ Dios Xuz nu na’.

²⁴ Na’a, guli’gü’ lataj le biyónili’ dza ni’te ugá’analenticasö libí’ili’. Channö le biyónili’ dza ni’te ugá’analenticasö libí’ili’, lësca’ libí’ili’ ugá’analenticasili’-në’ Dios Zxi’ini, enca’ len Dios Xuz. ²⁵ Le guzxí’ lu në’e Dios naca lë ni: Gunnë’ gunnë’ yöl-la’ na’bán idú queëru’.

²⁶ Chibuzúaja’ queéli’ lu guichi lë ni ca naca quëgaca nupa ta’zì’ ye’e libí’ili’.

²⁷ Na’a, zóalenë’ Dios Bö’ Lá’ayi libí’ili’. Cristo gusöl-lë’ë Lë’ queéli’, ate’ Lë’ cazë’ zóalenticasë’ libí’ili’. Que lë ni na’ biti’ riquínili’ nu usedi libí’ili’, tu’ chizóalen Nu na’ libí’ili’, en rusedi libí’ili’. Didza’ idútë li ru’ë Lë’, en biti’ rizí’ yë’ë. Ca na’ chinazédali’, guli’sóalenticasë’ Cristo.

²⁸ Na’a, zxi’ina’do’, guli’sóalenticasë’ Cristo para cate’ uluí’i lahuë’ Lë’, gácaru’ rugu ladxi’, en biti’ utuí’iru’ sóaru’ lahuë’ Lë’ cate’ huödë’. ²⁹ Channö nözili’ náquië’ Dios tsahui’, ral-la’ inözili’ ca’ yúgu’të nupa tun le naca tsahui’ nacagaca zxi’inë’ Dios.

3

Nupa nacagaca zxi’inë’ Dios

¹ Buli'yú ca nadxí'ide'enë' Dios Xuz rë'u, benë' ga nazí'i laru' zxi'inë' Dios caz. Que lë ni na' bönachi yödzülió ni bití' ca' núnbë'gaca le nácaru', tu' cabí gulúnbe'e Jesús. ² Böchi' luzá'ado', na'a chinácaru' zxi'inë' Dios, en bití' naca bé'eni le ral-la' gácaru'. Nöziru' cate' uluí'i lahuë' Jesús, gácaru' ca náquië' Lë', ate' ilë'eru'-në' catëz náquië' Lë'. ³ Núti'tës nu run löza gaca ca náquië' Jesús, ruí'i ladxí' nu na' gaca dxi'a ca na' náquië' Jesús dxi'a.

⁴ Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá. ⁵ Nözili' buluí'i lahuë' Jesús para bugüë' dul-la' nabágaru', en bití' bi dul-la' runë' Lë'. ⁶ Núti'tës nu dzaga Lë' bití' run dul-la'. Núti'tës nu run dul-la' catu caz bilé'e Jesús, en bití' núnbe'e Lë'. ⁷ Zxi'ina'do', guli'gún chi'i cuinlí' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. ⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' buduluí'i lahuë' Zxi'inë' Dios, para usunítië' yugu' le nun tu' xihui'.

⁹ Núti'tës nu naca zxi'inë' Dios bití' rúntica'sö dul-la', tu' zóaléntica'sö le guzxi' lu në'ë Dios Xuz nu na'. ¹⁰ Caní naca bë' nupa nácatagaca zxi'inë' Dios, en nupa nácatagaca zxi'ini tu' xihui'. Núti'tës nu bití' run le naca tsahui', en bití' nadxí'i böchi' luzé'e bití' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

¹¹ Lë ni naca didza' biyönili' dza ni'te, le rnna: Ral-la' idxí'iru' luzá'aru' turu' ia'turu'. ¹² Bití' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Böcha'ado', bití' ubánili' channö cabí ta'lé'e bönachi yödzülió ni libí'ili' dxi'a. ¹⁴ Nöziru' chigudódiru' lu yöl-la' guti, en chidë yöl-la' na'bán idú queëru' tu' nadxí'iru' yugu' böchi'ru'. Nu bití' nadxí'i böchi' luzé'e, chinati caz nu na'. ¹⁵ Núti'tës nu bití' rilé'e dxi'a böchi' luzé'e, naca huëti bönachi nu na', ate' nözili' nu ruti bönachi bití' dë yöl-la' na'bán idú que. ¹⁶ Caní núnbë'ëru' yöl-la' nadxí'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udódiru' yöl-la' na'bán queëru', para gácalenru' yugu' böchi'ru'. ¹⁷ Na'a, núti'tës nu dë yöl-la' tsahui' que, lë na' dë yödzülió ni, ate' rilé'e böchi' luzé'e, bi riyadzaj queë', en bití' ruhuéchi' ladxí' lë', bi unödzej queë', ¿naru' nadxí'itsö nu na' Dios? ¹⁸ Libí'ili', zxi'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ladxí'ru', enca' len idütë yöl-la' run queëru' ral-la' idxí'iru' luzá'aru'.

Le runru' löza lahuë' Dios

¹⁹⁻²⁰ Channö caní nadxí'iru' yugu' böchi' luzá'aru', nöziru' néquiru' que Nu na' naca idütë li, ate' lahuë' Dios huáca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nözinë' yúgu'të. ²¹ Böchi' luzá'ado', channö cabí ruxösa ladxí'do'oru' rë'u, dë le runru' löza lahuë' Dios ²² tu' nöziru' gunnë' queëru' bítitës bi inábaru' lahuë'. Caní naca, tu' runru' ca rinná bë' xibá queë', en le raza ladxë'ë Lë'. ²³ Lë ni naca xibá queë', para tséajlë'ëru'-në' Jesucristo, Zxi'inë' Dios, en idxí'iru' luzá'aru' ca na' chigunná bé'enë' rë'u. ²⁴ Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

4

Le naca bë' zóalenë' Dios Bö' Lá'ayi rë'u

¹ Böchi' luzá'ado', biti' tséajlë'ëli' núti'tës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zían bönni' ta'zí' yë'ë yödzülió ni. Ta'nnë' tu'ë didza' uláz queë' Dios. ² Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' bönachi. ³ Lësca' caní, biti' nequi queë' Dios nu bönni' biti' rnnë' yalaj lulu ca bidë' Jesucristo, rnnë' biti' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyönili' ral-la' guídë', ate' na'a chiridë' yödzülió ni.

⁴ Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzülió ni. ⁵ Légaquië' nácagaquië' bönachi yödzülió. Que lë ni na' tu'ë didza' que le naca que yödzülió, ate' bönachi yödzülió ni tu'zë nágagaca légaquië'. ⁶ Néquiru' rë'u queë' Dios. Nu nunbë' Dios ruzé nagui rë'u. Nu biti' nequi queë' Dios biti' ruzé nagui rë'u. Caní núnbë'ëru' nu na' yu'u le Bö' ruí'i didza' le naca idútë li, enca' nu na' yu'u le tu bö' rizí' yë'.

Náljalén Dios yöl-la' nadxí'i

⁷ Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzë'e náljalén ca' Dios, en núnbe'e Dios. ⁸ Nu biti' nadxí'i luzë'e, biti' núnbe'e Dios, tu' náljalén Dios yöl-la' nadxí'i. ⁹ Caní bulu'e lahui Dios ca nadxí'inë' rë'u, gusöl-lë'ë la's dui Zxí'ini cazë' yödzülió ni, para gata' yöl-la' na'bán idú queëru' ni'a queë' Lë'. ¹⁰ Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusöl-lë'ë Zxí'ini cazë' para gútië', en caní bugüë' dul-la' nabága'ru'.

¹¹ Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. ¹² Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'. ¹³ Nöziru' zóalenru'-në' Dios, ate' Lë' zóalenë' rë'u, tu' guchízië' Dios Bö' Lá'ayi rë'u. ¹⁴ Netu' bilé'etu' le benë' Dios Xuz, en runtu' ba nalí que. Lë' gusöl-lë'ë Zxí'ini cazë' Nu rusölá bönachi yödzülió. ¹⁵ Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzë'ë, zóalenë' bönni' na' Dios, ate' Dios zóalenë' lë'. ¹⁷ Caní run dxin yöl-la' nadxí'i lu icja ladxí'do'oru', run ga bítirö rádxiru' dza ichúguië' Dios quégaca bönachi ilátigaca. Ca náquië' Jesús, nácaru' ca' rë'u yödzülió ni. ¹⁸ Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ladxí'ru', runë' ga biti' rádxiru'. Nu radxi, riguí'i rizáca'a. Nu na' radxi, biti' nadxí'i Dios idú ladxí'.

¹⁹ Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. ²⁰ Channö nu inná: "Neda' nadxí'ida'-në' Dios", pero biti' rilé'e dxi'a böchi' luzë'e, nu ni rizí' yë'. Nu biti' nadxí'i böchi' luzë'e nu rilé'e caz, ¿nacxi caz gaca idxí'i Dios, en catu caz bilé'e Lë'? ²¹ Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë'e.

5

Ca gaca idéli'ru' lu le raca queëru' yödzülió ni

¹ Núti'tës bönni' réajlë'ë Jesús náquië' Cristo, náquië' zxí'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzë'ë nu naca bi'i queë' Dios. ² Caní réquibe'ëru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. ³ Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë na' rinná

bé'enë' rë'u bití' naca böniga. ⁴ Núti'tës bönni' náquië' bi'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. ⁵ ¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

Dios Bö' Lá'ayi runë' ba nalí queë' Cristo

⁶ Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idütë li didza' ru'ë Dios Bö' Lá'ayi. ⁷ Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácagaquië' tuz. ⁸ Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. ⁹ Channö si' lu ná'aru' le tun ba nalí bönachi, le runë' ba nalí Dios nácatërö lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'. ¹⁰ Nu réajlë' Zxí'inë' Dios, nazí lu në'e le nunë' ba nalí Dios. Nu cabí réajlë' Dios, naca ca rnna nu na': Dios rizi' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. ¹¹ Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. ¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca rë'ënë' Lë', Lë' riyönnë' rë'u. ¹⁵ Channö nöziru' riyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

¹⁶ Channö ilé'ëru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnní'a': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnní'a' inábali' que nu run dul-la' caní. ¹⁷ Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. ¹⁸ Nöziru' bití' rúntica'sö dul-la' nu naca zxí'inë' Dios, tu' rapa chi'ë Zxí'ini cazë' Dios nu na', ate' tu' xihui' bití' sequi' bi gun que.

¹⁹ Nöziru' yú'uru' lu në'ë Dios, ate' yúgu'të bönachi tuí'i ládxi'gaca le dë yödzölió ni yú'ugaca lu na' tu' xihui'.

²⁰ Na'a, nöziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idütë li. Zóalenru' Nu na' naca idütë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. ²¹ Zxí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

DÍDZA'DO' BUROPI BUZÚAJË' JUAN

Núnbë'ëru' le naca idútë li, en yöl-la' nadxí'i

¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxí'ida' libí'ili' tu' núnbë'ëru' le naca idútë li, en calëgasö neda', pero lësca' yúgu'të nupa chinúnbë'gaca le naca idútë li ta'dxí'i libí'ili'. ² Nadxí'itu' libí'ili' tu' núnbë'ëru' le naca idútë li, le zóalenticasö rë'u. ³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' lãdxë'ë queëli', en huéchi' lãdxë'ë libí'ili', en gunë' ga soa dxi icja lãdxí'do'oli' tu' núnbë'ëli' le naca idútë li, en nadxí'ili' luzá'ali'.

⁴ Budzëjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u. ⁵ Na'a, ráta'yua' lo', nigúlado', gunu' ca rinná bé' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. ⁶ Caní naca bé' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

Nupa të'ëni ila'z' ye'e rë'u

⁷ Lë ni riguíxjöi'ida' libí'ili', tu' chita'dá zian nupa ta'z' ye' yödzölió ni, nupa na' bití' ta'z' lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' ye', en nu ridá'baga' Cristo. ⁸ Guli'gún chi'i cuinli' para cabí initi le nadéli'li' tu' guzxi' lu na'li' Cristo, pero guli'gú' lãdxí'li' idéli'li' idútë li ral-la' sí'ili' lu në'ë Dios.

⁹ Nútí'tës nu riguela' nöza yúbölö, en rucá'ana xtídzë'ë Cristo, bití' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'. ¹⁰ Channö nútí'tës nu za' ga zóali', en rusedi xibá yúbölö, bití' ulébili' nu na' lídxili', en bití' guiëli' le: "Guyú'u len netu'." ¹¹ Nu rë le: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zian ral-la' uzúaja' queëli' lu guichi, bití' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzëjaru' idú lãdxí'ru'.

¹³ Zxi'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJË' JUAN

Le naca tsahui' runë' bönni' lë' Gayo

¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbë'ëru' le naca idútë li.

² Böcha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. ³ Rudzėjada' tu' ta'dxinë' yugu' böchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li. ⁴ Biti' bi dë le runrö ga rudzėjada' ca lë ni, riyönda' tun nupa nácgaca ca bi'i que caza' ca rna le naca idútë li.

⁵ Böcha'ado', runu' le naca tsahui', rácalenu' böchi'ru', en runu' ca' le nácarö lesaca', rácalenu' böchi'ru' bití' núnbe'enu' légaquië'. ⁶ Yugu' böchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxi'inu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. ⁷ Légaquië' bila'ruájë' ni tu' nadxi'igaquië' Jesús, en bití' bi ta'zi'ë lu ná'agaca bönachi bití' ta'dá' Cristo. ⁸ Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

Le cabí naca tsahui' runë' Diótréfes

⁹ Chibuzúaja' lu guichi le uzéajni'i bönachi queë' Cristo ni', pero Diótréfes, bönni' ni' raza ládxe'ë gáquië' lo ladjagaquië', bití' runë' netu' bal. ¹⁰ Que lë ni na', channö huida' ga zóali', usá'a ládxi'li' cate' udúbili' ca nácgaca le runë'. Rizí' quídzë'ë netu', en rnnë' queëtu' le cabí nácatë. Bití' rixxón ládxe'ë tsa lë nisö, pero lësca' bití' runë' bal böchi'ru' ta'dxinë' ni', ate' ruzáguë'ë xinözguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo.

¹¹ Böcha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

Le naca tsahui' runë' Demetrio

¹² Yúgu'të böchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nözili' nácatë lë ni runtu' ba nalí queë'.

Le rinabë' Juan lahuë' Dios

¹³ Ziánrö ca' le gú'unida' uzúaja' quiu' lu guichi, pero bití' ré'ënda' uzúaja' le lu guíchisö. ¹⁴ Na'a, runa' löza ilé'eteda' li', ate' gü'iru' didza' ruá'a cuinru'.

¹⁵ Rinábida'-në' Dios gunë' ga soa dxi icja ládxi'do'o. Nupa ni ta'dxi'i rë'u tu'gapa Dios li'. Lësca' li', bugapa Dios tu tu nupa ni' ta'dxi'i rë'u. ¡Ca' gaca!

DÍDZA 'DO' BUZÚAJË' JUDAS

Judas rugapë' Dios nupa nulidzë' Dios

¹ Neda', Judas, tsaz naca' huen dxin queë' Jesucristo, en naca' ca' böchë'ë Jacobo. Rugapa' Dios libí'ili', nulidzë' Dios Xuz libí'ili', en nadxí'inë' libí'ili', en rapa chí'ë libí'ili' tu' nácali' tuz len Jesucristo. ² Rë'ënda' inözili' ca ruhuéchi'da' ládxë'ë Dios libí'ili', en nadxí'ide'enë' libí'ili', enca' ruzóadë'ë dxi icja ládxi'do'oli'.

Nupa tu'sedi le cabí nácatë

³ Libí'ili', böchi' luzá'ado', gúcada' ládxa'a uzúaja' queëli' lu guichi ca naca yöl-la' rusölá nadéli'ru', pero run bayudxi uchízia' icja nágali' para idú ládxi'li' tíl-lalenli' nupa ta'dá'baga' le réajlë'ëru'-në' Dios, lë na' budödë' Dios tsaz lu ná'agaca nupa néquiquequi quez queë' para ulu'zë didza' que lógaca yúgu'të bönachi. ⁴ Caní run bayudxi guna' tu' bagáchi'sö chigula'yázalenë' bal-lë' bönni' rë'u, Dios buzóë' quégaquië' dza ni'te ichúguië' quégaquië' ila'nítië' tsaz. Biti' ta'yéaj ládxi'gaquië' Dios bönni' caní. Tu' zoa le ruzá' ládxë'ë Dios queëru', téquinë' huáca ilunë' le ruá' dö'. Ta'dá'baguë'ë Xanru' Jesucristo. Tuzë' Lë' rinná bé'enë' rë'u.

⁵ Chinöz quézili' lë ni, pero rë'ënda' usá'a ládxi'li' ca benë' Xanru' Dios. Sal-la' busölë' bönachi Israel cate' bubéajë' léguequi luyú Egipto, gudödi ni' busunítië' nupa bítsa'gaca ládjaguequi, en bití' gula'yéajlë' Lë'. ⁶ Lësca' caní, yugu' gubáz lá'ayi queë' Dios, nupa ni' bití' gulún xichíngaquië', pero bulu'cá'anë' xilátjagaquië', Dios busayjë' légaquië' tu' lataj chul-la. Nága'gaquië' tsaz ni' ga idxinrö dza usiúdxë' Dios yödzülió ni. ⁷ Lësca' caní guca quégaca yödzü Sodoma, en yödzü Gomorra, enca' yugu' yödzü dzágagaca léguequi. Ca na' gulunë' gubáz lá'ayi na', gula'dá'baguë'ë Dios, lësca' caní gulunë' bönni' yugu' lu yödzü na'. Bulu'dödi cuíngaquië' para gulunë' le ruá' dö', en le gula'zësö ládxi'gaquië' le tun ga nu rutuí'i. Na'a, tu' busaca' zi'ë Dios légaquië' lu guí' le cabirö ulu, lë na' guca quégaquië' naca tu le run gadxi yúgu'tëru', para cabí gunru' la' lëbisö.

⁸ Sal-la' gulaca lë ni, la' canísö tunë' bönni' ni, bönni' röjácalenë' yëla ta'nënë'. Tun dítjanë' idütë le naca cazë'. Ta'dá'baguë'ë le rinná bé'enë' Dios rë'u, en ta'nnë' zi'ë quégaca nupa ta'nná bë' yehua' yubá. ⁹ Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, bití' burúguinë' udxíë' dö' tu' xihui' na', pero gudxë' le: "Xanru' uzenë' li' bach." ¹⁰ Yugu' bönni' ni ta'nnë' zi'ë quégaca le runë' Dios, yugu' le bití' ta'yéajni'inë', ate' yugu' le ta'yéajni'inë' rácasö quégaquië' ca na' tunba' böa' guixi' bití' ta'yéajni'iba', lë ni tu'gunë' dxin, en caní tu'dxía dö' cuíngaquië'.

¹¹ Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguie' Moisés. ¹² Yugu' bönni' ni tágulenë' tsözxön libí'ili' cate' ráguli' yugu' guí'i huagu lu yöl-la' nadxí'i queëli'. Tunë' ga ta'chixi ta'nigui nupa dzágagaca libí'ili', tu' të'aj tagu lizë'. Náca'gaquië' ca yugu' bönni' ral-la' ulu'gágugaquië'-ba' bö'cu' zxila', pero la' cuíngacasë' tu'gahuë'. Náca'gaquië' ca böaj lúzxiba bití' nachë'gaca nisa, ate' ruá' bö' léguequi ná'alö ní'ilö. Náca'gaquië' ca' ca yugu' yaga chibidxín dza bi ila'bía, pero bití' bi ta'bía. Náca'gaquië' ca' ca yugu' yaga chigula'bidxi idú luí, en chinaládzugaca. ¹³ Náca'gaquië' ca' ca

nísado' cate' riyasa ridxía, ate' ribö' bidxina' que, læ na' rulu'í' ca naca yöl-la' stu' tunë'. Nácagaquië' ca yugu' böljaj lúzxiba nucá'anagacaba' xinözgcacaba'. Dios chinunë' quégaquië' ila'yázië' tsaz lataj chul-la.

¹⁴Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxí cö' zxi'ini xi'sóë' Adán. Gunnë': "Buli'yútsöca', zë'ë Xanru', ate' dzágagaca Lë' zían gayuá' bönachi néquiguequi quez queë'. ¹⁵Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'. ¹⁶Yugu' bönni' caní ta'nnë' queë', en ta'zi' quídzë'ë, en tunë' ca naca le ta'zësö ládxi'gaquië'. Tu'ë didza' lu yöl-la' run ba zxon cuíngaquië', en para ulu'zi'ë xibéquequi, tu'ë didza' le ta'gú'u bönachi yöl-la' zxon.

Judas rusë'ë ládxi'gaca nupa ta'yéajlë' Cristo

¹⁷Na'a, böchi' luzá'ado', guli'tsöjnë' yugu' didza' gulu'ë bönni' gubáz queë' Xanru' Jesucristo dza ni'te. ¹⁸Yugu' bönni' na' gulë' libí'ili': "Yugu' dza tsöjsëtëgaca ulu'lu'í' lógaquië' bönni' ulu'titjë' le naca lá'ayi, en ilunë' ca naca le ta'zësö ládxi'gaquië' le ruá' dö'." ¹⁹Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en biti' zóalenë' Dios Bö' Lá'ayi légaquië'.

²⁰Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. ²¹Buli'gá'analenë' Dios, Nu nadxí'í rë'u, en guli'cöza dza ni' ulu'í' lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queëru'.

²²Guli'gún ga ila'dipa ládxi'gaca nupa raca chopá ládxi'gaca. ²³Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi queéli' buli'huéchi' ládxi'li' ia'zíca'rö bönachi. Guli'gún chi'í cuinli', para cabí gunli' tsözxön légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxon

²⁴⁻²⁵Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxon, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULU'INĒ' DIOS JUAN

Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'ínë' yugu' huen dxin queë' ca naca le run bayudxi ilácatë. Jesucristo gusöl-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínë' neda' ca naca lë ni. ² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zë nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ládxë'ë queë'li, en gunë' ga cö'ö dxi icja ládxí'do'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bë'ë. ⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'inë' rë'u, en gudibë' rë'u, tu' bugúë' dul-la' nabága'ru' len xichönë' le bulaljë' lë'e yaga cruz, cate' gútië' uláz queë'ru'. ⁶ Jesucristo benë' ga rinná bë'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzxiba! ¡Ila'lé'e Lë' yúgu'të bönachi, enca' nupa ni' gulún Lë' huë', en bëtigaca Lë'! ¡Ila'bödxí yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulë'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxön riguí'i rizáca'lëna' libí'ili', en tsözxön len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxi' na' rnnë' Jesucristo queë'ru'. Nadzuna' tu luyú bidxi ni gatsaj láhui'lö nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. ¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chí'ë tu bönni' rulidzë' zidzaj. Biyön chí'ë ca ribödxí lúzuba' böa' bëdxí. ¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusöl-la' le quéguequi gadxi cö' bönachi quia' nacua' luyú Asia, nupa nacua':

Lu yödzö Éfeso,
 lu yödzö Esmirna,
 lu yödzö Pérgamo,
 lu yödzö Tiatira,
 lu yödzö Sardis,
 lu yödzö Filadelfia,
 lu yödzö Laodicea."

12 Buécja' para ilé'eda' Bönni' na' ruidzë' neda'. Cate' buécja', bilé'eda' gadxi le nuá'gaca guí' le néquiguequini oro. 13 Ladaj gadxi le nuá'gaca guí' na' bilé'eda' tu Bönni' rinë'ë ca tu bönni'. Nácüë' tu lari' tunna le ridxín xini'ë, en luchu'ë nasië' tu le néquini oro. 14 Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiöj lahuë' ca guí'. 15 Rëpi yösa bení' ni'ë ca guié bronze dxílido', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön. 16 Lu në'ë ibëla zxóagacaba' gadxi böljaj bení', ate' rirúaj didza' ru'ë le naca ca tu guié tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

17 Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. 18 Naca' Nu nabán caz. Gútia', ate' na'a zóaticá'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. 19 Buzúaj lu guichi lë na' chibilé'enu', en le raca na'a, enca' le ral-la' gaca tódi na'a. 20 Lë ni naca le nagachi' ca naca quégacaba' gadxi böljaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

2

Didza' gusöl-lë'ë yödzö Éfeso

1 Gunnë' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi böljaj bení' lu në'ë ibëla, en ridë' gatsaj láhui'lö gadxi le nuá'gaca guí' na' néquiguequini oro. 2 Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxí' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'. 3 Ribözali' zxön ladxi', en chigudí' guzxáca'li' tu' dá'ali' neda', pero biti' gucuidi' láchxi'li'. 4 Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö. 5 Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'ili' láchxi'li', en guli'gún ca na' benli' zí'alö. Channö cabí ubí'ili' láchxi'li', guídatia' queéli', ate' ugúa' le nuá' guí' queéli' xilataj. 6 Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj láchxi'gaca budó' guiöj budó' yaga, en tun le ruá' dö', lë na' lëscá' biti' rilé'eda' dxi'a. 7 Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzö Esmirna

8 Gunnë' ca': "Lëscá' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. 9 Caní rnnía': Neda' nöz quézida' le runli', en ca riguí' rizáca'li'. Nözda' nácali' yechi', pero le nácate' rilé'eli' yöl-la' tsahui' le naca idú. Nözda' ca' ca ta'nnë' queéli' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. 10 Biti' ca' gádxili' le ral-la' quí'li' sáca'li'. Tu' xihui' na' gun ga idzunli' bál-lali' libí'ili' lidxi' guié. Caní si' bë' libí'ili', ate' quí'li' sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queéli'. 11 Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo, rnnë': Nupa

ila'deli' lu le raca yödzölió, biti' bi gun yöl-la' guti quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

Didza' gusöl-lë'ë yödzö Pérgamo

¹² Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'. ¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzö Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bédxido' gulútigaquië'-ba' lógaca budó' guiöj budó' yaga, en gulunë' le ruá' dö'. ¹⁵ Lësca' caní nacuá'len libí'ili' nupa ni' nazí' lu në'eguequi xibá quégaca bönachi nicolaíta, lë na' biti' rilé'eda' neda' dxi'a. ¹⁶ Que lë ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquië' len didza' rirúaj ruá'a, le naca ca tu guié tuchi'. ¹⁷ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntú nu nunbë' le, pero núpasö na' ila'zí'i le, ilúnbë'e la na'."

Didza' gusöl-lë'ë yödzö Tiatira

¹⁸ Gunné' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca cá guí', ate' ni'ë nácagaca ca guié bronze dxíildo'. ¹⁹ Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ládxi' queëli'. Nözda' nácáro idú ca runli' yugu' lë ni ca benli' zí'alö. ²⁰ Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizi' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guiöj budó' yaga. ²¹ Neda' bë'a-nu lataj ubí'i ládxi'nu, pero biti' ré'ëninu ucá'ananu le ruá' dö' na' runnu. ²² Que lë ni na' chú'una'-nu tu le gátinu ga na' quí'i sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'. ²³ Guna' ga ilátibi' zxi'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queëli' tsca naca le runli'. ²⁴ Ia'zícá'li' zóali' yödzö Tiatira, nülöli' biti' nazí' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. ²⁵ Na'a, lë na' chinazí' lu ná'ali', guli'gún chi'i ga idxintë dza huöda'. ²⁶ Bönni' ni' ila'déli'në' lu le raca yödzölió, en ilunë' ca ré'ënda' neda' ga údxitë, neda' guna' ga ila'nná bé'enë' bönachi idútë yödzölió. ²⁷ Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guié, ate' ulu'zuzxjë' bönachi na' ca nu ruzxuzxaj zxiga' yö'öna néquini yu. ²⁸ Gu'a ca' le naca ca böläj hui sila quégaquië'. ²⁹ Nu riyöni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

3

Didza' gusöl-lë'ë yödzo Sardis

¹ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bōlaj bení' lu nē'ë ibēla, rnnë': Neda' nōz quézida' le ruá' dö' runli', en nōzda' chinati cázali' sal-la' téquiguequi bönachi zóali' nabanli'. ² Buli'subán lādxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' bití' naca idú tsahui' lahuë' Dios. ³ Guli'tsojné na'a xibá na' biyōnili' le guzxi' lu ná'ali'. Guli'gún ca rnna xtídzë'ë Dios, en buli'bí'i lādxi'li'. Channō cabí usubán lādxi'li', guída' ga zóali' tsárido'os ca na' ridxinë' tsárido'os gubán, en bití' inōzili' bizxi dza na' guída' ga zóali'. ⁴ Nacuá'len bal-la bönachi libí'ili' lu yödzo Sardis, nupa bití' nácagaca xihui'. Ila'dalen nupa ni neda', nácagaca lari' chiguíchido'os le ruluí'i nuhuóacagaca idú tsahui', en nácagaca lesaca' gaca caní quéguequi. ⁵ Nupa ila'deli' lu le raca yödzölió ugácuá' léguequi lari' chiguíchido'os, en bití' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Xuza' Dios, enca' lógaquië' gubáz lá'ayi queë'. ⁶ Nu riyōni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cō' bönachi quia' neda', Cristo, didza'."

Didza' gusöl-lë'ë yödzo Filadelfia

⁷ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idútë li, en dë lu nē'ë xzí'ini guíë queë' David, bönni' gunná bē'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. ⁸ Bönni' ni rnnë': Neda' nōz quézida' le runli'. Nōzda' náпали' láti'do'os yöl-la' huáca, pero runli' ca rnna xtídzá'a, en bití' rutuí'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntu nu gaca usayaj le. ⁹ Buli'yútsöca', ta'dé' bönni' ni' Satanás, tu' xihui', en ta'zí' yë'ë, ta'nnë' nácagaquië' bönachi judío ta'yéaj lādxi'gaca Dios, pero bití' nácagaquië' caní, guna' ga ila'dxinë' loli', en ulu'zechu zxíbigaquië' xiní'ali'. Ní'irō iléquibe'enë' nadxí'ida' libí'ili'. ¹⁰ Tu' benli' ca rnna xtídzá'a, en gulózali' zxōn lādxi', gun chi'a libí'ili' dza na' ila'guí'i ila'zaca' yúgu'të bönachi lu yödzölió ni, lë na' gaca para si' bē' léguequi. ¹¹ ¡Si' guída'! Que lë ni na' guli'gún chi'i le náпали', para cabí gaca nu gun ga cabí sí'ili' lë na' ral-la' gunna' queéli'. ¹² Núlōli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxōn, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzo queë' Dios le naca Jerusalén cubi, le huötaj irúaj yehua' yubá lu nē'ë Dios. Lësca' udá'a libí'ili' La' cubi. ¹³ Nu riyōni ral-la' uzé nagui lë ni rnnë' Dios Bö' Lá'ayi, ruí'ilenë' yugu' cō' bönachi quia' neda', Cristo, didza'."

Didza' gusöl-lë'ë yödzo Laodicea

¹⁴ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idútë li ca runë' ba nali', en náquië' ca' Bönni' na' gulén lu nē'ë yúgu'të le benë' Dios. ¹⁵ Caní rnnë': Neda' nōz quézida' le runli'. Ca runli' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zōgui', tu' cabí dá'ali' neda' idú lādxi'li'. Dxí'arō gaca la' gácali' ca nisa ziaga o ca nisa zōgui'. ¹⁶ Na'a, tu' nácali' ca nisa nati yúlasō, en bití' nácali' ca nisa ziaga, en bití' nácali' ca nisa zōgui', chú'una' libí'ili' ca run nu ruhuëbi nisa nati yula na'. ¹⁷ Libí'ili' rnnali' rilé'eli'

yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisö! ¹⁸ Que læ ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutuí'i. Ral-la' gá'uli' ca' quia' le gun ga ulu'huóaca guiøj loli' para gaca ilé'eli' le naca quia'. ¹⁹ Neda' ruzeda' bach, en run zi'a yúgu'të nupa nadxi'ida' channö cabí tun le naca dxi'a. Que læ ni na', buli'bí'i ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö núti'tës nu yöni chí'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idéli'li' lu le raca yödzölió, neda' guna' ga cö'öli' tsözxön len neda' ga na' rö'a rinná bē'a, ca na' benē' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxön ga na' rö'ë rinná bē'ë. ²² Nu riyöni, ral-la' uzé nagui læ ni rnnē' Dios Bö' Lá'ayi, ruí'ilenē' didza' yugu' cö' bönachi quia' neda', Cristo.”

4

Yöl-la' ba ta'gu'ë Dios yehua' yubá

¹ Gudödi gulaca yugu' læ ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chí'ë bönni' na' biyönda' zí'alö, ate' bulidza zidzaj ca ribödxí lúzuba' böa' bēdxí. Chí'i ni bulidza neda', gunná: “Gudá xitsá'alö ni, ate' neda' ulu'ida' li' le run bayudxi ilaca tödi ni.”

² La' ní'sö guzóalenē' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bē', en bilé'eda' ca' Nu na' rö'ö lataj na'. ³ Rēpi yösa bení' Nu na' rö'ö lataj na', ca na' rēpi yösa bení' guiøj jaspe, en guiøj cornalina, yugu' guiøj nazáca'da'. Idú gásibi'ilö lataj na' zoa biguita' le naca lachi ca naca guiøj esmeralda, le répida' yösa bení'. ⁴ Idú gásibi'ilö lataj na' nacué' ca' ia'tapa uruá' lataj gapa ta'bö' nupa ta'nná bē', ate' yugu' lataj na' rö'ögaquiē' tapa uru'ë bönni' gula, nácugaquiē' lari' chiguíchido'os, en dxíagaca ícjagaquiē' le néquiguequini oro. ⁵ Ta'ruáj yösa, en guziú' rinné lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios. ⁶ Ca dödilö lahui lataj ni dē tu ca naca tu nísado' le rēpi yösa bení' ca guiøj jara.

Nacué' tapa nupa nabángaca cuiti lataj na', tsölá'a huéaj, ate' zían guiøj lógaca dxíagaca zaca' cúdzi'löguequi, en láhuilöguequi. ⁷ Tu nu nutsa' ladaj tapa ni nalá' ca nácaba' bēdxí guixi'. Nu na' buropi nalá' ca nácaba' bēdxí, ate' nu na' bunny nalá' lahui ca naca lo bönni', ate' nu budapi nalá' ca nácaba' bisíá' ruzuba'. ⁸ Idápatē nupa ni, nacué' xopa xíligaca que queēguequi, ate' idá'alöguequi, en lé'elöguequi xíliguequi dxíada'gaca zían guiøj löguequi. Rēla, en te ža biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulé'!

⁹ Nupa na' nabángaca ta'gú'u yöl-la' ba Nu na' rö'ö rinná bē', en zóatica'sö nabán. Tun bal Nu na', en tē Nu na': “Xclenu'.” Bátati'tës tun idapa na' caní, ¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquiē' lahui' lo lataj ga ni' rö'ö rinná bē' Nu na', ta'nnē':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bē' tu' benu' yúgu'të le dē!

¡Ca rě'ëni quézinu' nacuá', en gula'sí lo nacuá'!

5

Tu guichi, en Bönni' náquië' Bö'cu' Zxíla'do'

¹ Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lě'elö, en láhuilö. Naguela' guichi na' gadxi le nusáyajgaca le. ² Bilé'eda'-në' tuë' gubáz lá'ayi lo, ate' bē'ë zidzaj didza', gunnë': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵ Ní'irö tuë' bönni' gula ni' gudxë' neda', gunnë': "Biti' cödxu'. Bönni' na' náquië' ca bēdxi guixi', en nabábalenë' xzí'ini xí'sóë' Judá, en náquië' ca' xzí'ini xí'sóë' David, chibidéli'në' lu yúgu'të le raca, en séqui'në' uládu'ë le naguéla'gaca guichi ni, en usalajë' le."

⁶ Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxië' huë' ca naca que tu bö'cu' zxíla' zoa nu bëti lēba' lahuë' Dios, nacuá' gadxi lúzuba', en gadxi guiöj loba', le tu'luí'i ca nácagaca gadxi bö' na' dzágagaca Dios, nasöl-lë'ë léguequi idütë yödzölió. ⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. ⁸ Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zöngaquië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, lë na' ruluí'i yöl-la' rulidza Dios quégaca bönachi queë'. ⁹ Tul-lë' tu le rul-la yöl-la' ba, le naca cubi, le rna caní:

Nacu' lesaca' quélu'u guichi na',
en uládu'u le naguéla'gaca le,
tu' bē'u lataj yugu' bönni' gulútië' Li',
ate' len xichönu' böá'uu' bönachi para ilequi queë' Dios,
nupa nácagaca bönachi izá'a nacuá' idütë yödzölió,
bönachi tuí'i yúgu'të didza' yúbölö,
en nabábagaca yúgu'të yödzö,
en yúgu'të luyú nacuá' idütë yödzölió.

¹⁰ Benu' ga nácagaquië' bönni' ta'nná bē'ë
en ga nácagaquië' bixúz queë' Dios queëru'.
Benu' ga ta'nná bē'ë lu yu yödzölió.

¹¹ Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxön len nupa na' nabángaca, enca' yugu' bönni' gula na'. ¹² Tu'ë zidzaj didza' yúgu'të', ta'nnë':

¡Bönni' na' náquië' Bö'cu' Zxíla'do' gulútië',
náquië' lesaca' gata' yöl-la' unná bē' lu nē'ë,
en yöl-la' tsahui', en yöl-la' réajni'i, en yöl-la' huáca!
¡Náquië' lesaca' gunru'-në' bal, en tseaj ládxi'ru' Lë',
en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacuá' yugu' lataj na', ta'nná:
¡Yöl-la' ba Nu na' rö'ö lataj lo,
enca' Bönni' na' náquië' Bö'cu' Zxíla'do'!
¡Gúntica'siru'-në' bal

en cú'utica'siru'-nē' yöl-la' ba,
ate' inná bē'tica'sē' Lē'!

¹⁴ Idápatē nupa na' nabángaca ta'nná: "¡Ca' gaca!"

Ní'irō idapa uru'ē bōnni' gula na' bulu'tsaga lógaquiē' lu yu, en gula'yéaj lādxi'gaquiē' Nu na' zóatica'sō.

6

Yugu' le naguela'gaca guichi

¹ Ní'irō bilé'eda'-nē' Bōnni' náquiē' Bō'cu' Zxíla'do', ate' buládzu'ē tu le naguela' guichi na', ate' biyōnda' tu nu nutsa' ladaj idapa na' nabángaca, ate' biyōn chí'i ca guziú' rinnē, gunná: "¡Gudá uyú'!"

² Buyúa', en bilé'eda'-ba' tuba' bōa' chiguichi, ate' nu na' dxía lēba' zōn tu uxiti' yaga. Gulu'ē lē' tu le néquini oro udxíē' icjē', ate' birúajē' ca tu nu nácatērō lo para idéli'nē' lu gudil-la.

³ Cate' buládzu'ē le buropi le naguela' guichi na', biyōnda' nu buropi na' nabán, ate' gunná: "¡Gudá uyú'!"

⁴ Ní'irō birúajba' ia'tuba' bōa', nácaba' xiná. Bulu'dödē' lu nē'e nu na' dxía lēba' yöl-la' huáca unná bē' tsōjtúa yöl-la' ribōza dxi'a tsáhui'do' quégaca bōnachi, en gun ga iluti luzē'eguequi. Bulu'nōdzjē' queē' tu guíē tuchi' zxōn.

⁵ Cate' buládzu'ē le bunní le naguela' guichi na', biyōnda' nu bunní na' nabán, ate' gunná: "¡Gudá uyú'!"

Buyúa', en bilé'eda'-ba' tuba' bōa' gasaj, ate' nu na' dxía lēba' zōn tu zxigóns.

⁶ Biyōnda' ruí'i didza' tu chí'i gatsaj láchui'lō tapa na' nabángaca, ate' gunná: "Chopa guíē zxoá' xtila len lazxaj que tu dza huen dxin tu' gaca gubín, en xopa guíē zxoá' cebada len lazxaj que tu dza huen dxin, pero bití' gunu' ga yadzaj le naca za, en bití' bi gunu' que xisi uva nal-la."

⁷ Cate' buládzu'ē le budapi le naguela' guichi na', biyōnda' ruí'i didza' nu budapi na' nabán, ate' gunná: "¡Gudá uyú'!"

⁸ Buyúa', en bilé'eda'-ba' tuba' bōa' gulaj, ate' nu na' dxía lēba' nazí'i le Yöl-la' Gutí, ate' zéajlen nu na' nu nazí'i le Lataj Chul-la. Bulu'dödē' lu nē'e nu na' inná be'e gatsaj tu gatsaj bōnachi nacuá' yōdzōlió para guti léguequi len guíē tuchi', en len yöl-la' ridún, en len yugu' yōdzōhué', en len yugu' bōa' guixi' sínía' dzō'ōba' luyú.

⁹ Cate' buládzu'ē le guyu' le naguela' guichi na', bilé'eda' zxan bucugu yehua' yubá ní' yugu' bō' gulaca cazē' bōnni' ní' gulútiē' légaquiē' tu' gulunē' libán que xtídzē'ē Dios, en tu' gulunē' ba nalí queē'. ¹⁰ Guluí'i zidzaj didza' yugu' bō' ní, gula'nná: "¡Xantu' Lá'ayi, runu' ca rnno'! ¿Bátaxi caz uchi'a usóróu' queētu', en uzí'i lēbu' yugu' bōnni' nacu'ē yōdzōlió tu' gulútiē' netu'?"

¹¹ Bulu'nōdzjē' quéguequi yugu' lari' chiguíchido'os ilácuē', en gulē' léguequi: "Ral-la' uzí' lādxi'li' ia'tú chí'ido'osō, ga idxinrō dza ila'dxín yúgu'tē luzá'ali' huen dxin queē' Cristo ní, yugu' bōnni' na' ral-la' iluti bōnachi légaquiē' ca' ca na' bétigaca libí'ili'."

¹² Cate' buládzu'ē le buzxopi le naguela' guichi na', buyúa', en bilé'eda' gudōdida' budó' zxu' luyú. Bōáca gasaj gubidza, en guca ca tu lari' guitsa' gasaj, ate' bōáca beo' xiná ca naca rōn. ¹³ Gula'guínnaj bōlaj lúzxiba lu yu, le guca ca raca que yaga higo, cate' ta'guínnaj le ribía cate' rutá le bō' budunu'.

¹⁴ Gudōdi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'tē guí'ado', enca' yúgu'tē gapa zoa luyú bidxi lu nísado'. ¹⁵ Ní'irō yugu' bōnni' ta'nná bē'ē luyú, en yugu' bōnni' lo, en yugu' bōnni' ta'lé'enē' yöl-la' tsahui', en yugu' bōnni' ta'nná bé'enē' bōnni' rōjáquiē' gudil-la, en yugu' bōnni' dē lu ná'agaquiē', en yúgu'tē nupa nadó'ogaca, en

yúgu'të nupa biti' nadó'ogaca bulu'cachi' lógaquië' gapa naca zzan bulóaj, en gapa naca lë'e guiöj lu guí'ado'. ¹⁶ Gulé' yugu' guí'ado' na', en yugu' lë'e guiöj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. ¹⁷ Chibidxín dza ulu'i lahui yöl-la' rilé quegaquië', ate' ¿nuzxi caz sequi' guá' ilén le?"

7

Tu gayuá' yu' tapa-un milë' bönni'

¹ Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'záguë'ë xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'tué' gubáz lá'ayi zë'ë rirúajë' ga rilén gubidza. Nu'ë tu le udë'ë nupa nácgaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná'bë' ilún dítjanë' luyú, en nísado'. ³ Gudxë' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

⁴ Biyönda' tsca nácgacaquië' bönni' da' légaquië' lë na' naca bë'. Nácgacaquië' idú tu gayuá' yu' tapa-un milë' ladaj yúgu'të cö' zxi'ini xi'sóë' Israel. ⁵ Yugu' bönni' na' da' légaquië' lë na' naca bë' nácgacaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

⁶ Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

⁷ Chinnu milë' di'a dza queë' Leví.

Chinnu milë' di'a dza queë' Isacar.

⁸ Chinnu milë' di'a dza queë' Zabulón.

Chinnu milë' di'a dza queë' José.

Chinnu milë' di'a dza queë' Benjamín.

Bönachi guizxi yu nácgaca lari' chiguíchido'os

⁹ Gudödi guca lë ni buyúa', en bilé'egacada' bönachi zían, cuntú nu gaca ulaba léguequi. Nabábagacaquië' yúgu'të yödzö tu'i didza' yúbölö idütë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácgacaquië' lari' chiguíchido'os, en zöngaquië' zin. ¹⁰ Tu'ë zidzaj didza' yúgu'të, ta'nnë':

¡Yöl-la' rusölá za' lu në'ë Dios queëru', rö'ë lataj lo ni,

en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacué' bönni' gula, enca' idú gásibi'ilö ga nacué' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj ládxi'gaquië' Dios, ¹² ta'nnë':

¡Ca' gaca! ¡Yöl-la' ba Li', Dios queëtu'!

¡Napu' yöl-la' zxön, en yöl-la' réajni'i!

¡Rëtu' Li': "Xclenu'", en runtu' Li' bal!

¡Napu' yöl-la' unná'bë', en yöl-la' huáca!

¡Gácatíca'sö caní quiu', Dios queëtu'!

¡Ca' gaca!

¹³ Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquië'?"

¹⁴ Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'guí' gula'záca'da'. Gula'guíbë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'. ¹⁵ Que lë' ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chi'i légaquië' tu' zóaléntica'sö légaquië'. ¹⁶ Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá ¹⁷ tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ru'i yöl-la' na'bán, ate' Dios uzxië' lógaquië' nisa ta'bödxë'."

8

Le igadxi le naguela' guichi

¹ Cate' buládu'ë le igadxi le naguela' guichi na', gurö'ö dxi yehua' yubá idú gatsaj hora. ² Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. ³ Ní'irö bidë' ia'túë' gubáz lá'ayi, nu'ë tu zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. ⁵ Ní'irö gubáz lá'ayi na' bulië' zxíga'do' na' len bo' yalaj dxía lu bucugu na', ate' gurú'unë' le luyú. Gunnë guziú', ate' bö zidzaj biyön. Guyëpi yösa, en gudödi budó' zxu'.

Tu'cödxë' lúzuba' böa' bëdxi

⁶ Ní'irö igádxité' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

⁷ Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

⁸ Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'látí'do'os ca gatsaj tu gatsaj nísado' na' böáca rön. ⁹ Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

¹⁰ Bucödxë' gubáz lá'ayi bunni lúzuba' böa' bëdxi, ate' böxaj tu bölj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'látí'do'os ca gatsaj tu gatsaj nisa na' rö'ö luyú. ¹¹ Bölj ni lëba' Ajenjo, le naca tu le silá', ate' böáca silá' ia'látí'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ní'a que nisa na' böáca silá'.

¹² Bucödxë' gubáz lá'ayi budapi lúzuba' böa' bëdxi, ate' böáca chul-la ia'látí'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bölj. Caní guca, bítí' buzení' gubidza ia'látí'do'os ca gatsaj tu gatsaj dza, en bítí' bulu'zení' bölj, en beo' ia'látí'do'os ca gatsaj tu gatsaj rëla.

¹³ Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lö lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica'

bayechi' libí'ili' zóali' luyú ni cate' ulu'cödxë' ia'tsonnë' gubáz lá'ayi na' lúzuba' böa' bëdxi!"

9

¹ Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bölj lúzxiba böxaj luyú, ate' bulu'nödzjé' nu na' zxi'ini guié que lataj chul-la. ² Gusaljé' lataj chul-la na', ate' gurén dzön que lataj chul-la, le guca ca dzön rirúaj ga tu zégui'ë bulá'do', ate' gula'chul-la gubidza, en lúzxiba ni'a que dzön na'. ³ Lu dzön na' bila'rúajba' böchi'zu, yugu' le gula'zxoásiba' luyú, ate' Dios bë'ë légacaba' lataj iládu'ba' bönachi ca tunba' xöjnö' dzö'öba' luyú. ⁴ Gunná bë'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquië'. ⁵ Biti' bë'ë légacaba' lataj ilútiba' légaquië', pero ulu'saca' zí'siba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'. ⁶ Yugu' dza na' ilë'enë' yugu' bönni' iluti cuíngaquië', pero biti' ila'zéqui'në'. Ilë'ëninë' ilátië', pero ucuíta cuini yöl-la' guti.

⁷ Nalá'gacaba' böchi'zu na' ca nácagacaba' böa' nácugacaba' le néquiguequini guié, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi. ⁸ Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'. ⁹ Nácugaca luchú'ugacaba' le néquini guié. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. ¹⁰ Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'. ¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazi'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

¹³ Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'i didza' gatsaj láhui'lö tapa le nácagaca ca lúzuba' bëdxi dá'gaca tapa squin bucugu na' néquini oro, le rö'lahuë' Dios. ¹⁴ Chi'i ni ruí'ilen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi idápatë' gubáz xihui' na' nága'gaca ra' yegu Eufrates."

¹⁵ Ní'irö bulu'sedxë' tapa gubáz xihui' na', chinucözë' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió. ¹⁶ Biyönda' tsa nácagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Nácagaquië' idú chopá gayuá' mil milë'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bëdxi guixi', ate' lu ruá'agacaba' ta'rúaj guí, en dzön, en tu le ruzégui'da', nazi'i le azufre. ¹⁸ Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacua' luyú, lë na' nácagaca guí, en dzön, en lë na' ruzégui'da'. ¹⁹ Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

²⁰ Ia'zíca'rö bönachi, nupa biti' gulati lu chopá ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guiöj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i

ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu nē'ē tu guíchido'

¹ Ní'irö bilé'eda'-nē' ia'túē' gubáz lá'ayi nál-la, bötjē' birúajē' yehua' yubá, nácuē' böaj lúzxiba, en zoa ca tu biguita' ícjälē'. Rēpi yōsa bení' lahuē' ca run gubidza, ate' nácagaca ni'ē ca ya'zxōn ta'yegui. ² Zoa lu nē'ē tu guíchido' nayalaj, ate' tu ni'ē ibēla nulibē' lu nísado', en ia'tú ni'ē yōgōla nulibē' luyú bidxi. ³ Ní'irö bē'ē zidzaj didza', ate' biyōn chi'ē ca riyōn cate' ribōdxi'aba' bēdxi guixi', en cate' budxi bē'ē zidzaj didza' na', bila'yōni chí'igaca gadxi guziú'. ⁴ Cate' budxi bila'yōni chí'igaca guziú' na', neda' si' uzúaja' lu guichi, pero biyōnda' nu ruí' didza' yehua' yubá, rē neda': "Bucáchi'sō didza' ni gulu'í gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nē' zuínē' lu nísado', en luyú bidxi, guchisa nē'ē ibēla zaca' lúxibalō, ⁶ ate' ben tsutsu xtídzē'ē ni'a que Nu na' zoa caz, Nu na' ben yehua' yubá, en le nacuá' ni', enca' yōdzōlió, en le nacuá' ni', enca' nísado', en le nacuá' ni', ate' gunnē': "¡Bíti'rō tse! ⁷ Cate' ucōdxē' gubáz lá'ayi igadxi lúzuba' böa' bēdxi, usudxinē' Dios le nagachi' queē', lē na' buluí'inē' yugu' huen dxin queē', bōnni' ni' gulu'ē didza' uláz queē'."

⁸ Ní'irö chi'i na' biyōnda' rirúaj yehua' yubá bē'len neda' didza' leyúbölö. Gunná: "Guyéaj, yōjxí' guíchido' nayalaj na' zōnē' gubáz lá'ayi na' nulibē' lu nísado', en luyú bidxi."

⁹ Guyija' ga na' zoē' gubáz lá'ayi na', en gunábida'-nē' gunnē' guíchido' na' quia'. Gubáz lá'ayi na' gudxē' neda', gunnē': "¡Guzxí', gudagu! Lu ru'u gaca zxixi ca naca bidxína'do' queē'ba' buz, pero lē'u huōáca silá'."

¹⁰ Guzxí'a guíchido' na' zōnē', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böáca silá' lē'a. ¹¹ Ní'irö gudxē' neda': "Ral-la' gu'u didza' leyúbölö uláz queē' Dios lógaca zían cō' bönachi izá'a, en gapa nacuá' yúgu'tē yōdzō, en gapa tu'í zían didza' yúbölö, en lógaca zían bōnni' unná bē'."

11

Chopē' bōnni' tunē' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queē' Dios. Burixi ca' bucugu lá'ayi que, en bulaba nupa nacuá' ni' ta'yéaj ládxi'gaca Dios. ² Bucá'ana ca' lō'a que yudo' na' dē ní'ilō, en biti' urixu' le, tu' nadōdi lu ná'agaca bönachi izá'a, ate' ulu'libi ulu'léaj yōdzō lá'ayi na' idú ca chopá-un beo'."

³ Gudxē' ca' neda': "Isōl-la'a chopē' bōnni' ilunē' ba nalí quia', ate' ilu'ē didza' uláz quia' idú ca chinnu gayuá' yu' tsónnalalaj dza, nácugaquiē' lari' le naca bōdzádzado'." ⁴ Chopē' bōnni' ni' tunē' ba nalí, nácugaquiē' chopá yaga olivo na' nazúaj lu guichi lá'ayi ca naca quégaquiē', en nácugaquiē' ca' chopá le nuá'gaca guí' na' nacuá' lahuē' Dios, Xani yōdzōlió. ⁵ Channō gué'eni nu guá' dö' quégaquiē', irúaj guí' ruá'agaquiē' le usuniti nu na' rē'eni guá' dö' quégaquiē', en guti nu na', enca' nupa ta'dá'baga' légaquiē'. ⁶ Chopē' ni' dē lu ná'agaquiē' ulu'záguē'ē xinōza nisa guiōj lúzxiba, para cabí galaj guiōj tsa dza na' ral-la' ilu'ē didza' uláz queē' Dios, ate' dē lu ná'agaquiē' ca' ilunē' ga huōáca nisa rōn, en ilunē' ga gatsaj yōdzōhuē' yōdzōlió. Ilunē' caní bálati'tēs luzuí ilē'ennē'. ⁷ Cate' údxi ilunē' ba nalí, irúajba' böa' sínia' lataj chul-la, en tíl-lalenba' légaquiē', en ucúl-laba' légaquiē', en gútiba' légaquiē'. ⁸ Le gulaca cazē'

ila'túlusö ca' la' nöza lu yödzo zxon, ga ni' gudé'e ca' Xanru' lè'e yaga cruz, en ca rucúdzuru' didza', nazí'i le ca' Sodoma, enca' Egipto. ⁹ Idú ca tsonna dza yu' gatsaj bönachi yúgu'tè yödzo, en yúgu'tè bönachi izá'a, en bönachi tuí'i zían didza' yúbölö, en bönachi yúgu'tè luyú, ila'lé'eni le gulaca cazé', en bití' iluí' lataj nu ucache' légaquié' yeru ba. ¹⁰ Ulu'dzéjade'e nupa nacua' yödzölió tu' gulatié', ate' lu yöl-la' rudzeja quéguequi ila'söl-la' le ulu'nödzaj quégaca luzé'eguequi, tu' bulu'saca' zi'é chopé' ni gulu'é didza' uláz queé' Dios bönachi nacua' yödzölió.

¹¹ Ní'irö cate' chibizá'a tsonna dza yu' gatsaj na', Dios busubané' légaquié', ate' gula'yasé' gulazuiné', ate' guladxi gula'dzöbi yúgu'tè nupa bila'lé'e légaquié'. ¹² Ní'irö bé' zidzaj didza' tu chi'i yehua' yubá, en gudxi légaquié': "Gulí'cuén ni."

Gula'bené' lu böaj lúxiba zaca' yehua' yubálö, ate' nupa na' gula'dá'baga' légaquié' bila'lé'e légaquié'. ¹³ La' ní'sö gudödida' budó' zxu', ate' biguinnaj tu cö' tsa tu chi cö' yugu' yu'u dzö'ö lu yödzo na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoé' yehua' yubá.

¹⁴ Chigüdüdi le buropi le rusuniti bönachi, ate' chizóa idxín le bunni le usuniti léguequi.

Rucödxé' gubáz lá'ayi igadxi lúzuba' böa' bédxi

¹⁵ Bucödxé' gubáz lá'ayi igadxi lúzuba' böa' bédxi, ate' guluí'i zidzaj didza' yugu' chi'i yehua' yubá, ta'nná: Gapa ta'nná bé' bönachi yödzölió nadödigaca lu në'e Xanru' Dios, en lu në'e Cristo. Lè' inná bé'tica'sé'.

¹⁶ Ní'irö idapa uru'é bönni' gula na' rö'ögaquié' gapa na' ta'nná bé'è lahué' Dios, bulu'tsaga lógaquié' lu yu, en ta'yéaj ládxi'gaquié' Dios. ¹⁷ Ta'nné': ¡Xantu' Dios, napa cazu' yöl-la' huáca!
¡Guzóa cazu', en zoa cazu', en ral-la' guída cazu'!
¡Xclenu', tu' chibugunu' dxin yöl-la' huáca zxon quiu', en risí lo' rinná bé'u!

¹⁸ ¡Gula'lé bönachi yugu' yödzo pero chibidxín dza gunu' léguequi xíguia'!
¡Naca dza uchi'a usöröu' nupa chinátigaca!
¡Ubi'u quégaquié' huen dxin quiu', yugu' bönni' gulu'é didza' uláz quiu', nupa néquiguequi quez quiu', en gulún bal Lo', nupa nácagaca cá'asö, en nupa nácagaca lo!
¡Chibidxín dza usunítu' nupa bulu'suniti yödzölió!

¹⁹ Ní'irö gualaj yudo' queé' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nuné' Dios. Guyépi yösa, en gulú'u bö zidzaj, en gunné guziú' luyú. Gudödi budó' zxu', en gurö'ö guiój bögui' yöla sunna.

12

Tunu nigula, en tuba' bëla zxon xitsini'

¹ Ní'irö bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa zxon ní'anu beo'. Dxía ícjanu tu le néquini oro ga dxíagacaba' chinnu böljaj bení'. ² Nigula ni chizóa soa bí'ido' queénu, en ribödxinu tu' rúdia' lè'ènu. Riguí'i rizáca'nu ruzóanu bí'ido' queénu. ³ Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxon xitsini'.

Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. ⁴ Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légacaba' luyú. Guzuíba' bëla zxön xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bí' bí'ido' queénu na' ca gáljabi' na'. ⁵ Buzóanu-bi' tubi' bí'i bönni'do' ral-la' inná bé'ebi' yúgu'të yödzö len tu xiyaga guië. La' bucuítatë'-bi' Dios bí'ido' queénu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. ⁶ Buzxúnnajnu nigula na', zéajnu lu lataj cá'asö, ga ni' chinupë'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca lëba' ⁸ pero bití' bila'deli' lu gudil-la na'. Que lë ni na' bí'ti'rö bidzöli xilátjagaca yehua' yubá. ⁹ Caní guca, gula'rú'unë'-ba' bëla zxön xitsiní' na' ní'ilö. Nácaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzáagaca le gubáz xihui' na' dá'gaca le.

¹⁰ Ní'irö biyönda' tu chi'i ru'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'rú'unë' ní'ilö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queëru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali' queë'. Biti' gulu'i'í ládxi'gaquië' yöl-la' na' bán' quégaquië', pero gulatië'. ¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

¹³ Cate' gúquibe'eba' bëla zxön xitsiní' na' chigula'rú'unë'-ba' luyú, ní'irö yöjsóa régu'ba'-nu nigula na' buzóanu bí'i bönni'do' na' queénu. ¹⁴ Ní'irö Dios bë'ë-nu nigula na' chopá xíliba' bisía' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahuë'-nu idú tsonna iz yu' gatsaj. ¹⁵ Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en gü'i nisa yegu na' gúbaba' bëla zxön xitsiní' na'. ¹⁷ Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queénu di'a dza queénu, nupa na' tun ca rnna le gunná bë'ë Dios, en nazí' lu në'eguequi le nunë' Jesucristo ba nali'.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxí'a. ² Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budödiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. ³ Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'. ⁴ Gula'yéaj ládxi'gaquië'-ba' bëla zxön xitsiní' na', tu' budödiba' yöl-la' unná bë' queéba' lu ná'aba' böa' sínia'

na'. Gula'yéaj ládxi'gaquië'-ba' böa' sínia' na', en gula'nnë': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

⁵ Guta' lu ná'aba' böa' sínia' na' bé'ëba' didza' ba zxön, en didza' xihui' le rinnëba' queë' Dios. Idú ca chopu-un beo' guta' lu ná'aba' yöl-la' unná bë'.

⁶ Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacua' yehua' yubá. ⁷ Guta' lu ná'aba' gudíl-lalenba' nupa néquiguequi quez queë' Dios, en bucúl-laba' légaquië'. Guta' ca' lu ná'aba' gunná bé'eba' yúgu'të bönachi izá'a, bönachi yúgu'të yödzö, en bönachi tu'i yúgu'të didza' yúbölö, en bönachi idütë yödzölió. ⁸ Yúgu'të bönachi nacua' yödzölió gula'yéaj ládxi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

⁹ Channö nu riyöni, ral-la' uzë nagui. ¹⁰ Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxön ladxi' nupa néquiguequi queë' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopu lúzuba' ca naca lúzuba' bö'cu' zxíla', en ru'íba' didza' ca na' ru'íba' didza' bëla zxön xitsiní' na'. ¹² Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacua' yödzölió böa' sínia' zí'alö na', böa' na' buniti huë' le guti lëba'. ¹³ Böa' buropi na' runba' ca' le nácagaca bë' ga ridxintë runba' ga ruhuöxaj guí' le za' lúzxiba, en ruhuöxaj luyú lógaca yúgu'të bönachi. ¹⁴ Rizí' yé'eba' bönachi nacua' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bé'eba' bönachi nacua' yödzölió ilunë' tu budó' ca nácaba' böa' sínia' na' gúcaba' huë' que guié tuchi', ate' nabanba'. ¹⁵ Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gü'i didza' budó' ni, en gun ga nu guti yúgu'të nupa biti' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. ¹⁷ Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. ¹⁸ Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

¹ Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'. ² Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que. ³ Tul-lë' tu le rul-la cubi, nacua' ca dödilö lahui lataj lo ni', enca' ca dödilö lahui ga na' nacua' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzölió. ⁴ Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán.

Söjácalenë Bönni' na' náquië' Bö'cu' Zxíla'do' gátitës ga sa'yéajë'. Cristo caz böá'uë' légaquië' ladjagaca bönachi, ate' nácagaca nupa bulu'dödi cuíngaquië' zí'alö queë' Dios, enca' queë' Bönni' na' náquië' Bö'cu' Zxíla'do'. ⁵ Catu caz gula'zí' yë'ë, ate' cuntunu gaca bi innë quégaquië' ga na' nacué' ca dödilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

⁶ Ní'irö bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacué' yödzölió, bönachi idútë luyú, yúgu'të bönachi izá'a, en bönachi tuí'i yúgu'të didza' izá'a, en bönachi yúgu'të yödzö. ⁷ Ru'ë zidzaj didza', rnnë': "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Guli'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

⁸ Ia'tué' gubáz lá'ayi söjnáhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na'! Caní guca que, tu' gulún nupa nacué' ni' ga gula'zí' lu ná'agaquië' bönni' yúgu'të yödzö ilunë' ca nácagaca le ta'zë ládxi'gaquië' le ruá' dö'."

⁹ Ia'tué' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na', enca' budó' queëba', en gü'i lataj ta' ra' xigué o lu në'e le naca bë' da' lëba', ¹⁰ gunë' Dios nu ni xíguia' lu yöl-la' rilé queë'! ¡Qui'i saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! ¹¹ Cuéntica'sö dzön que guí' ga ni' quí'i saca' nu na'. Rëla, en te dza qui'i saca', ate' catu caz gata' lataj ulu'zí' ládxi'gaca nupa ila'yéaj ládxi'gaca-ba' böa' sínia' na', en budó' queëba'. Biti' ulu'zí' ládxi'gaca nupa ilu'í'i lataj ta' laba' léguequi. ¹² Que lë ni na' nupa na' néquiguequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxi'."

¹³ Ní'irö biyönda' chi'i nu ru'í'i didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'zí' ládxi'gaquië' lu dxin gulunë', en ulu'zí'ë xibé ca sa'yéaj le gulunë'!"

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë. ¹⁵ Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu zxoá' xtila, tu' chibidxin dza nu uzí' le! ¡Chinabídx do que le dë yödzölió!"

¹⁶ Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buzi'ë le rulá' luyú.

¹⁷ Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. ¹⁸ Birúajë' ia'tué' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidzë' gubáz lá'ayi zí'alö na' nu'ë guíë tuchi', gunné': "¡Bugún dxin guíë tuchi' quiu', en butubi tu'xóa huéaj le ta'bía lubá uva rögaca yödzölió, tu' chiná le ta'bía lubá uva!"

¹⁹ Ní'irö gubáz lá'ayi ni bugunë' dxin guíë tuchi' idútë yödzölió, en butubë' le ta'bía lubá uva rögaca luyú, ate' yöjchú'unë' le ta'bía lubá uva na' lu yeru zxön ga izí xisi. Yugu' lë ni rulu'í'i ca gunë' Dios, gunë' xíguia' bönachi nacué' yödzölió. ²⁰ Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsca gaca sá'aru' idú chinnu dza.

15

Yugu' gubáz lá'ayi nuá'gaquië' gadxi yödzöhuë'

¹ Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nuá'agaquië' gadxi yödzöhuë' röjsétegaca, le ugunë' dxin Dios, údxi gunë' xíguia' bönachi yödzölió.

² Bilé'eda' ca' tu le naca ca tu nísado' le rëpi yösa bení' ca guiöj jara le nutsí'i guí'. Nupa na' bulu'xicja lu böa' sínia' na', en lu budó' queëba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'e Dios queégaquië'. ³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxöntëro nacu' Li'!

¡Zxöntëro naca yúgu'të le benu',

le tun ga rubánitu'!

¡Li' rinná bé'enu' yugu' yödzö!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzö,

en ila'yéaj ládxi'guequi Li'

tu' ta'lé'e naca tsahui' yúgu'të le runu'!

⁵ Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'. ⁶ Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzöhuë' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. ⁷ Ní'irö tu nu nutsa' ladaj idapa nupa na' nabángaca, bë' que queégaquië' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'i yöl-la' rilé queë' Dios, Bönni' zoa cazë'. ⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzöhuë' na' nuá'agaquië' gadxi gubáz lá'ayi na'.

16

Yugu' zxíga'do' yúdzugaca le rulu'i yöl-la' rilé queë' Dios

¹ Ní'irö biyönda' chi'i nu ru'i zidzaj didza' lataj lá'ayi na', en rë gadxi gubáz lá'ayi na', rna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lë na' rulu'i yöl-la' rilé queë' Dios!"

² Guyijë' gubáz lá'ayi zí'alö, en yöjla'jë' le yudzu zxíga'do' na' zönë' lu yödzölió. Lë na' yudzu zxíga'do' na' ben ga gutsaj yudzu' ya'a le riláda' idútë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queëba'.

³ Ní'irö guyijë' gubáz lá'ayi buropi, en yöjla'jë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacua' lu nísado' na'.

⁴ Guyijë' gubáz lá'ayi bunny, en yöjla'jë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön. ⁵ Ní'irö biyönda' ru'ë didza' gubáz lá'ayi na' dë lu në'e rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tsahui' nacu' tu' richugu' caní quegaca bönachi ⁶ tu' bulu'laljë' rön quegaca nupa néquiguequi quez quiu', en quegaca nupa gulu'i didza' uláz quiu'! ¡Na'a, Li' runu' ga ilë'ajë' rön, tu' caní ral-la' gaca queégaquië'!"

⁷ Ní'irö biyönda' ruí'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tsahui' naca ca richugu' quégaca bönachi!"

⁸ Guyijë' gubáz lá'ayi budapi na', en yöjlaljë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí' que. ⁹ Gula'yégui'da' yúgu'të bönachi tu ruzégui'da' gubidza, pero bití' bulu'bí'i ládxi'gaca, en bití' gula'gú'u Dios yöl-la' ba. Gula'nnë zi'i queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

¹⁰ Guyijë' gubáz lá'ayi guyu' na', en yöjlaljë' le yudzu zxíga'do' zönë' lu xilataj böa' sínia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'guí'i gula'zaca' bönachi, guláguya'a lúdxigaequi, ¹¹ pero bití' bulu'bí'i ládxi'gaca para cabirö ilúngaca le ruá' dö' tunë'. Gula'nnë zi'i queë' Dios zoë' yehua' yubá tu' ta'guí'i ta'zaca', en tu' dxíagaca yudzu' ya'a na'.

¹² Guyijë' gubáz lá'ayi buzropi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bë', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yöjaca bö' xihui' na' idú yödzölió, en yöjtúbigaca nupa ta'nná bë', para tsöjajúie' lu gudil-la na' gaca lu dza zxön queë' Dios, Bönni' napa cazë' yöl-la' unná bë'. ¹⁵ Caní' rnnë' Dios: "¡Buli'yútsöca'! Guída' tsárido'os ca ridxinë' tu bönni' gubán. Bica' ba nu zoa ban ládxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí'i nu na' lahui' lógaca bönachi." ¹⁶ Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

¹⁷ Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë lataj lo na', rnna: "Chinaca."

¹⁸ Ní'irö guyëpi yösa, en gurö'öda' bö, en gunné guziú'. Gudödida' budó' xzu', le gudödida'rö ca gudödi tsanni ni nacuá' bönachi yödzölió. ¹⁹ Birúaj tsonna cö'ölö yödzö zxön na', ate' gula'guínnaj yödzö nacuá' yödzölió. Yöjnenë' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queë' benë' xíguia' nupa nacuá' ni'. ²⁰ Bila'gachi' yugu' luyú bidxi dzö'ö lu nísado', ate' bití'rö gula'lá' yugu' guí'ado'. ²¹ Böxaj ca' guiöj bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiöj bögui' na' ca tu gayuá' guíë, ate' yúgu'të bönachi gula'nnë xihui' queë' Dios tu' nözi guiöj bögui' na' tu' bulu'sáca'da' zi'i léguequi.

17

Dios richúguië' queënu nigula udá dzaga

¹ Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bë'lenë' neda' didza', gunné': "Gudá ni, ate' uluí'ida' li' ca gunë' Dios, gunë'-nu xíguia' nigula udá dzaga na', rö'önu lu nísado' zían. ² Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le bití' naca dxi'a."

³ Dios Bö' Lá'ayi guzóalenë' neda', ate' gubáz lá'ayi na' guchë'ë neda' tu lu lataj cá'asö, ate' bilé'eda'-nu tu nigula ní' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chi lúzuba', en dá'gaca ca'

lëba' le ta'nnë xihui' queë' Dios. ⁴ Nigula na' dxíanu lëba' nácunu lari' xiná chul-la, en lari' xiná gu'ido'os. Nazí'i biquitaj queënu le néquiguequini oro, en yugu' guiöj nazaca', en yugu' bugá. Lu ná'anu rö'ö tu zxíga'do' néquini oro, en yudzu le nácagaca xihui', en le ruá' dö' runnu. ⁵ Ra' xigánu dá'gaca ca lënu, le tu'lu'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió." ⁶ Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'. ⁷ Gudxë' gubáz lá'ayi na' neda', gunné': "¿Bizx que rubánu? Uzéajni'ida' li' lë na' nagachi', le rulu'i ca naca nigula ni, enca' le rulu'i ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'. ⁸ Böa' sínia' na' bilé'enu' guzóaba' zí'alö, pero bití' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacua' luyú cabí nazúajgaca láguequi lu guichi que yöl-la' na'bán, le buzúajë' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atélö, pero bití' zóaba' na'a, ulu'bani tu' nubanba'.

⁹ Lë ni naca tu le uzéajni' nu gaca tséajni'i: Gadxi ícjaba' na' tu'lu'i gadxi gu'ado' gapa rö'önu nigula na'. ¹⁰ Lësca' caní gadxi ícjaba' na' tu'lu'i gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'tué' bití' ridxíninë', pero cate' guidë', inná bë'ë tu chí'ido'osö. ¹¹ Böa' sínia' na' guzóaba', pero bití' zóaba' na'a, rulu'i tu bönni' izxunu', inná bë'ë. Nunë' tsözxön bönni' gadxi na', ate' tödi ni nítië' tsaz.

¹² Chi lúzuba' na' bilé'enu' tu'lu'i chië' bönni' ila'nná bë'ë. Bití' ta'zíninë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxön len böa' sínia' na'. ¹³ Chië' bönni' ni, lëbisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'. ¹⁴ Ila'díl-lalenë' Bönni' na' náquië' Bö'cu' Zxíla'do', pero Lë ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacua' len Lë', bulidzë' Dios léguequi, en guröë' léguequi, ate' tsaz dá'gaca Lë'."

¹⁵ Gubáz lá'ayi na' gudxë' ca' neda', gunné': "Yugu' nísado' na' bilé'enu' gapa ni' rö'önu nigula udá dzaga na', tu'lu'i bönachi yugu' yödzö, en yugu' bönachi izá'a, en bönachi tu'i yugu' didza' yúbölö, en bönachi yugu' luyú. ¹⁶ Chi lúzuba' böa' sínia' na' bilé'enu', en tu'lu'i chië' bönni', bití' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahuë' xipëla'nu, en ulu'zégui'ë-nu len guí. ¹⁷ Dios uchízië' icja ládxi'do'gaquië' chië' bönni' na' le gun ga ilunë' ca rë'ëni quézinë' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë. ¹⁸ Nigula na' bilé'enu'-nu rulu'i yödzö zxön na' rinná be'e nupa ta'nná bë' yödzölió ni."

18

Riguinnaj yödzö Babilonia

¹ Gudödi na' bilé'eda'-në' ia'tué' gubáz lá'ayi ruhuötjë' rirúajë' yehua' yubá, en dë lu në'ë yöl-la' unná bë' zxön, ate' guyëpi yösa bení' luyú ní'a que yöl-la' bení' queë' gubáz lá'ayi na'. ² Bë'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxön na'!

¡Chiböáca xilataj tu' xihui', en xilátajgaca bö' xihui' tun ditaj bönachi!

¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

³ Caní guca que yödzö na' ní'a que le gulún bönachi nacua' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bē' luyú yōdzōlió gulunlen légaquiē' le ruá' dō',
ate' guta' yōl-la' tsahui' quégaquiē' bōnni' to'o tuti' nacu'ē yōdzōlió
tu' guyánda' yugu' le nazaca' gula'zē ladxi' bōnachi ni'.

⁴ Ní'irō biyōnda' ruí' didza' ia'tú nu zoa yehua' yubá, rnna:
Guli'rúaj lu yōdzō na', libí'ili' néquili' quia'
para cabí gunli' dul-la' tsōzxōn len légaquiē',
en para cabí quí'i sáca'li' le gaca quégaquiē'.

⁵ Nayánda' dul-la' nabága'gaquiē',
en chinayasa nadxín caz lúzxiba,
pero Dios rōjnenē' le ruá' dō' núngaquiē'.

⁶ Buli'bí'i quégaquiē' ca na' gulunē' queéli'.
Buli'bí'i quégaquiē' chopa cō' tsca le gulunē'.
Buli'bí'i quégaquiē' chopa cō' tsca le naca xihui' gulunē' queéli'.

⁷ Guli'gún ga ila'guí'i ila'záquiē', en ila'bōdxi yéché'ē
tsca guca yōl-la' ba, en yōl-la' zxōn guluí'i cuíngaquiē'.
Ta'zá' lādxi'gaquiē', ta'nnē':

Rō'ōtu' ni, rinná bē'ētu'.
Biti' nácatu' uzēbi, en catu caz cōdxi yéchi'tu'.

⁸ Que lē ni na', tu dzasō ila'dxín quégaquiē' le ila'guí'i ila'záquiē',
yōl-la' guti, en yōl-la' ribōdxi yechi', en yōl-la' ridún.
Iléguiē' lu guí', tu' napa cazē' yōl-la' huáca zxōn Xanru' Dios.
Lē cazē' usiúdxē' quégaquiē'.

⁹ Ní'irō gunné': "Ila'bōdxi nupa ta'nná bē' luyú yōdzōlió, en gulún le ruá'
dō' tsōzxōn len légaquiē', en bulu'zí' xibé le nequi quégaquiē'. Ila'bōdxē', en
ila'bōdxi yéché'ē cate' ila'lé'enē' dzōn que yōdzō zxōn na' régui. ¹⁰ Zi'tu' zí'tu'sō
ila'cu'ē tu' iládxinē' ca gaca xíguia' le gaca que yōdzō na', ate' ila'nnē': ¡Bica'
bayechi' Babilonia, yōdzō zxōn ni, le gúcada' lo! ¡Tu dzasō guca xíguia' que!"

¹¹ Ní'irō gunné': "Ila'bōdxē' ca' bōnni' to'o tuti' nacu'ē yōdzōlió, en ila'bōdxi
yéché'ē ni'a que yōdzō na' tu' cabirō soa nu ga'u bi ilúti'ē ni'." ¹² Cúnturō nu
ga'u ni':

Le néquiguequini oro, en plata,
en yugu' guiōj zaca', en yugu' bugá,
en yugu' lari' nazáca'da', en lari' xiná chul-la,
en lari' dxí'ado', en lari' xiná guí'ido'os,
en yugu' yaga rilá' zxixi,
en le néquiguequini dxita nazáca'da',
en le néquiguequini yaga nazáca'da',
en le néquiguequini guíē cobre,
en le néquiguequini guíē,
en le néquiguequini guiōj jara.

¹³ Cúnturō nu ga'u ni':
Canel, en yugu' le rilá' zxixi, en yalaj,
en le rilá' zxixi que mirra, en que yōj olíbano,
en xisi uva nál-la, en le naca za,
en yiōzja dxí'ado', en zxoá' xtila,
en yugu' búrrodo', en yugu' bō'cu' zxila',
en yugu' bōa', en yugu' carreta,
en yugu' bōnni' huen dxin, en ia'bal-la bōnachi.

¹⁴ Nupa na' to'o tuti' ilē légaquiē', ila'nná:
Nadúagaca le guzē lādxi'li'.
Chigudōdi quégaca yōl-la' tsahui',

en le nácagaca lachi queéli',
ate' bíti'rö idzöli' léguequi.

¹⁵ Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zi'tu' zí'tu'sö tu' iládxinë' ca gaca xíguia' le gaca que yödzö na', en ila'bödxë' yéché'ë." ¹⁶ Ila'nné':

¡Bica' bayechi' yödzö ni guca zxön!

Guca ca tu nigula nácunu lari' nazáca'da',
en lari' xiná chul-la, en lari' xiná guí'ido'os,
en nazí'i biquitaj queënu le néquiguequini oro
en le néquiguequini guiöj zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacua' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zí'tu'sö." ¹⁸ Cate' ila'lé'enë' dzön que yödzö na' régui, ila'bödxë', en ila'nné': "¿Bízxilö yödzö guca zxön ca naca yödzö ni?"

¹⁹ Ní'irö gunné':

Ulu'dxië' bëchtö ícjagaquië'.

Ila'bödxë', en ila'bödxë' yechë'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'
quégaca yúgu'të nupa nácagaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali' yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguië' Dios que yödzö ni

ní'a que bi gulún queéli' nupa nacua' lu yödzö ni.

²¹ Ní'irö tuë' gubáz lá'ayi nál-la buchisë' tu guiöj zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,

tu' iguinnaj yödzö na' guca lo,

ate' bíti'rö nu udzöli le.

²² Bíti'rö nu yöni lu yödzö na' nupa ta'guinni lë'e le rul-la,

en calëga nupa tu'cödxë' gui

en calëga nupa tu'cödxë' lúzuba' böa' bëdxë'.

Bíti'rö udzöli bönni' huen dxin ni',

en bíti'rö yöni bö rigú'u le rutu ni'.

²³ Bíti'rö uzení' nitú guí' lu yödzö na',

en bití' yöni chí'ë bönni' rutsaga në'ë ni',

en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzö ni,

en guzxi' yé'eli' bönachi idútë yödzölió len yöl-la' gudzá' queéli'.

²⁴ Lu yödzö ni gulaj xichöngaquië' bönni' gulu'ë didza' uláz queë' Dios,

en xichöngaca nupa néquiguequi queë' Dios,

enca' xichöngaca yúgu'të bönachi yödzölió,

tu' bëtigaca nupa nacua' yödzö ni léguequi.

19

¹ Gudödi lë ni biyönda' tuí'i zidzaj didza' bönachi zián nacua' yehua' yubá, ta'nná:

¡Yöl-la' ba Dios! ¡Yöl-la' rusölá runë',

ate' yöl-la' zxön, en yöl-la' unná bē' napē' Dios queēru'!

² ¡Naca idútē li, en tsahui' ca rusiúdxē'!

¡Guchúguiē' que yödzo na' naca ca tu nigula udá dzaga, en queégaca bönachi lu yödzo na' ila'niti tsaz!

¡Gulún ditaj bönachi yödzo'lió tu' nözi le ruá' dö' gulunē'!

¡Dios buzí' lēbē' légaquiē'

tu' gulútiē' yugu' huen dxin queē'!

³ Leyúbölö gula'nnē': "¡Yöl-la' ba Dios! ¡Cuéntica'sö dzön ga régui yödzo na'!"

⁴ Idapa uru'ē bönni' gula ni' bulu'tsaga lógaquiē' lu yu tsözxön len idapa nupa ni' nabángaca, en ta'yéaj ládxi'gaquiē' Dios, Bönni' rö'ē lataj lo queē'. Gula'nnē': "¡Ca' gaca! ¡Yöl-la' ba Dios!"

⁵ Ní'irö biyönda' ruí'i didza' tu nu zoa lataj lo na', rnna:

¡Guli'cu'ē Dios queēru' yöl-la' ba

yúgu'tēli' runli' xichinē', libí'ili' na' rádxili' Lē',

nácali' bönachi cá'asö, en bönachi lo!

Laní que yöl-la' rutsaga na' queē' Bönni' náquiē' Bö'cu' Zxíla'do'

⁶ Biyönda' ca' nu ruí'i zidzaj didza', le biyön ca riyön cate' tuí'i didza' bönachi zián, en biyön ca' ca riyön ga ridödi tu yegu zxön, o ca riyön cate' rinnē guziú', ate' rnna:

¡Yöl-la' ba Dios tu' risí lahuē' rinná bē'ē!

¡Napa cazē' yöl-la' huáca!

⁷ ¡Ral-la' udzeja ládxi'ru', en uzí'iru' xibē',

en cú'uru'-nē' yöl-la' ba

tu' chibidxín dza laní que yöl-la' rutsaga na'

queē' Bönni' na' náquiē' Bö'cu' Zxíla'do'!

¡Sí' lu nē'ē Cristo nupa néquiguequi queē'!

¡Chinabá'a queēbi' bí'i utsaga ná'alenbi' Lē'!

¡Nácabi' le ruluí'i nupa na' néquiguequi queē'!

⁸ ¡Dios ru'ē-bi' lataj gácubi' lari' nazáca'da'

le naca idú, en rēpi yösa bení'!

Lari' nazáca'da' na' ruluí'i le naca tsahui' núngaca nupa néquiguequi queē' Dios.

⁹ Ní'irö gubáz lá'ayi na' gudxē' neda', gunnē': "Buzúaj lu guichi didza' ni: ¡Bica' bágaca nupa na' nulidzē' Dios légaquiē' para ila'cu'ē laní que yöl-la' rutsaga na' queē' Bönni' náquiē' Bö'cu' Zxíla'do'!"

Gudxē' ca' neda': "¡Yugu' didza' idútē li ni ru'ē didza' Dios caz!"

¹⁰ Buzóa zxiba' xini'ē gubáz lá'ayi na' para tseaj ládxa'a lē', pero gudxē' neda': "¡Biti' gunu' caní! Neda' ca' naca' huen dxin queē' Dios ca nacu' li', en ca nácagaquiē' böchi' luzó'o nazí' lu ná'agaquiē' le naca idútē li ca naca queē' Jesús. ¡Guyéaj ládxe'ē Dios!"

Nupa tuí'i didza' uláz queē' Dios, tuí'i didza' le naca idútē li ca naca queē' Jesús.

Bönni' dxíē'-ba' böa' chiguichi

¹¹ Ní'irö bilé'eda' nayalaj lúzxiba, ate' buluí'i loba' tuba' böa' chiguichi, ate' lē' Bönni' dxíē'-ba', Nu Run Ca Rnna, enca' Nu Ruí'i Didza' Le Nácatē. Caní lē' tu' ruchi'a rusöröē' ca naca le naca idútē li, enca' caní tsejē' gudil-la. ¹² Rēpi yösa bení' guiöj lahuē', le nácagaca ca guí', en dxíagaca icjē' zián le néquiguequi oro. Nazúaj lahuē' tu le lē', le cuntu nu nözi, pero tuzē' Lē' nözinē'. ¹³ Nácuē' tu lari' nē'aj rön, en lē' ca' "Nu Naca Xtídzē'ē Dios." ¹⁴ Röjnógaquiē' Lē' ni'a nē'ē guizxi yu nacu'ē yehua' yubá, dxíagaquiē'-ba' böa' chiguichi, en nácagaquiē' lari' nazáca'da', le naca chiguíchido'os, en bití' naca bösaj. ¹⁵ Rirúaj ru'ē le naca

ca tu guié tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guié, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. ¹⁶ Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

¹⁷ Ní'irö bilé'eda'-në' tuë' gubáz lá'ayi zuinë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Guli'dá, buli'dubi ga ni gáguli' laní zxön queë' Dios! ¹⁸ Gáguli' xipéla'gaca nupa ta'nná bë', en xipéla'gaca nupa ta'nná be'e bönni' röjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bia légacaba', en xipéla'gaca yúgu'të bönachi, nupa biti' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

¹⁹ Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu. ²⁰ Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxi' yé'enë' nupa ni' gulu'i lataj nu uzúaj láhuiguequi lë na' naca bë' dá'gaca lëba', en gula'yéaj ládxi'gaca budó' queëba'. Böa' sínia' na', enca' bönni' na' bë'ë didza' uláz queëba', gula'rú'unë' léguequi nabángacasö ca' ga rö'ö guí' zxön le réguilen lë na' ruzégui'da'. ²¹ Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guié tuchi' na' rirúaj ru'ë, ate' bulu'huóljaba' yúgu'tëba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' zxi'ini guié que lataj chul-la, ate' nu'ë tu du guié yödx. ² Guzxönë'-ba' bëla zxön xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chi gayuá' iz. ³ Yöjchú'unë'-ba' lataj chul-la, en busayjë' lataj na', ate' budë'ë tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixë' yénguequi yugu' bönni' biti' nácagaquië' tsahui' tu' gulún ba nalí queë' Jesús, en tu' gulún libán que xtídzë'ë Dios. Yugu' bönachi ni biti' gula'yéaj ládxi'gaca böa' sínia' na', en budó' queëba', en biti' gulu'i lataj nu uzúaj ra' xigáguequi, o lu në'eguequi lë na' naca bë' nu da' lëba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz, ⁵ pero ia'zica'rö bönachi nátigaca biti' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queë' Dios, enca' queë' Cristo, ate' ila'nná bë'len Lë' chi gayuá' iz na'!

⁷ Cate' izá'a chi gayuá' iz na', ulu'sanë' Satanás ga na' nadzún. ⁸ Urúaj Satanás, en tsöjzxi' ye'e bönachi yugu' yödzö nacuá' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. ⁹ Guizxi yusö gula'dödë' idútë luyú, ate' gula'cu'ë lë'ajlö lataj ga na' nacuá' bönachi néquiguequi queë' Cristo, le naca yödzö na' nadxí'inë' Dios. Ní'irö benë' Dios

ga böxaj guí' le birúaj yehua' yubá, le buzegui' légaquié'. ¹⁰ Tu' xihui' na' nazí' ye'e légaquié', yöjchú'unagaquié' le ga rö'ö guí' zxön que læ na' ruzégui'da', ga na' chizóaba' böa' sínia' na', enca' bönni' na' bë'e didza' uláz queëba'. Ila'guí'i ila'zaca' ni' rëla, en te dza yúgu'të iz zá'gaca.

Ta'dxín bönachi lahuë' Dios ga rö'ë ruchi'a rusöröë'

¹¹ Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en gualaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', læ na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca. ¹⁴ Ní'irö yöjtsázagaca yöl-la' guti, en lataj chul-la ga ni' rö'ö guí' zxön le naca lataj que yöl-la' guti le raca burópilö. ¹⁵ Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'. ² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queëbi' bi'i nigula chizóa utsaga ná'alenbi' tu bönni'. ³ Biyönda' ruí'i didza' nu rnna yehua' yubá: "¡Buli'yútsöca! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi! ⁴ Dios uzxië' nisa ribödxí zoa guiój lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca læ na' gulaca zí'alö."

⁵ Ní'irö Nu na' rö'ö lataj lo ni' gunná: "¡Buyútsöca! ¡Yúgu'të ruúna' cubi!"

Gudxi ca' neda': "¡Buzúaj lu guichi læ ni, tu' naca idútë li didza' ni, en naca löza!"

⁶ Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga guí'aj nisa na' runna yöl-la' na'bán! ⁷ Nupa ila'deli' lu le raca yödzölió, gaca quéguequi yúgu'të læ ni. Neda' gaca' Dios quéguequi, ate' léguequi ilácagaca zxí'ini caza', ⁸ pero nupa tadxi, en nupa biti' ta'yéajlë' neda', en nupa nácagaca xihui', en nupa tuti bönachi, en nupa tun le biti' naca tsahui', en nupa nácagaca udzá', en nupa ta'yéaj ládxi'gaca budó' guiój budó' yaga, en yúgu'të nupa ta'zì' yë', chizóa riböza xilátjaguequi lu guí', ga ni' rö'ö guí' zxön que læ na' ruzégui'da', læ na' naca yöl-la' guti le raca burópilö."

Yödzö Jerusalén le naca cubi

⁹ Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxíga'do' yúdxugaca gadxi yödzöhuë' yöjsétegaca, bidë' ga zoa'. Gudxë' neda': "¡Gudá ni! ¡Ulu'ida' li' bi'i nigula na' si' utsaga ná'alenbi' Bönni' na' náquië' Bö'cu' Zxíla'do'!"

¹⁰ Guzóalenë' Dios Bö' Lá'ayi neda', ate' guchë'ë' gubáz lá'ayi na' neda' tu lu guí'a sibi, en buluí'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. ¹¹ Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu' guiój nazáca'da' ca naca guiój guí'do'os

nazí'i le jaspe. Naca yödzo na' yení'ido' ca naca guiöj jara. ¹² Zoa tu zö'ö zxön, en sibi idú gásibi'ilö yödzö na'. Lé'e zö'ö na' nacuá' chinnu gapa nu riyaza. Ra' gapa nu riyaza na' nacu'ë chinnuë' gubáz lá'ayi tapa chí'ë. Tu tu ga nu riyaza na' nazúaj tu tu lágaca idxinnu cö' di'a dza zxí'ini xi'sóë' Israel. ¹³ Lé'e zö'ö le ruyú saca' ga rilén gubidza nacuá' tsonna gapa nu riyaza, en saca' ga za' bö' ziaga nacuá' tsonna gapa nu riyaza, en saca' tsólá'a ga ridödi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza. ¹⁴ Zxan zö'ö que yödzö na' nacuá' chinnu xilibi zö'ö, ate' l'é'egaca xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca nácagaca gapa nu riyaza, en tsca naca zö'ö que. ¹⁶ Yödzö na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷ Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lë na' ruríxinë' gubáz lá'ayi na'.

¹⁸ Zö'ö na' néquini guiöj jaspe, ate' yödzö na' néquini órotëz, le naca yení'ido' ca naca guiöj jara. ¹⁹ Yugu' xilibi zö'ö que yödzö na' nazí'gaca biquitaj guiöj nazáca'da'gaca.

Xilibi zö'ö zí'alö néquini guiöj jaspe.

Le buropi néquini guiöj zafiro.

Le bunni néquini guiöj ágata.

Le budapi néquini guiöj esmeralda.

²⁰ Le guyu' néquini guiöj ónice.

Le buzxopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxí néquini guiöj crisoprasa.

Le idxinéaj néquini guiöj jacinto.

Le idxinnu néquini guiöj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzö na' néquini órotëz, le naca yení'ido' ca naca guiöj jara.

²² Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazë' idútë yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. ²³ Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na', ate' lësca' Bönni' náquië' Bö'cu' Zxíla'do' náquië' le uzení' ni'. ²⁴ Bönachi yugu' yödzö, nupa nulágaca, ila'dá lu bení' que yödzö na', ate' yugu' bönni' ta'nná bë'ë yödölió idiguá'agaquië' yöl-la' tsahui' quégaquië' lu yödzö na'. ²⁵ Catu caz tsáyajgaca gapa nu riyaza lu yödzö na' lahui' dza, ate' lataj na' catu caz gaca rëla. ²⁶ Bönachi yugu' yödzö idiguá'agaquië' ni' le nácagaca lesaca', en yöl-la' tsahui' quéguequi. ²⁷ Tu le ruá' dö' biti' ca' tsaza ni', en calëga tu le naca xihui', en calëga nu rizí' yë', pero tsázagacasö ni' nupa nazúajgaca lágaca nupa nadéli'gaca yöl-la' na'bán.

22

¹ Ní'irö gubáz lá'ayi na' buluí'inë neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiöj jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. ² Rizá' yegu ni gatsaj lámhu'lö nöza lo que yödzö na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágu'gaca yaga na' nácagaca le tu'ún bönachi yugu' yödzö. ³ Biti' soa ni' nitú le dxía dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'. ⁴ Ila'lé'enë' lahuë' Lë', ate' le nazí'i Lë' nazúaj ra' xigágaquië'. ⁵ Biti' gaca rëla ni', ate' nupa nacua' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacua' ni' ila'nná bë'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para uluí'inë' yugu' huen dxin queë' le ral-la' gácatë. ⁷ Caní rnnë' Jesucristo: ¡Chizóa huöda! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxön. ⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. ¹¹ Nu ruá' dö' guática'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

¹² Rnnë' Jesús: "¡Chizóa huöda! Nu'a lu na'a le nadéli'gaca bönachi, ate' ubi'a que queë'guequi tsca naca le gulúngaca. ¹³ Neda' naca' Nu zoa zí'atëlö, enca' Nu røjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! ¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'zí' yë' ila'cuá' ní'ilö ra' yödzö na'. ¹⁶ Neda', Jesús, gusöl-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxi'ini xi'sóë'. Naca' ca' bölj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'alénbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxí' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹ Lësca' caní, channö nu cúa bítí'tës didza' ni ruá'a uláz queë' Dios, en nazúaj lu guichi ni, Dios ugúë'

ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' lãdxë'ë queëli' yúgu'tëli'. ¡Ca' gaca!